



C. A 9 = 45

~~65-6~~

65-5

x3

Pour

Ms 86-B

n° 125

Le Révérend Père
Dommereau Rect^r du
Noviciat des Jésuites au Séminaire
St Germain

De la part de l'auteur
et de son très humble
et très obéissant serviteur

Veuill^t.

and know us

James M. Smith

Handwritten text, likely bleed-through from the reverse side of the page, is visible at the bottom of the page.


1841

1844

at the bottom of the page


1840

[Faint handwritten text, possibly "P. M. D. S."]



Railler in. et del.

Vallot sculpsit



Domus Probatis Cassis. Soc. Jesu Cat. In k.


LEONARDI FRIZON

E SOCIET. JESU

OPERA POETICA,

LIBRI XXIV.

Cum Orationibus Panegyricis III.





PARISIIS;

Apud SIMONEM BENARD, viâ Jacobea è regione
Collegii Claromontani Societatis JESU.

M. DC. LXXV.

Cum Regis Privilegio.





CELSISSIMO
S. R. I. PRINCIPI
FERDINANDO

EPISCOPO PADERBORNENSI,
COADJUTORI MONASTERIENSI,
COMITI PYRMONTANO,
LIB. BARONI DE FURSTENBERG,
LEONARDVS FRIZON S. 7.



*V A M vere sciteque à Consulari
viro politissimoque autore scrip-
tum sit Plinio, nescire semel inci-
tatam liberalitatem stare, cuius
pulchritudinem usus ipse commendat; id ego,
CELSISSIME PRINCEPS, jam à trien-
nio plane sentio, felicissimaque experientia*

EPISTOLA:

comprobo, perennibus à te donis & beneficiis ornatus. alia nimirum ex aliis neſtuntur, ſpecie varia, honore inter ſe pretioque certantia. Quorum ut exordium hîc debita memoris animi teſtificatione conſignem; funebre carmen olim à me, non ſanè tantam in ſpem, amico datum ita non improbaſti, ut exiſtimationis honorificæ teſtem officioſæque tuæ voluntatis interpretem eſſe jufferis eundem illum elegantiffimum hominem ac diſertiffimum, qui tenuem ingenii mei fetum exhibere Poëtarum Principi non dubitarat. Nec verò ſola judicii & benevolentie ſignificatione contentus, humanitatis etiam pignus ex ipſa Germania in ultimas ferme oras Galliæ certiffimum ampliſſimumque tranſmiſiſti, librum inſignem, atque auctore ſuo, quod inſtar omnis eſt elogii, digniſſimum.

Hîc ego, PRINCEPS OPTIME, quibus exequar verbis, quanta mihi ſit gratiæ tuæ oborta lux; quod Vir tantus, heroica ſtirpe, Pontificum intima conſuetudine, Regum amicitia, Chriſtianarum omnium gentium admiratione, plauſu, præconio celeberrimus, ex

EPISTOLA.

isto rerum fastigio longinquum ignotumque respexeris hominem, ac splendidissimo munere provocaris? Et sane cum à magno Principe quidquid sit muneris profectum, in pretio & honore habeatur: tum si quid ipsa Principis manu elaboratum, profectum industria, venerit; id certe primas thesauri partes jure meritoque obtineat. Quo igitur animi sensu, FERDINANDE, donum istud à me suscipi necesse fuit, quod neque à magnificentissimo Principe instrui ornarique potuerit, nisi pariter ingeniorum doctrinarumque principe? non volumen Poëticum sed ipsam vivam & spirantem Poësin; neque in arctum reorum nature, ut ait ille, sed artis pulcherrimæ majestatem, ex omni parte mirabilem.

Jam illum tuæ liberalitatis primum excurstū quot alia subinde vel humanitatis vel eruditionis argumenta consecuta sunt! littërasne dicam, orationis elegantia, urbanitatis comitate suavissimas? an æterna quæ condidisti, non tam Paderbornensis regionis, quàm excelsæ mentis divinæque Monumenta? Quid recentiora, variis novisque de rebus edita

EPISTOLA.

carmina? quorum blandissimis illecebris, & mirifica munerum tuorum voluptate sic affectus, ita captus sum; ut explicare satis non possim, cui contemplanda vacavi, numeris omnibus absolutam & venustatem operum & dignitatem; aurei profecto seculi germanam imaginem, & secretis veterum autorum vitiis omnibus, meram perfectamque virtutum omnium complexionem. Hanc incorruptæ antiquitatis imaginem absolutissimam, jamtum in juvene spectabilem Roma suspexit: huic nobilissima cultissimaque fasces Academia principatumque detulit. Sed te patria ad alium longe principatum insulasque revocavit; felix regio, quæ tantarum luce virtutum artiumque spectatissimâ formâ gaudeat; tuos afflatus sentiat, tuo vultu & spiritu ad suscipienda celebrandaque Musarum sacra excitetur. Quanquam tu,

Antistes doctorum sancte virorum, singulari benignitate nationem universam comprehendis Poëtarum; beneficiique publici vim & amplitudinem ad remotissimas gentes futuraque secula porrigis. Me quidem ip-

EPISTOLA:

se fortunatum agnosco, cui sponte aditum in Parnassum illum aperueris, quo in summo regnas, idem propositus exemplum, & Poëtis, egregie scribendi ad merita decoraque Principum illustranda; & Principibus viris, amicè splendideque Poëtas fovendi, magistros præconesque virtutis, famæ gloriæque procreatores, ingenue liberalisque voluptatis artifices. At ista pro se quisque Vatum, in laudes tuas undique certatim incumbentium; sive ad summi Patroni gratiam sane parabilem, honesto quodam ambitu captandam; sive ad grati piique animi post accepta dona memoriam illustri testimonio proferendam. Mira certe conspiratio est, ac velut concentus unus totius, quàm latè patet, orbis litterati; quam tibi debet gratiam, referre, quoad licet, egentis. Verùm tam multiplex tamque luculenta commendatio per te Musis adjuncta, FURSTENBERGICI splendore nominis; honorum, quos geris, claritate; factorum scriptorumque præstantia; denique munerum copia, varietate, pretio: tanta, inquam, conciliata Musis dignitas, quibus doctorum ho-

EPISTOLA:

minum studiis & laudibus rependatur? quæ privata de te colloquia? quæ publica elogia? quæ litterarum officia? quæ librorum inscriptiones? quæ symbola & insignia, tantis de nobilissimarum artium genere choroque universo promeritis apte digneque respondeant?

Ego verò, quem tu, PRINCEPS CELSISSIME, plurimum tibi debere voluisti, quo justo præconio litteraria tua dona, aurea numismata, majoraque alia munera in me congesta celebrabo? qua oratione, quo carmine vel datorum beneficiorum laudem, vel acceptorum gloriam agnoscere potero, nedum etiam reliqua tua decora exornare? Morum tuorum ac vite nitorem, an elocutionis candorem exponam? Splendoremne domesticum, Fratrum amplissimorum ornamenta, lectissimam cohortem prætoriam eruditorum, florentissimamque familiam commemorabo? an externam, & longe lateque diffusam in populos tibi subditos, in sanctiores Ordines magnificentiam; neque in Poëtas modò, sed in Historicos, Theologos, aliosque scriptores editam prædicabo? Quid in republica, sacra,

EPISTOLA.

politica, & possis & efficias: qua vigilantia, qua solitudine in gregis tui custodiam & salutem excubes: quàm acre simul & suaue Religionis tuendæ ac propagandæ studium explices; quàm incredibili solertia, liberalitate, scientia, & pondus addente legibus exemplo, difficillima quæque temperes & administres; animas à probro ad honestatem, ab errore ad veritatem fidemque revocandas consecuteris? Denique animi constantiam & fortitudinem, ingenii perspicaciam & ubertatem, divinarum juxtà & humanarum omnium doctrinarum comprehensionem; sapientiam & auctoritatem in Principum atque urbium dissidiis componendis; in excolendo muniendoque templis & arcibus Paderbornensi tractu pietatem ac providentiam, ceterasque tuas dotes persequar, numero infinitas, excellentia singulares? Id quidem non unius epistolæ, sed ingenium Panegyricorum opus. nec nihil aut egerunt, aut tentarunt certè plura jam mea poemata. sed si quid habent ornatus, materiæ acceptum referunt: si quam partem suavitatis; è Mellito, quo tua scatent Monumenta,

EPISTOLA.

*Fonte hauserunt. Si quando haud infeliciter
assurgere audaciâ videbuntur; generosus iste,
sublimis ac sapiens impetus vim aliquam ad-
diderit iacenti animo, & nonnulla sacrae se-
mina mentis asperserit.*

*Neque tu, Principum Eruditissime atque
Humanissime, facili tantum admissione hæc
qualiacunque carmina, identidem ad te ad-
spirantia, dignatus, eorundem per Ita-
liam & Germaniam diribitorem ac promul-
gatorem agere instituisti. Ad ipsum quoque
invictissimum Poloniae Regem de Chocimensi
prælio Epinicion ita meum transmisisti; ut
Heros ille suo jam merito imperatorisque pal-
mis coronatus, & mansuetioribus disciplinis
amicus, cum officium à te sibi præstitum gra-
tularetur, Autoris non ingratum obsequium
testaretur. Quid, quodd Musas simul omnes
meas in lucem, & quidem clarissimam vocasti?
eoque munificentiam contulisti, ut quem istius
judicii, aut favoris potius, majestate supra
spem ac meritum extuleras; mutarum deinde
artium subsidio, sacrisque adeo manibus tuis
in editissima laureati Montis arce collocares?*

EPISTOLA.

Quod ergo à me scriptum, FERDINANDE PRINCEPS, memini, cum ipse mihi primum speciosissimam alloquendi tui necessitatem singulari beneficio tuo & munere impositam voluisti; precari me Deum Opt. Max. ut qui mihi, benignissimo providentiæ ductu, subitam insperate à tanto Principe gratiæ lucem ostendisset, ejusdem insigniter profitendæ celebrandæque gratiæ viam & rationem expediret: ejus me voti compotem novo tuo illustrique beneficio & sentio &) gratulor. Atque utinam, quas solennes consonasque muneri grates ausus eram polliceri; nunc & beneficentiæ isti, & huic incensæ tui studio voluntati non impares persolvam! Atenim novam tum maxime gratiam contraho, cum in referendis prioribus elaboro. Hoc tamen ipse tenuitatem atque imbecillitatem sublevo meam & consolor, quodd tuo in me beneficio sane multos mecum tibi devinxisti. Enimvero si quid ad immortalitatem mea carmina faciunt (quod pro tua eximia humanitate non semel tibi persuasum scripsisti) nonnihil munificentie tuæ maximi

EPISTOLA.

quique temporum nostrorum Principes debuerint. Quod si quid ad morum conformationem, ad cultum ingeniorum & eruditionem hi nostri libri valebunt: nimirum quidquid hinc elici poterit utilitatis, ipsa tibi posteritas debebit. Ac si longius progredi licet, &, quod ingeniosus Poëta cecinit, usurpare;


Nec satis est homines, obligat ille Deos: incrementum aliquod Cœlites per te honoris fortasse receperint, quorum laudibus haud exigua Poëseos mea pars est consecrata: & scilicet gratiam, quam mortales non possunt, ex omni parte perfectam exaggeratamque reponent. Id ego à supremo bonorum omnium autore Deo votis omnibus contendo, cunctis, quod sperare fas est, Superis faventibus, ut tibi felicitatem, quam in tuos clientes derivare soles, novis pro merito perennibusque incrementis accumulet. Interim debitum jamdiu tibi, PRINCEPS OPTIME, laboris Poëtici fructum accipe, tardiores opinione quidem ac voluntate nostra, sed intentiori cura studioque maturatum; venera-

EPISTOLA:

tionis in te meæ , tuæ in me beneficentiæ docu-
mentum. Scriptorem , quem huc autoritate &
benevolentia tua longe accersitum , solida
singularique munificentia complexus es ; nec
paucis , nec levibus aut obscuris præjudiciis
ad fiduciam non improbam excitatum , patere
semper summo iudice , summo Patrono se sua-
que tueri , CELSITUDINI TUÆ ex ani-
mo , certissimoque & immortalis cultu dicata.

Lutetiæ Parisiorum , XI. Cal. Quintil.

M. DC. LXXV.



A D ERUDITUM LECTOREM.

NON otiosam hîc ego præfationem instituo, Erudite Lector, sed utrique nostrum haud inutilem; tibi, ad horum poëmatarum prænotationem quandam universam; mihi, ad consilii factique mei rationem exponendam. Poëtices quidem sive laudatio, sive defensio, multorum exercuit ingenia; pluribusque à me carminum locis ita perstricta est, ut, disjunctas partes si conferas, vim pondusque justî Panegyrici propemodum obtineant. Hîc ea tantum attingam, quæ rei subjectæ propria, simul ad usus Poëtarum latissime patere videantur.

Atque ut primum operis materiem disse-
ram, inde ad formam ipsam tractationem-

PRÆFATIO.

que descensurus : magnam hi profectò librì varietatem argumentorum , summam dignitatem cum suavitate conjunctam offerunt. Nam , ut fileam fabulas historiasque veteres ; novas certe ac temporum nostrorum res , ab annis triginta piè , fortiter , magnificeque gestas , omnes fere complectuntur. Jam verò multa è Theologia , multa è Philosophia deprompta reperias ; de artibus multa , multa quæ ad mores pertineant. Seria & gravia , festiva etiam occurrent & jocularia. Interim virorum , urbium , regionum crebræ laudationes. nec , si fortè , ut mos est , satyrâ delectaris , deest opportuna scelerum insectatio , notatio censuraque vitiorum.

Quem acervum ut aliquantum evolvam , proponamque distinctiùs , vel ad *indicem rerum* generatim exhibendum ; habes hîc , Erudite Lector , septem solidis libris comprehensas res hujus ætatis , ut ante monui , clarissimas , quæ regnante LUDOVICO XIV. contigerunt in Europa. Quanquam & aliis plerisque voluminis hujusce partibus non pauca istiusmodi sunt aspersa ; tum aliquamiscuntur extra Europam cruento edita theatro spectacula. Eminent partæ de Barbaris terra marique victoriæ. Quid Candix obsidio , vel Ostendaræ historiâ , vel Trojanæ fabulâ major & insignior ? quid Cho-

PRÆFATIO:

cimensis pugna, vallarem, civicam, regalem coronam Poloniae Magno Polemarcho Joanni Sobieskio promerita? Quidquid ad artem bellicam, ad urbium oppugnationes & assultus, ad irruptiones in castra munitissima, ad concursus campestrium praeliorum, ad tormenta, cuniculos; ceterasque subterraneorum ac missilium formas ignium attinet, variè pertractatur.

Ecce tibi, præter antiqua illa Francorum Monumenta, & adhuc recentia Justi Ludovici, in Oceano, in Alpibus, in Pyrenæis constituta; efferunt se altiora Ludovici Magni trophæa de Hispanis, de Germanis, de Belgis, de Insubribus, de Turcis, de Sequanis, de Batavis; vastiorque armorum & victoriæ in Hollandia, quàm subinde maris Inundatio. Oculos ad se, credo, rapiunt Currus Gloriæ, tot Galliæ palmas hostiumque spolia circumferens; Nova Fortunata, seu Pacifica Insula; Hymen Regius, Paci adjunctus; Gallia ad Cunas Delphini; supra centena Signa Militaria, ad Senefum triplici foederatarum gentium exercitui à Condæo Principe erepta, à Rege Basilicæ Virginis Matris Parisiensi appensa. Hæc sane admiratione defigere animum possint, si quâ debent, elegantia, & majestate repræsententur. Neque, ut spero, segniter audies Protrepticon ad Princi-

pes

PRÆFATIO.

pes Christianos, non sonum inanem, sed gravitatem, quæ Sacram Expeditionem persuadeat, rationum. & verò libenter, pro tua æquitate, Vestphalam audies Liberatam; Principi Ferdinando, non sine debita Turenæo laude, gratulantem. Age, quid splendidius Christianæ, post Sueciæ regnum abdicatum, Romana profectio, Voto Lauretano, in Galliam adventu, pompaque triumphali? quid luctuosius (sed partem habet voluptatis poëticæ dolor) Annæ Augustæ, Ducis Longavillæi, Lazari Mocenici Venetæ classis Præfecti, Nicolai Comitis Serini, aliorumque illustrium virorum & adolescentium Epicediis? quid Exercitationibus Regiæ Pueritiæ speciosius? quid Aula Sereniss. Delphini, eruditionis regno, ornatus? Adde multiplici elogio celebrata Ducis Enguinei facta, Parentis invictissimi fortitudinem heroicam referentia: adde Richelii Cardin. opera posthuma, perpetuos ex hæresi triumphos relatúra.

Num à me tibi, Lector, indicari Furstenbergica mea necesse est? vidisti jam à primo aditu librorum, unde profecta, quò referatur hæc operum nostrorum editio. Patroni honores non Poëmatis modò, sed etiam Symbolis insculptos volumus. Jam Alexandri VII. conservatas laudes propagatasque vel celeberrima in Ferdinandum, Cubicu-

PRÆFATIO.

larium quondam Intimum, benevolentia exigebat. Atque istis omnibus, quæ commemoravi, magnis nominibus sua cuique propria, plura etiam plerisque inscripta sunt Poëmata.

An verò Urbanum suum omittere Musæ potuissent? an Continuum Principem, lumen litterarum, ut cetera nunc taceam, & ingenii miraculum? cujus florentissimi Liberi, & ingenio, & forma, & incredibili ad omnem laudem indole spectatissimi, regia felicissime adolescunt disciplina. Infinitus sim, viros summos, quorum his libris encomia intexuntur, si percensere velim, Carolos, Godefridos, Scanderbegos, Henricos, Torasios, Rupifucaldios, Vladislaos, Casimiros &c. tum alios, magno Franciæ bono, magna seculi gloria viventes; quos malim suo quemque loco suspici, quàm hîc minus ornatos apparere.

Nihil de altera generis Epidiæci parte loquor, quæ in reprehensione versatur; acriter in rebus, non acerbe in personis, tractatâ: nihil de Colorum inter se jocosa contentione; nihil de Fæstis Ignibus, de Tudicularibus Ludis; nihil de Mothæo Prætorio, de Agrorum, de Fontium amœnitate; nihil de Iride, de Terræ Motu, de Fulmine: quæ singula propriis opusculis continentur. Nam rerum, quarum incidunt passim def-

PRÆFATIO.

criptiones, ut solis variorumque siderum, ut avium & quadrupedum, ut florum & animalium, ut iconum & aulæorum, ut sphaeræ tabularumque geographicarum, ac similium vis innumera. Denique in his Poëmatis, Panegyrica, Eucharisteria, Epinicia, Soteria, Propemptica, Epithalamia, Genethliaca, Epicedia, Bucolica, Didascalica, Parænetica invenies, aliaque non pauca; ut intelligas, Musis nostris nullum ferme intactum esse rerum genus honestarum.

Ac res planè sacras, Erudite Lector, si quæris, abunde suppetent: sin fortè nitescere Poëtica tractatione posse diffidis, ades, quæso, parumper facilis, abjectoque ad tempus præjudicio, integrum æquumque præbe te mihi gravissimæ causæ disceptatorem. Equidem sæpe sum vehementerque admiratus, quid esset, cur in pia poësi nonnunquam homines, etiam non mali, fastidiant. Nam sive utilitas est poëtæ proposita, sive jucunditas, sive utraque; in quo perfectionem artis constituit Horatius: ad eum finem consequendum summis instructa præsidiis hujuscemodi poësis videbatur. De utilitate profectò nemo sanus dissenserit, cum piis carminibus & honos habeatur Superis, & vitæ sanctitas informetur, & vera sempiternaque beatitas pariatur. Circa delectationem intenditur calumnia. atenim

P R Æ F A T I O.

sinceram voluptatem cum adeo pietas non excludat, ut ipsa per se deliciis perfundere animos soleat; sic statuo, non penes materiem culpam residere, si quando suo sapore Christiana poësis destituatur; sed aut scriptoris esse peccatum, aut lectoris: illius, argumenti præstantiam si vilitate ingenii deterat; hujus, si nausæa quadam animi suavitatem oblatam probi sacrique carminis parum sentiat.

Fuit illa Gothicorum temporum infelicitas & barbaries, ut sancta dehonestaret argumenta; posterosque in eum induceret errorem, ut inepta poëtico lepori existimarentur, quæ tam sinistrè fuissent aliquando tentata. Sed jam olim, ac deinceps improba lascivaque ingenia cum sibi majorem in modum placerēt indulgerentque concinnandis suis lenociniis; tum aures patulas & paratissimos animos nacta, quibus influerent exquisitis corruptelarum illecebris, nimirum & suâ & alienâ nequitiâ triumpharunt. Nunc *horridus ille defluxit numerus*, ubi politissimi scriptores omnem in piis rebus amœnitatem explicarunt: ac si qua pars est mysteriorum, necdum satis exulta Poëticis studiis; usquamne fructuosius collocari possit labor, aut industria exerceri? Superest, ut mutata ætate mens ipsa mutetur; & quæ voluptas è cœno carminum tantò scedio.

*Non eadem est
etas, non mens.
Horat. ep. I.*

PRÆFATIO.

rum , quantò in flagitiosis rebus elegantiorum , certissima cum perniciè petebatur , ea nunc uberius feliciusque è liquidissimis expiati Parnassi scatebris hauriatur.

*Dulcius illimis purâ fons emicat undâ ,
Castalius niveos qualis perfundit olores :
Gratior affulget nullo fax sordida fumo ,
Phœbea innubem qualis collustrat Olympum.*

Enimvero ubi castius amor & lætius ardeat , quàm in divina specie quærenda & complectenda ? quid amabilius imagine Sponsi cœlestis è Canticis expressâ ? *O quam pulchram faciem !* (ut Senecæ verba usurpem) *quàm sanctam ! quàm ex magnifico placidoque fulgentem* videas ! jam Virtus , jam Sapientia , jam Divinitas , quod Philosophorum spes ac vota superat , oculis obversatur. Neque te , Lector , ut spero *hanc faciem altiore fulgentioreque quàm cerni in humana consuevit* , utcunque delineatam pœniteat in Theandricis uno alteroque loco aspexisse. Amavit se Virgilius in canendis Elysiorum camporum deliciis. Num Christiano Poëtæ maligniorem subjicit elegantiae segetem *Hortus ille voluptatis* , quem in Epithalamio Regio , quem in Josaphato Indiæ Principe descripsimus ? Nusquam largiùs divitem venam Horatius , quàm in Fortunatarum Insularum laudem effudit. At eum sic nos imitati su-

PRÆFATIO.

mus eodem carminis genere , in beatissima quæ triumphantem Deiparam excepit , regione depingenda , ut plura nobis è sacris litteris majoraque affluerint commoda , quàm illi fabularum omnis suppeditare copia potuerit.

Nec verò in illa profanæ miseræque antiquitatis caligine non viderunt & Græci & Latini Poëtæ , maximam è rebus divinis conciliari Poëticis operibus majestatem. Inde à Jove capienda primordia edixerunt : inde toties *Deus è machina* ; nec tantum , ubi *dignus vindice nodus incidit* , sed passim ac promiscuè , ornatûs & autoritatis gratiâ. Ergo illi commendationem suæ Poësi à superstitione , crebraque inanum & commentitiorum Numinum invocatione ac prædicatione duxerunt : Christiani ab omni sacrorum commemoratione , tanquam funesta contagione ac labe , artem divinam removebunt ? Non omnem prorsus , inquierunt mitiores Aristarchi , sacrorum attrectationem , sed multam nudamque prohibemus. Parcè ista raptimque adhibeantur ; non efferant se , non extent ; obrepant in turba , fallant oculos ac prætervolent. Atqui non ita veteres timidè suis de sacris egerunt ; nec furtim ac dissimulanter ; & quasi rerum puderet pigeretque divinarum , sic eas multitudine humanarum obrutas voluerunt. neque iis tan-

PRÆFATIO.

tum carmina sua, perinde ac quibusdam insignibus distinxere. libros ipsos falsis illis religionibus contexuerunt; haud veriti, satis ut grata poësis esset, si theologica religiosaque appareret. Atque ut paucos è plurimis proferam; scripsit Hesiodus Theogoniam, scripsit hymnorum in Deos volumen Callimachus. & verò

Musa dedit fidibus Divos, proximam propriamque materiem, Horatio teste sanè idoneo. Quid Ovidius? quam gloriose fabulatur in Fastis: ac nominatim sub exordium libri VI.

*Fas mihi precipue vultus vidisse Deorum,
Vel quia sum vates, vel quia sacra cano.*

*Ius tibi fecisti Numen cæleste videndi,
Cum placuit numeris condere festa tuis.*

Et delicata superbaque metuam fastidia, si quod & nomini Christiano, & propriis vitæ meæ institutis congruit, profitear; si Poëticorum operum partem aliquam divinis rebus consecraro; si quid in festos solennique cultu consignatos dies edidero? Tibine, Lector, monstra illa portentaque Deorum potius, quam Beatarum Mentium Hominumque Sanctorum decora arrideant? mihi ne de vera & augustissima Theogonia silentium indixeris? At generationem ejus quis enar-

PRÆFATIO.

rabit? quis enimvero æternum illud arcanum Verbi Divini prorsus evolvere, aut etiam temporarium ortum explanare pro dignitate possit? Sed cùm illa Evangelici Vatis admiratione, non interdicti denunciatione, cohibiti deterritique non sint aliarum facultatum scriptores ab utraque Dei & hominis Christi generatione vel disputationibus theologicis, vel asceticis commentationibus, vel oratoriis laudibus prosequenda; Poëtis venerationem summo Religionis mysterio nefas erit adhibere?

Ex Hieron.
sententia in
Epitaph. Ne-
potiani.

*Publica vox orbis, Christus. jam barbara passim
Stridorem fregere suum cœlestibus ora*

Ex Apocal.

*Eloquiis: prædulce Crucis decus omnia cantant.
Fulguribus misti sonitus citharæque tubæque,
Et vitrei Oceani confusâ murmura flammâ
Ingeminant, totoque audita tonitrua mundo.*

Ambros.

Soline obmutescant Poëtæ in communi rerum & universo concentu? Non minuit, sed auget veritas admirabilitatem. Quò enim spectat fictio Poëtica, nisi ut quam res ipsa non suggerit, admirationem excitet fabula? Si ergo res per se magnifica & admirabilis existit; si *major ambitioso mendacio simplex veritatis fides*: cur operosè minora tandem veris & ultro se offerentibus machinare miracula? quin tu Aristotelem audias, Poëtices ista à veritate immania dissidia tollentem: nihilo-

P R Æ F A T I O.

que minus Poëtam esse, qui facta tractet, aperte diserteque pronunciantem. *Factorum enim aliqua nihilesse vetat ejusmodi, qualia sit verisimile fieri, ac fieri posse. & horum ille ratione Poëta est.*

Atenim sacris argumentis verisimilitudinem detrahunt, qui suam profanis asserunt; parum attendentes, quos in laqueos difficultatum, quàm inexplicabiles, sese induant. Itane verò credibilia veterum de Diis commenta, quàm Religionis Christianæ mysteria? quod aures piæ dictum perhorrescant. Sed omissa contentione sacrosanctæ veritatis cum nefaria superstitione Deorumque farragine, quam veri speciem, quem colorem in absurdis turpissimisque fabulis de Jove ceterisque fictis Numinibus exhibebunt? Tam fœda certe de suis illis Diis excogitarunt antiqui Poëtæ, tam detestabilia cecinerunt, homini ut inimico, quod ait Isocrates, talia objicere nemo audeat. Neque enim tantum Sancti Patres, aliique Christiani autores probi & eruditi, colluviem illam spurcissimam fabularum damnarunt, quam *flumen Tartareum* gravissime vocat deploratque Augustinus; sed vel Ethnici scriptores propudia illa sordesque infectati sunt, pœnasque impietatis à malis vitiis repetitas censuerunt. Non hîc ego singula, quæ Diis improbè afficta fuerint,

PRÆFATIO.

enumerabo , ne infinita , ne inverecunda sit oratio. furta , bella , fugas , vulnera , ceteraque imbecillitatis aut levioris nequitiae prætereo. unum hoc , magno cum Augustino , premam ; & *tonantem Iovem & adulterantem.*

Jupiter infamat seque suamque domum.
Propert.

*Fulmine qui rapido concussum exterruit orbem ,
Flagitiis violat terras , incestat Olympum ,
Idem ultor pariter scelerum & fœdissimus auctor.*

Cl. Tusc. X.

Quid afferent profanæ antiquitatis defensores , quo verisimilitudinem obtineant ; quo chorum omnem Vatum Ethnicorum , ipsumque adeo principem excusent Homerum ? de quo si Dioni Chrysostomo credideris , tantum abest à probabilitate , ut projectus sit & mortalium audacissimus ad publica manifesta que mendacia. Video , quò confugiant , ubi se jactent. omnia videlicet recipit sustinetque allegoria. Sed age , utrum existimas probabilius , crocodilis & draconibus nomina Deorum , an Diis hominum facinora flagitiaque imponere ? *Fingebat hæc Homerus , & humana ad Deos transferebat. divina mallet ad nos.* Pugnas tu mihi elementorum causaris , aliaque effecta naturæ , speciosis obvoluta integumentis. At supremam , rerumque moderatricem naturam quid erat quod impudentissimis commentis implicatam dedecorares , atque ad extrema quæque

PRÆFATIO.

flagitia abjiceret? Si cautum artis doctores voluerunt, ut ne similitudines indecoræ magnis & fortibus viris applicarentur; si hoc ipso nomine reprehensus est Homerus, quod Ajacem humili & indigna cōparatione depressisset: quid eidem facias, obscœna in Deos & nefanda reapse conjicienti? An si Jovi Olympio Phidias vultum finxisset monstrosum, Græciæ inventum illud suum probare potuisset? castigatissimam effigiem augustissimamque sculptor scientissimus elaboravit. Fac, si vis, ex HomERICA, ut aiunt, descriptione pulcherrimum istud celeberrimumque simulacrum expressisse. Magnifice Homerum de Jove nonnunquam scripsisse, facile concessero. sed ubi ratio decori, vel in scena observandi?

Ne quicumq; Deus, quicumque adhibebitur Heros, Horat. in Arte Poët.

Regali conspectus in auro nuper & ostro,

Migret in obscuras humili sermone tabernas.

En ille Tonans, ille Divûm atque hominum Rex,

Omnia transformat sese in ludibria rerum;

in avium & ferarum species transmigrat, ardens libidine, cupiditati serviens: & qui jam princeps Deorum inceserat, è Jove non Satyrus modò personatus, sed taurus, sed anguis, apparet, ut fucum faciat, ut vim inferat, ut flagitiorum omnium princeps & signifer agnoscatur. Atque hæc ego Religionis causâ, non animo criminandi nota-

PRÆFATIO.

rim, summorum alioqui Vatum observantissimus; quorum est ille miserandus error, tunc popularis & plausibilis. quanquam ipsi pestiferam superstitionem dulcibus numeris aluerunt; & quasi Circæum poculum, melle aut nectare poëtico mistum, gentibus propinarunt. Fortunati nos, Evangelica luce collustrati, Divinæ Sapientiæ oraculis instituti, homines Christiani; si modò bonis uti nostris sciamus, *pii Vates & Christo digna locuti*. Jam & humana ad Deum, longe aliter quàm fingeatur ab Homero, translata sunt; & divina ad hominem plenius ac præstantius, quam optabatur aut capiebatur à Cicerone.

Nunc superioris meæ disputationis hæc summa sit, perperam & iniquè verisimilitudinem abrogari sacris & Christianis, dum profanis Ethnicisque vendicatur argumentis. Quod si quid ad purgandum Homerum ceterosque superstitionis & fabularum inter se pugnantium cantores valet communis eâ ætate vulgi persuasio; non valebit ad necessariam Vatibus religiosis probabilitatem sanctissima fides populorum, tot tamque certis fundamentis à tot jam seculis constituta? & illa quidem *credibilitatis*, ut vocant, argumenta clarissima, in Christianæ Triumpho, in Sacra Oeconomia, in Ode ad Fidem conglobantur; ac Mysteria ipsa libris ali-

PRÆFATIO.

quot celebrantur, utinam pari tua, Lector;
ac scriptoris voluptate.

Sed quoniam voluptatis è piis capiendæ carminibus recurrit mentio; Sacræ, quam effinximus, Solitudini suas nemo, ut reor, delicias abjudicarit; nemo Christum cœlo invectum, similiaque argumenta, veluti morosa & tristia relegarit. Cruciaturum autem Servatoris, tormenta inferorum, aliaque generis ejusdem, utique ciendæ oblectationi minime apta quis non existimabit? Quam ego difficultatem ut prorsus enodem; hoc primum statuo, cùm agitur de Poëtica delectatione, non titillationem sensûs quæri, non risum & gestientem lætitiâ. Est illa Maximi Tyrii sententia, male mereri de Homero, si quis eum in canenda Heroum virtute voluptatem spectasse opinetur. sic enim primarium Vatem in ordinem redigi lascivorum & bacchantium; quibus ex hac parte sit inferior. jucundum eum sanè, sed pulchriorem quàm dulciorem, & laudî quàm voluptati propiorem. Facetiis est interdum locus in Poësi; luditur sæpe in epigrammatis, in satyris: & aliquid hi libri supeditabunt ejusmodi. sed oblectatio, quæ totam in Poësin pertinet, ex ingenua nascitur pulchritudine; narrationum, descriptionum, motuum varietate gratiaque efflorescit.

PRÆFATIO.

Suavitatem Cicero probat *austeram & solidam, non dulcem atque decoctam.* itaque prudenter atque ex arte monet; vel Poësis vel oratio, *ut gravis, ut suavis, ut erudita sit, ut liberalis, ut admirabilis, ut polita; ut sensus, ut dolores habeat. in toto spectantur hæc corpore.* Vides nominatim requiri dolores à Tullio? nec minùs ab Augustino. qui posteaquam hoc generatim posuit; *Pati vult ex luctuosis atque tragicis dolorem spectator; & dolor ipse est voluptas ejus:* tum de se testatur; *dolere amabam, & querebam ut esset quod dolerem; quando mihi in ærumna alienâ, & falsâ & saltatoriâ, ea magis placebat actio histrionis, meque alliciebat vehementius, qua mihi lacrymæ excutiebantur.* An verò quidquam apud Oratorem nobilius actione illa de Navarchorum suppliciis, ac præsertim de cruce Gaviana? & erunt, qui necem Crucemque Liberatoris Opt. Max. negent satis habituram in Poësi splendoris & dignitatis? Quid apud Virgilium Ætna, Polyphemo, tempestate spectabilius? quid excidio Trojæ, funestisque aliis casibus graviùs altiusque cantatum, maximè pœnis inferorum? quas etiam ceteri Poëtæ, data opportunitate, libenter, amplè, magnificeque commemorant. & Christiana Poësis vocabitur in invidiam, si non meras veneres loquatur, si quid grande & arduum objiciat, si quando veros inferos ad terrorem compo-

PRÆFATIO.

sita exprimat? In pictura, cui Poësis confer-
tur, non tantum floridæ areolæ, prata rivu-
lis intercisa, nitida illustriaque prætoria de-
lectant; sed locorum aspectu desertorum,
asperis montium rupibus, præcipitantibus
aquis, urbium palatiorumque ruinis graphi-
cè propositis, diutius etiam quàm illis mol-
libus illecebris clarisque coloribus tenearis.

Quid, quòd ea quæ primâ facie horrida
videantur argumenta; & suavitate motuum,
& verborum elegantia, rebusque exquisitis-
simis perinde ac vermiculatis emblematis
hilarantur? Librum certe in Christi suprema
septem Effata, & Odas aliquot in acerbissi-
mos Domini cruciatus, descriptiones variæ,
affectus, aliaque multa sic imbuerunt ac
temperarunt, nihil ut me quidem teneriùs ac
suaviùs meorum afficiat. Neque inscriptio-
nes Poëmatum omnia præferunt; ac multa
reperias inexpectata; & novis antiqua, &
antiquis nova citra perturbationem admista.
In Parthenicis non Gregorios modò, Cy-
rillos, Ildephonfos, Bernardos, ejusque
generis viros sanctos & pacificos; verum
etiam Constantinos, Theodosios, Clodo-
væos victrici pietate suspicias triumphan-
tes. ibi Ludovicum Justum admirere, cultûs
regii clientelæque Marianæ præmia colli-
gentem.

PRÆFATIO.

*Attonitam Europam, Rhenumque in vincla petitam,
Oceanumque jugo fractum, domitasque procellas,
Calcatasque Alpes & nubila Pyrenæa.*

Ibidem Ludovici Magni vel ductu, vel auspicio,

*Tot fusas campis acies, gentesque subactas
(Namque urbes memorare parum est) tot signa superbis
Fixa tholis, sacri monumenta æterna triumphis.*

Iisdem Parthenicis res quoque intextæ Polonicæ, novique Regis victoriæ; tum aliorum elogia Principum cœlesti Reginæ addictorum; ac plurima rerum magnarum & insignium documenta. Quarum profectò rerum occursum dilui possit abstergique vel alienissimorum à pietate fastidium. Sed, ut præclare Lactantius de vero cultu l. vi. *si voluptas est audire cantus & carmina, Dei laudes canere & audire jucundum sit. Hac est voluptas vera, quæ comes & sociâ virtutis est.*

Neque est, quod ullius animum à divinis rebus, aut suspicio difficultatis avertat, quasi mysteriorum gravitate obruendum; aut species religionis impediât, velut ad primos augustissimorum penetralium aditus horrore perfusum. Equidem sat scio, eum qui circumseptam inaccessâ luce majestatem temere arroganterque scrutetur, illo tantæ gloriæ splendore opprimi atque occæcari. sed qui, duce Fide, sacrorum autorum vestigia secutus, erigat se venerabundus ad mysteria,

non

P R Æ F A T I O.

non rudis alioqui, non imparatus à Poetica facultate; excitabitur, mihi crede, attolletur ipsa materiæ sublimitate. sic enim se ratio habet eloquentiæ, ut docet III. de Oratore Tullius. *si est honestas in rebus ipsis, de quibus dicitur, existit ex rei natura quidam splendor in verbis.* quantus igitur è rebus divinis eluceat, necesse est? Quod si summus hic eloquendi artifex fatetur se oratorem, *non ex Rhetorum officinis, sed ex Academia spatiis extitisse;* nihilne Theologiæ sacraria, sanctiorumque monimenta litterarum ad Poeticam suppellectilem conferent? Quanta sit ejus quæ sacrosanctâ Scripturâ cõtinetur, Poeseos divinitas; exemplis nonnullis Mosæorum Davidicorumque carminum ostendit Panegyricus in Poemata Celsiss. Princ. Ferdinandi. Psalmos etiam integros aliquot verticeorum alibi splendidissimas tessellas inserui. ex aliis item sacris Vatibus varia variè transtuli. quæ materies si caret eo dictionis præparatæ ornatæque subsidio, quod Latini Poetæ subministrant versuum genera commutantibus; at rerum præstantiâ spirituque illo cœlesti gaudet, cujus ad majestatem nemo profanorum adspiravit. Nec dubitabo, ad hujus veritatem sententiæ confirmandam, ex hoc seculo testem excitare, sed cui superiora paucos vel singulis facultatibus, nedum admirabili scientiarum omnium complexione pares tu-

PRÆFATIO.

Iere. is est Dionys. Petavius, qui epistola ad Urbanum VIII. Paraphrasi Psalmorum Græcæ præfixa, in hæc verba mentem suam aperuit. *Omnes qui apud Græcos & Latinos Poëtica laude præstiterunt, uno eoque perexiguo libro adeo David antecelluit, sive sententiarum dignitate ac pondere, sive etiam elegancia, venustate ac dulcedine, ut insulsa & incompta reliqua videantur omnia, sic cum uno illo comparentur.* Ne quem verò sollicitum habeat Mysteriorum obscuritas; vel popularis rerum Christianarum cognitio satis fuerit ad omnia fere sine labore percurrenda. ac si quid reconditoris doctrinæ occurrat, umbra tamen & recessus partem habet splendoris: extimus obviussque sensus implendæ menti sufficit ornatuque Poetico delectandæ.

Hactenus sic egisse mihi videor & auctoritate & ratione, ut evicerim, præclarè cum Poesi piis argumentis convenire; eadem ita & jucunda & utilia, ut allicere te potius, Erudite Lector, debeant, quàm abstertere. Si tamen alia quæris argumenta; de bello, variisque suprà indicatis rebus plura succurrant millia versuum, in quibus oculos ingeniumque occupes. Neque obfuerit sacrorum & divinorum tractatio mortalia civiliaque meditati. ut enim sapientissimè verissimeque dictum à Tullio est; *omnia profectò, cum se à celestibus rebus referet ad humanas, excelsius*

PRÆFATIO.

magnificentiusque & dicet & sentiet. Ceterum quæ Poemata de rebus ætatis nostræ conscripta sunt, adhuc recentibus, aut veniæ aut gratiæ minùs opportuna accident jam quasi flore amisso novitatis. multa singillatim edita volitarunt: memorisque hîc animi testimonium debeo, illata editionis mentione, Julio Card. Mazarino. Oblata sibi rerum ingentium, quarum Administer fuerat, præconia sic accepit; ut Currum Gloriæ (posteaquam in lucem è Regia Lupaeræ Typographia prodierat) Lugduni, quò tunc Aula concesserat, recudi juberet, ejusque supra ducenta exemplaria in Italiam transmitteret. mox Insulam Fortunatam, quæ (ut erat ab Autoris manu) Pacificatori è Pyrenæis Tolosam primùm adeunti, reddita fuerat, ipse datis ad illustriss. Seguerium Franciæ Cancellarium litteris commendavit; ut, quo tempore in vulgus Acta Pacificationis edebantur, instrumentum Pacis illud quoque Poeticum Lupaeræis typis excuderetur plura Eminentiss. Principis officia subjectis ex optibus intelligentur. Atque is ego sum, qui specie quavis gratiæ movear; neque grati animi sensum extinguere morte de me aliquando bene meritorum patiar. Nec verò injucunda tibi, Lector, esse debet rerum admirabilium Poetica renovatio, quas avidè solet repetere ab historia posteritas. neque à tua

PRÆFATIO.

vel prudentia petendum, ut temporis quod quidque scriptum fuerit, habeas rationem: vel æquitate; ut si cui forte nomini parum sis amicus, cum libro ne simultatem exerceas. Virum potius imitare primarium, cujus ad gratiam aditum mihi aperuit Poema, quo viderat sibi adversum Principem quàm altissimè elatum: optavitque pariter sibi carmen ab eo, quem satis nosset partium esse nullarum; sed benevolos & faventes sibi, quamvis inter se graviter dissidentes, idoneis libratisque officiis prosequi & ornare, quàm posset amplissimè.

Venio nunc ad formam operis, quam ex occasione jam circa res sacras delibavi. sed quod reliquum est proposito meo, quasi punctis conficiam, cùm aliquanto me longius quàm animo destinaram, superior disputatio provexerit. Atque ut ab externa forma incipiam, & universam dispositionem breviter oculis tuis, Lector, subjiciam: Poësin hanc (cujus haud uno libro, jam inde à scriptoris adolescentia, variaque deinceps minorum voluminum editione specimen apparuerat) nunc, quantum è re judicavi, collectam, & multorum accessione carminum locupletatam excultamque, totam in quatuor divisi partes; partes singulas in libros sex. quæ ita re ipsa Typographicaque operâ conjunctæ sunt, ut vel solvi possint sejungi-

PRÆFATIO.

que in tomum duplicem, justo & pari utrumque numero librorum duodecim; vel omnino separatim haberi circumferrique singulæ commodiùs. priorem tomum Heroica, Theandricaque annexis Parthenicis; posteriorem Lyrica Silvæque constituunt. Heroïcon verò, à materia inscriptorum, nomine Theandrica Parthenicaque comprehendere nolui, ne quis mihi fortè Scaliger, ut olim Bēbo (potuit & Vidæ) litem intendat. etsi hac quidem ratione in Christum non male convenire nomen Heroïs videretur; quod Heroes antiquitus vocarentur altero parente Deo, homine altero procreati. Sed quemadmodum viros, seu morali, seu Christiana virtute præstantes, Heroas Poeticè vocavi; sic ab iis Deum-Hominem ejusque divinam Parentem secretos volui. Reliquas partes geminas à forma carminis appellavi; Lyrica, ut patet; Silvas etiam, ut placuit cum antiquis, tum novis autoribus festinatos versus hocce vocabulo designare. Jam ex his libris tres quidem Parthenicon, hexametro scripti (nam quartus, itidem ut Theandricon, Lyricus est) perpetua sunt serie contexti. divisis ceteri constant operibus; ad unum tamen plerique caput referuntur.

Est præterea genus Poematis multiplex, neque solum ratione carminis, ut Heroïci, Melici, Elegiaci; sed etiam intra unam ean-

PRÆFATIO.

demque speciem versûs, tractationis ratione
 diversum; ut in hexametro alius sit Epici so-
 nus, alius Bucolici; sua Panegyrico, sua
 Exegematico certa vox. ac nimirum, ut vestis
 corpori, sic est aptanda rei oratio. Nota
 sunt illa: *humilia subtiliter, magna graviter, me-
 diocria temperatè, nec satura jejunè, nec grandia
 minutè.* Atque idem, qui hæc scitè tradidit,
 ubi venit ad Paradoxa, *non est tale*, inquit de
 hoc opusculo, *ut in arce poni possit, quasi illa Mi-
 nerva Phidie: tale tamen est, ut ex eadem officina
 exisse videatur.* interim hujus ipsius opusculi
 lucubratione probat ea quæ sua sponte squal-
 lida & spinosa sint, orationis adhibito cultu
 enitescere. quid? Maronis locine omnes ejus-
 dem sunt dignitatis & pretii? quid? Odæ
 Flacci, parisne omnes majestatis? Plinius ju-
 nior de scriptis suis agens, hanc legem sta-
 tuit. *Sapiens subtilisque lector debet non diversis
 conferre diversa, sed singula expendere, nec deterius
 alio putare, quod est in suo genere perfectum.* Quæ-
 dam ita sunt inelaborata, ut satis ferè sint
 elaborata, *paucis senium confertur & horis* (ut
 Lucani verbis utar,) sive felici mentis impe-
 tu & afflatu cœlesti, sive acerrima cura &
 consuetudine, temporis iniquitatem com-
 pensante. Quamobrem nec Poeta, cum in-
 æqualitati se accommodat argumentorum,
 sibi parum æqualis habendus est, sed varie-
 tatis gratia commendandus: neque opera,

PRÆFATIO

festinationis nomine, statim aut laudanda aut reprehendenda; cum inelegans vitiosaque celeritas meritò explodatur; & felicitas puræ ac profluentis venæ non sit certe probro vertenda. Brutæ quidem gemmæ artificis manu expoliuntur laboriosè: at ipsa naturæ vi simul erumpunt solis radii, simul emicant, tametsi splendidiùs vibrare, acrius intorqueri è summo cœlo videantur. De me hoc ego ac de meis carminibus ingenuè dicam; non eâ semper quâ multi putant, facilitate mihi versus fluere. opus est sane peculiari motu aliquo beneficioque divino; ut omnis cecinit antiquitas, ad grave plenumque carmen fundendum. Versus autem meos, quamvis magnam partem sint properati, neglectos tamen ausim negare; quos si non *multa diès*, at plerumque *multa litura coercuit*.

Liceat mihi per te, Lector, ad observationes nonnullas descendere, primo quidem aspectu leviores, sed unde tamen præstantia carminis perfectioque existat. simul his reddetur instituti cujusdam mei ratio, formæque circa structuram metricam Virgilianæ pars explicabitur Poeticæ studiosis. ac nihil in hac parte nimium duces, si Aristotelis Rhetorica Tullique pervolveris. ea certe solertia Maronis diligentiaque fuit, ut delictum haberet non modò solidarum vocum, sed etiam litterarum, ac singulari judicio

PRÆFATIO.

convenientissimas rebus adhiberet. quod u-
no alteroque exemplo adstruam non dubio.

Mollia luteola pingit vaccinia caltha, ecl. II.

Quàm rari sic pinxissent! ac non potius, *lu-
teolis calthis. & ; mixta rubent ubi lilia multa.*

Albarosa, XII. Æneid. ecquid apertior foret
distinctiorque oratio, *ubi lilia multis albarosis?*
sed tanti fuit istiusmodi suavitas ex crebrita-
te primi elementi, ut eam vel aliqua oratio-
nis ambiguitate captare vir intelligentissi-
mus non dubitarit. Quid de versibus dicam
in speciem asperioribus? qua idem arte,
quanto judicio in IV. Æneid. venustatem post
habuit dignitati!

Nec Saturnius hæc oculis pater aspicit equis!

Ac ne fortè imprudenti excidisse Virgilio
præfractum numerum existimes, eundem
usurpat in V.

Tum Saturnius hæc domitor maris edidit alti.

Fuisset utique mollius; *Nec pater hæc oculis Sa-
turnius; Tum maris hæc domitor &c* Sed aures
eruditæ sentiunt, cur sibi in hoc numero ab-
rupto minusque concinno placuerit divinus
Poeta. ejusdem modi versum reperias Par-
then. I. III.

Tantâ mole sub ætherias attolleris auras.

Potuissem equidem, ac nisi aliud certa ratio
persuasisset ad dignitatem carminis, planè
scripsissem; *Tanta mole gravis superas consurgis
in auras.* Quantò lenior item ea commissura

PRÆFATIO.

molliculis auribus acciderit;

Nec famulos Orco pateris concurrere inermes!
 quàm, *Nec pateris famulos Orco concurrere inermes.*
 Hanc ego tamen posteriorem formam præ-
 tuli ad pugnae concursum ipso litterarum
 concursu exprimendum: ut Virgilius xi. *his*
decurt mecum concurrere telis. De classis Vene-
 ræ Præfecto, Heroic. l. iv. in fine carminis,
quonquam gravis ævo, malui, quàm, *obitus ævo;*
 quod erat plenius; ut ipsa versûs inclinatio
 devexam ætatem referret. Parco pluribus
 exemplis & autoritatibus. sed hæc apud mul-
 tos mihi necessaria cautio, iisdemque non
 inutilis. Omnino sic habeto, Lector, à me
 nullam ex necessitate licentiam usurpatam,
 sed ad elegantiam, ad gravitatem, veterum
 inhærendo vestigiis: si quis fortè solutior
 versus aut durior videatur, factum de indu-
 stria, rei naturæ ut servirem. alioqui lenes,
 inoffensos, volubiles, ubi res postulat, non
 desiderabis.

Graviori locus hîc esset disputationi de
 fabula & fictione, quam etsi jam demonstra-
 vi consentaneam Poesi magis quàm necessa-
 riam, à me tamen, Lector, multis locis mo-
 disque cernes adhibitam. & quidem nonnul-
 lis in Poematis regnat, eaque tota occupat:
 aliis, quantum satis est, inseritur. Videbis
 audiesque Poeticas personas, ordine pro-
 deuntes, Poloniam, Religionem, Vestpha-

PRÆFATIO.

liam, Philosophiam, Croatiam, Gloriam,
Pacem, Hymenæum, Galliam, Hispaniam,
Fidem, Candiam, Honorem, Theologiam,
Pronæam, Alethiam, Astræam, Eridanum,
Clenum, Garumnam, Euphrosynen, Mu-
sas, Genios &c.

Num personæ hujusmodi minus habent
gratiæ, quam Jupiter, Neptunus, Juno,
Pallas, aliæque fabulis contritæ? quanquam
& aliquas memoravi fabulis celebratas, pro-
fopopœiâ tantum, & verbo tenus à profanis
assumptas. neque enim, cum inanium Deo-
rum actiones in carmina mea non admittam
nisi contemptim & quibusdam in ludicris,
eorum tamen penitus à feriis & sacris nomi-
na excludo. Mars, Lyæus, Ceres, Libitina, in-
terdum à me usurpata, *rerum vocabula, non Deo-
rum.* Phœbus jam pro sole, jam pro spiritu
Poetico: Musæ pro ingenuis artibus, pro car-
minibus; quidni & Olympiæ pro Choris no-
vem, assidue laudes canentibus divinas, hu-
manasque mentes afflantibus? semel Nym-
phas pro puellis aut sponsis dixi. at in divinis
litteris Titan, Cocytus, Orion, Arcturus,
Hyades leguntur. *non quod, ut animadvertit*
Hieronimus, eadem apud Hebræos vocabula sint,
sed quod nos non possumus que dicuntur, nisi consue-
tis vocibus intelligere, nedum enunciare Poeti-
cè. Cui M. Gregorius concinens; *nequaquam,*
inquit, sermo veritatis vanas Hesiodi, Arati &

Ep. c. xxviii.
ad Fabiolam.

Lib. ix. in
Job.

PRÆFATIO

Callimachi fabulas sequitur ... in sacro eloquio sapientes Dei sermonem trahunt à sapientibus seculi.
Inducuntur etiam iisdem sacris monumentis, prout personæ, Sapientia, Babylon &c.

Sed ut fabularum hostibus ferendus est usus fabulorum nominum; ita Mythologiæ amantibus neutiquam respuendus est usus Christianarum vocum, seu Græcarum, seu Latinarum. Theander, nihilo fanè austerior vox quàm Leander: & immensam habet energiam, quæ Deum & hominem sonat. neque in hoc sita puritas est Latini sermonis, ut à *Martyris* aut *Angeli* verbo funditus abstinetur. quid tamen hominibus facias haud mirificæ Latinitatis, & in elegantiam multa peccantibus, qui nomina istiusmodi & à politissimis autoribus frequentata, & ipso Religionis instituto consecrata, velut sanctitati linguæ inimica & leporis venena execrentur? his equidem uti non timui, sed perparcè, non temere. & verò graviùs elegantia circumducto semper ad hos quasi scopulos vitandos sermone corrumpatur. Adde quòd multa quæ videntur Ecclesiastica inventa, extant apud veteres: Hæresis quidem, apud Tullium: Charistia, quæ semel, Mysteria, quæ sæpius appellavi, saltem apud Ovidium: psallere, apud Sallustium & Horatium. atque hunc admonentem audiat, quisquis est ad arguendum projectior. *fragili quærens illidere*

PRÆFATIO.

dentem, *Offendet solido*. quotus enim quisque verba, non dicam, Senecæ, Plinii, sed Tullii, sed Maronis habet in numerato? ac quoniam in hoc loco verſor; Tullianæ, Virgilianæ, Horatianæ dictioni ſtudiſſe me profiteor, ſic tamen ut ab aliis autoribus, ſed laudatis & omni exceptione maioribus, id quod proxime declaravi, aliqua mutuari non defugerim. Jam, etſi candida clariffimaque mediocriter intelligentibus eſt dictio; tamen apertiſſima quæ videntur, eruditis aliter oculis quàm parum acutis inſpiciuntur. ſub eſt non rarò altior ſenſus & alluſio, quæ minus peritos fugit. ſpecimen hoc eſto. Neſtorii linguam impiam, biſulcam dixi, cum ſerpentis dici triſulca ſoleat; quod hæreſiarcha neſarius venenato dogmate ſolveret Chriſtum ſcinderetque in perſonas duas. Deipara vocatur *alma*. pleriſque, ni fallor, communis duntaxat huiusce vocis poteſtas occurret, & ratio. at enim MARIA ſingulari penitus ratione Alma nuncupatur Hebraïcè loco Iſaiæ celeberrimo, *Ecce Virgo concipiet*; ubi nomen, Alma, pro Virgine abſconditâ. Cuiusmodi non otioſarum vocum animadverſiones, ut optatæ ſcriptori, legenti gratæ acciderint; ita plerumque haud neceſſariæ, cum ingenio vulgata ferè notio ſatiſfaciat.

Redeo hinc, Erudite Lector, ad fabulam & fictionem, unde me dictionis Poeticæ ab-

PRÆFATIO.

duxerat consideratio. ac primum circa recentiores historias mihi videor illud audire Plinianum; *quæ tam Poetica, &, quanquam in verissimis rebus, tam fabulosa materia? dices immissa terris nova flumina (maria) novos pontes fluminibus injectos... una, sed maxima difficultas, quod hæc æquare dicendo, arduum.* Equidem, historiæ quidquid attigi carminibus, tractavi sic, ut nihil fabula fidei, nihil suavitati veritas officiat. Circa res quoque sacras multa inventa fictaque sunt, sed rebus cohærentia, è rebus ipsis ducta; ut constabit ex. c. in Transfiguratione & Ascensu Christi; in Euthanasia & Apotheosi Borgiæ; in Josaphato utroque, Judæo & Indo. Difficile prorsus ac periculosum est Superos effingere loquentes, cum in ejus generis orationibus divini species decori tenenda sit. quare frequenter è sacris litteris eas orationes elicui, ut Deum sequer verba præeuntem. ac videlicet, quemadmodum Ethnici suas, cum de Diis agerent, fabulas carminibus inculcarunt, ita Christianis hominibus in religiosis argumentis historias divinas & sententias adhibendas censuerim. Nec pauca inde fictionis, non inanis, sed & utilis & jucundæ semina sublegi; quæ si colere libuisset, peramplam hinc segetem rerum excitassem. at enim non profanis modò fabulis consultò in sacris abstinui, sed à plurimis etiam sanctioribus inventis, quæ sese

PRÆFATIO.

ingerebant, majoris utilitatis gratiâ temperavi; quò pietati velut purior campus, & via diverticulis minus flexuosa panderetur. Neque idcirco mihi videor à Poetæ scopo aberrasse, cum abunde probarim stare sine fabula Poësin. Quod nisi ita foret, jam non tantum Lucretius (ut Græcos præteream) Horatius, Tibullus, Propertius, Ovidius, ac reliqui pænè ad unum Latini veteres, in ple-risque suis operibus non essent Poetæ habendi; sed ne Virgilius quidem magna sui parte esset Poeta numerandus: cum Georgica, opus mirificum ipsaque Æneide perfectius, imitationem habeat nullam & fictionem, præterquam in extremo libro quarto, ubi fabula est Aristæi, eaque non primo autoris consilio, sed Augusti jussu prolixæ laudationi subrogata Cornelii Galli. Principem ego Poetarum sequi satius duxi, quàm Ovidium in Fastis consecratione fabellarum lusitantem; ingeniosè, suo more; sed nihil ad Maronis gravitatem. hujus adeò Poësis, tanquam matrona plena modestiæ, plena dignitatis: illius, velut puella saltatrix, & festivior quàm necesse est probæ. An verò nullam Virgilio præbebant fictionum opportunitatem

*Diique, Deæque omnes, studium quibus arva
tueri?*

quos ille in principio Georgicon invocat longa serie, & ambitu (quod notasse obiter pro-

PRÆFATIO.

fuerit) trium & viginti carminum. quanta undique Poetam silva fabularum invitabat ! nec tamen *carmine ficto*, atque per *ambages*, sed verâ seriaque argumenti sui tractatione Mecænari delicias fecit. ingenii maturitate, præstantiâ doctrinæ, dictionis elegantia sic materiem austeram excoluit, nihil ut illo rure floridius esse queat, nihil fructuosius & ornatius. Veterum ego tamen legenda mihi vestigia reputavi magis quàm premenda. recentiorum autem in operibus nonnulla sum aliquando miratus iis gemina, quæ, priusquam eorum apparerent libri, meis vulgaveram. at facilè in eandem unam incurri potest vel sententiam, vel elocutionem. quin honori duxero, è meis quidpiam opusculis ab imitatore industrio decerpi. Sed octo ipsos continentes versus, omnino integros aliquos, alios paucis in deterius mutatis vocibus, è Curru Gloriæ abstraxisse; non imitatio, non mutuatio, sed mera direptio ac deprædatio est.

Quod ad Intercalaria pertinet carmina, non eas mihi leges proposui, quæ alicubi novo Regii Carminis, ut vocant, invento servantur. ad Moschum respexi, Bionem, Catullum, Virgilium, inter profanos. nam & Regius Vates hoc artificio psalmos aliquot, & majori varietate insigniit. Jam Notæ, quibus libros aspersi, partim curiosæ rerum observationes publicarum sunt; partim peculiarium aut locorum

PRÆFATIO.

aut operum necessaria, vel commoda certe indicia. quædam etiam præmunitionis causa fuerunt observanda; ut de Græcis nominibus apud Hebræos usurpatis; in Scaligerum, qui Sannazarium ex hac quidem parte male arguit. Scripturæ locos è multis aliquos apposui, quæ pietatis, quæ eruditionis instrumenta. Qui tamen peregrinetur in sacris litteris, nihil est quod hæreat in nudis autorum codicumque sanctorum nominibus passim obviis. satis est, si advertat, è divinis monumentis sumpta quæ morem humanum aliquando superant; & reverentiam S. Spiritûs oraculis debitam exhibeat. Voces nonnullas Theologicæ disciplinæ solennes, quæ plurimam emphasim habeant, ad Oeconomiam Sacram marginem annotare non dubitavi; nullas in ipsa carmina irrepere sum passus à Poesi alienas, crebra etiam notatu digna prætermisi, ne oras librorum onerarem: ac nihil quandoque ob ipsam rerum copiam adscripsi; ut l. III. Silvarum, ubi densæ perlucidum historiæ ac fabulæ. si quid quis minus assequitur, & subsidium à Grammaticis petere gravatur; facilis est unius alteriusve dicti iactura. *Neque verò ego hoc tantum oneris imponam nostris præsertim oratoribus (ait Cicero; dicam ego, lectoribus) nihil ut iis patem licere ne- scire.*

Sed jam plura fortasse, quàm erat necesse, de materia & forma Poeticorum Operum :
nihil

PRÆFATIO.

nihil tamen, ut arbitror, supervacaneum & inutile, five ad indicandam & probandam instituti mei factique rationem, five ad morem profanum erroremque multiplicem pro mea tenuitate corrigendum. Et crebrioribus, quæ congerere in eam rem potueram, exemplis, autoritatibus, rationibus, censurisque sciens volensque supersedi. Juvabit, ut spero, te, Lector Erudite, supplementa quædam harum dissertationum & accessiones brevissimas persequi, suam cuique voluminis parti præfatiunculam. ex ea verò, quæ Panegyricis præfixa est Orationibus, istius causam additamenti conjunctionisque agnosces. Ad extremum, hoc à me dictum æqui bonique consule; non levem & desultoriam, sed intentam & sagacem à te optare me lectionem. neque enim ita scripsi, ut bracteolis caperem oculos, verùm ut solidâ formâ pascere. ac si tibi fortè primo aspectu non displicuerit operis subjecti species; tolerabilius aliquanto, cum omnia perspexeris accuratiùs, quidquid est sive Poeseos, sive Orationis, visum iri sanè confido.

FACULTAS P. PROVINCIALIS

Societ. JESU in Aquitania.


CUM aliquot Societatis nostræ Theologi legerint *Opera Poëtica & Orationes Panegyricas* P. LEONARDI FRIZON ex eadem Societate ; eâque censuerint ob materiæ dignitatem elegantiamque formæ posse ad utilitatem publicam typis excudi ; potestate ad id mihi factâ à Patre nostro Joanne-Paulo Oliva Generali Præposito , facultatem Autori concedimus Opera illa sua Poëtica & Oratoria in lucem emittendi. In quorum fidem has litteras manu nostra subscriptas , & officii nostri sigillo munitas dedimus , Burdigalæ 19. Martii an. 1674.

M E C U R I U S V E R D I E R.

SUMMA REGII PRIVILEGII.

CH R I S T I A N I S S I M I Regis autoritate patentibusque litteris cautum est , ne quis *Opera Poëtica & Orationes Panegyricas* P. LEONARDI FRIZON è Societate J E S U , absque ipsius autoris consensu , excudat excudendave curet , aut ullo modo effingat intra quindecim proximos annos à die primæ impressionis expletæ numerandos. Qui secus faxit , indicta pœna confiscationis librorum coercebitur, aliâque multâ Regio diplomate contentâ. Datum Parisiis die 27. Junii , an. 1675. Sic signatum , de mandato Regis , G U I T O N N E A U.

Perfecta hac prima editio fuit die 14. Augusti. an. 1675.



HEROICON

LIBER I.

SACRA EXPEDITIO

A D

PRINCIPES CHRISTIANOS

*Cum decreta ad eos essent in Varsoviensi Poloniæ
concilio Legationes, opem adversus imminentem
Turcam oratura,*

PROTREPTICON.



URGITE, magnanimi Proceres,
quos æthere ab alto
Increpuere sacrum spirantia classica
Martem:
Rursus equos, densas alii conscen-
dite puppes.

Nunc age, nunc socias in prælia jungere vires

A

Ottomanum contra, manifesto numine Christus
Imperat, Heroasque suos Deus evocat ultor.
Pannoniam, Cretam, terras populatus & undas,
Acrior ecce ruit, majoraque Barbarus audet.

Scilicet arrepto discordis tempore regni,
Christiadhūm, heu, turbas proprios convertere in usus
Doctior, immani vastatos clade Polonos
Obruit, impositoque jugo, deforme tributum
Exigit, ac populum censeat Regēmque clientem.
Proh pudor! huic trabeam sceptrumque insignia mittit.
Imperii servilis, & illatibile donum.

Ni Dominum & leges Princeps patiatur acerbis,
Territat; insultansque malis, graviora minatur,
Jam fræno injecto, Camenensique arce potitus.

Qualis ubi Ætnæis proruptus faucibus ardor
Fulminat, exitio miscens silvasque, domosque,
Felicis que prius campos; hinc major eundo
Explicat undanti viatrices agmine flammæ,
Quippe suum depastus iter Vulcanus, & alta
Sævior in castra & magnas se concitat urbes.
Funerei antevolant cineres, mistis que favillæ
Pumicibus, cæcisque atra caligine Terror.
Haud secus assiduus avidus successibus instat
Osmanides, pavidumque ferox grassatur in orbem.
Nexa inter sese, & gradibus substructa trophæa
Æternam in seriem tendunt; acuitque cruentam
Præda famem. crescunt vires, crescuntque furores.

At non sic Asiam, Libycasque ex ordine gentes
Abstulit, Europæque incumbit publicus hostis
Christiadhūm, & spoliis dives lætatur opimis;
Ferro, igni campos & procumbentia miscet
Agmina: non primis, non seris parcitur annis.
Cæditur imbellis pariter cum milite vulgus;
Sacra, profana ruunt: it torrens undique sanguis.
Non genus hoc hominum. testantur Caspia claustra

HEROICON LIBER I.

Inmissas tygres populis : morésque rigescunt
Caucasei , & solidas cautes præcordia gestant :

Quid loquar, ut probris instans effræna libido
Barbaricis , vesanum odio confundat amorem ?
Threiciis compuncta notis quot millia sordent
Christigenûm , passimque foro venalia prostant ;
Remigiôve addicta gemunt ; ferrôve gravata ,
Pressa jugo , terram exercent , pontûmque fatigant !
Heu Pudor ! heu temerata Fides ! impune per orbem
Exultans , Christo illudit Mahometica labes :
Semirutisque trucem templis increescere Lunam
Cernimus , antiqua de Relligione trophæum.

Jam mihi se Rhodiæ , Cypriæ jam cladis imago
Subjicit ; & versis quæ dudum , ah ! Græcia fatis
Lugè , inane fremens , Hyrcano oppressa latroni ;
Barbara nunc , priscas nec jam reminiscitur artes.
O Solyma ! ô sparsæ divino sanguine rupes ,
Quas scelere omnigeno Thraces fecere profanas !
O specus augustum , & sacri penetrale Sepulcri !
Nullane jam Regum conspirant fœdera ? nusquam
Alter erit Godofredus , & altera sanguine pictum
Classis agens Labarum , atque Orientis digna triumphis :

Sed longinqua pios arcesso in prælia Reges ;
Et Syriam memoro , & gentis juga ferrea Grajæ !
Non quæsitus adest hostis , seque objicit ultro ,
Viscera Sarmatiæ penetrans ; dirûmque minatur
Romano excidium solio , & cœlestibus aris.
Dalmatiam , Cretam bello lacerasse perenni ,
Rem Venetam , Dacôsque parum est : jam claustra re-
vellit

Ardua Podoliæ , captivas insidet arces.
Præfagisque mali gravior jam Luna cometis
Occiduum imperii domitrix invadit Eoi.
Surgite , magnanimi Heroes , vestrisque Tyrannum
Dejicite hærentem cervicibus. ite , ferocem

LEONARDI FRIZON

Hactenus, & fœdè tutum civilibus armis
Christiadum, properè collectis viribus omnes,
Unum omnes petite, atque excindite funditus hostem;

Ipse pias CLEMENS concepit maximus iras,
Advigilans gregibus Pastor, simul arbiter orbis,
Et pacis bellicue idem certissimus auspex.
Ille quidem humanos prudens adhibere labores,
Ac summa, quantum licuit, molitus opum vi:
Sed tamen imbelles hominum sine Numine curas
Novit, opemque Dei recluso excivit Olympo.
Supplicibus docuit populos se accingere votis,
Questibus & Divum stellata impellere castra.
Ut superæ fervent acies, florentiæque auro
Signa micant! toto conjurant sidera cœlo
Lunam in Bistoniam, & radios in tela minaces
Exacuunt: sociali ardēt rapida æthra tumultu.
Læta pias circumvolitat Victoria partes
Virginis ora gerens, & fulgure cincta corusco:
Qualis in Odrysiam ex alto sævire phalangem
Naupacti horrifonas quondam spectata per undas.

Perge Deo, SOBIESKI, audax duce; perge nefandum
In genus, Europæ vindex; neu sperne cadentis
Assiduos populi gemitus, & publica vota.
Aspice, ut infelix Scythicoque exposta furori
Russia protendit, quas, nî tua dextra resistat,
Ocyus impediēt captas vincla aspera palmas.
Mollibus ille etiam fallax, si credula nactus
Pectora, Christicolæ verbis deludit, & armis
Occupat incautos. Thraci ne credite, gentes,
Fœdifrago, cui nulla fides; & acinace pender
Unica lex; jurisque modus, violenta potestas.
Barbarus & bruto quàm proterit omnia fastu!
Servitio accenset Reges Sultanus; & aulæ
Mancipia Ottomanæ, Judæo stigmate inusta,
Gentibus imponit domitis; populosque tremētes

HEROICON LIBER I.

5

Delectu misero exhaurit , fœdoque tributo :
Principum & incertos ludo transmutat honores ;
Ceu viles animas , & de grege corpora mactat.

Ergo fulmineas aquilas , motûsque secuti
Sarmaticos , celerate viam , compellite turmas ,
Europæ Proceres : justæ proludite pugnæ ,
Subsidiis certatim alacres in bella ferendis.

Ausonidæ magni , priscis gens clara triumphis ;
Vos , fidæ quorum ante alios concredita curæ
Religio , & cælo Petri contermina sedes ;
Quorum elata sacri , terras spectanda per omnes ,
Arce micant belli vexilla ; pióque supremi
Pontifices signa ore canunt ; rapite arma , Quirites.
Insubres , Tusci , Ligures , in castra vocanti
Sarmatiæ , pulcri in partem pretiumque laboris ,
Confluite. emeritas , Veneti , sociate catervas ,
Thracibus expertas vires terraque , marique.
Huc Calabræ gentes , huc Parthenopæa juvenus.
Tum vos , Alpini excitum finibus agmen ,
Taurini , Allobroges ; Cyprum repetentis opimam ,
Egregii Ducis auspicio lætissima pubes.

Helvetii , Rhæti , durissima pectora bello ,
Ite , Asiæ molles populos vel corporis ipso
Proterite incursum , gravibus concidite telis.

Sicania properate rates , Sardoaque signa ,
Cyrnæaque acies ; Belgæque animosa Leonis
Ira per Ottomanæ stragem exercenda phalangis.

Indorum atque Arabum toties victricia tela
Nunc & turritas Ægæo obvertite naves ,
Lusiadæ : merces venati Oriente repostas ,
Huic potiùs laudi , partæque incumbite gazæ.

Unâ flos Melites , & ineluctabile robur ,
Purpureo signo inscriptas agitare triremes
Gestiat , Argolicas equitans generosa per undas ,
Odrysiis metuenda manus , lætissima corda.

Nec minus Arctoi coeant in fœdera Reges.
 Tuque adeo, cæsi post horrida fata parentis,
 Post varios casus, post mille pericula rerum,
 Reddite jamdudum patriæ, sceptrisque Britannis;
 CAROLE; belligeram tanto pro munere classem,
 Vindicis ô vindex Christi, molire, sacrumque
 Assere cognomen *Fidei Defensor*, avorum
 Rite viam claræque legens vestigia laudis.
 Prædones violata luant commercia ponti,
 Christicolûmque exin metuant attingere fines.

Armipotens, socia & concors ditione tuenda,
 Vandalus hîc animos acres, hîc robora promat,
 Livoniæ avertens vicinum tractibus hostem.

Romulidûm quondam terror, non degener arma
 Expediat Cimber, Thracum haud spernenda furori;
 Causaque successum præstet gratissima cælo.

En feges, en fortes quæ poscat adorea dextras,
 Sese offert, Germani, & martia corda laceffit.
 Lechiadûm terrisque, Duces, iidemque periclis
 Contigui, jam vestra animis præsumite bella,
 Illo decurrat virtus palmaria campo.

Huc validas, huc verte acies; & grandibus ausis
 Materiem, Cæsar, iustoque ex hoste triumphos
 I, pete; & ipse tuas consors ultricibus armis
 Res age. nec pacis te gratia tangat iniquæ,
 Quam toties jam Turca prior, nil parta moratus
 Commoda, totque agris auctus torque arcibus, ultra
 Fregerit. Hungariæ motus vi, fraude, rebelles
 Fovit; & insidiis media inter fœdera turbat.
 Utque Nehusalam, Varadinam infedit & urbem,
 Hinc atque hinc prædas abigit, tua regna frequenti
 Sollicitans excursu: & vim vis si qua repressit,
 Prosequitur questu, accivit quæ damna, superbo;
 Intentatque minas, Germanisque ingruit oris,
 Teutonicis inhians sceptris adrepat, & ultra

Tendit atrox, spargitque feræ contagia cladis ;
Pannonico, ah nimium, regno, nimiumque Viennæ
Finitimæ gravis, & nullo tractabilis usu.

Austria nec dirum Pietas accendat in hostem ?

Quid regalis Hymen, caræ fortuna sororis ?

Auxilii spes ampla, toro jam pacta Polono.

Quin Batavus, regnantum apices & jura vereri

Discat ; & auspiciis captans regalibus auras,

Velivolo Ionio veræ nunc laudis amicus

Institor exagitet, communemque urgeat hostem

Ipse etiam, raptuque opulentæ gaudeat oræ,

Tum melior, tum rite fidem culturus avitam.

O tandem solidam si fas componere pacem !

Supplice ten' Vates hortatu, Maxime Regum,

Appellet, ceu Sarmatico Legatus ab axe ?

At tua, par mundi imperio, sapientia curis

Antevenit monitus, precibusque occurrere gestit

Relligione animus, decorisque incensus amore.

Pannonici tu summa inter discrimina belli

Labentem auxilio fulcis, L O D O Ï C E, columnam

Imperii ; tumidumque novis successibus hostem

Proteris, Hungariæ assertor. Scit strage cruentus

Arrabo, & cæso Turcarum obstructus acervo.

Agnovit L E O P O L D U S opem, fataliaque arma,

Et Francis meritos Ducibus quæsit honores.

Heu quo dissiluit fragilis concordia casu !

Hospita Legatis, Europæique Senatûs

Pacem exquirentis statio ; cui nomen & ortum

Agrippæ sanguis, fortes dat Roma colonos ;

Dives opum, Rhenumque potens frænare ferocem ;

Urbs, gremio adversas partes media ipsa capaci

Confocians ; populis optatam redde quietem,

Principibus decora ; & fratrum tenero imbue sensu

Regales animas, & inermia confere corda.

Quò diversus Iber ? Siculam respectet ad oram,

A iiiij

Sardiniam, Appuliam, crebro quam perfidus Afer
 Sultanique cliens conjuratusque satelles
 Diripit exscensu, & levibus prætentat in armis,
 Barbara dum pleno procedant agmina gressu.
 Hesperiam duplicem usque inhiant, amissaque regna,
 Fors aliqua intentis aditum, portamque recludat;
 Ore avido extortam prædam indignata reposcet
 Colluvies Maurorum, & inundans omnia pestis.
 Sat, toties periisse, quid, heu! nova funera mundi
 Expectare juvat? si quem generosa cupido
 Bellonæ, si Pacis amor, si Gloria movit,
 Ad bellum Pax alma vocat; purasque, nec ullis
 Tingendas lacrymis palmas ostentat Idume.
 Expiat infectos cognatis cædibus enses
 Relligio, Scythicoque sacrabit tela cruore.

Hoc tua se virtus, L O D O I C E, effundat in æquor.
 Duc age in Ottomanum, aut turmas immitte vacantes,
 Borbonide, surgens Proavorum ex ossibus ultor.
 Barbaricas ingens Byzantî regia gazas,
 Augustam in sedem Francos revocantibus astris,
 Congestas mundi exuvias, tua præmia servat;
 Aternosque Sion debet repetenda triumphos.
 Proximus ire animisque flagrat Germanus & armis:
 Ac, sinerent anni, patrios D E L P H I N U S honores
 Aggrediatur ovans; formosoque emicat igni,
 Spe jam præcipientem hostem. Quo turbine sese
 Inferet, ac populos & celsas proruet urbes
 C O N D Æ U S, belli fulmen; princepsque juventæ,
 Et magno virtus succrescens æmula patri
 E N G U I N E U S; Procerumque alii, quos splendidus
 ardor
 Relligionis agit stimulis, victricia tollent
 Lilia ad Auroræ tractus, Solymæaque regna!
 Et jam Sarmatico fractus Mavorte tremiscit
 Barbarus, armatis trepidanti incumbite dextris,

HEROICON LIBER I.

9

Augusti Proceres : neu clade ferocior ipsâ
Amiſſas renovet vires , urgete jacentem.
Victus at ille tamen , præruptis ardua ſaxis
Caſtra tenet , necdum Camenenſi excuſſus ab arce eſt,
Numinis auſpicio ſociatas fœdere vires
Chriſtiadûm feret , ac tantis par Regibus ibit ,
Sarmatîci Ducis exiguo qui milite fuſus ,
Largoque undantem rubefecit ſanguine Tyram,
Threïcia & dudum propriâ res mole laborat ,
Concuſſu latè immanem tractura ruinam.
Eruta magnifici pretium dabit ipſa laboris.
Sic faciles adſint Superi , ſic vota ſecundent.
Jam Moſcum bello inſtructum , ſocia arma cientem ;
Jam toto imperii connixas corpore gentes
Romulidûm , Illyridemque , & quanta eſt Dacia ,
junctam
Sarmatiæ , Perſamque hoſtem , Graïumque rebellem
Sentiat ille ferox terris agitatus & undis ;
Caucaſeosque fugâ montes , Scythiamque requirat.

JOANNI SOBIESKIO

POLONIÆ

MAGNO POLEMARCHO

AB INSIGNI CLADE

TURCIS AD CHOCIMUM ILLATA

EPINICION.

QUÆ nova Sarmaticæ rerum conſortia genti !
Laurea jam taxo increvit , jam palma cupreſſo ;
Feralesque inter gemitus Victoria læto
Ecce volat plaufu , atque alto Pæane triumphus
Inſonuit : pheretro fulgentem Gloria currum

Addit, & festos aris persolvit honores.

Regis Polo-
niae Michaëlis
mortem obi-
tam 1 v. Id.
Novemb. con-
secuta proxi-
mo die victo-
ria.

Abjice lugubres, orbata Polonia, Regis
Funere ab hesterno, lugubres abjice sordes;
Jamque triumphales auro nitida indue cultus:

Nec dubium caelo munus gratare faventi,
Victum acie Turcam, caligantemque retusis
Cornibus, ac multo squalentem sanguine Lunam.

Ardua Chocimi Dacis qua finibus adstat
Arx imposta jugo, subterlabentibus undis;
Hic, securus agens, validis tentoria castris
Fixerat Husseinus; turritumque agmine collem
Ottomano insidens campumque, amnemque tenebat.
Huc & Lechæo præstantes robore turmas
Littaviæ adjunctis rapuit SOBIESKIUS armis;
Tutari patrios fines, ac vincla minantem
Strenuus immanem ferro prohibere tyrannum:
Admoveret & cuneos, bombardisque increpat hostem.
Crebro proludens ictu vicina laceffit

Munimenta, gravi pariter reboantia nimbo
Ærisque plumbique, & stridentum igne globorum.
At quanquam imparibus coram volitare manipulis
Christiadas, pugnamque vident obtrudere iniquam;
Non tamen instructas acies educere contra
Odrysi tendunt. vallo se densa coërcent
Millia; nec rudia, aut temere collecta; sed omnes
Mavortis jam docta vias, longosque per usus
Fatiferasque artes Cretæo exercita bello.

Projectas operum moles tantum inter & alta
Propugnacla, sinusque viarum ambage reductos,
Excursu leviora brevi certamina libant
Osmanidæ, facili castrorum in tuta receptu.
Quippe sibi haud ullo venalem sanguine laurum
Polliciti; malè concordēs, inopesque catervas
Cessuras passim trepido jam jamque tumultu,
Certa Musulmannis ludibria. Proinde, solutos

HEROICON LIBER I.

11

Donec sponte suâ & fusos sine Marte Polonos
Aspiciant, dubio parcunt se credere campo
Interea, justaque negant decernere pugna.

Quid faciat, dum castra fovent, Sobieskius acer?
Quâ solers arte eliciat subducta periclo
Agmina? quo clausos invadat robore Thracas,
Perrumpatque aditus, & sævas objice moles?
Cominus an positis obsidat barbara castris
Castra urgens, ceu lustra ferarum indagine cingat,
Lentâ fracturus vires Dux clade superbas?

Cauta paludati pendent consulta Senatus;
In partes mens scissa Ducum; numeroque locoque
Quam demum tantò inferior spem Sarmata tentet
Post varias clades, miseri tot vulnera regni.
Scilicet insanis rapidus se impingere Thracum
Molibus, exitioque ruat devotus aperto.
Secum adeo patriamque trahat, penitusque sub ipsos
Principis occasus communi funere mergat.
Victori quos nempe obices, aut quæ agmina Turcæ
Opponat fusâ hîc acie? Vacua illa, nec ullis
Præsidiiis firmata, truci vel nuda resistant
Castra loci ingenio, peditemque, equitemque fatigent.
Ast illo terdena situ lectissima bellant
Millia. tum castra immenso manus arisque labore
Aggeribus fossisque operosa emuniit, urbis
Prævalidæ in morem, clivo surgentia, & arcem
Tormentis cunctoque armorum imitata paratu.
Atque hinc fœda palus, vepreto hinc aspera sæpes,
Vallorumque rigens & non penetrabile textum.
Hinc atque hinc abrupti aditus: & flumine Tyras,
Et creber rapido prælabitur agmine torrens.

Nil tamen objecta specie, immanisque pericli
Concussus terrore, animos super æthera tollit
Lechiadûm invictus Ductor. perfringere castra,
Turcarumque moras ardet rescindere ferro.

II LEONARDI FRIZON.

Acrior ut peragat , forti quæ maxima volvit
Pectore consilia , & cœptis audacibus instet ,
Cœlesti monitu formaque accensus amica est.

Nocturnam sua Magnus obit dum castra per umbram ;

Ecce viro effulgens armis occurrit Amazon ,

Aquila , insi-
gne Poloniæ.

Cui galeam auratam passis aquila infidet alis ;

Sed tamen evulsa pennarum parte , superbum

Visa ferox , iraque minax spirare dolorem ;

Exertos acuens , haud fulminis immemor , unguis.

Hastam dextra gerit : turbatam nubila frontem

Contristant ; generoso animus tamen emicat ore :

Nec , quæ multa notat vultus , inhonesta cicatrix.

Et laceræ chlamydis nodus collegerat oras.

Tum Patriæ sic nota virum compellat imago.

Pervigilas , S O B I E S K I ; & me pro Rege caduco

Sustentans , cruda Thracis ditione tyranni

Eripere , amissosque reponere tendis honores !

Pervigila , curisque Ducem gere : nec tua cœpta

Aut socium timor , aut fallax prudentia vertat.

Quo stas , ne dubita , felix locus omine certo

A N. M. D C. Palmam offert. Campum hunc nobis Victoria dudum

XXI.

Sacravit : cæsæ hîc terram stravere Polonis

Odrysiorum acies ; Osmannus & ipse superbis

Ingemuit cecidisse ausis , fractusque refugit.

Perge , ô ! tanta sequi divinæ pignora sortis ,

Fatalemque novo campum insignire trophæo.

Dilabine tuas , Hulsseino crescere vires

Cunctando patièrè ? trahas quam lubrica , sentis ,

Auxilia : & Cereris pedites jam vexat egestas.

Jamque domum , Rege extincto , remeare videbis

Magnates , solito properos confidere cœtu ;

Undique submissum interea cogente Caplano

Auxilium Ottomanis. Et tanto cardine belli

Cessabis ; longoque fines quæsita labore ,

Præsentem elabi manibus , tua præmia , laurum ?

Surge age , & ipse tuos primi sub luminis ortum
Ad laudem prædamque voca. Quin aspice, ut astris
Religio delapsa , sacro comitante maniplo ,
Ducit opem , totâque favens tibi militat æthrâ.
Solam operit præsaga horror ferrugine Lunam.

Excipit allâbens propius Regina sacrorum,
Fimbria quam pictâ circumfluit aurea pallâ.
Numinis augusto radiatam nomine frontem
Insula , tergeminoque tiaras orbe coronat.
Turicremam non jam illa manu suspendit acerram ;
Sed Constantiæ magno quam candidus æther
Purpurea sub nube Crucem, victricibus armis
Fatale extulerat signum, jam luce rubentem
Ostentat : simul hac Heroïda voce secuta est.

Imò ego , cui fortem versas in prælia dextram,
Maxime Lechiadûm & superis gratissime Ductor ,
Omnia fausta dabo , celebresque ex hoste triumphos.
Hæc Pater omnipotens statuit commercia rerum,
Ut mea qui bello defendunt jura , vicissim
Defendam , pia tela regens, clarisque coronas
Frontibus attexam. Mene execranda tyranni
Sacra pati Mahometis ? & Orco cedere Christum ?
Funestæque salutiferam concedere Lunæ
Posse Crucem ? crescente illâ, decrescere solem
Eoum , Hesperium, atque astro servire bicorni ?
Non ita Sarmaticam gentem implacabilis ultor
Abjecit , prædamque atro permisit Averno.
Stringere sed patrio voluit turbata flagello
Regna Deus ; pavidis torrentem inducere terris ;
Pœnarum admonitu populos revocare nocentes
Ad sese , tumidisque infringere cornua Turcis.
En , ait , & cœli castris descendere apertis
Fulmineas, en , cerne acies. Tum nube verendas
Discussa facies aperit, palmare Polonis
Subsidium, cladem Ottomanis. Sobieskius ora

Suspiciens divina, pio præcordia motu
 Intremuit. novus inde animos Ducis excitat ardor;
 Affusæ indicium luci vocale magistra
 Subjicit; oblatosque viro dat nosse faventum
 Augustos Superûm vultus, atque ordine pandit.

Ille, vides? qui fidereis Antistes ab oris
 Agmen agit, patriæ memorem testatur & ortûs
 Pannonii; terrisque incendia sæva propinquis
 Barbarici extinguet belli. Spectatus in armis
 Ille prius, meruitque Deo. Quam largus egenis
 Miles opem dextra miserans gladioque ferebat!
 Mox alacer Christum bella ad meliora vocantem,
 Hilariique tubas & fulgida signa secutus;
 Ipse etiam Turonum per agros sua signa, per urbes
 Explicuit, Furiasque opifer, morbosque fugavit.
 Hospitibus Francis exin venerabile nomen

Prælium festo
 S. Martini die
 commissum.

MARTINUS, populisque ingens & Regibus auspex.
 Crastina lux, magno Heroi quæ condita fastis
 Annua sacra refert, meritosque indicit honores,
 Felix auspicio pugnam vocat. Arripe sancto
 Prælia sancta die, & festos paritura triumphos.

Qui comes ingreditur, paribusque insignia vittis
 Tempora collucet; pulchro sed rubra cruore
 Auxit honoratam præfulgens laurea frontem;
 Hic tuæ Adalbertus * patriæ pater. ipse Polonos
 Gnesnensi è solio rexit, Christoque subegit.

* Polonorum
 Apostolus.

Militarem
 Hymnum
 scripsit in D.
 Virginem, te-
 stamentoque
 legavit Polo-
 nia, exin præ-
 cini pugnae
 solitum.

Virginis aternæ sollennem ad prælia laudem
 Entheus instituit populari carmine vates;
 Testibus & doni tabulis transcripsit habendum
 Dilectæ ante alias genti, virtutis & acrem
 Belligeræ stimulum, pretiumque decusque triumphum.
 Carmine quo, numquam illa pios frustrata clientes,
 Excita Sarmatiæ adspirat pugnacis honori,
 Armipotens Orci domitrix, Materque Tonantis.
 Calce laborantem Virgo terit ardua Lunam.

HEROICON LIBER I.

15

Tertius ille, suo pariter quem sanguine clarat
Purpura; & indomitum regali corda furore,
Sollicitumque gregis venerata Cracovia cultu
Eximio custodem: aderit mea bella gerenti,
Fortius ille movens hastaque & acinace telum,
Pastorale pedum; caulis quàm suave regendis,
Tam grave prædantur in rabiem, rictusque ferarum.

D. Stanislaus
Martyr, Episc.
Cracov.

Nomine, magnanimaque virum pietate togatus
Ecce refert juvenis; multo nec feciùs usu
Splendidus armorum, quæ Tartara, quæque furoris
Tartarei socias acies, gentesque superbas
Debellant: niveoque intacti flore pudoris
Dulce nitet, vivaque rubens flamma ardet amoris
STANISLAÛS, & Aligeris se concolor infert.

Talis & antè pio flagrans CASIMIRUS amore,
Morte sacra herois decus immortale pacifici
Ausus, & illæsa pro virginitate beato
Victima procumbens fato; consortiaque Agni,
Liliaque æterni meruit stellantia veris,
Regia progenies & regni gloria, Princeps.
Ecquid, ut ætherias inter spectabilis auras
Littavicis condensa dedit superare maniplos
Agmina, Turcarum sic impia castra refringet?

Prima sed optatæ veniat fiducia palmæ,
Indigetis tutela potens & amabile КОСТКА
Præsidium. Quanquam hic obitu delectus ab ipso
Regibus ac populis Tutor: sed fervida nuper
Cognati pietas Regis, summi que Senatus,
Mystarumque Equitumque ardens quibus institit ordo,
Vota patrociniū tandem meruere sacratâ
Lege ratum. dabit ille suæ nova pignora sortis.

Atque hoc ipse solo jantum cæleste probavit
Auxilium; jantum pietati æquata potestas
Explicuit sese, patriam servantis alumni;
Barbariæ tota incumbens Thrax mole tyrannus

B. Stanislaus
Kostka Poloniae Lithuanicaeque Patro-
nus præcipuus à Pontifice
declaratus.

Superior ad
Chocimum
victoria, B.
Kostka præsi-
dio parva, ce-

ribus etiam
regiis litteris
aliisque publi-
cis monumen-
tis.

Cum tot ab extremo terrarum effusa recessu
Millia, quot Mæotis agit, quot Bosphorus undas;
Infestis ageret signis; cæcoque furore
Sceptra Sigismundo præceps, altaria Christo
Extorquere parans, fastu pulsaret Olynpum;
Et Ladislaum vastis assultibus urgens,
Prælia misceret generi fatalia vestro.
Nubivago in vectus curru tum Kostka Patronum
Et visus gerere, & Magnam conjungere Matrem
Auxiliis, tenero MARIÆ dignatus amore.

Tum simul & Regi (bello insurgente petitum,
Regni ad tutamen) sanctum ac venerabile munus
Transmissum Ausonia fines intrare Polonos
Egregii cœpit juvenis caput; & simul atrox
Finibus excedens regni, postque irrita dirum
Cœpta fremens, lacera Osmannus vexilla trahebat;
Pone suæ linquens immensos cladis acervos.
Nunc quoque victrices experta Cracovia curas
Gratur Kostkæ, & læto meritum ambit honore;
Festa triumphalis renovans sollennia pompæ.

Auspice quid tanto metuas immania castra?

Recens hæc
victoria sub
ipsum relata
B. Stanislao
sacrum diem;
quo Id. Nov.
consignantur.

Jamque instat sacrata dies, quâ publica gestit
Sarmatiæ pietas, carumque ornare laborat
Indigetem; & supero Tellus conspirat Olympo.
Ac tua demeruit crebris spectata Patronum
Muneribus pietas; blando quem fovit amore
Semper, & assiduis voluit clarescere signis
Omnipotens, sanctique parat fastigia cultus.
Hoc duce & innumeras Geniûm advolitare cohortes
Auxilio videas, capitique adamantina circum
Scuta dare; & jaculis trepidum flagrantibus hostem
Sternere. Jam Valachi Turcis venere revulsi:
Cedere mox statione sua, partesque parati
Moldauî Ottomanas signis mutare Polonis.
Nec suspecta fides: certo stant fœdera nexu.

Pertæsum

HEROICON LIBER I.

17

Pertæsum Schytici proceres populosque tyranni est.

Tu dextram Superis tantum præbere ministram
Ne cessa ; & vallo propior succede , pericli
Securus. Non vana tibi hæc ludibria noctis :
Haud dubitanda cano. Divis , i , castra secundis
Exupera. hostilem tormentis dejice turbam ;
Turcarum implebunt congesta cadavera fossas :
Terraque & Odrysio spumabit sanguine flumen.
Husseini sollennem intra conopea reddes
Victor ovans vœana Deo : prætoria ad alta
Gaudebis , Bassæque opulenta in sede profani,
Non hos augusti substructâ in muneris usus,
Magnificas peragi grates , sacrisque litari.
Æterno recolent populi decora ista triumpho.

His dictis, nubem in nitidam sese ipsa , suumque
Collegit comitatum ; & sulcum lumine duxit,
Rectam in castra viam signans rutilo hostica tractu.
Emicat hîc Superos venerans Sobieskius ; & quâ
Lucet iter, necdum exorto Titane , secutus ,
Ipse pedes castrorum habitum vallumque minasque
Explorat ; quid Turcæ agrent ; quâ parte Polonis
Opportuni aditus turmis ; cuncta ordine lustrat.
Præcipites quantum in fossas cava terra dehiscit,
Horrifico se aperit barathro ; tantum aggere crescit
Perpetuo , solidosque refert alte edita muros.
Densa coronabat castrenses machina gyros.
Nec Turcas segnis pressit sopor : aggere summo
Stant circum armati, & crebrum vallo excubat agmen.

Talia ubi certo jam cominus omnia visu
Observata Duci ; jam sese ardentior ipsâ
Terroris facie stimulatque , animisque pericla
Digna suis , paria heroæ molimina gaudet
Virtuti , ac summæ segetem consurgere laudis.
КОСТКА infixa viget penitus fiducia cordi.
Irasidii subit illa animum cælestis imago,

B

Quæ denis prior extulerat sese inclyta lustris,
 Dux ad Chocimum summo in discrimine pugnae,
 Corripiens lectas mira ad spectacula mentes,
 Purgatosque oculos, & nescia fallere corda.
 Visus ab occasu procurrere solis in ortum,
 Luce viam signans currus. Sedet aurea Virgo
 Sidereo super axe, Deumque amplexa puellum,
 Totaque, purpureo ceu sole induta, coruscat;
 Undique candenti radios jaculatur Olympo.
 Reginae ante pedes affusa luce refulget
 Dilectus juvenis, nitidoque simillimus astro.
 Isque habitu supplex, almam captare Parentem,
 Præpetem, quam sequitur Dominam Victoria cursu,
 Nube videbatur volitans per aperta curuli.
 Conflictu in medio Thracum, sævoque periculo
 Dulcem ostendebat patriam, defensor ab alto
 Ipse potens, majusque addens in prælia numen.
 Nec dubius, referat paribus quin æqua periclis
 Subsidia, hunc animo spectat, præque omnibus unum
 Implorat simul ipse, simul consueta, vocare
 Imperat obnixis Sobieskius agmina votis.
 Præcipue concepta Duces fiducia in omnes
 Dividitur: certi stat Tutelaris amico
 Terribilem auspicio, mora nulla, capeffere pugnam.
 Turmis & Κοστκæ sacrum data tessera nomen.

Ærea Sarmaticis mox undique cornua castris,
 Tympanaque instantem concentu edicere pugnam.
 Illicet & pugnae accinctos Dux fortibus acer
 Exacuit dictis. Hic Religionis amantes,
 Hic Patriæ decorisque animos ciet. Obvia præda
 Monstratur: queis castra viis superanda, quibusque
 Auspiciis: facili Superum sterni ardua nutu.
 Virtuti latè infanas subsidere moles
 Sensuros, fossasque æquari cædis acervo.
 Oppressas urbes, regni Camenensia claustra

Hostibus eripiant. hinc claves arcium, & uno
Omnia torqueri fatalis cardine pugna,
Et famam, & cara cum libertate salutem.
Tanto insultantes fastu, vectigal & ausos
Exigere, infesso detrudant limite Turcas.
Atq; eodem meminisse jubet quondam æquore victos.
Huc spes arrectas populorum: adstare Ruthenos,
Moldavos, Valachos. sub jura Polona volentes
Ac tacito repetant jam obstrictas fœdere gentes.
Vindicibus socias armis Victoria dextras,
Et certam junctura fidem. Sibi publica fata
Credita pugnam inter revocent, summique Parentis
Commisam & Patriæ causam: quam splendida cælo,
Quam terris maneant pulchrum pretia ampla laborem.

Sic animos postquam validis hortatibus Heros
Implevit; nudo flammatus acinace primam
Evolat ante aciem; & peditem pedes ipsè sub ora
Turcarum, fossasque & propugnacula sistit.
Proxima jam vallo pugnam tormenta ciebant,
Moldavi quâ parte Ducis sese obvia castra
Ottomanis adjuncta dabant, proprioque dirempta
Aggere. Dissimulat conceptum hostilis imago
Transfugium; juvat arcanam fraus bellica pacem.
Cedit non invitus; & igneæ tela procellæ
Dum fugit, instantes recipit, junctoque Polonos
Agmine Dacorum Princeps in Turcica septa
Promovet. Hinc læta ingressus victoria cepit.

At quota pars operis tamen applicuisse tremendis
Directas oris acies? stant robora valli;
Stat super aëriis surgens par montibus agger:
Infra putris humus, vastaue voragine circum
Undique restagnat fossarum immanis hiatus.
Nec minus assultu indicto Sobieskius hostem
Aggreditur, princepsque in aperta pericla sequaces
Inducit voce extimulans dextraque catervas.

Ut tonitru horrendo , ac piceo torrente ruinam
 Edere castrorum , & vallum cœpere curules
 Sternere bombardæ ; simul & conferta nitrato
 Pulvere missilia , & ferro plumboque gravata,
 Innumeras Thressam in turbam dispergere mortes :
 Extemplo adnixa , atque animis sua tela secuti
 Sauromatæ irrumpunt , turrita evincere castra
 Certantes , ferroque omnes referare latebras.

Nec vero interea resides ignavia Thracas
 Detinet , aut solo propugnant aggere castra.
 Præfens adverso respondet pectore robur.
 Are graves solido , quæ Turcas plurima obarmant,
 Congeminant tormenta globos : furit aëre toto
 Ferrea tempestas , plumboque ignique remissa.
 Confusæ saxis frameæ , glandesque sagittis ;
 Nimirum & cælo terras confundere visus
 Armorum fragor , & rauca inter classica vasto
 Cornipedum immixti fremitus clamore virorum.
 Signa movent: nusquam requies. necdum aspera confert
 Pugna manus , mediæque arcent discrimina fossæ.
 Bis valido assultu Turcas petiere Poloni ;
 Bis Turcæ assultus vallo repulere Polonos.

Altior hîc animo insurgens , ultraque morarum
 Impatiens ardet Sobieskius. utque corusco
 Extulit insignem spectandus acinace dextram ;
 Statis , ait , cæptoque abstinitis ! hæccine virtus,
 O focii , Patriæ vindex , vindexque sacrorum ?
 Nec retulisse pedem pudor est ? Ite auspice Christo,
 Cælestis causæ memores. Duce Numine freti
 Ite , agite , invictis certi ruite omnia dextris.
 Non Patriæ , non jam suprema pericula tangant :
 Christicolæ Christus moveat , calcandaque Turcis
 Relligio. Tantum hæc Ductor medio acer in æstu,
 Indignans. nec frustra. animis vox omnibus una
 Suffecit , Christique incendit pectora nomen.

Continuo Christus , calefacta per agmina , Christus
Volvitur : ora , animos Christus nec spe implet inani.
Nam simul increvere animi; simul æthere amico
Aucta securigeras intendunt robora dextras :
Tertius & Turcarum obices perrumpere tandem
Impetus evaluit , castrisque immisit apertis.

Hussarti , natæ bellorum ad dura cohortes,
Multâ emolitæ vi barbara claustra revellunt.
Protinus incurrit , quâ porta effracta , Polonus
Victor ; & attonitos hostes agit undique terror.
Spumeus everso superans velut aggere torrens,
Collectaque ira tumidus , cumuloque ruentum
Turbidus undarum , passim caulâsque gregesque
Conglomerans rapit , atque evulsas stirpibus ornos.
Terribili sonitu latè loca pulsa reclamant.
Talis ovans hostili infert se Sarmata vallo ;
Obvia præcipiti permiscet cuncta ruinâ.

Numine victricem dextro sic ire phalanga
Exultans ; votique , opifer quo rite vocatus
Kostka aderat , compos tum denique Ductor in altum
Emitat alipedem saltu ; peditemque secutas
Accelerare jubens equitum præit arduus alas.
Ocyus infundit patulis sese utraque castris,
Dextra Palatino Russorum addicta magistro;
Demetri læva imperiis. aciem ipse supremus
Ductor agit , cunctisque animos Sobieskius afflat.

Trans fossas primum objectos , longoque revinctos
Inter se tractu , ferrata repagula , currus,
Jam pediti hinc illinc perfossâ , adituque recluso
Transiliunt , Turcisque acres palantibus instant.
Splendida turbantur rapido tentoria cursu,
Barbaricæ calcantur opes. non obvia tardat
Præda viros , chalybemve auri vis blanda retundit.
Pulvere jam cæcus fumoque obtexitur æther :
Letiferæ crepitant flammata grandine nubes.

Omnigenis sævit telis , gestitque cruore
Sordidus , ac totis volitat per funera castris
Sarmata , nec trepidos patitur consistere Thracas.

Pars ingens , Paczi , pugnae , cui Littava summo
Agmina rectori parent ; tuque inclyte factis
Czarneski , qua voce mihi citharave canendus !
Cætera Lechiadûm neque ego clarissima bello
Nomina conticeam Procerum , queis laurea Martis
Debita ; & Aoniæ cumularim præmia frondis ,
Largior appulerit cupidas si fama sub aures.

Nec merita Hussæinus fraudetur munere laudis.
Ille ubi depulsos , iterumque iterumque feroces
Assultu haud ultra potis est arcere Polonos ;
Jamque adeo castris medios videt : omnia dextrâ ,
Omnia consilio expertus ; non ille pudenda
Evasisse fuga properat ; sed Marte receptum
Temperat. Adversum quin & furiatus in agmen
Principis invectus Demetrî , robur ab ipsa
Clade animosque trahens , lævam concusserat alam ,
Victoris manibus palmam infregisse minatus ;
Ni vigil , atque animo partes arrectus in omnes ,
Providus auxilio Sobieskius advolet ; & jam
Arcta laborantes inter discrimina turmas
Erigat , Hussartûm valida subeunte caterva.

Est omnes quamvis castrorum agitata per oras
Turba fugit , vallumque extra dat terga Polono ;
Ferreus egregio Janissarus agmine restat.
Nil turbata phalanx , non ullâ ex parte solutis
Ordinibus collecta , jugo confedit ; & alta
Hussæini octonis aciem prætoria circum
Millibus instruxit ; Magnique oblata recusat
Munera Ductoris , placidaque admittere leges.
Hic labor , hic nodus , pugnaeque asperrima moles ,
Chocimo propior , montanoque edita dorso ,
Castrorum regio domitis supereminet arvis.

Acre satellitium Sultani, interrita leto
Stat numerosa cohors; projectam ultura salutem,
Armorum sese vallo stipata coronat.

Ignivomo rigidi ære tubi, præfixaque acuto
Silva sarissarum protenditur undique ferro.

Fortes reliquias, & inexuperabile septum
Militis Ottomani, cur vitæ prodigus ultro
Ac fortis nimium tentet, rerumque periclo
Fatali victor spissis se immisceat armis?
Horrentem, & denso confertum robore vallum
Disjicere admotis placuit, quæ Turcica præda,
Tormentis, solidas aptis divellere turres.

Ergo aciem contra Odrysiam Vulcania moles
Ducitur ingenti serie; vastoque boatu
Sulfureos nimbos & fulmina Martis ahena
Torquet in objectum truculenti militis agmen.
It ferrata seges, flammæque animata phalangem
Dilacerat; longeque actis lateque reclusam
Limitibus secat. Hac orbis rapido ære volutos,
Hac rutilas spargi diro stridore catenas
Cernere erat; contrita simul, simul usta virorum
Brachiaque & capita, huc illuc jactata per auras;
Sanguineoque afflicta solo squallentia plagis
Corpora, & ipsa suis transfixa indutaque telis.

Quæ labes impressa, ruunt in aperta parati
Septa equites. iisdem sævos modo lenius ignes
Intonuisse putes castris, & ahenea Martis
Fulmina, dum totas agitant populantque cohortes.
Sic alacer turmas rapit impetus, agmine rupto
Supremam ardentes cladem accumulare Polonos!
Jam partam laudem, victriciaque arma morari
Ausam aciem delere avidi cæduntque metuntque.
Certatim gladios, hastas, sclopeta, secures
Ingeminant. Medios se nobilis ira per hostes
Explicat, extremo gemebundâ in morte furori

Osmanidûm insultans ; protritaque quadrupedantuni
 Calcibus , & rabido laniantur corpora morfu.
 Aëre trunca volant , sternuntque informia clivum
 Membra : natat tellus , & cælum sanguine rorat.

Lechiadûm sic Marte phalanx Janissara late
 Procubuit. totis sic Bistones undique castris
 Ejecti ruere ad fluvium , pontisque propinqui
 Effugia , & fœdam pedibus mandare salutem.
 Ipse Husseinus atrox , luctuque oppressus amaro
 Dum fugit , & tristes Sultani præcipit iras ,
 Incertus , Dominum gravius formidet , an hostem ;
 Radziviliaci percussus acinacis ictu
 Pænè cadit : multo perfusum sanguine morti
 Vix caput eripiens , trajecto elabitur amne.

Non ita , quos comites fugienti terror agebat.
 Littavicus partem immixtis equitatus habenis
 Sternit humi : partim , victorum urgentibus armis
 Ponte super , tumidi subjecta in flumina Tyræ
 Præcipitant ; senisque extincti millibus , undas
 Corporibusque armisque arctant, auctasque cruentant.
 Alter & undantes habet amnis sanguine terras ;
 Terras , quas cæsi , bisseptem millia , Thraces
 Contexere ; vaga segetes ut falce per agros
 Dejectæ , aut silvis excussæ turbine frondes.
 Innumeræ passim campos per & horrida castra
 Apparent leti facies. divisa bipenni
 Hic capita ; & cerebro & tabo miscetur arena :
 Illic semicremata jacent , discerptaque plagis
 Corpora , dimidiique homines , dubiæque figuræ
 Truncorum ; & fœde mutilos mors crebra per artus.
 Hastarum infracto confossi pectora ligno,
 Hussartæ legionis opus pars vulnere monstrant.
 Mactati cum plebe Duces , Bassæque cruenta
 Arva premunt : Solimannus humum , Seydusque mo-
 mordit.

Torvus adhuc vultu spirat furor ; armaque servat
Pugnæ dextra memor , victorique ira minatur.

Victor at ipse suo , postquam jam cæde peracta
Respirare datum est , facto defixus , & acri
Proruta metitur Thracum munimina visu ,
Concisasque acies , fumantes stragis acervos ;
Et tantum potuisse feros miratur in hostes.
Nec minus & prædâ gaudet , quæ maxima castris
Parta subit : ferroque aurum non molliter emptum ;
Splendida Turcarum Procerumque Ducumq; supellex,
Militiæ admistus luxus , pretiosaque vestis ;
Armorum genus omne , viris gratissima præda,
Versandum meliore manu. generosaque equorum
Corpora ducuntur , stratis fulgentia pictis ,
Threiciique Afrique greges , Asiæque cameli.

Tum , queis immensa satiatus cæde pepercit
Sarmata ; Romanis spectacula digna triumphis,
Ductores in vincla dati , discinctaque turba.
Chocimi paucas fuga condidit arce cohortes.
Mox ipsas , arcemque petens Victoria , vertit
In Dominos tormenta suos , quæ plurima castris
Ceperat. Obsidio pugnæ cumulavit honorem.

Debita , Magne , tibi spoliis redduntur opimis
Præmia , Dux. phaleris sonipes gemmisque superbus
Husleini , prona domitum cervice fatetur :

Victrices felix Domini potioris habenas
Induit , ad palmas mutata sorte vocatus.

Lunatumque Crucem signum Prætoris adorat ,
Candiæ ab obsidio clarum , Venetumque trophæo,
Et Vaticanum sacrandum fornice templi.

At tu laurigeras , Turcæ conopeo ab ipso
Ductoris , propera chartas emittere victor ;
Lætitiâque , tui fructum diffunde laboris.
Sarmatico late regno , sociisque , Patrique
Christiadam ante omnes , ingentia prælia narras ,

Præmarius
exercitus
Turci ver-
xillum , in
Candiæ obsi-
dione specta-
tum, hoc præ-
lio captum, &
Romam ad
Pontificem
missum à So-
bieskio victo-
re.

Divinam testatus opem; sacrisque litatis,
 Castrensi medius Procerum gratante Senatu
 Palmarem signare diem per secula gaudes,
 Annua rite pii statuens documenta triumphi.

Sic Patriæ fœdatus honos, violataque Turcis
 Relligio, ultores majestas utraque sacro
 Repperit illustres bello. Sic K O S T K A Polono
 Protegit, atque novo tutelam pignore sancit.
 Inde novus grato generosa in pectora sensu
 Ardor, & integri veniet sanctissima cultus
 Ambitio, ætherios dudum quæ prenfat honores
 Ausonio explendos ritu, supremaque dona.
 Sic demum votis damnata Polonia, Kostkam
 Splendidius venerata suum, festaque per urbes
 Ibit ovans pompâ, dulcique operata Patrono.
 Consurgent memores aræ: servata Patronum
 Agnoscent, claroque augusti munere picta
 Indigetis referent sollennes templa triumphos,
 Ac tanti vivent monumenta æterna favoris.

O mens ætherii celebrandaque cura Parentis,
 Sarmatico invigilans regno, durisque secundos
 Casibus intexens! ô sospita dextra, caducis
 Maturam submittere opem fidissima rebus!
 Dum cælo emeritum sub tanta pericula Regem
 Occupat, ingentem spoliatis Rege triumphum
 Dat terris Genitor. Supera confedit in aula
 VISNIOVIZKIADES, nequicquam ad sacra profectus
 Bella, gravesque via passus castrisque labores.
 Præmia jam regni excepit melioris; & amplis,
 Queis Lauretanæ moriens donaria cellæ
 Auxerat, astringerem gemmis diadema repensum.
 Fatalem unde tulit labefacto corpore morbum,
 Robora suggestit castris, palmasque ministrat;
 Et consanguinei captat præsentia Kostkæ
 Auxilia, & Divæ placido regnantis Olympos,

Fulmina quæ Nati armipotens in prælia torquet.
 Queis vitam impendit cœptis, finemque decusque
 Addere latus ovat victor certaminis exors.

Nec, qui Sarmaticæ CASIMIRUS blanda coronæ
 Pondera, tot clarus factis, tot casibus heros,
 Abjecit miro exuperans pietatis amore,
 Et Francæ hospitio sedis supera alta petivit;
 Tanta fatiscentis curam inter prælia regni
 Abdicat, & patriæ sanctum desertor amorem.
 Abstulit hunc secum, invita dum cederet aula
 More novo contemptor opum, contemptor honorum,
 Æternumque memor fido Rex æthere servat.
 Ille Borysthenidum motus, turbamque revicit
 Immensam Kostkæ auspiciis; munusque Patroni
 Grande sonans, cui se supplex discrimine summo
 Obtulerat jam castra petens, mox vindicis alti
 Nobile votivo simulacrum vestiit auro
 Sospes, & edomito rediens jam major ab hoste.
 Tandem inconcussus folio super astra serenus
 Sternere amat sævos felici lumine fluctus,
 Et prece victrici Superos armare faventes
 Gentem in Threiciam Sobieski ingentibus ausis.

At Frater, qui sceptrâ prior Lechæa trophæis
 Extulit, Osmanni victor nunc denique vinci
 Annuit, ardentis signa inter vectus Olympi
 Notam ad Chocimi sedem; spectatque juvatque
 Lechiadum pugnam, fortunatumque laborem.
 Barbaricos quippe assultus infregerat olim
 Aggere castrorum Princeps, ubi noctis amicæ
 Hostica per tenebras meditantem invadere castra
 Luce Jagelloniden monitus præverterat hostis.
 Tu vallo septum atque operosis molibus agmen
 Sole palam exuperas, Sobieski; & splendidus ultor
 Christiadum caneris, communi pectus ahenum
 Hosti objectasse, ac rapidum frænasse furorem

Vladislaus
 I V.

Terrificasque minas ; & famam æquabis Olympo.

Nunc etiam lætis pugnae successibus instas,
 Quà licet : & pulsum regni Vexillifer urget
 Caplanum , Dux Magne , tuo procurrare jussu
 Acer in Ottomanos. trans Istrum cedere adegit ;
 Et tractus purgat Valachos , tutisque volentes
 Insidet hibernis ; vasta dum strage per agros,
 Per montes , trepidis fugientum erroribus actas
 Reliquias ipsi fervent abolere coloni.
 Disposita circum interea statione fatigas
 Mirum audacis opus structuræ , Artisque rigentem
 Naturam armantis. quæ vix fastigia pennis
 Affectent aquilæ , nidis saxa alta legentes,
 Castra supercilio rupis Camenenisia pendent,
 Terrisque imperitant late , cœloque minantur.
 Intus acerba furens arcem labefecit egestas,
 Extruditque fames Hulsleinum , equitumque catervas.

Sic , ô , sic stratis victor spolia ultima Turcis
 Detrahe. Bellipotens felicitis gaudia pugnae
 Præstet inoffenso late crescentia cursu.
 Danubium , Euxinum , sacroque Propontida bello
 Sarmata profubigat , pacatoque imperet Hebro.

Diva , triumphorum mater , tuque optime semper
 КОСТКА fave : celebrique affusa Polonia cultu
 Quot vocat Indigetes , justis addicite votis
 Optatum decus , & vestro quæ nomine surgant
 Æternisque operum titulis signata trophæa.

At rerum caput & summam , præque omnibus unum
 Largiri eximium donis properate benigni
 Cœlicolæ , Regem , vestro quem munere dignum
 Unanimi agnoscat gratata Polonia plausu.
 Impavidum belli Regem , sed pacis amantem ;
 Justitiæ quem annexa Fides , quem strenua Virtus,
 Candida quem Pietas ; artesque imbuta regendi
 Ornet , & imperii vario Solertia motu

Nil titubans , fortique eadem placidâque salubris
 Quæ rerum ingentes dextrâ moderetur habenas.
 Dotibus insignem tantis Heroa , Polonisque
 Ufu animoque graves aptum sarcire ruinas ,
 Annuite , ô Superi. Nil Ambitus , aut vaga possit
 Gratia , nil pretium ; meriti vis unica regnet.
 Concilia in regni , magnæ ad suffragia fortis
 Devolet , ancipitemque regat Concordia campum,
 Nobilis & sensus acuat Prudentia turbæ :
 Consilii que auctor , divinâ Spiritus aurâ
 Mentibus insinuans , dociles ad publica flectat
 Commoda ; civiles & numine comprimat undas.
 Quam mundus prensat , Superi , deferre coronam :
 Ac regem , arbitriis nunquam fallentibus ipsi
 Deligite , aggestisque illustrem fingite donis.
 Magnificum humanis opibus , nec inane tumentem,
 Augeat ætheriis divinæ copia gazæ.

Tartaricas hic ille acies , Turcasque , recenti
 Clade super , damno insolito probroque furentes ;
 Europæ atque Asiæ contractis viribus , arma
 Sævius attritæ jam jamque inferre paratos
 Sarmatiæ , excipiens solido Rex pectore frangat :
 Quò nova Christiadûm resonet victoria templis ;
 Primitiasque dicans lætique exordia regni ,
 Principis augustum tollat super æthera nomen.

Hæc ego ; dum varios Musarum educere fetus,
 Præfulis auspicio FERNANDI & numine vates
 Accelero , æterni memoranda exempla favoris ;
 Sarmatico hæc bello super , atque urgente periclo
 Christicolûm , Ducis & Magni victricibus armis,
 Cantabam , raptim , lauroque innexa recenti
 Signa movens ; ubi me Padebornæ afflavit Apollo,
 Quo sine nil amplum , & sacro mens concipit
 æstro.

Namque mihi auspicio præfens, & Apollinis instar
 Unus adest, facilesque indulget cantibus aures
 Usque meis Princeps: latebris altoque recessu
 Mersum acuens, dulces in luminis evocat auras.

Quin & muneribus totam, quàm didita longe,
 Pieriam gentem & claro dignatur amore :

Aureum nu-
 misma Cels.
 Princ. Ferdi-
 nandi Episc.
 Paderb. Coad,
 Monast.

Regia præsertim quàm se Lutetia cælo

Extulit, ante alias Phœbi clarissima sedes.

Aurea FERNANDI passim collucet imago,

Quam citharæque tubæque, & ovantes carmine cycni

Altra inter celebrant surgentem; & amabile signum

Suspiciens, cantuque simul plausuque secutus

Incola Parnassi, & Pindi chorus omnis adorat;

Gentilesque notas, insigniaque alta biformis

Imperij, & mentis radios à fronte micantes.

FURSTENBERG IACI spectator sideris ignem

Concipit, & sancto gestit suspensus ab ore,

Grandibus inscriptos titulis veneratus honores.

Numinis hinc spirans augusta relucet imago.

Te duce surgentis, PRINCEPS, & segrege famam

Tentare audentis versu, proscenia libri

Aspice, quo blandus ritu, quàm fronte serenus

Exigui toties munuscula grata clientis

Spectasti, Musisque jubens tua dona secundis

Teutonicas passim & Latias volitare per oras.

Te præeunte modos & sacri classica Martis,

Succinui, longe tenui vestigia gressu

Devenerata sequens, & non imitabile plectrum.

At tibi non Musâ Ottomanos agitavit inermi

Vox pariter suavisque lyras, fortisque tubarum

Terribiles meditata sonos; auditaque toto,

Quàm patet, orbe pios urgens ad prælia Reges.

Cretæas etiam donis porrectus ad oras;

Pannonico emeritus bello; Scythica arma, tuorum

Fregisti manibus victor, dum mystica tela

In Principis
 Ferdinandi
 Poëmatibus mul-
 tiptex ad sacrum
 bellum adhor-
 tatio legitur.
 Idem adversus
 Barbaros &
 pecunia Cre-
 tam, & suppe-
 riis militibus
 Hungariam
 impense juvit.

Ipse moves, supplexque tuas operaris ad aras;
 Cæsaris auxilio florentem splendidus alam
 Transmisissè equitum; ferroque auroque juvabas.
 Ah facti maneat turbatis gratia rebus !

Vestphalicis dum sævit agris Mavortia labes,
 Heu nimium placidæ nimiumque adversa Camœnæ;
 Neuhusia sublimis agens tamen arce refulges
 Horrificos inter nimbos, bellique procellas
 Pacato exuperans animo, nec parvus avarum
 Agminis infesti pretio mulcere furorem.
 Tristibus hibernis vexatæ, armisque suorum
 Sic plebi tenerum impendis miseratus amorem,
 Pastoremque gregi præstas, patriæque parentem.
 Sed pia consiliis licet acri corda dolore
 Vulnere perſentis populi, fœdasque ruinas;
 Haud dejecta suo mens robore perstat : & Arctos
 Pervigil ut vasto bacchantes despicit undas
 Oceano, fidaque vagas immota carinas
 Luce regit; sic illa feros super ardua casus
 Eminent, invictaque potens virtute, frementum
 Cœlo affixa videt terrarum insurgere motus.

Nec minus & summo Parnassi vertice regnat
 Princeps; ac lucem ingeniis dum præbet amicam,
 Cordibus ardorem vivo simul addidit igni.
 Nil mihi Phœbeus, jactat quem fabula, fervor :
 Solus agit placito FERNANDI spiritus æstu.
 Ille operis cursumque ciet, mollitque laborem :
 Spem donis prævertit; & altæ semina mentis
 Dividit, inclinatque apices, ac læta clienti
 Dulcibus auspiciis Superûm commercia præstat.

IN
 OPERA POETICA
 CELSISSIMI PRINCIPIS
 FERDINANDI
 FURSTENBERGII,
 PADERBORNENSIS EPISCOPI,
 COADJUTORIS MONASTERIENSIS,
 PANEGYRICON.

IN DECORES animas, turbamque exose pro-
 fanam

Quam procùl Aoniis summotam finibus arces,
 Tu quoque Musarum fanis absiste Sacerdos,
 Flacce procax; tuque ô, Flacco cum Vate, Properti,
 Et qui virginibus male-gratus cunque Camœnis
 Sacra tulit. melior castas operatur ad aras
 Fatidicæ Antistes gentis, quem ¹ suavis ab alto
 Spiritus, & certi vis plurima Numinis afflat.

Amisii ripas virides & glauca salicta
 Testor, ubi exanimem lugebas Tityre ² Daphniin,
 Insignem meritis, insignem Prole Parentem.

¹ Lemma Principis, *Suaviter ac fortiter.*

² Primum Poëma inscribitur *Daphnis*, sive *Fredericus Fursenbergius*, *Parens.*

HEROICON LIBER I. 33

Vestphaliā, Angariā, Nymphasque ad iusta ciendo,
Sollennem ipse præis planctum; laurumque cupres-
sumque,

Atque apium, atque hederam cumulas, suprema se-
pulcro

Dona ferens, cælasque æternum in marmore carmen.

Felix ille pio facundi munere Nati,

Quem Paderæ campos & pingua regna tenentem,

Ipsa etiam, pecorumque ferax domitrixque luporum;

Adscivit Mimigarda ducem; quem summus & ultro

Fovit ALEXANDER claro complexus amore,

Pastorumque idem Princeps, Vatumque Magister.

Scilicet intactæ vitiis, doctæque beatas

Mentis opes miratus, adhuc florente juventâ

FERNANDI, sensusque graves maturaque corda,

Ætheriæ afflatus auræ, & commercia Divûm.

Nec tamen impenso supremus honore Clientem

Chisius evicit, Regum Pater, Arbiter Orbis.

Splendida iudicia & generosi præmia cultûs

Mutua Pontifici referens; quos cepit, amoris

Pignora magnifici, titulos decorabat honorum,

Exsuperans meritis, lucemque in dona refudit

FURSTENBERGIADES. age, quo divina rependas

Carmina Regalis pretio Favor, aut quis Eoâ

Hesperiaque micans gaza compostus acervus?

Carmina, quæ Tuscos inter spectabilis amnes,

Umbro³, populeâ vernantem fronde coronam

Cœruleo indutus capiti, meditatur, ubi omnem

Puniceo ripam vidit florescere cultu,

Ac teneris hiemem Zephyri intepuisse flabellis.

Felices ortus, ingentia fata renarrat

Chisiadæ pueri, & cunas præfagus adorat.

³ Umbro, nobilis Hettruriæ fluvius, inducitur à Ferdinando, Fabii Cardinalis Chisii natalem Hendecasyllabo suavissimo celebrans.

Haud tales dedit ante modos,⁴ cùm Statius ipsam
 Calliopen Vati nutricem admovit Ibero,
 Ausus Smyrnæo Bætin præferre Meleti.

Quid, cùm tergeminæ redimitum luce tiaræ,
 Purpureos inter Proceres, sacrumque Senatum,
 Et Vaticanæ sublimem in culmine Sedis
 Dicit Alexandrum Fernandus, & aurea seclæ?
 O Veleda⁵, ô virgo, sortes adjungere docta
 Imperiis! summas infederat ardua turres:
 Hinc responsa dabat, dum totæ limina circum
 Bructerica pendunt poscuntque oracula gentes.
 Altiùs illa sonans nunc magni voce⁶ Nepotis,
 Paciferum invitat Fabium, gratansque salutat
 Concilium Europæ Mimingrodense petentem:
 Jamque suis Regina monet proludere fatis,
 Arbitriis geminos recturum ingentibus axes;
 Principibus dare jura, & fessis otia regnis.

Evenêre. suo plaussit Germania Vati,
 Plaussit Roma suo. Studiis concordibus acti
 In laudes, Fernandæ, tuas Rhenusque Anioque:
 Lætior & flavô Tiberis sese extulit alveô
 Hospitis adventum in tanti: septena Quiritum
 Emicuere juga, & colles sprevere Pelasgos.
 Te simul ingenio regnantem⁷ Academia vidit,
 Gestit obstupuitque: & Romulæ Aganippes
 Sub tua jura fluens jam largiùs Humor amœnis
 Fontibus intumuit, gemmisque auroque refulsit.
 Tum vicina polo⁸ Seni fastigia Montes
 Inclinant; sanctisque adstat quæ Montibus ingens,

⁴ In Genethliaco Lucani.

⁵ De hac Virgine fatidica, & latè Bructeris imperante, Tacitus l. 4. histor.

⁶ Tunc aliquis vates, Procerum de stirpe meorum, &c. in Carmine ad Alex. V. I. I. Pontif. renunciatum.

⁷ Ferdinandus Romanæ Humoristarum Academiæ præfuit.

⁸ Alluditur ad insignia gentilitia Alexandri V. I. I.

Et Latio non vana sonans oracula ⁹ Quercus
 Protegit & patulâ cantantem amplectitur umbrâ;
 Sponte etiam nitidas capiti demittere frondes
 Visa tuo, & ramis placitam circumdare frontem.
 Chisiacæ arrisit Stellæ pulcherrimus ignis,
 Et citharæ aspersit radios, Vatique coronam
 Addidit allabens Phœbeæ lucis imago.

Urbem, ¹⁰ Orbis caput insistens, veterisque novæque
 Mirator, quam Germanas transmittis in oras
 Effigiem, ac tanti speciosam nominis umbram!
 Funereo spectas redivivam è pulvere ¹¹ Trojam;
 Utque cinis terras supra se Dardanus omnes
 Sustulerit, septemgeminas extructus in arces,
 Fervidus, ac denso populorum sanguine mistus.
 Mox eadem recidiva, in se confidere visa,
 Externis pariter facibus furiisque suorum
 (Heu cinis! heu toties vastum & lacrymabile bustum!)
 Occubuit nova Troja, suisque alterna favillis
 Roma resurrexit, sibi jam fatisque superstes.
 Quin & splendidior crebris majorque ruinis,
 Explicat immensum imperium: Clavesque tetendit
 Relligio, sua sceptrâ, sacrique insignia regni,
 Laurigeros quò non vis olim Martia fasces
 Intulerat, dominaeque, immania jura, secures.
 Cæsareos apices supra, sellasque curules,
 Sanctior aternâ Majestas Sede triumphat.
 Hîc Lateranæ arces, Vaticanumque tribunal;
 Hîc Cephæ solium, hîc cæli terræque potestas.
 Christiadûm augusto ritu sacrisque piata
 Roma Crucem, ligno domita atque imbellibus
 armis,

⁹ Habita Graiis oracula quercus. Georg. I I.

¹⁰ De admirandis priscæ ac novæ Romæ operibus insignis
 Elegia Ferdinandi.

¹¹ Dicam, Troja cades & Troica Roma resurges. Propert. l. 4 el. 1.

Regis adoravit superi venerabile signum;
 Signum, quo Stygii vires cecidere Tyranni,
 Pactaque Flaviadæ Magno Victoria fulsit.
 Jam chaos antiquum, Errorum nox atra refugit;
 Omnigenûmque Deûm collectis undique monstis
 Cæca Superstitio Fidei concessit, Agrippæ
 Pantheo abacta fremens, & queis regnaverat aris.
 Insanos operum sumptus, molesque profanas
 Asserit, & verâ sub religione Tonantis
 Magna tenet Mater, rutilis ¹² quam densa coronis
 Agmina Cælituum & dio comitantur honore.
 Atque hæc Martyrii aggestis loca clara trophæis,
 Sanctorum egregio Pugilum rubefacta cruore.

At ¹³ nivibus, dum candet atrox fervoribus æstas,
 Exquilio latè clivo descripta renidet
 Area virginei, M A R I Æ dignissima, templi.
 Sic tibi, sic purô splendescit carmine mirus
 Ille nitor; vitæque ac morum concolor ædi
 Responsat niveæ species. quâ tu æde, sacrorum
 Primitias libans, Fernande; adytisque reposta
 Maternis Bethlea Dei cunabula, partu
 Rite novo & junctæ simulacro cædis, ad aras
 Dilectas celebrans, æterni Principis ipsâ
 Natali sub nocte; oblato Numine Numen,
 Ætherium cæsa coluisti Prole Parentem.

Tanta novæ memoras, Præsul, miracula Romæ,
 Divinisque refers numeris cælestia facta.
 Quidquid & humanis Ars extudit improba curis,
 Naturam dum versat agens, mundique ferocem
 Romam ornat spoliis, & Olympo æquare laborat;

¹² Pantheon ab Agrippa conditum, cessit in cultum *S. Mariae ad Mariyres*.

¹³ D. Virginis ædes in Exquilis, æstivæ nivis miraculo designata. Ibi sacrum Domini Præsepe servatur; eaque primum in æde Ferdinandus litavit inter ipsa Christi Natalitia.

Ludibria annorum, atque opulenti rudera fastûs;
Rostra, Theatra, Arcus, Circos, Thermâsque Colum-
nâsque

Æterno instauras cantu, reparasque potentis
Viribus ingenii, famâque ad sidera tollis.

Pamphiliam inprimis Obelisci Romula molem
Ad fora defixam, saxumque immane revolvis,
Magnificum Ægypti specimen, quo mystica toto
Signa, feræ variis volucrêsq; ambagibus errant.
Nec minùs & librum ¹⁴ doctrinæ immanis & artis,
Prisca resignantem latebrofi arcana Canopi;
Oedipodæ solertis opus, mentisque profundæ;
Cæsaris auspiciis eductum opibûsque sub auras
Grataris, penitusque acri jam luce resecta
Symbola, & in cæco deprensam Sphinga recessu.
En tibi se, vanâ Memphis quam condidit umbrâ,
Explicat abductô, quanta est Sapientia, velô;
Totaque inexplèto sub pectore clausa Vetustas,
Mille tumet cumulata novis, Fernande, bonorum
Partibus; ac studiis immensum colligis orbem.

Nunc lacrymas fundis, myrrhæ queis suavis amaror
Cedat, & Auroræ concreti lumine rores;
Castalii increcant fontes. fata ¹⁵ lilia fletu,
Humentesque rosas, violas calthasque pheretro
Spargis dulce gemens, æternosque addis honores.
Sic & Alexandri occasus, tua funera (quanquam
Publica Romulidûm, ac mundi communia fata)
Prosequeris grato mœsta inter carmina sensu.
Sic & delitias patriæ, floremque jubarque
Lusiadûm, ah, primæ spectatâ in luce iuventæ
Flebas ¹⁶ Theodosium extinctum. spes illa decusque
Occidit, exemplumque Aulæ, censuraque Regum.

¹⁴ Athanasii Kircheri *Oedipum Hieroglyphicum*.

¹⁵ *Alba lilia... seruntur... & lacrymâ suâ*. Plin. l. 21. c. 5.

¹⁶ Ode perelegans de Morte Theodosii Lustraniæ Principis.

Ast idem Hesperia postquam Sol abditus undâ est,
 Purpureos Oriens formosior explicat ignes.
 Talis & ille Tago Princeps veneratus & Indo,
 Emicat in superas arces, æthrâque renatus
 Despectat fragili turrita palatia fastu;
 Regna tenens, non septa loci, non finibus ævi,
 Jam Divûm æterni consors heresque Parentis.

Privatas ¹⁷ etiam dignaris grandibus umbras
 Inferiis, tumulosque absens attollis inanes :
 Ac simul exequias regnato Helicone frequentes
 Indicis; simul atrati, tua turba, Poëtæ
 Concurrunt, donisque oneratas tristibus urnas
 Pierio lustrant latice & vocalibus undis.
 Vindice te, docti fugiunt oblivia Manes;
 Elysiis volitant campis, atque astra capeffunt.

Nunc joca, ¹⁸ sed tenero nil averfanda Pudori,
 Ingenuosque sales risu miscere decoro :
 Quondam etiam partem invergens mordacis aceti;
 Tunc quoque non insuavis; amici ¹⁹ Vatis & ultor,
 Ignarum, audacem gaudes illudere Momum.

Jam fidos monitus & Principe digna sonantem
 Audimus; seu Christicolas civilibus armis
 Parcere, in Odrysium convertere bella Tyrannum,
 Barbaricamque urges Solymâ detrudere Lunam:
 Seu Clariæ fetus Artis, placidæque Minervæ,
 Musæo elicere, ac doctos vulgare labores
 Emerito per blanda instas convitia ²⁰ Vati.
 Nam quid Apollineas celarunt scrinia gazas
 (Invidiæ genus !) & gremiô remorantur avarô
 Maturos famæ dudum, tenebrasque perosos,
 Et cedrô & laurô dignos Parnasside versus?

¹⁷ Natalem Rondinium, Dionysium Petavium, &c.

¹⁸ Arguta Epigrammata.

¹⁹ Augustini Favoriti.

²⁰ Alexandro Pollino.

Nec modò, cui Superos vivo affectare potestas,
 Addis Pollino stimulos, dum publica vota
 Increpitant cunctantem, & iniquâ nocte sepultum:
 Officiis ultra cineres progressus amicis,
 Holstenium ad lucem revocas, vitamque perennem;
 Debita munifico quæ posthuma vita Patrono.
 Hic decuit sumptus Proceres: hinc semina laudum
 Fœnore multiplici, pariterque Autoribus amplò
 Auspiciisque operum proventu edenda sub auras.
 Serviat ingeniis, & largò nobilis usu,
 Quem parit excusis splendorem Opulentia libris,
 Contrahat, & nullâ metuat rubigine carpi.

Heu solidæ ignari laudis, quos garrula vano
 Plebs ²¹ Rumore capit; queis auro vitrea ematur
 Gratia, & in tenuem dilabens Gloria fumum.
 Quid turbarum æstus, quid inanis sibilus auræ
 Corda movet? miseri ante diem formidine pallent,
 Aut temere concepta levi spe gaudia ventos
 Ferre vident, quos Credulitas improvida versat,
 Dum populi arbitrio vaga quid fortuna minatur,
 Dulcibus aut animos promissis lactat hiantes.
 Atqui ceu pelago fluctus, aut aëre nubes,
 Blanditiæque Iræque incertum agitantur in orbem,
 Et fucò perfusus Amor, Livorque veneno
 Turgidus, atque atros larvata Calumniæ vultus.
 Tu brutos strepitus, varioque incondita motu
 Falsique ac nimium fallacis murmura vulgi,
 Opprobria & fictæ pariter præconia vocis,
 Spernere ceu ludicra doces crepitacula puppi.
 Ne vulgo explodenda tamen se fabula Vates
 Præbeat, insanum spirans, ²² suaque ipse superbus
 Jactet; ut amplexu informes quæ simia partus

²¹ Ferdinandi Lyricum de fide popularibus rumoribus non habenda.

²² De Philauria fugienda.

Enecat usque fovens, passimque ostentat, & altè
 Pignora miratur fœdè haud indigna parentis.
 Neu, cecò infelix veluti Narcissus amore
 Obstupuit, sibi frustra inhians, sibi pulcher, & ignem
 Concipiens haustâ specularis imagine lymphæ.
 Qualem se vecors, Musisque invisus agebat,
 Mendacique operum formæ arridebat & umbræ
 Suffenus, procius ipse sui; pavonis & instar
 Circumspectantis sese, caudamque rotantis,
 Stellatas oculis & pictas Iride pennas.
 Hęc prudens consulta dabas; similemque furori
 Errorem haud patiens Scriptorum inolescere menti,
 Morum expurgabas studiorumque, Optime, pestem.
 Judex ipse adeo, rigidusque in singula censor
 Primum esto sibi quisque, incorruptamque subito
 Dein Criticen, taciti cautus metuissè Favoris
 Infidias : doctique notâ perstrictus amici
 Gaudeat; ac proprii illecebras & Amoris ineptam
 Mollitiem excutiens, verum condiscat Amorem.

PANEGYRI-
 CI PARS
 ALTERA.

TE verò ante alios, exactum pumice carmen
 Si quis amat, spectare juvet, Princepsque Pater-
 que
 Aonii venerande Chori ! Te secla Magistrò,
 Forte quid & pulchrum, quid suave, quid vtile discant.
 Vestphalico depacta solo ²³ monumenta, per urbes,
 Per loca vasta ferisque eductas montibus arces,
 Fluviorum ad capita, & fusos longo agmine fontes.
 Marmore nec muto, aut rudibus signata locorum
 Indiciis monumenta; sed aureâ voce canora
 Stant; ingens queis se Padeborne Gloria cêlo
 Extulit, atque oras terrarum provocat omnes.

²³ Monumenta Paderbornensia, magnificis marmorum in-
 scriptionibus, aureis versibus exquisitissimisque notis à Poëta
 Principe insignita.

Victuris eadem libris geminata, per orbem
Laude volant meritâ plausuque accepta secundo.

Hîc Magni ante omnes Caroli decora ardua fulgent;
Cæsaris imperium Occiduas qui primus in oras
Rettulit, & Grajis indebita sceptrâ Tyrannis.
Fregit, quos vario exundans immiserat æstu
Hinc Asia, hinc Libye, Maurosq̃ue Arabasq̃ue profanos.
Europę aut domitor Princeps, aut vindice dextra
Servator, longe populos lateque feroces
Perculit, & Septem sub Francica jura Triones
Misit agens; durumque armis, totiesque rebellem
Saxona divino instituit mansuescere cultu.
Nimirum hoc illo fuerat victore domari;
Hoc juga magnanimi legemque capeßere Regis.
Felix clade sua tellus, penitusque solutæ
Servitium antiquo melius cervicis honore!
Tartareo subtracta jugo, purgatæque fœdis
Barbariæ sacris, Carolo sic Principe genti
Addita libertas, Christi cùm subdita regno.

Nec tu felicitatis tantum fastigia belli,
Maxime prosequeris Vatum, camposque cruentos;
Palmarum segetes, spoliisq̃ue induta ²⁴ Trophea,
Pyramidum potiora situ, super æthera tollis.
Conciliis etiam celebres, templisq̃ue vetustis
Pervolitans oras, pariter fortique pioque
Franciadum imperio, & gestis insignia rebus,
Cuncta recognoscis patrię monumenta sagaci
Ingenio, & longi renovas haud immemor ævi.
Altius & priscos repetis, Fernande, labores,
Romulidumque graves casus, & castra Neronum,
Totque operum moles, objectaque claustra Sicambriis,
Terribiles ²⁵ saltus, cęsi loca sanguine Vari
Inclyta, & Augusto defletæ conscia cladis:

²⁴ Trophea Caroli M. in campo *Sinsfeld*.

²⁵ Saltus Teutoburgienſis.

Arminio ut gratata duci Germania risit
 Captivas Aquilas Latii spolia ampla Tonantis;
 Omnia collustras : & quam Germanicus Aram
 Manibus erexit patriis, informia postquam
 Ossibus, horroremque adiit spirantia lustra:
 Mactatis & quas veniens legionibus ultor
 Detulit inferias; feralisque aggere busti
 Relliquias, lateque errantes condidit umbras.

Nunc, quę sanguineis squallebant atra fluentis,
 Lęta refers lymphis passim felicibus arva;
 Quas neque Romanis cantatę Vatribus undę,
 Vitrea Blandusia & Venusinis florida fertis,
 Martiäque ²⁶ Ausonias inter präclara Napeas
 Æquiparent, Aponive ²⁷ ægris aqua sospita membris;
 Non Rivi ²⁸ Herculei metuens connubia Virgo,
 Non Arethusa fugax cęco per operta meatu.
 Talia & Alpei duplicans miracula, grato
 Cum strepitu ruit, ac Resonus ²⁹ Fons nomine gaudet,
 Per cava saxa solo subiens altisque latebris;
 Unde iterum emergens, & apertis redditus agris,
 Explicat undosum Nymphis plaudentibus agmen.
 Ille etiam Procerum excubias, convivias, ludos
 Allexit, dum insueta frequens spectacula cętus
 Captat, & assimilem pelagi revolubilis æstum.

Driburgi ³⁰ latices, Smechtę liquentia saxa,
 Crystallum ambrosiä miscent, dulcedine frigus;
 Plurimaque inde Salus panaceä manat inemptä.
 Nec minüs & suaves ³¹ opifer tibi præbuit haustus,

²⁶ *Clarissima aquarum omnium . . . præconio urbis, Martia est.*
 Plinius l. 31. c. 3.

²⁷ Fons Aponus à Claudiano cantatus.

²⁸ *Iuxta est Herculanus rivus, quem refugiens Virginis nomen
 obtinuit.* Plin. ibidem.

²⁹ Vulgo *Bullerborn*, fons æstuosus, &c.

³⁰ Driburgum & Smechta, salutaribus aquis celebres vici,

³¹ Princeps Ferd. aquä Paduli fontis in febris ardoribus re-
 creatum se posito monumento testatus.

Proluit & flagrante levans labra arida feбри,
 Clarius argento Padulus. doni ipse vicissim
 Haud uno memorem consignas munere sensum.
 Luppia & Amisius, Sennâ³² prognatus uterque;
 Et cujus gremio surgit pulcherrimus, urbi
 Natali Padera inducens memorabile nomen;
 Quisque sue cultus gratantur originis auctos
 Marmore, & insigni per saxa loquentia versu:
 Ripaque³³ velivoli per te decorata Visurgis.

Quot, Fernande, tuis interlabentia regnis
 Flumina diversô volvuntur in equora cursu,
 Oceano laudesque tuas titulosque recensent.
 Queis & Pegasei donas consortia fontis,
 Certatim exiluire tua jam laude superbi
 Ornatuque novo; atque infuso à sole micantes
 Mille coloratam ducunt Thaumantida formis,
 Jamque sacri in numerum resonant tua carmina fontes.
 At tibi inexhausto feliciore ubere vena
 Nectar agit; seseque perenni ad sidera jactu
 Purior electro vibrabit, ditior auro.

Dum stabunt montes, ac Montibus edita Castra,
 Nempe tuum, Princeps, æquabunt nomen Olympo.
 Doctrinâ³⁴ & Virtute domus tibi fama que in ævum
 Ceu geminæ solidô fulcro subnixa Trabis stat:
 Qualibus Oldenburga rubentibus aurea tignis
 Scuta nitent, altæ quæ nota insignia genti.
 Sic tu diversas æterno fœdere dotes,
 Pulchrioris & vitæ, Præsul, quam lemmate nectis.

³² In deserto Sennæ, clari duo nascuntur amnes, Luppia cum Amisio.

³³ E regione Heristalli Saxonici.

³⁴ Alterum Ferd. Principis lemma, pro arce Oldenburgâ in monte Furstenberg, usurpatum: quo alludit ad b nas Oldenburgicas Trabes in aureo scuto rubentes, a primâ usque origine Furstenbergiis usitata insignia.

FURSTENBERGIACÆ quis roborâ stirpis, & armis
 Nesciat illustres animos, heroaque corda,
 Consiliis præfaga eadem, generosaque factis;
 Et placidos mores, ac multo tincta lepore
 Ingenia, & studiis utramque amplexa Minervam?
 Sic Belli Pacisque Artes, sic plurima in unam
 Confluxere domum geminæ decora inclyta laudis
 Certatim, & palmâ texunt oleâque coronas.
 Hinc tibi primus honos. nec tantum suavis Hymettum
 Spiras, & liquidis manantem vocibus Hyblam:
 Bilstenias³⁵ arces, atque ardua Valdenburgi
 Castra sonas; validumque & inexsuperabile pectus
 Saxonas excelsâ Proceres ab origine reddit.
 Pars pietatis erat Majorum agnoscere laudes,
 Augustô nec degenerem Virtutis avitæ
 Progeniem exemplô summis accingere rebus.

Carminis ipsa adeo facies, Autoris imago.
 Nobilis in teneræ vultu se gratia Musæ
 Explicat, & blandâ Majestas fronte renidet.
 Haud secus & vivis sese illa coloribus effert
 Vis animi, numeros Virtus expleta per omnes,
 Ac tenuem vulgum non aspernata Potestas,
 Fidaque Amicitia & grati specula undique sensus.
 Largius officio indulgens, & prodiga laudum
 Carmine magnifico per gentes Musa vagatur:
 Teutonici nec sola petens fastigia Pindi,
 Jam florem Italiae, jam Belgica lumina cantat,
 Lusadas, Celtasque & Phæbo & Marte potentes.
 Quam teretes versus! Latiae quam candida linguae
 Copia! quæ doctrinae opibus congesta supellex!
 Qui cultus! qui splendor, & immortale beatæ
 Mentis opus, Naturæ ingens certamen & Artis!

³⁵ Bilstenium, arx Angariae munitissima, Dynastiae cognominis, ubi natus Ferd. Valdenburgum, item Dynastia Furstenbergiorum,

Quanta vetustatis species ! melioris & ævi
 Principibus lemniscatam rapit æmula palmam,
 Quæ priscos imitata, novis imitanda Camœna:
 Et divina colent feri Monumenta nepotes.

O DIGNUM, laude omnigenâ³⁶ cui serviat uni
 Musarum chorus omnis, & antris omnibus unum
 Concelebret lucisque Helicon, undæque loquacis
 Fontibus ; ac studiis certantibus ambiat Orbis !
 Debita jam, Princeps, tibi vectigalia cunctis
 Partibus Europe solvit, nec digna rependit.
 Ordinis Aonii censu lectissima lustras
 Agmina, juratosque sequi tua castra Poëtas.
 Ac velut in silvis, ubi formas dædala miscet
 Infinitio, discuntque novos arbusta saporos ;
 Argutô exceptas socialia germina lucô.
 (Nil tua adoptivis sedenim viridaria ramis,
 Quantum adicita tuis debet Pomona viretis,
 Vitam animamque trahens & opimo à stirpe nitorem)
 Aut versô laureta solô, jam sedis amicæ
 Dulcibus hospitiiis, cui mente addicta Satorum,
 Gratus exurgunt ; cultisque hilarata propinquis,
 Nativum hinc augent decus, ac felicibus umbris
 Subjiciunt sese, & magnum crevere per orbem.

Atque hîc, Cecropidæ³⁷ mellitis prodita chartis,
 Aptæ libris, Fernandæ, tuis, memoranda recurrunt,
 Spartano quæ mira Duci spectacula pandit
 Cyrus, Achæmenix regnator splendidus aulae,
 Regibus insuetâ florens idem arte colonus.

PANEGYRI-
 CI PARS
 TERTIA.

³⁶ Ab laudatissimis Europæ Vatibus, Poëtarum Princeps verissimè splendidissimeque collaudatus : quorum encomiorum duo extant libri à Ferdinando adoptati.

³⁷ Xenophon, Apis Attica ; cujus ex libro Oeconomico Tullianus Cato refert, Cyrum Minorem Lyfandro *quendam conscriptum agrum diligenter consurum ostendisse, &c.*

Mollis agri consep̄ta, & amœno confita culta
 Lata renidebat facies, glebâque subactâ
 Pura nitebat humus ; simul omnis copia Floræ
 Suavibus areolis mistos afflabat odores.
 Pulcrô in quincuncem directas ordine plantas
 Proceri nemoris, scatebrisque micantia culta
 Cernere erat, cuncta intento lustrata Laconi.
 Hîc gnavam laudare manum fortissimus hospes,
 Et curam ignoti pariter cultoris & artem,
 Quæ spatiis dimensa solum, picto imperet arvo.
 At Cyrus : mea regna vides, operumque labores.
 Cuncta mihi descripta : meâ nemus arte, meisque
 Digestum ordinibus : per me secta area florum ;
 Irriguis per me spirant violaria lymphis.
 Multa etiam sylvâ ex istâ, quam suspicis, arbos
 Hac fata rite manu superas se tollit ad auras.

Tum stupefacta Lacon defixus lumina Cyro ;
 Regalem ornatum, & quem Persica gaza nitorem
 Corporis augusti gemmis acuebat & aurô,
 Contemplatur, & attonito sic subjicit ore.
 O te purpureo felicia rura colono !
 Sceptriferae dextrae pulchrum sensere laborem.
 Ut te felicem non mendax Fama locuta est,
 Submissique ferunt populi, quando addita regnat
 Virtuti Fortuna comes ! nec terra recusat
 Imperium ; nec, Cyre, tuas Bactra ultima leges,
 Ac studiis ut non-ingloria cura feracem
 Ornat humum ; famulam tractat solertia gentem,
 Regnaque frugifero exercens beat aurea cultu.

Principis agricolæ ludens industria laudem
 Si meruit, manibusque agitatur gratia ruris ;
 Quas labor egregius mentis, doctæque Minervæ
 Splendida culta ferent laudes, Parnassia Tempe ?
 Hoc mutæ non Artis opus, frondesve caducæ
 Aut fetus nemorum, & marcentes Veris ocelli.

Hanc segetem, hos fructus, Musarum exercita curis
 Otia fuderunt. ³⁸ viget, æternumque vigebit
 Scilicet atque ipso florescet lætius ævo,
 Ingenio quodcunque satum est, & pectore ab alto
 Indita vis alit, ac divinæ spiritus auræ.
 Clarior ista tuæ, Procerum Doctissime, regnat
 Conscia Fortunæ Virtus, Opulentiaque Arti:
 Laurea & augustam pariter stellataque baccis
 Infula cœlesti frontem convestit honore.

Tu Pastor populorum, & jura biformia longè
 Das Princeps lateque potens: civilia sacris
 Imperia, & Vatis citharæ gladiumque pedumque
 Annectis; suavique idem fortique gubernas
 Cuncta manu: templis crebras atque arcibus altis
 Magnificusque ornas, firmas & providus urbes.
 Gaudet sorte suâ, & rerum Padeborna Magistrò:
 Æmulaque optavit dominum Mimigarda Patremque;
 Proximus emerito ut solium, Fernande, capeßas
 Christophoro ³⁹, quo nunc (heu, longum oppressa)
 triumphat

Vindice Relligio; socialiaque arma regentem
 Pannonico ⁴⁰ expavit nuper gens Thracia bello,
 Invicta pietate virum; modo fracta tremiscit
 Consortem Franco refugitque Batavia Marti,
 Tot cursim rapientem urbes, torrentis & instar
 Fana salutiferâ vertentem inimica ruinâ.
 Talem ⁴¹ peniculo Frater, tu carmine pingis;
 Mox aucto clarum imperio, Fideique trophæis,

³⁸ *Nullius agricola cultu stirps tam diuturna, quàm Poëta versu
 seminari potest.* Cic. 1. de Leg.

³⁹ Celsiss. Princeps Christoph. Bernardus, Episc. Monasterienfis.

⁴⁰ Hungarico bello Director fuit copiarum Imperii nomine
 adversus Turcas conscriptarum.

⁴¹ Theodorus Caspar Lib. Baro de Fustenberg, Canonicus
 Moguntinus & Spirensis.

Magnanimum populo reddes Heroa clienti :
 Desponsæ impones decoris fastigia Sedi.

Seu templis reddendus honos & mystica jura,
 Civica seu poscunt alternas munia curas ;
 Virtutum hinc, atque hinc Musarum sedulus adstat
 Æternum, Fernande, tibi chorus. alba relucet
 Justitiæ comes Integritas, & prævia gestat
 Pervigili stellantem oculo Prudentia virgam :
 Ornatumque ⁴² addens, nec inertia gaudia, cunctas
 Muneris in partes fertur divina Poësis.
 Laudibus hæc Superos, blandis mortalia jussis
 Corda movet ; quondam illa feras, silvasque sequaces,
 Nec-surdas traxisse potens testudine rupes.
 Aspera sic hominum flectebat pectora carmen !
 Assuetus numeris, concinnoque ordine, Vates
 Publica ⁴³ describis justas in commoda leges.
 Utque graves, Fernande, modos tibi plurima condit
 Gratia ; clementi non seciùs omnia ductu
 Temperat, & certâ versat ratione Potestas :
 Exemploque gregem ⁴⁴ formas, Mystasque refingis.
 Nec verò tantum placidas Musa excitat Artes :
 Armatis eadem dux & Virtutibus auspex,
 Aut socia incedit ; victricia signa coronat,
 Et læto decorat celebres Pæane triumphos.
 Spartanas acies Tyrtæi accendere cantus
 Plus valuit, rauco quàm clangor ab ære tubarum.
 Fulmineos animos Macedo, sectator Achillis,
 Iliade oblectans simul informabat ; & illum
 Fatalem Auroræ populis, Mundoque tremendum,
 Appositò gladium incumbens acuebat Homerô.

⁴² Poëtices dignitatem amplissimam uberrimosque fructus
 præclaro carmine complexus Ferdinandus,

⁴³ Politicum Ecclesiasticumque statum scitissime sanctissime-
 que composuit.

⁴⁴ *Forma fastigregis.* 1. Petr. 5.

Arte sacra decent palmatae exempla Camœnæ:
 Nec defunt adytis & cælo digno profati;
 Immenſumque pii vanos vicere Poëtas.
 Princeps ille tibi ante oculos Vatumque Ducumque;
 Quem fragili inſtruxit virgâ tela omnia contra
 Bellipotens, ſpoliisſque Ducem Deus auxit opimis;
 Intimaque admiſſum ſanctæ in penetralia nubis,
 Colloquio Vatem & viſu dignatus amico,
 Cornibus ardentem radiorum inſigniit aureis.
 Tu rerum Autori ſollennia ⁴⁵ debita laudis
 Magnificæ æternâ meditantem voce ſecutus;
 Iſaciæ reſonas Erythræa ad littora genti
 Digna triumphali præeuntem gaudia cantu.

Vatis ad imperium, & virgæ fatalis ab iſtu
 Æquora diſſiluere: tumentibus arduus undis
 Biſgeminos ſeſe in montes ſuſpenderit Erythra,
 Et vitreo horrendas libravit in aggere moles.
 Jamque hiat, & ſiccâ patet alveus imus arenâ.
 At populus mirum per iter, convalle profunda,
 Hinc, illinc ſtantes ſolido ceu marmore fluctus,
 Audacem rapuere fugam matreſque virique,
 Ac medio emerſi barathro gratantur ovantes.
 Ruſus ad imperium, & radii nova verbera ſacri,
 Ardua procubuere gravi freta verſa fragore,
 Protinus & tumida geminus ſubſedit aqua mons;
 Marmoraque implerunt vaſtas undantia fauces.
 Spumæa purpurei ad nubes maris ira reſultat.
 Dum trepidant, Phariam revoluto gurgite turbam
 Obruit agglomerans æſtus, curruſque viroſque
 Armaque cornipedesque, & cum Pharaone ſuperbo
 Demerſit, Regiſque capax Regniſque ſepulcrum.
 Quid mirandum ⁴⁶ æquæ Vates ſonuerè profani?

⁴⁵ Moſes Eucharifticon Deo cecinit, *Exod. 15.* ⁴⁶ Ad majestatem Poëticiſam ſacrorû Vatum, ac Moſis potiſſimum & Davidis, quos mirificè collaudat Ferdinâdus, nemo profanorû adſpiravit.

Inde quaterdenūm vastas emensus arenas
 Curriculo annorum, quo fœdera carmine sancit
 Legiferi Interpres summi, populique Sequester !
 Cælo ⁴⁷ audita simul Terræque potentia verba,
 Naturamque omnem vox imperiosa coërcet.
 Quo fluit eloquio divinæ copia linguæ,
 Fecundique solum rigat instar gemmea roris !
 Quas eadem irato jaculatur Numine flammæ
 Lingua minax, immane tonans ! quo turbine acu-
 tum

Fulguris instar agit gladium, depascere crudâ
 Corpora cæde avidum, calido ebria tela cruore !
 Qui tam sublimes Græci Latine Poëtæ
 Assurgunt ? tanto infremuit quis Jupiter ore ?

Nec sacro inferior cantu, quem diæ sonantem
 Auritâ Jordanis aquâ pendensque silensque
 Hauferat : & citharæ solitam vibrare canora
 Fila manum sensere ursi, sensere leones,
 Sensit sanguinea fusus Goliathus arenâ.
 Ipsa, Saitem agitans furiis, infracta Erebi vis.
 Vim Musæ placidam, ludum stupet Aula salubrem,
 Ut Deus ⁴⁸ aligeros supra volat arduus axes,
 Colla super Geniorum, altæ caligine lucis
 Circumseptus, ovans ; Majestatisque satellites
 Terror adest, flammis & militat acribus æther,
 Nubilaque agglomerant venti, rapidæque procellæ !
 Flumina tum plaudunt manibus ; tum frondea mon-
 tes

Culmina succussant, agnos imitantia saltu.
 Numine conspecto refugas Timor in caput undas
 Dispulit : in fumos abeunt tabentia saxa,
 Ocyus & cerâ tellus resoluta liquefcit.

⁴⁷ Audite Celi quæ loquor &c. Deuter. 32.

⁴⁸ Ascendit super Cherubim, & volavit. &c. Psalm. 17. & alia alijs
 passim Psalmis planè divina,

HEROICON LIBER I.

51

Tanta facer volvit ⁴⁹ Fidicen : tu , Magne , vi-
cissim

Jessiden, Fernande, canis, palmaribus armis
Scepтрisq̃ue ac lituis jungentem nablia Regem.
Fatidicis Vates numeris correptus ad astra,
Jam Superos inter, fulgentia templa canorus
Ales obis, nubes despectans altus Olympô,
Dircæique humilem Cycni per inane volatum.
Regibus hinc aptam, dignam Cælestibus Artem
Discimus. ingeniis animos æquantibus, iidem
Gesserunt scribenda Duces, scripsere legenda,
Externosve suosve ipsi cecinere labores,
Atque operum famam & pretium peperere canendo.
Belligeræne decus Pietatis, & inclyta facta
Hic repetam, quantisque implevit laudibus Orbem
Occidui ⁵⁰ Pater Imperii, virtute fideque
Eximia Custos aternæ maximus Urbis,
Vindexque & columen sacratæ immobile Sedis?
Haud minùs Assertor Musarum, opibusque benignis
Conditor Aonii (testis Lutetia) regni.
Creber & Ausonias Germanasque ille per urbes
Regifico templa attollens ingentia sumptu,
Artibus omnigenis posuit sacraria, & ipse
Cæsareis claras studiis exercuit Artes,
Doctrinâ, pietate, armis ter-Maximus Heros;
Terror & orbis amor, quâ sævos contudit hostes;
Stravit Barbariem, sceptris Latia addita Francis
Sceptra tulit, versus augustâ scribere dextrâ
Non timuit : nec tantò indignam vertice frondem
Credidit Aoniam, atque hederæ serpentis honorem;
Vertice, quo regnans gemmisque auroque superbi

⁴⁹ David, Simonides noster, Pindarus & Alceus , &c. Hieron.
Paulino.

⁵⁰ Carolus Magnus, Universitatis Parisiensis aliarumque pas-
sim Academiarum Fundator, versus etiam ipse factitavit.

Sideris instar habens, Romanæ summa coronæ
Cincta triumphali Majestas fronde coruscat.

Non ego Paulinum ⁵¹ fileam, quem suggerit ultro
Ipse locus, flavi dum me tenet ora Garumnæ,
Quondam olli regnata : & adhuc ingentia nomen
Tecta decusque Viri, ac memori templa insita castris
Servant, & priscae turrita cacumina molis.
Gentis Aquitanæ, & Viviscae gloria ⁵² Lunæ,
Notus & Ausoniis fastis, sellæque curuli,
Consulis & trabeâ ; sed fastu clarior omni
Funditus abjecto, & calcato major honore ;
Pauperiemque ausus latis præponere fundis,
Et servum induere, atque hortum versare colonus.
Ille tot egregius titulis, tanto ille piorum
Concentu & studiis Patrum celebratus amicis,
Virtutumque gravis meritis ; sollennia vota,
Cum Nolana sacram circumdaret infula frontem,
Carmine reddebat ; præstantiaque acta decoris
Cantibus exornans, Musas super astra ferebat.
Et quisquam dubitet sanctos effingere Vates ?
Aut velut indecori Proceres avertere Cyrrhâ
Tentet, inops mentis, nec sensu imbutus honesti ?

Cetera quid longo percurram nomina tractu,
Ille tuus docto quæ ⁵³ Plettenbergius ore
Percentet capita alta, tuæque accommoda forri,
Pontificum Regumque apices, certissima Vatum

⁵¹ S. Paulini domus hodie que Burdigalæ visitur sanè magnifica, vulgo *Puy-Paulin*, atque is opum generisque splendore & Consularis gloria, sed vel maximè insigni heroicaque virtute floruit ; idem ingenio & Poëtica facultate spectatissimus.

⁵² Burdigalæ, quam *lunatam* appellat Ausonius, insigne *Lunæ* est, ipsi portus formæ congruens.

⁵³ Christianus Theodorus de Plettenberg ex Lenhausen, Ferdinandi Sororis Filius, Præfatione ad Illustriss. Wilhelmum à Furstenberg, cui Frateris, Episcopi Principisque Paderb. Poëmata dicavit.

HEROICON LIBER I. 3

Stemmata, & Indigetes, nescit quos fabula, Divos,
Gregorios, Damasos, aliosque ex ordine Mystas,
Christiadûm impositos Parnassò, arisque dicatos?

Perge augusta sequi venerandæ exempla catervæ,
Præsul, & ipse virûm summa inter nomina jan-
nunc

Propositus Magnatum aulæ, Vatumque cohorti.
Urbani sectatus Apes, purissima mella
Fundis : Alexandri ⁵⁴ Juveniles promere Musas
In lucem, artificis genio delectus amici,
Ne tristem ipse tuis metuas, Fernande, senectam,
Queis cani gravitas sensûs pondusque Camœnis,
At vigor æternæ lumenque decusque juventæ.
Jam tibi quæ Gradii, quæ Torcki nobile plectrum
Concinuit, ne, Magne, tuas ne desere Musas,
Ingemino. sacra ferta, pios cole gratus amores.
Vive, vale, regna. partæ dulcedine laudis
Perge frui, semperque novas contexe coronas :
Sordida & ingenia, insultans, liventis inanes
Barbariæ fremitus ac plumbea protere tela.

En medium tibi se turbis plaudentibus infert
Regnantum Princeps Ludovix, dignumque Suprema
Nacta suæ laudi Majestas denique Vatem,
Accepto ipse tuam Gallis pro carmine laudem
Indicit, donisque fovet gratatus amicis.
Itala nec studio vincet, nec Belgica tellus,
Utraque Fernando jamdudum exercita ; nec quæ
Te felix sese Germania jactatumnô ;
Quo Romæ Imperium, & Padebornæ publica
summo

Principe civilis, sacra res Antistite gaudet.
Verjusi, patriæ non ultima gloria, Fratres,

⁵⁴ Alexander VII. Opera sua Poëtica, quæ *Philomathi*
Musa juveniles inscribuntur, Furstenbergio vulganda com-
misit.

Delicium Francique decus, par nobile, Pindi,
 Grande ministerium queis & regalia latè
 Circumferre datum est arcani pignora sensûs,
 Agmen agunt, doctamque vocant ad signa cohortem.
 Splendidus ille tui præco Geniique librique,
 Muneris interpretes gazas superantis Eoas,
 Quas offert Charites, quantos tibi latus honores,
 Digna Palatinus quæ scripta receptet Apollo!

At grati quem vis animi, quem rara voluptas,
 Mirantemque avidumque, ac sese explere negantem,
 Entheus ardor agens tua per vestigia raptat,
 Suscipe devotum Princeps Auspexque Poëtam.
 Quidquid & immensâ laudum sub mole fatiscens
 Debilitas, vivique audacia peccat Amoris,
 Mixta verecundæ Spes & non improba Curæ,
 Cyrrhæo facilis nec fîcto ignosce clienti.

Fors etiam sacrari adytis, aut arce locari
 Carmina ames, Fernande, tuis è fontibus hausta,
 Ignibus aut accensa tuis, radiisque corusca.
 Ingenium certè nutu stabitve cadetve
 Omne tuo : & Pindi regnis quæcunque refulget,
 Inclyta lauricomos summittet Gloria fascēs.
 Si qua mea est, necdum Artificem⁵⁵ rapido axe refugit,
 Quem varios Bellique inter Pacisque labores
 Alta coronato respexit Gloria curru ;
 Hic ego, quodcunque hoc decoris, quodcunque trium-
 phi est,
 Abjicio, & Summi fastigia Vatis adoro,

⁵⁵ Alluditur ad Poëma, cujus inscriptio est, *Currus Gloria in Triumphalem è Belgio Reditum*, &c. an. M. DC. LVIII. *Insulam Fortunatam, sive Insulam Pacis*, &c.

HEROICON LIBER I. 55
 VESTPHALIA LIBERATA
 A D
 FERDINANDUM
 S. R. I. PRINCIPEM,
 EPISCOPUM PADERBORNENSEM,
 COADJUTOREM MONASTERIENSEM,
 EUNDEMQUE
 MAGNIFICENTISSIMUM ERUDITISSIMUMQUE
 MONUMENTORUM PADERBORNENSIIUM
 AUCTOREM.

CERNE tuam indigna, PRINCEPS, à clade
 recentem

Vestphalam, & nostri vestigia sæva doloris.
 Germanis, eheu, manibus lacerata, sed armis
 Franciadùm jam sospes, & arcto libera nexu
 Vindicis augustum L O D O I C I nomen adoro.
 Tu Pastor, vigilemque agitans pro me, Optime, curam;
 Nunc etiam grati tanto pro munere sensûs
 Splendidus interpres, partam gratare salutem :
 Æternæque opifex, atque idem publica laudis
 Materies, nova divinas monumenta per Artes,
 Ingenii molire sacri, FERNANDE, labores.

Sub initium
 an. M. D. C.
 LXXIII.

Jamdudum latios inter Francosque vagata
 Saxonix annales, duce te, connexa Poësis
 Historix, studiis arrectas pervolat urbes,
 Magnarum condensa legens vestigia rerum.
 Sparsa Paderbornæ vasto quæ rudera tractu,
 Oppidaque & summis dejectas montibus arces,

D. iiii

Aliiſ, antiquis ſteterant quàm molibus, effert.
 Camposque flavioſque notas, ſaltuſque vetuſtiſ
 Cladibus inſignes ; quas Varus ſanguine terras
 Nobilitat ; queis ſe Germanicus intulit oris
 Ultor, acerba gemens, legionumque oſſa ſepulcra
 Compoſuit ; manibus diſjectam hoſtilibus aram
 Reſtituit Druſo, decurritque ipſe parenti,
 Agmine cum toto, fulgens victricibus armis ;
 Funereo mœſtoſ ludo celebravit honoreſ.
 Et cœntumgemiſ Paderam inclareſcere fontis
 Ubere feciſti, & rivis ſalientia mella
 Smechtæque Iburgique, Machaoniſque reperta
 Artibus auxilia, & medicas in pocula lymphas.
 Marmore quos circùm latices, venasque ſalubres,
 Silvarumque comiſ & amœna plurimuſ umbra
 Sepſiſti, dulcique ſonanteſ carmine inauras.

Sic tua, muneribuſ conſors, Paderata per arva
 Magnifici ſpecieſ animi, doctrinaque certat,
 Splendida regaleſ Perſarum vincere gazas.
 Egregiis ſtellata notis monumenta coruſcant,
 Quæ patriæ quæque ipſe tibi clariſſima condit :
 Certiùſ & chartæ, ſaxo quàm credita, vivent,
 Inque alia ex aliis current per ſecula præliſ.
 Marmora conſument anni : ſed labiliſ ætaſ
 Quantum operi externo & manuum detraxerit arti,
 Laudibuſ ingenii & Muſæ tantum addet honori.
 Semper amor, ſemper generoſæ gratiâ mentis,
 Veſtphaliâ amplexæ ſtudiis cultuque ſuperbo,
 Creſcet ; & illuſtreſ ibunt ſuper aſtra ruinæ,
 Quas docta, Fernande, manu caligine ab ævi
 Excidioque rapiſ, cœcoque evolviſ acervo.

Maximuſ ille tuæ VIDICHINDUſ gentiſ origo,
 Eximii curam, decuſ immortale, nepotiſ
 Agnoſcit. nec non, acreſ qui Saxonaſ unuſ
 Perdomuit, Chriſtoque ferocia corda ſubegit ;

Hospes & Augustus Paderæam insigniit urbem,
 Cæsareâque frequens aulâ cœtuque sacrato,
 Præfulis & solio & regnis ingentibus auxit.
 O mihi suprema felicem in clade triumphum
 Cùm placida tandem vi debellata refugit
 Prisca superstitio, doctæque ignara palæstræ
 Barbaries ! fractæ ipsa jugum cervicis amavi.
 Saxonici tunc & simulacrum *Irminfula* Martis
 Corruit infelix, & Christo numen inane
 Decessit ; Christo, nutu qui prælia torquet :
 Auspice quo latè vicit, Romanaque sacra
 Gallicaque Europæ CAROLUS circumtulit arma.

At pius everfor simulacri immanis, & aræ,
 Quam laudum segetem, quantâ inclyta mole Trophæa
 Nunc operi, Fernande, tuo debere fatetur,
 Vertice ab ætherii lætus spectator Olympi !
 Tecum ingens, totamque trahens in mystica victor
 Bella vetustatem, victisque salutifer Heros,
 Pugnat adhuc, Romæque hostem Cœloque rebellem
 Lutherum contra, pro majestate sacrorum,
 Testisque & Fidei Vindex acerrimus instat.
 Qualia per memores ducunt sollennia fastos
 Christicolæ, sanctosque agitant ex ordine ritus,
 Legibus & factis idem regalibus ornat.
 Hic decoris monumenta tibi communia secum
 Esse jubet, paribusque it mutua gloria fatis.

Hac, Fernande, tenus veterum monumenta potenti
 Ingentes Paderæ Genio celebrata per oras :
 Artifici cura emerito nova surgit, honoris
 Ubere succrescens, operosaque adorea belli.
 Quamquam haud ista tuis, Princeps, intacta Ca-
 mœnis.

Jam Batavas Regis lauros, sistique negantem
 Aggeribus Lodoicum, & ineluctabile robur
 Cantare, assertos jam Relligionis honores,

Aggressus, summoque cies præconia Pindo.
 Nec tua, crudeli Bellonæ oppressa tumultu,
 Suada tubasque inter tormentorumque fragores
 Conticuit, simul ac Paderano exercitus agro
 Austrius insedit, Brandenburgæque phalanges.
 Quippe meum patrio sensu miserate dolorem,
 Magnanimos alto misisti pectore questus :
 Ac totâ gravis Europâ, variasque per aulas
 Littera, turbatum Imperium temerataque jura
 Incusans, crebro eloquii ceu fulmine vindex
 Procurrit, virefque ultricibus addidit armis.
 Vim diram & fœdè grassatum aperire furorem
 Strenua Principibus, tristes exsuscitat iras.

Sed præsens nobis tanto in discrimine rerum
 TURENI adventu auxilium, terrore propinqui
 Fusa Ducis, miserum damnant socia agmina fœdus:
 Nec mediæ tardant hiemes, nec flumina cursum,
 Luppiaque Amisiusque & cum rapido Ambra Visurgi.
 Sic reduces Francos, optataque pignora sensi :
 Antiquam exitio sic exemere parentem.

Ergo rite novos, Vatum Supreme, triumphos
 Et faciles Regi grateris carmine palmas ;
 Reddita quo nobis summo jam Vindice constat
 Libertas. Hic ille Opifer subvenit ; & absens
 Præcipientes ipsâ victor dispellere famâ
 Evaluit, longeque tremendo nomine turmas.

Nimirum pictas, regalia munera, formas
 BORBONIDÆ magni atque Augustæ Conjugis ora,
 Et teneri vultus Delphini habitusque decoros,
 Jam duplicem facie atque animo spirante Parentem,
 Laudibus æquasti cœlo, Divisque remiscens
 Pierio æternas retulisti munere grates.
 Nunc age, nunc tantæ quæ molis publica tecum
 Dona tuli, claro testari lætus honore ;
 Invia per spatia & glacialia tempora missas

Subsidio vires, gravibusque erepta ruinis
 Oppida, Francorumque vias signare labora,
 Totque operum famam venturis adstrue seclis.
 Huc Parii veniant lapides, auroque deserto
 Carmina viva sonent. Tureni hîc fortia castra :
 Hîc turmas equitum fudit, peditumque catervas ;
 Hæc juga, præsidio dejecto, hæc mœnia cepit.

Parce tamen vasto nimium, Fernande, labori.
 Tot loca, tot populos urbefque arcesque subegit !
 Quin ego Tureni monumentum adstare, trophæis
 Majus, amem servata, & pulchris conscia factis ?
 Nec satis est, sævus quæ latè invaserat hostis,
 Arva recepiſſe, & paſſam vincla aſpera gentem.
 Ipsa etiam pulſo dominô captiva viciffim,
 Et solida in prædam victori Markia cessit.
 Arte animifque potens, biſſenos ordine menſes
 Indefeffus agens, nimbifque invictus & armis,
 Trans montes pavidum, trans flumina reppulit ho-
 ſtem :

Extremumque agmen, tormentis ponè relictis,
 Palantum, & ſciſſis, quos fœdus junxerat, oras
 Per varias cuneis fugientia terga premendo,
 Francus ovat ductor, ſpoliifque potitur opimis,
 Ac domitis hiberna legit pinguiſſima terris.

Vidiſti, quo ſe ferat Heros arduus ore ;
 Officiis dum nuper adit ſollennibus arcem
 Neuhuſiam Princeps. tantum Romanus Aliſo
 Nec Drufum ſtupuit, moles quondam iſta Sicambris
 Caſtelli oppoſita, & non exuperabilis agger.
 Aſt eadem auguſtæ nunc Relligionis, & Artis
 Omnigenæ, deceat culti quæ Præſulis aulam,
 Splendet amœna, ingens, par Regibus, aurea ſedes,
 Gloria ubi faſtum luxumque Opulentia nescit.
 Luppia turrigeras infrâ coëuntibus undis
 Almaque ſuſpiciunt excelsi Principis ædes.

Aliſonis, caſ-
 telli à Drufo
 conditi, locum
 occupavit arx
 & ſedes Epiſ-
 copi Princip:
 Paderb. Neu-
 huſii ad Lup-
 piæ Almæque
 confluentes.

Istuc &, Mimigarda colit quem læta triumphis,
 BERNARDUS placidam castris excurrit in arcem ;
 Ille, togæque sagoque, armisque sacrisque potentem,
 Jam securum ævi, tua quem monumenta loquuntur.
 Quà se Isalæ regio, quâ porrigit hostica tellus
 Markia, & aërias ostentat montibus arces,
 Quæque Ravensbergi patuit plaga ; fulminis instar,
 Missilibus flammis & candentùm ære globorum
 Obvia perrupit, subjectasque expiat urbes.


Convenere Duces, studiis concordibus ambo,
 Erepti insidiis ambo, cæcisque periclis ;
 Nuper atrox, & consiliis agitata nefandis,
 Barbara quos petiit, Germano indigna solo, fraus,
 Numine, cui sociis ambo meruère sub armis,
 Servati, nostræ fatalis uterque saluti.
 Scilicet omnipotens rebus Vigil excubat, orbis
 Arbiter, & suavi pariter fortique supremos
 Contingit dextrâ fines, atque omnia versat.
 Quidquid proditio, quidquid furiata coquebat
 Perfidia, hic tenuem subito difflavit in auram
 Providus illudens, feraliaque ausa retexit,
 Cara sibi capita & partes tutatus amicas.

Quare age, divinam celebra, Fernande, Pronœam ;
 Quam densas inter strages hominumque locorumque
 Et circumjectis bacchatos gentibus hostes,
 Hactenus incolumi Padebornæ sede benignam
 Agnoscis, Caroli memorando à Cæsaris ævo.
 Nunc quoque cælestes dignatam impendere curas,
 Regalisque ministerii præsentia dona,
 Altius extolle, & cultu venerare perenni.
 Exhaustis lætare malis, fructuque dolorum,
 Quos pia mens, patriamque arctè complexa ge-
 mentem

Pertulit, & constans animo Prudentia fregit.
 Hinc & partus honos, & major ab æthere merces.

Mox damna in quæstum referas, quæ plurima Franci,
Nominis invidiâ atque odio perpeſſus iniquo.

Interea doctum ſurgent æterna per orbem
Digna tui monumenta; & quæ cæleſtibus ipſe
Ingeniique Artiſque opibus miranda paraſti;
Et quæ cuncta tibi Parnaffia debuit ora,
Reddere certatim accelerans: ſed Gallica tellus
Ante alias, totiſque applaudens Sequana ripis;
Oceanique hoſpes, quo non velocior alter
In laudes reſonare tuas aut lætior amnis,
Flavus Aquitano exultans Helicone Garumna.
Tu, Fernande, meæ Princeps & maximus Auctor
Laudis, in extremas pergis diffundere terras
Veſtphaliæ famam, rerum & monumenta mearum.
Jam FURSTENBERGI veterem ſaſtigia Pindum
Effinxêre mihi, ac peregrinos undique Vates
Alliciunt, & te gaudentes præſide Muſas.
Dumque hîc ore meos auguſto paſcis amores,
Circum inhians mundus cunctis ſpectabile ſeculis
Invidet ac tanti gratatur Principis aſtrum.





HEROICON

LIBER II.

CAROLO AURELIO
COMITI SAMPAULANO
SUB EXEQUIAS PATERNAS
HENRICI
DUCIS LONGAVILLÆI &c.
CONSOLATIO

PANEGYRICA ET PARÆNETICA.



OBILE jam vasto pheretrum squalore secuti

Plangere amant dudum populi ; fufusque per Aulam,

Certatim patrio celebrat te in funere mœror,

CAROLE, & officiis Procerum follennibus ambit.

HEROICON LIBER II.

63

Atratos subiisse lares nec Maximus ipse
Regnantum, Heroë amisso communia tecum
Damna querens, blandisque ferens solatia dictis,
Cunctatur : penitusque animum, solitasque Parentis
Suscepisse vices tenero dignatur amore.

Venit & Uranie, doctæ venere Sorores,
Ore habituque Deas referens chorus : una * sed
omnes

An. M. D C
LXIII.

Majestate premens, longè spectabilis anteit.
Carbascos substricta sinus, chlamydemque figuris
Inscriptam variis, tenui quas dædala filo
Addidit ipsa operi, miræque intexuit arte ;
Naturæ immensus quidquid complectitur orbis,
Veste gerit, sceptrumque manu regale coruscat.
Splendent ingenui mixtâ gravitate lepores,
Et nodo incompertum religavit tænia crinem ;
Neglectusque decet : pulcroque incendit amore
Devenerantùm animos augustæ gloria formæ.
Ignea vis oculis, quæ terras, nubila, fluctus
Permeat, & visu penetrans rimatur acuto;
Fœderaque & pugnas, primæque ab origine cursus
Rerum aperit, veroque offusas discutit umbras,
Interdum medio insertans caput ardua cœlo,
Concentum & mundi numeros revolubilis audit:
Mortalem jam se in speciem demissa modumque
Colligit, atque hominis veniens sic voce profatur ;
Florentique ulnas circum Dea fudit Alumno.

* Philosophia,
cui tum Prin-
ceps operam
dabat.

Non ego, dulce mei decus & lux prima Lycei,
Carpere acerba tuos aut imperiosa dolores
Opprimere (indignum) meditor, nimiumque potenti
Naturæ vim ferre, & ahenea fingere corda.
Nec verò rigidas leges, immania jura
Stoicidum jussi, aut hominem dediscere suasi:
Fasa sed immites animos Sapientia fecit,
Splendidus ille furor, popularis & ambitus aura.

Magnificum, stupuisse, & Divis proxima virtus
 Insano visum generi : quanquam intima fluctus
 Pectora miscebant, ventosæ dissona linguæ.
 Ferreus, extremo Genitorem in cardine vitæ
 Cernere qui siccis oculis, terræve repostum,
 Sustineat : monstro similis, consortiæque extra
 Civica Gætulas procul exportandus in oras.
 Tu Patrem decora lacrymis. nil fletibus obsto
 Quos sacrat Pietas. Heroïum lumina vinci
 Nec puduit, guttisque rigare ingentibus ora.
 Sic pius Æneas, sic acer flevit Achilles.

At non immensis concessum planctibus auras
 Rumpere; & antiqui cecinerunt qualia Vates,
 Mollitiem exemplis prætexere grandibus ausi,
 Sublimesque animos & mascula frangere corda.
 Degener Alcides, tantorum in fine laborum,
 Immemor & laudum furit, impatiensque doloris:
 Personat & fœdum muliebribus Oeta querelis.
 Immodico parce, ô Princeps, tabescere luctu;
 Et cape justa volens tantæ solatia cladis.

Publica lex, dirumque & ineluctabile fatum
 Humanæ incubuit stirpi. Nil purpura juvit
 Regia, nil fidæ prætoria ad alta cohortes,
 Armæque opesque Ducum, congestæque marte tro-
 phæa.

Parcarum, scis ipse, colos & inania pensa,
 Quois suspensæ hominum fluerent cum flamine vita,
 Fabulâ jactavit, rapidæque obnoxia falci
 Viventum capita, & cæcæ ludibria mortis.
 Ast innata mali, concretaque semina vobis,
 Terrigenæ ! quotquot vitales carpitis auras,
 Vivitis in mortem : seriesque miserrima leti
 Vita fugax, penitusque occulto exercita bello.
 Quattuor implicito conflagunt agmine, & ipsis
 Visceribus clausi, donec per mutua tandem

Vulnera conciderint hostes ; simul ipse ruinam
Campus, ubi adversas soliti collidere vires,
Traxerit everfus pariter civilibus armis.

Quin age, & hanc rerum vastam circumspice molem.
Disiectas urbes, horrenda cadavera, easdem
Civibus, en, cernas propriis ingesta sepulcra.
Quid loquar, ut longâ consumpta ætate fatiscant
Marmora, & æriæ montano in vertice cautes ?
Cælum etiam sua fata manent. populabit Olympum
Flamma vorax ; sident terræ, miscebitur æquor
Sideribus : jam jamque ruens dissolvitur Orbis.
Fortior una adamante, & stellis altior una
Stat, mundi occasus inter, mortalia Virtus
Despiciens, summumque volans super emicat axem.
Illustres meritis animas, utcunque solutis
Membrorum elapsæ vinclis & carcere gaudent,
Semideûm adscribit numero ac felicibus arvis.
Et lugebis adhuc, Princeps, quem vivida leto
Afferuit Virtus, Divorumque intulit aula :

Vos ego, quæ nivium aggeribus, quæ montibus,
Alpes
Exstructæ nimborum ; &, Claustra Segusia, sævis
Rupibus armata & confertis horrida telis,
Appello. Vidistis enim, subitoque pavore
Intremuere juga & concussæ funditus arces:
Cum primam Dux ante aciem, lectamque catervam,
Pectora præsentî juvenum devota periclo,
Tenderet, Alcidae calcans vestigia ; Francisque
Iavia gestiret vastâ stravissè ruinâ.

At solido infani subsidant corpore montes,
Terrificæ moles, & saxa minantia cælo :
Longavillææ monimenta perennia laudis
Stabunt, atque ipso crescens formosior ævo
Ardua florescet gestarum gloria rerum.
Ant Padus Rhodanusque, mari torrentibus undis

Hentici landes
bellicæ.

Turbidus irrumpens hospes, maris instar uterque,
 Deficient arente vado ; quàm splendida latè
 Occumbant memores gemini per fluminis oras
 HENRICI decora æternis defixa trophæis.

Qui vigor Herois, quàm non tolerabilis ardor !
 Testes Allobrogum turmæ, testesque Salassi.
 Sequanus, Austrasiisque, & fractis Insuber armis,
 Germanusque, feroxque Henricum sensit Iberus,
 Turbine quo populos, quo fulmine proterat urbes.
 Tuta situ, munita manu Dertona superbam
 (Centum alias fileo) turritis collibus arcem
 Summisit Victori, & Gallica fræna recepit.
 Consilio dextrâque potens, palmaria signa
 Gentibus attonitis circumtulit. inter & amnes
 Arctatus quondam geminos, totidem hostica castra,
 Ancipitiq; malo pressus, majorque periclo ;
 Ut leo Massylâ venantûm indagine septus,
 Acrior insurgens collecto robore, belli
 Felicem explicuit per tot discrimina cursum.
 Quid, quod & hiberno spumantem gurgite Rhenum
 Cymbâ tranavit fragili ; & divisa phaselis,
 Virtutem simul arte juvans, innoxia Ductor
 Agmina transvexit : pennisque animisque resectas
 Terruit audaces Aquilas, telisque fugavit,
 Unguibus excutiens ac rostro rapta cruento.

Mox illum tellus regali Vestphala pompâ
 Spectandum ante alios ; nec jam metuenda ferentem
 Arma, sed absterfo Gradivi pulvere blandum
 Adspexit, stupuitque Ducem, cui jura fidesque
 Credita Francigenûm, & Pacis commissa potestas.
 Nec quisquam Europæ immensos componere motus
 Dignior, aut Regum causas solertior alter
 Cernere, Christiadisque optatam condere Pacem,
 Tres adeo, cœptis instans felicibus, annos
 Et curas Paci addixit lætissimus omnes

Legatio Prin-
 cipis ad Trac-
 tatum Pacis
 Monasterien-
 sem.

Concilio in magno Procerum ; quos undique, florem
 Reghorum excerpens delectu Europa superbo
 Miserat, augusti speciem molita Senatûs,
 Unde novas populi leges requiemque laborum
 Et prisco acciperent florentia secla metallo.

Jamque moras operum, & quales non ense recidit

Ille Asiæ Domitor, cæcis vincla aspera nodis

Ingenii superans acie discluserat Heros ;

Ni studia Hesperius curasque eluderet hostis,

Pacis egens, sed qui Fortunæ mobilis æstum

Alternum expectans, duram sine honore quietem

Sperneret interea & cassâ spe damna levaret.

Debitane Austriadi Pax & servata puellâ,

Dotale à Superis munus ? Regumque Hymenæos

Pignore firmari tanto, penitusque beari

Sic decuit geminas duplicato fœdere gentes ?

Maturam confecta malis Germania Pacem

Arripuit ; fortemque Ducis mitemque probavit

Unam eandemque manum, belli pacisque potentem.

Redde triumphalem Victori, Gallia, palmam :

Quas retulit bello exuvias, jam Pace revinxit ;

Et sancto proprias ipsis cum gentibus urbes

Fœdere subjunxit patriæ, finesque vetustos

Protulit. armorum vim duram & ferrea Martis

Jure novo firmat placidus cum Casare jura.

Gallia Civilem, tûque ô Germania, quercum

Nectite Pacifero ! servatos utraque cives,

Tu magis, & partam Imperio gratare salutem.

Quamquam oleæ fragilem aut quernâ de fronde co-
 ronam,

Despicit ætheriâ Princeps nunc arce potitus,

Pacis ubi æternæ regio, æternique Triumphî.

Illic fidereum fronti diadema coruscæ

Induit, & silvæ numquam marcentis honores.

Hoc altæ de se potior victoria Menti

Virtutes Hen-
 rici variæ.

Extudit immortale decus, non indiga ferro,
 Militis aut operâ ; non dextræ obnoxia forti.
 Quàm variæ jactant mortalia pectora turbæ !
 Spes avidæ, refugique Metus, & mista Dolori
 Gaudia inexpletos vulgi lactantia sensus ;
 Ambitio flagrans, ultricis & imperus Iræ,
 Totque alii surgunt animis discordibus hostes.
 Hos motus vitiorum, hæc, Carole, monstra domari
 Rara, vel Herculeas passim frangentia vires,
 Ille tuus stravit Genitor : nec tam ille reductâ
 Teutonibus, quàm composâ sibi Pace beatus.

Nunc terræ grave pondus, inertia corpora rerum
 Pyramidas turesque & nota palatia longè
 Transvolat, & fœdo bacchantes agmine nimbos :
 Sanguinei Martis signum, dirosque cometas
 Sub pedibus, Lunamque videt, Casusque malignos,
 Fortunæ insultans ; certoque insistit Olympo.
 Sublimes inter Proavos, magnoque DUNENSIS

Aurellanensis
 Puella.

Proximus ingreditur, Bellatricique Puellæ ;
 Reddita quæ cœlo, speciosis ignibus ardet
 Francorum Heroïna jubar, columenque Britannis
 Semirutæ quondam solii, fatalis Amazon.
 Aoniam Henrico famam debere fatetur,
 Acceptasque refert divino carmine laudes.

Ergo consortem Superûm, & fulgentia templa
 Laurigero in vectum curru mœrere parentem
 Quod genus invidiæ est ? Nam quæ majora vovere
 Aut meliora Patri licuit ? solatia luctûs
 Ampla tibi, & vitæ moriens exempla reliquit.
 Providus ante obitum, populique Aulæque tumultus
 Fugerat, & nemorum in latebras tacitosque recessus
 Abdiderat sese ; commercia quærere cœli,
 Terrenis animum, quæ fas, exsolvere curis
 Sollicitus, vivoque abductam corpore mentem.
 Quin etiam injussis delicta extinguere pœnis

Instituit, supplexque iras mollire Tonantis;
Loricæ aurato pro tegmine, texta severa
Indutus Cilicum, & Stygios armatus in hostes.

At laudis caput innumeræ, præque omnibus unum
Enituit, cœleste, recens, memorabile factum.
Divelli, mandante Deo, sua passus ad aras
Viscera; turicremisque imponens rite dicavit
Ipse focus detracta sibi & spirantia corda,
Primigenam, patriosque volens mactavit amores.
Gaudet Relligio sacris; Natumque Patremque
Francia miratur: nec debita præmia differt,
Et caro solidum appendit Deus æthera dono.

Qualis erat, cùm te alloquio Fratremque supremo
Plurima, jam leti medius, victorque doloris,
Edocuit, pulchrisque oneravit pignora jussis!
Punica sic Ludovix moriens ubi littora pressit,
(Tantorum, ah, moriens operum sub limine Princeps!)
Adstantem erudiit Sobolem, monitusque salubres
Imperiis urgens, & pondus habentia legum
Exempla ostentans, vicino accensus Olympo:
Et jam conceptum spirabant pectora Numen.
Tu Proavum Indigetem, generis quæ gloria vestri,
Suspiciens, tanto dignum te finge Magistro,
Assiduus memores virtutum evolvere fastos.
Letiferæ hinc odium noxæ, pietatis amorem
Disce; jubet, factis monimenta ingentibus olim
Exscribenda Pater tradens, chartæque perenni
Et fidæ mandata simul jura aurea menti.

Sic adeo tecum ipse agita. Non proxima Regum
Nobilitas sceptris & eadem à stirpe profecta;
Non opibus crebrisque domus decorata triumphis,
Quantum impensa Deo Pietas & splendida profint
Obsequia, imperio & Francis meliora coronis.
Longè illi, queis dextra Deus, queis improba fastu
Lingua Gigantæo, & Titanum immania corda,

Sub obitum
Henricus su-
premo liberis
mandata, quæ
artexuntur, de
scripto tradi-
dit.

Longè absint ; oculisque nefas atque auribus arce ;
 Neu tua Tartareæ contingant limina pestes.
 Nec minùs & si queis novitas afflata profani
 Dogmatis, occultoque Fides tentata veneno ;
 Et queiscumque malas captari sueta per artes
 Gratia, non faustos dominis horresce clientes ;
 Illecebrasque omnes scelerum, contagia, sordes
 Disjice. nec vani specie delusus Honoris,
 Non gazâ luxuque ferox, sed fortibus ausis
 Egregius, certas quondam Rege auspice lauros
 Spe jamnunc præsume, novæque accingere laudi.

Barbaricos sensus & plumbea dicta refelles
 Tu quoque victrici dextrâ, frigescere inertes
 Doctrinis jactantùm animos & languida corda.
 Præcipites cæcique ruunt, ac more ferarum ;
 Virtutisque umbrâ rapidum obtexere furorem.
 An nostras Macedo Juvenis non hauserat artes ?
 Segniùs an Persas ingens posttravit Alumnus ?
 Pulcriùs & campo pugnax inferre Lyceum,
 Mortis ubi imbuitur teneris contemptus ab annis,
 Magnanimo C O N D A E U S ovans cum Fratre docebit.
 Quos Pater indixit, meritos agè reddere cultus
 Perge tuis. Caro decus & tutela Nepoti,
 Sidus uterque tibi mediis affulgeat undis.

Cetera quid referam magni præcepta Parentis ?
 Sed tamen exilem, repeto, ne despice turbam,
 Tristiaque afflictæ miserare incommoda plebis.
 Aurea quos humili Proceres Opulentia vulgo,
 Quos altus secrevit Honos, Clementia cœlo
 Æquat adoratos populis, votisque vocatos.
 Cernis, ut Henrici exequias, ceu publica gentes
 Funera pullatæ celebrant ? quo saucia luctu,
 Scissâ comam, laniata genas, velut orba parente,
 Neustria ? ut Henricum Morini genuere jacentem ?
 Necdum animis prisca exciderant Prætoris amores ?

Illum etiam Helvetii flerunt montesque lacusque;
Et Nova, quæ summo gaudentia Principe nuper,
Nec domini alterius falces metuentia Castra.
Quippe gravis nulli, atque alieno crescere damno
Inscius, & populis tantum exprompsisse juvandis
Vim solitus, patremque gerens; & corde benigno
Fovit amans, seu quas propriâ dititione regebat,
Seu quas Proregis commissas nomine gentes.
Sic facilem in cives animum, mansuetaque corda
Suscipe; sic veterum, Princeps, oracula sancit.

Felices olim populos, felicia regna,
Si quando rerum melior Fortuna magistros
Deligeret Sophiæ gremio ac florentibus hortis,
Divinus cecinit cynæis vocibus auctor.
Tergeminum Rationis opus variumque laborem
Scrutatus, ne quâ insidians adreperet Error,
Arte obstruxisti; mersum caligine Verum
Eruere, absterfoque sagax depromere fucos.
At ne istâ pigeat, terris quâ te arduus effers,
Arce exoptatos patriæ descendere ad usus;
Et quæ fidereæ speculatus vertice mentis,
Mox perfecta dare, & populis aptare regendis.
Verboſo ampullas strepitu Zenonis inanes
Vita imples solidâ; dignos & Principe mores
Exprimis, ac molles superas Virtutibus annos.
Maturum jam te Aula vocat, nostroque revellet
Complexu; rumpentque graves docta otia curæ.
Sed prius ad metas exacto Academica cursu
Emenſum spatia, & Circensi pulvere ovantem
Proſequar uſque comes; nec vano ſedula fungar
Officio, dextrâque facem præferre juvabit,
Inter & ambiguos flexus callesque malignos
Ducere inoffenſo vitam pede. Nunc age, & omnem
Arripe Naturam ſtudiis animoque capaci.
Aude, & quis Naturæ Opifex, quæ machina Mundum,

Extulerit ; terram informem tenebrisque sepultam
 Unde novâ cum luce color, pictique lepores
 Imbuerint : totumque adeo cum Numine Olympum
 Vestiga, & pulcras agita me iudice lites.
 Fufos ære globos, an tenuia corpora Mentis
 Affiduæ volvant Superûm ? stellæne vagentur,
 Per mare quo pisces volucresve per aëra ritu ;
 Sedibus an fixas propriis, clavisque rotarum
 Affimiles, clavis adamante aurôve coruscis,
 Incita multiplicis circumvehat orbita cœli ?
 Quæ Solis maculæ, obtusa qui luce labores :
 Unde vices Lunæ instabilis ; quæ tanta potestas
 Oceanum exercens, refluentibus imperat undis :
 Unde imbetes ventique, & lurida flamma cometæ ;
 Insolitusque olim Gallis tremor, unde Pyrenen
 Movit, Aquitanas nuper grassatus in oras ?
 Palladios quodcumque viros, operosa fatigat
 Ingenia, & vulgo summotâ arcana profano
 Omnia collustra, densisque evolve latebris.

Exercitationes
 Philosophicæ
 Caroli, summa
 laude plausu-
 que publico
 celebratæ.

Seu castris medius, seu campo egressus aperto,
 Argutum exeres placido certamine martem :
 Victricem puramque refers sine sanguine laurum.
 Arrectis inhians animis immensa corona
 Circumfusorum Procerum, dicentis ab ore
 Pendet ; & Actæo numquam exaudita Lyceo
 Responfa accipiens, celebri sonat undique plausu :
 Splendida & oracla, & Juvenis miracula jactat.

Hæc inter, solare pium, mea cura, dolorem,
 Dum Famâ præfens, vivax dum laude perenni
 HENRICUS, terrasque implet, cœloque beatus
 Regnat, & ardenti respectat sidere Natos.
 Nec mora, inexhaustos Patriæ solabere luctus,
 Dum populi communis Amor, dum Gloria Franci
 Nominis, ac Belli emeritus Pacisque Minister
 Cernitur HENRICUS generosa in Prole superstes,

Augusto spirans vultuque animoque refulget.

Talia fundebat sacri Regina Lycei,
Luce nitens purâ, & multo manifesta sereno ;
Illustremque amplexa sinu mulcebat Alumnum.

NICOLAO
COMITI SERINO
EPICEDION.

SILVÆ crudeles, silvæ, queis Martia Virtus
Occubat, invictamque animam cum sanguine
fundit.

Christiadum SERINUS amor, terrorque Getarum !
Tantane Apro jam semineci permissa potestas,
Quanta nec Ottomano collectis viribus hosti ?

Desidis impatiens, dum bello parcitur, otî,
Haud mollem venatum agitat. Quam barbara mallet
Agmina, Turcarumque greges ! sed pace coactâ
Ludicro interea silvas certamine miscet,
Proturbatque feras, & Martis imagine gaudet.
Mutato subiit requies operosa labori.

Ergo immanis Apri, mediâ sub morte, ferocem
Inter lustra fugam premit ardens invia victor:
Et jam defilit acer equo, strictoque coruscus
Obtruncare parat Serinus acinace prædam.

Ah nimium confise animis, confise lacertis !
Vim compelle canum, flagrantis verberare plumbi
Desuper ingemina plagas, neu cominus æquo
Aprum invade solo. paribus quondam occidit ausis
Fortior Ancaeus iusto, Calydoniâ in altâ.
Spumosâ rabie atque suo se in sanguine versat
Vulnere fixus Aper. Quæ te malesuada cupido
Extimulat ? spolia hæc tristi captanda periclo ?
Tanti, informe caput ? sed non revocabilis instat

Usque fero, & summos Venator destinat ictus.

Quid vos, ô, quorum exercent mortalia curas ?

Non ego te, Dryadasque tuas, Latonia Phœbe,

Quâ duce venantes olim, quâ præside freti,

Appello, veterum commenta & crimina Vatum.

At vos ætheriæ Mentēs, queis credita vita,

Hungaria D.
Virgini dicata
à S. Stephano
Rege.

Credita regna virûm, Genii ! tuque, optima Virgo,

Pannoniam, sacro devinctam munere, gentem

Reginæ imperio complexa, parentis amore !

Tuque adeo, humanæ vindex custosque salutis

Maxime, qui maria ac terras sublimis Olympo,

Christe, regis, præsens cuncta ad discrimina Numen !

Num decuit prohibere nefas ? (ah ! parce dolori ;

Publica damna queror) capitique avertere tanto

Insolitam exitii faciem, casusque cruentos ?

Vestris ille tamen sese devoverat aris,

Unde atras Ciconum tædas atque impia tela

Reppulit, exuviisque tholos distinxit ovantes,

Templa coronavit signis. decrescere visa

Cornibus obtusis, captivaque Luna pependit.

Nec minùs, Odrysiæ clades certissima gentis,

Christicolûm armipotens & ineluctabilis ultor,

Concidit, & cæso immoriens confunditur hosti.

Corpore inhorrescens toto, furiisque resectus

Venanti se immittit Aper : ceu saxea pila,

Adriaco violenta sinu quam machina adegit.

Jactu elisa tonant maria, & spumantibus undis

Tempestas insueta fremit. via rupta profundo :

Pondere anhelat humus, tramefactaque littora circum.

Setigerum atrocem Heroï sic turbidus infert

Impetus. haud æquos animis palmaribus artus

Sternit bellua vasta, ferâque Erymanthide major.

Tum super insanâ dejectum mole recumbens,

Multa reluctantis jugulum rostro haurit adunco ;

Obliquum infigit repetito vulnere dentem.

HEROICON LIBER II.

75

Quo Zacaturnenses infamat crimine silvas
Sævus Aper, funestum & non medicabile vulnus
Germanæque Aquilæ flebunt Venetique Leones.

Barbarico imperio metam, * frænunque furori
Præfixisse ausus, turritis molibus arcem,
Arx melior Patriæ, ac solido ceu murus ahenus
Pectore, Pannonicis stabas in finibus, Heros.
Turca nec erubuit crudeli inglorius arte,
Postquam Martis opes & vim consumpsit apertam,
Immensa fatale caput mercede pacisci:
Proscriptum ferroque perit Sultanus & auro.
Omni genâ sed te florentem laude, Tuorum
Excubiis servarat Amor, Pietasque Fidesque,
Magnanimum, impavidum, divinaque jura tuentem,
Scilicet & comites ducentem in prælia Divos.
Assiduè fœdâ prædonem clade superbum
Vrebas infestus, agros populatus & urbes:
Parque novum adverso compositum robore Mundus
Sultanum & Comitem stupuit: cessitque Tyrannus
Vana fremens, magnos solitus vilissima Reges
Ducere mancipia, & Superos invadere fastu.
Nec te Corvinus, nec te præstantior armis
Hunniades, quamvis terrori natus uterque,
Turcarum exitio natus Patriæque saluti.
Et Scanderbegi poteras, si libera regna
Armorum nactus, famam superare triumphis.

Ibas, laurigeri quò magna vocabat imago
Serini exemplis acuens. Fortissimus ævi
Ille sui, coram Solimanno urgente, ducenta
Millia qui contra stetit imperterritus Heros.
Ter- quinos tulit assultus; ter- dena Getarum
Millia prostravit, lectissima corpora, leto;
Et circumfessæ disjecit mœnibus urbis.
Indignantem animam castris effudit, honori
Extincto Solimannus atrox famæque superstes;

Zakaturnum,
arx Croatiae, e
ditione Serini;
quam ad urbē
dū venaretur,
luctuosissimo
casu interit.

* Arcem extru-
xerat, unde
crebram Tur-
cis vastitatem
inferebat.

Matthias Cor-
vinus, Rex
Hungariæ.

Nicolaus alter
Serinus, olim
Sigethi contra
Solimanum
propugnator;

Ut scopulo impactam fractamque herere Sigetho
 Fortunam aspexit, Mahometem & conscia Lunę
 Signa trucidis frustra incusans, altoque subactus
 Serino latè dominos summittere fasces.
 Te Mausoleum Solimanni excindere vidit
 Urbs eadem, vastâ duplex quæ septa palude
 Belligeræque artis vario munita labore,
 Exiguus Duce te raptim superata manipulis.
 Gestit & illustrem antiqui rata Vindicis Umbram
 Elysio reducem; aut, cæli statione relictâ,
 Nomine Avum egregii redivivum animoque Nepotis.
 Ultro hic decretâ jam morte ferocior, arcis
 Corruptę flammis quando spes nulla tuendæ,
 Hostiles ruit in cuneos, confertaque tela.
 Non artus loricâ, aut casside tempora vestit:
 Ære indefensum pectus, caput ære levatum
 Consecrat, in patrio tantum mucrone brevique
 Parmâ alacer. pennis candentem adamantina cristam
 Pala attollebat, nitido suffixa galero.
 Aurea seu pulchro venturę à vulnere mortis
 Præmia, seu iusti, nummos, pretia ampla sepulcri;
 Et tunicæ assutas Custos fidissimus arcis
 Gestabat claves, non ipsa in morte relictas,
 Multo quęritas Turcis certamine claves.
 Puniceoque sago, totoque insignis amictu,
 Munera cara parans hosti, speciemque triumphi
 Instituens, portis sese extulit acer apertis
 Sulphureos inter nimbos, volucrumque globorum
 Quas retro displosa vomunt tormenta procellas;
 Haud leviùs stragem ipse, manu stipante suorum,
 Fulmineo accumulans gladio. mox fessus opima
 Cede cadens, & morte gravis, Janissarum acervos
 Usque premit, Turcis etiam post fata tremendus.
 Quin simili occumbis leti dignatus honore,
 Non morte informi saltus, Serine, cruentas?

Antè quidem in silvis fato deprensus iniquo,
Obsidium meditans claram explorator ad urbem
Dum paucis comitatus adis per operta viarum,
Ipse fero incurſu Turcarum obſeſſus & armis
Hæſiſti, ut denſa venantum indagine cinctus.
Nec, captum, potuiſſe capi miratur & horret
Inſidians, laqueo ingenti vinxiſſe paratus,
Summum Threicio munus prædamque Tyranno
Omnibus optatam votis, pretiiſque redemptam.
Plurima te Virtus, validi ſola agminis inſtar,
Expediit, præſenti increſcere docta periclo.
Fulguris & ritu condenſam erumpere nubem
Viſus eras. non tu effugio contentus aperto,
Agmina circumfuſa motis, palantibus inſtas.
Nequicquam armorum genus impenetrabile Ductor
Barbarus induerat, magicis fortasſe venenis
Imbutum & Stygio firmatum carmine tegmen;
Ferri ex quo chalybisque acies, plumbi ignea grando;
Indomito ſtridens adamante obtuſa, reſultat.
Prædæ præda ſuæ, & fidis obtritum in armis
Maſtatur, laqueo neſtendus colla parato.
Haud ita, Pœnorum ſeſe agglomerante catervâ,
Emicat, incurſuque leo venabula frangit
Latronumque minas, ut Thracia corpora paſſim
Fundis humi. Tunc Odryſiis ſuccumbere telis
Inſcius, aprugno potuiſti occumbere morſu?

Viderat exanimis, tragicoque Croatia caſu
Perdita: tum mœſtis incendit vocibus auras,
Et magnum lamenta præit geminanda per Orbem.
Heu furor, heu monſtri facinus! ferrum inter & ignem
Incolumis, pugniſque aſſurgens omnibus Heros
Altior, indignæ potuit ſuccumbere morti!
Nate, dolor Matris, Genitricis gloria, Nate,
Huccine tot parti bellis recidère triumphi,
Victor ut indecori conſectus denique læto

Sic jaceas : hæc Virtutem pretia ampla manebant ?
 Ast ego Bistonias metuebam improvida turmas,
 Vimque dolumque tibi ; seu cùm rescindere Pontem
 Eßekium auderes, Getici commercia Martis ;
 Turbine seu rapido medios inuestus in hostes
 Omnia cùm ferro misceres, omnia flammâ.
 Ottomanæ sed nil fraudes, Byzantiæve arma :
 Formidandus Aper, saltuque exercita Pacis
 Otia monstrifero. Nam quò te fata reservant !
 Strozziadæ inuideas, si quid, Fortissime, sensûs
 Restat adhuc. trajectu avidos dum fluminis arcet
 Osmanidas, glandem flammata fronte recepit,
 Splendidaque æternam retulit sub funera laurum.
 Tu felix, pulcræque necem fortitus, & isto
 Dignam animo, captis Byzantî mœnibus ingens
 Corrueres, Cruce purpureus Scythicoque cruore.
 Hoc miserranda tamen, Princeps, solabere fata.
 Jam tibi sat decorum, congestaque præmia laudis.
 Eximii simulacra Ducis volitantia longè
 Per populos latèque coli tua novimus ora,
 Grandiaque immenso celebrari nomina plausu.
 Et tua longinqui jactant præconia * Reges :
 Diversâque Aulâ, gestis miracula rebus
 Gratantes, donis absentem insignibus ornant :
 Gloria & augustis manibus te Fama coronat.
 Inviçtus, Serine, viris, victique ruinâ
 Oppressus ; tum castra petis fulgentia Divûm,
 Cælestem post sacra ferens certamina palmam
 Junctus Avis, meritosque agitas super astra triumphos.
 At mihi quæ tanti fuerint solatia luctûs ?
 Tu Scutum & Gladius Patriæ ; quo sospite motus
 Nunquam Threïcios expavi, Osmanica bella ;
 Quo Duce magnanimas inter caput ardua gentes
 Extuleram, præincta novis Regina trophæis.
 Nunc Thracum effrænis exposita incurribus, orba

Comes' Stroz-
 zius, Serini
 prius collega,
 occubuit ad o-
 ram Muræ flu-
 vii.

* Christianiss.
 & Cathol.

Præsidio, quid agam ? ni tu, clarissime, Fratris,
 Petre, vicem partesque subis, lux altera Regni
 Spesque salusque mei. nec tu sacrata ciere
 Bella rudis, Thracumque fugacia cedere terga.
 Tuque agè fulminei vires animosque Parentis,
 Expectate, refer, laudesque haud degener imple,
 O Juvenis ! per nota parem vestigia gressum
 Srenuus accelerans : & Avorum ingentia facta,
 Et Pater & Patruus sublimibus excitet ausis,
 Serine, Odrysio nomen fatale Tyranno.

Hos inter gemitus complexa Croatia natum,
 Semianimemque fovet gremio, siccaturque cruorem.
 Pannonia excepit luctum ; planctusque secuta
 Stiria, Carniola, & pallente Carinthia vultu ;
 Austriaque, & comites trepido circum agmine Nym-
 phæ
 Mœrorem ingeminant, lessumque Europa frequentat.
 Attonitæ lugent ceu publica funera gentes
 Christiadum : at festis collucet Turcia flammis.

Frater Nicolaus
 dux & ipse
 fortissimus.

DE NECE

PETRI COMITIS SERINI

APPENDICULA.

TU quoque tot palmis olim spoliisque superbus
 Quàm melius Turcâ cecidisses victor ab hoste !
 Quàm melius vel Apro victus, Serine, jaceres !
 Heu, qui præcipitem casus ? qui te ambitus egit,
 Aut ultricem animus versans malè providus iram ?
 Ah miser, & tragicæ exemplum lacrymabile fortis !
 Hoccine atrox, immane, horrens tibi fata theatrum
 Servabant infesta, cadens ut Cæsaris armis
 Damnato imbueres funestum sanguine ferrum ?

LEONARDI FRIZON
ALPHONSO MANCINO,
LESSUS.

IT E, & feralem M A N C I N O ducite pompam,
O miſeræ, ô pullâ mœrentes cyclade Muſæ.
Occidit, heu ! Clarij decus & ſpes aurea montis.
Præfica Calliope, ceu quondam in funere Nati,
Crudeles clamet Parcas, crudelia ſara :
Et gravius, quàm cùm Spartanâ Hyacinthus arenâ
Concidit, ac niveos fœdavit ſanguine vultus,
Lugeat & gemitu flores inſcribat Apollo.
Sidereo exutus flagrantem murice pallam,
Pro viridi lauru, roſeæ pro lucis honore,
Cæſariem impexam taxoque atraque cupreſſo
Induet, horrificaque caput ferrugine condet.
Hac ſpecie ſordens, verſoque inglorius ore;
Squallenti lamenta Choro, luctuſque perennes
Præcinet, attonitumque implebit queſtibus orbem.
Fangere, Mancino amiſſo, dolor iraque ſuadent
Cum cithariſque lyras, atque omnia carminis arma.
In lacrymas totis Parnaffus fontibus exit.
Ite, jubet Phœbus, feralem ducite pompam,
O miſeræ, ô pullâ mœrentes cyclade Muſæ.

Jam molles vincentem annos ſuper ardua Pindi
Pegaſeo ingenii vis egerat ignea curſu.

In pariſi. Col-
legio Claro-
montano S. J.

Jam quater inſignem Parnaffi maxima præſes,
Candida vittatâ circumdans tempora lauro,
Extulerat Themis, & donis regalibus auctum,
Annua quæ doctæ L O D O Ì C U S præmia publi
Conſtituit, ſtudiis acuens certantibus Artes.

Avunculo car-
men, Templū
Famæ inſcri-
ptum, obtule-
rat.

Dædalias ſcit Fama manus, operoſaque Tempa,
Præſenti auguſtus quæ numine J U L I U S implet,
Primitias Pueri ingentes, pulchrumque laborem.
Hei mihi, quòd tantis operari haud longius aris

Conceſſum,

Concessum, & noto solennia reddere vota
Indigeti, festas Jano referente Calendas !
Vivit opus, solidoque ingens stat marmore Templum:
Ipse fuit, pheretroque jacet lacrymabile corpus.
At Famæ lugubrè sonat tuba ; lumina fletu
Cuncta natant, vulsæque fluunt cum sanguine pennæ :
Et falsus delubra obiit nigrantia sudor.

Vos Templi Artifices testor, Templique ministras,
Nunc miseræ, & pullâ mœrentes cyclade Musæ.

Tu quòque Celtarum gaudens jactare triumphos,
Belgica quos J U L I auspiciis dedit ora recentes,
Nunc agè ferali, Mavors, accedere pompæ,
Præreptumque tibi ALPHONSUM lugere memento.
Romanæ quem tu florem virtutis, & alto
Sanguine majores animos in bella gerentem,
Parcarum invidiâ, & fato, Mars, perdis acerbo !

Jam tibi se Regique acer devoverat ultrò,
Heroum in laudes, magnumque in nomen iturus,
Parisiæ impubem tegetet licèt umbra palæstræ,
Musarum illecebris & non ignobilis oti
Dulcibus intentum curis placidæque Minervæ ;
Jam tamen ardentes agitabat pectore pugnas,
Aonia & fociis miscens certamina victor
Ludicrâ innocui specie Mavortis ovabat.
Ducite Mancino, feralem ducite pompam.

Sic, ubi natalis tenerum spelunca leonem
Incluserit, fulvæ crescentem ex ubere matris,
Cui neque robur adhuc, necdum juba vestiit armos ;
Jam fremitus tentat patrios, caudæque laceffit
Verbera, primævosque irasci discit in ungues,
Erumpitque animis, & rictu sævit inermi.
Sic rudibus vivos ignes versabat in annis
Belligeræ virtutis honos, stimulisque premebat
Alphonsum, magnoque exercita pectora Phæbo.
Plurimus ante oculos Frater, civilis Enyo

Paulus Mancinus
 commissus
 ad portam Lu-
 retiae Antonia-
 nam praelio cae-
 sus.

Cum rapidos ageret cognata in viscera Gallos,
 Purpuream qui dena animam per vulnera fudit ;
 Troilus invicto qualis congressus Achilli
 Dardaniae ad muros cecidit, portisque sub ipsis,
 Mirandus pariter juvenis, miserandus & hosti.
 Atque ea Germani occurrens morientis imago
 Alphonsum exemplis fata ad majora vocabat.
 Nobilius Fratri invidit letum æmulus ardor.
 Ducite, Pierides, feralem ducite pompam.

Illum & cœruleo turbatus gurgite Thybris,
 Regalemque urnâ diffundens Sequana lympham
 Flebant, & vasto resonabant littora planctu.
 Officiis funus paribus commune frequentant
 Hinc Franci, hinc Latii. Nec matri cedit honore,
 Quæ fido illustrem gremio pia fovit alumnum
 Lutetia, & Romam tendit vicisse dolendo.
 En, Clarum obvolvunt ut tristia nubila Montem,
 Latus ubi ingenuis dociles Puer Artibus annos
 Excoluit, nitidaque tulit de fronde coronas !
 Rex etiam, Rex, quo meriti non arbiter usquam
 Certior, ereptos leto sibi luget amores,
 Lilia ceu dejecta ruentibus æthere nimbis,
 Paulumque, Alphonsumque, & nomina cara reposcit,
 Nomina Gradivi fastis Phœbique notata.
 Ducite, Castalides, Mancino ducite funus.

Omne rapax Libitina caput, discrimine nullo,
 Illidit tumulo, insultans. Nil florida vere
 Primo atas, formæque decus flexere furentem :
 Sed neque crinales lauri, neque clarior astris
 Purpura, Fortunæque omnis congesta supellex.
 Hos adeo incurfus, & ineluctabile fulmen
 Borboniâ excepit sublimis Julius aulâ,
 Immitique Suos consumptos funere vidit.
 Hostiles animos toties, viresque superbas
 Consiliis armisque invictus contudit Heros :

At sævam evaluit Lachesis quis frangere legem ?
Cum sanctæ inferias atque annua justa Sorori
Solveret ; ecce aliud funus supèr, addita Matri
Exinctæ Soboles, luctum integrat, atque cruento
Pectoris angusti rescindit vulnere vulnus.
Parcite, Fata, graves producere longiùs iras ;
Privata ne clade suos Dux ipse triumphos
Atterat ; & , Francæ dum gaudia publica gentis
Instaurat, simul ipse novo pugnare dolori
Cogatur, durasque vices superare ferendo.
At vos Mancino feralem ducite pompam,
Heu miseræ , heu pullo mœrentes sŷrmate Musæ.

O vitreas hominum spes , & ludibria rerum !
Stellatis circumvolitans blandissimus alis
Mancino ridebat Honos ; geminisque ferebat
Sacrorum hinc decora, hinc belli decora obvia palmis ;
Murice fulgentes trabeas, rutilosque Galeros,
Alphonisque oculis rutilantia gratiùs arma
Jactabat, cœloque animum tollebat ovantem.
At subito immani media inter talia lapsu
Involat, & tristi Puerum Mors obruit umbrâ.
Fallax, heu nimiùm fallax, quæ mollibus vlnis
Ambierat, dulcemque sinu lactabat Alumnum
Fortuna, & plenis influxerat aurea rivis !
Perfida mox tenerum, ludoque assueta procaci
Rejicit, & summo infontem rapida excutit axe.
Quem Latia ardebat certatim & Gallica tellus,
Occupat infelix pheretrum, prædaque potitur.
O curæ fragiles ! ô vota caduca Potentum !
Ite, & feralem Mancino ducite pompam,
Ah miseræ, ah pullâ mœrentes cyclade Musæ.
Ipse quidem nullo celeres fugientis in auras
Fortunæ desiderio, casuque movetur :
Nec largum in socios, & opes diffundere prònum,
Parca tenacem animæ, vitæque incuset avarum.

Dignior & tantò lacrymis luctuque perenni,
 Qui gemitum Alphonius cruda inter fata repressit
 Maturâ virtute potens ; animumque virilem
 Extulit, afflatusque hausit propioris Olympi.

Hieronyma
 Mazarina, spe-
 ctatæ virtutis
 matrona.

Illic, emeritam Pietas quam vivida morti
 Eripuit, superas Genitrix Heroïdas inter
 Dilectæ occurrit Soboli, gremioque receptat
 Latam, exultantem. Non hæc Parnassia Famæ
 Tempa, inquit ; sed quam fundavit Gloria molem,
 Nexilibusque astris solidoque adamante coruscantem.
 Has, Alphonse, domos, hanc summi Numinis arcem
 Ingredere ; & cœlo jamnunc assuesce fruendo.
 Quàm metui, ne quid facies tibi blanda noceret
 Peltiferæ Sirenis, & illætabile carmen ;
 Ambitio præceps, aut insidiosa Voluptas !
 At breviora tibi puræ compendia vitæ
 Descripsit, placitamque animam properavit in astra
 Cœlicolûm Genitor terris educere iniquis.
 Has olim sedes æternaque templa capeisset
 Noster, & imperii consors in parte sedebit
 Julius, atque alio victor spectatus in ostro
 Post martem edomitum latè, prostrataque monstra.
 Huc, Fidei asserta pro majestate, triumphum
 Invehet, ætheriisque addet sua Sidera campis.

Dixerat ; & Fratrem ostendit, formosâ gerentem
 Lilia, gemmiferisque insignem tempora palmis,
 Nec jam mortalis securo flore juventæ.
 Fortunati ambo, nullum quos dividet ævum
 Faterno amplexu, neque dulcia vincla resolvet !
 Natorum media æterno pascetur amore
 Mazaris, Ausonias inter clarissima matres :
 Ledæis Geminis par Fratrum illustrius ibit
 Signiferi antiquos inter crescentis honores.
 Ite, & cœlestem Mancino ducite pompam,
 Jam lætæ, ac nivea splendent cyclade Musæ.

HEROICON LIBER II.
CURRUS GLORIÆ
JULIO CARD. MAZARINO

85

IN TRIUMPHALEM
E BELGIO REDITUM

AN. M. DC. LVIII.

VARIA RERVM INSIGNIVM

Principumque virorum imagine celatus.

SCANDE triumphalem, JULI, quem Gloria currum
Admovet insignem palmâ, spoliisque nitentem
Belgarum ; quales nec Martia Roma quadrigas
Gentibus accepit domitis, quantasque nec ipsa
Fabula procudit, vel Phœbus rexit Apollo.
Nonne vides fronte in primâ rutilantia longè
Sidera, laurigeroque evinctas fasce secures,
Romani specimen generis, sub luce galeri
Purpurea ? tantus domino cui serviat axis ,
Præfixa ostentant heroæ insignia fortis.
Circùm efficta micant laudum monimenta tuarum ,
Celatique auro spirant, decora alta, labores
MAZARINE : sacros currus Victoria vestit.

Quâ latus excurrit dextrum, Mavortia tractu
Porrigitur vasto Germania ; truncaque ponit
Sequanæ ad imperium captivus cornua Rhenus :
Et, Rheni quæ longa sedent per littora * Nymphæ,
Turrigeram ingenti submittunt agmine frontem ;
Pacificæque tibi munus gratantur olive.

Continuò Imperii fines, Germanicaque arva
Excipit, ac veteri Domino parere fatetur
Belgica inexhaustis tellus generosa triumphis.
Retheli palmam hîc duplicem, fuso hoste, recepta
Urbe, manu legis ipsè tua, fortissime Juli:
Debitaque Atrebates civilis præmia quercûs

* Urbes à Trā-
cis in Germa-
nia capte.
Pax Monaste-
riensis.

Belgiæ victo-
riæ.

Purpureæ attexunt fronti, obsidione soluta,
 Direptisque hilares castris palantis Iberi.
 Dehinc Medium aspicias dejecto vertice Montem,
 Castrumque premi, & celeri Venantia nuper
 Mœnia rapta manu. Hic series densissima rerum;
 Quattuor immanes repetitæ stragis acervi,
 Innumeræque urbes, tot Ibero ex hoste trophæa.
 Cogestæ assurgunt prædæ: Scaldisque fugaci
 Amne jugum indignans, & fracto debilis alveo,
 Lisaque jam fræni patiens, domitusque Mosella
 Argento hic spumant solido, nec jam ipse recusat
 Oceanus Franco sævum addixisse tridentem,
 Et socias famulo subvectat corpore classes.
 Rursum injecta sibi Mardiko sensit ab alto
 Vincula; Dunkerquæ mutatas sensit habenas;
 Et Gravelingæ capta simul arce secutus
 BORBONIDÆ imperium, toto jam Celticus optet
 Ire mari, atque eadem Belgas data jura per omnes,
 Singula quæ vivis opifex splendescere signis
 Edocuit; factis, Juli, tu grandibus ornas.
 Hic etiam fulvum ex auro molita leonem
 Fabra manus. multo concisus vulnere membra,
 Gallorumque metu speluncis abditus horret.
 Ille quidem obtritatos irasci tentat in ungues;
 Sed cassus furor, & rugitus fingit inanes.

Nimbofa apparet diversa in parte Pyrene,
 Celtarumque memor quæ nomen Iberia servat.

Rosæ, urbs in
 Catalonia.

Hinc formosa Rosis necit Galatea coronam,
 Liliaque Hispano perfusa cruore rubescunt.

Tum dextri plaga quæ Currus sese extima tollit
 In sellam; Romæ, unde sacer te, Maxime Juli,
 Transtulit ad Francos Genius, collucet imago
 Tyrrhenumque fretum, scopulisque minacibus Alpes.

Pacificatio Ca-
 salensis &c.

Quam lata Italiæ species! exordia magni
 Magna refert fati, jactatque operosa Casalis

Fœdera. Jam compositæ animis hostilibus iræ,
 Redditaque Allobrogum trepidæ pax civica genti.
 Gallica nec longè Tusco volat æquore classis,
 Neptunique arcem geminam rapit. intremere omnem
 Ausoniam, & pavidò credas pallerè metallo.
 At propius Francas experta Valentia vires :
 Eridani lætis adolefcunt lilia ripis.
 Addua nequicquam castris munitus Iberis,
 Sponte ferox tumidusque, alto nil gurgite cursus
 Belligeros Gallorum, & fortia cœpta retardat.
 Adverso insultans Mutinæ Dux trajicit hosti,
 Perrumpitque obices. medio sese arduus effert,
 Nec genitore minor, pugnæ Almericus in æstu.
 Inde operi, laudique acer Navallius instat,
 Ah, fragilem ardenti trajectus glandè galerum;
 Insubrumque quatit campos, urbesque fatigat :
 Jam Mediolani portæ pulsantur, & arces.
 Mortaræ incubuit rapidi vis horrida Martis,
 Et Lodoicæos victoria clarat honores,
 Indigetis testata manum, caroque Nepoti
 Impensum Proavi regnato ex æthere munus.
 Franciadum auspiciis an lux felicior, & quâ
 Gentiles potius liceat sperare triumphos?
 Hac eadem Atrebatis exuta Hispania castris ;
 Funditus oppressi servatis civibus hostes.

Parte ex adversa Currus tibi credita, Juli,
 Gallia, & ancipiti toties exercita casu,
 Explicuit campum immensum, laudisque theatrum,
 Quo tua se populis Virtus, ævoque sequenti
 Approbet Invidiæ domitrix, sortisque sinistra.
 Namque opifex lætis aspergens mœsta recenset.
 Proxima deliciis mollem fastidia vitam
 Excipiunt : & sæpè acunt se rebus acerbis
 Dulcia quæ obtuso languebant gaudia sensu.
 Prima renidentis facies lætissima Regni

D. Ludovici
 festus dies vi-
 ctoriis insigni-
 tus.

Regis puericia
 triumphalis.

Enituit : puro Zephyri tantum aëre ludunt ;
 Candida purpureis plaudit Victoria pennis.
 Rexque puer, tua cura, tuo venerabile pignus
 Deposited gremio Patris morientis ab ore,
 Clara ministeria, & partos miratur honores ;
 Jamque triumphatos victor supereminet hostes.
 Ac tibi, pro meritis, toto se infundit amore,
 Auspice quo virides fundunt cunabula palmas,
 Crescentesque videt lauros crescentibus annis,
 Jam miris prægressus avos puer inclytus orsis.

Ecce autem Stygius prorumpit ad æthera turbo,
 Ardentesque inter Furias Discordia demens,

Civiles mo-
 tus.

Civili Gallorum animos, in mutua fortes
 Funera, præcipitans certamine. protinus omni
 Parte tremunt concussæ urbes : ruere omnia visa.
 Tela inter medius, ferrum undique & undique flam-
 mam,

Heu ! Paulus cadit ille tuus, quo gratior alter
 Non fuerat Juvenis Regi, non fortior armis ;
 Mancinæ spes gentis, amor dulcissimus Aulæ.
 Illum exspiranti similem, similemque gementi
 Extudit Ars, læcera inclusam dum viscera mortem
 Glande gerunt plumbi accensâ ; solatia quanquam
 Magna ferat leti, Regis quod victima tristes
 Occidit ante oculos. nec tantum vulnere deno
 Sanguinis, æterni quantum profluxit honoris.
 Sanguine tu caro aspersus ; quoque icta Sororis
 Progenies, crudo transfixus vulnere corda,
 Exuperas hostemque armis, animisque dolorem.
 Sic tu Fortunæ, Juli, congressus iniquæ,
 Tartaream extinguis pestem : & Prudentia victrix
 Per populos altâ spectata in luce triumphat
 Turbine sub tanto, & cæci caligine regni.
 Pulsâ infelici rediit Concordia Regno:
 Extorti manibus gladii, tædæque furentum ;

Sanctaque præteritos mersere oblivia motus.
Vindice te, læsos Princeps instaurat honores,
Prodigus & veniæ Princeps, parcusque cruoris ;
Regiaque inscribit Patriæ Clementia Patrem.

Læta serenato succedunt undique cœlo,
Donec in extrema lævæ regione curulis
Cernitur incumbens stratis, letoque propinquus
BORBONIDES, febri, heu, miserum correptus anhelâ.
Antè quidem ingressus castris victricibus Heros
Gesta recognoscit Turenæ, operumque labores
Collustrat, campumque hostili à cæde recentem.
Sanguine fumat adhuc, segetemque effudit Honoris
Purpuream, & magnæ servat vestigia famæ.
Dunkerquæ bis-capta equitat per mœnia Princeps,
Victor ovans ; legesque viris, & jura reponit,
Sedulus intactâ pro majestate sacrorum.

Nec Morbi insidias, Febrimque labore calentem
Respicit, ille etiam, propiùs dum singula lustrat,
Projecti (ut perhibent) graveolenti corporis aurâ
Afflatus. sedenim concepta incendia venis
Diffimulat, sedem repetens, aulamque Caleti,
Successu lætus rerum, majorque triumpho ;
Victoremque pudet morbo succumbere inertî.
At superante malo (quid enim mortale resistat ?)
Rex hominem afflicta demum virtute faterur.
Non tamen ille Ducum, proprio in discrimine, torpet
Immemor, excepto decorat quos vulnere pugna ;
Quidve agitent sani, exposcit, qui cursus agat res :
Quaque licet, sua signa animo, bellicque tenorem
Persequitur, curasque ægro sub pectore versat.

Interea sordentem Aulam, suspensaque mutis
Arma tubis, ipsumque adeo lugere Triumphum,
Et caligantes mœstâ formidine cernas
Parisiis, Morinosque & Franci quidquid ubique est ;
Pæonios trepidare senes, Regnoque minantem

Regis, post ex-
pugnatam Dû-
kerquam, mor-
bus Caleti.

Interitum horrentes, studio diffidere, & arti;
 De cælo veluti tactas horrescere gentes.
 Fida comes Regem Pietas, & fervida Vota
 Circumstant, vigilemque animum super æthera tollūt.
 Tum cælo Elicium Numen deducere adortæ
 Relligio, sacrique Fides non inscia cultūs,
 Quotquot iêre dies, penetrali in sede litatum
 Cominus ostentant, hominum Vitamque Salutemque,
 Et cupidi invitant cupidum sub pectoris aulam.
 Decumbenti adstas; & motus anxius omnes
 Observare mali, tacito suspiria corde,
 Eruptura ultro, cohibes; timidosque medentes
 Hortaris, Juli; & Matri solatia fessæ
 Crebra ciens, meliora jubes sperare merentem.
 Nec temere, longo febris jactatus ab æstu,
 Collectâ jam mente, sibi jam redditus Æger
 Ore vocat; propiusque toro succedere jussum
 Te, Juli, affari, rerumque arcana videtur
 Pectore flammato tutam deponere in aurem.
 Scilicet insignem ante alios testatus amicum,
 Hoc fidei, rerum supremo in cardine, pignus
 Exigit: armatas fraudes, & bellica furta
 Qui toties acri nudaris providus arte;
 Incautum ne mors tacito pede lubrica fallat,
 Dum Reginam horror quatiat præsentè periculo,
 Ipse adeas, rebus non sic acceptè secundis,
 Nuncius instantisque, & non reparabilis horæ.
 Hæc virtus, hæc summa tui fiducia, Juli;
 Sic Pietatem hausit, gaudetque occurrere fato.
 Quâ vox illa animum nece tum confecit amantem!
 Purpura pallorem traxit; mistaque verendus
 Majestate Dolor, sculpti toto eminet ore.
 Versa tamen Morbi in ventos cessere pericla:
 Detonuere poli, & vacuæ sine fulmine nubes.
 Currus ubi lævam sellæ confurgit ad oram,

Mazarine, tibi melior jam arridet imago.
Vicit, iô, supplex aversum Gallia Numen ;
Maternæ vicere preces, vicere P H I L I P P I
Fraternæ lacrymæ, & felicitis cura Ministri.
En, meritis fecunda, pioque enixa dolore,
Quem cœlo expressit, terris partum ANNA retentat,
Asserit & Francis divinum sospita pignus.
Et natalitiam referunt Soteria lucem,
Ac superant, caro experti jam muneris usu.
Tunc pretium ignotum, ac teneri spes una puelli.

Gaudia securo passim volitantia Regno,
Servato pro Rege, vehit formosius aurum,
Brutaque lætitiæ sensus hausere metalla,
Quæ prius immenso confusa Lutetia luctu,
Suppliciter mœrens, arisque affixa pependit,
Emicat hîc rutilis in flammam accensa pyropis.
Concurrunt urbis Proceres, ingensque Senatus.
Ante omnes, Princepsque togæ Seguerius ibat,
Et pompam, pietate gravis, ducebat ovantem.
Templa sonant cantu ; festis micat ignibus aër ;
Ignibus ardentes vici, fluviisque relucet ;
Bacchæi totam latices fluxêre per urbem :
Cunctaque sollenni gratatur Francia ritu.
Qualis, ubi obstructi defectu exterrita Solis,
Voluitur in noctem & pariter cum Sole laborat
Natura, & mœsto sumit lugubria mundo.
At simul obstantem latebroso corpore Lunam,
Transiit, offusaque velut redivivus ab umbra
Emicuit Titan, victriciaque ora retexit
Aureus, & roseo latè spectabilis igni ;
Explicat abstersâ nitidos ferrugine vultus,
Visaque jam Natura suo cum Rege renasci est.
Jam rebus cum luce redit color : omnia lata :
Ipse etiam pecudes, ipse gaudere volucres,
Æquora camporum, & rigidis juga consita silvis.

Deiparæ Vir-
gini Assumptæ
Rex Parisiis
acceptam salu-
tem victorias-
que gratulatur.

Episcopus Ru-
thenensis, an-
tea Regis in
pueritia Præce-
ptor, Carnotē-
se, ac Salmu-
riensē Virginis
templa pedes
adiit, Ludovi-
ci nomine, vo-
tum in morbo
conceptū per-
soluturus:

Regalem invehitur curru Lodoïcus in urbem,
Obvia quæ excussis procurrere mœnibus ardet,
Gestitque, & plenis cives agit undique portis.
Christiparæ Princeps hostilibus inclyta signis
Sospes init templa, & festo veneratur honore.
Nimirum Dominæ primâ devotus ab alvo,
Regna super; pompasque suas, sua sacra quotannis
Rite colens, patrii renovat sollennia voti
BORBONIUS: munusque suum Patrona tuetur.
Quid repetam cæsas acies, direptaque castra,
Edomitasque urbes, transvectæ sidera Divæ
Augustam solito lucem signare Triumpho?
Accelerat mitra effulgens, lituoque Rutheno
Antistes, Pastor populi, Regisque Magister,
Et longum metitur iter pedes. Addidit alas
Regis Amor, Pietasque: urbes mirantur euntem.
Virginis latus templis Regalia Vota
Perfolvit: Magnæque dicat quæ splendida Matri
Munera, Victrici Morborum appensa trophæa.
Testatur Carnotum ædes, venerataque Crypta,
Mysticus unde animis, & Divæ conscius horror
Funditur, antiquo Druidum clarissima cultu.
Sponte Salutiferæ sacrato Virginis antro
Mystarum pia turba, novemque operata diebus,
Angustis in rebus opem, Regique salutem
Ambierat voto, & notam prenâverat aram.
Salmurii paribus decorata altaria votis
Cœruleus Ligeris gemmatâ suspicit orâ.
Ergo age, nec dubiam tanto, Regina, Clienti,
Sic memori gratoque favens, defende salutem:
Da pede inoffenso faciles evolueret cursus
Annorum, & factis ingentem extendere vitam.
Quem natum, & Franci revocatum à funere debent,
O, proprium annueris, & non revocabile donum,
Belli ferale converso cardine portas

Dum claudat, mox Odrysium ducturus in hostem
 Olim Asiæ spoliis, domitoque Oriente superbos
 Francigenas, Proavum fato meliore secutus.
 Hac ibit. Satis ipse sibi jam vixerat Heros,
 Longævus, si Regum ætas censenda triumphis ;
 Sat patriæ nondum, & fatis. majora supersunt ;
 Debent astra fidem, & secli venientis honores.

Julî consiliis aperit se longior ordo :

Hic & fata reget ; finget Prudentia sortem

Postquam omnis cecidit languor , viresque refectæ ;

Aspice, degeneri fugiens torpere veterno,

Venatu indulget Princeps, * per florea culta

Quâ nitidæ Fons agmen agit crystallinus undæ.

Nunc medio volucrem jaculans petit acere prædam ;

Letiferæ certo deprendit vulnere glandis :

Nunc incensus equo prævertitur alite cervum

Æripedem, aut instans spumanti cominus apro

Crudum silvestri assimulat certamine martem.

Jam puro ingreditur campo ; belloque remotus,

Quod superest, Custodum armis in pace cohortem

Exercet, ludique genus regale capessit.

Undique visuri ereptum discrimine summo

Legati, Procereſque ad regia tecta frequentes

Confluxêre : agris ridet Lepor urbe relicta ,

Sospitaque officiis fervet certantibus Aula.

Gratantum Aurelius medio Dux agmine fulget,

Gravelingæ antehac domitor, dum Celtica GASTO

Arma regens, Fratrem supplet, magnoque puello

Promovet imperii fines, Belgasque triumphat.

Tum Regis morbo edomito, Parcaque repulsâ

CONTYNUS; Rhodani à populis placidoque Garumnâ

Adveniens ; Julî reditu, partoque triumpho,

Ingenii bellique acer Contynus ovabat.

Heu , quinam ARMANDI præceps Mors gaudia
 turbat,

* Ad prætorii
 Fontis Bella-
 quei.

* Filiolū prin-
cipi ex Anna-
Maria Mar-
tinossia fuscē-
pium.

Obsidio Gra-
velingæ.

Vix * ortum infringens regali è sanguine florem!
Lætitiæ extremum carpit Dolor invidus agmen.

Ultima, quæ Sellæ pingit pars dorsa Curulis,
Gravelingæ arces, & Regia castra, tuosque
Auro animans, Juli, descripsit, Magne, labores.
Stat Sannectarius Ductor, totumque coronat
Arte locum. dextrâ Mavortia sceptrâ coruscant,
Audacesque urgent in honesta pericula Celtas.
Haud procul inde manus Hispanâ clade cruentas
Arduus ostentans, hostes Turena coercet,
Et medio tegit armorum socia agmina vallo,
Dixmudâ, & Furnis raptim, Berguâque potitus
Dunkerquæ victor; felix, si protinus almæ
Det Fideique manus, Romanaque signa sequatur.

At Gravelingæ triplici circumdata fossâ,
Undosâ, ingenti, lunatisque obsita muris
Mœnia præsidio Hispani trepidante tuentur.
Nec quisquam erumpit portis, aut castra laceffit:
Missilibus certant flammis arcere ruentes
Franciadas, cannisque necem displodere ahenis.
Acrius & Francis effusa incendia castris:
Immanesque globos, tempestatemque vomebant
Sulfuream assiduo tormenta frementia jactu.
Mole labant quassî tantâ, passimque ruinam
Dant muri; turreſque, & saxea cornua cedunt.
Pulvere fumantem piceo, candere tabellam
Igne putes: mistusque operi sonus, iraque flammis,
Et pavor, & leti centum atro turbine formæ.

Instant assultu vario, diuulsæque faxis
Saxa inter Franci irrumpunt, Francisque remissi
Helvetii, certatim, & flammea corda, Britannii.
En Scoti objecto tardantem gurgite fossam
Intrepidi nando, visu mirabile, vincunt
(Belligero anteeunt gladii, & fluviale profunda
Ore secant) castra adverso jam littorē figunt.

Atque alius, duce quo legio Campana cohortis
 Gaudet, in hostiles nudo se corpore fluctus
 Conjicit, artificem media inter praelia ducens,
 Suffossurum urbis tacito molimine muros ;
 Deinde cavam implebit nitrato pulvere labem.
 Fatale inventum muris ! nam pulvis ubi ignem
 Arripuit fune admotum, rarefcit & aer
 Accensus, nec flamma viam clauso invenit antro ;
 Impatiens vi rumpit iter, latera omnia rumpit
 Carceris, impositasque arces. tonat undique tellus,
 Et stragem immensam convulsis mœnibus edit,
 Exitio involvens homines, hominumque labores.
 Horrendæ artificem cladis dux lintre latentem
 Ipse palam ducit, ferrum manus altera gestat ;
 Altera contempto cymbam regit hoste sequacem.
 Nec caret eventu felix audacia justo.
 Quippe ubi trans fossam applicuit cymbamque vi-
 rumque ;

Cuniculi bel-
 lici.

Incolumis, socium turba plaudente, remenso
 Tuta petit stagno nudus loca, quem super ardens
 Grando sonat plumbi, & stridentes increpat undas.
 Multaque præterea bellantum exempla virorum,
 Non audita prius, venientibus edita seclis,
 Gallica castra vident, obsessusque horret Iberus.

Nimirum hos animos Julii vicinia fecit ;
 Quem pro Rege, gravis post sæva pericula morbi
 Mollius ad cælum & patriæ interiora reverso,
 Restantem servat statio opportuna Caleti ;
 Unde frequens castra invisit, durosque labores
 Præsens ipse levat. Tanto sub teste superbus
 Arma movet ; Regique suam, spectante Ministro,
 Virtutem Ductorque probat, milesque : nec hostem
 Obsessum contra tanto contenditur æstu,
 Quantum inter sese pulchro certamine pugnant,
 Quis laudem, Magnique ferat suffragia Julii.

Laudibus hic donisque favens, fortissima corda
 Extimulat; pretiisque animosos addit honores.
 Ergo alacres plagasque, & aperta pericula rident,
 Evertuntque moras, propiusque accedere tendunt.
 Jam superant muros; jam propugnacula late
 Cuncta tenent, nudamque invadunt cominus urbem,
 Infidiis nuper, pugnaque exceptus iniquâ,
 Rursum ex captivo victor, pactique sequester,
 Arce Coaslinus summâ minitatur Ibero
 Præfecto (Sannectarii sic jussâ ferebant)
 Ni Gallum admittat discinctæ mœnibus urbis:
 Pestiferoque specus tres fœtas sulfure monstrat.
 Mittitur extemplo portis Orator apertis;
 Qui Julî leges, & regia fræna capeſſat.
 Manqueſius victos muris educit Iberos,
 Et Mazarinum prono veneratur ovantem
 Pectore. dat cladis Victor solatia tantus.
 Ipse autem captæ succedit Julius urbi.

Talia multiplici cælavit imagine facta,
 Aureaque illustri circumfert GLORIA Curru.
 Impulit ipsa volans volucres auriga quadrigas,
 Instrato alipedes ostro, cristisque superbos
 Puniceis, pictoque aspersos lilia tergo.
 Vectorem sensere suum; sacroque laborant,
 Exultantque onere, & Zephyros prævertere certant.
 Auro fræna micant, auro bombycina lora;
 Aurea collucet pernicipibus ungula plantis:
 Crispa juba, & crebro vittata adamante coruscat.
 Interiorem ardens consternit purpura currum:
 Purpureusque super, Romano & honore togatus,
 JULI, Cæsareoque sedes augustior astro;
 Aëraque, & totos incendis lumine currus.

Quadrigas festa antevolat denso agmine pompa.
 Vexillum dextrâ niveum Victoria tollit,
 Flores inscriptum, cœlestia munera, Francos.

Argento resonante tubam, byssoque nitentem
 Fama gerit chlamyda, & radiantes explicat alas.
 It, roseis quæ corda ligat Concordia fertis,
 Et Fortuna Redux, & aperto Copia cornu,
 Lætitiæque comes trabecâ splendente Triumphus,
 Et Curæ vigiles, indefessique Labores,
 Musarumque Chorus, Virtutum exercitus omnis.
 Post currum depressa jugo portenta trahuntur ;
 Invidia infelix, livente Calumniâ vultu,
 Proditioque, & sanguineâ Discordia pallâ,
 Extinctos lacrymans tædis fumantibus ignes ;
 Fraudesque, Infidiæque, exarmatumque Duellum,
 Arma inter, dominas horrescunt Crimina Leges.
 Tantam agitat, Juli, curru tibi Gloria pompam :
 Plausibus excipiunt Francæ longo ordine gentes:

At Musæ læto meditantur carmine laudes,
 Facta sacrum cæli ingenio descripta per axem :
 Ut Puerum ingentem lustrali è fonte renatum
 Suscipiens, pulchro Lodoïcum nomine signas :
 Ut Pacem, Bellumque regis; Themidemque, Fidemque
 Rite foves : Regi ut princeps, Regnoque Minister
 Advigilas ; victis Belgas Insucribus addis ;
 Fata moves populorum, animo complecteris orbem:
 Auspice te, qui partus honos ! te præside, Juli,
 Gallica se quantis attollit Fama trophæis !
 Te domitæ stupuerè urbes : te mente sagaci
 Fractus fugit Iber. Ostendæ ignobile lucrum,
 Et Francâ Hispanam fraudem virtute rependis:
 Connexas fecunda ferit Victoria lauros,
 Atque aliam ex alia jussit succrescere palmam:
 Tu, rem Germanam vario miscente tumultu ;
 Imperii libras sortem ; populosque feroces
 Jungere, & Arctoos concordî fœdere Reges,
 Sarmatiæque graves tendis componere motus.
 Casareas Aquilas Gallorum à finibus arces,

E. C. Mazari-
 nus Regis in
 baptismo su-
 scepor.

Sacramento adigens Romanum in publica Regem
 Pacta, neque Austriaco temerandas sanguine leges :
 Et tua Germani Troceres se in fœdera nectunt.
 Salve Romulidûm Soboles, decus addite Francis,
 Et molli dignare aditu tua facta canentes.
 Aula, revertentes semper gratata Triumphos,
 Sic festo celebret sollennes munere pompas ;
 Emeritumque altâ LODOÏCUS laude coronet.
 Auctior immensos agitet sic Gallia plausus,
 Mazarina sequens tranquillo Sidera cursu
 Gallia adoratos fascēs, dominasque secures,
 Julia, quas niveis frangat Clementia vinculis,
 Victricique recens ornavit fronde Triumphus.

Hæc memorant Musæ : referent hæc carmina gentes,
 Seraque fors recinet seclis volventibus ætas,
 Necdum perfecta, & studio properata calenti ;
 Cuncta licet, meritis impar, Phœbea cadat vis.
 Interea æterno laudes insculpet Olympo
 Gloria, te, JULI, trans nubila, transque coruscas
 Tempestatum arces, Fortunæ mobilis auras,
 Sublimi rapiens media inter sidera Curru.





HEROICON

LIBER III.

EMINENTISSIMO PRINCIPI
JULIO CARDINALI
MAZARINO.



*T*RIVMPHALEM tuum è Belgio post multiplices insignesque victorias Reditum, PRINCEPS EMINENTISSIME, cum primū ad me fama pertulit, effusis gaudii magis impetu, quàm artis operâ elaboratis carminibus excepi. Alterum nunc tuum è diversis Regni finibus, ubi pacem summa cum laude constituisti, Reditum aliquantò letiori gratulatione *prosequor, eò sanè illo superiori pulchriorem, quò magnificentius de ipsis quodammodo triumphis triumphasti, cum eorum paratam segetem optatissima Paci posthabendam

* Sub primum à Pyrenæis digressum.

*duxisti; Pacem arctissimo speciosissimoque Regalis
 Conjugii nexu devinxisti; Fortunam tunc maxi-
 mè indomitam, cum blandissima influit, heroico
 planè animo repressisti. Sed qui antea Victori re-
 vehendo Currum, tuorum gloriâ factorum, quibus
 convestitus ornatusque fuit, splendidissimum obtuli;
 nunc, quasi annum Musarum vectigal, Insulam à te
 felicissimis curis augustisque congressibus Paci con-
 secratam, ac verè Fortunatam, exhibeo Pacificato-
 ri, eandem quam nec semel exprompsisti, de te mihi
 benignitatem pollicitus. Animos certè addidit tua
 illa, CARDINALIS EMINENTISSIME, ad
 conditum pacificationi locum hac* pergentis, ho-
 norifica vox, quâ tot inter tantasque curas, qui-
 bus orbem complexus universam, Regum consilia,
 fata populorum moderaris, animum clientis praco-
 nisque tui non immemorem altro significasti; Opus,
 Auctoremque laude aspersisti. Quod si discessus ille
 tuus ex hac urbe, tuâ etiam opinione celerior,
 ob acceptos publicæ rei citius gerende nuncios,
 presentis mihi gratulationis fructum invidit; ob-
 ruere profectò non debuit, sed auctiorem ipsâ
 morâ, & liberali fenore cumulationem accersere.
 Omnes tu quidem non Gallos modò, sed planè
 Christianos, præsertim reconditoris vitæ homines,
 eruditoque otio exercitatos, sublato bello, placida-
 rum artium certissima peste, ita demeruisti, ut
 jam honestissimum suavissimumque in tuas laudes
 certaminis genus Pax ipsa omnibus indixerit.
 Atenim plerique silentio venerationem obtendere*

* Piclavio.

*possint, intentatoque ad tantum istud fastigium
aditu diffidere. Mihi verò, quem tu, PRIN-
CEPS EMINENTISSIME, propriâ
quadam singularique benignitate provocatum vo-
lueris, timendum jure intelligo, si publicas inter
populorum acclamationes siluero, ne stuporem ho-
mines potiùs animi, quàm dignum aliquid ex-
aggeratis supra invidiam & prædicationem me-
ritus proferendi desperationem interpretentur.*

Jam docti faciles auras experta favoris,
Debilis invidiæ strepitus, vulgusque malignum
Despiciet Fama : & cœptos implebit honores
Phœbeo tibi sacra chelys, tuba sacra labore.
Crescet & ingenium jussis, & concita nutu
Vena tuo, quæcumque vocas in munera, JULI,
Annua nunc primùm rupere silentia Musæ,
Ex quo laurigeros agitavit Gloria Currus.
Belgarum à populis, Gravelingâque potitum
Heroa ostentans, plaudenti reddidit Aulæ.
Seque suasque tibi, collecto Numine, vires
Hac-servare-tenus, magnis non degener ausis,
Pierias ex te curas & dulcia fata
Pignore jam devinctus amat suspendere Vates :
Ac, dum jussa paras, tenui proludit hiatu
Æternos Belli meditans Pacisque Triumphos,

LEONARDI FRIZON
INSULA FORTUNATA,
SIVE
PACIS INSULA.

AN. M. DC. LIX.

HESPERIOS ultra fines, metasque laborum
Pacato Alcides statuit quas denique mundo,
Indeprensa olim rudibus miracula nautis
Cantataeque jacent sedes, pulchrique recessus,
Insulae Atlanteo in magno felicibus arvis,
Omniaque Elysio similes, ubi Vere perenni
Misceat Autumnum caelo gratissima tellus,
Nil curis hominum debens, nil^a indiga cultu.
Splendida nimirum veteris mendacia Famæ!
Ludibrium Europæ, vulgo jam prodita sordent,
Ausus inexperto postquam dare vela profundo
Alter iit, Libycasque oras & littora Tiphys
Explorans, vilesque, ornat quos fabula, campos.

At nova se se aperit (narranti credite gentes)

Insula vulgo
I hafianis di-
cta, ad radices
pyrenæi, in
mine Canta-
biæ Bidassoa.

Mole brevis, gestisque Orbi par Insula rebus,
Et Fortunatæ vero se nomine jactat.
Non ita divitibus Serum pendentia ramis
Vellera collucent; non sic Gangetica gemmis
India, sic auro Peruvia gleba coruscat;
Explicat immensas ut opes gazasque superbo
Insula læta sinu, & solem fulgore laceffit.
Nectaris hinc passim rivi; mensisque paratis
Omnigenas elementa dapes famulata ministrant
Sponte suâ: dulci sonuerunt littora cantu,
Quem neque odoratâ certans philomela sub umbrâ,
Nec Sirenum omnis tacitâ chorus æquet in undâ.
Phasidis huc ales desertâ Colchide venit,
Deliciis hominum natus; sedisque beatæ
Suavibus illecebris dedit haud ignobile nomen.
Sed pretium ipsa loco, & primos Pax fecit honores,

Pro quâ Consiliis duplex Regalibus instat
Hinc atque hinc Genius, divini fœderis autor.

Huc, ô Bellonæ Domitor, Pacisque Minister,
Verte oculos, JULI, gravibus docta otia curis
Queis Reges populosque beas, intexere lætus.
En Tibi, Phœbeâ spectando in luce, theatrum
Panditur: in te oculis Europa animisque moratur:
Pacifica Heroum vacat ad consortia Mundus
Expectans quas una sibi ferat Insula leges.
Ex quo funereum Socialis Mantua Belli
Sustulit Austriaco signum tremefacta tumultu;
Obsessæque arces, & mœnia quassâ Casalis:
Visa laboranti signum Spes candida seculo
Erigere, ac lucem trepidis ostendere rebus.
Jam tum sacra ferens Pacis, cum Gallica Iberis
Impatiens castris affunderet agmina Mavors,
Adversas acies inter, pugnaeque sub ictu
Magnanimus per tela volas stridentia victor:
Invitosque enes, correptoque igne frementes
Tormentorum iras, & ahenea comprimis ora.
Allobrogas per te Proceres Pax fida revisit;
Reddita Germanæ per te, servataque genti;
Per te Borboniis rediit Pax Civica Regnis.
His adeo auspiciis imbutus, & omine dextro,
Jam propè depositæ majora in munera Pacis
Venisti, & pulchram geminas per fœdera laudem.
Ergo, quo facilis vultu, quibus antè Camœnam
Auribus excipere atque oculis dignatus amicis,
Accipe, post duri strepitus & classica Martis,
Lætius hîc blandæ gratantem Pacis alumnam.
Jamdudum profugam Pacem, grassante per omnes
Bellonâ populos, frustra in vota vocatam,
Hospitium augustum donec subjecta Pyrenæ
Insula felici Geniûm statione dicaret,
Exequitur, seriem evoluens ac pondera rerum,
G. iiij

Et queis restituas prostratum è cladibus Orbem.
 Tu cœptis (sacrae sub numine Mentis eunt res)
 Grandibus adspira , Princeps , & luce faventes
 Exere purpureâ Stellas , comes addita Musæ
 Gloria nec deerit , quæ te hîc quoque laudibus auctum ,
 Pace triumphantem , Capitoli in vertice sistat .

Postquam sanguineo feralis crine Cometes
 Terruit aspectu populos , flammæque minacis
 Prodigio ardentes Superûm circumtulit iras :
 Ocyus Europam fugiens , Arctoæque regna ,
 Hesperiasque urbes , patrium super æthera cessit
 Pax , & Virginei Virgo se se hospita Signi
 Addidit Astrææ , terras quæ exosa nocentes
 Transcripsit cœlo Libram , gladiumque reliquit .
 Sed jam accincta fugæ , & discessu mœsta coacto ,
 Fatidico , ut perhibent , tales Pax ore querelas
 Effudit , gemituque pium confessa dolorem est .

Terrigenæ , infelix & non miserabile vulgus ,
 Ite agite , in vestras elementa innoxia clades
 Vertite , miscentes terris freta , fluctibus ignes .
 Bellonæ Furiisque vacat locus . hinc ego cœlum ,
 Unde ad vos delapsa , ingratis exul ab oris
 Nunc repeto , & cæcis nil inde furoribus obsto .
 Ah stirpem indignam contemptæ munere Pacis !
 Tempus erit , positis aris cùm publica Reges
 Certatim populique ferent , sed inania vota :
 Despiciam sero gemitu lacrymisque vocantes .
 Ipsi has , Tartareo quas nunc accenditis igni ,
 Nequicquam infuso restinctas sanguine flammæ
 Optantes , alia ex aliis in bella ruetis :
 Acrius accendet sanguis feralia busta .
 Heu Pietas ! heu sancte Pudor , venerandaque avorum
 Relligio , Pacis quondam sub numine ovantes !
 Quas ego jam scelerum facies , quæ vulnera cerno !
 Tota Erebus jam castra movet : mortalibus armis

Cælicolas nova bella petunt, Titaniaque ausa,
 At terris unâ irrumpent deformis Egestas,
 Atra Fames, morbisque Lues stipata nefandis,
 Pejor Sævities Leto, Luctuque Voluptas,
 Bellonæ comites, monstrorum exercitus ingens.
 Tunc Pacem ej&ctam regnis gaudete quietis,
 O Populi; Bellona juvet. Non fulmina Patris
 Sontibus intento, aut diri portenta Cometæ:
 Bellonam ultricem violatæ injuria Pacis
 Repperit: ipsa suas pariunt jam crimina pœnas.

Haud mora, fatidicæ respondent omnia vati.
 Fervida corripuit spatium Bellona, malorumque
 Explicat omnigenûm tristes factô agmine formas,
 Nec requies, populosque insano turbine versat,
 Qualis, ubi effrænâ commissi Aquilonibus Austri,
 Aere tempestas toto bacchata repentè
 Horrificas glomerat nubes, simul imbribus atris
 Præcipites, concepto altûm simul igne sonantes:
 Tum pelago infesta & terris incumbit, ubique
 Aspera, ubique nocens, traxitque per omnia cladem,
 Jam silvas, navesque; casas, turreſque ruinâ
 Involvit, camposque humiles, montesque superbos;
 Cum grege pastores, ipsas cum civibus urbes.

Sensit & Auroram Oceano quæ prima recentem
 Aspicit, & Solem quæ fuscipit ora cadentem;
 Sensere adversi gemino sub cardine tractus:
 Terrigenæ strictis certarunt undique telis
 Mutua in exitia, atque alternæ crimina cædis.
 At furiis una ante omnes immanibus arsit
 Europa, & geminum sparſit sua bella per axem:
 Per duplicesque Indos, Americaque littora fluxit
 Christiadum cruor, & merces fœdavit avaras.

Collisa hîc toto dissultant corpore Regna:
 Cessurumque Orbem, si non obnixa resistat
 Gallia, fatali concussit Iberia motu.

Hoc seculo
 bellis omnia
 ubique infesta.

Galliæ Hispa-
 niæque causa
 Europa im-
 plicuit.

Nam quid ego Aufonidas memorem, Belgasque feroces,
Germanosque, Gothosque, & ovantes classe Britannos?

Unà omnes ruere? ac studiis discordibus actos

Franci alios; alios Hispani in prælia raptant.

Arma armis, ratibusque rates, atque arcibus arces

Opposuerunt: Dolo Virtus, vis addita Juri:

Consilio admistus Casus, Prudentia Sorti:

Undaque naufragiis, Tellusque oppressa ruinis.

Jam directæ acies campo; jam mœnia circum

Metata obsidio, sinuloque aggere castra:

Cornuaque hinc peditum, hinc alæ tenduntur equestres;

Cominus & gladio, & longè vibrante sarisâ,

Missilibusque globis pugnatur, & ignibus atris.

Pingues confuso populorum sanguine campi:

Cæde virum tumefacti amnes, & uterque rubescit

Oceanus: fumant disiectis mœnibus urbes;

Pulvere subjecto seu vis latebrosa procellæ

Eruit ardentis; seu vi Mavortis apertâ

Ænea fulmineo moles circumtonat ictu.

Lauris inserpunt taxi, palmisque cupressi:

Præana abrumpit plangor, casusque trophæa.

Quem sceleris Bellona gradum? quid cruda refugit

Barbaries? direptæ aræ, protritaque sacra.

Ne verò sæcli furias, ne tristitia probra

Militiæ, scelerumque artes, peccare docentem

Historiam feri discant me Vate nepotes.

Horruerant monstris gentes; augustaque Regum

Pectora, & adstantes Genios dolor altus habebat.

Una salus fractis bello Pax cognita rebus.

Idem omnes simul urget amor: Populusque, Patresque

Pacem orant; Pacem lacrymis, votisque reposcunt.

O tandem Pax alma redi, Pax aurea cœlo,

Labere, & infandos hominum miserare labores!

Neu te infelicis quondam fastidia terræ

Avertant sceleris memorem: neu munera tristi

Commendare morâ placeat, similique repulsâ.
En, quibus exhaustâ pœnis, quo funere mersâ
Deficiunt gentes! & deest jam terra sepulcris.

Obstreperit at votis scelerum fragor æthera pulsans
Altiùs: & nullâ perstat revocabilis arte,
Supplicibusque diu lacrymantum immota querelis,
Atque insultanti similis, Pax æthera servat.
Jam non vana minas fuisse oracula inanes
Gaudet; & indignâ, quâ cedere jussâ, repulsâ
Ultrices explere juvat pro crimine pœnas.

Tandem post clades varias, post mille labores,
Sidereos oculorum orbis averſaque terris
Ora, explorandi studio, reflexit. ibi alter
Successit dolor, ac veteris sensum obtudit iræ.
Hei mihi, quàm funesta animum percussit imago
Europes! latè stagnantes sanguine terras,
Collapsasque urbes ferro, & flagrantia regna
Vidit, & expensis didicit mitescere pœnis.

Ergo, ubi Vestphalicâ Legatos eminus urbe
Audiit orantes, placido se misit Olympo.
Non tamen omnino dubiis se credere regnis
Ausa, sed aërio curru subvecta pependit,
Teutonicumque umbrâ dulci prætexuit orbem.
Visa quidem cessisse loco Bellona; sed antro
Subſedit Paci insidians, latebrisque resistit
Multa movens (at tu pactis, gens fida, maneres)
Armaque operta ciet, larvatoque ore vagatur.
Mox volitare palâm, Divamque extrudere longè
Præcipitat, subitâque Arcton formidine turbat.

Insuſbres neque tum populos, nec Gallica rura
Pax adiit, frustraſque Hispanas ambiit urbes.

Nec vos arguerit, Franci; nec te, Optime Regum, Pax cum Hi-
Bellipotens, sed Pacis amans: non te, Indlyte Princeps, pania Francis
Qui Latium augustis claras virtutibus ostrum; quæſta.
Conſiliis Franciam, cujus tibi credita summa

Mona sterii,
(Dux Longa-
villæus, Regius
in Monaster.
Tractatu Le-
gatus)

Rem fundas, variâ Stator jactante procellâ:
Jamtum acres solida curas pro Pace gerentem
Comprobet heroo Dunensis sanguine cretus,
Quem penes haud dubiæ, rerum monimenta, tabellæ,
Exinde optati Gallo quæ fœderis usquam
Intentata via est? quid non molitus in armis
Pacis amor! quas non Legatis permeat urbes!
Scit Venetus, scit Belga: nec hostis nuper Iberus
Magnificam invideat quæsito è fœdere laudem.

Brux. Camer.

Testes Bruxellæ, Cameracique ardua castra.

Romæ,

Tu quoque, terrarum domitrix, Mavortia Roma;
Nunc & Christiadûm Solyme, sacrataque Paci,
Urbs Æterna, & Cephæis augustior aris,
Quàm cum Cæsareis orbem complexa triumphis:
Heroiûm generosa parens, æquataque Olympo,
Cœlestem felix Genium cui Francia debet!

(Alexander
VII)

Tuque adeo, Interpres Superum, Mundique Sequester,
Consciis expromptæ Gallis in fœdera curæ,
Regia dum fido mandata Leonius ore
Exequitur, certæque aperit commercia Pacis:
In medias Ligurum, superatis Alpibus, urbes
Venturum, quocumque volens condixeris, offert
Protinus aut Regem, aut Genium, simul adsit Iberus.
Splendida tu arbitria exerce, notosque labores,
Ex quo Teutonicam in Pacem Legatus, & undas
Europæ quinquenni operâ mollire tumentes
Exorsus, Regum caussas, nodosque morasque
Fœderis, & longæ vidisti semina cladis.
Indomitum, augustâ pro majestate, furorem,
Et Regum Pater, & Populorum Maxime Pastor,
Placares, avidis poscebat Francia votis.

Madridi.

Quin etiam decorisque sui, palmæque recentis
Immemor, hostili Pacem captavit in Aulâ:
Et, Carpetanæ, stupuisti, Mantua gentis,
Victricem officii partes descendere ad imas.

Denique Germano referam quæ proxima cœtu
 Septem-gesta-Virûm, celebri jam prodita famâ?
 Incassum labor omnis, & irrita machina cessit.
 At desiderio tabescit Gallia inani.
 Admotam toties Pacem, & jam jamque prehensam
 Longiùs ætherias refugam absiluisse sub auras!
 Ceu levis umbra manus inter dilapsa sequentum
 Vanescit, nec capta capi datur. haud secùs illa
 Germanas iterum Bellonæ agitata per oras
 Avolat, & se Virgineo sub sidere condit.
 Hæc illi statio, fidâque hic arce receptus.

Pacem oculis animoque sequens, statione notata,
 Virginis aggreditur Magnæ placabile numen
 BORBONIDES. rerum Dominam, Pacisque potentem,
 Cujus & auspiciis vitam felicibus hausit,
 Jam nova marmoreæ vocat in penetralia sedis,
 Flavia * cui cedant longè delubra facello.
 Imbuit ipse aram votis, sternitque coronam
 Purpureus cultor. pariterque advoluitur aræ
 Pacificæ Invicto supplex cum Fratre PHILIPPUS;
 Belligeros tenero sub pectore sentiat ignes
 Ille licèt; Germanum animis, votisque sequutus.

Indicta & passim templis sollennia Francis;
 Supplicibus passim turbis undantia Divûm
 Limina miscentur: sacris æterna litatis
 Victimæ pacifero lustravit sanguine Gallos.
 Æthere demissum fulgentes infidet aras
 Pacis adorandum, & nunquam violabile pignus,
 Scilicet & vinci cupidus, lætusque minacem
 Exarmari iram, vincendi suggerit artes
 Ipse sui, & votum Deus impetrabile dictat
 Intus agens, cumulanisque sequaci munere munus.

Nec minùs ingenti, L O D O I C E, exercita curâ
 Pectora, & obstrictum PACIS REGINA Sodem
 Respicit, ac pulcrum præsens juvat ipsa laborem;

Lud. novum.
 Lupatæ Sacel-
 lum dicavit
 Mariæ Pacificæ.

* Flavius Vesp.
 pas. Paci tem-
 plum condide-
 rat.

D. Virginis à
 Pace Sodalitio
 Rex nomen
 dederat.

Cui tu corda magis, Luparæ quàm splendida testæ
Sacrasti, Proavo Indigeti non degener Heros.

Hæc adeo Francæ Genium Virgo impulit Aulæ,
Regnorum ad fines mittendam exquirere Pacem,
Insula ubi Gallo simul & communis Ibero
Magnanimos eadem societ, quæ dividit, hostes.

Ibo, ait, & coràm ipse gravis capita aspera causæ
Discutiam : & Pacis certum est componere leges.

Turbatæ Europæ mediis Rex incidit undis ,
Belli una sceptrique Hæres. quò vinceret hostes ,
Ætatem vicit teneram, patriæque tumultus.

Quamvis æqua tamen, quamvis felicia, dudum
Projicere arma manu, palmisque intexere olivam
Ardet sponte inhians Paci, nostroque petitam
Acriùs hortatu Pacem Lodoïcus adorat.

Ecquid inexpertum carâ pro Pace relictum est?

Legatis aditi Belgæ : Caducifer ambas

Gallicus Hesperias, Germanica regna cucurrit.

Quid vastis rerum impensis, operumque labore
Tantorum, studiisque actum ? pia vota per omnem
Vulgata Europam, Pacisque incensa cupido
Victori in mediis Franco testata triumphis.

Nulla viam optatæ reperit solertia Paci.

Sæviti adhuc Bellona, & non tractabile gliscit
Clade malum assiduâ, cognatosque atterit hostes.

Supremâ nunc arte usus, memoranda, nec ullis
Præstructa exemplis, agedum, commercia inibo ;

Pacis opus laudemque mihi si fortè reservat,

Qui paribus quondam curis non absuit autor,

Et Pacem Ausoniam faustis Deus annuit orsis.

Pactorum immensos mittam in compendia tractus;

Flebilis Europæ clades solabor acerbis.

An, Paci medium, expectem, dum se offerat agmen,

Commoda privato disturbans publica quæstu ?

Nimirum & duplices Tractatûs limine in ipso

Pacificis hæsisse annos Germania vidit
 Sollennes inter ritus, argutaque bella,
 Undique collecto Patrum pugnata Senatu.
 Præcisæ rerum ambages, contractaque Pacis
 Acta mihi : gemino dirimentur bella Ministro.
 Hinc jam spem alterno confectæ vulnere gentes
 Concipiant : jam nunc posito certamine plenam
 Præsumant, ictō, brevis est mora, fœdere Pacem.

Dixit, & arcano GENIUS præludia Pacis
 Colloquio aggressus, suspensis ilicet armis,
 (Sive ubi devictas hibernis insidet urbes
 Turena armipotens, Sannædariusque triumphat ;
 Belligeras seu quæ Navallius explicat artes,
 Pugnacesque animos justa sub lege coercet)
 Terrore Italiam solvit, crebrumque trophæis
 Belgium, & admistos Celtarum nomine Iberos.
 Rex etiam, Vicennæ arces dum visit amœnas,
 Captivam emittit libata Pace catervam.

Ipse autem miro correptus Pacis amore
 Carpit iter longum Genius, noctemque labori
 Addit, & ingentem lecto rapit agmine pompam.
 Purpurei antevolant equites, Procereſque ſequuntur :
 Aurati longo ſonuerunt ordine currus.
 Proregum, ditio quæ cuique eſt credita, fervet
 Officiis : turmasque alacres præmittere longè
 Nobilium certatim ardet provincia florem.
 Occurrunt totis effuſæ mœnibus urbes ;
 Paciferos læto plauſu celebrare labores
 Sedulæ, inexpletis oculis mirantur euntem.
 Tum lituûm canor, & rauci fragor igneus æris.

Ut vidi, ut ſtupui, ut me novus impulit ardor,
 Majorem famâ immenſâ, nec laudis egentem,
 Sed, tanto quamvis circumſonet agmine plauſus,
 Haud noſtræ ſurdum citharæ, immemoremve Camœnæ
 Gratarî, ac totos Parnaffi evolvere fontes !

Pacis tractatio
 arcanis collo-
 quiis Lutetiæ
 prælibata.

Induciæ.

Cardinalis ad
 Pyreneos con-
 ventus profes-
 tio, mediâ æſta-
 te ſuſcepta, per
 provincias om-
 ni gratulatio-
 nis genere co-
 lebrata.

Pacificus menti Deus infidet : eminet ipsis
 Pax oculis : blandam spirant ora aurea Pacem,
 Et miris capta illecebris per corda triumphant.
 Protinus, Hoc, dicas, Europæ fata cieri
 Addecuit Capite ; Hoc Bellum, Pacemque Ministro.

I, tua quò Virtus, quò res te publica ducit,
 Et Regni commissus honos. Jam te altiùs, Heros,
 Tollere Mavortis palmari Gloria curru
 Possè negat ; captasque urbes, populosque triumpho,
 Fercula ceu pompæ, devictaque regna trahentem.
 Tollet olivifero revocatæ Gloria Pacis
 Axe, nec humanos apices, perituraque tantùm
 Regna super, spoliisque graves hostilibus arcus.
 Trans & fidereas arces, jam te altior ipse,

**Pacifici homi-
 nes in ff. lit.
 Dei Filii vo-
 cantur.**

Cœlicolum, i, summo assimilis confurge Parenti.
 Prævertit subitum & populis mirabile fœdus
 Spes timidas ; suspensi animi pendentibus armis:
 Perfice cœpti operis famam, dextrâque potenti
 Nequicquam tentata aliis pia vincula neſte.
 Plebis Amor, faustæque preces, & publica vota,
 Magne, tuum comitantur iter. Sed quæ invida terris
 Fata moram properæ tendunt innectere Paci ?
 Cede, importunò nimium Dolor improbe morbô,
 Inviſtos experte animos. clementior Æſtas
 Parc sacro Capti : Capiti vos parcite sacro
 Austrique, pluvixque, tonantesque aëre nimbi.
 Trans colles, fluviosque, & per deferta locorum
 Pulverulenta celer, populis quam præstitit, unus
 Non capit, heroo seclusam corde, quietem.

Ardua Pyrene supero se immittit Olympo,
 Turritum abjetibus caput & niue tecta perenni,
 Fluminaque uberibus volvens, & nubibus atris
 Circumfusa, micans, crebro dum fulminat igni
 (Unde illi nomen) nec fulmine mota corusco.
 Horrisonos pedibus subjecti elidere gaudet

HEROICON LIBER III.

113

Oceani fremitus, & ineluctata superstat.
 Atque illam vastos insanâ mole Gigantas
 Vincentem Natura parens statione locavit
 Æterna, & mediam Francorum in limite fixit
 Provida, discrimen regni & tutamen Iberi.

Saltibus aëriis juga per scopulosa fragosus
 Præcipitans, vallemque rigat, gentisque fluento
 Hesperiaë Francæque extremam interluit oram
 Bidassoa, rapax, & quondam inglorius amnis.
 Partus honos fluvio, nomenque in secula missum,
 Cum geminas ultro Nymphas citroque jugali
 Fœdere trajecit diversa in Regna vocatas.

Altera jam cœlo ante diem repetita, superstes
 Prole tamen magnâ, pulcraque in imagine vivit,
 Francigenis quâ se maternus prole refunder
 Sanguis, & augustum referes, Hispania, pignus.
 Altera labentis secli fulcire ruinam
 Munere Cœlestum, & longo permissa favore,
 Fatalis Paci, & nostræ pia Nympha saluti,
 Communem Anna gerens populi Regisque parentem.
 Perpetuo ripas commerciaque aggere junxit
 Regia pons fluvio * impositus; mediumque potentes
 Composito inter se Nymphæ occurrere per amnem.

Elisabeth
 à Francia,

* Non longè a
 Pacifici collo-
 quii sede.

Torrentis brevia apparent divortia lymphæ
 Haud longis infra spatiis. sacra Insula Paci
 Fluminis in gremio, Solis procurrit ad ortus,
 Ac modico sensim excrefcens diducitur orbe;
 Et paria hinc Boreæ latera, hinc obvertitur Austro
 Insula, ad occasum in puppim collecta ferendis
 Fluctibus, alternoque freti revolubilis æstu.

Topographia
 insulæ, & quæ
 in eâ gesta.

Quæ postquam sedes, gemini ceu sibula Regni,
 Congressu insolito, magnis & idonea sacris,
 Delecta arcanas operanti Pacis ad aras
 Francoque, Hispanoque; pares gens utraque curas
 Expedi, atque operis certans communibus instat.

H

Principiò, tenui perductus tramite limes :
 Signatæ populis metæ, discretaque Regna.
 Tum descripta æquo properant tentoria cultu.
 Hîc propriæ sedes ; hîc gentibus area mistis :
 Hîc Procerum locus ; hic summo conclave Ministro.

Ac Domus illa quidem, non luxu splendida frustra
 Barbaricò ; non illa ebena, sèctove elephanto,
 Dædalio artificum spectanda labore, superbit :
 Sed subitò enata, & facili texta abierte surgit,
 Hospitio quæsita brevi ; quanquam ærea vincet
 Laude opera, & Pariis decifas montibus arces.
 Et servabit Honos tectum suus : inclyta sedes
 Paciferùm, feris visenda nepotibus olim :
 Atque ipsas studio memori venerata ruinas
 Cantabria ostendet, Geniùm vestigia adorans.

Aurea sic tectis egit sub vilibus ætas ;
 Solus & exigua dominus splendebat in æde :
 Agrestumque casas humiles subiisse feruntur
 Numina, subsidium miseris portantia terris.
 Auratas coluere domos mox ferrea secla.
 Sed prisca redeunt mores : nec regia Castra
 Pœnituit mutasse casis. tamen omne decoro
 Substruitur xystum interius, cameræque paratu,
 Præcipuè Geniùm quæ conscia grandibus aula
 Colloquiis, pictisque nitet laqueata tapetis.

Quò Bidassæ solidum cùm pervius alveus
 Ponte superstructo, connexis ordine lembis,
 Stravit iter ; Procerum diversis partibus agmen
 Educunt Genii, lecticâ infertur Iberus ;
 Gallicus invehitur rhedâ : longoque sequuntur
 Quadrigæ tractu, qua nuper ière phaseli.
 Stat delecta cohors utroque in littore, pontis
 Observans aditus, Paci famulantibus armis.

Scipio & An-
 nibal, inter se
 de pace acturi,

Nunc mihi Scipiadæ, cui nomen victa superbum
 Africa ; & audacis, quem non capit Africa, Pœni

HEROICON LIBER III.

25

Colloquia, & vanos jactent pro fœdere nifus.
Mutuus hîc certè, postquam ad consortia ventum est,
Defixit stupor, atque aspectu mulcet amico,
Dum sese in Socio admirans speculatur uterque,
Et placidos mores, & quæ solertia rerum,
Pacis quantus amor, populis quàm provida cura,
Mirantur conjuncta Domo sua Sidera gentes ;
Mentes ætherio missas venerantur Olympo,
Consiliis quæ Regum adstantes prospera terris
Dispensant, Bellique vices, Pacisque reponunt.

diu mutua ad-
miratione defi-
xi steterunt, ac
demum re in-
fecta discessere.

Si quam olim tenuit Romæ Concordia Cellam,
Hæc meliùs delubra implet ; veteremque refringit
Invidiam populorum, odiisque tumentia lenit
Pectora, & hostiles jungit Concordia dextras.
Jam nova post belli sævas Fiducia fraudes
Alteram in alterius rapuit prætoriam gentem.
Officiis tantùm, & donis certamina pulcra
Exercent. totis fervent convivium ripis :
Et piscatorum videas fulgentia tesqua
Regales stupefacto amni prætereunte mensas.

At comes interea Geniùm Sapiëntia, longo
Maturum accelerat finem positura labori :
Inter & offusas densâ caligine nubes
Florentem radiis dextram protendere visa,
Fatales nodos & inextricabile vinculum,
Quo dudum implicitas gentes Pacique negatas
Bellona immani superans ditone premebat,
Disclusit, Pacisque in libera jura remisit.

Candida puniceo Pax ilicet ætheris arcu
Devolat ; & frustra terras accita per omnes,
Hospitio indulget primùm, quò cara vocavit
Insula, collatis Geniùm celeberrima curis.
Lilia virgineam cingunt stellantia frontem,
Purpureoque acuit candorem tænia nexu :
Lilia cœruleam passim per cyclada florent,

Gratiùs aureolas inter candentia flammæ :
Mista rosis toto lactescunt lilia vultu.

Exilii Astræam sociam, Legesque reducit,
Quas pressò armorum sonitu dehinc audiat Orbis :
Fortunæque comes Reducis, lætissima Fama,
Centum cui pennæ, centum cui corpore linguæ,
Cœlestique micans circumvolat agmine pompa.
PACIS, AMOR, DEUS, & formoso innoxius igni,
Cordaque felici stringens Regalia nodo.
Tum Pietas, castusque Pudor ; tum cana Parentum
Relligio, bellisque Fides vexata profanis ;
Civilique Salus crinem circumdata quercu,
Et cornu in populos descendit Copia prono ;
Præsertim quâ parte viam consternere lauris
Gestit, & pictâ verrit Victoria pallâ,
Nec vinci indignans, Pacis decedit honori,
Mutatura oleis palmas. & vomere cassis,
Et curvam in falcem rigidus mutabitur ensis.
Laudatæ subeunt Artes, Laudumque parentes.

Pacis in adventum, gravibus jam fessâ trophæis,
Gallia languentes erexit ad æthera vultus,
Abstersosque oculos risu diduxit amœno,
Ac passis Divam reducem complectitur ulnis.
Turrigeri, antiquam referens Castella Cybelen,
Suggestu inflexo capitis, veneratur amicum
Numen, & immites solatur munere casus.
Ter læto intonuit plausu gratata Pyrene
Festivos silvis accendens omnibus ignes :
Ter Bidassæ repetitos Insula plausus,
Et sua Neptuno properantem gaudia sensit,
Gaudia perque agros, totasque effusa per urbes.
Alcyonum resonant vicino è gurgite cantus ;
Advolitant niveæ, placidissima turba, Columbæ.
Versicolor Sole affuso radiantia colla
Iris obit ; ramum ora ferunt viridantis olivæ.

HEROICON LIBER III.

117

* Infubrum in.
figne &c.

Ipſa ſuis Serpens * tunc exarmata venenis,
Nec ſævo ſtridore minax : hîc ipſa Leonum
Dedidicere feras, manſuetaque pectora Pacis
Ingenio colludere amant paſcentibus agnis.

Pace renidet humus, Zephyris Pax aëra mulcet,
Marmoreo tumidos ſternit Pax æquore fluctus.
Eridanum, Scaldim, Sicorim, priùs amne cruento
Spumantes, vitreâ liquidos Pax luce ſerenat ;
Florentes ripas electro pingit & auro :
Nectare purpureos agit per compita fontes.
Tympana jam, mitesque tubæ, ſimul ænea Pacem.
Pulvereis tormenta ſonant innoxia flammis :
Romula ſollenni gratantur carmine templa ,
Et paſſim fidibus Muſæ aſſonuerè canoris.

Ambitio, ſciſſamque trahens Diſcordia pallam,
Iraque, & obliquus Livor, torvique Furores
Diffugiunt. fugit ipſa Dolo ſubnixa bifor-
mi
Viſ gladium, tædamque gerens; Luctuſque, Metuſque,
Strageſque, omnigenumque immenſa caterva ma-
lorum.

Bellona ante omnes, Stygiæ dux atra cohortis,
Hiſpani præceps agitur Francique levatis
Finibus imperii. quin cunctis cedere juſſa
Chriſtiadum Regnis, in Thracia vertitur arva,
Collectas lato vires diffundere campo
Jam meditans, juſtaque ibi demum cæde pianda.
Ottomanis quæ non Genius jam bella minetur
Sacra ſacer ? Venetoſque arctis in rebus amica
Auxilia orantes firmet ſocialibus armis ?
Qui, primos armorum æſtus ubi Luna cruenta
Exciit, aſſiduè creſcens, Solique cadenti
Inſultare ferox ; pelaguſque undantia bello
Boſphora in Adriacum, & Cretæas impulit urbes ;
Navales ultro belli ſuſpendere motus
Heſperii, ac geminam in Thracas convertere claſſem

H iij

Mox cursu alterno Libycum detorquet in axem :
 Voluentemque suis describit mensibus annum
 Titanis ratus & felix mortalibus error.

Dividis in populos Regem, spectabile laudis,
 MAZARINE, tuæ monimentum, Artisque magistræ
 Quâ sceptrum gessisse doces, & moribus ornas
 Ipse tuis, residemque animo fugiente quietem.
 Non glacialis Hiems, non ignea terruit Æstas.
 Seu quò dura vocant civili tempora Bello,
 Inscius ille ævi, non inscius ille laborum,
 Longas ire vias solitus : seu quò extera poscunt
 Prælia, Belgarum fines repetisse quotannis
 Fervidus, ac medios victor volitasse per hostes.
 Sic Rhodanum hiberno nuper, sic deinde Garumnâ
 Æstivo relegit cursu : nec flectere inertî
 Sustinet ignotas Gentes LODOÏCUS ab aulâ :
 Lætitiâque novæ moremque indicare Pacis
 Gestit, ac toto leges describere Regno.
 Consilio ipse tuo felix, felicia fingit
 Secula ; queis certæ auspiciû dedit Insula Pacis,
 Hactenus illa meæ, JULI, celebrata Camœnæ,
 Et meritum oblato servans in carmine nomen
 Fortunata, tuo si fors dignata favore.

HYMEN REGIUS

PACI ADJUNCTUS.

A. N. M. D. C. LX.

DUM tua regales Hymenæo Sidera tædas
 Accendunt, diri tandem victricia Martis,
 Et jam pacatas radiis mulcentia gentes ;
 Ecce novos ignes animo, nova lumina, JULI,
 Phœbeis potiora cient, cantusque laceffunt
 Rursus adoratum spondentia Signa favorem.

Quò Deus, & quò læta vocant ostenta, sequamur.
 Insula, quam Paci sacram dixere Camœnæ,
 Tot fida arcanis, tantarum conscia rerum,
 Pacis ad extremum Geniis repetita laborem,
 Continuo Vatis repetatur carmine, nuper
 Felix ante alias, jam se felicior ipsâ,
 Hospita ubi Regum peragit genialia pacta
 Rite memor, Pacemque jugali fœdere sancit.
 Hanc etiam, Thalamique Auspex, Pacisque Repertor,
 Aspice, Musarum perfecto munere, partem.
 Non hîc Fescennina procax convicia ludus
 Liligero fundet Juveni, castæque Puellæ:
 Nec tibi deformes ausint se obtrudere nugæ.
 Si canimus thalamos, sint carmina Principe digna,
 Christiadûmque sacris, aut Virginis arte Camœnæ.

Reddita Pax Gallis, fidæque allapsa Pyrenæ,
 Spe dudum erectos avidâ, votisque calentes
 Per populos urbesque volans gestibat, & agros.
 Borboniam Pacis Genius remeaverat aulam,
 Cui longè occurrens alacer plaudentia duxit
 Agmina Primorum Lodoïcus, & ipse reductam
 Gratatus plebi Pacem, sibi pacta TERESÆ
 Connubia, & nullâ turbandos sorte triumphos.
 At non degeneri soluit Rex pectora luxu,
 Haud sibi quæsitam testatus in otia Pacem.
 Quin, alii dum tecta foveant, & inertia gaudent
 Frangere nunc hiberna focis, nunc fallere ludo;
 Ille Palatinum, populis mirantibus, agmen
 Palladiæ educit rapidus statione Tolosæ.
 Nec Matrem Augustam retinet mora segnior annis:
 Ac, velut Herculeâ superans virtute, Minister
 Mutando assiduos recreat laxatque labores:
 Magnanimoque faces Juveni sublimibus addit
 Consiliis, patrioque viam præit acer Olympo.
 Heroum per amica volat vestigia Princeps.

Actuosa hi-
 berna Ludovi-
 ci; excursus in
 Galliam Nar-
 bonensem;
 Provinciæ pa-
 cæ motus.

Jamque per infestas glacies, concretaque acuto
 Rura gelu, Rhodanumque immani frigore vinctum,
 Duratasque nives properant. mora nulla, tumultus
 Composuere: jugum facili cervice quievit
 Antè exultantis populi. Certissima, cives
 Discite, Libertas placido sub Principe constat.

Arx Massiliæ
 structa, Arau-
 sionis diruta,

Quid varias memorem, regali providus Heros
 Nutu quas sternit, nutu quas excitat arces?

Talia per Salyum tractus, Phocæaque longè
 Littora jam plenâ Lodoicum in pace gerentem
 Impatiens revocabat Hymen, dulcesque movebat
 Cantabriæ illecebras, maturaque gaudia cordi.

Hunc Pater omnipotens, generis cui cura tueri
 Perpetuam humani seriem, deduxit Olympo,
 Et Fortunati spatiis ridentibus Horti
 Intulit, ætheriæ facies cui plurima sedis;
 Pictaque ceu stellis, & mille induta colores
 Area lucebat, marcescere nescia, florum.
 Quadrifidi in medio latices; caput annibus ingens,
 Fons erat, electro salientes purior undas:
 Per viridesque toros argentea lilia fontis
 Labra coronabant, & purpurei narcissi.
 Circùm & odorati nemoris, fetuque gravati
 Auricomo, tremulas Zephyris ludentibus umbras
 Misceri aspiceres. ramos arguta per omnes
 Gens volucrum, dulcemque choro meditata camœnam,
 Mulcebat Vitæ silvam Fatigue potentem.
 Non illuc Morbis aditus, curvæque Senectæ:
 Nondum pestifero corruperat omnia flatu
 Tartareus coluber, Mortemque induxerat orbi,
 Lividus ah nimium, & malefuado callidus ore.

Illic Semideum, limo quem principe finxit
 Rerum Opifex, septis ultro præfecit amœnis;
 Ossaque perfundens placido stupefacta sopore,
 Detraxit costam lateri, quâ deinde Virago

Terrigenæ assimilis perfecto corpore surgit.

Tunc primum conspectus Hymen, & blanda per
Hortum.

Jura dedit, jura in terras quæ porrigit omnes,
Abstraxisse domo sobolem gremioque parentum
Rite potens. justo Pietas decessit Amori.
Hunc morem, has leges Galilæa sanxit in ora,
Dignatus tenui convivæ accumbere mensæ
Cum Deus attonitos mutavit nectare fontes :
Addidit & Charites, curam lenire sequacem,
Et juga dura jubens, & solvi nescia vincla,
Cum sacro moriens Hymenæum sanguine tinxit.
Ille autem emicuit cœlesti splendidus ostro.

Qui nunc Regali frontem redimitus honore
Pyrenen subit æriam, cœtusque superbos
Indicit geminæ studiis certantibus Aulæ.
BORBONIUM ante omnes, operosa hiberna remotis
Finibus explentem, suavi sic evocat ore.

O Decus Europæ, Juvenum Pulcherrime, Pacis
Ecquando fructus, &, quæ facis, otia carpes?
Tristem abrumpe moram: duplicis communia Regni
Vota imple, spesque ipse tuas. en mollior annus:
Sæva refûgit Hiems; tepidâ Ver funditur aurâ :
Strata nitet passim violis humus, arva renident,
Conspiratque tuis Cœli indulgentia votis.
Sponsa tibi Hesperias inter pulcherrima Nymphas
Ducetur; Natamque Parens comitatus euntem,
Nil tardante ævo, juvenili occurret amori.
Sanguine juncta, venit propiori fœdere Virgo
Jungenda, æqualem pepigit quam conscius æther,
Ac primô tibi consortem signavit ab ortu.
Ut, parcam increpitans laudum, veroque minorem,
Quamvis ingenti facies convicia Famæ!
Oris delicias rosei, tenerosque lepôres,
Et tua cum nivibus vincat qui lilia candor,

Ludovicus &
Maria-Teresa
eodem mense
nati.

At magis effulgentem oculis mirabere mentem.
Pulcrior & virtus formoso in corpore regnat.

Sic ait, atque ultro properanti fervidus instat
Borbonidæ (Felix cupidum rapit Insula Amantem)
Non secus Hispanis urgens Hymenæus ab oris
Majestate gravem, carâ cum prole, PHILIPPUM.

Heroum, Regumque capax, nata Insula Paci,
Felices agè pande sinus, Cœlo æmula tellus!
Oceanum imperio, famâ transvectus Olympum,
Advehitur geminus diversis partibus Hospes,
Par augustum, ingens, geminus cui serviat Orbis.
Confluit unâ omnis, Procerum agglomerante coronâ,
Galliaque, & magni consors Hispania voti,
Regifico tantùm luxu certare paratâ.

Utraque delicias, & gazas explicat omnes;
Inque vicem, quanta est, cerni ambitiosa laborat.
Suscipe tot decorum formas, tot lumina pompæ,
Et quæ vel Geniûm primos spectacula vincant
Congressus, Reducisque immensos Pacis honores.

Non aliàs tam festus Hymen, tantâque superbus
Se specie cultuque ferens, ac Numinis instar;
Nec cùm Regales hæc ipsa ad littora Nymphas,
Borboniam Austriacâ, Francâ mutavit Iberam.
Juncturi dextras repetitaque fœdera Reges
Conveniunt: & Sponsam aulâ comitante Philippus
Ipse Viro addicet Genitor; Lodoïcus ovantem
Regnique ac thalami sociam feret ipse paterno.
E gremio, Hesperiaë spoliis gavissus opimis,
Pace triumphali Victor, sed victus Amori.

Infigue regalis
phaeli, quo
eum Sereniss.
Filia Rex phi-
lippus ad insu-
lam eductus.

Cernis, ut involitans auratâ classe Cupido
Palmarem dextrâ ostentat victrice coronam;
Cœruleumque levis, proræ simulacra, leonem
Calce terit; maris imperio strictoque tridenti
Mitè ferox, domitisque insultans igneus undis?

Dotalem hæc Pacem, & Pacis venerabile pignus;

Deliciasque vehit Lodoïci, clarior Argô
 Thesſalicâ ratis, & ſtellarâ dignior arce.
 Hanc duplex colit Oceanus. ſtat Velleris aurei
 Puppi affixus honos: ripis invitat amicis
 Inſula, Phafiacæ volucris quæ nomina ſervat;
 Prædaque Phryxæo rutilat formoſior auro.
 Mille ſimul lituûm, fidiumque per alta volutis
 Mille ſonis excantat aquas Orpheia turba.

Lævibus Eoæ ſegmentis ditia ſilvæ,
 Undique texta micant auro: cryſtallina puram
 Admittunt, infracto æſtu, ſpecularia lucem:
 Addita lucenti florent bombycina ſepto.
 Serica navalem thalamum radiante metallo
 Latè umbella tegit. verſis nova corpora formis,
 Vivida Apelleæ fraudis miracula, picto
 Utrinque excurrunt lateri; placitoque tuentûm
 Illuſos oculos animoſque errore morantur,
 Carmine delectos priſco referencia amores.
 Multijugas agitant tranquilla per æquora cymbas,
 Regalem & placido lapſu traxère phaſelum
 Puniceis culti ſagulis, longo agmine, nautæ:
 Lætaque inauratis verruntur marmora palmis.

Nereidum Galatea choros per flumina ducit
 Hoſpitiis junc̃ta Oceano, luſtratque carinam.
 Cœrulei rex inde gregis, poſt turbida bella,
 Poſt longas hiemes, exultim alludere gaudet,
 Terque quaterque micans plauſo ſonat æquore Del-
 phin.

Senſit læta toris, & fati conſcia Virgo.

Parte ex aduerſa volitans Lodoïcus in armis
 Et pacem, & pulcros tantûm ſpirabat amores.
 Martia Cuſtodum legio, Scotique, gravesque
 Helvetii, Francæ ſocii virtutis, ad annem
 Conſtiterant: equitumque alis, peditumque catervis
 Littora fulgebant longe, cantuque ſonabant,

Armaque clangentesque tubas referentibus undis,
 Et sua florentes distinxit pompa maniplos,
 Ac variæ undantes cristato vertice pennæ,
 Instar quisque ducis , nec parte gregarius ulla
 Ferrum auro mutat miles. quid lumina dicam
 Tot Procerum , egregio certatim ardentia cultu ?

Maxima sed Princeps decorum pars ipse suorum,
 Non veste insigni , crebroque adamantis honore,
 Sidereâ quantum specie regnatque rapitque
 Cunctorum ad se oculos unus , stupefactaque corda,
 Os habitumque Deo similis ; jactuque per auras
 Fulguris assiduo cœlestia tela retorquet.
 Dum simulacra ciet martis , dum lætus honesto
 Pulvere sordescit , ripæque excurrit apertâ;
 Circùm avidi suspensio inhiant spectacula vultu
 Insolita Hesperii , & misto venerantur amore.
 Arduus , imperiosus , ovans , medio acer in æstu
 Campo insultat eques ; prætoriaque agmina creber
 Fortibus exercet studiis; roburque fatigat
 Militis , ipse pedes crudo insudare labori
 Fervidus , instructas superans cervice cohortes ,
 Et signa ordinibus versis & castra movere.
 Otia sic agitat , ludoque augustus in ipso est !

At qualis quantusque sacræ penetralibus aulæ
 Ingreditur , quò dulcis Hymen cum Pace reposcit!
 Nec Regina Parens , atque altera cura Parentis,
 Uuo Fratre minor , florens ætate Philippus,
 Et Charitum æquales Regali ab Stirpe Puellæ,
 Continus , Proceresque aberant , quos Julius anteit
 Splendidus & pompa & pactis ingentibus auspex
 Ducitur auratæ non invida rheda carinæ ,
 Aurea , picta , micans , Solarique æmula curru,
 Aptaque solenni Nuptam retulisse triumpho.

Jam puppi exscendit Virgo , Genitorque sequutus;
 Tum pacto felix Hymenæo , & Pacis olivâ

Tres Sereniss.
 Gastonis filias,
 quæ nuptiali
 pompæ inter-
 fuerunt.

Gulstanides, Sponsum retulit qui nomine Regem,
Absentisque vices Lodoïci & munera gessit:
Innumerique alii, cultuque habituque coruscant
Magnates, toto spoliis Oriente petitis.

Obstupuit geminæ distractus cœtibus aulae,
Undique collucens, & plenus imagine Regum
Bidassoa amnis; veluti cùm nocte serenâ
Cœruleo expressit regnantia sidera mundo.

Sublimes animæ; præsentia numina terris,
Concilio in magno quis conscia pectora sensus
Pervasit? te Augusta Parens, cùm Pace reductâ
Concordem aspiceres tanto pòst tempore Fratrem,
Et Nato dignos Fraternæ Proles honores?

Te, voti compos, Fortunatissime Regum,
Conjugis aspectu in primo quàm splendida cura
Occupat, & magnas placito spes vincit amore!
Ut collecto ignis sævit non improbus æstu!

At vos, Hesperia Domini, Prolesque, Paterque;
Tu Genero felix, tu Rege beata Marito,
Qui stupor invasit; correptaque lumina vultu
Borbonidæ affixit Juvenis! quæ gaudia coram
Attonitas liquido perfundunt nectare mentes!

Ac procerum ille globo quanquam commixtus in
aula

Conforti stetit, & manifesta incognitus ultro
Prævertit furtivo avidus commercia visu;
Prodidit ipsa virum species, Regaliaque ora.
In se acres Reginae oculos ex omnibus unus
Convertit; præceptum animo retulisse decorem
Visus, & immensæ præconia vincere Famæ.

Mox Regem confessus adest. Ne gaudia differ
Ulteriùs, venerande Socer! jam Numinis aram
Contigit; & Paci, nil Julia pacta retractans,
Sacramentum ingens, & non revocabile dixit.

Dux operum, formosus Hymen, Collegaque Pacis

Ludovicus de Haro & Gulstan, Comes-Dux de olivarez, cum Card. Mazar Pacificator, Ludov. Regis in sacro nuptiarum ritu personam sustinuit.

Rex Christianiss. primo congressui regio adfuit in turba: sed ex ipsa oris Majestate deprehensus, Reginae oculos ad se rapuit.

Crux piè ab Regibus, pacem sancientibus, contracta.

Vênit Hymen ; Mariam Lodoïco tradit amanti.
Dicite iô , Franci ! Lodoïco ducitur uxor.

Pronuba non illic Juno ; sed quæ inclyta primuna
Diva dedit *MARIÆ* nomen , crinalibus astris
Sanctum incincta caput. Dominæ lætissima servit
Insula Pacificæ , regalemque instruit aram ,
Æternum facti monumentum , & nobile Pacis
Bellonâ expulsâ , atque evictô Marte trophæum.
Jamque , loci præses , Superûm Regina frequentem
Deduxit cœlo pompam , non innuba Virgo ,
Virgo eadem , summiq; Parens augusta Tonantis.
At non , ceu Thetidis quondam celebrasse feruntur
Æacidæque toros ingenti numina cœtu,
Theslala cùm stupuit fatales regia cantus
Parcarum , & magnum jamtum præcepit Achillem.

Vera canam. Regum ad thalamos delapsus Olympo
Borbonidûm genitor LODOÏCUS , & aurea Mater,
Hesperia lumen gentis , castissima Blanca ;
Maternâque *ANNÆ* Francos ditioe regentis
Ingens exemplum , paribusque exercita curis ,
Turbati imperii paribus jactata procellis.

Adstirrit & Proavo socius , quo Justior alter
Non fuit , & clarâ manifestus nube refulsit
Principis ante oculos Nati , Pater ; ille trecentas
Expugnasse potens armis victricibus urbes,
Et pietate prior ; nunc demum Pace resectâ
Lætior , optatam votis ardentibus olim
Incassum , ac totâ fugientem mente sequutus.
Supremo admotus solio & stellantibus aris ,
Pacem exoravit Domini graviora minantis
Funera ; vaginæque inimicum reddidit ensem
Sontibus instantem terris ; stragesque cientem.
Et Nato Hispana repetitum gaudet ab aula
Connubium , & sacro devinctam fœdere Pacem.

Nec minùs & , Francis Fidei quæ Regibus auspex,
Clotildis

Clotildis ; veloque caput Radegundis amicta
Stellifero, magnorum haud immemor illa clientum.
Namque huic marmoreum, voti rea sospite Nato,
Anna sepulcralem simulacrum erexit ad aram
Reginæ Regina dicans ; & Pictava templa
Concelebrans multo fida intra mœnia cultu ,
Tranquillam Cleni quoties confedit ad oram.

Adfuit & Nymphas inter spectabilis omnes,
Alitis ætherii jaculo cor saucia, & igni
Sidereo, pulcrumque fovens & amabile vulnus ;
Commisæque sibi felix Patrona Teresæ.

Centum alii Heroës Regi venêre Marito ;
Centum aliæ Nuptam comitatæ Heroïdes adfunt,
Insignes radiis, seu quos mea Gallia cœlo
Addidit Indigetes, seu quos Hispania misit ,
Utraque Semideûm partu generosa beato.

Stellatæ micuere faces, vibrantiaque auro
Flamea, virgineæ velamina debita fronti,
Æthere fluxerunt, complexusque annulus Orbem
Candida Pax, Bellonam abigens immanè frementem,
Antevolât, sternitque toris genialibus ostrum.
Insequitur, mollique jugalia vincula nexu
Gratia, & adstringens populos Concordia inermes,
Regales animos sacrato fœdere jungit.

Ibat Majestas rutilâ turrita coronâ :
Lilia regalem pinxerunt aurea pallam,
Cœruleam, ingentem. longe lateque fluentes
Ponê sinusque legunt, gemmâtiaque agmina Nymphæ.
Quam juxta, major solito, nec lumine cassus,
Tendit Amor, Rex Regum, auroque armatus & igni.
Inter se unanimes ambo nunc denique regnant
Fœdere composito, atque eâdem sedere curuli.

Cœlestes inter formas animosa Virago,
Sed galeâ exutam mulcent cui Lilia frontem,
Corda que letifero Gradiui exsolvit amore

Mitis Hymen, stabat sublimi Gallia vultu.
Lactea florebat facies, ridentiaque ora,
Ridentisque oculi; & molli coma fluctuat auro.
Auxerat & solitos, Naturam imitata, lepores
Ars facilis; luxusque opulentâ veste fluebat.

Altera sese, oleæ felicibus obsita ramis,
Extulit, ac vestem baccis oneravit Eois,
Fronte supercilioque minax quæ nuper Amazon.
Temperat hîc mores, & jam gravitate remissâ
Fingitur ad lusus; & pro re gaudia jactat
Publica, pace quidem & fausto gaudens Hymenæo;
Austriacæ sed quam digressus Virginis urit,
Subtristis, lacrymisque oculos nimboſa tumentes.
Nec jam se cohibet; dilectamque anxia voti

Prosequitur gemitu Dominam, amplexuque retentat.

Cunctanti dextram implicuit submissa Puella
Gallia; &, ô, teneras dictis quid inanibus aures
Vexare, ac lucem turbare, Hispania, festam
Indigno plangore juvat? quin plausibus, inquit,
Lætitiæque favens, Hymenæo accedis ovanti?
Teutonicum non illa procul discedit in axem;
Contiguo immigrat regno: coramque tueri
Fas erit alloquiisque frui. neu tu, optima Virgo,
Natalem Hesperiam, patrias neu respice sedes:
Quamvis & liquidas pleno Tagus aureus alveo
Volvat opes, & uterque Indus; magnisque reposta
Montibus ac toto Peruvia serviat auro.
Ecce Garumna Tago flaventes concolor undas
Invitat, pulcroque oneri succedere gestit.
Nec Bæti Ligeris, Rhodanus nec cedit Ibero.
Sub tua jura fluit regali splendidus urnâ,
Qui nunc te votis expectans omnibus ardet
Sequana, perque omnes magni decora alta triumph
Molitur ripas, Luparæque ostendit honores,
Queis patriam haud pigeat mutasse penatibus aulam.

Mitius hîc cœlum : nec tantum lactea vultus,
Quantum animi se forma probat, morumque venustas.
Quam crebræ, nimbosque ingressæ turribus urbes !
Quam validæ surgunt arces, admotaque Olympo
Culmina templorum ! series quàm splendida Regum,
Primigenum queis alma Fides sancivit honorem ;
Queis olei æternum laticem, queis lilia nubes
Fuderunt ; dextram morbi sensere potentem !
Quanta virum virtus, seu pax, seu bella gerenda !
Secula durando superat bisseña, Potestas
Europæ atque Asiæ domitrix, columenque Quirinæ
Sedis, & Odrysiæ terror frænumque Tyranni.
Auximus & numero Superos, cultuque : nec Aula,
Tot regnorum inter casus, errore profano
Degenerans patrios didicit corrumpere ritus.
Quin etiam proprios folio transmissit ad aras
Indigetes ; nostrisque æther inclaruit astris.

Terra suis felix opibus, quas mille Britannæ
Teutonicæque petunt longinqua per æquora naves.
Aspice vicinos portus : & utroque frequentes
Oceano, duplicique agitant commercia mundo.
Ac si parva loquor (coram & majora tueris)
Regia barbaricas evolvit Thracia prædas,
Subdita Majorum sceptris, desponsaque fati.
Hîc Legesque, Artesque vigent, hîc sacra piorum.
Rara per ingentes campos vestigia restant
Invisi gregis, errantisque per avia longè.
Hæc quoque fas abolere tibi : flectesque sequacem
Imperio gentem facili, & cœlestibus armis.
Gallica Regna, tuæ jamdudum obnoxia Divæ,
Fatale agnoscunt nomen ; superæque secundam
Reginæ augusto M A R I A M venerantur honore.
Vincet amore tui gentiles Francus Iberos.
Quos tu æstus cernes populorum, & quanta per urbes
Gaudia ! nec dubio subsultant mœnia motu.

Sed quanto tuus ille, tuus nunc gestit amore !
 Scilicet & motus teneros Genitoris, & omnes
 Præstitit, in fido spirent qui Conjuge, sensus :
 Téque sibi votis & regnis omnibus emit
 Rex Dominam, thalamo pariter, folioque potitam.
 Hic Vir, hic est, tua qui rudibus præcordia flammis
 Imbuit, & nunquam dubios infedit amores :
 Quicum facturam, ludens magno omine, pacem
 Diceré, jampridem retulit quæ fama, solebas.
 Mutuus arma inter, cœloque immissus ab alto
 Crevit amor ; lætoque tori spem corde fovebat.
 Nunc votis respondit Hymen. Sic ore loquutam
 Excipiens, cœtu in medio solennia sancit
 Gaudia, Conjugibusque Hymenæus talia cantat.

O bene conjuncti, & vinclis felicibus apti !
 Augustis prælate procis, Pulcherrime Regum,
 Dudum bello ingens, nunc pace ingentior Heros ;
 Candida Principibus Virgo prælata puellis,
 Hactenus Hesperia, Francæ nunc Phosphorus aula :
 Regalisque pares Fortunæ munere, & annis
 Equales, Magnâque ambo sub * Virgine nati !
 Carpite inoffensæ socialia gaudia Pacis ;
 Stringite fraternum geniali fœdere fœdus :
 Ac similem vobis (nam quæ majora precemur ?)
 Virtute & formâ thalamis educite prolem.
 Æternùm viridem, Juvenes, pertextite vitam,
 Qualem victrices fatorum ducere palmas,
 Ramosa amplexu connexas brachia, narrant ;
 Phœnicisque modo, propriâ de stirpe renasci.
 Nunc his, iô, Franci ; bis, iô, nunc dicite, Iberi !
 Borbonidæ inscripto florentia nomine Regis
 Lilia, cumque oleis suaves aspergite myrtos.

Assensere homines pariter, Divique canenti.

Annuit ipsa hilarans vultus Hispania, lentoque
 Abscessum molita gradu, vota ultima fudit ;

* Sub signo
 Virginis : at
 felicius sub tu-
 tela V. Deipa-
 læ.

Votum Philip-
 pi Reg. Hisp.

HEROICON LIBER III.

133

DELPHINO matura dato, quem sceptrā manerent
 Augusta Musulmanū spoliis, Lucina Puellam
 Ederet, Austriaco sociandam rite Puella;
 Arctius ut, misto Regum, totiesque refuso
 Paciferum in populos coalescat sanguine fœdus.

in ipso digressu
 significatum.

Interea lætum vicina sub oppida tendit
 Francus iter. fluvio invitus succedit Ibero
 Phœbus, & alternæ tradit crescentia nocti
 Gaudia, perque vias longæ spectacula pompæ.

Pompa clarissima,
 quæ Regina
 est comitio
 ad Galliā tra-
 ducta, in nodis
 excurrit.

Noctivagas nec pompa faces angusta requirit,
 Dum tædis præluet Hymen, ac Regia Virgo;
 Qualis ubi Solis radios excepit & ignes,
 Candida Luna nitet; clarioque argentea curru
 Pallentes inter, Cœli Regina, tenebras
 Stellarum famulante choro percurrit Olympum.
 Inde Pyrenæi saltusque amnesque relucent;
 Cantabrico rident splendentes æquore fluctus,
 Hesperiaque urbes, atque omnis Gallica tellus;
 Et bello antè flagrans, flammis melioribus ardet
 Europe, sacrosque Hymenæi concipit ignes.

FORTUNATÆ ingens ventura in secula nomen
 PAX & HYMEN Sedi geminato inscripsit honore.
 Addita religio, & populis venerabile numen;
 Regiaque æterno celebrabitur Insula cultu.

Quæ decori pars, Magne, tuo nunc denique, JULI,
 Restat, ubi angusto post horrida fœdere bella
 Paci adjunctus Hymen, myrtusque accessit olivæ?
 Tu Genius: tibi fas soli, quo robore mentis
 Cuncta potes, Francæ datus hæc in munera genti,
 Pondera moliri Regnorum, Orbisque ruinas
 Erigere, ac miris populorum ingentia vota
 Vincere consiliis, & spes prævertere factis.
 O quantum exhaustum curæ, sanctique laboris!
 Terque quaterque novis Pacem congressibus urges;

Carol. Mazari
nus. Regis
Christianissimi;
Patriarcha In
diarum, Catho-
lici Regis juri
jurando de ser-
vanda pace præ-
fuerunt in Au-
la comitali.

Non pendere minas operum, dubiamque salutem,
Passus, in expletisque manum desistere cœptis.
Et Pacem, immenso tibi quæ perfecta labore,
Teste Deo firmatam, & non violabile fœdus
Pacificâ in Cellâ juratis rite sacraasti
Regibus, ipse Auspex Latio venerandus in ostro,
Civilesque gerens curas & mystica jura.

Nec tua se Francis, Juli, Pax finibus arcet,
Collectos artus laceri per civica Regni
Dissidia in veterem revocans mitissima formam.
Hesperiam latè duplicem, geminumque peragrat
Oceanum, vastoque furentem gurgite Mosam,
Rhenumque æratis pugnacem cornibus, & qui
Mille alii bellis fremuere ardentibus amnes.
Taurinûm armisonis concussas motibus Alpes
Sedat; & Allobrogas, Mutinamque, arcesque Monæci,
Austriasque implet, lætoque per omnia cursu
Explicuit sese, volucris comes addita Famæ.
Venturos etiam motus elidere in ipso
Semine prægestis, longinquæ occurrere cladi:
Helvetios, Rhætos, pugnis exercita corda,
Fœdere componis fraterno, & legibus æquis.

Quid, quod & insanum toties popularibus undis
Anglia pacavit Tamesim, jam Rege recepto?
Quid non Sarmaticæ gentes, aut Cimbrica debent
Regna tibi? Sueco fessis requiescere bello
Queis tua ab ocafus extremam porrecta sub Arcton
Cura dedit, tacitâque ciens vi machina Mundum.
Illa tibi demum, Borealibus aspera flabris,
Sed magis infestas Gradivi experta procellas,
Et Batavis Anglisque gemens sub classibus, ecce,
Detumuit Baltis, socialiaque arma remisit.
Ilicet alterno fumantes sanguine & igni
Borboniam Stellam fluctus, & Julia adorant
Astra securigeros inter dominantia fasces.

Nunc & compositis Europes Africa rebus
 Pacem ambit donis supplex : captivaque tendit
 Jam palmas Asia, & liventia brachia vinclis,
 Gallorum memor, ac dominos venerata priores ;
 Missaque jam Cretæ gaudens, Franca arma reposcit.
 Ipsa etiam Pacis fructus America recentes
 Decerpfit, securo agitans commercia ponto.
 At trepidi jam jam Byzantia mœnia Turcæ
 Christigenum armatæ cernunt succumbere Paci
 Barbariæ terrore vago portenta tremiscunt,
 Fulmina ut extorques Aquilis, Colubrosque veneno
 Exarmas, sævosque adigis mansuescere Pardos.
 Et nova belligeri veniunt ad fræna Leones :
 Unguibus ira, jubisque minacibus excidit horror.

Sed caput hoc meriti, prono tu Marte fluentem
 Sortem inhibes, mediosque abrumpis Pace triumphos,
 Fœdera constringens dulci regalia vinclo.
 Scis votis posuisse modum, rebusque secundis,
 Victor & ipse tui, Fortunæque altior Heros.

Parcius hæc timida satis est libasse Camœnâ.
 Nam tua quæ summæ præstructa modestia laudi,
 Plura efferre vetat. Famam suspendit hiantem,
 Oppressitque animos stupor, & venerantia corda.

PAX PRÆFICA

IN FUNERE

JULII CARD. MAZARINI.

AN. M. D. C. L. X. I.

QUÆ modo sidereos tædis felicibus ignes
 Regalem ad thalamum, festæ inter gaudia pompæ,
 Pronuba jactabam, ferales Præfica tædas
 Tollere nunc Parcæ invidiâ fatoque sinistro
 Cogor, & augustos luctu fœdare triumphos.

Magne Parens, quid me fontes invisere terras
 Jussisti, & sævos oculis haurire dolores?
 Nempe excedentem, quo sum revocata Ministro,
 Aspexi, frustra injectis obnixa lacertis;
 Gallia dum trepidat labefacto cardine rerum,
 Numinaque implorans questu, surdasque precanti,
 Heu, frustra votis incendens omnibus aras.

Cui tantum in Genios licuit? nec parcere docta
 Semideis, nec Regum apices ostrumque vereri,
 Armaque opesque Ducum, spoliisque superba trophæa,
 Ludit Parca furens, atque implacabilis instat
 Communi exitio; capite omnes ferrea censet.

O Francæ, atque Italæ gentis decus! ô sacra Julia
 Purpura: tergeminoque corusci fidere fasces!
 Sidera nunc extincta, & tristi decolor umbrâ
 Purpura; nunc versi fasces, laurumque oleamque
 Funereâ mutant taxoque atraque cupresso:
 Palmarem pheretromutavit Gloria Currum.

Fortunæ ô vario Princeps jactate tumultu,
 Non te discordes animi civilibus armis,
 Non hostis dolus aut virtus navortia læsit:
 Mortis ego armavi dextram, morbi que furores
 In te acui; te Pacis amor studiumque peremit.

Parcite magnificum, Vates, affingere nomen:
 Insula, quæ tantæ dederit primordia cladis,
 Fortunata negat dici; crimenque fatetur
 Tot molem curarum, & non tolerabile pondus.

Ah, quoties præsaga mali, metuensque pericli,
 Arcano increpui monitu! Jam fœdere pacto,
 Curarum nimius jam desine. non tibi ahena
 Membra rigent; quantæve animo, stant corpore vires.
 Ille nec Europes tota sub mole fatiscit,
 Igneus, acer, agens, superis haud Mentibus impar:
 At corpus mortale tibi, &, qui clarius astris
 Intus agit, sensum divino carpitur igni.

Ipse tui cape fructum operis, cape debita Pacis
Præmia; quam populis præstas, cognosce quietem.

Instabas tamen usque avidus; belloque fugato
Materiem curæ immensam æternique laboris
Pertexens, farum ipse tuum, quo mœsta fremebat
Natura, urgebas morbo obluctatus iniquo:
Legatis responsa dabas; nec Gallica tantum
Commoda, bellantes etiam curare Polonos
Et Venetos totumque amplecti haud segnior Orbem.

Ergo deficiens, operique immortalis Heros
(Nec poteras majora, & jam Cœlestis haberi
Debueras, miro pacatis fœdere terris)
Humanas experte vices, usuque dolorum
Non rudis, extremam subiisti denique sortem.
Terrarum hoc tremor, hoc diri cecinere comete:
Montibus hoc pavidis sonuit, dum rite peracto
Munere signa moves, horrendum agitata Pyrene:
Venturamque Orbi senserunt omnia cladem.

Vicennæ infelix castrum, quo, maxime Juli,
Occidis, atratumque nemus, Regalia Tempe
Squallent, assiduus lacrymosus & imbribus aër:
Insani vastis tumuerunt fluctibus amnes.
Delicias Regni Ligeris corrumpit: & altam
Sollicitans Juli patriam, similisque furenti
Lugere amissos docuit Tiberinus honores.
Plangebant ripæ, plangebant Romula tecta;
Septeni gemitum referebant ordine colles.

Tum crudo infamem casu, penitusque nefastum
Damnare annum Superi morbisque fameque.

At tibi si merito producere longius ævum
Cœlicolæ dextri terris facilesque dedissent;
Multiplici expertas bello, notasque triumphis,
Lætior exciperet pacales Francia curas,
Tristibus exhaustæ fatis solatia plebi.

Talia versantem duræ inclementia mortis

Oppressit. nec tu legem indignatus acerbam,
 Mente inconcussus solida, fortique supremos.
 Tollebas pietate animos, Cœloque sacrabas.
 Scilicet & mœstum, in medio jam funere, Regem
 Multa monens, fidoque in postera secla Minister
 Consilio excurrent, mortalibus altior ibas.

Orbatæ hi Pacis gemitus, & flebile carmen,
 Musarum plangente choro, dum maximus Heros.
 Illustri exequias Umbrae supremaque solvit
 Officia æterno constans L O D O I C U S amore.

LUDOVICUS DE HARO

*Eodem, quo MAZARINVS Cardinalis,
 anno extinctus.*

* Autore Phi-
 lippo Rege.

E H E u, curarum consors, sociusque laborum,
 Hesperia decus, & Pacis * cognomine gaudens;
 Atque inter sanctos, Hymenæi fœdera, ritus
 Liligeri gessisse vicem clarissime Regis;
 Tune etiam Pacis luctus, HAROE, suburges?
 Funere fatalem duplicato polluis annum?

Regnorum Atlantes, gestis par nobile rebus,
 Fœderis & gemini arbitrio; sacroque labore
 Confecti, emeriti, dilectæ victima Pacis
 Conciditis, Capita Europæ devota saluti.
 Una eademque ambos æterno junxit honore
 Causa Duces, ambos & funere junxit acerbo.

Nunc, ubi terrenum mens exiit ignea corpus,
 Ætherioque volans demum requievit Olympo;
 Non tu, crinito ceu quondam Julius astro,
 Romulidum ludos propriosque invisit honores;
 Sed placido terris affulges gratior igni,
 Principibus, JULI, & populis spectabile fidus.
 Tuque, ô Gusmanide, gentiles inter olivas

Suave nitens, dulces patriæ das carpere fructus,
 Ingentisque ministerii dona ultima fancis.
 Anglica quin Tamefis turbatam ad littora Pacem
 Ante obitum firmas benesuolo providus ore,
 Legatisque vetas Francis concurrere Iberos.

Paciferi mundo Gemini, Martisque procellam
 Ingenii latè radiis stravisse potentes,
 Munere sic geminum & luctu conjungitis axem :
 Vestraque regales implebunt nomina fastos,
 Et pressò Invidiæ mirantia secla veneno.





HEROICON

LIBER IV.

GALLIA AD CUNAS DELPHINI.

AN. M. DC. LXI.

GENETHLIACON.



MIHI non frustra surdas jactata
per auras,

Quæ Regum ad thalamos cecini so-
lennia vota !

Audistis, faciles Superi ! DELPHINUS
Olympo

Ambrosios inter latices processit, & ignes
Purpureos ; capitique sacro micat aurea flamma,
Bisgeminam effingens stellatâ fronte coronam.

Hic ego te instratum cunis, quas aulica circum
Pompa fluit, folio Majestas intulit alto,

Aspicio, venerande Puer, Regumque voluptas
 Et populi communis amor! salve inclyte Delphin,
 Spes hominum, pignusque Deum, mea gloria salve.
 Quantum instar Genitoris habes! utque oribus ora,
 Et vivâ augustos effingis imagine vultus;
 Sic mentem affimilem menti, sic æmula corda
 Auguror, æquandosque altæ virtutis honores.
 Quantus & Austriaci flos Sanguinis ille renidet
 Borbonio intextus flori, blandissima Mater;
 Lacteolisque genis, tenero quas imbuunt ostro
 Ipse Pudor, roseisque micans expressa labellis!
 Felix ô nimium, tantos sortite Parentes,
 Igneus unde animos implet vigor, igneus artus;
 Scilicet & pulchro infusi cum sanguine mores,
 Fortunæque capax venit sub pectora Virtus.

Vos quoque divinâ felices Prole Parentes,
 Nobile queis vinclum & fecundi pignus amoris
 Additur, optato surgit nova gloria partu,
 Liligerique Heres columenque immobile Regni!
 Phœbe, tuos nimbo, * si quis rubor, obrue vultus.
 Major adest, mediamque Oriens splendore superbo
 Præstinxit Puer iste diem; festisque Novembrem
 Auspiciis, tantaque insignes laude Calendas
 Clarior illustrat Supremæ Lucis Imago.

Natus meri-
 die Delphinus
 (* nubilo cœ-
 lo)

Relligio & castus meritam Pudor æthere prolem
 Elicuit, cupidisque jubar spectabile terris.
 Ecquos non votis Augusta Puerpera Divos
 Advocat, & præsens spirantia ipsa numen,
 Difficilem expediant nixum, partusque labores?
 Nec minùs ipsa, gravi Reginæ arrecta periculo
 Suppliciterque instans aris, Cælum omne ciebam.
 Tota exorati sese reclusit Olympi
 Regia. tum niveos sparsit Via Lactea rores:
 Denſaque odorato volitantia lilia nimbo
 Aëra pinxerunt nitidum. data lilia Cælo,

Festa SS. om-
 nium luce.

Infita succrescunt terris. O publica Divûm
Cura, Puer, Divûmque ingens, Delphine, propago!
Indigetem L o b o i c u m, expectatumque Nepotem
Tardi commendent ortus, operosaque cœpta :

Tu facilis celerique venis gratissimus ortu ;
Nec populos mora longa & spes incerta fatigat.

Tu Pacis gremio eductus : præmissaque ab astris,
Sternere iter Pax iussu tibi, formosa Parentum
Pronuba, jam Nati curam Pax alma reposcit.

Ostensus primûm terris, spirabile lumen
Hausisti, medium cûm Sol attingeret axem,
Quâ lucem quondam Genitor libaverat horâ.
Artubus hinc solidum robur, vis flammea cordi,
Omnia Patris erunt. Requies labor vna laboris
Nota Viro. Sic arma inter noctemque diemque
Alipedi insidens, obsessas contudit urbes.

Nuper & insolito Ligerina ad flumina cursu
Pervolat attonitas gentes, & fulguris instar
Itque reditque alacer : vel aperto qualis Olympo
Fervidus astrorum Princeps, perque hospita Signa
Irrequietus agit, fecundaque lumina terris
Dividit, ingentes anni revolubilis oras
Assiduè relegens, atque indefessus eundo.

Nec deerunt, qui belligeræ præfagia vitæ
* Die Martis. Natali * de luce trahant, quam nomine signat
Bellipotens ; clarumque canant victricibus armis
Delphinum, & Martis conceptas pectore flammæ.

Disce tuis, Auguste Puer, proludere fati ;
Non quæ Parca vetus fragili currentia fuso
Temperat, aut Stellæ vis imperiosa coërcet.
Fortunam, Fatumque tibi Sapiencia finget,
Clarius & stellis Virtus, cœcasque regentum
Arbitrio sortes Divûm justissima cura.
Maximus imperiis, exemplis major, ad usus
Ipse Parens finget varios, palmarius autor,

Progeniem ; Pacisque artes Bellique docebit :
Sceptrum habili tractare manu ; librare bilancem
Justitiæ ; gentes gladio aut terrere superbas,
Aut tegere oppressas, animoque evincere Casum.

Haud magis omnigenas pestes, immania monstra,
Vindice terrarum dextrâ clavâque petivit
Alcides ; quàm Tartareis sese arduus infert
Portentis hostem LODOÏCUS, & agmina turbat
Juratis odiis, Vaticanisque coruscus
Ignibus ac Themidis ferro superimminet ultor.
Tum Pietas partes animum convertit in omnes.

Vos, Aræ, testes LODOÏCO, & conscia Virgo,
Divorumque alii, pronum queis rite clientem
Exhibuit, largis onerans altaria donis ;
Vidtricesque dicans lauros, atque hostica signa,
Signa triumphales delubris fixa per arcus.

Quid loquar, ut summo demittens vertice rerum
Officiis sese popularibus, altior exit ?

(Quàm bene Majestas placito sociatur Amori !)

Ut Martis furias, utque ambitiosa Duelli
Opprobria, indomitumque nefas feralis arenæ
Tandem abolet, pœnasque sacratis legibus armat ?

Quin etiam immensæ subit ardens pondera molis :
Publica mens toto Regni se corpore miscet,
Nil curæ assiduæ parcens, rigidoque labori.
Sufficit ipse sibi, & vigili regit omnia nutu.
Tristibus accisæ bellis solatia plebi

Multa agitat, Pacisque sequacia munera, & ortu
Jam, Delphine, tuo latè sua gaudia fundit.

Sic homines, sic ille Deos comprehendere gaudet
Promeritis ! sic ille Patrem patriæque, tuumque,
Magne Puer, geret, & curas utrique sagaces
Dividet incumbens, æternosque addet honores.

Naturæ igniculos, virtutumque indita Nato
Rex generosa fovens felici semina cultu,

Optatam eliciet segetem. Ceu stirpis origo
 Borboniæ, templiique Heros adscriptus & astris,
 Crescentem instituit sobolem; audacique Philippum
 Pectore surgentem patriæ ad fastigia laudis,
 Secum acies inter, trans & maria aspera duxit,
 Barbara cùm peteret Christo duce & auspice regna,
 Spectatorem adhibens operum, comitemque laborum.
 Hos adeo mores, Proavi decora alta, secutus,
 Præceptis factisque ingens formare magister
 Prægestit Natum Genitor, pulcrasque per Artes
 Grandia jam tenero meditantem educet ab ungui.

Cresce oleas inter, Princeps; ac Pacis Alumnus
 Reliquias bellorum, & adhuc stillantia tela

Sub idem tem-
 pus, Londini
 turbatū est in
 Gallos ab Hi-
 pano Legato.

Sanguine, funesto prohibe recalescere motu:
 Jam nunc terrificus, subnixoque addita Patri
 Maxima vis, Regique Nepos amor addite Ibero.
 Ah! ne Christicolūm lætis nimium invida rebus
 Eumenis insurgens, ah! ne vis dira laceſſat,
 Hosticaque ultorem dilectæ injuria Pacis
 Extimulet, Bellonam adigens revocare cruentam!

Sed quocumque gradum & fatalia verterit arma,
 Victor & aspectu, gelidumque in corda tremorem
 Hostibus incutiens animosi fulmine vultus:
 Pellæi ne tu Pueri de more triumphos
 Prosequere augustos lacrymis, jam laudis avarus.
 Apta seges laudum, cùm firma adoleverit ætas,
 Suppetet, optatæque expectat copia palmæ.
 Tempus erit, cùm te sua per vestigia ovanter
 Ducet ovans, primoque tibi mirandus ab ævo,
 Ille habitu Heroas referens ac robore Princeps,
 Vel magnum Alciden, vel magni pectus Achillei.

Spero equidem, Ottomanus venturi exordia belli
 Imbuet, heu Mundi Prædo, rerumque Tyrannus!
 Sed prius ipse tamen, dum te immatura moratur
 Indignantem ætas, fractus terræque marique

Fulmineo

Fulmineo Genitori, obtritaque agmina caudæ
Vasta trahēs, proprioque Draco se in sanguine versans.
Sentiet inde tuos, palmaria cœpta, labores,
Ultimaquē excipiet regali vulnera dextrâ,
Perdomitus sacro demum post secula marti.
Grassantem, immensâque feram cum strage ruentem
Hac-cohibere-tenus satis est, vel stringere plagâ
Membra levi. Monstro respirat Dacia pulso;
Prostrato insultat Venetus, Cretamque revellet.
Tu sævum toto Mahometem Oriente triumphâ,
Vindex Christiadum, & partæ monumenta salutis
Assere. Byzantî dejectis culmina Lunis
Purpureasque Cruces & candida lilia tollant,
Lilia Threïcias olim dominata per oras,
Perque Asiæ dites populos, altamque Siona.
At tibi grata rudes acuent præludia nifus;
Jam gladio frameâve brevi simulacra ciere
Bellica, congestuque extructas cespitis arces
Aut premere assultantem, aut mœnia ficta tueri,
Accensoque tubos nitro displodere ahenos:
Imperiosum equitem septa ostentare palæstra,
Mox & pulvereo fumantem attollere nimbo
Campum, aut venatu silvas agitare feroci.
Herculeos configere apros. Regalis Amazon,
Ausâ manu tenerâ Mater, pulchrâque beatas
Morte feras. Nam quid patrii certamina ludi
Commemoro? seu cùm peditem pedes ipse Gradivi
Legibus exercet, turmasve inducit equestres;
Innocuo spectantum acies terrore remulcet.
Carpite nunc, Musæ, citharas, nunc aurea plectra,
Nil humili meditata sono. jam sponte micantes,
Ecce, fides gestire novos in carminis usus.
Altiùs evectæ Pindo, Regalia cœlo
Ferte Puerperia, & meritos Delphinis honores.
Vestras ille colet studiis haud segnibus Artes;

Materiemque amplam jam nunc docto ille labori
Suggestit, ac niveos vagitu evincit olores.
Cingite Apollineâ cunabula cingite lauru :
Æternum viridem Puero properate coronam.

Tuque agè, Fama loquax, nunc omnibus, I, cita pennis,
I, cita Fama, tubis nunc omnibus ora resolve,
Per meâ regna volans ; Boreanque Notonque pererra,
Hesperiasque domos, Eoque Memnonis arva.
Ad tua subsilient auriti carmina montes ;
Intonsa applaudent nemora, exultantiaque antris
Saxa frement, vocesque jocosa revolvit imago :
Oppida Delphinum, Delphinum rura sonabunt.
Tristes diffugient Morbi ; fluet aureus imber
Verius in populos, quam cum, nascente Minervâ,
Flava Rhodi liquido maduerunt culta metallo.
Purpurei trepident alieno nectare fontes :
Millenas vagus in formas lasciviat ignis :
Ære cavo festi tonitrus, innoxia ludant
Fulmina ; & innumero florentes lumine Cœlum
Miretur terras, & non sua noctibus astra.
Bisgeminos concha Triton circumsonat Orbes ;
Regales inter saltus, & Fontis amœni
Delicias natum, Oceano Delphina renarrat.

O fortunati Tempe Regalia Fontis !
Vos Henriciaden Tyrrhenæ Naïdos alvo
Excipitis quondam ; tepidâque argentea lymphâ
Balnea præbentes, mollem fovistis Alumnum,
Rupellæ excidio venturum, & vana frementis
Oceani Domitorem, effractâque Alpe superbum.
Nunc LODOICIADEN, & Avo majora daturum
Prodigia, & forti non inferiora Parente,
O Regum Natale solum, sub luminis auras
Edis, ô Idæo longè felicius antro,
Clarius Ortygiæ luco ; veterumque Deorum
Quæcumque est patria, & ficto se jactat honore.

Sangermanæ arces, Vicennæque ardua castra,
 Et Luparæ crescentis opus, Lutetiaque ingens
 Dulces primitias visi Delphinis, & ortus
 Invidet : ambrosio decedit Sequana Fonti.

Quod superest ; munus faciles defendite vestrum,
 Cœlicolæ ; Geniusque vigil communia servet
 Pignora. Tuque adeo, Regum fidissima Custos,
 MAGNA tuum placido respecta fidere MATER,
 Quem pia Adoptivum Genitrix, sanctoque renatum
 Fonte dicat, properansque sinu meliore reponit.
 Nec minùs & dulci Genitor gratatus amore
 Acceptam retulit sobolem : conceptaque vota
 Reddere Carnutum celebres festinat ad aras ;
 Quo sua rite memor templo Soteria Princeps
 Fixa recognoscat, meritosque instauret honores,
 Bis-tuus, ô MARIA, & miro primùm editus ortu,
 Mox & præreptus morti Lodoïcus acerbæ.

Vera fave Lucina ; insonemque Alma Clientem,
 Complexa, & Nato commendans blanda Tonanti,
 Augustosque satellitio sepsisse Parentes
 Aligero, curaque ANNAM dignare perenni :
 Ut gremio reptans Aviæ, niveisque lacertis,
 Ludat purpureus, ludendo & seria discat
 BORBONIDES ; pietatem avidus pleno ebibat ore :
 Splendidaque æterno revirescat flore senectus.

Auspice te, jam sponte rosas, jam lilia, Virgo,
 Gemmantes Pueri fundunt regalia cunæ.
 Barbariæ Domitor latè, venientibus annis,
 Nomine, Diva, tuo passim sacrata trophæa
 Inscribet, spoliisque tholos ditabit opimis ;
 Imperio terras, meritis complexus Olympum.

Jam video effusas alta ad Prætoria Gentes :
 Concursum trepido fatalem Mundus adorat
 Certatim Delphina, & ovanem plausibus aulam
 Undique Legati celebrant, ferventque superbis

Officiis. major Pueri jam affulget imago.
 Promissa his demum Natalibus aurea current
 Tempora, & oblato riserunt omnia seculo.
 Haud temere lacrymarum exors., frontemque serenus
 Prodiit; & fausto præsignans omine Delphin
 Illustres cuncta in melius referenda sub Ortus,
 Spes quamvis auidas olim & vota improba vincet.
 Vincula, fasciolis victus, jam soluit egenti
 Turbæ Opifer, pavidisque Reis. Quàm lata sequentur
 Omnia! quàm felix Populis ac Regibus ætas!
 Major Avis, nec summo impar, DELPHINE, Parenti,
 VIVE, Puer festive; Puer suavissime, CRESCERE,
 Et merito jamnunc REGNA formosus amore.

Sic incompositam rumpentia gaudia vocem
 GALLIA, Regales Cunas venerata, profundit,
 Natalesque sacrant solennia vota Calendas.

CHRISTINÆ AUGUSTÆ
 POST ABDICATUM SUECIÆ REGNUM
 ejuratumque Lutheranismum
 TRIUMPHUS.

ILLUSTREM ante alios meritis pompâque Trium-
 phum

Ad Vaticanas, populis plaudentibus, arces
 Ducit Amazoniâ superans virtute Virago.
 Christiades Musæ, vos, ô, quibus inclyta facta
 Heroum ardenti labor est inscribere Olympo;
 Huc agè, victrici redimitæ tempora lauro,
 Artifices conferte manus, currumque volantem
 Flectite, regalisque decus cantate triumphi.

CHRISTINÆ vos tangit honos: nam gloria vestri
 Prima chori, Virgo, Parnassumque intulit Aula.
 Et mihi jam hiscenti, stupefacto inglorius ore

Stat pudor, atque hominum queritur succumbere laudes.

Gustavi soboles, majusque in nomen itura
Fulmineo genitore, & sceptris apta Virago,
Jam post sanguineas acies devictaque bella
Vandalicas pulcra gentes in pace regebat.
Fœmineo non illa manus assueta labori;
Otia nec temerè ludo contrivit inertī:
Sive domi externas libuit perdiscere linguas,
Et mores hominum varios, habitusque locorum:
Sive quatit cursu campos, saltusque coronat
Venatrix, crebraque feras indagine cingit;
Reginam qualem nemorum mentita vetustas.
Et forti immites urfos transfigere dextrâ
Christina innocui gestibat fervida martis;
Aut summa obscuras volucres de nube petebat,
Letiferæ accenso deprensas verberare glandis.
Intrepida & quondam medios equitare per ignes,
Insignis sagulo, & radio describere leges
Attonitæ visa est urbi, cum fortè coorta
Turbarent pavidam Stocholmæ incendia plebem.
Jam docto prisca evolvens monimenta recessu,
Ingeniique novos ad se Christina vocabat
Europa ex omni fetûs: folioque locavit
Pierias donisque acuit regalibus Artes.

Jam triplicis * regni curas & publica jura
Secum agitans, medio gravia aut consulta Senatu,
Auspiciis bellumque eadem pacemque gerebat.

Talibus accinctam curis, thalamosque perosam
Respexit divina Fides, miserataque longè est.

Sublustrēs inter nimbos diversa sedebat,
Heu, dudum ingratis Suecorum à finibus exul;
Tempore jam ex illo, Septem quo fœda Triones
Hæresis invasit, Luthero Acheronta movente
In Superos. tum pulsa Fides & casta parentum

* Suec Vandal
Goth.

Relligio ; averſis luxerunt templa miniſtris ;
Proſtratus Pudor, & ſacris confuſa profana.
Tum fera lymphatas rapuit Diſcordia gentes,
Armaque civili toties ſclerata cruore.
Nunc demum Suecos arcano tramite fines,
Non ulli audita ingreditur neque viſa profano.
Et jam Chriſtinæ ſenſus præmiſſa pararat
Gratia ; jam ſtimulos ſub pectore fixerat acres,
Sollicito exercens ſuſpenſam examine mentem.
Ergo Regina Muſæo illapſa per auras
Alma Fides, libris intentam, auguſta ſagaci
Mente explorantem divinæ oracula chartæ,
Nec ſuſpecta Patrum atque ævi documenta prioris,
Repperit, ac verbis compellat talibus ultro.

O gravibus, Virgo, non fruſtra exercita curis,
Necdum Auguſtanæ ſpernis deliria Sectæ ?
Aſpice, quas morum maculas, quàm diſſona Chriſti
Dogmata mandatis, furiali invexerit ore
Lutherus, mundi turbo, cladeſque ſacrorum.
Integra Relligio Romæ, mutataque nunquam
Doctrinæ capita. Hic PETRI firmiſſima Sedes,
Quam nullus toties concuſſam ſubruit hoſtis :
Pontificum jugis ſeries ac plurima virtus.
Hanc olim veſtri Sedem coluere Parentes :
Huc Proavi repetunt, magnique ex ordine Reges,
Viſ & Naturæ captum ſuperantia, viresque
Aligerumque hominumque, Dei certiſſima ſigna
Proſequar, attonitum paſſim ſpectata per orbem ;
Aut quæ purpurei conſignant ſanguine Teſtes ?
Quod ſi adeo inſedit, ſceptriſque affixa Gothorum
Hæreſis avelli refugit ; fuge noxia ſceptra,
Nec malè regnandi miſero tenearis amore,
Tartareo interea debens ludibria regi.
Quid Regni periturus honos, ventolaque Fama ?
Terrenæ quid opes, vel mundo æquata poteſtas

Profuerit, si damnum animæ fatale sequatur ?
 Quod genus hoc lucri, quæve hæc commercia rerum?
 Aude, atque exemplum seclis memorabile præsta,
 Quod stupeant cuncti, vix ulla imitabitur ætas.
 Projice sceptrum manu, capiti depone coronam:
 Tanti æterna Salus. Sortem miseratus acerbam
 Indignamque perire animam Deus, hoc Deus autor
 Qui glacie pontique ideò te vindicat undis
 Bis tenui ereptam lethi discrimine, salvæ
 Imperat, ac tibi me superis demittit ab oris.
 Illa ego vera Fides, quam nullo callida fūco
 Infecit Novitas, spurcæque Licentia vitæ,
 Inque Erebum præceps graviore Superbia casu.

Deficiente glacie sub traha
 ludicra, divino
 beneficio servata semel fuerat;
 iterumque, delapsa in mare
 tabulâ salutate, cum suam
 classem invisceret.

Sic ait ; & speculi crystallo expressa sub umbra
 Numinis ora offert, lævaque à parte minantes
 Perfidie pœnas horrendaque Tartara flammis.
 Præmia dextra nitent victricis fronde coronæ,
 Lemniscorum instar, radiis ardentis & auro,
 Illicet abstersâ dubiæ caligine mentis,
 Ac subitum mirata jubar Christina benignam
 Cœlestum gratatur opem, victamque fatetur
 Lata Deo, Fideique arctis complexibus hæret.
 Tu mihi dux vitæ, tu princeps una sacrorum :
 Te sequor, & spreta Regni te sorte pacifcor.
 Quæstus erit Christo impensæ jactura coronæ.

Tantas magnanimo reddebat pectore grates
 Herois ; patriâque ardet sceptroque relicto
 Præsentem Romana sequi ad sacraria Divam.
 Dissimulare tamen conceptos Numinis ignes,
 Ne qua mora occurrat votisque ingentibus obstat,
 Cogitur, obscuroque fidem servare recessu.
 Tantum exscendendi folio patefacta voluntas.
 At Regum vulgò pugnas terraque marique
 Ambitus imperii & nunquam exsaturata cupido
 Misceat, & tantis concussit motibus orbem.

Christinam non terra capit, nedum ora paterni
Imperii ; Balthin quamvis transgressa profundam,
Atque in Germanos excurrit Suecia tractus.
Jam major, cùm se ipsa gradu sic læta supremo
Dejecit Regina sui, manet insita vultu,
Nil splendoris egens alieni, & plurima toto
Majestas habitu atque augusto corpore regnat.
Suspensa Europe cœptis insignibus hæsit :
Discessus quæ causa, viæ quæ mera, requirunt
Attonitæ gentes : Christinæque, alta prementis
Consilia, hospitium diversis partibus orbis
Optavêre sibi studiis certantibus urbes.
Dia Fides nebulae circum velamine tecta
Monstrat iter ; puppinque freto, campisque quadrigas
Occultâ regit illa manu, Romanque suburget.
Heroïna viam regnando affectat Olympo.

In urbe Oeni-
ponte Catholi-
cam Religionẽ
publicè profes-
sa Regina.

Sed nebulas rapidi Pontem discussit ad Oeni,
Christinamque Fides templis inducit amicis.
Huc oculos, lætasque, Pij, convertite mentes !
Regina ante aras (urget præsentia Christi)
Diram execratur Sectam, ritusque profanos
Lutheri ; & Sanctæ fastigia Sedis adorat.

Protinus Italiam magno petit agmine Virgo ;
Aëriasque Alpes, astrisque minantia saxa
Transcendit. cedunt amnes, montesque residunt.
Illa per Euganeos, & quæ quondam arva togati
Galli habitant, Italo commisti sanguine Galli,
Fertur ; & Historiæ relegens vestigia priscae
Cuncta notat ; doctisque oculis loca clara recenset :
Majorem ipsa locis famam nomenque relinquit,
Et quæ impressa colant feri monimenta nepotes.

Nūti quatuor
Pontificii Chri-
stinam excepẽ-
re in primo Ec-
clesiasticæ di-
tioniis aditu.

Amilias Christina simul pede contigit oras ;
Illam Oratores, venienti occurrere jussi,
Quattuor excipiunt regalis munere pompæ,
Bucentaurus adest aulaeis strata superbis,

HEROICON LIBER IV.

353

Quam celeres pictâ comitantur classè phaseli :
Reginamque vehit, subter plaudentibus undis
Eridani. Vesulo hic natus, per pinguia latè
Culta natat, claroque idem spatatur Olympo
(Mirus honos) flumenque suum, * sua sidera servat.
Cœruleum crinem & taurinæ cornua frontis
Populus innectit bicolor, Phaëtonia silva,
Umbrosūque addit capiti decus : undique manat
Splendidus Heliadum ramis lacrymantibus humor,
Jam triginta ingens fluvios lato accipit alveo,
Et mare in Adriacum septena per ostia volvit,
Ipse mari similis, vasto Padus agmine torrens.
Atque hic Centaurum magnam, Dominamque ve-
hentem

* Eridanus
etiam constel-
latus.

Suscepit ; tantoque oneri succedere lætus
Currit iter liquidum, * Stellatque applicat oræ.
Interea misto fervent clangore tubarum
Tympana ; & ignito sclopetâ vapore salutant
Trajicientem undas Nympham, ripasque tenentem.

* Oppidum eo
nomine ad
Padum.

Stabat ALEXANDRI juxta spectabile donum,
Regium opus, villosa tegunt quam serica rhedam
Puniceâ insignem testudine, fimbria circum
Aurea, & argenti lamnæ pretiosaque signa.
Cælatus Fidei multa nitet arte Triumphus :
Hæresis incassum colubris stridentibus horret
Victricis pede pressa, caputque elisa nefandum.
Sueca triumphales currus sedemque Virago
Purpuream inscendit, lectâ cingente catervâ.
Obvia Reginae plenis Ferraria campis
Profluit : exultant muri ; tonat ænea moles
Fulmine pulvere ; tormentis tota remugit
Arx circum, & festo splendescunt templa paratu.
Sub noctem plateæque rogis, facibusque fenestræ
Undique collucet, faciemque imitantur Olympi.
Nec pompâ meritoque Bononia cedit honore ;

Ad veram
istiusmodi cas-
laturam hoc
Poëmate allu-
sum.

Fœmineosque choros, ludosque ostentat equestres.

Cætera quid memorem, Ausonias quacunque per
urbes

Christina invehitur, variæ spectacula pompæ,
Concurfus populorum, effusæque gaudia passim
Principis adventu? Procerum quid publica narrem
Officia, & cultus Patrum, quos sanctior ornat
Purpura; seu plebem curâ interiore gubernant
Pastores animorum, aut extera jura tuentur
Pontificis, dominisque adstringunt legibus urbes?
Perpetuo, quâ quisque potens ditione, triumpho
Suscipiunt alii ex aliis; mox ordine longo
Perducunt mutantque vices: finesque sub ipsos
Grande satellitium florentibus ære catervis,
Præsidium ornatusque viæ, comitatur euntem.

S. Domū Lau-
retanam piè
magnificeque
Christina co-
luit; sceptrum
coronâq; Cœ-
lesti Reginae
dicavit.

Ast illam Picenum in agrum rapit entheus ardor,
Quæque per immensum Galilæos aëra tractus
Deseruit, terrasque supervolitavit & undas,
Aligerum subvecta manu, clarissima Cella,
Mortales quo fonte Salus manavit in omnes,
Gratiaque & cœli miracula, sæpe tiaris
Supplicibus, sæpe abjectis decora aucta coronis.
Certant muneribus gentes, cultuque perenni
Votorum reus ante aras provolvitur Orbis.

Ut primum Lauretum oculis sitientibus hausit,
Constitit; & Magnæ ante oculos ceu Matris imago
Splendeat, ætherios persentit pectore motus
Religione loci atque afflatâ Numinis aurâ.
Desilit extemplo rhedâ, flexoque salutat
Reginam Regina genu. pedes ardua carpit
Inde viæ spatia, & parvis subit hospita muris,
Quos Mariæ cultus magnas superextulit urbes.
Nec verò umbellam capiti Christina modesto
Prætendi oblatam patitur; famulamque gerendo
Virginis, augustas virgo contendit ad arces.

Cœlestes Genii, *MARIÆ* prætoria turma,
Accipite hospitio subeuntem & dona ferentem
Christinam ; Divæque adytum referare Parentis.

Festa dies aderat, sæcli melioris origo,
Cum Virgo sterili Concepta effloruit alvo,
Nullaque Adamæ traxit contagia noxæ,
Sed magis æternæ radios & semina mentis.
Tantum actura diem sanctæ in penetralibus ædis,
Ingreditur Christina locum, quò lapsus ab astris
Nuncius optatam roseo tulit ore salutem.
Hic Deus humanam faciem mortaliaque ora
Induit, angustæque Puer reptavit in aula.
Vos Aræ testes Christinæ, & conscia Virgo,
Quos animo imbuerit sensus, cum prona verendum
Ore solum pressit ; flagrantiaque oscula figens,
Felicem venerata Domum est, Dominamque Sacello
Nunc quoque præsentē, mox cernua corpora Princeps
In genua excipiens, dixitque tenerrima verba;
Vibrantemque auro densoque adamante coronam
Cum sceptro appendit *MARIÆ*, propriamque sacravit.
Huc, iterum abjectos, Regni transcribis honores,
Gestamen dextræ, capitisque insigne superbum ;
Teque tuis super ipsa dicas bene prodiga donis !
Quam tibi fidereâ gemmantem luce coronam
Stellata ardenti referet diademate Virgo!

Si Bereniceo detonsum vertice crinem
Carmina donarunt cœlo ; Cressæque puellæ
In nova conversos, frontis decus, astra pyropos :
Non æstro graviore icti, tua turba, Poætæ
Depositam attollent rutila inter Signa Coronam ?

Vix è complexu *MARIÆ* divulgata, Sacelli
Thesauros postquam convectis undique donis
Visit, & ingenti cumulavit munere gazam,
Tendit iter Romam Christina : hic terminus hæret.
Jamque Apennini superat juga, jamque Sabinos
Præterit, & dominam Latio procedit ad Urbem.

Cardin. ab
Haffia.

Ventum ad Bracciani silvas, Urfinia Tempe.
Tum gemini Româ, sacri decora ampla Senatûs,
Legati properant ; Medicæo sanguine clarus
Alter ; & antiqua Chattorum * ab origine Princeps,
Ipse olim Fidei præda, & pars magna triumphi.
Loricata præit, pacem spirantibus armis,
Turma: laceffenti lux ærea sole resultat;
Attabalique tubæque sonant. Bis-dena sequuntur
Corpora Epheborum, vestem aurea & aurea formam.
Germani Thuscique Equites, generosa juvenus,
Mifcentur. Procerum inde globus : quo deinde sub ipfo
Legati incedunt mannis candentibus ambo
Purpurei, comptus glomeratur ponè fatelles,
Pontificisque Cohors levibus Prætoria in armis.
Multijugi extremo voluuntur in agmine currus.

Sed quid ego hæc autem celebris præludia pompæ
Demoror, ingreffu tacito cùm Regia Virgo
Romam init, ac meritos privatim exceptat honores ?
Jam nova feptenos meditari gaudia colles
Aspicio, & lætos Tiberinum attollere fluctus ;
Iplam pænè fuis convulfam fedibus urbem
Geffire, ac totis cives fe effundere portis.
Jamque Magiftratus, Romæ fimulacrâ prioris,
Ecce, Palatina trabeati ex arce feruntur
(Romuleæ antevolât flos Nobilitatis, avorum
Fronte notas animumque gerens) Christina, Quiritum
Nomine grântes, blando quos excipit ore.
Hos fuper advenit, longâ comitante minorum
Pontificum ferie, Farnefius ; inclytaque offert
Munera Alexandri, follennis fercula pompæ,
Lecticam fellamque ingentemque ordine rhedam.
Ducitur Afturco fonipes candore nivali,
Textilibusque fuper frâtis. argentea pendent
Fulcra pedum hinc atque hinc : mollique argentea
frænâ
Ore terit ; molli in numerum glomerantia grefsu

Crura ferens, tergo Reginam invitat ovantem.

Quæ simul infedit, facilesque immisit habenas ;
 Continuo regalis honos procedere pompæ
 Incipit, & Romæ vicina ad mœnia tendit.
 Armatae anteeunt turmæ, festosque tubarum
 Tympana concentus inter Mavortia plaudunt.
 Puniceas chlamydes atque ære sonantia tela
 Ostentat generosa cohors, quo milite corpus
 Stipari solitum Reginæ. fortibus omnes
 Exultant in equis, pennis capita alta decori.
 Externi Latiique equites fulgore coruscant
 Quisque suo, & socium radiis vibrantibus ardent ;
 Principibusque ingens decorum crebrescit imago.
 Tum Vaticanæ, Capitolinique ministri :

Proxima Nobilium emicuit Dominam ante caterva.

Ibat Legatos inter media ipsa, triumphi

Et pompæ Christina caput ; circumque superbâ

Veste fluens. tamen augusti speciosius oris

Majestate viget ; Gustavique instar in illa est.

Plurimus Antistes sequitur ; mox aulica turba.

Tandem immensum agmen Custodia claudit Equestris,

Ultimaque auratas agitant spectacula rhedas.

Talis erat pompæ species. Cape, Roma, triumphum,

Qualem Cæsarei nunquam peperere labores :

Quamquam & belligeri Rhenus juga nautica pontis

Ferre gemens, fractusque audaci classe Britannus

Oceanus ; rutilisve Pharos simulata pyropis,

Cultor & Ægypti septemplex brachia Nilus ;

Aut Gætulus Atlas, cœlo supposita columna,

Portari, & lacerae prostratis mœnibus urbes

Ire videbantur, spirantia signa metallo ;

Turrigeræque ferae, placidique ad fræna leones.

Martia quin etiam capti spectacula Reges

Ornabant, nexique rotis victricibus orbem

Fortunæ inversum pronâ cervice gemebant,

Splendida ludibria & vivum assumulata trophæum.
 Hic Regina jugo vinclisque asserta Tyranni.
 Non hominum genus & mortalia contudit arma ;
 Sed Stygiam Christina manum , Stygia arma refregit ;
 Et monstrum domuit Lernæâ immanius Hydrâ.
 Laurea pacales inter surrexit olivas,
 Nec crudelè rubens hostili sanguine, nec quam
 Ferrea messuerint bruto certamine tela,
 Nullum illinc temerè foliumve umbramve tribunus
 Decerpat, milesque ferox ; quo more solebat
 Fronde triumphali galeam redimire comantem ;
 Dum sequitur spoliis oneratum insignibus axem,
 Vocibus incompertis ludens, & sæpè protervo,
 Haud ingrata Duci, jactans convitia cantu.
 Hic propria in solidum Christinæ gloria cessit.
 Nec solitas Fortuna vices casusque secundos
 Exprobrat. auxilio tali non indiga vicit
 Heroïna : Fides in partem & Gratia venit,
 Ac totum est Virtutis opus. Nec inania rerum
 Traducit vulgi ante oculos simulacra triumphus,
 Quæsitum imperii referens nomenque decusque :
 At Virgo exuperans animis quæ regna reliquit ;
 Hæc merita, & justæ non vana choragia pompæ.
 Patritius tanto nec deest occursum honori :
 Major & antiquo mundi rectore Senatus,
 Publica Christiadum quo se res cardine vertit,
 Reginam opperiens dextrâ lævâque sedebat
 Flaminiam ad portam, facies cui pulcra triumpho,
 Principis & vario præscriptæ carmine laudes.
 Cuncta renidebant intus ; pictisque tapetis
 Marmoreas luxus vestibat Regius ædes,
 Romanasque æquabat opes. & milite septa
 Perpetuo, hinc illinc duplici via fulgere versu
 Armorum ; fragor unde ingens, latique tumultus,
 Quando alacres inter movet Heroïna maniplos.

Ærati resonare tubi, reboare curules
Bombardæ, & calido glomerari pulvere nubes.
Mole laborabant spectantum altæque fenestræ,
Et plateæ angustæ stipatis undique turbis.
Pegmata per vicos passim substructa ; premuntque
Protruduntque alios alii, & vix frontibus extant.
Defixis inhiant animis ; qui frontis honores !
Ingenii quæ lux oculis & amabile fulgur !
Palladis ut veræ faciem, nil molle decoro
Ore gerens, saguloque habiles Virgo extulit artus !
Cernere inexpletum flagrant, atque omnia monstrant
Civisque, inter se, & mistus denso advena civi.
Mirantur speciem insolitam juvenesque virique,
Et cum virginibus matres, tenerique puelli :
Servatisque senes tanta in spectacula canis
Gaudent, & vitæ fructum cepisse fatentur.
Usque adeò, Gothicis quondam tremefacta sub armis,
Nunc placido Gothicæ adventu decorata Puellæ,
Lætitiâque fremens & dulcibus excita curis
Totaque ovans, Roma hospitio sacra fœdera sancit.

Interea cantusque inter plaususque Quiritum
Percurrit Marci stadium Regina ; PETRIQUE
Templum augustum, ingens (cui nec Solymeia certent,
Nec quæ Ephesus quondam stupuit miracula) metam
Votorum, extremo à Borea tractuque viarum
Quæsitam immenso, sacrorum contigit arcem.
Jam festos Moles tonitrus Adriana remittat :
Sanctior insonuit Pæan : & sacra terentem
Limina Christinam divinæ munere laudis
Suscipit ; ac meritas solenni carmine grates
Exequitur chorus, & longè tecta alta volutant.
Majores affusa Deum veneratur ad aras,
Triticeâ indutum specie ; dignâque triumphum
Regina, Hæreseos Victrix, pietate coronat ;
Mirantes populorum oculos hîc illa morari

Dignior, in medio quàm cùm spectata triumpho.
 Purpurei excipiunt multo cum Præsule Mystæ,
 Atque in confessum celebrem comitantur, ubi ingens,
 Et Regum Pater & Populorum Pastor, ab alto
 Fulget Alexander solio ; sanctisque renidet
 Montibus augustum ac mundo venerabile Sidus.
 Huc Suecam divina Fides perduxit ; & imos
 Demittens Patris ante pedes, Cœlo altiùs effert.

Stella monti-
 bus imposita,
 in Alex. VII.
 insignibus.

Perge, triumphalis Virgo, decus addita Romæ,
 Quæ Gothicas contemnere opes, Regnisque relictis
 Ausa Fidem Christumque sequi Christina vocantem.
 Aspice, quos summi conspecta in luce theatri
 Excieris motus animorum ; actasque potenti
 Exemplo gentes, Procerum & cunctantia corda
 Cephææ doceas Fidei succedere signis.

Subinde Ger-
 mani complu-
 res in urbe
 Neapoli Lu-
 theranissimum
 ejurarunt. Prin-
 ceptis Sultza-
 chius ad Ca-
 tholicos tran-
 sit.

Jam te hæc illa Fides, Romana in castra receptam,
 Relligione frequens templisque exercet & aris.
 Jam tibi, Martyribus largo perfusa cruore
 Ostendit monimenta, & fortia facta renarrat ;
 Quantasque, ob Superos felicia vulnera passi,
 Heroës vario tulerint certamine palmas.

Hæres capta locis : nec te tam rudera fastūs
 Cæsarei, molesque operum, insanique labores,
 Seu Thermas Circosve, aut prisca Palatia lustras,
 Quàm Pietas, & adhuc spirans post secula Virtus
 Detinet illecebris & conscia pectora mulcet.

Christina Ro-
 manæ præfuit
 Academiæ.

At tibi magna canunt Latiae præconia Musæ,
 Et quæ te docto regnantem Academia cœtu
 Cepit, & ingeniis stupuit dare jura potentem.
 Felices, quibus hæc coram datur acta tueri !
 Nos, quibus obtusas it nuncia Fama per aures,
 Gaudia fera procul verisque minora triumpho
 Concipimus, tenuique ardentes pascimur aurâ.

JUSTA

CHRISTIANISSIMÆ REGINÆ
ANNÆ AUSTRIACÆ.

ERgo luctificos, ardentia monstra, Cometas
 Principibus torvo aspectu fatale minari,
 Certa nimis, mundique fides sancita dolore est.
 Heu stella infelix ! geminus geminata Cometes
 Funera portavit terris : consortia damna
 Francamque Hesperiamque furens divisit in Aulam.
 Ecce cadit vix composito super Anna Philippo,
 Jampridem inmiti morbo lentisque peresa
 Mortibus, inque suos luctus servata, superstes
 Augusto germana seni. Nil docta vereri
 Cruda, ferox, regnantum apices & symmata nudo
 Miscet Parca gregi, spoliisque exultat opimis.
 At Regina Parens, cognati ab origine secli
 Ad metas justum vitæ inviolabilis orbem
 Exigeret, niveæque impleret lustra senectæ.

Nascentem excepit solium : sceptrâ inter Ibera
 Reptavit, Tyrioque ardentes murice cunas.
 Aureus Infantem plausis Honor ambiit alis.
 Quid generis decora alta juvant, Proavique coronæ
 Cæsaris, & gemino spectata sub axe trophæa ?
 Quid, magnum tacitâ ille ciens vi maximus Orbem,
 Dum Carpetanos Avus inter confidet hortos ?
 Quid suppar Divis Genitor, sanctissimus Heros ?
 Justitiæque Virum pariter, bellique potentem ;
 Calvinique satus, Furias domitare rebelles
 Felicem ante alios, raris æquaverat Anna
 Dotibus, Austriaci lux ingens sanguinis, ingens
 Borbonii ; meritis & jam præceperat astra.

Providus imperio vultumque animumque paravit

L

Duplex come-
 res Philippi
 I V. & Annæ
 proximis fune-
 ribus præluxit.

Ludov. XIII.

Naturæ solertis amor ; Fortuna superbis
Prodiga certavit donis: ornavit utramque
Largior, & pleno accumulans se munere Virtus.
Hinc vitæ factis contextæ illustribus ordo
Implevit secli fastos : ævique prioris

Matronis melior, documentum insigne futuris,
Undique Reginam penitusque Heroïda gessit.
At laudem vitæ immensam cursumque coronat
Clarius occasu, & cæli regna ardua victrix
Vi rapit, & rigido venalem funere palmam.

Ah cancri labes dirum serpentis, & ipsa
Pectora letifero depasti horrentia morfu !
Aspera nec partem indulgit laniena quietis :
Ac si quâ fors arte sopor, potuque vocatus
Pœoniô, qualem virofa papavera succô
Accersunt agris requiem ; non funditus omnem
Oppressit curæve animis, membrisve laborem.
Sex adeo menses immani exercita morbo,
Nocte dieque avidi stimulos experta doloris ;
Nec minùs abstinuit, votisque Augusta pepercit,
Communem plebs orba pio cum Rege Parentem
Dum gemit, invidiâque onerans cælum omne fatigat.

Divinæ, quid, cùm subierunt fercula pompæ,
Omnis quam Procerum ducit chorus, aulica turba,
Rexque facem præferre suis, celebrique præire
Sedulus exemplo, majoris & assecla Regis ?
Hospita quo Dominum sensu moribunda recepit,
Præsentemque animæ panaceam, alimumque supremæ
Tutamen complexa viæ, & contermina cælo !
Illa etiam medio adstantem sub funere Natum
Crebra monens ; & quæ Superis, quæ debita regnò,
Supremum ingeminans, nil jam mortale sonabat.
Inconculso animo solidæ constantia mentis
Perstitit : ac longo æternas mercata dolore
Delicias, molli ut somno Regina soluta est.

Ignibus explorata nitet sic aurea lamna,
 Et rutilum terræ excoctâ jam sorde metallum.
 Gratia quod finxit tenerum, propriumque sacravit
 Imperio usque regens facili, dum vita manebat;
 Post fatum, lectâ Cor Gratia sede recepit.

Cor Annæ de-
 positū in Par-
 thenone Val-
 lis-gratiæ.

Continuò exequias Nymphæ, pullata caterva,
 Instituunt. duro turbatus Sequana casu
 Torrentes egit lacrymas : Rhodanusque Ligerque
 Planctibus insonuere, tumentis & alta Garumnæ.
 Ille & flaventūm latè qui dives aquarum
 Ibat ovans, rutilâque Tagus formosus arenâ;
 Sordet rauca sonans, nigra decolor aurô.
 Protinus & sancto concussus flumine Tybris
 Ingemuit famæ, atque oris florentibus Arnus,
 Ticinusque Padusque : & ripa binominis Istri
 Cæsareæ mœstis Aquilæ clangoribus horret.
 Belgarum amphibii lugent Venetūmqûe Leones :
 Nec non & strata per Baltica littora phocæ
 Triste fremunt; plangitque Arctos, nec jam ultimat

Thule :

Europæque omnis sordescit purpura lactu.
 Ipsæ etiam squallent aræ, delubraque mœstum
 Visa queri, & grandes in fletum volvere guttas.

Sic decuit. meritis & quas regalibus Annæ
 Equiparet grates ? quæ præmia digna reponat,
 Augustæ claros celebrans pietatis honores,
 Religio ? vel quo civilis munera curæ
 Agnoscant populi sensu, pretioque rependant ?

Mausolæum ingens, æterni regia luctûs,
 Septem inter petiit dubiam miracula palmam;
 Barbaricas ut opes monumento exhaustit inani
 Caria, magnifici Numen venerata doloris.
 Altior insueti moles operosa sepulcri
 Parnasso assurgat, summumque affectet Olympum.

Anna, tibi sedem hanc mœsti sacrabit Honoris,
 Purpureæ hospitiiis umbræ titulisque superbam,
 Pieridum chorus & studiis certantibus Artes.
 Alterno crescent gemitu cantuque labores;
 Et densæ lacrymolæ ibunt per marmora gemmæ.
 Pyramidas Memphis, Regum feralia tecta,
 Summitter, dirisque extructas Manibus aulas.

Stabunt hinc atque hinc ebena lugentia signa,
 Gallia & adversum servans Hispania postem,
 Ambæ squalientes, dejectis frontibus ambæ.
 Borbonii dextrum Reges latus ordine longo
 Distinguent, lævum Austriaci, spirantiaque ora
 Semideos: medio splendescet Gloria luctu.
 Sceptra decussatim & sparsis scena ampla coronis,
 Liliaque in totum fundent se plurima limen,
 At non jam nivei, deformia lilia, flores;

* Insignia Ca-
 stellæ.

Et pede quas valido pulsat Mors improba * Turres.
 Mistaque perpetuo current insignia limbo
 Circùm dædaliis monimentum amplexa figuris.
 Quattuor adstabunt, pariterque insignibus aptæ
 Quæque suis, librâ, speculo, cratere, columnâ
 Virtutes, Annæ comites fidæque ministræ.
 Principis exuvias, cari latera alta sepulcri
 Servabunt, lacrymisque humescent ora decoris.
 Et mihi jam signis asper, sculptâque superbus
 Factorum serie paries nitet undique, vivum
 Artis opus, variâque Annam sub imagine reddit.

Principio, terris demissum à Numine pignus,
 Post steriles annos miro tandem inclyta partu
 Apparet, censu ætherio dotata Puella.
 Mox paribus sterilem fatis emensa juventam,
 Supplicibus pariter votis fecunda, morantis
 Naturæ evincit senium; Prolem ipsa vicissim
 Elicit optatam, patrio dignum æthere munus.
 Felix Prole Parens, felix Genitrice Propago!

Quinquenni ereptum Puero Regina Parentem
 Supplet, congemmans curam ; Matremque Sorore
 Deposita gerit, & populis dat jura subactis.
 Indomitos pariter Belgas, duplicemque refregit
 Hesperiam ; trans & refugum victricibus Albim
 Impulit auspiciis Celtas. lætissima campis
 Palmarum seges, atque astris vicina trophæa.

Terrificas addam cælato in pariete nubes,
 Fulguraque & vastis surgentes motibus undas.
 En, freta per tumida atque horrentes marte procellas
 Tendit iter ; clavoque hærens affixa, magistram
 Anna manum scopulosque inter Syrtisque probavit ;
 Et cæcos populorum æstus, Procerumque tumultus
 Exuperans, tutâ navim statione reponit.
 Nec quâ fœminei sensus animique minores
 Gaudere assoliti, vindictam exegit ; & ipsos
 In portum rapidis hostes subduxit ab undis.

Tu quoque pars ingens operis (cui Phasias ales
 Nomen habere dedit) supremum augebis honorem,
 Insula, jam nostris olim cantata Camœnis,
 Quam florentem auro myrtique oleæque coronant.
 Sustulit Anna pias cælo dum fervida palmas,
 Addita belligeri signis victoria Nati.
 Afflictis subiit Pax denique sospita regnis,
 Et Pacem comitatus Hymen, Annamque Maria
 Virtute ac formâ referens Neptisque Nurusque.
 Perductam huc demum curam gratata Parenti
 Gallia, jamdudum Lodoïci fortibus apta
 Regna sedent humeris : latum jam temperat orbem ;
 Et patrias laudes, virtutès reddit avitas :
 Gemmiferâ Delphin ludit formosus in aulâ.

Parte aliâ, dulces latebras sacrosque recessus,
 Parthenicique umbris Annam se involvere septi
 Aspicias ; gremio tacitæ quâ Vallis amicum
 Hospitium & fidam præbebat Gratia sedem.

Atque heic, exutâ jam majestate, sed omni
 Imperio assurgens & jam sese altior ipsâ ;
 Ingratos Aulæ strepitus curasque profanas
 Effugiens, nido ceu fessâ columba resedit :
 Libera, collectamque Deo jam proxima mentem,
 Virtutum haud mollem trivit Regina palæstram.
 Sancta laborato passim argumenta sepulcro,
 Dona que & insignes gazis regalibus aræ.
 Laureti felicitis opes Cellamque verendam ;
 Teque, ô Salmurium, Ligerinaque flumina testor ;
 Vos, Peronæ arces, queis præsidet aurea Virgo ;
 Lætitiaque ædem titulo crebrisque superbam
 Prodigis ; vos & Carnutum ingentia testæ :
 Parisiis gratæ ante alias decora ardua Vallis,
 Nascentem venerata Deum, fulvoque metallo
 Turritos apices, nitidæ fastigia molis.
 Et vos, Pictonici, testor, Radegundis honores,
 Lychnosque statuasque auroque micantia corda ;
 Mille alias cultûs species, accitaque longè
 Lipsana, sollennes pompas, ritusque Sacrorum ;
 Quos & Salesio titulos, quæ præmia, Divûm
 Interpres Vaticano decrevit ab alto,
 Dum studiis instat supplex flagrantibus Anna.

SS. Eucharis-
 tiae cultus.

Heic nebulas inter niveas & mystica in umbrâ
 Stat radians & Sole latens Deus eminet aureo:
 Gloriaque & teneri circumfunduntur Amores.
 Marmoreæ monimenta Crucis, Sedanæ trophæa ;
 Templaque collucet, Franco quæ plurima regno
 Addidit, æternûm sumptu spectabilis Anna
 Egregio, & claris vivax post funera factis.

Quin etiam Regina alium porrecta sub axem,
 Munificâ Europam jungens Americaque longè
 Arva manu, Pietas. stat densis aspera silvis
 Barbariæ facies, Canadæque horrentis imago,
 Præcipites inter salebras abruptaque saxa,

Per glaciesque nivisque armatosque ignibus hostes
 Ire salutiferum videas examen, anhelò
 Corde, feras venantùm animas, ardetque volatque
 Lecta Cohors, invicta malis, fecunda bonorum.

Omnigenæ scelerum, portenta immania, formæ
 Regalem horrescunt iram: fractoque Duellum
 Ense jacet, fumanisque sacro tacta Hæresis igni,
 Elisiq̃ue angues, spumantiaque ora venenis.

Marmoris extremam insurget fatalis ad oram,
 Luctiferoque petens Annam fulgore Cometes.
 Ipsa faces inter mœstæque insignia pompæ,
 Pauperis in morem placito riget obsita amictu,
 Nata eadem Regumque Soror, Conjuxque Parenisque.

Regina sacro
 habitu post
 mortem indu-
 ta ex ipsius
 mandato.

At pius exesis Animus se abjungere membris
 Lætior, it Cœlo, stellantemque occupat aulam.
 Augustas non quo vanorum more Quiritum
 Prisca Superstitio, turrîtæ vertice molis
 Sacravit, rutilasque pyrâ surgente sub auras;
 Cùm, flammâs inter volucres & olentia turis
 Nubila, dimissus peteret Jovis ales Olympum;
 Ceu felicem animam, Divûmque in jura receptam
 Tolleret, hinc populis latè venerabile Numen.
 Relligio rectique tenax Constantia pennis
 Attollunt mediam amplexæ radiantibus Annam.
 Quos coluit mortalis, adit; notosque fideli
 Obsequio repetit, meritorum conscia, Divos.
 Factaque sidereo gestant regalia in auro
 Aligeri, & festo resonant præane triumphum:
 Ut Charitum flecti arbitrio, penitusque refingi
 Cerea; sed duros Fortunæ adamantina casus
 Pertulerit: tacito splendorem obscura recessu
 Auxerit, offusâ veluti carbunculus umbrâ.
 Ut Regis Regnique Parens; tutela piorum,
 Quassatæ columen Fidei, terrorque nocentum;

Vindice ut Anna manu solium firmarit & aram,
 Templaque & ingentes ornarit moribus aulas.
 Majestatis apex humiles decrefcere ad ufus
 Sufiinuit : facilifque inopi te impendere vulgo,
 Larga manu, placida alloquio, Regina favebas.
 Tu Pacem affiduis cunctantem flectere votis
 Una potens, dulcique Hymenæi adstringere vinclo,
 Civiles eadem turbas atque hostica bella
 Placasti, non ulta tuos, Augusta, dolores,
 Non rerum fuffeffu animos elata feroces :
 Cognata & gemino fociasti fœdere Regna.

Sic Annæ merita & claro præconia plaufu,
 Pluraque gratantes celebrant, ac lilia toto
 Æthere dant Superi. Vivis crinale pyropis
 Nectitur auguftæ fronti decus ; aftraque circum
 Purpuream ardenti funduntur cyclada limbo.
 Confortes fatigue & nominis Heroïnas
 Sceptriferofque inter cœtus, Iufto addita Regi,
 Regibus & Proavis, æternâ in fede corufcat.

Inde fuos, Lodoïcæ, potens Regina tueri,
 Grandibus invigilat curis, afthroque benigno :
 Ac, tua quos reddit pietas, fublimis honores
 Refpicit & longo regales ordine pompas.
 Advolitant dulces animæ, quas vita reliquit
 Mortalis duplices prima fub luce Puellas,
 Regia Progenies, præcerptaque lilia terris.
 Ambæ Aviam doctæ blando cognofcere rifu,
 Ambæ ingentem amplexæ Animam, carofque Parentes
 Commendant, Fratremque, tui folatia luctus.
 Ante aciem, jamque acer equo Delphinus & armis,
 (Agmina follenni dum, Rex, Prætoria lufro
 Cenfebas,) ftrictoque Patrem mucrone falutans,
 Circumjectorum Procerum, vulgique fecundo
 Mirantis fremitu emicuit, natusque triumphis
 Et pugnas jamnunc tenero meditatus ab ungui,

Consiliis Nati adspirans felicibus Anna,
Seu Pacis, seu Martis opus majore movendum
Auspicio, Divis gratos reget alma labores.

VENETORUM NAVALIS VICTORIA

A. N. M. D. C. XLIX.

HUc ades, æternâ frontem circumdata lauro,
Stellantis Regina Lyræ, Mens enthea Vatum ;
Cui vaga Fama tubas, rutilos cui Gloria currus
Addixit ; penitusque ævi secura trophæa,
Et lemniscatas debet Victoria palmas.
Tu Venetûm decora alta refer ; tu martia facta
Classẽ in Threïciam, confusos sanguine fluctus ;
Disjectas ultasve rates, mersasve profundo
Commemora : & supero decerpens lumina Phœbo,
Aut radiante * Argô, liquidâ quæ fluctuat æthrâ,
Rostratam, navale decus, contexe coronam.

Facultas Poë.
tica.

Ut primûm, quæsita diu, Byzantia classis
Christiadûm deprensâ oculis, lunataque signa ;
Exarsere animis Veneti : subit ira tyrannos
Æquoris, ac sævos ulcisci Numinis hostes,
Criminibus fetas spoliisque invadere naves.
Agminis Euganei Prætor, quanquam gravis ævo,
Fervidus ultra annos, crudam viridemque senectam
Riva tamen vivo Bellonæ incendit amore.

* Signum cœ-
leste.

Ipse etiam inventum procurrere primus in hostem
Impatiens (ducibus postquam ad consulta vocatis,
Omnibus una sedet properæ sententia pugnæ)
Classẽ obit, ac validis animos hortatibus implet.

Magnanimi Socii, Venetis spes maxima rebus !
Quos vastum pelagi, sextâ jam luce, per æquor
Quæritis, hîc latitant imbellia pectora Turcæ.
Antè fugâ elapsos, hæc intra littora Terror
Compulit : hoc Nemesis constrictos carcere fontes

Tradidit. in manibus prædæ, pœnæque nocentum.
 Nunc Patriæ Christoque manus præbete vocanti.
 Hic acies, hic tela reget. Certaminis omen,
 Una ratis versos egit quæ fluctibus hostes,
 Dum ventus lumenque datum est. palantia textit.
 Agmina nox, Ciurani ingentibus invida cœptis,
 Ast ea nunc iterum nostris Deus objicit armis;
 Militibusque suis, nutu qui prælia torquet,
 Victricem ætherio palmam protendit ab axe.

Talia fatum avido Rivam clamore frementes
 Excepere acies, certi præfaga triumphi
 Gaudia testatæ, atque oblatis Martis amorem.
 Tunc alacer, simul ac thoraca indutus ahenum,
 Canitiem pressit galeâ, instructasque cohortes
 Admonuit, puppi signum dat Prætor ab alta.
 Omnibus extemplo velis, remisque citatis
 Lata secat maria, & spumantibus evolat undis
 Adriaca Osmanidum in medias vis concita classes.
 Hostibus obvertunt proras: & carbasa tendit
 (Quem Venetis pugnans Genius, maris arbiter Ales,
 Impulit haud-ficti commissâ lege tridentis)
 Adspirans Zephyrus, puppesque ad littora portat,
 Focchia queis Thraces penitus sub mœnia clausi.
 Euganeum obstupuit tantisque exhorruit ausis
 Barbarus: & quanquam numero majore coactas
 Europæ atque Asiæ vires habet Africaque arma,
 Adversis trepidat ventis; portusque reducti
 Janisarum angustas delecto robore fauces
 Obsedit; pavidamque emunit machina classem.

Nec minus & plenis invecti littora velis
 Omnia Christicolæ perrumpunt: neve fugaces
 Certamen Turcæ effugiant, dejecta carinas
 Anchora fundavit, collatisque obvia proris
 Agmina concurrunt. * Ostro castella refulgent
 Turrata: & solidas jactari fluctibus urbes
 Dixeri, aut actas vario Symplegadas æstu.

Locus ubi pugnatum est,
 vulgo *Focchia*
 dicitur.

* Pugnæ signum.

Hinc gravis atque illinc nitrato pulvere, flammam,
 Principium pugnae, concepit ahenea moles,
 Terrifico eructans glomeratas igne tenebras.
 Ære cavo ingeminant tonitrus:reboantia longè,
 Dissultant freta anhela, novisque agitata procellis;
 Ferrea nox super, & piceas intorta per umbras
 Fulgura, tum rapido populata turbine naves;
 Illa gubernaculo, diffracto hæc faucia malo:
 Pars prorâ, pars puppe caret, pars ardet in undis,
 Tormentis jactæque pilæ, sparsæque catenæ,
 Quales aëriis excussi nubibus ignes,
 Aut Ætnæ insanæ aut bacchantis in arva Vesuvi
 Visceribus, plagas & mille volantia fata
 Exitiumque viris portant pestemque carinis.
 Haud mora, vulnificæ majoribus undique glandes
 Commistæ crepitare globis: mox cominus enses
 Stringuntur, fremituque virum cantuque tubarum
 Personat, & rabidis Turcarum ululatibus æther.

Riva manu linguâque animos accendit in hostem.
 Scotam oppugnantes valido certamine puppim,
 Jamque unco immisso consertam ac dentibus æreis
 Fixam irrumpentes, deturbat in æquora Thracas
 Auxilio accurrens: victricem penè triremim
 Bombardæ assiduo labefactam verberare mergit.
 Tu quoque, qui Cretam spe jam, malefane, voraras;
 Dum Ciurani audes adversam invadere navim,
 Ah, malè tentato præceps vix te eripis hosti;
 Et multa, indecores, fugiens cum strage, latebras
 Bassâ petis. Jam barbarico rubefacta cruore
 Unda calet: jam crura virum, densosque lacertos
 Et capita huc, illuc, refugas glomerata per auras,
 Igniti rapuere globi, flammæque catenæ.

Scilicet Euganeis præsens, delapsaque Olympo,
 Quam precibus tecum votisque, ô MARCE, vocabant,
 Diva supervolitat, dubiis fidissima rebus,

Aligeras ducens acies, in prælia fertur
 Ætheriis Regina rotis & nube coruscâ,
 Ipsa instructam aciem referens, asperrima Virgo
 Bistonibus, blandumque suis & amabile numen.
 Auspice quâ freti (dum Bellipotentis amorem
 Conciliat Mater, cœloque effundit aperto
 Auxilia) Odrysios fregere, Acheloia propter
 Ostia, Christigenæ. Naupactæoque triumpho
 Victricis partum Dominæ cognomen, & aræ
 Creverunt, festumque diem Victoria signat.
 Hîc quoque fatiferas stellis crinalibus ardens
 Terque quaterque faces jaculatur ; & ignea toto
 Corpore tela micant, vibranti Solis amictu.
 Sub pedibus Lunæ palleſcunt cornua Threſſæ,
 Sanguineisque horrent maculis ; & luce malignâ
 Deficiunt, MARIÆQUE impressâ calce laborant,

S. Mariæ 4 Vi-
 ctoria conse-
 cratæ Nonæ
 Octobres.

Mulier amicta
 Sole, & Luna
 sub pedibus
 ejus &c. Apoc.
 12.

Venetorum in-
 signe D. Marci
 leo ensifer.

Et juxta irato, Venetûm tutela, leoni
 Assimilis Bellator adest, Scythica agmina contra
 Fulmineum versans diris stridoribus ensẽm
 Arduus : Ottomani quo to ta exterrita signo
 Agmina contremuere. polo demissa faventi
 Subsidia, & vires addentem in prælia Marcum
 Sensere Adriaci, Turcisque ardentius instant.

Diffugiunt trepidi rerum, terramque capeſſunt,
 Quâ licet, Osmanidæ. fœdo lymphata pavore,
 Navibus, & raptim ejiciens se incondita turba,
 Ipsa sibi infelix obstat ; truduntque, ruuntque.
 Pars &, flammæ metuens, Neptunia in arva
 Desilit, & leti accelerant formidine letum.
 Littora dum nando affectant, pelagoque furenti
 Luctantur ; vorat hunc vortex, illum hostica tela
 Transfodere : alios manibus saxa aspera cernas
 Prensare obnixos, limo aut reptare tenaci.
 Plurima sed contis elidit corpora miles
 Implacidus ; summâque revulsa crepidine retro

Affligit, filicive infigit pendula acutæ,
 Squallida vulneribus taboque informia membra.
 Multiplicem pauci cladem, cœloque marique
 Infesto, evadunt : nec terræ credere & arci
 Semianimes audent ; & adhuc fatalibus armis
 Terribiles Antenoridas fugientia longè
 Terga rati premere : ac montes conduntur in altos ,
 Cœcaque inaccessis exquirunt cautibus antra.

Phocœo interea cladis spectacula portu,
 Naufragii immanis tabulas, classisque superbæ
 Reliquias passim, ac laceris fluitantia transtris
 Fragmina malorum, & permistis carbasa remis ,
 Telaque corporaque & stagnantes sanguine proras
 Horrescunt, imasque petunt grex cœrulus undas.
 At victor Geticis nexos, miserabile, vinclis
 Solvit Christiadas ; Focchenisque arce potitus ,
 Navibus Odrysiis, clari documenta triumphi,
 In mediis festos accendit fluctibus ignes.

A D

CAROLUM AURELIUM COMITEM SAMPAULANUM

DE SUA

EXPEDITIONE CRETICA.

GLORIA Fráciadûm, Veneri Comes inclyte Martis,
 Quò tua te virtus, quò splendidus abstulit ardor!
 Non maris infidi motus, rapidæque procellæ,
 Sævior aut pelago tellus, & fluctibus ignis,
 Naufragiisque horrens densa inter funera portus,
 Consilio magnæ potuere avertere mentis
 Per medias properantem hiemes, mediosque per hostes
 Usque adeo extimulat teneris Heroas ab annis
 Acer Honos, & Principibus dare jura superbus !

Scilicet & vis major agit, lætissima sacri
 Relligio auspiciis belli ; & te, CAROLE, digna
 Præmia, fulgentes ostentat ab æthere palmas.

Te Melite armipotens, Geticisque ornata trophæis
 Vidit anhelantem pugnas, stupuitque periclo
 Longè inhiantem animum; pariterque accurrere Cretæ
 Subsidio exarsit, tua per vestigia lectum
 Agmen agens, Equitum generoso ex Ordine florem.

Lugubris heu rerum facies! atra undique busta,
 Undique congestas strages hominumque locorumque
 Obtulit hospitium infelix ; squalentia longè
 Littora, semirutas arces, urbisque cadaver.
 At misera, & latè disjectis horrida membris,
 CANDIA, ut obsessos portus angustaque claustra
 Francigenam audaci sensit penetrasse phaselo ;
 Principis adventu crudos oblita dolores,
 Tandem exangue caput vastisque oppressa ruinis
 Extulit ora. gravem plagis, taboque fluentem,
 Sed laudis memorem ac mediâ sub clade ferocem,
 Explicat abstergens vultum, frontemque serenat.
 Deinde novam tota in speciem defixa, notasque
 Sanguinis augusti, atque excelsæ insignia mentis;
 Jam fessas revocat vires : mox Candia, lætas
 Collectâ in voces animâ, sic dura virago
 Gratatur ; sic dulce jubar venerata salutat.

Qualem ego te, quantumque, ô, cui spectabilis aureo
 Emicat ore animus, majestatemque benignâ
 Temperat illecebrâ, terrorem aspergit amor ;
 Qualem ego te, ardentem ut Genium cœlestibus armis ;
 Aspicio, juvenum fortissime ! viribus annos
 Exuperas, virtute genus. præsentia famam
 Auxit, & immensas vincent spes ardua facta.
 Audieram, quas Tornaci sub mœnia, Princeps,
 Belli primitias, tantarum exordia laudum,
 Imbueris, vallo irrumpens, raptamque sarissam

Ipse tuum referens spoliato ex hoste trophæum.
 DUNENSIS palmæ Proavi, clarusque triumphis
 LONGAVILLA Parens, & Avunculus * incitat Heros.

* Pr. Condæus

Nunc & longinqua impatiens tentare pericla ;
 Et quos cantavit Proceres mirata vetustas,
 Per maria & terras cuncta in discrimina rerum
 Ire alacres, raræ quæsita ad præmia laudis,
 Amulus insolito cursu plausuque secutus
 Venisti, paribusque imples fastigia cœptis.
 Nec tibi per fictos accrevit gloria casus :
 Et, quæ lætus adis, prisca discrimina pugnas
 Semideûm obscurant. nil Trojæ splendida cœtet
 Fabula, & obsidio, Vatum labor ille, decennis.
 At mea jam quinto proturbat mœnia lustro
 Barbarus Europæ atque Asiæ Libyæque Tyrannus.

Huc totus, post Pannonici divortia belli,
 Incubuit ; lectosque Duces, lectasque cohortes
 Fervidus immisit, repetitisque acrior instat
 Obsidiis. pulsos revocat pudor iraque Bassas.
 Incaluit probro rabies, violentia damno.
 Objectam indignata moram victricibus armis,
 Indomitam sævis quassavit motibus arcem.
 Ceu campos torrens latè populatus apertos,
 Aggerem in oppositum glomeratis æstuat undis
 Spumeus assultans ; donec via facta ruinâ
 Præcipitem excipiat cursum, vastoque fragore
 Secum obicem rapiens fluctus domita obruat arva.
 Sic rapido everfas gentes spoliataque regna
 Agmine convolvens, collectâ hîc Barbarus irâ
 Infremit, assiduisque furens assultibus urget.
 En, fossis fossas, vallum vallo, arcibus arces,
 Urbrem urbi objectant. in me Nova-Candia crevit.
 Aspicias, Osmanidæ summus quâ mole Minister
 Intulerit sese, conjuratasque Getarum
 In mea fara manus quantis exerceat ausis ?

Nec terrâ aut ponto requies, tum mollia linquens
 Otia Sultanus, vicinas ipse per oras
 Signa movet. speculâ increpitans vigil adstat, & acrem
 Exigit intenditque operam. prædæ imminet ardens,
 Meque suosque premit pariter: bello ipse ministrat;
 Plurimus obsessam exagitans spe devorat urbem.
 Barbariamque omnem, mundumque sub arma coëgit
 Ottomanum. Larissæ* alium gerit asper Achillem.
 Cominus interea (rerum cui credita summa)
 Vizirus, tanto ratus omnia cardine verti,
 Instat atrox, cunctasque & vires promit & artes.
 Non illum solitis excurrentes finibus æquor;
 Non jam tertia hiems, & qui fœdissimus imber
 Substructam corrumpit humum; pestifere famelice,
 Crebraque seditio castris, populique rebelles;
 Non fuga secessusve, pavor cædesve suorum,
 Avertêre operi. Suscepto impendere vitam
 Certior, ac Domini donis opibusque refectos
 Attollens animos, ferro bacchatur & igni,
 Immissisque undis, ac toto pugnat Averno.
 Janifaros acuit, devotaque pectora letho:
 Nec sibi, dum noceant Venetis, jam parcere norunt;
 Aut vitæ pretium, aut finem posuere labori.
 Spesque metusque agitant: rivis sudorque cruorque
 Miscentur: nec viva solo se immergere cessant
 Corpora; & infestos sensi concurrere Manes.
 Alter inexplicitos Cressa Labyrinthus in orâ
 Texuit anfractus castrorum, altisque tetendit
 Aggeribus fossisque minax ingentia septa:
 Efferaque horrificis emittit monstra cavernis,
 Pinguia jam nostro, necdum exsaturata, cruore.
 Mille per ambages, effossaque viscera terræ
 Serpit, & obscuræ crescit vis addita fraudi:
 Martis & accendit furias Vulcania pestis.
 Suggestu vario & crebrâ statione tonantes

* Egit ea in ur
 be Sultanus ali
 quando per
 obsidionem.

Conspirant

Conspirant basilisci ; & ahenâ fauce procellam
Sulfuream, immanisque intorquent fulmina massæ.
Ictibus insanis tremefacta remugit Ida ;
Dissultant muri, & fossas stravere profundas ;
Ac mea jam vastæ nudant præcordia labe.
Tartareis, credo, erumpens fornacibus ardor
In cinerem ærias succenso pulvere turres
Collesque scopulosque & propugnacula vertit.
In me armata, meis confusa elementa ruinis.

At tanti est seriem immensam exhaustisse laborum,
Ut bello vexatæ Opifer socialibus armis
Adveniens, matura malis solatia præstes,
SAMPAULANE, meis ; cœlestiaque ora tueri,
Spectatasque ævo possim transmittere laudes,
Et merita attonitum famâ celebranda per orbem.
Felix obsidio ; felix, quæ cedere fatis
Nescia, te, Princeps, sensit constantia testem.

Sic effata, oculis exin mirantibus hæsit
Candia, teque tuasque adspectans, CAROLE, pugnas.
Nec mora : vix urbem inVectus, jam erumpere gestis,
Ottomanasque acies, adversa laceßere castra.
Nimirum & decoris primas, primasque pericli
Strenuus invadis partes. florente maniplo
Terribilem insistens aditum, labefacta tueris
Mœnia : & immanem lacerae super arcis hiatum
Arduus, intentos arcus flammataque Thracum
Tormenta, ac solido candentûm ex ære globorum
Horrisonos, plumbi confusâ grandine, nimbos
Despectas, murumque adverso pectore supples.

Inde aliud moliris opus ; prætexere muros
Aggeribus ; laxare vias, munire receptus
Præsidio, & campum, erumpens quo se explicet agmē;
Barbarici informes operis, vacuasque ruinas
Vertere tutandæ reparatas urbis in usus,
Objicibusque novis Geticos frænare furores.

Nec piget effossam toties totiesque refoffam,
 Pulvereo jactatam igni, putremque cruore
 Tellurem versare, gravelque attollere cistas.
 Ipse oneri subiisse, gregi socialis laborem,
 Princeps, & sudore fluens sordenisque decoro
 Pulvere, nobilibus gaudes præcurrere Francis ;
 Haud pompæ tantum specie, cultuque clientum,
 Quantum animo & formâ ante alios spectabilis
 omnes.

Agminibus, quid, cum instructis prorumpere in
 hostem,

Ac dextram conferre datum est? qui te impetus egit
 Threiciis præstructa inter munimina castris!
 Quanquam Christiadum excubiis arcana relictis
 Transfuga prodiderat; tentandaque castra manipulis
 Francigenum intenti firmarant undique Thraces:
 Robur in objectum, delectaque millia tendis,
 Nobilium stipante manu. nec te ulla pericli
 Absterret facies; non, quæ centena minatur
 Machina; turritivæ operosa repagula septis,
 Præcípites cryptæ, aut fossarum immane barathrum.
 Pugnae avidum cohibere labor. commissa sagittis
 Tempestas saxorum, & acutis addita clavis
 Dira catenarum series, glandesque pilæque
 Fulmineæ, ac piceo fumantes igne tenebræ,
 Vulneraque, & variæ complerant omnia mortes.

Ecce autem, dum tu partes arrectus in omnes,
 Si quæ fessa cohors numerove oppressa fatiscat,
 Subsidium meditaris, & irâ pulcrior ardes:
 Fulguris in morem ruit, atro turbine adactum,
 Missile ahenum, ingens, cui pulvere foeta nitrato
 Viscera, & omnigenæ stipato pestis acervo:
 Belligeræ quo nil inventum atrocius arti,
 Mille simul jaculis trepidas populare catervas,
 Vel solida ardenti casu percurrere tecta.

Quem non iusta tui, subitâ formidine, cura
 Concussit, sonitu horrifico ferale ubi telum
 Allapsum crepat, & violenta in fragmina circum
 Abilit, huc illum segetem ferrique necisque
 Igniferæ spargens, refugas & sævit in auras ?
 Tu, lethi mediâ immotus caligine, moli
 Fatiferæ insultas, Princeps ; animosque manipulis
 Franciadûm, viresque afflas constantibus ausis.
 Impete funduntur passim turbata, caduntque
 Agmina Turcarum. pulchri nec parca juvenus
 Sanguinis, insequitur penitus, quò dulcis amore
 Immodico fortes animas Victoria raptat
 Immemoresque sui. pars altæ stragis acervo
 Incubat, & moriens te spectatore superbit.

Nec sola Venetos dextra bellator, & armis,
 Sampaulane, juvas. usu non indiga, & annos
 Antevolans, dubiis aderat Sapiencia rebus,
 Consilio in magno, & Martis spectata senatu.

Sic ubi Turcarum viresque artesque dedisti
 Spernere, quò rigidum extendes, Invisce, laborem ?
 Longiùs acte animis, terræque marisque per omnia
 Acte pericla, redi Princeps. huc Francia tristi
 Bis morbo implicitum revocat. non ænea membra,
 Aut animo indomitum respondent mutua robur,
 Sat Cretæ Venetisque datum, belloque viæque
 Pone modum : plenis adolescat viribus ætas.
 Spem certam in patriæ, & claros te Regis in usus
 Magnanime asserva Ductor. Quàm-penè cruento
 Oppressus casu, primæque in flore juventæ !
 Te prope, tot ferro audaces cecidère vel igni.

Tuque adeo Superos, capitis gratusque memorque
 Custodes venerare tui. crudelia fata,
 Stridentis plumbi glandes, volucresque sagittas,
 Accensosque globos, & operti incendia belli,
 Sic merito, avertère, sacris dum fervidus armis

Et mediis gaudes intervolvere periclis.

Hospitiis iterum assurgens invitat ovanthem

An. M. D.C.
LXIX.

Romaque, & immensâ CLEMENS qui mole tueri
Cretæ reliquias totoque urbem orbe laborat.
Christigenûm imperiis sacrâ Vigil arduus arce
Prospiciens, sociale armis Divûmque virûmque
Bellum agitât ; Francæ ante alias ope gentis amicâ
Lætus, in Ottomanum cœlestia signa secutæ.

Præsidio Cretam erecti ; magnoque vel absens
Exemplo, Princeps, aderis. Jam concita cursû
Laudis opisque tuæ, certatim Gallica fertur
Nobilitas ; passimque Europæ animosa videmus
Confluere auxilia, & dēnsas agitare carinas.
Bistona tu pariter factis illustribus hostem
Emeritus vicisti, & amicam, Carole, famam.





HEROICON

LIBER V.

CELSISSIMO PRINCIPI
FERDINANDO
FURSTENBERGIO
EPISCOPO PADERBORNENSI,
COADJUTORI MONASTERIENSI &c.



CELSISSIME PRINCEPS,

*Quam tibi nuper obtuli Divi Francisci Bor-
gia vitam, eâ parum adeò mea in sanctum vi-
rum religioni, meoque in Celsitudinis Tuae obse-
quium studio factum est satus, ut mihi aliunde*

M iij

quaerendum videretur tenuitatis mea supplementum. Ea de re sollicito opportunum subsidium attulit Frizonius noster, vir omni eruditionis copia dives, cum scripta ad me misit in laudem ejusdem Sancti poemata, tibi suo nomine in xennium hisce Kalendis offerenda. Multis illa tibi nominibus debebantur; sive quod è Gallia nostra flores illi sint, cujus gloria faves, & à quâ ita suspiceris, ut de te ornando jam atque celebrando certent inter se Galli omnes eruditi; sive quod opusculorum illorum author sit Poëta celeberrimus, atque ideo tuæ, ut ita loquar, ditionis; cum eam ferè tibi auctoritatem in poetarum gentem omnem excellens quadam regia illius ac divina artis peritia vindicet, quam summa virtus, antiqua nobilitas, totque dotes viro Principe dignæ, in fortissimos ac bellicosissimos totius Germaniæ populos tribuerunt; sive denique quod carmina illa sint in laudem Sancti Generalis Societatis JESU, quam hereditariâ benevolentia complecteris ac protegis. Plura adderem, quibus factum est, ut te potissimum Mæcenatem optarit Poëta illustris, nisi melius ipse propediem explicaturus esset eximio poemate, quod editurus est in tuam laudem. His in antecessum fave, ac munus, quod te non omnino indignum diffiteri non ausim, eâ quâ Musas nostras soles, humanitate ac benevolentia excipe.

CELSITUDINI TUÆ

Coloniæ Agrippinæ, Cal. Ianuar.
M. D. C. LXXIII.

Devotissimus
ANTONIUS VERJUSIUS S. J.

SANCTI
FRANCISCI BORGIAE
E GANDIAE DUCE
SOCIET. JESU PRÆP. GENER.
EUTHANASIA.

CHRISTIADUM sacro sociandas fœdere gentes
Lustrabat Latiâ veniens Legatus ab arce,
Purpureus trabeam, & sancti pars ampla Senatûs,
Regiaque in sævos acuebat prælia Turcas.
Tu quoque, Romani missu Patris, inclytus ibas
Assæcla Legati, & magnæ, FRANCISCE, Minister
Causæ ingens, verbisq; potens, factisq; verendus ;
Ardua cui virtus, meritâ celeberrima famâ
Herois, totoque animus sublimior Orbe,
Contemptu spectatus opum, spectatus honorum,
Te sequor, ô terras vastis emense Viator
Virtutis gradibus, postquam gravia illa prioris
Splendidaque excutens Fortunæ pondera, cursum
Acrior ad superos spatium contendis aperto ;
Dum, metam exhausti pro Relligione laboris,
Sideream prenas patriam, sedesque beatas,
Arrepto exultans victricis munere palmæ,
Ipse mihi, votis jam pridem assuete vocari,
DIVE, Sacræ Mortis pretium, causamque genusque,
Hæreseos scelere infixum reclude dolorem,
Et quæ diluerint feralem gaudia sensum.

Littora ad Oceani, pronique cubilia Solis,
Mirantes inter populos, Regumque per aulas,
BORGIA progressus, penitusque affixus Olympo ;
Mox iter immensum relegit, quâ Gallica brumâ
Arva rigent, circumque fremunt civilibus armis,

Cardinali Alexandrino, ad Gallæ, Hispaniæ, Lusitaniæque reges Legato Borgia comes adjunctus à Pio V. Pontif.

Morbum contrahit ex itinere incommodis, & animi dolore ob factorum vastitatem ab Hæreticis Galliæ importatam.

Undique & infandâ templorum strage laborant.
 Calvinî scelus, ac nîmiûm funesta voluptas!
 Ah, quibus aspergit lacrymis fumantia latè
 Rudera sacrorum, & miserandas Borgia clades!

Testo Purifica-
 tionis die in
 ruino'o tem-
 plo sacris ope-
 rans febri cor-
 rûpiur.

Fortè dies augustæ aderat sacrata MARIÆ,
 Quâ subiit, nullas experta Puerpera sordes,
 Haud sibi præscriptæ Mosæa piamina legis:
 (Insigni lucem gaudent celebrare triumpho
 Christicolæ, & facibus stellantem imitantur Olympū)
 Cùm Pater, usque inhians Christo sacrisque litandis,
 Quotquot eunt soles, miseris nec passus in oris
 Ambrosiâ impastam superâ languescere mentem;
 Tum magis, ut Solymas ipsum jam cernit ad aras
 Offerri tenero celatum corpore Numen;
 Ritè Dei, & Magnæ sollennia munera Matris
 Instaurare parat, meritosque exsolvere honores.

Ergo semirutum in templum collapsaque tecta
 Venerat, ætherii meditans convivia Regis;
 Perque altos graditur confusæ molis acervos:
 Ac, virgulta inter, tristem squallore situque
 (Quando aliam infelix regio negat) instruit aram;
 Thesbitæ similis, justo flammata dolore
 Quem stimulat, fœdisque super coquit ira ruinis.
 Atque ita concusso gemebundus pectore fatur.

O Deus, ô dudum cessans in fulmina Vindex!
 En tua fœdifragi violarunt jura, tremendæ
 Immemores legis, furiisque immanibus acti.
 En tua disjectis lugent altaria saxi,
 Et cæli polluta premunt sacraria Mystæ.
 Indigetum prostrata querar, contritaque signa?
 Corpora quin etiam tumulis evulsa dicatis,
 Corpora, fiderei soliis quæ debita regni,
 Raptarunt medias probris onerata per urbes.
 Pars undis absumpta, rogis pars tradita & auri;
 Omniaque infando temerata elementa furore.

Franciæ cala-
 mitatem cre-
 brò deplorabat
 illis Eliæ ver-
 bis:
*Dereliquerunt
 pactum Domi-
 ni ... altaria
 tua destruxe-
 runt &c.*

Sed caput, heu, scelerum, nullâque piabile flammâ,
 Dirum, horrendum, immane nefas ! vel Numen adorti,
 Triticeæ occultum formæ sub tegmine Numen
 Excussere adytis ; pedibus calcare Tonantem
 Haud veriti, & ravidis escam objectare molossis.
 Proh, Fidei columen, Romanæque ancora navis,
 Virtutumque Virûmque parens generosa, nec ullo
 Infamis quondam monstrorum Gallia partu !
 Quas ego felices clades, quæ funera regni
 Aspicio ! veterum quò lux & pompa sacrorum,
 Aureaque imperii cessit florentis imago ?
 Primævi nam quæ decoris vestigia restant ?
 Hei mihi, quâ faciam, fordens vix ara reperta est,
 Lassatâ scelerum rabie excidioque superstes.

Hoc animum imbutus sensu Pater, ætheris Agnum
 Immortalem offert, ac se superimmolat ipse.
 Quippe hiemes inter gelidas, nudoque sub axe
 Peritat, & infesto Boreæ suspiria miscet,
 Tartarei atrectans monumenta invisâ furoris.
 Succenso interea Domini præsentis amore,
 Et sceleris pariter conspectu saucius horret.
 Martyrii genus ! hinc fragiles rigor occupat artus ;
 Tum subeunte æstu, morbi fatalis origo.

Ecce autem caro Divûm Regina Clienti,
 Mystica dum toto suspensus corde volutat,
 Protinus affulget niveam circumdata nubem.
 Crux fronti, dextro stella est affixa lacerto ;
 Parvulus insedit lævam Deus : almaque regnat
 Gratia, & angusto collucet Gloria vultu,
 Dulcibus & Natum radiis Matremque coronat.
 Scilicet ut priscâ divinus imagine Pictor,
 Unus Apelleas felix superasse tabellas,
 Christiparam effinxit ; cultusque extendere sacros
 Undique sollicitus, cælestem Borgia formam
 Innumero exemplo geminos divisit in axes.

*Sola Gallia
 monstra non
 habuit, Hier.*

*Imaginem B.
 V. à S. Lucâ
 pictam, primus
 exprimendam
 curavit.*

Tali se specie Virgo miranda per auras
 Obtulit oranti ; majestatemque remissam,
 Infractumque umbrâ non aspectabile lumen
 Exhibuit, mœstumque erexit voce Clientem,
 Solari dignata graves placidissima curas.

Agnosco, gratorque pios, FRANCISCÆ, dolores.
 Carnificum asperius ferro, penetrabile telum
 Tu quoque nunc animo excipiens , mea vulnera sentis,
 Nimirum humanos per me devotus in usus,
 Et fonti addictus lustralis victima Mundo,
 Ut primum oblatus templa ad Solymæa Puellus ;
 Nunc idem manibusque tuis, linguâque sequestrâ
 Offeritur, per secla suas mactandus ad aras.

Nec tantum rigidam ante Crucem , gladii instar acuto
 Altè descendit materna in viscera sensu ;
 Transfixitque animam, Vatisque oracla probavit ;
 Sed jamtum ante aras ictu confodit amaro
 Illa hominum corrupta Salus, indigna ruinæ
 Materies, cæcoque objectus meta furori
 Filius, ut signum jaculis hastisque petiti.
 Tu modò ruderibus templi percussus, & isto,
 Gallica quo cernis jactari regna, malorum
 Turbine, sacrilegoque in me Natumque tumultu ;
 Infernæ furiis turbæ, & feralibus ausis,
 BORGIA, inhorrescis luctu confectus acerbo ;
 Membra animosque æger torrente involveris æstu.

Verum age, conceptumque hinc jam solare dolorem.
 BORBONIA surget fatalis origine Vindex,
 Qui Proavum ingentem LODOVICUS nomine reddat,
 Assimilis pietate nepos & fortibus armis ;
 Hæreticas sternat vires, Fideique ruinas
 Excitet, IGNATI auspiciis felicibus ardens ;
 Quem Latio ritu sacrandum altaribus acer
 Instabit , Bellique Ducem, Regnique Patronum.
 At mihi præcipuè sollenni obnoxia voto

Ludovicus
 XIII. ad Hæ-
 resim perdo-
 mandam divi-
 na providentia
 excitatus ; B.
 Ignatium ele-
 git Patronum,
 ejusque Consec-
 ratione sum-
 mo studio pro-
 movit.

HEROICON LIBER V.

185

Sceptra dicans, festos pomparum indicet honores ;
 Clarior ille mei, Regis quam sorte, Clientis
 Munere, & obsequium gaudens præferre coronæ.
 Illi ego vel Regnis majus, vinci inscia, Donum
 Et dignum referam supremo à Numine pignus ;
 Nominis, imperii, decoris qui splendor heres
 Funestam excindet labem, passimque profana
 Diruet æternis permutans templa trophæis,
 Regnaque firmabit vastâ subnixâ ruinâ.

Quam regis, augusto signatam nomine Turmam
 Pars opere in magno, & vario quærenda labore
 Gloria, divinique manet seges ampla triumphî.
 Hæc adeo, FRANCISCE, mali solatia jamnunc
 Præcipe, Francigenis melior quæ proferat ætas.

Interea durum, quo carperis, ipsâ laborem
 Causa gravis relevet morbi. Nempe obsequiî vis
 Huc egit, nec mollis Amor, quem nulla retardat
 Monstrorum facies, non horrida Mortis imago.
 Scis, quo deliciæ pretio, sinceraque emantur
 Gaudia ; ut adversis prodant sese inclita Virtus ;
 Ceu, deformis adhuc terrâque obducta, probatur
 Et purgata acri micat aurea lamina camino.

Quæ toties ambita, Crucem nunc denique perfer
 Impositam, Christique volens te insignibus apta.
 Sic mihi, sic Nato placeas. Nec longa supersunt
 Curricula : optato vitam via limite claudet.

Laureti fugientem animam complexa fovebo.
 Felix ille, meas vigilat qui mente paratâ
 Ante fores : certa expectet promissa quietis :
 Et, queis imminoreris, tibi præmia parta laborum.

His ubi dilectum verbis affata Clientem
 Diva Parens, multâque aspersum luce remulsi ;
 Non tamen, effeto grassantem corpore, morbum
 Expulit ; at tenuis dispensans munera vitæ,
 Egregiam invictâ firmavit robore mentem.

Gallicum Re-
 gnum Deiparæ
 consecravir.

Ludovicus
 XIV. post dica-
 tum V. D. Frâ-
 ciam natus ad
 ultimum Hære-
 ses excidium.

Beatus homo
 qui : : : vigilat
 ad fores meas
 &c. Proverb. 8.

Inde animo venerans tacito, cœlestia dicta
 Borgia Virgineæ recolit speciemque Parentis :
 Nec durum suspendit iter, fessivæ quietem
 Indulget membris, properantia fata moratus.
 Trans Alpes, trans Eridanum ferturque, viæque
 Obstantum speciosa Ducum retinacula rumpit ;
 Quâ Taurinûm Augusta, & quâ regalibus ingens
 Hospitiis vim blandam adhibet Ferraria, frustra
 Cuncta movens. Nam se ingrato Franciscus honori
 Deliciisque procul rapiens, unum æger anhelat
 Lauretum, & Magnæ augustum penetrabile MARIÆ.
 Cella Palæstinas inueto tramite sedes
 Quæ fugiens, terrasque volans transmisit & undas,
 Aligerum vectante manu, Domus æmula Cælo ;
 Terrigenas quâ certa Salus profluxit in omnes,
 Gratiæque & rerum miracula. sæpè tiaras
 Pontifices stravere aris, diademata Reges ;
 Gentes vota ferunt, supplexque advolvitur Orbis.
 Communem humani generis Franciscus ad aram,
 Vitæ reliquias, & qui super halitus, alto
 Maternas quàm corde libens effundat in ulnas!
 Stat promissa fides : votis nova dona solutis
 Accipit ; extremæque trahit suspiria vitæ
 Longiùs ; & Romam (votorum hic terminus hæret)
 Accelerat. Caput illa viæ, finisque laborum.
 Qualis ubi æternum, populis Lucemque Salutemq;
 Aspexit Puerum Senior, dulcique potitam
 Pignore jam felicem animam liquefactus amore est,
 Molli cycneas spirabat carmine voces.
 Talis, agens animam, divinos Borgia sensus
 Concipit ; & Cælo Sanctæ surgentia Romæ
 Culmina prospectans, ægros se attollit in artus,
 Conscius & MARIÆ delubra augusta salutat.
 Grandibus impensam obsequiis in publica vitam
 Commoda gratatur Christoque Patrique Latino ;

Romæ aut
 Laureti Fran-
 ci'cus emori
 cupierat.

Romam iniēs,
 Simeonis can-
 tico mortem
 evocavit.

* Sub ipsam
 portam Flemi-
 niam iussu con-
 sistere lectica,
 pro foribus
 Mariani tem-
 pli, diu suppli-
 cavit moribū-
 dus.

Melleaque heic demum Simeonis verba secutus,
Corporis emitti labefacto carcere gestit.

Vixi, & letifero sanxi mea vota labore,
Extremum imperiis cælestibus actus in Orbem.
Tot Divum statio, longi meta ultima cursus
Roma mihi, Europes reduci jam finibus adstat.
Splendida fallacis dudum ludibria vitæ
Abjeci, fugiensque Aulae vincla aurea rupi:
Nunc etiam abjungi membris, penitusque resolv
Terrenis avidam nodis, Deus, accipe mentem.

Dixit; & investus Romanis collibus hospes,
Ætheriæ conscendit ovans juga summa Sionis,
Quam studiis ardens, toto quam corde petebat,
Et patria tandem peregrinus sede quievit.

Exequendo vo-
ro solenni Obe-
dientiæ Ponti-
fici debite vi-
tam contump-
sit.

DIVI

FRANCISCI BORGIAE
APOTHEOSIS.

PR OVIDA Mens, vastum imperiis quæ temperat
Orbem,

Ipsa sui Custos operis, Reginaque fati;
Naturæ illustri quanquam spectanda theatro
Explicuit sese, & variis micat undique signis;
Altior æternam proprio tamen ordine sortem
Præstruit, augustosque piis dispensat honores.
Lenibus insinuans radiis, flammæque salubri
Gratia sublabens quæ corda volentia flectit,
Suave ministerium Divinæ sedula Mentis
Exequitur, fastusque docet contemnere Mundo
Insultantem animam, & Cœli supera alta petentem.
Illic, exosos mortalis ludicra pompæ,
Heroas solidâ felices luce coronat
Gloria, supremæ ceu sidera viva Sionis;

Mox etiam humanos inter clarescere cœtus
Virtutem jubet emeritam, Cœloque refundit
Terrarum in latos vibrantia lumina tractus.

* Maternum
genus ab Ara-
goniæ Regibus
ducebat.

Sic, grandes titulos & opes ubi Regius * Aulæ
Transfuga, Lojolæ signa atque exempla secutus,
Borgia deseruit; totiesque obtrusa repulsam
Purpura deinde tulit, sacri lux illa Senatus:
Jam veri compos decoris, cui tota vacavit
Ambitio, fulgentem animus comprehendit Olympum.

Illicet occurrunt puræ sine corpore Vitæ,
Hic Geniûm chorus, ille Virûm, quos igneus anteit
Lojola, & magno lætus se infundit alumno.

Tum comes, Eoæ domitor Xaverius oræ:

P. Petrus Fa-
ber spirituali-
bus exercitiis
primus Gádiaz
Ducem exco-
luit.

Allobrogumque decus, sancta qui finxerat olim
Arte Ducem, Faber hospitio susceptus amico;
Nunc meritis auctum gratatus, & ipse vicissim
Excipit; ac terrâ sublustrem ostensa per umbram
Divûm arcana, polo clarâque in luce recludit.

B. Stanislaus
Kostka Romæ
à Borgia in So-
ciet. Tiroti-
nium admittus.

Nec tu, virginæ flos, Stanislae, pudoris,
Obvius ire Patri cunctaris, & igne coruscus
Dulciâ sidereo veniens incendia misces.

* P. Gonzalez
Silveria.

Sanguineæ rutilans trabæ * Consalvus amictu,
Purpureusque Azevedio ductore manipulus

XL. Socii ab
eodem Gener.
Præposito in
Brasiliâ missi,
ab Hæreticis
interempti,
&c.

Francisco inclinant palmas. Quid cætera narrem
Agmina, in æternos jam tum provecta triumphos
Ignatî à castris, variâque evincta coronâ?

Advolat & Christi spirans patientis imago,
Dum sacro gereret confixum stigmatæ corpus,
Nobile qui templis nomen Franciscus & astris
Intulerat princeps, Seraphimûm concolor alis,
Assissi gentile jubar; cui notus ab alvo
Difficiles inter Genitricis Borgia nixus,
Et prece maternâ felicem debuit ortum,
Nomine præsentem hinc referens studioque Patronum.
Ecce autem, quo se Tutore Hispania jactat,

Advenit, ætherii pars haud postrema Senatûs ;
 Primus & invictum ferro, Regisque cruenti
 Sævitiâ clarum Domino testatus amorem.
 Quondam acies contra Stygias, horrenda Deorum
 Monstra, sacro intonuit bello : tum barbara visus
 Sternere, Tartareo quæ conjurata Tyranno
 Agmina ; bellipotens rapidi cùm fulminis instar,
 Hesperias acies, ora igneus, aureus arma,
 Antevolans, Mauros pariter turbaret & Indos.
 Ille coronandum Cœlo, terrisque colendum,
 Primitias Equitum insignes, sacræque cohortis,
 Rite suum agnoscit, tacitisque exercita pugnâ
 Pectora ; quæ secum ipse pius certamina miles
 Gesserat, & motus acer fregisse rebelles
 Irâ exarmatâ domitâque cupidine victor.
 Talibus auspiciis imbutus, & hoste subactis,
 Molles illecebras duosque agitante furores,
 Militiæ gravioris opus vastumque laborem
 Borgia in externos obiit mox fortior hostes ;
 Innumerasque Erebo prædas avertit, Olympo
 Quæritas animas, Christique in castra recepit.
 Tuque adeo, Cœli genus & spectabile lumen,
 Fulgure mobilior simul ac flagrantior Ales,
 Francisco datus antè Comes, terræque pericla
 Mortalesque inter casus fidissime Custos !
 Nunc vigilis fructus optataque gaudia curæ
 Excipiens, varias Cœli Dux alme per arces
 Consortem ostentas ; Dominæ communis ad ora
 Sponte volantem effers Animam, sistisque MARIE.
 Semideos una ante omnes clarissima longè
 Diva Parens ; Natoque simillima regnat, & una
 Indigetum ordinibus sparsos collegit honores.
 Ipsa humilem, pedibusque adstratum maxima Virgo
 Suscipit amplexu tenero dignata Clientem ;
 Ac Matrem confessa, pii dulcedine cultûs

Primus è mili-
 tari ordine S.
 Jacobi conse-
 cratus Borgia,
 ab ejusdem Or-
 dinis Equiti-
 bus amplissima
 pompa celebra-
 tus.

Quem velut ambrosii lactentem aspergine succi
Imbuerat, satiat torrente hîc nectaris unda.

Inde ad supremam sedem, & penetralia ducit,
Æternam, augustam, immensam glomerantia lucem.
Omnipotens quo se Trias incomprensa recessu
Sepfit, adorato in solio, circumque tremendis
Majestatem adytis vallans, fulgore coronat,
Cœlituumque beans inhiantia lumina pascit;
Æternusque Parens, Sobolesque æquæva Parenti,
Adscitam servans hominis super æthera formam,
Ac sacer amborum nexus, Spirabilis Ardor.
Desertori aulæ, jam Numinis aula patescit :
Abjectamque Duci, & protritam calce coronam
Textilibus flagrans astris diadema rependit.
Jam tenues latebras, & amica silentia vitæ,
Contemptusque avidam toto canit æthere mentem
Gloria. Facundæ resonant te, Borgia, voces,
Quot, stellante capax gremio, Solyma aurea Cives
Latitia cantuque perenni exercet ovantes.

Unum omnes celebrant : ut linguam animumque
Puelli

Imbuerit Pietas, tenerisque inoleverit annis :
Ut vitii illecebras inter, tot blanda pericla,
Anxius, & suspensa ferens vestigia, morum
Eximium haud ullâ macularit labe nitorem.
Setoso Cilicum textu juvenilia creber
Membra domans, molli Serum fallebat amictu.
Mitia ut assuetus populis dare jura, sed armis
Vimque salutiferam placidasque exprompserit iras;
Fœda latrocinia, & scelerum genus omne fugarit :
Legibus, ac pulcris ornarit moribus urbes,
Principibus populisque idem lex viva decori.
Quas operum moles, sumptu pietatis in usus
Magnifico, statuit ! nec tantùm Gandia, felix
Muneribus largi crevit Ducis : ipsa benignam

Sensit

Catalaniæ Pro-
rex, grassatori-
bus eam pro-
vinciam pur-
gavit.

HEROICON LIBER V.

191

Sensit opem, floretque Sacro Roma aucta Lyceo;
Enitet ingenuas Virtus quo culta per artes.

Romanum So-
ciet. Jesu Col-
legium funda-
vit.

Ut decora, ut gazas, adspirantemque favorem
Cæsaris abjiciens, tacitis se infoderat umbris!
Mox &, Pontificum quæ maxima dona, sacrati
Purpureos apices longè aversatus honoris,
Supplicibus contra votis in probra tetendit!
Assiduumque gerens vexati corporis hostem,
Vix tenui membra ægra cibo, somnove maligno
Sustinuit, precibusque instans, gravibusque flagellis!

Quàm patrias idem curas geminum acer in Orbem
Extendit! quàm voce frequens calamoque saluti
Incubuit populorum; & sanctæ semina frugis,
Regum animis, plebique avidæ consperxit! ut ipsam
Barbariem amplexus studiis, ad sacra vocavit;
Huc, illuc missis America in rura colonis,
Immites sudore rigans & sanguine terras!

Talia Cœlestes memorant; super omnia, vitam
Difficili exhaustam obsequio, longosque labores,
Contractumque pio morbum letumque dolore
Hæreticæ aspectu templa inter diruta pestis.

Nec celebrata semel laudis præconia, primos
Borgiæ in adventus patrii ad consortia regni:
Volvuntur Cœlo sonitus, per secla resultant.

Audiit Urbanus, Superis quem proxima Sedes
Extulit; auditâque Interpres laude, Beatum
Succinit Indigetem, ac festo veneratur honore.
Maximus augustam Clemens nunc denique laudem
Ingeminat, sanctoque addit fastigia ritu.

Urbanus VIII.
Beatis illum
adscriptis.

Vaticana sonant præeunte Oracula Cœlo:
Roma novos Divo ducit gratata triumphos:
Christicolæ accipiunt gentes: micat Italia tellus
Latitiâ; & gelidam quæ se porrexit ad Arcton,
Sarmatia imprimis generoso exarsit amore,
Regiaque illustres agitat solennia pompas.

Clemens X. in
Sanctorum al-
bum retulit.

Borgiae consecrato pompam in urbe Leonopolis Rex Reginaque Poloniae duxerunt.

Madriti, corpus ejus afferatur & colitur magnifice.

Parisiis in Aede D. Ludovici, celeberrima concione laudatus est ab octo Ecclesiarum Praefulis.

Rediens ex Hispanica legatione Borgia, summo honore exceptus Burdigalae fuit, ibique Collegium admisit.

Et jam quadrifidas terrae crescentia partes
Gaudia pervadunt: certant ingentibus urbes
Inter se studiis, & plausu consona regna.
Quam turbis alacres fervent undantibus aestus!
Quae Procerum decora, & Regum spectacula fulgent!

Mantua praesertim claros molitur honores
Carpetana, suo jactans se plurima Divo;
Pignusque & sanctae spoliū venerabile mentis
Ostentat, gemmisque inclusum attollit & auro,
Multiplicem advolvens Magnatum ex ordine pompā.

At Lodoicæo templo & Praeconibus altis
Splendida Franciscum, miroque operosa paratu
Astriferi decorasse tholi Lutetia gaudet,
Sublimem Aligeris mediā rapientibus æthrâ.

Tu quoque cœlestes excelso pectore curas
Concipis, insolitoque paras assurgere cultu,
Burdigala, Heroi magno; mortale trahentem
Corpus adhuc venerata Patrem, simul arcibus hospes
Legati Comes Ausonii successit amicis.

Quanta Viri illuxit pietas, quantusque modesti
Oris honos! jamtum meritis æquatus Olympo
Ibat, & Indigetis spondebant omnia sortem.

Ille tibi, optatas populo, votisque vocatas
Patritiis Musas, divini muneris autor,
Annuit, ingeniumque rudis moresque juventæ
Fingere sollicitas; non quæ Parnassia vani
Numina jactarunt, Phœbo sub præside, Vates;
At JESUM inscriptas studium queis carpere lauros.
Quam facili nunc aure tuas, pro munere gratis
Admitter, rata vota, preces, cui tanta potestas
Numinis ad solium, regnique in parte sedenti?

Ergo & pignoribus tantis spes concipe dignas;
Et veteris memor hospitii, meritique, Patronum
Concelebra, dum læta cliens præludia tentat
Musarum Chorus, ac vario discrimine vocum

HEROICON LIBER V.

193

Miscet Aquitani centus munera Pindi.
 Borgiam & alterno Franciscum docta volutant
 Antra sono, filvisque canora resultat imago.
 Franciscum toto revolubilis amne Garumna
 Assonat, & longo geminatur Borgia plausu ;
 Auspice * Alibreto, decorant cui bellica fortem
 Sceptra manum, Regisque vices fascesque tenenti
 Paret Aquitanos quæ gens colit inclyta tractus ;
 Dulce, Valentino cognatum à sanguine, nomen
 Borgia cui pulcros pietatis suscitât ignes,
 Mutuaque hinc atque hinc accrescit adorea laudum.
 Æmula certatim Francisco elementa laborant ,
 Terraque, & Oceani consors æstuque superbus
 Æquoreo fluvius, cantuque exercitus aër,
 Ac festis glomerata rogis, displosaque ahenis
 Flamma tubis. Latos urbisque arcisque fragores
 Pulvereo tormenta rotant mavortia nimbo ;
 Et quæ vasta præmunt Lunati cornua portûs,
 Condensæ tonuère rates reboantibus undis.
 Civica jam legio, & latè spectata juvenus,
 Ore habituque nitens, pompæque insignibus ardent,
 Et cunctam armorum incendunt fulgoribus urbem.
 Per vicos, per templa micant regnantis Olympo
 Signa Ducis, vultusque sacros vexilla coruscant.

Sic Pater omnipotens gratantibus inclyta terris
 Præmia Virtuti sanxit ; laudisque fugacem ,
 Ac, Ducis exuto splendore opibusque superbis,
 Magnificè opprobriis ausum se involvere Christi
 Franciscum, hîc nostras etiam dum carperet auras,
 Cæsareos supra venerandum evexit honores.
 Summissi officiis Reges, stupefactaque Regna
 Cælestem coluere Virum : Natura jubentem
 Audiit ; attractum Morbi timuere, caducis
 Cedere corporibus trepidi; Mors ipsa refugit,
 Tartareique hostes : ac mens præsaga futuri,

N ij

* Maréscallus
 d'Albrét, Aquitaniae Gubernator, affinis S.
 Fr. Borgia.

Semotasque procul vivâ res luce retextit.
 Omnia prospectans superâ nunc arduus aulâ,
 Et nova per populos fundens miracula, Mundi
 Supplicis ambitur votis : radiisque micantem
 Sacra triumphali circumfert Gloria curru.

JOSAPHATUS

JUDÆÆ REX,

MUTUA HOSTIUM INTERNECIONE

VICTOR.

E Paralip. lib. II. cap. XX.

LYMPHATIS actos in mutua funera dextris
 Ammonem Moabumque cano, deletaque Idumes
 Agmina ; & immoto, queis militat arduus æther,
 Victores ferro Isâcidas, spoliisque potitos.

Armipotens, cujus Josaphato Rege sequuta
 Numinis auspicium, & promissio munere fidens,
 Carminibusque sacris precibusque armata tetendit
 Tergeminas acies contra Solymæa juvenus ;
 Bellatorem animum, & magno Deus ore sonantem
 Adspira ; immani subitos dum marte furores ,
 Ausosque in sese & passos hostilia cæco

Concursu socios, jam præcentore triumph
 Vate * Sionæo aggredior, tua, Maxime, facta
 Miratus, priscolque instauro lætus honores.

Dilectam superis Judæo à sanguine gentem
 Justitiâ & leni componens pace regebat
 Haud illaudato Princeps patre clarior Asa.
 Straverat ille aras lucosque exciderat altos,
 Impia queis fœdum celebrabat turba Baalem.
 Jamque peragratis Judææ finibus, omnes
 Regis ad ætherii prisicum revocarat honorem :

Jahaziele, de
 quo infra.

Successuque operum lætus, jam debita vitæ
 Otia carpebat Solymâ Josaphatus in arce ;
 Quæ subjectam urbem, magnæque ipsa urbis adinstar ,
 Despectat turrita Sion. hunc regia montem
 Majestas insedit, & altis rupibus aulam
 Imposuit florentem auro cedroque superbam.
 Sedibus his, belli haud metuens, Josaphatus agebat ;
 Cum trepidus Solymam, cursuque irrumpit anhelò
 Nuntius, & subitis Regem terroribus implet ;
 Collectum Ammonem, junctisque in bella Moabum
 Viribus, ac toto descendere monte Seïris
 Conjuratum agmen, penitusque in viscera regni
 Influere, & vastas Engaddi undare per oras.
 Desiluit Princeps folio, jejuniaque omnem
 Per populum indixit, notasque refugit ad aras.
 (Hinc illi quæsitæ salus) cœtu inde precatur
 In medio. Judæa sacræ se infuderat ædi,
 Hostili incurfu tantoque excita periclo.

Mons Seïr
 apud sacros au-
 tores idem cū
 Idumæa.

Æternis, ô, qui cælum terramque gubernas.
 Imperiis, Deus omnipotens, quo Numine solo
 Res Patrum stetit, & Judææ gloria gentis !
 Indigenûm excidio vacuum Chananæida, & omni
 Purgatam scelerum illuvie, Pater alme, dedisti
 Abramidis, veterem pacto haud frustratus amicum ;
 Et propriâ Israël stabilem in sede locasti.
 Ille autem, simul optatâ tellure potitus,
 Templum insigne tuo populus sacravit honori,
 Hæc dicens : si quando examina densa malorum
 Ingruerint, strictusve ensis, pestisve famesve ;
 Hic portus nobis, hæc lapsis anchora rebus.
 Stabimus augustam ante domum, penetraliaque altus
 Implebit clamor : placidas clamantibus aures
 Advertes, salvamque tuam dabis, Optime, gentem.
 Nunc genus Ammonis, Moabique incesta propago,
 Atque Seïræi ; per quos (cùm Ægyptia linqvens

Hæc Regis
 oratio, iridem
 ut altera Pro-
 phetæ subse-
 quens, è sacris
 uraque litteris
 expressa est.

Arva,, Palæstinas duce te migraret in oras.
 Isacidum bisfena tribus) pertendere cursum,
 Et consanguineos vetuisti attingere fines ;
 Diversâque viâ longum exercere laborem
 Jussisti, & flexis errare per aspera signis :
 Ne victorum armis passim per rura, per urbes.
 Horrida confusæ volitaret cladis imago.
 Nunc illi immemores veniæ, ingratiq; salutis
 Nos contrâ patriis detrudere sedibus ardent ;
 Et tua præcipites dona extorquere laborant
 Indignis odiis furiisque hostilibus acti.
 Ecquid in ultricem porro Justissimus iram
 Consurges, bellumque tuâ pro gente capeffes ?
 Haud equidem tantis obsistere viribus ipsi
 Sufficimus. tria castra movent, tria bella facessunt
 Exitium in nostrum sociatæ fœdere gentes.
 Vix hostes Judæa capit. Nos omnium egeni,
 Quod reliquum, ad te oculos, ad te vocisque manusque
 Tollimus, auxiliumque tuis accersimus aris.

Hæc Princeps ; unoque eadem simul ore precatus
 Ingeminat populus. cunctis ex urbibus illic
 Matres atque viri, densum & miserabile vulgus,
 Cum pueris gemitu compellant supplice Numen,
 Quâ nova se lato prætendunt atria templo.

Ecce autem subiti perflatus Numinis aurâ
 Surgit Jahasiel, Asaphi de stirpe Levites,
 Turbarum in medio, cœlique oracula fundit.
 Audite, ô Cives, ait, & quos bellicus horror
 Compulit huc , Solymes arcem templumque petentes.
 Tuque adeo, Josaphate, animum Rex adjice verbis.
 Quæ fari Deus ipsè jubet. Secludite curas ;
 Nec vos infestis venientum exercitus armis
 Ille triplex vano pavidos terrore fatiget.
 Non hæc bella manu vobis pugnanda, neque hastis
 Tempus eget : testes oculos victoria poscit.

Bella geret Deus, atque adversos proteret hostes.
 Crastina ubi cœlo tenebras Aurora fugarit,
 Ite Dei auspiciis, aciemque educite contrâ.
 Obvia Sisæo transcendent agmina clivo:
 Terminus heic illis hæret torrentis ad undam,
 Qui Jerveleæ tractus præcurrit Eremi.
 Haud istis, repeto, manibus telisque gerentur
 Prælia: Bellipotens pugnam sibi vindicat uni.
 State alacres, certumque Dei sperate favorem.
 Hoc tantum, ille opifer vobis Deus æthere ab alto,
 O Cives, Deus ille aderit. Ne proinde virûm vis,
 Tanta licet, cujusquam animum formidine turpi
 Concutiat. Pugnæque autor, sponzorque triumphi,
 Bellorum Præses Dominus. Vos ite, superbos
 Aspernati hostes. cùm lux se crastina cœlo
 Invehet, auxilio Armipotens præsentè favebit.

His dictis erecti animi, festusque per omnem
 Clamor iit populum. submisso protinus ore
 Rex terram simul ipse, simul pia turba petivit;
 Et Dominum toto prostrati corpore adorant.
 Interea Caathita domus,* Coreique Levitæ
 Rite Deo laudes, templis resonantibus altè,
 Promissum ob munus læti, gratesque canebant.
 Quales ætheriæ per fulgida templa Sionis
 Aligeri modulata Chori præconia volvunt.

* Leviticæ fa-
 milia.

Nec filet arma inter divini carminis usus.
 Namque ubi confurgens, Thecuz in deserta phalangem
 Manè novo Josaphatus agit, mediumque per agmen
 Vertitur arma gerens, Solymique insignia regni:
 Hesterni memores Vatis jubet esse catervas,
 Promissisque adhibere fidem, Dominique parato
 Subsidio confisa metu se exsolvere corda.
 Tum qui gentili celebrarent carmine Numaen,
 Linigeros ipsâ turmarum in fronte ministros
 Constituit; fidibusque tubas, & nablia sistris,

Tympanaque & doctæ jungentes cymbala voci.

Ergo ubi Jessei solennia classica Regis

Consonuere sacro præeuntes more Levitæ :

Ceu signum aurito dederit symphonia cœlo,

Omnia fidereis armamentaria castris.

Visa quati, Superûmque acies in bella moveri,

Fulguraque in gladios & acutis ignibus hastas

Conflari, & rapido currûm tremere astra rotatu.

Lib. Indicum.

6. 1.

Et jamjam Sifaræ pœnas, stragemque cruentam

Dispositi statione suâ, flammamque minantes

Stellarum instaurent cunei ; ni Maximus Ultor

Temperet ardentes iras, tonitrusque remittat.

Ipforum adversas in se collidere vires

Hoc placet, atque omnes sociali occumbere bello.

Ilicet attonitas penitus lymphaticus Error

Lotiadûm invadit mentes, simulacraque rerum

Mutat ; Idumæis fociis hostilia signa,

Hostilem inducens faciem, Judæaque rela.

A Toto pro-
creati Moab &
Ammon, unde
nomen genui-
que populi duo
eraxerunt.

Exoritur vastus confusa per agmina clamor

Ammonis Moabique : ruunt socia arma ferentes ;

Castraque Idumæum, nil tale timentia, fœdis

Cædibus evastant. Quò nunc, quò tenditis ? eia,

Quis furor, ô cœci ! quæ vos mala fascina turbant ?

(Clamat Edomæus Princeps.) non hosti ca castra,

Judæamque aciem ; vestras, socia agmina, vires

Perditis, & ludos hosti datis ! en ego vester.

O cohibete iram, & sanctum ne prodite fœdus,

E socii hostes. Media inter talia furdus

Hinc Ammon, illinc Moabus, nec segniûs instans,

Proturbatque Ducem ; & rerum discrimine tali

Deprensos dubiosque, fugam pugnamne capeffant,

Maetat Idumæos. Cunctantes ferrea primûm

Telorum oppressit grando : mox letifer ensis

Accumulat cladem. sternunt tentoria passim,

Quadrupesque virosque ; & inûdant sanguine campi.

Mox eosdem inter se fratres novus incitat ardor :
 Ammonem Moabus, Moabum ferit inscius Ammon,
 Mutuaque infausto veniunt cum fœnore fata.

Terrigenas Vatum sic fabula prisca canebat
 Æsonidæ innocuos hosti, magicoque furore
 Instinctos, fratrum non hæc in prælia natis
 Oppetiisse armis, Grajæ spectacula juventæ
 Dulcia, Phasiaco sed non lætanda Tyranno.
 Aut, ne ficta loquar, sic bella domestica ludit
 Et multo urbanam violavit vulnere pacem
 Roma feræ altricis mores imbuta cruentos ;
 Cùm circumfusæ crudelia gaudia plebi
 Ædilis faceret. Circensi Thraces arenâ
 Barbaricam exercent artem ; ferroque recepto
 Infestos sæpe in gladios indutus uterque,
 Alter in alterius confudit sanguine vitam.
 Haud secûs obnixa Moabusque Ammonque vicissim
 Conficiunt sese, atque infano Marte trucidant
 Victores victique : absumptis omnibus unum
 Per campos triplici superest ex agmine funus.

Judæûm interea vacuis exercitus arvis
 Progressus venit ad speculam fatalis Eremitæ.
 Hic verò novus ille oculis gratissimus horror
 Subjicitur, Dominique aperit se ultoris imago.
 Ceu cùm æstiva Ceres vastum succisa per æquor
 Procubuit, densisque latent sub messibus agri :
 Strata cadaveribus prospectant omnia latè,
 Nec quenquam innumeris restare ex millibus hostem ;
 Tergeminas cecidisse acies. simul undique rubri
 Visa maris facies, stagnantia sanguine castra.

Tum divino ictus mentem Josaphatus amore,
 Admiransque, manus cælo cum voce tetendit.
 Hoc illud, Deus, auxilium sperare jubebas !
 Hæc promissa tui Vatis ! Belli arbiter unus
 Diceris Solymæ, tua, Maxime, signa Triumphus

Semper amat ; famulisque volat lætissimus alis,
 In quancunque voces partem. spes ille superbas
 Curribus & gladiis fidentum eludere jussus,
 Transit ad imbelles, viresque infringit iniquas.
 O tibi quas referam grates ? quæ munera templo
 Digna satis, Deus armipotens ? Agnoscite, Cives,
 Vim superam, patrii tutelam & numen amoris.
 Res ubi depositæ, præsens discrimine summo
 Maturâ trepidos ope sospitat, ipsaque donis
 Optata exuperat. Votorum summa salutem
 Spectabat, si versâ retro vestigia ferrent
 Lotiadæ : nunc parta super victoria, & ipsi,
 En, ultro incurrere suis, mirabile ! telis,
 Ac nostras obiere vices. Agè, debita laudum
 Carmina solvamus Domino, quo Vindice tuti
 Carpinus oblatos tanto ex certamine fructus.
 Ite modo, & spoliis, Cives, gaudete repertis.
 Dicentem Isacidæ læto clamore secuti
 Decurrere jugis : prædamque ex hoste petentes
 Ingeminant gratesque Deo regique triumphos.
 Ventum erat in vallem, facies quam dira premebat.
 Heic perfossa vident pilis, hausta ensibus illic
 Corpora, & innumeras lethi formasque viasque.
 Nam trajecta alii jaculis præcordia rupti ;
 Confixi jugulos alii : partim ungula equorum
 Obtrivit ; partim falcati concita currus
 Vis rapuit, lacerosque artus circumtulit axis
 Fulmineus, tepido singultant flumine trunci,
 Ac plenæ capitum galeæ volvuntur, & arma
 Corporibus defixa hærent, & vulnera servant.
 In vultu sedere minæ ; vivitque superstes
 Ipsa in morte furor : gladios dextræque retentant.
 Grandibus hæc inter congesta cadavera acervis
 Ampla jacent spolia, & gemmis pretiosa supellex,
 Purpureæque virum chlamydes, pictique tapetes.

Judæus quæ abjecta legit, cælique potiri
 Muneribus properat : Ducibusque insignia cæsis
 Detrahit, & nitidas torques, & splendida bullis
 Cingula, loricæ argento auroque trilices,
 Et cristas capitum, clypeosque ex ære decoros,
 Arcusque pharetrasque & adhuc fumantia tela,
 Sed prædâ obruitur victor, tresque ordine soles
 Convectare humeris hostilia vasa laborat.

Quarta dies revocat sparsos ad signa maniplos
 In vallem, * quâ dicta Deo bona verba faventi,
 Inde sacram facti signarunt nomine Vallem.

* *Pa'lis bene-
 dictiois.*

Judæi exuviisque graves, & pectora largo
 Lætitiæ infusi sensu, quod perculit hostes
 Omnipotens, Solymæ remeant felicis ad oras,
 Palmatis omnes galeis (Josaphatus ovantes
 Anteit) & citharis misto clangore tubarum
 Tempia petunt, tantoque canunt pro munere grates.
 Nec mora, finitimas it nuntia Fama per urbes,
 Judæis pugnante Deo, cecidisse Seïrem,
 Oppressum Ammonem, debellatumque Moabum.
 Diditus in populos terror ; sancita Sioni
 Certa quies : & Pax cælo delapsa sereno
 Pinguibus ornavit Josaphati tempora baccis.

JOSAPHATUS

INDIÆ PRINCEPS

VICTIS VOLUPTATUM ILLECEBRIS

AULÆ NUNTIIUM REMITTIT.

Hujus argumentum Poëmatris de Iosaphato Indo, Regis Abenneris filio, è capite XXX. sumptum est Historia, quæ apud S. Ioannem Damascenum extat: ubi castissimi juvenis animus, quò blandius, eò periculosius à procacissima puella oppugnatus, idoneis ad vincendos conatus illos nefarios visis armatur.

NUMINIS ardentem, cælo gens orta, Ministri,
Queis vigilem humanæ curam exercere salutis
Tutelaque datum est, arcano Tartara bello
Frangere, fidereisque animas inducere regnis;
Victorem scelerum Juvenem celebrate, Camœnæ
Aligeræ, sanctumque Chori pæana sonantes.
Arte laborantem Stygiâ, Venerisque dolosæ
Illecebris, præsentem animum firmastis amici
Subsidio, visisque bifformibus. inde profanæ
Aulæ odium, sacræque cupido incessit Eremitæ.

Leo Isauricus,
Imp. Constantinop.
Iconomachus, in quæ
D. Joan. Damascenus scrip-
sit.

Tuque adeo, Vindex Superum, Domitorque Leonis.
Cæsareo induti cultu, lateque per arva
Thracia, perque urbes augusta in signa furentis;
O lux, ô patriæ Rectorque decusque Damasci,
Unde trahis nomen; jam Vatem respice Vates.
Ipse olim, nunc & cœlestibus addite Musis!
Desertorem Aulæ Josaphatum, antroque latentem,
Produxit spectandum Orbi, scriptisque sacravit
Dextra, pios doctâ ritus acerrima pugnâ.
Tutari; Graiæque ideo sub crimine fraudis

Præcípites Arabis furias perpeſſa Tyranni.
 Purpureæ formoſa micant veſtigia plagæ,
 Virgineique eadem veſtigia mira favoris.
 At tu iſtâ rege, Dive, manu, longeque coruſco
 Duc radio ingreſſum tua per monimenta clientem.
 Auroræ imperium & patriam calcere coronam
 Oſtentis rurfus variis ad dura vocato
 Da facilis juveni, & cœptis allabere magnis.

Jamdudum invictâ Patri pietate rebellis
 Memnonius ſteterat Princeps; viresque dolosque
 Fregerat, & Theudæ magicas eluſerat artes:
 Theudæ, qui Cyprias, agmen famulare, puellas
 Expertus ſclerum juveni ſubmiſerat autor,
 Infaſtumque miniſterium, pellaciaque ora.
 Una ſed ante alias regali è ſanguine Siren,
 Aſpectu cantuque nocens, præſentius offert
 Exitium, cœcoſque adſpirat vocibus ignes,
 Multa procax ſimulans; & relligionis ineſcat
 Objecta incautum ſpecie, turbatque timentem.
 Credulus & jam jamque magis molleſcere ſenſim
 Cœpêrat inſidiis animus, labefactaque corda:
 Cùm dubios inter fluctus, ægræque procellas
 Mentis, humi abjicitur, plangitque flagrantia ſupplex
 Pectora, & aſſiduos oculi ſolvuntur in imbres.

Interea, dolci fortitus tempora furto,
 Edenis ſuperi delecta papavera campis
 Ecce manu quaſſans delabitur æthere Somnus;
 Non, viles ſtupor ille animas, plebeiaque paſſim
 Aſſuetus riguo perfundere lumina cornu.
 Heroum hic vigilem ſopito in corpore mentem
 Exercet; cœloque infert; atque alta, latentis
 Numinis interpres, rerum miracula pandit.
 Mille adeo pictæ facies, ſimulacra ſequuntur
 Myſtica; prædulcis leti comitatur imago.

Manus ob Iſau-
 rici calumniâ
 Damasceno
 amputata, mi-
 ro Deiparæ be-
 neficio reſtitu-
 ta.

Ecſtaſis.

Ergo, ubi cœlestis tacito pede regia Somnus
 Tecta subit, curisque oppressum contigit aureâ
 Permulcens virgâ juvenem, sacrosque medullis
 Ambrosiæ insperfit rores; tunc lata caducam
 Molem eluctari ac sensu Mens ire relicto,
 Jam levior, jam laxatis propè libera vinclis.

Continuò ignota longè tellure vagatur,
 Aligerùm rapiente manu, qui per loca vasta,
 Dumisque scopulisque & grandibus aspera silvis,
 Tandem ad ridentes vîsi perducere campos.
 Splendidior crystallo & nectare suavior amnis
 Purpureas spargit ripas & gemmea prata,
 Halantesque toros æterni munere veris.
 Heic stupet insignem lucum Josaphatus, & altè
 Fluminis adstantes utroque à margine palmas:
 Queis, neque deliciis Indorum cinnama certent;
 Nec pretiis, olim vanus quæ cantat Apollo
 Hesperidum nemora & fulvi decora illa metalli.
 Non ipse Eois arvis pulcherrimus Eden,
 Prima homini sedes, divina confitus arte:
 Quamvis & flavæ dextram conferta Juventæ
 Ducere Vita choros & nullis anxia curis
 Gaudia gestiret, circum plaudentibus undis
 In numerum, & teneri strepitu admodulante Favoni
 Centus avium & liquidæ certamina vocis.
 Hæc nullæ colubri insidiæ pomaria fœdant;
 Nec diræ invigilat Mortis custodia ligno
 Auricomo, sacros prohibens invadere fetus:
 Noxaque & intacto longè Mors exulat arvo.
 Roscidus it totis panacæ frondibus humor.
 Utque nemus gracilis perlabitur aura coruscum;
 Dulci arguta sono, suavi fragrantia odore
 Conspirant folia; & roseis stellantia plumis
 Per teretes volucrum pendent miracula ramos,

Cœlestes Apodes, tellurem spernere natæ.
 Sponte sua rami varios sinuantur in orbes ;
 Heroasque vocat frontes condensa corona,
 Nec senio marcens, nec pulvere sordida terræ :
 Et lemniscatâ micat ardua Gloria palmâ.

Protinus amplam inhians rapitur Josaphatus in
 urbem,

Aureus immenso quas circum amplectitur arces
 Divinas spatio campis, silvæque beata.
 Portas bacca ingens, muros extruxit iaspis ;
 Obrizô speculari solum consternitur aurô :
 Splendida flagrantès volitant per compita turmæ.
 Cætera quis referat ? fulgentem qualis ad aram
 Majestas ! obductæ oculis trepidantibus alæ
 Circumfusorum Procerum : celsisque clientes
 Desiliunt Reges soliis, ponuntque coronas
 Suppliciter. festo sonat omnis Regia cantu,
 Mortalis quò non adspiret gratia linguae.
 Concordes fervent citharæ, cumque ore loquuntur
 Artifices digiti : vox eminet una canentum.
 Heroum hic locus est ; requies immota piorum,
 Qui maculæ expertes animas, intacta profanis
 Pectora deliciis, meliora in gaudia servant.
 Tu nos, ô Regum Princeps, Rex maxime Divûm,
 Imperii heredes patrii, tantæque coronæ
 Consortes numero ex omni legis, Optime Vindex,
 Qui meritos clauso Furiarum carcere Manes
 Fulmineus mactas Ultor. tu sanguine casto
 Purpureos idem Reges, aræque Ministros,
 Christe, sacras. tecum heic ipso regnabimus avo.

Dum sancto permista metu suprema voluptas
 Desigit mentem attonitam, suspensaque tanto
 Lumina conspectu Josaphati, uritque videndo :
 Dia rudes jampridem oculos spectacula pascunt ;

Nunc repetenda via ; externas agè desere sedes :
 Increpitant Genii cunctantem, & multa rogantem;
 Ne sua præcipiti subducant munera raptu,
 Neu fortunatæ revocent à mœnibus urbis.
 Non ita (subjiciunt juveni comitesque ducesque)
 Succedes magno hospitio : via dura laboris
 Carpenda : haud precibus superæ stant præmia
 palmæ.

Solenni referes palmam certamine victor.

Ergo aude, & clarâ dignum te finge curuli.

Hæc simul ; & Reges inter, sanctumque senatum
 Ostendêre locum vacuum, sellamque paratam.
 Ille autem sceptrum ac trabeam, quam Gloria dextrâ
 Texuit ipsa sua, sparsisque insigniit astris,
 Ætheriâ in sella, & vivis diadema pyropis
 Scintillare videt capiti decus. æstuat omnis
 Luce locus, rutilamque accendit purpura sellam.
 In medio, gemmis radiisque inscripta coruscat,
 Contemptori aulæ, formosæ tessera sedis.
 Hauserat illam oculis ; diversasque actus in oras,
 Et desiderio corda ietus fortia, cessit.

Parcite, terribiles Genii ! sublimis Olympi
 Quò cupidum rapitis Josaphatum in devia, & orbem
 Adversum penitus Superis, penitusque jacentem ?
 At vitæ ancipitis metas, discretaque factis
 Præmia magnanimo juveni recludere præstat.
 Hinc timor incumbens stimulis urgebit amaris
 Victrices agitare fugas. jam sidera nota
 Altius assurget repetens, in Tartara visu
 Demissus, Paphiosque extinguens ignibus ignes.

Antrum horrendum, immane, ardens, fornacis
 ahenæ

In speciem, cœcâ medium tellure dehiscit
 Præcipites volvens populos, & sulfure inundans

Conglome

Conglomerat piceo fumantes igne tenebras.
Segnius Ætnæis concepta incendia venis
Perpetuam eructant nubem, fundoque Vesevi
Montis anhelantes rumpunt spiracula flammæ.
Ipse ardent, ipsæque avidis sine more caminis
Inconsumptæ animæ feralia pabula præbent.
Illic discinctique Ducès, fractisque Gigantes
Viribus, ac noto spoliati murice Reges
Mutatos horrent habitus, & non sua regna.
Divite jam torquis baccâ stellatis, & auri
Cessit honos : nunc illuso circumdata collo
Flamma, eadem sceptrumque manu frontique corona
Fingitur : incensas penitus flamma induit Umbras,
Purpuream assimulans trabeam : stant omnia flamma.
Flammam inter Stygii, genus implacabile, vermes
Mille voluminibus serpunt ; atroque veneno
Spumantes, rabido convellunt intima morfu.
Admover ipsa faces, dirisque armata flagellis
Conscia mens instans æterno verberare sævit.
Monstrorum omnigenæ facies, simulacra Leonum
Ignea, Cerberei rictus, vastique Dracones,
Ah, trepidis inhiant, Orci insultantis acerba
Ludibria : & densam rumpentia fulgura noctem
Turbine sulfureo pœnas produntque gravantque.
Vinclorum tractu horrifono, crepituque resultat
Plagarum, & surdo mistum plangore Barathrum.

Talia dum pavido Josaphatus lumine cernit,
Confusosque haurit fremitus, questusque nefandos
Frustra execrantium sese, infaustosque parentes,
Ultoremque Deum : tum vox contorta per auras
Intonat. Hæc subeunt scelerati ergastula Manes.
His demum luitur pœnis malefana voluptas,
Fœdior & cœno, & rapidâ torrentior unda.
Quo tonitru concussi animi, ruptoque repente

Exturbata quies, noctisque silentia somno.

At non distractam in geminas spectacula partes

Oblata effugiunt mentem. Cœlum, Orcus in alta

Mente sedent, hærentque oculis : jam gaudia pectus,

Jam vastæ alternâ repetunt formidine pœnæ.

Ingemit, exanguisque tremens; fletuque sequaci

Suspirans, intercisis sic vocibus inquit.

O Superi ! ô Manes ! ô fortunata Piorum

Concilia ! ô sævo constricti carcere Sontes !

Agnosco (exclamat) nec me sacra somnia fallunt.

Eheu, quàm tenui rerum discrimine Olympum

Atque Erebum, Vitæ & Mortis confinia vidi,

Quamvis immensum fedes chaos inter utraque !

Cedite fatales, monstra importuna, puellæ ;

Tartarei, pestes, queis sibila lingua colubri,

Lubricaque heu nimium fallacis gratia vultus !

Insidiosa cohors, procul hinc, procul ite nefandæ

Eumenides ! Stygii in flammis remeate Barathri ;

Dira ministeria & fraudes avertite cœcas.

O Pater ! ô nomen jamdudum oblite parentis !

Ah, quid amore nocens & plusquam hostilibus urges

Natum odiis ? scelerumne faces, Orcique ministras

Prolis ad exitium magicâ pater instruis arte ?

Si tibi jam obstructæ monitis cœlestibus aures ;

Posthuma nulla salus ; pereundi certa libido :

Me Patris ætherii divina capeßere jussâ

Quæ demum invidia est ? comitemne in Tartara

Natum

Præcipitas ? hic prolis amor ! pugnare Tonanti

Quippe jubes ; Stygio fœdus sancire Tyranno.

Hei mihi, si pœnas scelerum, feralis Avernî

Effigiem hausisses oculis ! Proh bruta reorum

Pectora ! flammivomæ in medios fornacis hiatus

Ultero avari ruimus, Cœloque avertimus ora.

Proh furor, æternoque appensa dolore voluptas !

Quam prope ab exitio, pietatis imagine captus ,

Tartareas gressu in fauces titubante pependi !

Sed miserans, dextram Christus porrexit ab alto ;

Summâ, flagitio præreptum, à clade recepit,

Asseruitque sibi. Et tantis objecta periclis

Hæres, infelix anima atque ingrata salutis !

Quid dubitas ? Regis nudus vestigia nudi

Consectare, Crucique volens te accinge ferendæ.

Hac monstrata vocat stellantis gloria regni.

O ubi * Barlamus ! quid me, Pater optime, densis

Hostibus expositum ac furiis flammantis Averni,

Aulâ in fallaci tectisque micantibus auro

Deferis, ipse cavis agitans sub rupibus ævum,

Et cælo nivæ pia cōdens furta senectæ ?

Dicite, iō saltusque sacri, feliciaque antra,

Dicite, vosque almi, cælo gens debita, cives,

Quæ Barlamum habeat sedes ; ubi conscia votis

Molliat incenso lacrymarum flumine saxa !

O qui me patrias ardentem linquere sedes

Deserto statuât medium, puroque sub axe,

Quò me non Genitor, non aula invisâ sequatur !

Quæ mihi tum Charites, quæ cœli gaudia desint !

Tutior in silvis certè, mediisque lænas

Inter agam, quàm turba procax ubi retia nectit,

Illecebrisque afflant Paphiæ contagia formæ.

Aulam extra, scelerisque vias, vulgique tumultus

Tempora devolvam tacitæ placidissima vitæ,

Præcipiens Superos : victor mihi jura subactò

Ipse dabo, tunc sceptrâ tenens, potioraque regna.

Quam tu si veniam, specioso carcere septum

Usque premens, renuis ; nec patris nomine longum,

Dure, neque extincto Genitor lætabere Nato.

Sic Juvenem sacri collectus imagine Somni

O ij

* Vir sanctus,
a quo Josapha-
tus Christiana
fide imbutus.

Impetus acer agit, nec multo vota moratus
 Tempore, magnanimo spretam pede reppulit aulam,
 Sceptra super fugiens stratosque in limine fasces.
 Illicet & Serum molles ablegat amictus,
 Latus inhorrescens fetis ; & regia tecta
 Optato exilio mutans, spelæa terarum
 Occupat insuetus, silvis mirantibus, hospes.



H. Waelle jr.

L. Coffin sculp.



HEROICON

LIBER VI.

MOTHA CANDENERIA
 AD ILLUSTRISSIMUM
 FRANC. DE ROCHECHOUART
 CANDENERI DYNASTEN &c.
 PRIMUM E QUATUOR VIRIS
 PRÆTORIARUM COHORTIUM PRÆFECTUM.



FORMOSUM Ligeris quâ se via pandit
 ad amnem

Juliodunæi per agri lætissima culta,
 Dives opum decorumque, & amicis
 hospita Musis

CANDENERI latè regnat Domus, au-

rea Motha.

Illic certa quies, illic sincera Voluptas,
 Et junctæ Ludis Charites; Geniufque beatæ

Sedis, Honos ; Numenque Heroibus, ardua Virtus.

Inclyte priscorum sanguis Comitumque Ducumque,
Supremis populos terrasque undasque regentum
Imperiis ; ades ô tantis, generosa propago,
Major Avis, FRANCISCE, tuæ laus maxima Mothæ,
Jamdudum blandis exercens otia curis,
Et nova fatales vertens in gaudia casus ;
Splendida nunc mecum placiti monimenta laboris
Collustra, tantumque operæ felicitis & artis.
Ad tua, quò Vatem revocas, Prætoria cantu
Longinquas in amœna traham spectacula gentes.
Non juga Telegoni, non mollia Tiburis arva
Præniteant, Latias olim quæ plurima Musas
FronDOSI hospitii gelida tenuère sub umbra.

Conspicuas immenso aditu progressus ad arces
Chlorus, Apollineâ vernant cui tempora lauro,
Lunatum institerat campum, frontemque legebat
Adversam castris admirans, & ahenea claustra.
Sublimes tacitus valvas prælabitur amnis :
Limen inaurato succingunt ferrea vallo,
Candentes inter quæ spicula fixa columnas.
Addita vis formæ, decorique admista voluptas.
At valli in medio, & supremo in fornice portæ,
Divite flavescit, Soli haud spernenda, metallo,
Demittitque caput Clytie & languentia colla ;
Jamque riget luctu : florem cura ipsa colorat.
Antiqui, Clyties dextra lævaque, superstant
Postibus Heroës ; solidum queis pectore robur,
Marmoreo spirat majestas ardua vultu.

Projecta & nanis ingens redimita cupressis
Area transmissò Juvenem vix ponte recepit ;
Sidereâ illustris specie cùm se obtulit Hospes,
Aggere contiguo visus descendere castris.
Pulchrorum ille operum longè pulcherrimus auspex,
Cujus amor puris excelsas ignibus Artes

Incendit, seu res manibus, seu mente gerenda,
 Ibat Honos, florentem auro per colla torosque
 Cæsariem effusus, lituoque instructus eburno.
 Illicet amplexu, & dictis occurrit amicis.

Chlore, quis aspectu in primo, limenque sub ipsum
 Gressum animumque repens fixit stupor? extrema
 captos

M O T H A oculos tenuit: quid, cum penetralia pandet?
 Murorum neque enim facie censenda, suâque
 Mole domus, pinnisque, & turrigero anfractu.
 Ingredere, & maiora oculis mirantibus hauri.

Hæc inter, submissum animo gratesque cientem
 Occupat ipse manu, superatoque aggere ducit,
 Quâ gradibus summis gemini insedere leones.
 Ira jubas arrexist, & aspera dentibus ora
 Illisere globo, atque impactis unguibus horrent.
 Tum Sphinx, virgineo formosum pectore monstrum,
 Desinit in tergum, caudamque unguisque leonis;
 Pontisque obsedit fauces, terretque placetque.
 Stant toto virides suggestûs margine coni.
 Protectæ saxo molis latera ardua flumen
 Alluit, & vivo restagnant gurgite fossâ.

Vestibulum jam Chlorus init; foribusque superbis
 Aligeræ accipiunt Horæ, genus Ætheris alti;
 Quæ turrim castri ærisonam, bipatentia supra
 Limina, pervigili propriam statione tuentur.
 Contra excurrenti respondent atria visu
 Pervia, & immensum trans ædes panditur æquor,
 Anterior Mothæ quanto plaga limite tendit.

Tum comitem, argutis oculis per aperta vagantem,
 Inferioris Honos succedere sedibus aulæ
 Invitat, croceo Attalico quam stemmata pingunt
 Candeneri, undosoque appensa insignia scuto.
 Singula percenset Duëtor, Chloroque resignat,
 Et Domini priscâ fastos ab origine texit,

Viccomites
Lemovicenses,
quorum etiam
nonnulli Aquitaniae
Duces,
in de genus
Procerum de
Rochechoüart,
ex antiquiss.
monumentis.

Fulquerium, Vidonem, Ostrofrancumque renarrans,
Torque alios Lemovicis agri ditione potentes;
Queis & Aquitanos tractus, rapidumque Garumnam,
Infuso undantem Oceano, frænare potestas.

Certa loquor monumenta Domus, tabulasque
perennes,

Inquit Honos; nullaque fides ambage laborat.

Gerardi, Cubus Comiti cui paruit olim

Viviscusque Duci Biturix, placidique Vigennæ

Accola, perpetuum recto genus ordine fluxit

Rupem-in-Cavardi: ramoso deinde per omnes

Stemmata Francorum Procères, Italosque cucurrit,

Teutonicosque Duces, Regali & Sanguine mistum.

Cœlesti dignas sed quas ego Præsule laudes,

Cui magnum Rupes dederat * Fucaldia nomen,

Concipiam? Numen ceu Tutelare piorum,

Ac Regum ille Patrem gessit, nec dignior alter

Romulæ adoratam genti conscendere Sedem:

Nec (quò præstantum meritis incensa ferebant

Vota Patrum) folio frustra confidere summo

Christiadæ, pronoque humeros supponere seculo

Vidissent Custodem Orbis, Regemque Sacrorum,

Purpurei sanè Princeps lumenque Senatûs,

Nunc potiùs micans ostro, st latus Olympi

Arcè sedet, Franciscum & Avunculus excitat Heros.

Quid Polemarchorum clavas, & Martia regna,

Laurigerosque canam, proavis decora addita, fasces,

Et partam Heroum dura inter prælia famam?

Nec verò, stirpem egregiam quæ tanta coronat

Gloria, Candem rum longâ pertentat ovantem

Majorum serie, Consanguinisque superbum.

Haud splendoris egens alieni, & lumine clarus

Ipsæ suo, qualis proprio Sol igne coruscat,

Acrior ingenio, dubitas, animone; quieti

Aptior, an bello, certat cum robore forma

Condeneria
Domus cum
plurimis Gal-
liæ, Italiæ, Ger-
maniæ Princi-
pibus, ipsisque
adeo Christianis.
Regibus
affinitate con-
iuncta.

* Frac. Cardin.
Rupifucaldius,
Câdeneri Pro-
avunculus.

Corporis : intrepidâ regnat Constantia fronte.
Ille nec officii parcus, nec mollibus uti
Gnarus blanditiis, gratae capit artis amore
Phœbigenas ; Doctosque alios, quæ cuique facultas,
Hospitio donisque fovet, studii que laceffit.

Ingenio nova causa facies admovit, & ultro
Splendida captantem commercia nobilis urget
Cura Virum, Natus ; nec dignior ulla Parente.
Et Patre haud quisquam potior, sublimia rerum
Sponte suâ sectantem, & nil puerile ferentem
Excolat assidue, atque ingentibus omnia coëptis
Spondentem accingat famæ, decorique futuro.

Omnia mutatis jamnunc miracula formis ;
Assyrios, Persas, Grajos, Latiosque sonantem
Externis stupeas linguis. pulchrum ipse laborem
Ludo avidus rapit ; & memori sub pectore servans
Fastorum signata notis, signata locorum
Cuncta ævi monimenta refert : gressumque Lyceo,
Naturæque adytis oculos immisit apertis.
Usque adeo tardos animus prævertitur artus,
Annorumque moras ! lustro congesta secundo
Tot studia, exercent vacuas quæ singula mentes.
Atque Artes idem Musis permiscet equestres ,
Gradiivi Phœbique avidus decerpere lauros,
Et jam prima tulit gratantis munera Phœbi,
Aureolo tenerum modulatus pectine carmen.
Quale sub Ortygiæ cecinit natalibus antris
Delius ipse Chori Princeps, artisque repertor,
Lactea cum citharam primævo dextera lusu
Impulit : Ægei presserunt murmura fluctus.

Dixerat ; erectumque animis, auditaque plenâ
Mente revolvantem, vastæ penetralibus aulae
Chlorum educit Honos : junctoque per alta feruntur
Tecta gradu, atque alia ex aliis conclavia lustrant.
O mihi tantorum si fas æquare canendo

Innumeras decorum species, fusasque per omnem
 Delicias gazasque Domum ! Regalis ubique
 Splendor, ubique decus, gratoque opulentia luxu.
 Aurea librorum hîc nitidas examina sedes
 Complevere : illic armamentaria ferro,
 Partim etiam argento splendent ; nec ahenea desunt,
 Missilibusque globis & pulvere fœta nitrato
 Tormenta. inde tonans molitur fulmina Mavors.

Non ego, Mothæas quanquam omnia magna per
 ædes,

Singula amem gracili vacuus percurrere filo.
 At doctos equidem haud sileam, quos crebra tapetas
 Fabula descripsit, Chlorique exsuscitat æstrum ;
 Quos punctis acus insistens operosa minutis
 Bombyce exegit, mirâque animam addidit arte.
 Vos Juveni, quoscumque novæ Carthaginis hospes
 Legerat Aeneas casus patriæque labores
 Junonis templo effictos, aulæa refertis
 Gemmata, & Graiæ ac Latîæ contexta Minervæ.
 Hîc spoliatum armis, spoliatum lumine victor
 Hectora crudelis raptat, cumque Hectore Trojam.
 At Priamus (tantum patrii vis ausa doloris !)
 Pelidæ affusus genibus, natique rubentem
 Sanguine complexus dextram, feralia jura
 Et lacrymas emit appenso miserabilis auro.
 Parte aliâ insidias, furtivosque edidit hostes
 Arduus insultans muris Equus ; inde Pelasgi
 Dardaniam exundant nocturnâ strage per urbem.
 Jam cinis est quæ Troia fuit, domus illa Deorum,
 Ille Deûm labor. hîc nondum confedit in ignes
 Seclorum victrix, & adhuc vivacibus ardet
 Inconsumpta rogis, mediaque in clade perennat.

Postquam oculis Phrygios inhians animoque tapetas
 Circumiiit ; patulum se offert, lateque recluso,
 Ad primos quâ parte Domus respectat Ecos,

Pariete suggestum procurrit, & imminet undis.
Quò gressum juvenis simul intulit; arvaque raptim
Obvia prospectu insolito mirofque lepores
Libavit; simul attonitus, fidissime ductor!
Verane, ait, rerum facies? an splendidus error
Ludit Apellei fuco fallente laboris?
Lætius artificis nam quid solertia dextræ
Finxerit, audaci quidvis mentita colore?
Hîc virides umbras nemorum, hîc felicia culta
Hortorum, hîc riguo trepidantia flumina cursu,
Prataque fectilibus latè gemmantia rivis?
Ut partem ridente solo tunduntur in omnem
Gaudia, campestrisque decus spectabile regni!
Circeos equidem lucos, cantataque rura
Crediderim, illusos quondam pascentia sensus.

Ergo agè, multiplices jucunda per otia formas
Perlege, & Æmonias Tempe vincentia valles;
Arridens subjecit Honos. ipse omnia blandus
Intento signat digito, & res vocibus ornat.

En, ait, ut castrum placido circumvaga fluctu
Nympha coronavit! Dorizam nomine dicunt:
Cespitem ut eductus, tenuis quem glareæ vestit,
Ripasque extruxit, pratumque amplectitur agger!
Pratum adversum, ingens; ubi ritu ficta Britanno
Mille trahit virides fectis area gramine flexus.
Dædaleo ut sepes operi formosa renidet!
Frondentes metas, immortales cyparissos
Punicei variant flores; contexta rosæta
Laudato ante alios frutici, cui nomina fecit
Perpetuus, canæque viror nil frigora brumæ,
Nil rapidam æstatem metuens, torrentiaque astra.
Quattuor amne obeunt ducto in diversa canales:
Singulaque integrum referunt divortia flumen,
Crystallum oblongo liquidam voluente meatu;
Et castigatæ, ne quæ silva edita visu

Officiat, puris circumfédère cupressi
 Equales spatii, & utroque à margine vernant.
 Omnia congeminat lymphæ specularis imago.
 Aspice & ulterius pratis nemorosa vireta.
 In medio longeque viam, lateque patentem
 Herculea obtexit foliis bicoloribus arbos,
 Dum vastâ excipiat crescentis imagine lunæ
 Concurfus populorum, & publica vota petentum
 Salmurias arces & Magnæ Virginis aras.

Talia monstrantis, visu per cuncta sequaci,
 Stabat inexpletum juvenis suspensus ab ore.
 Cui ductor : subjecta oculis volitare per arva
 Pergimus ? an certis propius cognoscere formis
 Cætera, Chlore, juvat, gressumque efferre morantem ?
 Lætius hoc : dulcisque labor pervadere prata,
 Gramineosque toros manantibus undique rivis,
 Vicinumque nemus. Chlorus statione relictâ
 Exscendens, rarum artis opus jam calce terebat,
 Pendentesque gradus, atque ipso stantia nexu
 Aptâ inter sese miratur grandia saxa.

Inde, sub egressum, taciti ad penetrale Sacelli,
 Quod lateri annexum dextro gradibusque recurvis,
 Ducitur afflatus propiori Numinis aurâ.
 Rite piam ostendit sedem, sanctosque recessus
 Dux juveni, & quàm crebra loco pretiosa supellex ;
 Ingens præcipuè candenti è marmore signum.
 Humanâ major species niveam insidet aram,
 Marmoreusque puer maternis decubat ulnis.

* Deiparæ.

E silva r. —
 statii.

Credo equidem, Indigetis simulacrum nobile * Divæ
 (Infit Honos) arrecto animo dum suspicis, hospes,
 Grande illud tacitus voluis ; *Cætone peractum*
Fluxit opus ? certè longinqua per æquora tantum
 Hoc decoris Motham advectum. Basin aspice versu
 Inciso memorem : Genuæ venerabile Donum
 Agnoscas, una nec relligione tuendum.

Tempore quo Francâ Ligures ditioe Secundus
 A Decimo implicuit Ludovix, par unus utrique
 Hesperiaë, belloque potens ; sed amore suorum
 Clarior, & populi non vanâ laude Parentem
 Jactantis ; rerumque adverso fortior æstu :
 Pictonicas moderantem urbes & Santonis oras
 Oceani, multaque priùs virtute probatum
 Franciscum imposuit Genuæ, qui parta fideli
 Servaret validâque manu, Regemque referret.
 Pro quo bisgeminum Pario de marmore munus
 Publica gratati Cives monimenta dicarunt.
 Henrici studio Magni haud indignus, ad arces
 Fabricius * Belli dictas cognomine Fontis
 Secessit, statuisque decus regalibus addit.
 Ex illo quæ lux generis, quæ gloria jamtum
 Candeneri, cernas, gestis & adorea rebus.

Franciscum hac Pietas exercet sede frequentem.
 Exemplo componit Herus famulantia corda ;
 Sed magis affixam lateri Pater ardua prolem
 Astra sequi, pulchroque docens inolescere mori.
 Sic aquilæ advolitat pennis jam fortibus audax
 Vere novo fœtus, cum rupibus emicat ales
 Fulmineus, cœlique iras cœcosque fragores
 Exsuperans, rutilo nubes secatur ocyor igni.
 Jamque adytis cedebat Honos; cum Chlorus, at, inquit,
 Marmora dissimulas medio substructa Sacello !
 Ille autem. Ne verò alti, ne quære doloris
 Materiem. hîc viridis prærepta in flore juventæ
 Quippe Viro Conjux. lethi victricia corda,
 Aternæque foveant cinerem sub marmore flammæ.
 Stirpe genus Lupiâ ; Cœlesti ab Virgine nomen :
 Bellenave, ditio : roseo Mens pulchrior ore.
 Improbæ Lucinæ primum Libitina levamen
 Invidiâ excepit, libataque gaudia vertit.
 Sat partu fecunda uno tamen illa, puellum

Franc. de Ro-
 chech Dynasta
 Candenerius,
 Pictonum Al-
 niensiumque
 Gubernator, à
 Ludov. XII.
 Prorex Genuæ
 creatus.

* Statua, Hen-
 rico IV. expe-
 tente, ad cas-
 trum Fontis-
 bellaquei tras-
 lata.

Marmoreus in
 Sacello tumu-
 lus Mariæ Lu-
 piæ, uxoris Câ-
 deneri, feminæ
 spectatissimæ.

Nunc Geniis enixa parem. Nec plura profari
Sustinuit : gemitu sermonem abruptit acuto.

Protinus hinc comitem vicina sub atria transfert ,

Tabulæ Geo-
graphicae.

Quæ limbo circum insigni condensa tabella
Vestit , & pelago ac terris descripta pependit.
Torva hæc aspectu , & vultus imitata leonis ,
Corpore turrato ac totis gerit artubus urbes.
Arces ore sedent , exertis unguibus arcēs ;
Stant villi silvis , decurrunt flumina venis.
Nec minùs illa ferox , habituque induta Draconem ,
Sed tamen innocuis populos complectitur alis.
Ludicra quas hominum formas industria fecit ,
Ausâ etiam cœlo Superisque adscribere monstra.

Ecce autem patriæ laus & spes altera Mothæ ,
Candeneri Soboles , Musarum illustris Alumnus ,
Arti instabat ovans , corda igneus , aureus ora.
Mox ubi certatum officiis ; quascumque per oras
Ire velit , cuicumque freto dare carbasa , promptum
Spondet Honor signare vias , Chloroque laceffi
Ardentem . Ingenii certus , latusque pericli
Emicuit , radio stringens quæsitâ fideli ;
Mirator stimulos alacri dum subderet hospes.
Dic , ubi se , Proavis quondam regnata , superbis
Ædibus attollat Genua , & queis imperet undis ?
Continuò notat hic Ligures . quibus acer in oris
Regisque & patriæ vindex Czarneskius ardet ?

An. M. DC.
L X. quo hæc
scribebantur.

Littaviæ saltus , saturasque cruore paludes
Ostendit , captasque urbes , populosque fugatos.
Sarmaticæ hîc acies ; hîc cæsi castra Geloni.
Et numero iste quidem superans ; at languida bello
Dextera . Threiciis congressus viribus impar
Quid Dacus , Pannoque , & Cæsaris arma pararent ,
Dicebat ; Venetûm egregios , pia bella , labores
Subtexens ultro , ac quæsitis plura rependens ;
Dalmatiam , Cretamque , volantesque æquore Francos

Auxilio, variaque frementem classe Zacynthon.

Tum Japonum addebat, Sinarumque ultima regna
Montibus ac scopulis, æternoque aggere circum
Vallata ; &, si quâ nativus deficit agger ,
Perpetuâ muros internectente coronâ.

Perfidus ut subitâ defecit labe, ruinam
Imperii traxit murus ; quâ prodita claustra,
Ultero avidum invitans reclusis finibus hostem.
Non expectato deprensa ignavia casu ;
Turbine correptum imperium : tot sceptrâ solutas
Effugere manus, victoris præda superbi :
Aurea jam Kamo Pequini regia servit.

Sic memorans, geminum solers errare per axem,
Lusiadum æquabat cursus, classesque Batavas.
Laudibus implebit, studiis quem jam occupat Orbem.

His actis, castro excedunt, tabulataque picti
Lata premunt pontis, Phœbique feruntur ad ortus.
Aggere constiterant medio : castroque sub ipso
Quattuor apparent sectæ discrimina vallis,
Quattuor ad ventos vastum porrecta per æquor,
Prataque, odoratumque nemus, latosque canales.
Arboris eximæ versu distincta quaterno,
Tergemina immenso excurrit via limite in omnem
Acta plagam. tantum nitidi jacer undique campi !
Tractu lyncea vis infano fracta resistat.
Longarum ingentes supremo in fine viarum
Termini, & insignes candenti mole columnæ.
Innumeros paribus spatiis atque ordine certo
Propugnantque, ornantque simul claustra, addita
pontes.

Portæ XI. fer-
reæ, opere pul-
cherrimo.

Ferrea tota virent, nisi quâ permiscuit aurum
Artificis non parca manus : virgataque gyro
Ludunt multiplici, & longo serpentina flexu.
Lævia per segmenta, & apertos undique chlatros
Transmitti faciles visus. florente metallo

Impendent, sparguntque comas operosa micantes
 Lilia. tum jaculis increvit cuspis acutis
 Suprà, infraque horrens : portæ latus armat utrumque,
 Projectique aditus intercipit objice ferri.

Defixum objectâ specie per singula Chlorum,
 Præsertim verso in Zephyrum per hiantia castrî
 Atria conspectu hærentem, procedere porro
 Admonuit ; lævamque petens, imposta canali
 Dux picturatæ subiit fastigia portæ.
 Belgicæ inumbratum patulis quod frondibus ulmi,
 Transversum carpit spatium, pratisque propinquo
 Succedit nemori. venatibus obvia passim
 Præda, feræ : nec Phasiacæ deest turba volucris.

Jam silvam ventum in mediam, quod lata bis-octo
 In centrum toto coeunt spatia undique saltu.
 Pratorum in gremio, totidem strata ampla viarum
 Par stellæ species radiato colligit orbe.

Orbem densa utrumque abies, Indisque petitæ
 Finibus intonsoque comantes vertice plantæ
 Circumstant, viridemque loco struxere coronam.

Hîc molles strepitant auræ, dulcique canoras
 Murmure aves questuque cient. frondentia tecta
 Ingenui vario persultant agmine Ludi.
 Et sua cuique vacat regio. Quàm longa palæstra
 Ferratō exercet tuditi versatile buxum,
 Ac valido tantum lusu calet ! ilice opaca
 Assurgunt latera, & ferventia tela retundunt.
 Certatim solidosque globos, animataque plagis
 Robora succincti pugiles truduntque, rotantque.
 Concussæ alterno responsant verbere silvæ,

Exin digressos campestris scena theatri,
 Pierioque æterna vocant viridaria ludo,
 Spectanti Procerum quondam gratissima turbæ.

Interlucentes ferro tum dividit hortus
 Contiguus valvas. fruticum lectissima silva,

HEROICON LIBER VI.

223

Reticuli implicitam nexus quam sustinet arei,
 Pomifero Autumno muros convestit apricos ;
 Autumnique ornant alienos munera menses.
 At latus adversum nitidis intexta columnis
 Ærea præcingit sepēs ; hortique perennes
 Delicias eadem clauditque aperitque tuendo.

Atque ubi quadrifidâ incurrunt regione viarum
 Transversi pulvilli , incurvatoque recedunt
 Margine lunati ; culto sese extulit arvo
 Artis apex, compacta globis, ferrique metallum
 Auro illusâ, micans, & conscia machina cœlo.
 Aurea fama super passis levis eminet alis,
 Ære cavo inflatas tollens ad sidera laudes
 Candeneri, claræque ferens insignia gentis.
 Aurea Candeneri rutilat summo axe corona,
 Vel dum nube latet Phœbus, dum nocte sepultus,
 Temporis expressura vices. Phœbumque sequentis
 Flos Clyties, Austrina poli suffixus ad astra ;
 Auratique orbēs, ac florum ex ordine gemmæ,
 Et cælata basis vertente inscribitur umbrâ :
 Umbrâ, quam cornu effulgens fera temperat aureo,
 Mitis ab ingenio Domini mansuescere docta.
 Horas cuique suas tot per loca dissita genti,
 Ac tempestates varias revolubilis anni
 Describit, festosque dies ; & quæ, hospita Solis,
 Ignea signifero regnent animalia tractu.
 Eternum cursorem, indefessumque laboris,
 Umbra pari Solem cursu sequiturque fugitque
 Tempore dimenso. Mortalem extendere vitam,
 Quæ volucrique aurâ trepidaque fugacior umbrâ est,
 Fama potens, Heroum Umbras in sidera transfert.
 Accedunt, hilaresque oculos per singula volvunt
 Chlorus, & astriferis agitans commercia regnis
 Vixque humiles plantâ stringens Honor alite terras.
 Curriculo in magno celeres quæ meta quadrigas

Sciothericum
 horologium
 insigne.

Sistat, agens retrò ; & versis quò tendat habenis
 Longa per arduos relegens vestigia campos,
 Justus & alterno brumam Sol dividat æstu.
 Qui lucem appendat tenebris, noctesque diebus ;
 Qui mediumve diem, aut gemini confinia mundi
 Signet, & objecto prospectum limite claudat ;
 Quive polo hinc atque hinc prætexat circulus axem :
 Cæteraque alloquio miscent, Hortumque peragrant,
 Stant triplices ferro portæ, splendentia claustra,
 Quà sublapsus hortus læto bibit ubere flumen.
 Atque hinc Euripo duplici & brevioribus alveis
 Castrenses lymphæ in fossas exercita cursu
 Commeat, & crebro Nymphæ plausere natatu.
 Istuc bisgeminis videas sub æquilibus altis
 Confluere, exortos septenis fontibus, amnes ;
 Et quem multifido trajecit Motha canali ;
 Et qui diversâ salientes parte maritat
 Hospes aquas, primumque subit juncto agmine limen ;
 Cœruleum hinc Ligerim affectans, Neptuniaque arva.
 Tramitis in medio, sternit se ponte canalis,
 Committitque ingens, castro qui præjacet, agger ;
 Tum ponte adverso connectit ruscida prata.
 Nec visus altæ castigans objice molis
 Ille quidem, venientium acies ut aperta lacessant
 Atria ; per mediam traluceat eminus arcem
 Planities metata solo, fugientia rura,
 Innubisque dies, convexaque cœrula mundi.
 Aggeris extremam ad frontem subsedit utrinque
 Areola : & muro assurgens, niveisque columnis
 Ferratos molli in chlatros sese induit umbrâ.
 Pomonæ hæc lætis opibus, lucoque coronans
 Insolito Floræ socialia regna, trecentis
 Citriaque arbutis ostentat, & aurea mala,
 Mala vel Alcidae manibus dignissima carpi.
 Non lucum Hesperii servat tutela Draconis,

Saxea sed Boreâ moles defendit acerbo.
 Centum illis variæ species, & nomina centum;
 Terrarum & longè diversis partibus ortus.
 Nec dubiæ nemo auriferum committitur auræ,
 Infidoque solo. septa intra lignea silvam
 Stirpibus infossam teneris, facilemque moveri,
 Ubere congesto tellus nutritque fovetque
 Fragrantem silvam; teretesque nitescere ramos
 Desuper, ac latas Soli dat pandere frondes.
 Nam tepido exponi gaudent peregrina sereno
 Arbusta, & gelido subduci innoxia cœlo.

Tecta receptandis, hiemant dum sidera, malis
 Inter, & officiis structas vernilibus ædes
 Area quadrato explicuit se maxima tractu,
 Assiduisque retrò stellantes floribus horti.

Parte ex adversa, posticoque aggere castrî
 Insinuant undis, cæcisque ambagibus errant
 Areolæ, buxo Cretæum imitante laborem:
 Et ductu alludit vario labyrinthus aquarum,
 Illimes, vitreas, tremulo splendore micantes
 Candida quas Nais per amœnos dividit agros.
 Purpureos nivei latices & marmora cynci
 Fluxa tenent; doctas mulcent concentibus aures.

Acribus interea alipedum resonantia passim
 Armentis, & prata nitent, & fortia equorum
 Corpora delectu longè quæsita superbo.
 Jam limen repetens Chlorus, præsepia ad alta
 Turmatim pasci & longo fremere ordine cernit
 Threiciofque, Afrosque; & quos circumflua Ponto
 Anglia; quos ventis genitos, aurumque bibentes
 Dives equum, dives fluviorum Hispania misit.

Omnia quæ postquam Chlorum per gaudia duxit
 Blandus Honos, vivaque implevit imagine MOTHÆ;
 Visa simul Dryadasque inter, facilesque Napæas
 Ferre Camœna pedem ac ridenti Gratia vultu,

Quæquæ aliæ sedem Nymphæ tenuêre superbam.
 Una omnes, Geniumque loci Chlorumque sequutæ,
 CANDENERI pariter nomenque decusque canebant
 Æternum, & laudes surgentis ad æthera Nati :
 Nec voto inferior patrio, nec sanguine avito
 Degener, ingenii celebres miracula * Picos
 Reddere jam aggressus, Fortunam ut vincere discat
 Virtute ; & raptim sublustri visus in umbrâ
 Nuper ut attonitæ in se oculos converterit Aula.
 Obstupuit ; Geniique hortatu accensus amico
 Incessit pars ipse Chori, Dominosque Domunque
 Advena concelebrat, summoque attollit Olympo
 Jampridem tacito meditatæ pectore grates.
 Cantantem dux afflat Honos, Mothæaque pergunt
 Ambire officiis comitatæ ad limina Nymphæ.

* Silvia, Comit-
 tis Randani
 (nunc Duca-
 tûs titulo infi-
 gnita Randana
 virgo est) &
 Fulviæ Picæ
 Mirandulanæ
 Filia, Candene-
 rici Avia.

D E

CLARISSIMO ERUDITISSIMOQUE VIRO
 JOANNE VERJUSIO

CUM EJUSDEM POSTHUMUM OPUS
 PANEGYRICI SACRI

Fratrûm curâ in lucem prodiiissent.

F A L L O R, an ætherio volitat delapsus Olympo
 Et Famæ nova cura Liber, nova gloria Suadæ,
 Rorantes inter gemmas & lilia densâ
 Mistæ rosâ, puroque inscriptus volvitur auro ?
 Regia Musarum, veterisque Lutetia Romæ
 Æmula, divinum pignus, cœleste volumen
 Doctorum accepit Procerum gratante Senatu.
 Quam variæ arrident facies ! quam splendida floret
 Gratia, & augustis rerum miracula visis !

O dignum Superis munus, nataliaque astra
 Insolito referens habitu Liber ! omnia Cœlo
 Picta nitent, clarumque ostentant omnia Numen.

Hîc formâ primùm exoritur pulcherrima Virgo ;
 Qualis fatidico, silvarum gloria, Vati
 Jescâ radice procûl se attollere visa,
 Mystica Virga sacrum sublimi vertice Florem
 Edidit, æternùm vernans, nullo aspera nodo :
 Insignem ante alios florem, passimque decoris
 Purpureum maculis, niveoque tenerrima lacte
 Candentem folia ; & miseris præsentia terris
 Auxilia in Stygias lætum diffundere pestes.
 Ambrosium latè populis spiravit odorem,
 Unicaque extinctam reficit Panacea salutem.
 Et placidâ veniens aurâ, longèque volucres
 Ante alias dio spectanda Columba nitore,
 Virgineo flori patulis superincubat alis,
 Et dulci illæsum demulcens pondere firmat.

At belli signum, ecce, novi fatale coruscat
 Regnator, ligno domitum qui vindicat orbem,
 Morte sua vincens, & adactas sub juga gentes
 Sanguine pacifero lustrans : Mundique Tyrannum
 Deturbat folio, ac flammato carcere frænâ.
 Lucifugi trepidant hostes, revoluta barathro
 Agmina : sollennesque Cruci molita triumphos
 Fulmineum extollit cœlo Victoria robur :
 Aligeri ductam antevolant per nubila pompam.
 Scilicet & lethi spoliis Orcique superbos,
 Clara triumphales agitans Facundia currus,
 Ipsaque cœlestis pompæ pars magna, triumphat.

Jam rutila quantus properat Legatus ab aula,
 Idem oleam gladiumque ferens ; in utrumque Minister
 Delectus pariter, bellumque indicere Averno,
 Atque iterum, antiquo discissam crimine, pacem
 Jungere terrigenis, & non violabile fœdus !

P iiij

*x. Paneg. de
 Nascete Virgi-
 ne.
 Egredietur
 Virga de radi-
 ce Jesse &c.*

*Panegy. in
 Crucem.
 Ejus Victoria
 ac Triumph.*

*In D. Paulum;
 Christi Lega-
 tum.*

Principis haud melior mandata efferre supremi,
 Quam gerere ; & sanctas factis consciscere leges
 Sedulus, & cœli terris imponere morem.
 Naufraga ter maria, & crepitantis verbera nimbi
 Saxeæ, vulnificosque expertus corpore fasces ;
 Opprobriis clarus, media inter vincula liber,
 Publica devotus certæ velut hostia morti,
 Paulus hic est, Christi quem vis comitata per omnes
 Terrarum excurrit populos. Sapientia mentem,
 Corda infedit Amor ; tonitrusque in verba secuti.
 Commisus chartis spirat cœlestibus ardor :
 Divinæ resonant æterna oracula vocis.

In S. Matthæi
 (qui & Levi
 nominatus)
 Christi vocem
 telonio relicto
 securam.

Parte alia, vinclorum aurata volumina cernas,
 Splendidum onus, traxisse, & iniquo pondere frangi
 Leviaden, mille implexum præcordia nodis.
 Curarum audiri strepitus, ac semper hiantis
 Improba avaritiæ suspiria. Rumpe tenaces,
 Infelix, nexus ; Christus jubet. Ille potentem
 Difficiles inter sonitus magnæque tumultum
 Fortunæ, vocem arrectis simul auribus hausit,
 (Mirandum !) simul ille animis : gravibusque solutus
 Continuo curis, & avaræ transfuga vitæ
 Arduus exiluit ; nec mollia jussu vocantis,
 Calcatis audax opibus, nudamque secutus
 Pauperiem, jam spe regnandam præcipit æthram.

De S. Augusti-
 no.
*Quasi Ignis
 effulgens.*

Tu quoque magnificam, Aureli, fers, inclyte Præsul,
 Laudem opere in tanto : liquidoque simillimus igni
 Effulges, totumque illustras fervidus orbem.
 Omnia doctrinæ pervasit splendor, & umbras
 Dispulit errorum ; Manichææ insomnia noctis ;
 Quidquid Donati, quidquid delirat Arii
 Perfidia, & vario Pelagi fallacia flexu.
 Castus Amor, vivamque trahens à Numine flammam,
 Crimina purgavit lacrymis, æstusque profanos :
 Christicolis vastos Pietas operosa labores

Nunc quoque inextinctis præbet fulgoribus ardens.

Sed quid ego Indigetum longo præconia cantu
Singula confector ? Sanctæ decora omnia turbæ
Pagina, & inclusum, quantus patet, æthera sistit.
Huc sanctus repetit Genitor : per magna priorum,
Quà via sacra tulit, celeres vestigia natos
Acribus urget agens stimulis, validaque coronæ
Objectæ illecebrâ ; mollique per aspra locorum
Sublevat hærentes dextrâ miseratus alumnos ;
Et non degeneres immenso amplexus amore,
Imperii heredes patrii locat ipse volentis
Primigenæ in folio, fraternoque addit honori.

Nunc & viva subit patriæ felicitis imago,
Relligiosa quies, placidisque silentia septis.
Ceu fixa Isaciæ quondam tentoria genti,
Finibus avectæ Phariis, Erythræaque longè
Trans freta & Arabiæ vastas sitientis arenas.
Strata solo circum, & nimbis famulantibus acta,
Mira seges. dux certa viæ, fidissima nubes,
Pervigil & flagrante diem supplere columnâ,
Pensilis arcebat rapidos umbella calores.
Ordinibus descripta suis, distinctaque castra
Agmine bissero steterant, laudata vel hosti,
Aligerum excubiis, manifesto & Numine septa.
Balami ante oculos terrori mixta voluptas.

O nemora ! ô pingues riguis in vallibus horti !
O Libani juga picta perenne-virentibus herbis,
Et nitidi fontes, & roscida fontibus antra,
Ubere mellito doctæ mollescere cautes ;
Et vos, quæ terram pedibus servare coactæ,
Æthera formoso prensatis vertice cedri !
Quas ego delicias, quos Relligionis honores,
Dulciaque infantis legi spectacula vitæ,
Sidereas tædas, & virgineos hymenæos !

Nimirum hæc doctis manantia gaudia chartis,

P iiij

In Sanctos
universos.
Sancti estote
&c.

(Qui viceris,
faciam cum se-
dere tecum in
throno meo.
Apoc. c. 3.)

De vita Reli-
giosa Panegy-
rici tres.

Quam pulchra
tabernacula
sua, Iacob &c.

Et valles ne-
moroſæ, ut hor-
ti juxta flu-
vios &c.

Hæc sancti decora eloquii, clarissima Divûm
 Lumina, Verjusi, toto circumfluus æstu
 Numinis, & pleno largus jam corde refundis.
 Æterni suggesta premis radiantia templi
 Orator sublimis ovans; & debita, palmas,
 Præmia, facundæ gestans pietatis honores.
 Altiùs & Superis dudum vox nota perorat,
 Cœptarum pertexere amans præconia laudum.
 Inque vicem augustâ Superûm laudante coronâ.
 Nec tamen hæc inter, depressa in valle relictos
 Et nimium damni memores, oblitus amicos,
 Egregio constantem animum sensusque priores
 Pignore firmasti, magnæque interprete mentis,
 Suavia demissò exercens commercia Libro.
 Credimus? an tumulo assurgens super ætheris auras
 Reppetit Autorem fetus? tacitique reclusis
 Musæi latebris, prodit sub nocte jacentes
 Suadæ reliquias & digna encomia Cœlo?
 Hinc decus immortale viget, sacroque superstes
 Personat eloquio Francas Verjusius oras.

Nil favor hic peccat populi, gratisque redempta
 Fraudibus insincera libros quæ Gloria clarat;
 Et nitidâ illusos specie, cultuque superbos
 Crebra fovens, nugis pretium felicibus addit.
 Illum adeo Natura parens, illum aurea nutrix
 Congestis certatim opibus donisque beatum
 Vindicat Ars Genium: & studiis concordibus ambæ
 Scriptorem, curisque librum socialibus ornant.
 Quot lita luminibus, quam pulchris ignibus ardens
 Vis penetrat blanda eloquii, sensusque animosque
 Occupat illecebris, perque intima pectora regnat!
 Hic solido nervi cum robore; nec minùs, aptâ
 Temperie, florentis honos & gratia formæ,
 Materiæ cœlestis opus. neque prodiga luxu
 Diffluit, aut usu satiat corrupta voluptas.

Palladium Pitho qualis dominata per arcem,
 Infedit tereti linguæ, non illa decorem
 Ingenium fuco & placitis violata venenis.
 (Ceum, male bracteolas phalerasque induta crepantes,
 Splendida quæ turbis Suadellæ arrisit imago,
 Ingenii stricturâ & acutis frigida vibrans
 Fulguribus, gestitque operoso dædala ludo,
 Dulcibus & vitiis animos titillat inertes).
 Mollitiem unguentis madidam muliebribus odit;
 Sed pugilum ritu, atque oleo nitet uncta palæstræ.
 Nec verò (aspersâ ut sordet luctator arenâ)
 Asper inhorrescens, & quo schola pulvere ferveret,
 Squallidus ingreditur placidas orator ad aras.
 At quanto se Marte ferens, Academica bella
 Gesserat; & sacro spectatus ritè Lyceo,
 Sorbonicas lauros, primæque insignia laudis,
 Ipse suos, major titulis, decoravit honores,
 Jam gravis in viridi meritis Verjusius ævo!
 Doctrinæ immensum omnigenæ si respicis orbem,
 Secula Nestoræ fingas decursa senectæ.
 Ille tamen, Latiae quidquid Græciæque Minervæ est,
 Complexus, tot vasta virum monumenta, tot artes,
 Singula quæ totam longâ studia ardua vitâ
 Nec tardam impediunt mentem; nova, prisca, profana;
 Sacra, sinu collecta ferens, immanè capaci
 Cuncta aggesta sinu & cumulo inconfusa bonorum;
 Vix quater octonos annorum expleverat orbem.
 Atque illum, jam inde à puero, miratus, & altæ
 Vim surgentem animæ & Clari juga Montis amantem,
 Musarum ipse parens, doctrinarumque, Petavi,
 Sidus, ubi alterius spectas orientia Phœbi
 Lumina, primævoque tui tantum instar alumno.
 Et jam tum memores populorum evolvere fastos;
 Et quis cuique color veterum, quæ vena, suamque
 Ingeniis formam & certæ discrimina vocis

Adhuc puer,
 cum operam
 litteris daret in
 Collegio Cla-
 romontano S.
 J. admirationi
 fuit magno Pe-
 tavio.

Assignare potens; jamtum scripta edere tiro
 Visus erat, sua quæ curæ maturus & ævi
 Plurimus optarit & non inglorius autor.
 Mox juvenem Historici quoties, Mystæque salebris
 Impliciti, dubiaque malignæ lucis in umbrâ
 Consulere aggressi, & libris coluere dicatis!
 Vos ego, felici quoscunque admiserat usu,
 Aonii flos alme Chori, vos conscia testor
 Pectora, queis lucem toties affudit honestam
 Verus generosus amor. quanquam ipse recessum
 Maluit, & doctos latebris mandare labores.
 Quantum inhians sequitur vulgus, famam ille refugit
 Instantem; ac merito sese subduxit honori,
 Involvitque libris, solidæque incumbere laudi
 Prudens, & vanos populi contemnere plausus.
 Idem Aulæ speciosa animo juga ferre subactio
 Fortiter ignarus, byssoque prementia & auro
 Vincula, amicitiasque graves captare Potentum.
 Quin etiam sponte adspirans dum crebra Favoris
 Aura virum, placidique vocat pellacia ponti;
 Non malesuada virum species & gratia fallax
 Marmoris æquorei, non mobilis aura Favoni
 Constantem a fido valuit deducere portu.
 Ille quidem suavi ingenio componere frontem
 Blanditiis aptus, nec duos fingere mores;
 Si quidquam addictâ pro libertate pacisci
 Sustineat, nulli docilis servire magistro,
 Contemptu sublimis opum, sublimis honorum.
 Sed neque Pieriæ tantum indulgere quieti
 Aut vocali operæ natus; rebusque gerendis
 Fortè impar, strepitum horruerat, turbamque morantē.
 Misceri externæ si quando turbine sortis
 Contigit, obsequioque negotia versat amico;
 Strenuus ingentes ingenti pectore curas
 Explicat, usque suus: dulcesque revivere Musas

Impatiens, Pindo emeritus se condidit alto ;
 Et famæ parcens committere facta loquaci,
 Invidiam elusit pariter laudemque remisit.

Hoc erat, hoc dignâ tripodum quod voce sonabat.
 Felix, qui tacitam Mundi turbante theatro
 Personam gessit Sapientis, inania rerum
 Despiciens, casusque animo supereminet omnes !
 Sanctius effatum, delatamque aethere legem
 Nobilis intonuit sacrata ad pulpita præco :
 Et flatus premere, atque in se subsidere iussit
 Christicolas ignotâ humiles virtute profanis.
 Quippe Deum ultricemque manum intentare superbis,
 Munificamque ultrò summissis porgere dextram ;
 Dejicere elatam, dejectam attollere mentem.

Panegy. in
 Humilitatem.

Sic præeunte Deo cecinit, cum templa teneret
 Flammeus Orator. nec scenæ publica virtus
 Servierat ; linguam nec dissona vita refellit :
 Obvia quæ passim cordis fœdissima & oris
 Dissidia, & dictis stupeas pugnantia facta.
 Stabat Verjuss, non ulli obnoxia larvæ,
 Ac longè insanos exosa modestia fastus
 Naturam imbuerat penitus, vitamque regebat,
 Innumeras ornans, dotum gratissima, dotes.
 Inter Apollineos, lectissima pectora, cœtus
 Dispensare sagax lucem, furtimque docebat
 Discenti propior , paulatim arcana benignus
 Quærendo elicere, atque aciem suspendere mentis.
 Nequicquam ardentes latebrâ certastis, Amici,
 Excutere indignum tenebris , & promere in auras.
 Perpetuâ circum nebulâ seque ipse, suosque
 Sepserat ætherio fraudatos lumine partus,
 Ah ! durus nimium Genitor : populosque Patresque
 Frustratus ; sua regna, Lyceum, Helicon, beato
 Divitis ingenii censu fraudabat avarus.

At quascunque tenax & iniqua modestia vitæ

Librorum celarat opes, mors æqua retexit.
 Posthuma jamque usu cœpit splendescere gaza.
 Nec magis hæ Divûm, si fas est dicere, laudes,
 Quàm tua, Verjusi, præconia, cujus apertos
 Vivida profiliens Pietas Doctrinaque fontes
 Consecrat, & valido quæ lactea copia jactu
 Emicat in Cœlum ; nimboque relapsa sereno,
 Jam melior, jam nectareos imbuta saporos
 Cœlicolûm, terræ sitientia proluit ora.
 Haud secûs & vestra, eximii, præconia, Fratres,
 Publicaque officia, & Germano reddita famæ
 Præmia, quem superas redivivum effertis in auras.
 Pergite, cognatos queis fas censere labores,
 Pergite, dum Famæ hic rapitur plaudentibus alis,
 Doctam operum seriem & longam producite pompam.
 Jamdudum incensæ studiis, votisque vocanti,
 Nobile portentum patriæ debetis & orbi ;
 Ingens exemplum, jubar adspectabile seclis.
 Prodeat, & nullâ scriptorum parte sepultus
 Pervolet ora virûm ; jam totum reddite fratrem.
 Primitiis arrecti animi. Præcepta sequantur
 Orandique Artes præmissa Encomia Divûm,
 Auribus exceptam pronis, justoque favore
 Gallorum celebrem & notam super æthera Suadam.
 Quin & Romuleis Marci dignissima Rostris
 Perlegimus ? Patriæque pater, vindexque sacrorum,
 Qualia jam Lodoïcus ovans monimenta recepit,
 Maximus & Regum, Regum & sanctissimus Heros.
 Ite alii ex aliis libri. quid Epistola cessat,
 Seu Francas spirans veneres, Thuscosve lepores,
 Seu Latium antiquum referens, Romæque voluptas ?
 Orbe quid angusto pulchrè collectus Aquinas ?
 Quid, quæ Concilium in magnum, sanctique Senatûs,
 Christiadûm cuncto delecti ex Orbe Senatûs,
 Consultis meditata super, claræque Tridenti

In D. Ludovi-
 cum Regem
 Paneg. Latinus
 &c.

Historiæ ductus ? heu grandibus invida cœptis
Sævities morborum, & inexorabile fatum !

Sed propria incessit vates acuitque cupido,
Quæ patriis cantata modis, cantata Latinis
Verjusi, manibusque arrepta oculisque fruendi.
Ille autem sævo moriens addixerat igni
Carminaque & docti pariter genus omne laboris;
Scilicet extremam queis importuna vetabat
Sors adhibere manum, tenuesque abstergere nævos.
Sic quem olim Vatem divinâ carminis arte,
Mox eundem rigidâ censuræ lege secutus.
Publica sed veriti peccare in commoda Fratres,
Ac cineri prolem indignam miscere paterno,
Legem audent & jussa viri rescindere iniqua.
Funereo prærepta rogo spolia ampla tuentur ;
Vindicibus curis orbique ævoque laborant.

Hæc Patriæ, hæc illis solatia mortis acerbæ,
Æterni decora ingenii. Quam rara supremo
Munere tergemini conspirat gratia Fratris ,
Dulces partiri curas, operumque labores !
Ille, vicem accelerans extincti implere clientis ,
Purpureo sacrata offert monimenta Patrono ;
Fraternis ex quo vivum jubar allinit umbris.
Præclaræ effigiem mentis, studiique magistram
Insoliti speciem, latebrosæque intima vitæ
Facundo præfixa operi mirantibus offert
Fratrum alius ; majora fide, veroque minora
Concinere, & meritis gaudens succumbere tantis :
Plurima commendat quem, fallere nescia, testem
Religio ; Naturæ opulenta Artisque supellex
Insignit scriptorem, ac gemmeus eloquii fons.
Autori laus ipse tamen certissima, laudes
Inscriptus Superûm, & summo Liber æquus Olympo,
Astrorumque flagrans radiis auroque coruscus.
Nec minus & reliqui, dudum quos Fama reposcit ,

Vivaces fetus & pulchro sanguine digni,
 Jam sacram exornent, opera immortalia, cedrum.
 Hic te adeo, Lodoice, vocat labor : hæc tibi cura
 Præcipuè incumbens, fidos instigat amores
 Orba fovere sinu fraterno, ereptaque cladi
 Pignora magnifico dotata educere sumptu.
 Terrenis cessere opibus, Cœloque morantur,
 Quâ licet, ac mundo sese abjunxere profano,
 Qui Fratres superant gemini, te clara vetustas
 Verjusi columnen generis respectat, & ampli
 Nominis heredes ventura in secula mittet,
 Vindice te, Proavûmque altos cumulabit honores.
 Liligeram sedem, Themidis sublimè tribunal,
 Infedere alii ; tantis & Curia princeps
 Præsidibus latè Parisinâ ex arce clientes
 Per populos sua jura dedit, longeque tremendo
 Armavit gladio regalem in crimina libram.
 Virgineis alii templis (quæ maxima genti
 Cæstarum, & lectis delubra augusta Ministris
 Sequana obit) Regum Dominæ Matrique Tonantis
 Addicti, sanctæque illustres munere sortis,
 Doctrina & pietate graves. Mystasne renarrem,
 Crebra Matisconis sacro quæ lumina cœtu
 Effulsere ? genus censu cùm ritè superbo
 Mystarum, antiquos & nobilitatis honores,
 Lugduni in morem solita explorare Matisco.
 An, quos militiæ (Templi dum nomine clarus,
 Barbariæque armis invictus floruit Ordo)
 Adscriptos Equites, titulisque insignibus auctos,
 Fortibus egregios factis, longinqua tulere
 Secla, tuo jantum celebratos nomine dicam ?
 Et stirpis laus ampla tuæ, qui strenuus olim
 Auroram petiit sacris Verjusius armis,
 Dum sceptro Indigetis Lodoïci Francia cœlum
 Tangeret. Imperiû curas arcanaque fido

Henricus Ver-
 jusius à Bal-
 duino Imp.
 Constant. mis-
 sus ad S. Lu-
 dovicum Re-
 gem Franciæ.

Gestans ille sinu, Byzantinique Minister
Augusti, Francas rediit Legatus ad oras.
Virtutemque Artemque probans, Henricus Eoa
Occiduaque idem pariter spectatus in aula est.

Quo propiora sequar versu, cultusque Parentis
Eximios ? multâ ingenii quos arte lepores
Imbuit ? assiduo felices munere curas
Dulcibus impensas Natis, seu fingere linguam,
Seu mentem à teneris ; Naturæ ingentia cœpta,
Virtutumque satum latos absolvere mores ?
Te decorant generosæ Artes, primisque sub annis
Lyncea vel summis habilis Prudentia rebus.
Finitimos tereti suspendas plurimus ore,
Nec peregrina sonans, populos ; & civis haberi
Communis linguâ evincas. Aulasque superbis
Ritibus inter se adversas dextro inclytus usu
Concilians, uno libatas undique dotes
Pectore, nec solito contractas fœdere jungis.
Principibus quæ jura, tenes, quisve ambitus, & quas
Spes animis foveant ; quo se omnia cardine vertant.
Verùm intacta Fides, magnisque exercita fatis
Virtus, & claras cumulans insignior Artes,
Europam meritis, famâ complectitur Orbem.
Nunc & fraternæ spargis cum semina laudis
Sollicitus, longoque sequaces agmine libros ;
In studia & curas Germano impensa redundat
Hæc, Lodoice, tuas, & mutua gloria surgit.

Verjusi Manes, si quid mortalia tangunt
Vos decora, æterni felices luminis aurâ ;
Officiis gaudete piis, Fratrumque supremis
Muneribus dignas læti persolvite grates.
Ac dum ingens certat vatum Chorus ultima dona
Congerere, & lauros tumulo depangere sacras ;
Ne properante manu sparsos contemnite flores,
Candida quos Pietas & fratribus æmula jactat.

LEONARDI FRIZON
CAPUT JOANNIS
IN DISCO.

Hoc crudelitati ferulum debebatur...

*Intuere, Rex acerbissime, tuo spectacula digna
convivio &c. Ambrosius lib. 3. de Virginiis.*

HE u geniale nefas ! heu diri mensa Cyclopis !
Sanguine quis latices, cædem miscere choreis
Instituit, Vatisque impendere fata Tyranno ?
Funere Natalis colitur : Veneremque secutæ
Exultant Furia, facibusque incendia junctis
Conglomerant. Timor, Ira, Dolus miscentur in unum.
Nata procax, incesta Parens, concordibus ambæ
Grassantur studiis ; optatum in munere crimen
Dimidio anteferunt regno : suffragia cædis
Fert saltatricis fautor conviva puellæ.
Concilium infelix, & cui se nulla probarit
Insontem Virtus ! Bacchantigrata catervæ,
Auræa quæ tumido gestit lascivia cultu.
Crispa comam, fucata genas, simul ore renidens,
Limis & vibrans oculis, fractoque per artem
Ludere docta gradu ; molles muliebribus armis
Insidiisque viros & lubrica vertere corda
Gaudet ovans, victrixque obscænâ regnat in Aula.
Corruptis inhiant animis ; blandoque puellam.
Murmure, discumbens stratis fulgentibus agmen
Prosequitur : ludoque Herodes præmia dicit,
Quæcunque audaci conceperit improba voto.

O temere promissa fides, jurataque dona !
Mendax religio, & sceleris velamen inane !
Flagitii pretium est facinus. Flos ille pudoris,
Flos Baptista virum, cœlestique editus ortu,
Famossæ cadit arbitrio : manibusque protervis

Augustum

Augustum data præda caput, lacrymabile ferclum.

Nempe tuæ caput hoc cœnæ, Teterrime Regum,
Debetur, fumanſque cruento à carcere miſſus :
Et liſtore agitas convivias digna miniſtro.
Jam tragicæ illatum menſæ, quò, Barbare, feſtis
Infatiata epulis crudelia lumina paſcas.
Conſcius inſtructi ſcleris, fraudiſque nefandæ,
Quin ſcenam ficti removes larvamque doloris,
Ac tacito malè preſſa ſinu nova gaudia prodis ?
En age, quid cellas ? immitem porrige dextram :
Sævities ne quâ fraudetur parte, cruoris
Purpureâ nectar digitos intermicet undâ :
Et cùm nulla ſitim ſpumantis pocula Bacchi
Haſtenus explerint, totis agè faucibus hauri
Baptiſtæ abſciſſo calidum de vertice flumen.
Inviſos, en, cerne oculos, infamis Adulter,
Dedecoris certos media inter funera teſtes.
Nec verò extinctas acies vis ferrea lethi ;
Sed magis averſos orbes tua, fœde, voluptas
Clauſit : & objecti conſpectu ſaucia luxûs
Involvère gravi ſeſe pia lumina nimbo.

Quamvis inſano circumſremat ebria plauſu
Turba virûm, gratata nefas ; diſcumque cachinno
Feralem excipiat, ſalibuſque aſpergere certet :
Ultrix ipſa ſui Mens conſcia ſæviti, amarus
Inſigens penitùs ſtimulos ; laceratque flagello
Impia Tartareo cœcus præcordia tortor.
Ut tremis ! ut pavitas ! ut te fugis ipſe, tuumque
Nequicquam, Herodes, facinus ! cæſa ora, ſacrique
Horrificant vultus. Divinæ oracula Vocis
Ecce tacent ; & adhuc cœleſtis fulmina linguæ
Permetuis ! pœnas occiſo judice, demens,
Speraviſti eluſas, ſtratoque Heroë triumphos ?
Inſtat adhuc, graviuſque tuos obturbat amores
Cenſor, & intandum vocali ſanguine crimen

Q

MOSIS ELOGIUM

EX CAP. XI. EPIST. AD HEBRÆOS

à versu 23. ad 29.

Fide, Moyſes
natus, occu-
tus est à Paren-
tibus ſuis, eo
quod vidiffent
elegantem in
fantem, & non
timuerunt Re-
gis edictum.

FORMOSUM Amramus puerum, Jocabedaque
conjux

Ut vidēre, Fidesque animos formidine preſſos
Erexit; Pharii ſpreverunt juffa Tyranni
Barbara, ſollicitique infantem aluere parentes,
Ægypti in cladem natum, populique ſalutem,
Quem Deus eximio jamnunc ſignaret honore.

Flumine ſublatus Moſes, atque inſitus Aula,
Fortunam in magnam Regiſque ad ſceptra vocatus;

24 Fide moy-
ſes, grandis
factus, nega-
vit ſe eſſe filiū
filiae Pharaon-
is.

25 Magis eli-
gens affligi cū
populo Dei,
quam tempo-
ralis peccati
habere junc-
ditatem.

26 Majores di-
vitiis æſtimans
theſauro Ægy-
ptiorum, im-
properiū Chri-
ſti, aſpicebat
enim in remu-
nerationem.

Mox tamen, ²⁴ ut plenis adolevit conſcius annis,
Corda Fide egregiā firmans, probriſque gravatos
Iſacidas repetens, natam Pharaone parentem
Ultro abjuravit, ſpes contempſiſſe ſuperbas
Magnanimus. ²⁵ conſorſque Piorum indigna ferentum
Maluit extrudi ſolio, quam gente profanā
Gaudia miſcere; & falſi ſe nominis umbrā
Splendidus oſtentans, Phariā dominarier Aulā.

²⁶ Scilicet oblato gazæ Memphitidis auto
Opprobrium antetulit Chriſti, ſordesque ſacratas;
Præſago quem jantum animo cernebat egentem,
Nudatum, indecorem; noſtri quando exiit illum
Mirus amor, patrioque opulentum abjecit Olympo;
Pauperie ut placitā, probriſque immanibus emptos
Theſauros Superūm, & Cœli cumlaret honores
Terrigenis, proprioque heredes ſanguine regni
Scriberet ipſe ſui, atque aternā ſorte bearet.

Tanta, Fide arrectus, ſpectabat præmia Vates.

27 Fide reli-
quit Ægyptū,
non veritus

Inde pedo ſceptrum, deſponſaque regna ²⁷ Canopi
Exilio mutare libens, Madianis in arva

Concessit, rediitque animis cœlestibus auctus.
 Horribilem sævi expavit nec Principis iram,
 Abramidûm Vindex ; assertam compede gentem
 Ductor agens, jam totâ Ægypti mole premendus :
 Vel cùm terrificas rapiens per aperta quadrigas
 Fulmineus Pharaô, totque agmina quadrupedantum
 Cominus urgerent Erythræi ad littora Ponti.
 Certus inaspecti responso Numinis ibat,
 Ceu Domini coram fulgentia cerneret ora ;
 Promissum, nec spe dubiâ, discrimine summo
 Auxilium expectans ; ²⁸ & jam graviore periculo
 Defunctus, dirâ quando sub nocte satellites
 Numinis, ultrices Ægypto exprompserat iras.
 Quippe Fides sacris communem avertere cladem
 Instituit, mediis cæso in penetralibus agno :
 Cujus ut affuso signatos sanguine postes
 Primigenûm latè Vastator viderat Ales,
 Limina transfiliit sancto defensâ cruore,
 Hebræum innocuæ vetitus se immittere genti.

Alma Fides ²⁹ pelagi mortalibus invia plantis
 Reclusit spatia, & ficcô dedit ire profundô,
 Arentis quo more soli calcantur arenæ.
 Ut solido adstantes hinc atque hinc marmore muros,
 Undosos inter cumulos fugientia duxit
 Agmina mille virûm, Mosemque Deumque secuta ;
 Et turbam imbellem, materna ad pectora pressos
 Aut lateri hærentes pueros, tenerasque puellas.
 Ast easdem tentare vias, & non sibi apertos
 Cum Phariis ausum Pharaona irrumpere fines,
 Unâ omnes Erythræ absorpsit spumantibus undis
 Immensum, & populo & Regi commune, sepulchrum.
 Fatalis Virgæ imperium Sinus audit : & quâ
 Vi steterant tumefacta, repentè in se alta residunt
 Equora, purpureoque minantes aggere fluctus
 In medium evolvunt collapsis molibus alveum.

Q ij

animositatem
 Regis. Invisi-
 bilè enim tan-
 quam videns
 sustinuit.

28 Fide cele-
 bravit Palcha
 & sanguinis
 effusionem; ne
 qui vastabat
 primitiva, tan-
 geret eos.

29 Fide tran-
 sierunt mare-
 rubrum tanquã
 per aridam ter-
 ram. quod ex-
 perii Ægyptii,
 devorati sunt.

1870
1871
1872
1873
1874
1875
1876
1877
1878
1879
1880
1881
1882
1883
1884
1885
1886
1887
1888
1889
1890
1891
1892
1893
1894
1895
1896
1897
1898
1899
1900

1870
1871
1872
1873
1874
1875
1876
1877
1878
1879
1880
1881
1882
1883
1884
1885
1886
1887
1888
1889
1890
1891
1892
1893
1894
1895
1896
1897
1898
1899
1900

1870
1871
1872
1873
1874
1875
1876
1877
1878
1879
1880
1881
1882
1883
1884
1885
1886
1887
1888
1889
1890
1891
1892
1893
1894
1895
1896
1897
1898
1899
1900

LEONARDI
FRIZON

E SOCIETATE JESU

POEMATUM

PARS SECUNDA,

THEANDRICON LIBROS TRES

COMPLEXA

TOTIDEMQUE PATHENICON.

ERUDITO LECTORI.

Quod in primo totius operis aditu statui, splendide cum Poësi Christianis argumentis convenire; id sanè tibi, Lector Erudite, persuasum confido; tum verò sententiam hanc nostram in Theandricis maxime Parthenicisque valere; quibus nihil aut esse aut fingi possit, vel ad majestatem augustius, vel ad elegantiam suavius, vel ad varietatem copiosius, vel ad motum omnem accommodatius. Quare pauca tantùm hic admonebo: ac primum Ομοροίαν passim à Grecis Patribus vocari divinam humane assumptionem naturæ. Sic autem inscripto carmine præcipua quæque capita sum complexus, in Theologia scholis tractari solita de Incarnatione; sed ita subactis mollitisque difficultatibus, vix ut sentiantur. Quanquam hominibus Theologia non initiatis apertiora, quæ sequuntur, expeditiusque decurrenda videantur Poëmata. Ceterum omnia singillatim persequi ad Christum spectantia, nec rerum amplitudo, neque angustia temporis ingeniique patitur. Primo quidem carmine Theandrica res universa conglobatim prospicietur: ac deinceps, ad Christi necem, quæ præcipuo sunt Ecclesiæ cultu consignata. Cruciatu Posthumæque mysteria libro secundo, Effata VII. suprema tertio referentur. Jam quadam ex professo, & quasi ore pleno canuntur; brevius, atque ex occasione, aliis alia intexuntur, nec modò Theandricis Theandrica, sed etiam Parthenicis, ob summam Filii Matrisque conjunctionem. Suus quoque & Theandricis & Parthenicis hexametris quartus est liber subjunctus in tertia parte lyricus. De Parthenicis nonnulla speciatim suo loco exponentur.



THE ANDRICON

LIBER I.

SACRA OECONOMIA
SIVE
HUMANÆ A DEO NATURÆ
SUSCEPTIO.



IVINI series arcani, & mysticus
ordo

Jam tandem evolvit sese, visusque
tremendis

Mortales adytis castosque humiles-
que receptat.

Imperiosa Fides, captivæque ardua Mentis
Obsequio insultans, sublustri nubis amictu
Septa viam juxta stetit; admovitque flagrantem
Lampada, & umbrosos docuit penetrare recessus.

Quâ duce sublimes infert Sapiëntia gressus,
Tota Deo suspensa, & inenarrabile pleno

Ore agitans Numen. clarum hinc nomenque decusque

Q iiij

1. Corinth.
c. 10.

Theologia.

Alma gerit. Pindum supra, supraque Lyceum
Emicat in Cœlum, Naturâ major & Arte.

Nec tacitis contenta modis, propriasque tuendo
Pascere delicias ; mox & cœlestia terris
Visa refert : fructusque altæ monimenta que curæ
Dividit in geminum chartis resonantibus axem.
At non hîc, solito argutæ de more catervæ,
Grandia sensa rudi per humum sermone trahentis,
Cum strepitu & rigido pugnam ciet aspera ferro.
Hîc placida, excussò rixosî pulvere campi,
Incedit, solidoque adamante nitentibus armis.
Splendida Jessèi affectat vestigia Regis,
Enthea pleçtra sequens ; teque, ô clarissime Prosper,
Prosper Aquitanæ soboles & gloria gentis,
Totque, ævo meliore, Patrum capita alta recenset,
Magnifico pulchrum studio meditata laborem.
Talibus exemplis accensum afflare clientem
Gestit ; & ipsa viam, cultus induta sacratos,
Læta præit, viridem cedro è Libanitide raram,
Nexaque coccineæ foliis redimicula vittæ,
Temporibus dat circum ; & inexplicito labyrintho
Cœruleam ætheriæ pallam inscripsere figuræ.
Dextræ insertus honos, miris liber undique circum
Effulget signis ; niveique apparet imago,
Sed roseus cum lacte cruor quam diluit, Agni.

Sic tenues inter nimbos, vibrantiaque astra
Arrisit diæ species objecta Magistræ,
Utile jucundo miscentis, forte decoro.
Illa polo delapsa, gravemque ad sacra Camœnam.
Ducit ovans, sentesque docet florescere acutos.
Agglomerant sese ardentes, operique ministrant
Permistis Charites Geniis, pictique Lepores :
Et superadveniens Pietas , medioque coruscus
Agmine fervet Amor, rutiloque opus imbuît auro .
His accincta choris, grandes Sapia curas

Molitur, linguâque ciet dextrâque laborem ;
Seu calamo, seu voce refert spectabile Numen.

Jam Natum, ætherii gremio folioque Parentis
Summissum in terras, commercia nostra petentem,
Exequitur : jam consilii causasque modosque
Digerit ; humanæ concessa piacula proli,
Juraque muneraque, & rerum miracula passim
Siderei adventum Regis testata per Orbem.
Pulsa superstitio, simulacraque vana Deorum
Strata solo. Crux Cæsareis imposta coronis ;
Crux aris elata ; Crucem Capitolia adorant ;
Devictusque, jugo subiit post aspera Mundus
Prælia, & invalido potuit Dux agmine Christus
Proterere insanas vires, animosque superbos,
Et cultus rigidos sanctorum imponere morum.
Undique purpurei generoso sanguine Testes,
Nube velut factâ, condenso examine fulgent,
Qui populorum alacres Regem Regumque Magistrum
Pulchra canant, Fidei auctorem, per vulnera JESUM,
Christicolûm arbitriis vertique regique fatetur
Natura, & nutus sensit venerata potentes.
Vix Domini audito tremefactæ nomine pestes
Diffugiunt : trepidis horrescunt Tartara monstis :
Corporibusque atri cessere animisque Tyranni.
Debita quæ Christo conversi præmia Mundi,
Pignoraque, antiqui celebrarunt carmine Vates.

Secula tu revocans, sanctæ Regina palæstræ,
Excutis Abramidûm fastos, oracula pandis ;
Præcipuè incensis pulsanti sidera votis
Quæ responsa Viro prænuntius edidit Ales,
Fatorum Interpreter Gabriel ; signatâque CHRISTI
Tempora, septenos implexis orbibus orbes.
Judæo sceptrum generi rum denique raptum
Cum patrio venit demissus ab æthere Vindex,
Gentibus expectata Salus, longumque gementis

Christi adven-
tum & divini-
tatem in Ju-
dæos & Gen-
tes probat mû-
di conversio
&c.

Daniel. 9.
Hebdomades
LXX.

Gen. 49.

Compede sub Stygia miseræ spes publica Terræ.
 Heu cæcæ Ifacidum mentes ! heu saxeæ corda !
 Hostili præsentem odio vexare Theandrum
 Supplicioque ausi, cælestia dona ferentem.
 Ut diram ulcisci properarint omnia cædem ;
 Tot sceleris culpasque simul, pœnasque sequaces,
 Excidium Solymes, augusti incendia Templi,
 Exilia, errores, furias, genus omnia in unum
 Fulmina torta refers, & non placabile Numen.
 Væ dignis, quos ipsa Salus damnetque prematque
 Exitio ! nempe ancipiti discrimina Christo
 Fecere ; inque suam vulgo vertêre ruinam,
 Quem Natum Genitor relevando addixerat Orbi.

Luc. 2.

Ortus Christi
 non suspensus
 ab Adami pec-
 cato.

Quanquam inconcusso venturum haud feciùs Orbe
 Tradis, Adamæo nec tantum à crimine munus
 Invectum, aut nostræ supremum gentis honorem
 Funesti accitum opprobrio lapsuque Parentis.
 Quippe Deo, æternis meditantî sæcula curis,
 Christi primus amor, rebusque hæc causa creandis
 Maxima. certe operis meruit præstantia, & omnes
 Unius in laudem suasit procudere formas.

Coloss. 1.

Ioan. 1.

Hunc Superis, hunc Terrigenis Finemque Caputque
 Omnipotens statuit : pulchrorum exempla petita
 Hinc operum ; ex illo ducta omnis Gratia fonte,
 Gloriaque, huc pleno refluens exercita cursu.
 Fœdifragi ne quid se insania jactet Adami
 Rerum incremento, & sacros sibi vendicet ortus :
 Cui non se, ille gerens hominem Deus, at sua debet
 Uulnera & indignas mortali in corpore pœnas.
 Primigenam ante omnes voluit Pater edere fœtus.

Deiparæ Vir-
 ginis immuni-
 tas ab origina-
 lis etiam pec-
 cati debito.

Hinc adeo & Magnæ decus inviolabile Matri
 Afferis, & cunctæ removes contagia noxæ.
 Fatali exclusam pacto, Monstrique priorem
 Letiferi aspectu, conjunctam Prole Parentem,
 Rite doces. Charitum effuso sic munere plena,

Primitias Nati ex meritis tulit aurea Virgo,
 Præcepfitque suos fructus. ita Numinis alti
 Digna Parens, nullamque trahens ab origine labem,
 Non tenuem nævum, aut invisi criminis umbram;
 Undique perfecta, & maculæ Sponsa in scia prorsus
 Enituit; nivæ in speciem formosa Columbæ.
 Hæc quondam cecinere Patres : mox ille Tridenti,
 Christiadum insignis collecto flore, Senatus
 Annuit : exortemque sonant Oracla Puellam,
 Confuso exceptam primævæ Mortis acervo.
 Nec verò, antiquis superaddita jura, novasque
 Pro MARIA leges, Tarpeiaque fulgura Summi
 Parcis Alexandri, & tonitrus agitare minaces.
 Illustrem, & Mundi nactam suffragia causam,
 Sidera nec dubiis firmant quam conscia signis;
 Auctaque multiplici Dominæ sollennia cultu,
 Communes Matri ac Soboli defendis honores.

Bisgenitum augustâ Unigenam quis origine narret?
 Seu quâ, Luciferi ante ortus, exordia mundi,
 Supremum Genitor sanctæ inter lumina mentis
 Eloquitur Verbum; seu quâ Sponsam almus obumbrat
 Spiritus; afflatuque pii fecundus amoris,
 Virgineo tenerum fingit de sanguine corpus.
 Nec fetum ille rudem, vulgi de more, Parentis
 Concrefcentem utero paulatim excudit & aptat,
 Formam operi bruto inducens. simul omnia summi
 Expolit Artificis manus, ornatamque beato
 Sedem animo, penitusque illapso Numine complet.
 Hospitio neque successit Deus advena, ut aulæ
 Infert se Princeps. major proprio incola tecto,
 Parsque opifex operi ipse suo se innectere gaudet.
 Unus stat naturâ & simplex duplici Christus.
 Quippe Deo effultus, jam non suus, inque Tonantis
 Sortem adscriptus Homo, & jura in meliora redactus.
 Quæ spatio immenso disjunctas. fibula formas

Cantic. 2. 4. 6.

Constitutio Pon-
 tificia Alexan-
 dri VII. pro
 immaculato B.
 Virginis con-
 ceptu.

Verbi æterna
 generatio.

Christi produ-
 ctio; Naturæ-
 que illius hu-
 manæ, singula-
 ris atque ex
 omni parte mi-
 rifica efforma-
 tio.

Divina Hypo-
 stasis.

*Cum in forma
Dei esset...
formam servi
accipiens.
Philip. 2.*

Conseruit? Verbo corpusque animamque revinxit?
Terrificos nexus, & inenodabile vinclum
Solerti venerans tentat Sapientia dextrâ,
Et docto adnitens, quâ fas, animosa periclo.

*Decorum in
illa quoque ab-
jectione, assu-
mendisque na-
turæ mortalis
defectibus ser-
vatum:*

Inde alia ex aliis sacrorum arcana moventur:
Naturam ut fragilem nova per connubia Verbum
Adscivit; largâ veniens cum dote, vicissim
Quid segetem in meriti, ac varios Soteris in usus
Suscepit? quid, multa Deo cum indigna subiret,
Respuit illæsi probris ratio alma decori:

Quæve tenuis valuit decrescere, nil vice rerum,
Nil mutata habitu Majestas, semper eâdem
Sede manens, damni impatiens, haud indiga lucri.

Funditus Erroris nebulæ, vestigia Culpæ
Absunt, & pigro deformes agmine Morbi,
Defectus membrorum, orisque inamabilis horror.

Nulla intus fœdo conjurat turba tumultu:
Non illi, subitam rapiens in Fomite flammam,
Mollibus illecebris aut extimulata Cupido,
Injussâ aut brutis erumpens motibus Ira.

*Tranquillitas
Christi cum
agitatione vo-
luntaria:*

Ipse potens dominusque sui, laxatve premitvæ
Christus agens animi faciles cælestis habenas,

Invitâ nil mente ferens. Discordiæ imago
Si quando alternis surrexit turbida curis,
At pugnâ in mediâ Pax & Concordia regnat,
Infera dum superæ cedit paretque voluntas.

Isai. 53.

Externâ quid non idem vi passus acerbi?
Hanc quoque vim tulit ipse volens, avidusque dolorû.

*Beatitas ani-
mæ cum tristi-
tia & dolore.*

Insolito adversas componit fœdere partes;
Delicias animæ felicitis, & ubere Cœli
Ambrosio saturæ; mœrorem & cordis amarum,
Letiferum, horrendum, ac laceros tormenta per artus.
Ah! sensum fugiens, tacito subducta receptu
Arcem in tranquillam Mentis, divina Voluptas
Hæret summo apice; & liquido prius agmine torrens

Copia lætitiæ ruere in præcordia cessat ;

Nota vel exilis stillæ solatia parcit.

Ceu, quem prævalido frænarunt objice moles,

In se annis redit, & varios tumet actus in orbes.

Aur (propiora loquens, miro ut miracula facto

Josue 3.

Equiparem) arcanâ veluti compressus aquas vi

Jordanis stetit, inque caput revolutus, & altos

Plurimus undarum in cumulos montesque coactus,

Sustinuit sese ; atque educto gurgite in auras,

Ipse agger sibi marmoreus, nudoque pependit

Inferiore alveo, siccamque fefellit arenam.

Nunc agè ; quo tandem implicitæ concrefcere nodo

*Libertas cum
impotētia pec-
candi.*

Discant, & pactis socialibus oscula jungant

Splendida Libertas, & nulli obnoxia culpæ

Conditio, jamque aspectu dignata beato

Numinis, æternumque immobilis ? undique tutæ

Advigilat custos animæ, connexa Dei Mens.

Nec minus intereâ, patuit quâ limes Honesti,

Partem in diversam licuit se flectere Christo.

Curriculo in primo, atque inapertâ Virginis alvo,

Filius æterno æquævus comparque Parenti,

Hebr. 10 & 12.

Ingrediens, biviæ adstiterat capita æmula vitæ,

Arbitrio subjecta. Oblatos sprexit honores,

Gaudia, opes : ignominiam, sordesque, Crucemque

Arripuit ; medioque receptam in pectore legem

Figere amans, mandata libens graviora peregit,

Nec veniam exposcens facilem, nec jussa moratus.

Exorare Patrem, Cœlique educere castris

Matth. 26.

Fulmineas acies potuit ; sua vertere fata,

Et quæ circumstant vario discrimina casu ;

Indictæ proferre diem, aut accersere mortis ;

Delectuque operis placito, finisque decori,

Promerita aggerere, & fas immortale pacisci.

Sic, quanquam patriâ moriendi lege tenetur,

Ultro animam ponit CHRISTUS, seque immolat ultro.

Joan. 10.

Misericordia
cum iustitia.
Psal. 84.

Theandrica
merita.

Communica-
tio idiomatica.

Hebr. 2.

Sap. 8:

Ephes. 1.

I, latebras scrutata, Deique immane profundum;
Perge, aliam refeca litem, Sapientia : & aptum
Libera postquam intra gyrum dimensa Facultas,
Dein geminæ inter se certantia jura Sororis
Concilia. Cœlo hinc niveis Clementia bigis,
Purpureo hinc Astræa venit super obvia curru,
Virtutum & Charitum circumvolitante catervâ.
Quæ, miserante Deo, quàm justa piamina Christus
Solvat, & impenso pretium scis dicere dono;
Immensum pretium, haud ullo reparabilis auro,
Terrarum quo asserta Salus, Gentisque redemptæ.
Scilicet hanc divina viro consortia præstant
Vim meriti. Naturæ humili conspirat amicè,
Totum operi infundens numen, præsentia VERBI.
Qualis ubi insitio silvestrem callida truncum,
Impositis oculis docilem mansuescere, vertit
In melius, jussitque novos sobolescere fœtus;
Miratur socios peregrinæ frondis honores,
Lætaque felici crescens arbuscula ramo,
Et jam conjugio blandos imbuta saporos
Eminet in cœlum, nemoris decus atque voluptas.
O Terræ, ô Cœli commercia ! protinus ambæ
Uno impermixtæ coalescunt corpore partes.
Sol vili adstringens sua condit lumina limo :
At testæ, inclusus, radiis jubar allinit aureis.
Ergo humana Deus patitur ; nascique morique,
Ætherei cives infra dejectus Olympi,
Sustinet : angusto redimitus honore vicissim,
Ac Superis prælatus Homo divina capeffit :
Subjectumque ciens orbem, non ille locorum
Limitibus, rapidique arcetur finibus ævi.
Cuncta simul ; pictâ quæ quondam in veste ferebat
Textilibus simulata modis, majoris & ipse
Pontificis simulacrum, & Christo prævius Aron ;
Cuncta in se, nec fictum & inani pondere Mundum;

Colligit instaurata Deique Hominumque Sequester.

Et Reus & Judex, idem, Patronus & Actor;

Rex, Famuli squalens habitu; pariterque Sacerdos

Victimaque, æternam letho peperisse Salutem

Terrigenis gaudens, ablutâ sanguine noxâ.

O Amor! ô Virtus, atque inconfusa Potestas!

Cetera quid relegam decorum fastigia longo
Carmine pervolitans, fecundaque semina laudum?

Magnificas latè dotes, atque inclyta Christi

Nomina, Legiferique novi, Vatisque Magistrique,

Acribus & curis, & duro gesta labore?

Tam varias rerum facies, opera ardua, necdum

Aligeris sat nota Choris gentique beatæ?

Dum loquor; en, volucrum sonitus haurire rotarum

Hic videor, stellantum oculis, & fulgure opaca

Nubila rumpentum; quales Euphratis ad undam

Obtulit attonito spectandas Gloria Vati,

Implicitasque sibi pennisque ardentibus aptas,

Intus agente Deo, & sanctas animante Quadrigas,

Queis Victor domito subvectus in Orbe triumphat.

Varia Christi
munia.

Ezech. i.

S. August. lib.
i. de consens.
Evang.

BETHLEMIUM

STABULUM.

DUM chorus Aligerum bipatente effusus Olympo,
Pastorumque manus, Regesque Oriente vocati

Bethleo accelerant Stabulo, cunasque jacentes

Certatim votisque colunt, donisque frequentant;

Vos quoque mirandi læta ad spectacula partus

Ire decet, Vates; Parnassi horrentia saxa

Exosos, natale Dei succedere in antrum.

Huic Phœbea Claros, Pataræaque regna filescunt;

Fallaces tripodum pressere oracula Delphi.

Hunc Solyma, arcanis cæli gens conscia fati,

Prodidit, ac totæ Superûm sonuere cohortes.
 Et vos afflatâ propiûs jam Numinis aurâ
 Heic canite ; & viridi festa inter carmina lauro
 Spargite adoratam, Bethleamalia, rupem.
 Omnia Bethleam cedent miracula laudi.

Regifico sese luxu picta efferat Aula,
 Parietibus census populorum induta superbis ;
 Arduaue extremo devectas orbe columnas
 Tecta premant, Libanique arbos & Hymettia tigna :
 Textilibusque auri radiis, crebroque pyropo
 Stellati faciem referant laquearia mundi.
 Explicet illecebras, mollique nitentia fugo
 Gaudia mille trahens, toto licet ore Voluptas
 Rideat, inversumque effundat Copia cornu ;
 Atria Majestas teneat, niveasque curules
 Purpureis insignis Honos circumvolet alis.
 Contrâ informis Hiems, nimbosos aspera vultus,
 Et glacie hærentes nivibus conspersa capillos,
 Ac rigidus Boreas immansuetusque December,
 Quæque super stipulam laceris jacet obsita pannis
 Squallida Paupertas, & acutis ora querelis
 Exercens Dolor atque oculos tristi imbre resolvens,
 Præsepe obsideant : flatus tamen Aula remittat ;
 Elatumque supercilium cristasque coruscas
 Persica Bethleam summittat Regia sedi.

Porphyrogen-
 netis.

Contextas ebena cunas Indoque elephanto
 Cæsaribus struxit Fortuna, Erythræque lapillis
 Distinctas varique ardentes luce metalli ;
 Improba quas Nutrix undantes murice versat
 Ambitio, sceptrisque operosa crepundia fingit.
 Splendida sed vincit longè incunabula nudum
 Præsepe : & vilis baccata monilia vincit
 Fascia, lacteolum quæ circum amplexa Puellum.
 Suavius enituit stramen violæque rosæque.
 Sordibus æternos jam relligionis honores

Allinit,

Allinit, augustoque sacrat Deus omnia tactu.
 Felix ô stabulum, felix, quod prætulit altis
 Adibus Herodis, Romanisque arcibus Infans !
 Felices, Tyrio, panni, quos prætulit ostro !
 Atria Bethleis cedent Salomoniam caulis.

O stabulum, jam non stabulum, sed Regis Olympi
 Hospitium, templumque Dei, specus æmula cælo !
 Virginei Rex ille gregis, nive purior Agnus,
 Heic tener, ah ! duro nimium stabulatur in antro :
 Confectas macie & vastis erroribus actas
 Agnus oves tuto revocans Pastorque recessu
 Subjicit ambrosiam saturis præsepibus escam.
 Atque idem rabidosque lupos avidosque dracones
 Vicit, & ima fugâ trepidos sub Tartata adegit.
 Non ita Jessides, ursum puer atque leonem
 Hædorum in morem fortis laniare, Giganti
 Prælusit, sceptroque pedum mutare paravit.
 Bethleo cessit Davidica Turris Ovili.

ApoC. 14.

Creta Jovem latebris, materni conscia furti,
 Foverit ærisonos inter Corybantas alumnus
 Oleniæ venerans capræ, Idæoque Tonantem
 Ad superas antro mendax eduxerit arces.
 Criminis inde satus, secundaque secula probri :
 Seu claram, gemino reptatam Numine, Delon ;
 Seu Baccho insignes, insignes Hercule Thebas
 Fabula decantat, vanos & consecrat ortus ;
 Ac nimium Patri similes culpamque per omnem
 Sectatos famosa Jovis vestigia Divos.
 Majorem, extrusâque Deum farragine densâ
 Haud fictum cæli Dominum, rerumque potentem
 Virgineus pudor & patriæ lux candida Mentis
 Progeniuit, seculi Autorem melioris, & Orbi
 Ardua virtutis dare natum jura Puellum.
 Bethleo Latium decedet Pantheon Antro.
 Promissi jam olim Ducis alto à sanguine Judæ,

Principis æterni solium, infantisque Magistri
 Sella humilis, Præsepe, Deique ignobilis Ara !
 Ad te Custodes ovium, lætissima turba;
 Ad te munifici veniunt terno agmine Reges,
 Suppliciterque ferunt stellantibus oscula cunis;
 Aurea dejectis advolvunt sceptræ coronis.
 Inclyta Bethleo Capitolia cedite saxo.

Undique Luciferi primo surgentis ab ortu
 Usque sub extremum cæli revolubilis axem
 Concurrunt populi : nec Gymnosophista moratur
 Memnonias gentes, Druidum nec pulpita Gallos.
 Socratici lugent deserta umbracula * Cycni.
 Audit uterque Orbis Bethlei oracula Verbi,
 Delapsæque adstant supremo ex æthere Mentis.
 Nec me fiderei tantum concentus Olympi,
 Quantum humilis rapiat teneris vagitibus Infans.
 Attica Bethleæ concede Academia Mandræ.

* Platonis:

Non ibi ventoso bullas Stoa turgida fastu
 Jactat, & arguti pugnax sonat ira Lycei.
 Cœlestis latet obducto Sapientia velo,
 Et tacitâ cor voce petit : vagitibus ardens
 Bethlei Infantis Pitho divina perorat.
 Nil mutum in stabulo : vocaliaque antra beatam
 Pauperiem & stultos mundi pereuntis amores,
 Felices ignominias, suavemque dolorem
 Pannique stipulæque docent, tremebundaque membra.
 Romula Bethleæ decedite Rostra Cavernæ.

Quale satellitium magna ad prætoria noctem
 Pervigilans, decus ac tutamen Principis, omnes
 Circa aditus vallo telorum effulget ahenis ;
 Aut quales nitidam penetralia ad alta cohortem
 Purpurei agglomerant Procures, soliumque coronant :
 Dulcibus excubiis tales pulcherrima curas
 Heic agitans, rutilis Custodia flagrat in armis.
Castra hæc illa Dei. Sed opis non indiga, & ipso,

*Castra Dei sūt
 hæc. Gen. 32.*

Quæ Puer omnipotens infedit, Numine tuta,
 Spelæa officio celebrans exercitus ales
 Cælituum, cantuque sacro festoque volatu
 Lustrat, & ambrosios radiis permiscet odores.
 Te Romana olim solenni altaria cultu
 Suscipient, & longa colent per secula gentes,
 Prima apparentis statio, Præsepe, Theandri !
 Mox, simul humanos, opera haud mansura, labores
 Extremi abstulerint ignes ; cælestia templa
 Sidereamque petes, Superis vectantibus, * Aram.
 Cedite Bethleæ Solymæa Sacraria Cellæ.

* Signum cæ-
 leste.

Namque homini partæ monimentum illustre salutis
 Transcribet cælo Deus, in medioque locabit,
 Astrorum stipante globo : ligna arida latè
 Ætherio florens accendet Circulus auro.
 Cedet & Europæ vector, mala fabula, Taurus
 Bethleo sua regna Bovi, volucerque rudenti
 Bethleo Quadrupes. medium hæc Præsepe gemellâ
 Sidera servabunt flammâ, radiosque perennes
 Splendida cœruleis pascent Animalia campis.
 Lumina Bethleo concedite Olympia Signo.

AUGUSTISSIMUM

JESU NOMEN.

SUB cultro tener est Agnus : jam prima cruoris
 Libamenta offert ; demissum ex æthere Nomen
 Hoc redimit pretio, tantisque paciscitur orsis.
 Non umbram ingentis tituli gesturus inanem,
 Humanæ implebit Nomen fatale Saluti.

Josephus, grassante fame, sibi credita regna
 Frugibus expromptis (multò quas antè repostas
 Struxit acervatim prudens, Augurque futuri)
 Sustinuit ; populo Nilum supplevit alumno.
 Nunniades Phariis deserta per invia terris

In Circumci-
 sione.

Eductam Isacidûm gentem, felicia castra,
 Hostibus eripuit, propriâque in sede locavit,
 Quam Deus Abramio generi desponderat oram,
 Mellis, & irrigui præpinguem munere lactis.
 Clarus uterque ipsâ magni vel nominis umbrâ;
 Tum reliqui, patriam oppressam, duroque gementem
 Servitio, quicumque armis victricibus olim
 Asseruere jugo; & latam peperere salutem.
 Verùm incerta Salus, paribusque objecta periclis
 Contigerat. nam sæpe jisdem mox casibus actos
 Spes nova destituit, pacisque brevissimus usus,
 Cùm miseros alii ex aliis traxere Tyranni.
 At meus hic plenas Jesus mortalibus affert
 Vindicias, non quæ unius se limite gentis
 Contineant; nec quæ peritura in corpora tantum
 Expromptam, clausamque angusti finibus ævi
 Sævitiem avertant, recidivaque fata morentur.
 Principe ab hoc populos it Gratia fusa per omnes;
 Corporibusque animisque virûm præsentia pellit
 Exitia: immitis vincla omnia rumpit Averni;
 Et jam terrigenis amissâ in jura repostis
 Cœlicolûm optatâ dat libertate potiri.

O Jesu augustum et mundo venerabile Nomen,
 Omnia cui prisci concedant nomina fastûs,
 Et quæ Cecropidis & quæ jactata Latinis!
 Huic, æquata solo disjectis oppida muris;
 Huic, populata armis regio, imperioque subactæ
 Famosum gentes atque illatabile nomen,
 Vocale spoliûm ac titulum tribuere sepulcri.
 Non sic parta malis hominum atque immanibus empta
 Cladibus exornant divinum insignia Regem;
 Gloria sed proprio venit quæsita dolore.
 Nuntius hoc superi Gabriel genitoris ab ore
 Exceptum, magnæ retulit sub Virginis aures;
 Mox etiam, ut Sponsum dubiis exolvere curis

Venit, inassueti prodens mysteria fētūs,
Magnifici causam subjecit nominis Ales.
Servator populi, deletō crimine, Jesus
Dicetur, sanctūque feret super æthera Nomen.
Sic Gabriel : studiisque, pii quocunque secuti,
Nominis egregii merita in præconia certant.

Quōd Cephas inopem Solymæi ad limina templi
Haud expectatâ Claudum stipe donat, ut ægrum
Surgere, firmatoque jubet procedere gressu ;
Quōd morbi genus omne fugat : vi Nominis actum
Testatur summi ; haud alio miracula fonte
Profluere. Hoc terris Cœloque Ereboque verendum
Assiduè cantat Præco trans sidera raptus.
Nec librum, Aureli, quondam sâpuisse fateris,
Cujus nulla sibi præfixêt pagina JESUM.
Hæc adeo, Hyblæo vox nectare dulcior, & quo
Gemmati Hebræos lactavit adorea roris.
Bernardus, fandi cui mellea copia, testis,
Nominis effuso latè fragrantis olivo
Dum celebrat decora. Hinc duri fomenta doloris,
Hinc pugilum vigor, hinc pinguissima pabula luci.
Rite coronatum radiis micat undique Nomen,
(Quale sacer primū suggestu Orator ab alto
Spectandum effinxit populis, castèque colendum)
Discutit & Stygiæ tetram caliginis umbram,
Martyribusque animos invictæque robora præstat.

Ignatî (postquam Romanâ expositus arenâ
Procubuit senior, Libycorum præda leonum)
Dissecto carum, ut memorant, sub pectore pignus
Aureus exhibuit sanguis. radicibus illis
Altus amor toties repetiti Nominis hæsit.
Et nobis penitus sacrum ac memorabile Nomen
Dius Amor, non ille quidem flavente metallo
Insculpat, pulchrum & visu mirabile monstrum ;
Ignatî sed quo alterius fortissima inussit

S. Bernardinus
Senensis.

Corda, salutiferum vivo signum exaret igni.

Haud alio certè signatam Nomine baccam,
Emerita ingenti postquam stipendia bello
Prostratique hostes caloque invec̃ta trophæa,
Crediderim sanctæ Christum promittere genti,
Candentem & puro florentem lumine baccam.
Scilicet hoc palmare datum est ex omnibus unum,
Tessera supremæ, Nomen, pignusque Salutis.

EPIPHANIA.

De Christo Regum Rege
Cultuque à Regibus exhibito
Prophetici Psalmi LXXI.

METAPHRASIS.

1. **J**USTITIÆ Legumque parens, Deus Optime;
Regem

Rege satum, cui jam rerum concessa potestas,
Providus imperii justos effingere ad usus,
Exemplis compone tuis; rectique sequacem
Numine agens, sceptris æquas da jungere lances;

2. Legibus & sacris populum frænare clientem,
Judicioque inopem turbam recreare benigno.

3. Suscipiant placido delapsam ex æthere Pacem,
Et reducem Astræam submisso vertice colles.
Bella procul, scelerisque procul genus omne faceſſat;
Concordeſque homines Divis lætentur amicis.

4. Nempe humili Princeps gaudet jus dicere vulgo:
Ac, si quem oppressum scelerata calumnia vexat,
Conteret artificem sceleris, fraudemque refellet.

5. Dum Sol alternos & Luna recurret in orbes,
Stabit postgenitis clarus, regnoque vigebit
Æterno: labem nec mobilis afferet atas.

6. Ille etiam folio sese demittere ab alto
Gaudebit, facilis, tacitoque simillimus imbri,

PSALMUS LXXI.

Inscriptus quidem à Davide Salomoni,
sed Christi personam gerenti,
verè Pacifici, Optimi, Maximi
Regis ac Regum Principis.

1. **D**eus judicium tuum Regi da, & justitiam tuam
filio Regis.

(Christus in Evangelio passim Filius David, Regis Filius in parabola, Rex antomastice dicitur. ac de ipso Gabriel ad S. Virginem; dabit illi Dominus Deus sedem David Patris ejus Luc. 1.)

2. Judicare populum tuum in justitia, & pauperes tuos in judicio.

3. Suscipiant montes pacem populo, & colles justitiam.

4. Judicabit pauperes populi, & salvos faciet filios pauperum; & humiliabit calumniatorem.

5. Et permanebit cum sole & ante Lunam (quamdiu Sol & Luna extiterint) in generatione & generationem.

6. Descendet sicut pluvia in vellus, & sicut stillicidia stillantia super terram.

(Communis est Patrum, ipsiusque adeo Ecclesiæ interpretatio de Verbi per Incarnationem divino in Virginis uterum descensu; cujus mysterii figuram gesserat vellus illud Gedeonis mirifice irroratum. lib. Jud. c. 6.

Quod hîc distinctius, quàm in ipsa Metaphrasi, consultò Prophetica integumenta non prorsus evolvente, libuit exprimere)

Ceu liquidæ nubis gremio defluxit aperto

Velleris in nivei lanam purissimus humor,

Cum sacra Cœlituum jussis excitus ad arma

Expetiit fidei Gedeo mirabile pignus.

Nec pretium, conchæ illapsus, ros gemmeus aquet.

R iiii

7. *Orietur in diebus ejus justitia & abundantia pacis, donec auferatur Luna.*

(Perpetuitas extremis verbis significatur. nec verò id particula, *donec*, futurum infert, quod ipsi particulae subjungitur)

8. *Et dominabitur à mari usque ad mare; & à flumine usque ad terminos orbis terrarum.*

(In Metaphrasi, cum figuræ servierim, ut suprà indicavi, Prophetæ succinens duntaxat, neque enucleatius mysticum sensum exposuerim: hinc sententiam, prout Salomoni congruit, arctiorem; prout Christo applicatur, plenissimam numeris explicavi Poëticis)

Nec breve Erythræo describet gurgite regnum,
Internóque mari; & fecundo Euphratis ab amne,
Ægypti ad fines, Rivique * ignobilis oram.

Sed spatium ingentis, quodcunque habitabile, terræ
Imperio implebit: pelagusque adjunget Eoum
Oceano Hesperio; Tanaique à flumine tractus
Æthiopum extremos longè lateque patenti
Comprendet ditione potens, Rex omnibus idem.

* Rhinocor-
ra.

(Primis versibus regni limites Salomonii complexus, reliquis amplissimum orbique penitus æquale summi Regis imperium Christi designavi, sumpta è veteribus Geographis dimensione terrarum)

9. *Coram illo procident Æthiopes; & inimici ejus terram lingent.*

10. *Reges Tharsis & Insula munera offerent; Reges Arabum & Saba dona adducent.*

(Tharsis, id est, maris, potissimum Orientalis, sive Insularum, quibus & plurimis & maximis mare illud confutum est. Et quidem ab Oriente profectos adoratores Christi Magos Evangelica testatur historia. nec sanè desunt, qui Regem ab ipsa proprie dicta India censeant

Vellus ubi substratum & mollia terga bidentis:
 Aut ubi manantes declivis ab imbrice tecti
 Terra bibit stillas, & gramine læta virefcit.

7. Illius auspiciis pulchro exorietur Olympo
 Justitia, & felix mansuræ copia Pacis;
 Donec cœruleæ noctis Regina bicornis
 Axe revellatur, supremum passa laborem.

8. Bisgemini regnum pelagi protendet ad oras,
 Magnoque extremum à fluvio telluris ad orbem.

9. Confessi Dominum Æthiopes in pulvere coram
 Procumbent, pedibusque hostes capita ardua subdent;
 Lambentque ore solum & Christi vestigia prono.

10. Jam myrrham Æquorei Reges, Regesque Sabæi
 Thura dabunt, procūl innumeris advecta camelis,
 Munera digna Deo. 11. totoque ex orbe Tyranni
 Numen adorabunt: gens omnis serviet uni.

12. Scilicet abjectæ plebi insultare potentem
 Non feret; auxilioque inopem præfente levabit:

13. Nedum onera imponet cervicibus asper egenis,
 Indulgens miseris ultro: pœnasque remittet,
 Servabitque animas. 14. Fœnus dissolvit iniquum,
 Oppressos redimens, immanique ære gravatos.
 Quin vulgo exosæ pretium mirabile * Christus
 Dicit egestati, divinosque addet honores.

* Salomonem
 attingit Chri-
 sti nomen ob
 unctionem re-
 giam.

ad Christi cunas advenisse)

11. *Et adorabunt eum omnes Reges terra ; omnes gentes servient ei.*

12. *Quia liberabit pauperem à potente ; & pauperem, cui non erat adjutor.*

13. *Parcet pauperi & inopi ; & animas pauperum salvas faciet.*

14. *Ex usuris & iniquitate redimet animas eorum : & honorabile nomen eorum coram illo.*

15. *Et vivet , & dabitur ei de auro Arabia , & adorabunt de ipso semper : tota die benedicent ei.*

16. *Et erit firmamentum (frumentum , Hebr.) in terra , in summis montium ; superextolletur super Libanum fructus ejus : & florebut de civitate sicut fœnum terra.*

17. *Sit nomen ejus benedictum in sacula : ante solem permanet nomen ejus.*

(Ante, id est, coram, ut v. 5.)

18. *Et benedicentur in ipso omnes tribus terra : omnes gentes magnificabunt eum.*

19. *Benedictus Dominus Deus Israël , qui facit mirabilia solus.*

20. *Et benedictum nomen majestatis ejus in æternum : & replebitur majestate ejus omnis terra. Fiat , fiat.*

Subjicitur hæc Psalmo epigrâphe ;
Defecerunt laudes (sive hymni ; aut, ut vertit Hieronymus) Complete sunt orationes David filii Jesse.

15. Ipse hominum vitam accipiet, peregrinaque dona.
 Concurfu ardebunt gentes, sollennia vota
 Arabiæque aurum regali advolvere cultu,
 Fausta que perpetuâ gratantes laude precari.
 16. Montibus in summis, perque arida saxa nitefcet
 Lata seges ; Libani silvas transcendet aristis.
 Florebitque Sion, cives complexa beatos,
 Ut picturato ridentia germine prata;
 Regis opus, formosa Sion, Regumque creatrix.
 17. Pacifici celebrent augustum secula nomen.
 Immenfus quàm-Sole-diu lustrabitur Orbis,
 Inclyta Progenies manet, æternumque manebit.
 18. Ex illo ventura Salus : populosque per omnes
 Semper honore novo, semper celebrabitur aris.
 19. Gratia Abramigenûm Domino : miracula solus
 Edidit Omnipotens, alieni haud indigus unquam
 Præsidii. 20. Illum omnes linguæque animique perenni
 Laude colent : terram Majestas tanta replebit.
 Hæc mihi certa fides ; i votorum hæc summa meorum.
 Jæssidæ voces, meritatum in præmia laudum,
 Deficiunt ; digitos nec jam audivêre seniles
 Nablia. Sic vitam juvet absumpsisse canendo.

TRANSFIGURATIO.

*Nemini dixeritis visionem, donec Filius hominis
 à mortuis resurgat. Matth. cap. 17.*

*Non enim doctas fabulas secuti..... sed speculato-
 res facti illius magnitudinis &c.*

D. Petri Epist. 2. cap. 1.

L U D I T E mutatis aliena in corpora formis,
 Phœbeï Vates ; nugæque agitate profano
 Carmine bullatas, & inania somnia veri,
 Nocte supersticio Stygiâ quæ plurima finxit.

Me Christi nova forma, & lumen amabile vultûs.
 Siderei, puræque nivi rapit æmula vestis.
 At tu, Divinæ Princeps venerande Cohortis,
 Tu, Thaboris spectaclum ingens nubemque coruscantem
 Et Christo visos adstare per æra Testes,
 Petre, refer. tibi enim gemino cum Fratre tueri
 Fulgentes Domini vultus, vocemque Tonantis
 Audire, & memori concessum est scribere sæclo.

Postquam à morte redux, clausasque ingressus in
 aëdes,

Illuxit Christus Sociis; visuque beato
 Golgotheâ abstersit conceptum è clade dolorem:
 Jam non mortalis, mortales inter agendi
 Parciôr, abscessit post gaudia prima suorum.
 Ergo septa domo, sacra penetralibus aula
 Continuit sese, Solymûm formidine, turma:
 Ceu quondam in stabulis, pastore absente, tremiscit
 Grex ovium, circumque lupis ululantibus horret.
 Illic fortè pio curam sermone levantes
 Ac desiderium Christi, dum facta recensent
 Inclyta, & ante necem dulcis prædicta Magistri:
 Ecquid (ait Domino ante alios Carissimus omnes)
 Ultra præscriptum Thaboris decora alta filemus,
 O Cepha: exhausto surrexit funere Christus.
 Tum verò Socii, quæ sint mysteria porrò,
 Atque hunc atque illum scitari, arcanaque rerum
 Quærere. Nec Cephas Sociorum vota moratus;
 Dicam equidem, humanâ liceat si voce profari,
 Inquit, in hoc quæ iussu premi miracula tempus.
 Vidimus, ô Fratres (& adhuc meminisse voluptas)
 Divinæ specimen non enarrabile lucis,
 Mutatâ Domini specie, cùm Gloria Natum
 Ornavit patria, & cœlo claravit aperto.

Heic ubi collisi currus, prostrataque latè
 Agmina vesani Sisaræ, pugnantibus astris;

Vertice mons tereti superas assurgit in auras,
 Clarior ille olim spectato à lumine J E S U,
 Sidereæ quàm cùm exarsit certamine pugnæ.
 Atque huc me, sociâ Zebedæi Prole, vocavit
 Incubuitque preci per amica silentia Christus.
 Nos sopor oppressit, placidæque ignavia noctis.
 Ast ubi dimisit languentia lumina somnus ;
 Cernimus aërio Dominum consistere tractu
 Sublimem, simul ora modis splendentia miris.
 Qualis cùm liquidâ sol emicat igneus æthrâ,
 Et nubem objectam radiis incendit & auro :
 Haud aliter clausum terreno corpore Numen
 Crediderim augustos sese effudisse per artus.
 Hinc vestis candore nives anteire, jubarque
 Scintillare oculis totoque effulgere vultu.
 Non ita conspicuam divino lumine frontem
 Legifer induerat Sinæo in culmine Moses.
 Ille, & qui rutilo secuit spatia invia curru
 Thesbites, aderant : suspensique aëre, Christum
 Affari ; &, Solymæ quæ mox peragenda, vicissim
 Tractare inter se visi, Dominumque fateri :
 Majestate ambo insignes, lucemque trahentes
 A Christo ingentem & venturi præscia corda.
 Jamque recedentes ambo loca nota petebant :
 Ipse autem trepidâ mentem dulcedine captus ;
 Hac tria sede placet figi tentoria vobis,
 O Domine : heic ipso tecum latabimur ævo.
 Dicebam rerum ignarus ; cùm lucida nubes
 Has inter voces, umbellæ pensilis instar,
 Protinus obtendi, & geminos subducere Vates
 Mirantùm ex oculis. Tum vox è nube serenâ
 Altisoni Genitoris. Hic est mea maxima cura
 Natus, amor Patris. Vos jussi audite docentem,
 Mysticaque æternæ promentem oracula vitæ.
 At nos ætherii Patris reverentia, & horror

Ad Thaborem
 collisi sunt
 currus... de
 cœlo dimicati
 est contra eos:
 stella manen-
 tes in ordine
 & cursu suo,
 adversus Sisa-
 ram pugnaverunt. Jud. 5.

Vocalis tonitrûs pronos dejecit in ora.

Sed tactu admonitos & dictis Christus amicis

Surgere, terrenosque metus secludere jussit.

Solus erat, raptimque suos exutus honores,

Omnia jam nostro similis, vestemque, coloremque,

Oraque in humanæ morem revocata figuræ.

Qui sancti excelsa digressos vertice Montis


Prodere tanta vetat miracula, donec ab umbris

Infernis remeet victor sub luminis auras.

Talia veracis Cephæ narrata bibentes

Christiadæ, Dominique novo præcordia amore

Incensi, diæ pascuntur imagine formæ.





THAENDRICON

LIBER II.

CHRISTI CRUCIATUS;
POSTHUMAQUE MYSTERIA.

VIR DOLORUM

Isai. 53.

IN HORTO GETHSEMANIO.



INDE mali serpens, violato fœdere,
labes

Stirpem infelicis corruptam evertit
Adami;

Fatali repetita Salus effloruit Horto,
Almaque Oliviferi surgit Pax ubere

collis.

Heu maleficus amor, funestæque ambitus escæ!
Terrigenum simul ille parens, simul ille peremptor,
Arboris infaustæ fetum depastus acerbum est;
Et diro haud contacta cibo stupor obruit ora!
Jam solitos Christi cœlestia gaudia cursus
Sustinuere, animo penitus collecta supremo;

Ezechiel. c. v.

*Tristitia Chri-
sti.*

Ægraque destituunt admissis pectora curis,
Ac teneri nullâ sensûs dulcedine mulcent.
Et procusa Deo tales miracula in usus !

Nec sat erat, primo ex ortu quas Gloria membris
Divinæ fociis Naturæ animique beati
Debuit, abstinuisse caduco à corpore dotes ?
Queis auctus donis, & utrâque à parte beatus,
Undique circumseptus inaccessusque dolori,
Alituum & motus & vim penetrabilis auræ
Christus, & ardenti vicisset lumine Solem.
Nec fatis hæc decora, & sacros felicitis in artus
Suavem animæ excursum pressisse ! etiamne potestas
Deliciis orbare animam suprema laborat ?

Coepit pavere, & cadere &c. Corda catervatim Mœrorque Horrorque Pavorque
Invadunt, sedenim porta bipatente vocati,
Et iussi sævire, gravique insurgere motu.

Vivida quæ pingit rerum simulacra Facultas,
Probrorum effingit species formasque dolorum
Omnigenas ; quidquid scelerata insania versat
Concilio in Caiphæ, & rabidis ludibria sannis,
Sputa, flagella, Crucem, atque immanes criminum
acervos.

Et quæ proditio Judæ, & perjuria Cephæ,
Et labefacta fides Comitum, fuga fœda suorum,
Scilicet & caræ luctus ante omnia Matris,
Occurrunt animo, concussa que pectora turbant.
Totus Oliviferum in montem jam Golgotha venit.
Jam patitur, quæcunque feret ; calicemque paratum
Prælibat Christus, Patris illætabile donum,
Felle redundantem calicem, mistumque venenis.

Ingratum Solymæ genus, & quæ dira triumpho
In medio nuper lacrymas expressit imago
Excidii horrendi ; totumque agitanda per orbem
Religio subit, atque Erebo socianda Tyrannis
Gentē in Christiadūm, ac populos dominata per omnes
Impietas.

Impietas. facti mundi scelera agmine Christum
 Densa premunt. uno aspectu sibi tristitia sistit
 Cuncta simul, venturi & abacti conscius ævi.
 Nec tua, Christicolæ specioso nomine quisquis
 Improbe te jactas, immenso deerat acervo
 Perfidia; & Dominum stimulis propioribus urit.

Ah, sibi nequicquam series exhausta laborum
 Tantorum; sancti nequicquam effusa cruoris
 Maxima pars, pretioque humanæ impensa salutis;
 Tristitiæ, ah, nimium, & vivi seges ampla doloris.
 Quin hæc ipsa (nefas !) operosa piacula, & ingens
 Noxæ in materiem pietas vertenda; necisque,
 Heu, contemptus atrox, Crucis hostes undique, passim
 Calcandus cruor; & justum poscentia amorem
 Vulnera, sacrilego toties laceranda furore.
 Tum magni Genitoris honos temeratus, & illa
 Majestas despecta, polo terrisque tremenda;
 Hoc caput, hæc letho par alti summa doloris.

En, solus tacitâ sociis sub nocte relictis,
 Abiectusque solo, moribundaque pronus in ora,
 Ter supplex eadem Genitorem in vota vocavit,
 Terribiles si quâ pœnas avertere fas est.
 Ipse sibi obluens alterno scinditur æstu.

Qualis ubi ancipitem navis distracta procellam
 Sustinet; adverso assultant freta turbida motu;
 Jamque superjectis undarum montibus, alto
 Deprimitur; falsum pleno pontum ebibit alveo:
 At clavo affixus supereminet, astraque servat
 Rector adhuc puppe erectâ, cladique repugnat,
 Voce, manu imperitans, ventisque obnixus & undis,
 Ac merfam mergi prohibet multâ arte carinam.
 Haud secus hinc atque hinc curis discordibus actam
 Christi animam moles instantum onerosa malorum
 Urget, & immenso oppressam mœrore fatigat.
 Ardua Mens flecti docilem, facilemque levare,
 S

Arbitrio ciet ; & vasto permissa dolori
 Corda involventes sternit fracto impete fluctus.
 Hæret amarities usque, & suspensa Voluptas
 Innocuum fraudat sensum, & meliora merentem.

Sic nostro dolet, ac pavitans è more fatiscit,
 Quò vires nobis animosque suasque rependat
 Delicias tormenta inter. Quanquam Ales Olympo
 Missus adest, ægroque adhibet solatia cordi ;
 Deficit ille, & mortem animo prægustat acerbam.
 Deferuitque Pater Natum, seque ipse reliquit
 Filius. extremos vitæ durabit in actus
 Angor edax ; graviorque Crucis Crux intima pœnis.
 Ast homini redimenda Salus, reparanda Parenti
 Gloria, quæque ipsi rata prostant præmia Christo,
 Erexere animum ; atque æternâ lege Voluntas
 Versari mortalis amans, præcepta capeffit
 Aspera, sed patria, & pingui suavissima fructu.
 Nunc demum placido Christus certamine victor,
 Diffidii speciem nutu componit herili.
 Sponte sua justumque tulit posuitque timorem.
 Ergo quidquid atrox, probrosum, immane minatur,
 Exceptare audet, calicem epotare profundum.

Sudor Sanguis,
 neus.

Sanguineæ interea (monstrum !) de corpore guttae
 Horrendo sudore fluunt ; vestesque per ipsas
 Purpureus ruit imber, & undâ proluit arvom.
 Incaluit pulvis, penetravitque æthera clamor
 Sanguinis, Abelî major meliorque cruoris
 Voce sonus, miserisque potens veniam hostibus orat.
 Frigida qui cogente metu præcordia circum
 Sanguis iit ; superante animo dispulsus in artus
 Æstuat, & toto prorumpit corpore sanguis.
 Carnificum intactus plagas ultro occupat, ultro
 Viva ciens simulacra neci præludit JESUS,
 Primitiasque sui libat sine cæde cruoris.
 Ipse volens letho sese obtulit ; ipse furori

Occurrit venientum : & avaro barbara turba
 Ne quid signifero, ne quid scelerique doloque
 Deberet ; nil insidias, fictoque moratus
 Grassantem officio Judam, se prodidit ipse,
 Index ipse sui, & quærentibus obvia præda
 Hostibus incedens, vano indeprensa tumultu.
 Oscula tum blandæ in speciem composta salutis,
 Perfidiæ tela, atque atris imbuta venenis,
 Accipiens, fœdi contactum haud respuit oris.
 Mox læso imbutam servo, & majora parantem
 Audacis dextram Comitum gladiumque repressit.
 Parcere sed mandans ferro Clementia, & aurem
 Attactu medicans, nil, heu, corda impia tangit.

Ecce ruit, tædasque per umbram ensesque coruscans,
 Et mixtos fustes armis & vincula gestat,
 Venatu ceu belligero captura caterva,
 Monte super, silvâ defensum & nocte latronem.
 Væ, crudele satellitium, & duce digna nefando,
 Conjurata Orco manus involat, ausa verendum
 Cœlicolis violare caput. palantibus astris,
 Proturbatque teritque Deum, cæditque trahitque,
 More nec humano ; manicisque illudit onustum ;
 Calcibus & pugnis, scuticisque & fustibus instat.
 Ut quondam ille sacrâ, divini pignore fati,
 Cæsarie florens & inexuperabilis Heros ;
 Quem neque vi gens unum, & inermem perdere telis
 Evaluit ; pretio atque indignâ fraude petitus,
 Vincula Palæstinæ subiit furiasque phalangis.
 Ambos cepit Amor, pœnisque addixit iniquis :
 At turpis Samsœna, procax quem forma puellæ
 Incendit : Christum pius augustique Parentis
 Atque hominum flammavit Amor, decorisque salu-
 tisque.

Illi jam attonso robur fatale capillô
 Conciderat, domitumque armato objecerat hosti :

Ipse sui sese spoliavit roboris usu,
Immitte facilis dextras admittere Christus.

Cui tantum invito liceat de Numine, vinculis
Ætherium ut Regem, libertatisque datorem
Opprimat, inque extrema vocans ludibria, vitæ
Exuat autorem vitæ ? mortalibus ibat,
Teli extra jactum, furiis & inanibus ausis
Protinus insultans ; seu notas promere vires,
Flectere seu precibus Patrem, seu flammea jussis
Excire Aligerum toto velit agmina cœlo.
Sensit & immissus, quam certa potentia, miles.
Stans adversa cohors ; vnâ se voce fatentis,
Nec spirante iram dicto, simul acta retrorsum,
Fulmine ceu percussa, soloque afflicta jacebat,
Corporibus torpens confusa & inertibus armis ;
Nec sese erexisse valens, ni Vindicis alti
Annueret pietas. aliter nihil omnis in unum
Ausonidumque manus possit, Solymumque caterva.

O furor ! ô cœcæ præceps violentia turbæ,
Quam nec majestas operum & miracula terrent,
Illa hominem supra vis atque experta potestas,
Vulnera quæ sanat tactu, verbo agmina fundat ;
Nec, Malcho quæ impensa truci, strataque cohorti,
Blanda feram pietas docuit mensuescere Christo !
In Superos, hominum scelere atque errore ministro,
Tartarei rabies sævit tenebrosa Tyranni.

Diffimulat vim deinde suam, penitusque recondit,
Aut Socium expromit curâ ; servatque, latronum
Sexcentos inter gladios, dilecta Magister
Et Pastor capita ; ipse capi, vinculisque teneri
Passus, Olivetique inter juga confraga trudi,
Per montisque rapi declivia, perque Cedronis
Saxea torrentis nigro vada confusa luco.

VIR DOLORUM

IN URBE HIEROSOLYMA.

QUO Christum, scelerata cohors, trudisque rapisque

Compita per Solymæ & noctis bacchata per umbras,
Insano feralem agitans clamore triumphum?

Hei mihi, quæ rerum facies! quàm dissona pompæ
Sollenni, quâ nuper ovans incessit amœno

Christus Oliviferi descendens vertice montis,

Obvia cùm plenis undarent agmina campis!

Tota adeo Solyme sacri commota triumphi

Insolitâ specie, atque effuso percita plausu,

Nam quis hic est! stupefacta novo quærebat honore.

Matth. 21.

Hic Vates, hic ille (uno retulere faventes

Concëntu Populi) merito quam nomine præfert,

Re præstans, Nazaræ urbis decus ille, salutem,

Sermonisque operisque potens, cui nulla tulerunt

Secula parem, cui nulla ferent virtute secundum.

Scilicet eximias venientis ab æthere laudes

Omnia consonuere. tot altis conscia factis

Turba frequens ibat. cunctis redivivus in ore

Lazarus. & festos strepitus juga, mœnia, templa,

Gratantumque pias geminabant sidera voces.

Nunc ingens, capto veluti latrone, tumultus

Turbatam fremitu confuso implere Siona.

Per noctem. armorum sonitu mista omnia. terror

Civibus excussit somnos. spectantque rogantque,

Dum facibus vici ac densis hastilibus ardent,

Quid motus ferat iste? reus quò vinctus agatur?

Falsus adest Vates (reboat lymphata caterva.)

Turbarum incentor, Galilæâ è gente profectus,

Ducitur, errorumque sator, scelerumque magister,

Pontificis folio sistendus Numinis hostis.

Talia vociferans turmatim incondita prædo
 Præcipitem glomerat cursum, quò dira cupido,
 Heu, sceleri promissæ animos mercedis avaros,
 Fl. bilis & noxæ immites agit ipsa voluptas,
 Captivumque avidis expectans curia votis.
 Horrida funestæ passim ludibria nocti
 Dant JESUM, infaustæque parant spectacu' a luci.

Sternere cui vestes nuper gaudebat amica
 Turba suas, proprio exiit Rex pauper amictu,
 Pœnam in servilem, laniandus membra flagellis,
 Fœdiùs & nudos alienis vestibus artus
 Induitur; seu quâ Herodes candente lacernâ
 Illudit, vani specioso fymate Regis;
 Seu plagis lacerum, & perfusum sanguine corpus,
 Annofo petulans ubi miles tegmine cingit
 Purpureæ chlamydis, detritoque implicat ostro.

Certatim virides ardebat cadere palmas
 Vis populi exultans; Lethoque Ereboque subactò
 Ferre triumphales, Victori præmia, ramos;
 Pacifico nitidas oleæ substernere frondes.
 Undique Davidis prognato sanguine Regi
 Acclamata Salus, demisso à Numine Regi.
 Hæc nuper. quàm nunc tragico diversa theatro
 Scena, cruenta, atrox, informi squallida luctu!
 Mobilior pelago vulgus, per tanta receptum
 Gaudia, concursuque alacri cantuque secutus,
 En, probris onerat, dirisque sequacibus instat.
 Ad pœnamque necemque truci jam jamque reposcit
 Voce Salutiferum, & latè benefacta potenti
 Spargere consuetum linguâque manuque Theandrum.
 Nec Regem agnoscit populus, cui Cæsaris una
 Regna placent. calamo sceptrum, spinisque coronam
 Effringit; solâque furens odia arbore sistit,
 Atrâ, infelici. tollendum huc effera Christum
 Turba urget, precibusque frēmit violenta superbis.
 Jura minax terrore domat; scelerisque ministro

Judice, dum parcit manibus, sævissima linguis
Moliturque Crucem, & palmam Judæa nocentum
Vindicat : augustique levat dum perditæ gentes
Sanguinis invidiâ miseras, seque ipsa suosque
Obruit aternâ damnatos labe nepotes.

Criminis artifices Legis præiære Magistri,
Quos ferus exagitat Livor ; sed ficta doloſo
Nomine Relligio, Moſæaque gloria obarmat.
Illa nefas meditata, & iniquis excita curis
Pectora in optatæ vigilabant gaudia prædæ.
Postquam Annæ ſocero ſcleris libata voluptas,
Pontificis sævas raptatur Chriſtus ad ædes,
Impia collecto Procerum ad ſubſellia cœtu.

Ut ſtetit ante oculos crudelis & ora coronæ,
Qualis erat, vincla arcta gerens, ferroque gravatus ;
Exiluiere animis cuncti. nec ſe improba vultu
Compoſito premit ira ; erumpens conſcia prodiit
Latitiæ ſenſus ſaſtuque tumentia corda.
Tandem oblata, diu per vim quæſita, per artem,
Arridet vindicta. gravi cenſore levare,
Et caput inviſum geſtit maſtare Senatus.
Tartareus, meritaſque ſibi per crimina pœnas
Sancto inferre reo, cœli terræque Magiſtro.

Nocte quid infandâ expertus ; quàm triſtia paſſus.
Opprobria, inſultus, colaphos, luſusque jocoſque,
Sputaque, & obduſto caſos velamine vultus,
Comica larvati inſtruitur dum Vatis imago ;
Felleo acerbatos riſu enumerare dolores
Quis valeat ? falſi quantum auſa licentia Teſtis,
Lixarumque effræna licentia, dum rapit ultro
Turba procax noxam, ſtudioque accenſa placendi
Spectatorum odiis Procerum ? quis talia rerum
Aut æquare potens luctu, aut comprehendere verſu,
Centeno licet ore loquentia contrepet æra,
Atque ipſum ſletu Oceanum devolvat amaro ?
O tenebræ ! ô furia ! diris ô conſcia factis,

Iob. 3.

Te, mala Nox, fœdi tenebrosus turbinis horror
 Occupet, & cœco stellas involvat Olympo :
 Illicet omne tuâ lateat caligine lumen.
 Mosis ad imperium, pro libertate suorum,
 Haud talis piceâ nox quondam oppresserit umbrâ
 Ægyptum, atque unâ fontes nectente catenâ
 Tot populos, duroque immanem corde Tyrannum.
 Per chaos errantûm monstrorum infesta tremendo
 Agmine nox ; quo quæque loco deprensa, per agros
 Corpora perque domos ; valido ceu carcere septa,
 Prodigio stupefacta, metuque exanguia fixit.
 Hîc utinam simili torperent brachia casu,
 Ora, pedes, queis miles atrox creberque satelles
 Captivum, heu, monstris JESUM majoribus audet
 Indignis jactare modis, & mille nocendi
 Artibus illudens tacitum vexare Tonantem.
 Vincetus at ille tamen gelidæ inter frigora noctis
 Dum perstat, placidoque obtutu immobilis hæret ;
 Æterno interea flagrans Deus hostium amore,
 Et tenero miserans respexit in atria sensu,
 Ignis ubi, graviusque algens formidine Cephæ,
 Armato obrepssisse gregi temerarius, & se
 Visendi cupidum vernis junxisse protervis.
 Qui malè præfidens animis, inque omne paratus
 Discrimen, Dominum injussò defendere telo
 Nec timuit solus, glomeratæ obstare cohorti ;
 Dehinc terrore fugax, capto desertor ab horto ;
 Suspenso demum gressu, longeque secutus,
 Ah miser, & famulæ tremefactus voce Magistrum
 Abnegat. illustrem latè Judæa per arva
 Jam pudor est vel nosse virum, jam criminis instar.
 Tergeminumque nefas cumulat perjurus. at idem
 Alitis admonitus cantu, aspectuque Magistri,
 Ad sese redit, & tetrâ se proripit æde ;
 Tristiaque, effusus lacrymis, commissâ piare ;
 Instituit, solo Domini abstergenda cruore.

*Una enim ca-
 renz tenebra-
 rum omnes e-
 rant colligati.
 Sap. 17.*

Non ita Concilium infaustum, nimiumque profana
 Turba Sacerdotum, Pharisæaque corda moventur.
 Ut summum visura nefas, visoque tenebras
 Accitura dies, invito effulsit Olympo ;
 Ultima sacrilego fertur sententia Mystæ
 Confessu in magno, conjuratoque Senatu
 Numinis in cædem. idem hostis Judexque cruentâ
 Voce præit consulta : simul cuncta ora nefandum
 Infremuere, aperit cum se metuenda Parentis
 Aeterni Soboles, & nuntia & arbitra fati.

Scinde age, non sacras, Caïpha, de pectore vestes ;
 Crimine sed fetum, ac tantæ molimine cædis
 Sanguineum abrumpe, & justo cor protere luctu.
 Quem damnas, reus iste, Deo mox vindice Natus
 Clarescet, folioque sedens super astra paterno ,
 Rursus & adveniens Judex in nube curuli,
 Fulmineum mundo attonito spectante tribunal.
 Tum cidari excussâ, & sancto nudatus amictu,
 Ipse reus planges, montesque & saxa vocabis
 Auxilio, latebram capiti incumbente ruinâ
 Implorans. maculæ hic exors, mitissimus Agnus,
 Tonderi, cædi patiens, mutoque querelas
 Ore premens ; aderit Cælo implacabilis ultor,
 Horrificum jam vi referens irâque Leonem.
 Tum pœnas repetet, quem letho addixeris unum
 Pro cunctis lustrale caput, solenne piaculum
 Et devota cadens servandæ victima genti.
 Nunc ventura dies, oculis quàm dissita, longè
 Securis eadem hæc animis (quos invida dudum
 Excœcat rabies) penitusque oblecta recedit.

Apoc. 5. & 6.

Quanquam excors, nec se ipse ferens, Christumque
 professus
 Proditor insontem, & facti mercede cruenti
 In templum abjectâ, pœnamque invadat atrocem,
 Et laqueo elidat fauces : haud secius ille,
 Funesti metuens pretii contagia templo,

Impius empto instat sceleri, exitioque parato.
 Nec peccasse uni satis est : culpâque coactâ
 In caput augustum obtorquet fugientia corda,
 Romanosque suo sceleri implicuisse laborat.

Scilicet abreptum Latia ad prætoria J E S U M
 Pontius, haud ignarus enim livoris iniqui,
 Extimuitque reum Præses, stupuitque silentem
 Crimina densa inter, vitæque objecta pericla.
 Mittitur & cupidam Galilæi Regis ad aulam ;
 Itque reditque novis Christus per compita probris,
 Per fora versatus ; pariter demensque nocensque
 Ad tormenta trahi Deus, ad ludibria jussus.
 Turbarum trepido Solyme convolvitur æstu,
 Assiduoque vias fluctu plateasque fatigat.

Tu tamen intactum culpæ testatus, eundem
 Ad pœnam, Pilate, vocas. Clementia tanti
 Stat tua ! circumstant rapidi, spoliante verendum
 Carnifices corpus, tortoque rudente columnæ
 Adstringunt. rigidos solvunt in verbera fasces,
 Brachiaque intendunt nervis ; manibusque reductis
 Certatim hinc atque hinc densato, grandinis instar,
 Præcipitant ictu ; & plagis concisa pererrat
 Membra cohors tortorum, aufertque à corpore corpus.
 Tincta cruore columna ; solum natat omne cruore,
 Consperfusque rubet paries ; summumque resultat
 Ad laquear cruor, & totis agit artubus amnes.
 Parcite Tartareæ, nunc demum parcite, pestes.
 Jam quæ vel Solymum placet, satis ista superque
 Pœna, odium : tygresque dolor cautesque moveret.
 Quid juvat exhaustis jamdudum infringere membris
 Vulneribusque flagella ? artus immanè dehiscunt,
 Nec plagas cepere. quid iras perdere & ictus
 Ultra adigit ? vix se, vix brachia fessa remittunt ;
 Lumina tormentis necdum exsaturata, dolori
 Insultant, sensusque avidos sua crimina pascunt.
 Proh ludi genus ! en, sellâ statuêre cruentum

Regem humili. sentes capiti, dextræque palustrem
Insertant calamum, atque humeris circumdata pendet
Purpura. tum fannis coram venerantur amaris,
Suppliciter nixi genibus, sputoque salutant;
Et dextræ exemptâ pulsatur arundine vultus.
Hæccine supremi divina Parentis imago,
Vivida, collucens, æterno augusta nitore;
Quam defixæ inhiant acies stellantis Olympi,
Felicesque tuendo ardent, humilesque tremiscunt;
Eheu, ludibrium horrendum & miserabile terris,
Oblita jam fœdè sputis, maculosa cruore,
Vulneribus squallens, ac pallida Mortis imago?

Nec plebem informis species, Proceresque malignos
Inflexit, tantosque inter probra tanta dolores!
Quin potius vasto oblatum explosere tumultu,
Dejiciturque animis objecto Cæsare Præses;
Infelix, qui nec, visa ad nocturna paventis,
Conjugis audierit voces monitusque salubres.
Perfide, sic Virtutem audes terrore subactus
Prodere? sic uno damnas, absolvis & ore?
Incaustum palmas, pollutâ mente, cruentas
Abluis. hanc nec tota palus Tibereia labem,
Non, utroque ruens pelago, purgarit aquæ vis.

Crux adeo, Crux, heu, Regi fabricata Deoque;
Acribus illa quidem votis optata; sacrosque
Nunc primum exceptura artus, stirps illa salutis,
Mortalis vitæ ex aditu jam fixa animo Crux.
Sed patriâ quam lege, pioque amplexus amore
Suscipit, humani decreto imposta furoris;
Inque Deum fontis transfertur pœna soluti.
Scilicet immani portento innoxius Agnus
Posthabitus; Vitæque Opifex, Pacisque Repertor,
Seditionem inter civili cæde cruento.
Ergo inter fontes famosâ lege referri,
Latronum & levius fuerat persolvere pœnas?
Duxque latrocinii vulgo Princepsque per ora

Traductus, foliis ut prædo infestus & aris ;
 Furciferos inter medius, varioque dolore
 Insignis longè ante alios, probrisque cruentis,
 Ducitur , heu , Divûm atque hominum ceu publicus
 hostis.

Aude, anima, ingentis comes haud ignava Magistri ;
 Prælatæ succede Cruci. signata cruore
 Sectari per amica juvat vestigia Christum,
 Aspera Golgothei nitentem ad culmina montis.

VIR DOLORUM

IN MONTE GOLGOTHA.

SUPPLICIT sævam conscenderat arduus arcem ;
 Latronesque inter, medius, terram inter & æthram
 Pendebat consors hominisque Deique Sequester,
 Lugendum pariter spectaclum & amabile Christus,
 O sacer , ô blandos inter suavissime colles ,
 Golgotha, devotosque inter sævissime montes ;
 Gelboâ horridior, Libanitide amœnior ora,
 Ancipiti famâ ante omnes clarissima terras !
 O myrrhæ turisque ferax ! ô sentibus hirta
 Area purpurei Veris, fructuque salubri
 Læta seges ; vinoque admistus fellis amaror !
 O templum augustum simul, & ferale theatrum ;
 Hostia ubi sese ipsa volens & prodiga mactat
 Versus in humanæ pretium Deus ipse salutis ;
 Idem execratus Solymæ, veneratus Olympo,
 Omnigenûm immanes scelerum fert corpore pœnas !
 Tu Belli campus, tu Pacis, Golgotha, sedes.
 Hinc Furor, hinc Amor ardet, & aspera prælia miscent,
 Amborum paribus Christum premit impetus armis.
 Justitia hîc solium, solium Clementia fixit ;
 Ambæ concordæ sancito hîc fœdere regnant.
 Filius ultrices Genitoris sustinet iras.

THEANDRICON LIBER II.

283

Christo agit & patitur Deus ; atque interprete tanto,
Paciferæque undante Crucis per robora, fontem
Jam sibi conciliat placatus sanguine mundum.

*Deuserat in
Christo, mun-
dum reconcili-
ans sibi.
2. Cor. 5.
Coloss. 1.*

Quam nova turbatis passim commercia rebus,
Dum titubat Natura pavens, dum Gratia vires
Explicat, ac Morte ex ipsa melioris origo
Assurgit Vitæ, & probris sata Gloria fulget !
Pastorum ad caulas, Christo exoriente, per umbram
Emicuit peregrina dies, Superûmque canoris
Laudibus insonuere agri. nunc deficit unâ
Cum Domino, & mediam abrumpens ferrugine lucem
Numinis occasum trepido Sol indicat orbi.
Nunc tremefacta gemit Tellus , nunc luget Olympus :
Cæligenûmque acies, pacem queis cura tueri,
Attonitæ horrescunt, & amaro lumina fletu
Proluerint, si quis felicia pectora mœror
Pertentare queat. soli hæc servata dolendi
Delicias inter superas miracula Christo.
Sic Deus aggestæ patuit per crimina pœnæ;
Sic pœnâ exceptâ patuit Deus. ô Deus ultro
Infra hominem dejectus, & alti major Olympi
Gente Vir aligerâ, totoque ingentior orbe !
Hic majestatem posuit, desertus, inermis,
Ac vim compressit propriam, aut monstrare ferendo
Tantum amat. in longam extrahitur vita ultima
mortem.

Isai. 33.

*Psal. 21:
Hebr. I.*

Nam quid pœnarum superest ? velamina membris
Semianimis adstricta, tenaci hærentia tabo,
Abstulit, & si quid pellis super, antè probrosâ
Quam trabe suspendit lacerum ; conscissaque miles
Dividit inter se, ac sorti permittit iniquæ,
Ipsius ante oculos trunco pendentis ab alto.
Tunc & funereâ sublimis ab arbore Christus
Assusos lustrat populos, & acerba dolorum
Inter anhelus, hians, placido tamen ore tuetur

Hostiles facies, spirantiaque ora furorem.

Cernit & Aligerum pendentes aëre turmas,
 Qui, circum multâ velati nube, cruentos
 Seminecis Domini lacero de corpore rores
 Suscipiunt pateris, magno libamina Patri.
 Inde Potestates Erebi, Mundique Tyrannos
 Cæco exultantes media inter crimina motu
 Respicit, instantes plebi, Procerumque superba
 Corda incedentes, inimico explenda cruore
 Effudere odia ; & linguis, manibusque suorum,
 Iram exercentes, Supero de Rege triumphum
 Consilii ignaræ Mentis cœlestis agebant.

Colluvie in tanta paucos observat amico
 Pectore mœrentes. hîc Mater, & integer adstat
 Qui Sociis tenero Juvenis prælatus amore ;
 Magdala, fœmineæque alii virtutis honores.
 Omnes vulnifico percussæ corda dolore :
 Sed longè ante omnes Mater, cui pignus ademptum,
 Heu, desiderium, & mœsti grave Numen amoris.
 Tota Cruci vis fixa animæ se acerrima torquet :
 Et Proli immoriens, ac tanto invicta dolori
 Stat Virgo ! exundans sese dolor ipse resorbet ;
 Oceano similis, vastâ qui mole tumescens
 Æstuat, & rapidos glomerans ad littora fluctus
 Temperat excursum, fractusque in se ipse residit.

Verum hæc confixæ Nato forma ægra Parentis ;
 Quæcunque & triplices Christo tolerata per horas,
 Debata seclorum noxis ; septenaque Verba,
 Æterni numeros omnes implentia fati ;
 Mox alio atque alio resonabunt carmine, cœptum
 Quæ longo obruerint tractu ; fletusque recentes,
 Ordine quæque suo, plenosque vocantia luctus.

Vipeream exacuit linguam Solymeia plebes,
 Scriba Magistratusque execrandusque Sacerdos,
 Plusquam hostili odio ; & dictis configit amaris

Pendentem, gemitusque extrema in morte trahentem.

Proh rabies ! crudo ceu pectus ab ære rigescat,

Agglomerata Sion, stat nullis excita monstis,

Astrorum squallorem inter, Cœlique laborem ;

Et saxorum inter fremitus, terræque tremores,

Dura, immota, rigens, Furiisque agitata triumphat :

Nec sua adhuc scelera, infelix, sua vulnera sentit !

Tristiùs &, nigri quàm fellis & acris aceti

Pocula, tot Christi pœnis convitia miscet.

Haud telis graviùs, verbis quàm ferrea sævit.

Aspicias hæc, Pater omnipotens, audisque ; nec iram

Sanguineæ in Natum meruit truculentia gentis ?

At quam fatidico ille minax intendere ab ara

Ausus erat Vati, Regis * dextra arida quondam

Obriguit. Vatum hîc Regem, primamque vetustis

Materiem oraculis, viles impune lacescunt

Proturbantque rotantque manus, onerantque cruentis

Ictibus ; & sectum flagris, clavisque refossam,

Golgotheæ superimpositum crudeliter aræ,

Conficiunt ; solidæque vigent in crimina vires !

Saphatiden puerum inclamans lascivia calvum,

Dentibus urforum rapidis lacerata sub ipsam

Bethalem, magno luit, ignoscenda videri

Quæ poterant ævoque rudi, vocique petulcæ.

In Solymos non vis ruet irritata ferarum,

Sistet & immites lacrymosâ cæde cachinnos,

Post capiti infixos vepres, congestaque Christo

Opprobria, & factis Stygios dictisque furores ?

Si valuit, collis tantum descendere jussus

Vertice Thesbites, flammæ accersere cœlo,

Bisgeminumque agmen præsentî absumere pœniâ

Fulmineus Vates : actum in fastigia J E S U M

Sontibus addicti montis, perque horrida saxa

Sordida latronum tabo, atque infamia diræ

Regna necis ; quæque aërias sublatus in auras

* Jeroboam.

l. 3. Reg. c. 13.

Elisæum cavillo appetentes
pueri, ab urfis
discerpti. Reg.

l. 4. c. 2.

Elias *ibid.* c. 1.

Occumbit, furcâ per sannam exscendere iustum
 Non trifidus cœli Dominum tutabitur ignis,
 Carnificum involvens aciem, totamque Siona?
 Connivet Nati exitio Genitorque Tonansque,
 Terribilis famulûm Vindex. hîc fulmina cessant!
 At nec Pentapolis torrentes sulfure nimbos
 Sic meruit: nec, quæ corruptum immissa per orbem
 Diluvies, tantum ultra nefas, unum omnia vicit
 Et scelorum juxtâ & pœnarum nomina crimen.

Quam bene conversa in tenebras, funestior omni
 Squallet nocte dies! graviorque offusa nocentum
 Caligo Judæum animis, prorupta Erebo nox.
 Perpetuum Solymæa chaos, cœcæque tenebræ
 Tecta premant. Quin tu vasto discedis hiatu,
 Visa, solo trepidante, Crucis sub pondere Tellus
 Horrere; ac tanto, sed leniùs, excita monstro?
 Excute, merge nefas, Solymamque absolve profanam.

Sed quid ago demens? ultrices imprecor iras,
 Nec me respicio, pœnis obnoxius ipse,
 Autor ego infelix, & causa segesque malorum!

Christe, crucem clavosque tuos, mea crimina, cerno,
 Hastamque spinasque, & hiulcis vulnera membris.
 Hæc nostri monumenta operis, monumenta furoris.
 Agnosco, scelorum inventor, mea facta. crucemque
 His ego defixi manibus; lignoque probroso
 Ferrum adigens immane sacros in corporis artus,
 Palmisque infixi clavos plantisque trabales;
 Et capiti, ah, rigido feralem sente coronam,
 Et lateri, heu, diram contorfi ferreus hastam.

Quis lacrymarum oculis æternos concitet imbres?
 Quis cordi gemitus addat, suspiriaque ori?
 Sed quis & ætherios simul ossibus inferat ignes?
 Quis meritas linguæ, immenso pro munere, grates
 Suggestat; atque eadêm pro te, mea vita, ferendi
 Audaces animo sensus, nec inania vota?

O dolor,

O dolor, ô justâ conjurans turbidus irâ !

O Amor, ô tenero conspirans fervidus æstu !

Téne prius, Dolor acer & implacate, requiram ?

Téne, Amor alme, vocem ? crudelis tu quoque Christo.

Crudelis Christo magis, an mihi blandus uterque ?

Blandus uterque mihi, Christo crudelis uterque.

Ambo inter sese nectuntur Amorque Dolorque ;

Victus Amore tamen, vicisti Christe Dolorem.

Christum vicit Amor ; mortales vincat, & ipsam,

Victricem humani generis finemque Doloris,

Vi Mortem æquiparans, firmat Dolor æger Amorem ;

Vivum Amor exercens mollitque acuitque Dolorem.

O lacrymæ, ô valido lacrymæ clamore sonantes,

Supplicibus Christi votis & questibus actæ,

Purpureo frontis confusæ orisque fluento ;

Elicite, ô, nostros, & non sine sanguine, fletus.

O flammæ, ô misti bicolores sanguinis undæ,

Unâ ambæ lateris penetrali à fonte fluentes ;

Urite me flammæ, lustrales tingite lymphæ :

Sanguis alat flammæ, sacroque animam imbuat ostr.

*Fortis est ut
mors, dilectio,
Cantic. 8.*

*Preces suppli-
cationesque
cum clamore
valido & la-
crymis offerēs,
ad Hebr. 5.*

IN JUDÆOS.

Vos... Auctorem vitæ interfecistis. Act. 3.

PR o h scelerum feralis apex ! en stipite Numen
Suffixum, manibusque hominum Rex ætheris hic
est !

Isacida duri, quæ mentem oppressit Erynnis ?

Cernitis, ut vastum pavefacta elementa per Orbem,

Sedibus ut convulsa suis ? clavosque crucemque

Cuncta Dei sensere. Deo moriente laborat,

Et pullâ Autori Natura in veste parentat.

Heu cæci ! vestro maculastis crimine solem.

En abrupta dies, turbataque fœdera mundi !

Terra tremit, cautes rumpit dolor, omnia mœrent ;

T

Tartareum Solymes incusant omnia crimen.
 Ipsa amens furiis, dum gentibus ingruit horror,
 Gaudia, vae ! caeso peragit solennia Christo.
 Necdum etiam instantes coisse in fulmina nimbos
 Suspicit, aut fusi clamorem sanguinis audit :
 Eventusque sibi diros gratata, triumphat
 Victrix, illusoque ferox insultat Olympo.

Cara Deo quondam ante alias, insignis honore,
 Dives opum ; sed nunc tantorum oblita bonorum,
 Ausa immane nefas, caesi rea Numinis, ô Gens
 Infelix ; Babylone olim Phariâque catastâ
 Cœlestis merita Judex graviora reservat.
 Bella, famem, cunctas uno simul agmine pestes,
 Confusasque virum cædes, urbisque ruinas
 Iratum tacito meditatur pectore Numen.

Quot pariet Crux una cruces ! circum undique vallo
 Mœnia funereo, pœnis obsessa, tremiscent.
 Jam Solymææ arces, veritumque resurgere templum
 Procubuerunt : Dei jam ferrea virga rebelles
 Obterit ; & muris hostile impressit aratrum
 Romanus scelerisque ultor pœnæque minister.
 Degeneres nimium Abramidæ ! quin verior Anguis
 Tartarei soboles, factisque imitata parentem !
 Aeterno exilio populos disjecta per omnes ;
 Principibus, fano & legis spoliata magistris,
 Terrarum commune odium, justique furoris
 Terrificum exemplum ; capita in scelerata vocati
 Sanguinis horribiles extrema in secula diras
 Experiêre. Dei calicem ferventibus iris,
 Face tentus, spumantem hauri ; Christoque paratâ,
 Quos merita es, tristi decerpe ex arbore fructus.

Ioan. 8.

*Sanguis ejus
 super nos.
 Mat. 27.*

IN PSEUDOCRISTIANUM.

*Rursum crucifigentes sibi metipsis Filium Dei.**Ad Hebr. 6.*

TU quoque, tu, Christi cui non ignota potestas,
 Gloriaque & Numen supremo æquale Parenti !
 Ah miser, ah ! quò te Phlegetontius impulit ardor ?
 O scelus ! immitti rescindens vulnera dextrâ
 Justificum calcas furiatâ mente cruorem.
 Et Caïpham incusas, & Pontî ferrea iussa !
 Ingeminasque cruces, Solymosque absolvere certas,
 Confessum exercens graviore crimine Numen.
 Crudelis ! rursum spinis horrentia ferta
 Augusto intrudis capiti ; flagra aspera rursum
 Incutis ; atque omnem corrupto, perditte, sensu
 Configis Domini sensum ; nec lumina parcis
 Aspectu violare procax, nec vocibus aures.
 Siderea infandis sputorum sordibus ora
 Commaculas. Cæli manantem nectare linguam,
 Bacchantum similis, torques ; ceu rursus acetum
 Admoveas labris, aut tetri procula fellis.
 Divitiarum ardens & inexaturata cupido,
 Ecce, inopes casti nudavit corporis artus :
 Probra tumens renovat fastus, tormenta voluptas.
 Quid bonus ille autem, niveoque simillimus agno
 Terrigenum Vindex in te peccavit, Averni
 Execranda lues ? quò clavos crimine, rerum
 Artifices meruere manus ? te te illa creatrix,
 Quam modò sanguineâ transfigis cuspide dextram,
 Maternæ quondam latebrosis sedibus alvi
 Concreto, membra informans, è sanguine finxit.
 Nunc quoque, servatrix operis ni dextra caduci
 Suspensum hæc eadem teneat ; ceu pulvis in auras,
 In chaos inque tuum subito revolutus inane

Vanescas, Stygiæve ruas in aperta barathri.
 Tigride barbarior, Solymâ crudeliôr ipsâ,
 Quem petis, aut quid jam laniata in corpora sævis?
 Deest plagæ locus, atque exhaustus pectore sanguis.

Si te nulla movent morientis vulnera Christi,
 Nullus amor; moveat Nemesis, flagrantibus armis
 Tergo instans, omnesque trahens in crimina diras.
 Scilicet infontem, culpæ sub imagine, Natum
 Talibus affecit Patrîs implacabilis ira
 Suppliciis; & te scelerato Marte rebellem
 Terribilis servum Dominus patiatur inultum?
 Si cedrum in viridem sævit, fetuque gravatam
 Excindit palmam; non siccum & inutile lignum
 Agricolæ infesti valida ab radice securis,
 Et steriles ramos cariosaque membra recidat,
 Tartarei æternis busti damnata caminis?
 Infelix! nec te miseret Christique tuique!
 Siste, furens. letho perfunctum haud simplice Numen
 Quò revocas toties, atque ultra funera tendis?
 Num recidiva pio satis est quæ Victima ritu,
 Quotquot eunt luces, perque omnes concidit aras,
 Mystica Golgothei referens solemnia sacri?

Hac-effræna-tenus jactaris crimina: metas
 Hîc tandem præfige; hîc & suspiria ab alto
 Corde trahens, torrentem oculis devolvere lympham
 Quid cessas, Christique pio miscere cruori?
 Heu qui te Oceanus lustralibus abluit undis?
 Quo tristes maculas inferna piamine flamma
 Excoquat? ipso etiam, mundi qui crimina purgat,
 Si miser ingratam fœdatis sanguine mentem.

PATRUM LIBERATOR.

Expolians Principatus & Potestates &c.
Ad Coloss. 2.

SOL, qui funereæ squallens caligine noctis
Invisam Solymen & conscia pectora facti,
Ignarosque mali longè, nova monstra videntes
Turbasti populos; nitido spectabile cælo
Redde jubar, lætoque incedens aureus ore
Accelera, extinctæ reparans dispendia lucis.
Tuque, solum Hebræis trepido molita tumultu
Subtrahere, indignata nefas, & plangere diram
Visa necem, Tellus, nunc omnibus excita gesti
Læritiis, palmasque sacro consume triumpho.
Victor, iô, Christus Lethumque Orcumque triumphat.
Maxime Adamigenûm Vindex, qui, dum arbore
sacrâ

Latrones inter geminos lacrymabile corpus
Dependet, Solymorum odiis immane trophæum;
Obscuram irrumpens arcem vastator, avari
Diris opes, captiva piorum examina solvis,
Mox Erebo raptas vertens ad sidera prædas;
Sit mihi fas tua facta loqui, durâque catastâ
Assertos spectare Patres, tumultoque dicare
Fracta tuis manibus palmaris vincula turmæ.
Ipse viæ ignarum Vatem rege, Christe, per umbras.
Victor, iô, Lethique potens Orcique triumphat.

Corporis emissus templo, purâque refulgens
Luce Animus, junctum æterno cui fœdere Numen,
Telluris sub operta, Patrumque ergastula fertur.
Non ea sulfureis amplexi fluctibus amnes;
Non Diræ ultrices, non primo in limine custos
Tisiphone, secura quies, atque invia pœnis

*Habeo claves
mortis & in-
ferni. Apoc. I.*

Sanctorum statio (donec felicitis Olympi
Regia aperta vocet) Christique incensa cupido.
Jam spes libertatis adest, jam copia lucis,
Illustres Animæ, cum fato extinctus acerbo
Christus, iô, Victor Lethumque Erebumque trium-
phat.

Nec vestra mortem pro libertate pacisci
Extimuit, patriasque inhonesto funere pœnas
Golgotheâ explevit moriens sacer Agnus in arâ.
Nunc terrâ depressâ, situ loca senta profectus
Spiritus auxilium lucemque optantibus affert.
Vos, quibus Umbrarum imperium, Limbique silentis,
Pandite ferratos converso cardine postes.
Ne qua mora obsequiis. Qui prœlia numine torquet,
Bellipotens valido incussam crucis ariete Ductor
Portam effractus, trepidantibus ingruit antris.
Christus, iô, Morti insultans Ereboque triumphat.

Ut iussæ patuere fores, informiaque antra ;
Solis inassueti radiis mirantur, & omnes
Attonitis inhiant oculis ; quæ clara repente
Tempestat ? præcurrit enim, longeque coruscat
Dulce jubar. sedenim glomeratæ in turbine lucis
Ut videre Dei vultusque habitusque gerentem ;
Jam mundi primâ desponsum ab origine Christum
Agnovere ; animisque ultro certantibus omnes
Concurrunt, hærentque avidi, meritâque salutant
Laude Salutiferum Numen, pœana canentes.
Victor, iô, Christus Lethique Ereboque triumphat.

Continuò generis caput ille & causa malorum
Fœdisfragus, Mortique aditus qui præbuit ultro,
Profilit adventu liber cœlestis Adami ;
Primus & infernæ tetigit qui limina sedis,
Invisus fratri; Superis gratissimus Abel;
Sethusque, & custos demersi Navita mundi.

Melchisedech. Justitiæ Pacisque potens, qui sceptrâ Sacerdos

Gesserat ; exultansque avido nova lumina visu
 Abramus rapit , & series longissima Patrum ;
 Quotque pii Reges, atque iēti Numine Vates.
 Christus, iō, Domitor Lethique Orcique triumphat.

*Abrahā exul-
 tavit, ut vi-
 dit &c.
 Joan. 8.*

Tot sanctos inter Proceres, collectaque seclis
 Sidera terrarum, Christo præcurrere natus
 Qui caput augustum puro Baptista fluento
 Abluerat, diæ testis vocisque Columbæque,
 Emicat ; & , mundum, ecce, suo qui sanguine lavit
 Agnus, ait. simul ingentem veneratus Alumnum
 Iosephus, felix nimium, qui Virginis olim
 Christiparæ Comes, & Sponsi sub nomine Custos :
 Innumerique alii, Superos auctura propago,
 Victorem alterno gratantur carmine Christum.
 Victor, iō, Mortisque potens Orcique triumphat.

Salve certa Dei Soboles, æquæva Parenti,
 Nec meritis nec honore minor ; salve Optime Vindex
 Terrigenum, Lethi atque Erebi fortissime Victor !
 Expectate diu tenebrosâ Morte sepultis,
 Spesque salusque hominum, pleno jam temporis orbe
 Venisti memor, & cælo descendere ab alto
 Infernos etiam dignaris adusque recessus !
 O quanti miserâ exhausti pro gente labores,
 Quantaque Golgotheæ viderunt prælia cautes !
 Sed moriens vitamque paris, proprioque cruore
 Purpureus Victor Mortemque Orcumque triumphas.

Talia cantantes, nequicquam ululantibus Umbris
 Inferiore antro, magnum per inane beatæ
 Accelerant, dio perfusæ lumine, Mentis.
 Æternæ horribilis noctis clarescit imago :
 Uruntur sancto scelerati lumine Manes.
 Felices Animæ, niveis in vestibibus omnes,
 Agmina junxere Aligeris : hic carmine ovanter
 Cœlituum chorus, ille Patrum, celebrare Theandrum
 Certatim, pompamque unâ duxere triumphi.

Concava terrarum, & cœli convexa resultant.
Victor, iô, Christus Lethumque Erebumque triumphat.

ANASTASIS.

Apoc. 1.

PRIMOGENITUS MORTUORUM.

H A C T E N U S infernæ disjecta repagula sedis
Adventum sensere Dei ; pariterque benignam
Victoris, validamque manum cecinere soluti
Carcere ab umbroso Manes : nunc artubus ingens
Reddit se vacuis & notum spiritus implet
Hospitium, tristi redivivum è marmore corpus.
Tu mihi, tu victo surgentum à funere Princeps,
Dux operis, nova jam fessas in carmina vires
Suscita ; & infixum terris rape ad æthera vatem,
Christe, Parens vitæ , Mortisque in morte Peremptor.
Ibat lecta cohors Procerum, Limboque relicto
Exultabat ovans, radiisque accincta coruscis,
Et molem objectam penetrans tendebat in altum,
Quà Christus pandebat iter per devia terræ.
Ibat & Infantum legio, quos ubere præceps
Abstulit Herodis furor ; & formidine cœcâ
Dum petit insolito monstratum fidere Regem,
Ceui teneros stravit crudeli turbine flores,
Impius, & lacteo perfudit sanguine cunas.
Felix barbaries pueris ! compendia longæ
Fecit ad astra viæ ; palmæque insigne decorum
Obtulit ignaris pugnæ ; Christumque tueri
Morte dedit. Puero pueri data victima, & Agno
Primitiæ cecidere : Agnum, quacunque sequaces,
Et maculæ expertes niveo comitantur amictu.
Inde aliæ socias, immensis millibus, addunt
Sese Animæ, sanctumque & non ignobile vulgus.
Nec non & fornax manes quos iusta piabat,

Munere inassueto gaudent : pretioque recenti
 Largior indulget redimitque piacula Christus:
 Et culparum abolet calidus vestigia sanguis
 Concretam expurgans labem, proque ignibus atris
 Sideream accendit sacratâ aspergine flammam.

Postquam funereæ ventum in sacraria rupis,
 Corpus ubi viduatum animo, sed Numine plenum
 Decubuit : nostri monimenta , en, Christus, amoris,
 En, ait, aspiciate, & vestræ pretia ampla salutis.
 (Ac simul immanes ostendit corpore plagas)
 Nimirum tantæ collapsam attollere gentem
 Molis erat, communem Orbis sarcire ruinam.
 Nec queror impensos vobis, mea cura, labores:
 Ipsa juvant tormenta : & acerbi læta doloris
 Præmia jam cepi, cùm vos è nocte profundâ
 Afferui, & generis primæva in jura reduxi.

Ut fœdum vidêre nefas, sedemque jacentem
 Numinis, indigno mactatum funere corpus ;
 Squallentem crinem ac rigido compuncta vepreto
 Tempora, liventesque genas alapisque tumentes ;
 Extinctos oculorum ignes, atque ora pudendas
 Sputorum sordes & amarum experta liquorem,
 Confixasque manus, terebratas cuspide plantas,
 Plantas & vasto patefactum vulnere pectus :
 Obstupuere animis Patres. At criminis Autor,
 Conscius admissæ labis, Princepsque nocentum :
 Hanc ego te, æterni, video, Genitoris imago ?
 Et tanti mortale genus ! quò te, Optime, nostri
 Egit amor ! talin' decuit succumbere letho
 Augustum, cœleste caput ; Dominumque Deumque
 Pro servo luere, & diras expendere pœnas
 Terrigenæ ? ô nimium fatalis toxica pomi !
 Corpore in hoc, sceleris funesta apparet imago.

Tum Symeo : ah , dulces venerandi corporis artus,
 Quos gremio exceptos senioque trementibus ulnis,
 Sidereum Infantem proprias dum sistit ad aras

Intemerata Parens, avido mirabar amore !
 Huccine divinus recidit decor ? huccine sancti
 Oris honos, totisque adspirans gratia membris ?
 Sic te probrorum metam, immeritamque Parentis
 Transfixurum animam præacutæ cuspidis ensem
 Prævidi, cum te amplexu, mea vita, foverem,

Dehinc Jobus, recti ille tenax, Orcoque furenti
 Inconcussus, & omnigenum per acerba dolorum
 Spectatus, Christi instar habens. mox corniger Heros
 Sacra ferens tabulasque ; alii ex ordine Vates
 Dedecora, inter se, prædictaque vulnera monstrant,
 Sulcatosque immanè flagris servilibus artus,
 Perfossosque pedes ferro, plantasque patentis,
 Atque ipsum cœcâ violatum cuspidis pectus.
 Hi diræ instaurant cædis lamenta, dolentum
 Assimiles ; questu scelus execrantur acerbo.
 Pars tacito stupet ore, avidisque obtutibus hæret.
 At medios inter sese jam plenior effert
 Numine Jessides ; præit aureo carmina plectro.

Hoc erat, hoc prælagâ aliàs quod mente locuti.
 En perfecta fides, magni & promissa Parentis
 (Unâ omnis cecinit Vatum chorus). ergo agè Victor
 Surge Deus, caroque iterum te corpore misce
 Spiritus omnipotens. Laceros subit ilicet artus
 Spiritus, ac membris rediit vigor. ille renasci
 Sordibus absterfis visus ; ceu flava nitescit
 Lamina jam excocti purgatis fœcibus auri.
 Ales odorato qualis renovata sepulchro,
 Aut pennis Aquila exutis, positâque senectâ :
 Talis erat, tumulto spoliū cum funebre linquens,
 Sindona collectam fragrantiaque unguine vela,
 Emicuit Christus, non morti obnoxius ultra,
 Terrenâ nec mole gravis, sed luce decorus,
 Et cui per solidum detur via marmor eunti.
 Turbato injectus pelago, cetique sepultus
 Visceribus Jonas, postquam tres ordine noctes

Egerat, incolumis monstrosâ emerſit ab alvo.
 Sic gremio egreditur terræ, jejunaque Mortis
 Viſcera fruſtratur, faucesque eludit hiantes.
 Ac veluti diſcuſſâ umbrâ, penitusque ſubactis
 Nubibus inſultans, aliufque idemque reſurgit,
 Et croceò arridens cultu formoſus Eous

Cryſtallum illæſam vibranti trajicit ictu :
 Sic Dominus, vitæ remeat felicis ad auras;
 Poſt tenebras faciles, ſic deinde ſopore ſolutus
 Procedit ſpenſus thalamo ; ſimiliſque Giganti
 Exilit, ac ſtrato victor procurrit Averno.

Pſal. 18.

Ipfâ etiam, æterni quæ pignora ſervat amoris,
 Vulnere ſuavè rubent, vivos jaculantur & ignes.

Purpurei toto radii ſe vertice fundunt,
 Quot priùs infixæ ſteterant ad tempora ſentes.

O decora ! ô rerum miracula ! quantus in auras
 Poſt longos M A R I Æ gemitus, lacrymaſque clien-
 tum

Surgit; & immotâ ſignati rupe ſepulcri,
 Integræ clauſo ceu quondam ventre Parentis,
 Exoritur, victâ ipſe ſibi jam morte ſuperſtes !
 Protinus aligeri Juvenes ruere æthere ab alto.
 Stant nivibus pallæ ; vultu micuere coruſco
 Fulgura, ſemianimis viſuque exterrita paſſim
 Dirigit Latius, cuſtodia vana, ſatelles.
 Tela manu delapſa ſolum ſtravere : viro vir,
 Arma armis permixta jacent. Vix mente receptâ
 Diffugiunt Solymam, fulmenque inſtare pavescunt.
 Concuſſa intremuit tellus, revolutaque moles
 Saxea ſpeluncam tumuli nudavit inanem.

Pſal. 87.

At Chriſtus, Lethi imperio qui ſolus iniquo
 Liber, & umbroſum latè populatus Avernum,
 Nequicquam obſtructo extulerat ſe carcere victor,
 Evolat ad Matrem. Tacito ſecreta reſeſſu
 Illa ſedens, animoque inter diviſa ſepultas

Nati reliquias mentemque sub ima profectam ;
Et confossa pio , non & dejecta, dolore,
Lugebat spe damna levans, votisque ciebat
Maturos reditus ; qualis gemebunda columba,
Aut sola amissos suspirans turtur amores.
Nunc solito adspectu lætos accendit honores
Antè laborantis tristi caligine Lunæ,
Pallentesque novo reficit Sol lumine vultus.
Scilicet & Mortis spolia, & de Rege barathri
Primitias Genitrici offert ; Christumque secuti
Indigetes circùm densi glomerantur euntem,
Ac Dominam studiis petiere ingentibus acti.

Reginæ parvas etiam venere sub ædes;
Quos tumulis Christus cineres eduxit apertis ;
Consumptosque novans artus, propriisque beatos
Dotibus illustrans, nec pondere tarda caduco
Membra dedit, secura necis, secura doloris.
Qualia inauratis effingit nubibus ardens
Signiferæ Dux ille viæ, radiataque Titan
Sæpè sui simulacra, alios parit aëre soles.
Successere humili lectissima corpora tecto
Christiparæ, Superùmque alacres plausere manipuli.
Nec cuiquam interea visi auditive profano ,
Terrisque evecti delapsique æthere Christum
Ingeminant, cælo ac terris venerabile Numen ;
Et Matris festo pia carmine pectora mulcent.

O Mortis Domitor, Debellatorque Draconis ,
Agnus, monstri ferique Leo prædator Averni !
Tu mare, tu terras molitus & æthera, Verbum
Omnipotens. tibi mille acies, quæcumque coruscis
Aligerùm castris legio est. tibi nomina mille ;
Regnaque nec metis rerum, nec tempore clausa :
Sed gentes hominum pretiis immanibus emptas,
Captivosque Erebi manes, arcemque beatam
Cælestum æterno imperio complexa potestas.

Gaude, Christe, tuo ; Nati gaude, Alma, triumpho ;
 Mox proprio : victæ debetur laurea Mortis
 Altera, virgineoque exurget palma sepulcro.
 Jam felix, summos jam præcipe Mater honores,
 Et quæ digna manent regnando præmia cælo.

CHRISTUS

COELO INVECTUS.

*Triumphî divini spectator & præco David canit hîc
 Poëma variis è Psalmorum locis tessellatum ; as-
 persis etiam nonnullis aliunde sententiis, quarum au-
 tor idem qui Regium vatem agebat Spiritus.*

AUREA sublimi Christus convexa triumpho
 Invehitur, plenis cæli cui se obvia portis
 Agmina fudere Aligerûm, Patrumque manipuli
 Terrâ exultantes reducem super astra sequuntur.
 I, David, Vatesque Deum Proavusque Nepotem
 Aeriâ sectare viâ. me pulvere inerti
 Reptantem, & frustra conantem assurgere, corpus,
 Pigra tenet moles, cælestesque invidet auras.
 Ardua tu mentis celeri multò antè volatu
 Permensus spatia, & superi vetus advena mundi.

Hauferat ætherios regali pectore flatus ;
 Transmissoque animo ventura in secula Christum,
 Magnaque Oliviferi collis spectacula longè
 Ceperat admirans : manibus tum nablia Vates
 Increpuit ; sacris tum cantibus ora resolvit.

Latisonum clangorem inter Deus, ecce, tubarum
 Ascendit ! Captivæ Animæ ducuntur in altum,
 Libertæ Domini, & donis potiuntur opimis.
 O ego felix possim pars esse catervæ,
 Victoremque sequi, & citharâ tua dicere facta,
 O mea Progenies ! non me fulgentis Olympi

Sidereâ chorus ille lyrâ, non carmine vincet,
 Dicam Orci domitas acies, portasque revulsas
 Carceris inferni: Mortis feralia regna
 Disturbata canam, & Stygio datâ vincla Draconi;
 Quem teneri illudant pueri intactæque puellæ,
 Te duce gaudentes, dirum, sed inanè frementem.

Conscensâ tu nube equitas: tibi millia dena
 Aligerum, currus pennis per mutua nexis
 Intextent; oculisque rotæ stellantibus ibunt
 Fulguris in morem. Vitreæ super aëra lymphæ
 Nectareos, veniente Deo, liquantur in imbres:
 Et volvi assidui miris concentibus orbes
 Suavius astra rotent Domino modulata recepto.
 Tuque prior, tu laude Deum celebrare memento,
 O dilecta Deo & genitum visura Tonantem
 Abrami Soboles; cælique ad jura vocandæ
 Ifacidas inter nullo discrimine Gentes;
 Scendenti Domino cæli super ardua, quâ se
 Purpureo exoriens tollit novus æquore Titan,
 Plaudite, adorato gratantes plaudite Regi.

At vos, queis superi custodia credita Regni,
 Aligeri Proceres, valvis bipatentibus altè
 Regem, sidereo tollit quem Gloria curru,
 Accipite ingentem & spoliis hostilibus auctum.
 Quis novus hic superis adventat sedibus hospes!
 Quis tantâ se mole ferens, & luce coruscus
 Regiâ, honoratum summis caput admovet astris!
 Armipotens Dominus, partâ certamine duro
 Illustris palmâ Dominus, victricia cælo
 Signa inferre parat. Portas diducite latè
 O Proceres, portas æterno adamante rigentes:
 Et, sua quem volucris sublimem Gloria curru
 Extulit, ætherii Rex ingredietur Olympi.
 Axe triumphali nam quis petit æthera Victor,
 Quæritis, eximio Regis spectatus honore?

Bellipotens Dominus, Mortis qui Victor & Orci,
Humanæ assertor gentis, sacroque Sequester
Sanguine, discordes cælo componere terras
Instituit ; pacemque novam, nova fœdera sanxit :
Hic ille imperio patrii succedet Olympi.

Ocyûs indomito postes adamante superbos,
Terrigenæ obstructos fatali crimine postes,
Alati referant Proceres, æthramque recludunt.
Ille subit cantusque inter plaususque clientum.
At Pater omnipotens, rerum inviolabile Numen,
Mobile depressi supra laquearia mundi
Impellit solium, Natoque occurrit ovarianti.
Sancta coruscantem ducunt Animalia sellam;
Stellifer auratis Bos cornibus, igne jubatus
Colla Leo, præpesque avium Regina volanti
Juncta Viro, cervice jugum concorde ferentes.
Subsedere poli ; lateque sub axe sonoro
Æterni incurvata tremunt fastigia montis.
O Patris, ô Nati non enarranda voluptas,
Osculaque, amplexusque, & mutuus ardor Amoris !
Splendida inaccessi caligo luminis obstat,
Mortalesque hebetat visus : jam buccina cesset,
Jam citharæ ; & cæli penitus templa alta filescant,
Dum Patrem alloquitur divino Filius ore.

Ecce redux, Genitor, perfecto munere J E S U
Nunc adsum. Tibi non taurus mactatus ad aras,
Non hirci fusus placuit cruor. at mihi corpus,
Servilem aptasti formam, mortalia membra.
Tunc, proprio, dixi, venio scelera omnia lotum
Sanguine, nec Patris Natus mandata recuso.
Virginæ inclusus jacui penetralibus alvi :
Hibernæ mediâ exortum caligine noctis,
Purpureo non aula sinu, non ara recepit
Ture sacro votisque calens : Regemque Deumque
Sordida vix stabuli hospitio præsepia natum

Admisere : infans vagitu concava Verbum
 Saxa percussi, & lacrymis tenera ora rigavi.
 Exin probroso signatum stigmatē copus;
 Exilia, & latebræ, & rerum gravis omnium egestas,
 Et mundi artifices opera ad fabrilia palmæ:
 Longa famēs, densusque labor, frigusque calorque;
 Ingratūque odium vecorsque calūnia vulgi,
 Nota tibi, Genitor, seriesque immensa dolorum.
 Dedecorum exhausti calices, quos ipse bibendos
 Porrexti, felle undantes. Crux, ultima vitæ
 Meta mihi. mox & tumuli feralia claustra
 Ingressus, Stygiiue adiens spelæa latronis,
 Hæc spolia, hos refero Limborum è compede Manes.
 Vixi, & quod dederas munus, Pater alme, peregi:

*Ego te clarifi-
 cavi... & nunc
 clarifica me tu
 Pater &c.
 Joan. 17.*

Discipulis nomenque tuum legesque retexi.
 In terris nostro tibi gloria parta cruore:
 Et nunc, orbe prior cursuque volubilis ævi
 Gloria, quam fontis fecundâ è luce paterni
 Usque trahens, ter jam undenis peregrinus ab annis
 Dissimulo, reducem collustret Gloria Natum.
 Filius hæc; Pater æterno sic rettulit ore.


*Et clarificavi,
 & iterum cla-
 rificabo.*

Aligerū obsequiis, Reges ducentibus astris,
 Terque per attonitas demissis vocibus auras
 Hactenus, & crebris insignem reddidit orbi
 Prodigii Natum Genitor: nunc ætheris alti
 Imperium sine fine dabit, regniue coronam
 Tergeminam: tantorum hæc præmia certa laborum.
 (Sic Dominum affatur Dominus) Par Nate Parenti,
 Heic dexter mihi, Christe, sede, capita æmula donec
 Subjiciam invictis pedibus; mediosque per hostes
 Sceptra geras, quos terra parit, quos Tartara servant.
 Nempe ego te sancta æternum per lumina lumen,
 Auroræ ex utero ceu purum denique rorem,
 Progenui. Aligeris tantò caput altius effer,
 Aligerū quantò præstantior ordine, Natus

Augusto

Augusto exuperas famularem nomine turbam.

Quæ-vis-cunq; Patrē (neque enim patiere repulsam)
 Posce; dabo: latè Dominum, mundique supremum,
 Constituam Heredem. Tibi ferrea virga rebelles
 Profubiget: testarum instar, sublimia Regum
 Confringes capita; & flammis septum ante tribunal
 Discinctosque Duces dejectoque ore Tyrannos
 Nudatos latera, & palmas post terga revinctos
 Cum populis coges plangentibus. omnia Judex
 Arduus ore tonans seclorum crimina coram
 Expendes, penitusque accensa in Tartara merges;
 Idem iusta piæ decernes præmia genti,
 Et tua consortes gaudens in regna vocabis.
 Intereà humanam tibi fas componere sortem,
 Ac placido infestos moderari numine casus.
 Cum mea terrigenum in noxas exarserit ira,
 Ultricemque reo pestem meditabitur orbi;
 Tu latus effossum, plantarumque objice plagas
 Et manuum. pictis appensus nubibus Arcus,
 Fœderis antiqui testis fidissimus, arcet
 Diluviem, ut nimbis obductus inhorruit aër.
 Haud secus accensum in terras oblata furorem
 Vulnere placabunt: dextrâ extorquere trifidum
 Plagarum auxilio poterit Clementia fulmen.
 Audiat hæc Cælum, Tellusque & cœrula Pontus
 Inferni, Superique ac terris didita turba,
 Omnes audito subsidant nomine J E S U
 Suppliciter proni; nec majestate minorem
 Progeniem augusti dextræ assedisse Parentis
 Confessæ, J E S U celebrent præconia linguæ.
 Sacra Sionæi supra fastigia Montis
 Luce coronatus, regnandum insedit Olympum.
 Numine sic David fruitur, Magnique Nepotis
 Præcipit æternum decus, & pars ipse triumphi
 Præfago Vates agitat sua gaudia cantu.



THE ANDRICON
LIBER III.
CRUCIS ORACULUM.

IN CHRISTI
SUPREMA SEPTEM EFFATA
PROLOGUS.



DESTE, viri Christiani,
Quò Concionem advocat
DEUS ORATOR.
Venerabundo silentio, Christi
Auditores,

Excipite ab ore morientis
Oracula vitæ immortalis.
Theorhetorem admiramini,
Divinorum Actorem

Inhumana Patientem;
Memorem etiam Inimicorum,
Sui panè immemorem.
Ornatum si quis desideret;
Tantò Elegantior tibi sit,
Quantò pro te Deformior.
Stigmata Corporis,
Amoris Schemata videantur.
Novo dispositionis ordine
Veniam Carnifici, Latroni Regnum,
Matri Discipulum,
Patri Spiritum tribuit.
Quid non Ars possit Divina?
Invenit, quo vel Deicidium excusaret.
Quæ porrò dicendi vis & contentio!
Latus abruptit, Sanguinem profudit,
Animam efflavit.
Advola ad purpuratum Crucis Suggestum,
Quisquis discere Artes cupis
Orandi, Agendi, Patiendi.
Delectationem ne quæsieris:
Dolorem Golgothea Rhetorice poscit.
Utinam, quàm certò Docet,
Tam vehementer moveat,
Non minùs certè Corda, quàm Saxa!

LEONARDI FRIZON
VATES EVANGELICUS
PATIENTIS CHRISTI SPECULATOR,
EJUSDEMQUE PRIMO DE CRUCE EFFATO
Pro Transgressoribus rogantis.

AUDITOR ET PRÆCENTOR.

SIVE

CAPUT ISAIAE LIII.

CARMINE PARAPHRASTICO REDDITUM.

*Non Prophetiā
mibi videtur
texere, sed E-
vangelium.
Hieron.*

1. **Q**UO rapis, attonitum sacra ad spectacula,
Vatem

Omnipotens? seclis medium venientibus inferis,
Intima lux, & mens animi, tacitoque repostos
Alloquio insinuas casus! Audita quid urges
Prodere, & Ifacidis arcana evolvere fata?
Scilicet ingrati duras spargentur in aures
Hæc populi; nec tanta fidem miracula quondam
Invenient. Cui rerum Opifex, Vis maxima Patris
Illuxit, nostroque latens in corpore Numen?

2. Ceu tener, inculto deserta per arida campo,
Fallente attollet se furculus incremento;
Jesseæ radicis honos, cælestis & auræ
Afflatu crescens & lumine solis amico;
Verum hebetes oculos fugiens, obtusaque corda.

1. Quis credidit auditui nostro, & brachium Domini cui
revelatum est? (Ioan. 12. & Rom. 10. Domine, quis credidit,
ex versione LXX. Interpretum)

2. Et ascendet sicut virgultum (lactens, Hebr.) coram
eo, & sicut radix de terra sitienti. Non est species ei, ne-
que decor, & vidimus eum, & non erat aspectus, & desi-
deravimus eum.

Virginæa exurgens florescet Parvulus alvo,
 Certa Dei Soboles : at Fabri sanguine census,
 Terræ ignotus, egens, Cæli Puer. undique sordet
 In tenuis morem vulgi : natusque sub umbrâ
 Obscuram extremas vitam devolvit in umbras.

Nullus honos, formæ vestigia nulla prioris.

Ut vidi, ut stupui, ut me sacer obruit horror !

Cap. 52.

Et vidisse tamen, vel sic, juvat. ô mihi clara

Opprobria, & pulchræ divino in corpore sordes !

³ Omnia vesanæ expertus ludibria turbæ,

Omnibus absumptus pœnis, velut ima virûm fœx,

Calcatufque solo & furcâ sublatu atroci,

Consciûs humanæ didicit miserescere sortis.

Despectum, irrisum, indecorem, dejecta pudore

Ora putes tegere, atque suis se involvere probris.

Cap. 50.

Divulsas rapido ungue genas, sputisque alapisque

Squallentes cerno & pressos velamine vultus,

Serviat ut scenæ ficti sub imagine Vatis ;

Jam summo ad calcem perductum à vertice vulnus.

⁴ Ah, verè, nimium & nostros miserate dolores ;

Unus pro cunctis infando occumbere letho

Dignate, & tantorum oneri subiisse laborum !

Væ, cœci Abramidæ ! nimirum indigna propago

Cæli odiis noxisque urgeri, ac verberare diro

Percussum, fœdâ laceris elephantide membris,

Credidit. Ille autem perituræ crimina gentis

Sustulit ; & nobis quæ debita fontibus, insons

³ Despectum, & novissimum virorum, virum dolorum,
 & scientem infirmitatem, & quasi absconditus vultus ejus,
 & despectus ; unde nec reputavimus eum.

⁴ Verè languores nostros ipse tulit, & dolores nostros
 ipse portavit, & nos putavimus eum quasi leprosum, & per-
 cussum à Deo, & humiliatum.

⁵ Ipse autem vulneratus est propter iniquitates nostras,
 attritus est propter scelera nostra, disciplina pacis nostræ su-
 per eum, & livore ejus sanati sumus.

Vulnera & ultrices Patris obviis excipit iras.

Icta cruore sacro divinæ fœdera pacis :

Terrigenasque haustu calicis medicatus amari est,

Ipse malo languens alieno, & lividus artus,

Quos atri maculat penitus vis acta veneni.

⁶. Nos, trepidas ut oves (campo cùm infestus aperto

In medias ruit, & vasto lupus æquore turbat,

Sanguineam exercens rabiem) sic flebilis egit

Transversos, cælique à tramite dispulit error.

Criminibus via secta ; & non remeabile Averni

Quisque ingressus iter. Vindictæ ingentis honorem

Pro merito, & læsâ pro majestate reposcit,

Sacrato imponens capiti scelera omnia, rerum

Arbiter, & tantâ consumpsit cæde furorem.

⁷. At non invitus (Christo mora libera mortis,

Et genus, & vitæ pariter mortisque potestas)

Non conjuratis armisve dolisve subactus

Feralem ad pœnam rapitur. sese ipse suumque

Devovit caput, & Solymæo tradidit hosti.

Qualè bidens, manibus nil oblectata poparum,

Ducitur ; & nivei tonsores velleris, agnus

Fert placidus, nullisque resolvens questibus ora.

Haud secus immiti tacitus sese applicat aræ ;

Probraque ceu surdus, plagas ceu saxeus omnes

Sustinet, & crudos vorat alto corde dolores.

⁸. Agmina condensæ incurrunt petulantia plebis

Sponte suâ, & Procerum stimulis furialibus ardent.

⁶ Omnes nos quasi oves erravimus ; unusquisque in viam suam declinavit : & posuit Dominus in eo iniquitatem omnium nostrum.

⁷ Oblatus est, quia ipse voluit, & non aperuit os suum. sicut ovis ad occisionem ducetur, & quasi agnus coram ton-
dente se, obmutescet, & non aperiet os suum.

⁸ De angustia & de judicio sublatu est, generationem ejus quis enarrabit : quia abscissus est de terra viventium. propter scelus populi mei percussus eum.

Vi Leges & jura fero turbata tumultu
 Conticuere ; minaxque perorat clamor iniquo
 Judice , & infamem extorquet gens barbara pœnam ,
 Pendeat ut clavis altè suffixus acutis ,
 Sidereo dignus folio & cœlestibus aris.
 Nam quæ vel Superûm rutilâ lingua aurea flammâ ,
 Lucis inaccessæ & patriæ penetralia mentis
 Pandat, bisgenitique augustos Numinis ortus ?
 Aeterno tamen hic Soboles æquæva Parenti,
 Matre prior, velut infelix & inutilis arbor
 Stravit humum, excisus ferro ab radicibus imis.
 Illum ego (testatur sceleratæ gentis acerbo
 Idem odio Vindex immensoque actus amore)
 Mactavi, Natum Genitor.⁹ Nec publica mundi
 Victima sollennes templi procumbet ad aras.
 Opprobriô pars ne qua vacet, mortalibus ausis
 Permissi, addictumque neci, rituque profano
 Cædendum , quâ Mors ferali regnat in orâ,
 Famosas inter cautes, loca feta nocentum
 Suppliciis. pœnam cumulat pœnæ horrida sedes.
 At deforme jugum & pœnarum immane theatrum
 Religionis honos excelsique ara Sepulcri
 Clarabit ; monimentum ingens ubi rupe sub altâ
 Dives opum, dives virtutum exciderat * Heros.
 Impietas simul atque eodem Mors obruta saxo ;
 Quæque caput scelerum, plagis confecta supremis
 Sternetur, vastum, Solyme, fœdumque cadâver.
 Namque & veridico semper dolus abstinit ore,
 Et procûl intactam fugerunt crimina mentem.
¹⁰ Atque ipsum graviore manu, duroque flagello

Et erit sepul-
 crum ejus glo-
 riosum. C. II.
 * Joseph ab A-
 rimathæa.

⁹ Et dabit impios pro sepultura, & divitem pro morte sua: eò quod iniquitatem non fecerit, neque dolus fuerit in ore ejus.

¹⁰ Et Dominus voluit contere eum in infirmitate. si posuerit pro peccato animam suam, videbit semen longævum, & voluntas Domini in manu ejus dirigetur.

Immeritum obtrivit Dominus. Sic area pulsu
 Continuo sonat ; & spicis extusa, feraci
 Rursus humo subeunt redvivæ semina frugis.
 Hæc adeo spondet Genitor ; Natumque benigno
 Magnificè invitat, spes fallere nescius, ore.
 Christus Adamææ si justa piacula noxæ,
 Lustralemque animam servando impenderit Orbi ;
 Progeniem longo innumeram gratabitur ævo,
 Sidera quæ cæli, pelagi quæ vincat arenas.
 Illius arbitriis fingentur publica fata,
 Et nutus jam læta virûm fortuna sequetur ;
 Dum placidas leges, sancti mandata Parentis
 Implebit, largâ diffundens munera dextrâ.
 21. Durum exantlavit vepreta per aspra laborem
 Agricola insudans operi, fletumque cruoremque
 Addidit irriguum, & vitam pro fruge pacisci
 Sustinuit. pingues optatâ messe maniplos
 Exultans referet, cælique sub horrea condet.
 Jamque ubi parta quies, fructus spectare juvabit
 Curarum assiduos, mirantibus undique terris,
 Atque avida humanæ corda exaturare salutis.
 Alma Fides crassâ obductas caligine mentes
 Sparget luce novâ, Superûmque arcana recludet.
 Et Fidei comes ibit Amor ; simul, auspice Christo,
 Justitia effulgens melioris origine seclî.
 Diffugient tenebræ, scelerumque annosa tyrannis
 Concidet ; horribiles quorum feret hostia pœnas
 Labe carens, urbis tamen extra mœnia abactus
 Hirci execrati ritu, castissimus Agnus.
 22. Ergo illi, meritis pro talibus, agmina subdam

21 Pro eo quod laboravit anima ejus, videbit & saturabitur. in scientia sua justificabit ipse justus servus meus multos, & iniquitates eorum ipse portabit.

22 Ideo dispersit ei plurimos, & fortium dividet spolia, pro eo quod tradidit in mortem animam suam, & cum sceleratis reputatus est. & ipse peccata multorum tulit, & pro transgressoribus rogavit,

Lecta virum, aetheriae mox transcribenda Sioni.
Morte superveniens obitâ jam victor, ubi atro
Carcere securâque sedens in pace Tyrannus,
Terrarum spolia & convectas undique prædas
Servabat, manesque truci ditione premebat,
Tartareas major vires vis franget ; & illum
Prædonem solido Armipotens adamante revinctum
Exuet, infernâque pios caligine solvet.
Quin & opima suis exhausti præmia belli
Dividet, exuviisque aras ditabit ovantes.
Dedecorum augustos precio mercatus honores,
Furcam humeris Princeps velut alti insignia regni
Extulit ; ac sævo distentus robore membra,
Triste pendit onus, cæli terræque Sequester
Latrones inter medius, qui numine Patrem
Æquiparat ; non ille alieni jura decusque
Imperii rapiens furto ambitiosus inani ;
Sed quæ alii rapuere, luens : Natusque Parenti
Servorum delicta, cutisque innoxia solvit.
Improba quem Solyma & gentes fudere profanæ,
Hoc Solymam totasque piavit sanguine gentes.
Ille etiam, cùm exusta siti tabentiaque ora
Deficerent, ora ille tamen moribunda recludens
Haud vindictam inhiat, trifidos haud evocat ignes ;
Dum linguâque manuque asper circumfremat hostis,
Sævitiâque jocoseque-admixtaque probra dolori
Certatim ingeminans, suspenso illudere lætus :
At veniam implorat patriam, occurritque furori,
Æthere qui rapido infaustæ superintonat urbi.
Quâ licitum, incensis avertit fulmina votis :
Sanguinis ardentes restinxit fontibus iras.

CHRISTI MORIENTIS

EFFATUM I.

Pater, dimitte illis. Non enim sciunt quid faciunt.

Luc. 23.

2. Cor. 2;

PONE, Sionææ vindex quæ fulmina genti
 Arduus intentas dextrâ, Pater ! ah, quibus urbem
 Implicitam tenebris, rerumque erroribus actam
 Tartareis stimulat prædo, fallitque venenis !
 Si mea Judæis manifestâ in luce pateret
 Gloria, quæque ex te venit immortalis origo ;
 Nunquam hodie Cæli Dominum feralibus ausis
 Suffixentque cruci, mæque hæc in probra vocassent.
 Triste ministerium servando impendere mundo,
 Decretique tui numeros implere laborant
 Ignari, & cæco pietatem in crimine quærunt.
 At tu prima, Crucem queis imbuo, suscipe vota,
 O Genitor ! summus tibi victima cæsa Sacerdos
 Has mediâ jam in morte preces cum sanguine fundo.
 Ipse ratas Pater esse jube, si quâ tibi noster
 Dulcis amor, si quid lustralia sacra merentur.
 Talia Golgotheo suggestu exordia fecit
 Purpureus Cæli Orator. quot vulnera membris,
 Tot resonant patula ora ; fluuntque in verba cruores.
 Stat rigidis frons hirta rubis ; laniataque membra,
 Et palmæ & ferri transactæ cuspide plantæ
 Horrent : nec sannis oculos vexare potervis
 Infrænæ cessant furia ; multoque cachinno
 Cæduntur placidæ & dictis mordacibus aures.
 Ipse autem (proh digna Deo clementia !) tantos
 Sensibus accipiens æquis animisque furores ;
 Immemor ipse sui, necdum solatia Matri
 Debita perfunctus, Genitorem affatur amico

Suppliciter gemitu, & miseris placare laborat.

O pietas ! sic ille feros ulciscitur hostes !

Infandum molli prætexit nomine crimen.

Quid faceres, verè nescisti perdita, necdum

Ultricem agnoscis gens immiserabilis iram ;

Non labem antiquam generis, fontemque malorum.

Ac tibi, quæ Mōses radiatæ mystica fronti

2. Cor. 3.

Prætendit quondam velamina, nunc quoque densam

Objiciunt nubem ; & vibrantia tela retundunt

Luminis, incassum toto quæ plurima cælo

Emicuerē, gravesque oculos animosque lacescunt.

Nil jam expleta suis tangunt oracula rebus !

At vesana premens Solymos inciticia, latè

Fœda per omnigenos sparlit contagia fontes.

Naturam ingenio quamvis complexus, & arte

Lumina Cecropii vincat Geniosque Lycei ;

Ignarum arguerim, recto quem tramite culpa

Incautum & veræ defleat lucis egentem.

Heu demens ! nec quæ virtutum præmia, novit,

Nec quantæ incumbant violato à Numine clades :

Errantesque oculos Stygiæ offudere tenebræ.

In primis, quicumque odio flammatus & irâ

Exigit ultrices inimico à sanguine pœnas ;

Gloria seu mendax, furiisve accensa libido

Barbaricum infami Martem exercere duello

Suasit, ubi ardenti rapidam ænea fistula glandem

Pulvere agit, gladiis que parum sævire putatum est:

Quò ruat infelix, animæ contemptor & Orci,

Nescit, & immanes tantùm sub pectore curas

Turbidus in fratres versat superumque Parentem ;

Gaudet & infandos Christo instaurare dolores.

Parce tamen, parce ô sceleri placabile Numen,

Nunc quoque, nunc miserans ! ah, ne irrita dicta fe-

rantur,

Quæ Magnus, delubrum adolens fatale, Sacerdos

Ignea cum fletu supplex & sanguine fudit !

Adm. 7.

Teque adeò, quem non, Eoam lampada cælo
Attollens generique pio turbæque nocenti
Communem, ac lætos pariter discrimine nullo
Desuper infundens agris hostilibus imbres,
Fulminis & parcus Genitor veniæque profusus,
Molliit ; hæ Christi doceant mitescere voces,
Factaque & attonitum celebrata exempla per Orbem.

EFFATUM II.

Amen dico tibi : hodie tecum eris in Paradiso.

Luc. 23.

INFELIX arbos, genus execrabile lethi,
Ut primâ imbuitur divini aspergine roris,
Continuò lætos generoso è semine fetus
Pinguibus effundit cælo gratissima ramis.
Hos adeò fructus, hæc vitæ, morte sub ipsâ,
Munera sublegit scelerisque piamina Latro
Numinis affixus lateri, pœnâque beatus.
Ultro insultantem dictis ac sæva jocantem
Tormento in medio & supremo criminis actu,
Prædonem egregiâ censor sic voce refellit.
Heu miserum ! sic nulla Dei reverentia tangit !
Tune etiam, tu sacrilegis incessere dictis
Hunc, furiose, audes pœnâ damnatus eâdem ?
Et nos digna quidem, jamdudum & debita factis
Supplicia excipiunt : Hic verò criminis experts
Vim cunctam atque sales perfert populique patrum-
que

Immotus, sensuve carens similisve carenti.
Haud hominem vox illa sonat, quæ impenditur hosti,
Delictum exonérans, veniamque à Patre precatur.
His ubi furciferum increpuit ; dehinc lumina supplex
(Lumina ; nam palmas clavi tenere trabales)

THEANDRICON LIBER III.

III

Ad Christum tulit, &, regno cùm adveneris, orat,
 Confixi meminisse bonus dignare Latronis.
 Hoc tantum. Facili Christus sic rettulit ore.
 Immemorem me nulla dies, falsumve probavit.
 Promissis mea certa fides, haud irrita cedent
 Vota tibi. Collega Crucis, collega doloris
 Succedes cælo, regnique in parte sedebis.
 Mecum hodie felix divini luminis auram
 Accipies, vitamque feres à morte perennem.

Fortunate Latio! quis tantum ambire precando
 Edocuit? quis sic Regem captare propinquum?
 Quæ te autem Regis species objecta movebat?
 Augustæ nam quæ gemmata insignia frontis
 Aspectas, trabeæve ostrum, nitidumve superbæ
 Sedis ebur? Spinæ rigidam infixere coronam;
 Crux, folium est; totoque erumpens corpore sanguis;
 Purpura. Non isthæc animum ludibria fallunt.
 Nempe suum patrio credis super æthere regnum,
 Æternum, immensum tormenta per ultima adiri.
 Necdum etiam tenebris obtendi sidera, necdum
 Terrarum juga cœpta frementibus undique saxis
 Convelli, aut tristes referare sepulcra cavernas.
 Mira sed exuperans tranquillo pectore virtus
 Horribiles inter plagas, immania probra,
 Dum pacem, ah! rabidis moriens pacem hostibus
 orat;

Scilicet & plenis exundans Gratia rivis
 Magnificum ostendit Regem, Numenque probavit.
 Felix, umbrosas cui mox datur ire per oras
 Affusis radiis & Christi luce corusco!
 Felix, cui vastis ardentia Tartara pœnis
 Lucifugamque manum & fractos calcare dracones
 Victoris licuit vestigia magna sequenti!
 Tum quos mitis habet sanctos custodia Manes
 Abrami in gremio & terræ penetralibus altis,

Assertos Erebo supera ad convexa ferentem
Aspicias, pars ipse sacri non parva triumphi.

O mihi tam placidas audire in funere voces
Contingat, dextrumque latus servare Tonantis;
Crux ubi fatalis cæloque inscripta rubescet
Sanguineo fulgore minax ! simul arduus igneâ
Nube sedens Judex, terrarum opera omnia certis
Lancibus imponet, pœnasque & præmia summo
Dividet arbitrio, & jus irrevocabile dicet.
Ceu blandis ovibus petulantes segregat hircos
Tityrus ; infontes dextrâ, lævâque nocentum
Submotam immenso statuet discrimine turbam.
Hi, fidente solo, Stygios volventur ad ignes :
Ætherios illi colles & amœna beati
Arripiunt nemora, & stellis florentia regna.
Ne verò, ne rari animos exempla favoris
Decipiant ; neu spe miseram se lætet inani
Gens vitiis infixâ, & amans inolescere sordi.
Quin, ô, supremæ si provida cura Salutis,
Furciferi alterius memores, fatum inter utrumque
Speque metuque, viri, mistam suspendite mentem,
Consultare & dubiis maturè discite rebus.
Quàm temere cadat æternæ jacta alea sortis !

EFFATUM III.

Mulier, ecce, Filius tuus.

Ecce Mater tua. Joan. 19.

STABAT ferali sub stipite regia Virgo,
Ah, dulcem medio spectans in funere Natum,
Ipsa animo confixa, immani faucia luctu,
Jam sine Prole Parens, jam Matris nomen & umbra.
Aliger ætherio quondam legatus Olympo
Felicem ante alias cecinit coluitque Pue llam,

Gratia cui totos infudit prodiga fontes ;
 Quam Deus, illabens uteroque animoque, sacravit,
 Ac sua præsentî cumulavit Numine dona.
 At nunc, heu ! longè felicis gaudia mentis,
 Longè illi decora & plausus gratantis Olympi.
 Nunc Domino erepto viduamque orbamque dolores
 Exercent, animamque immenso vortice torquent.

Digresso Genitrix olim super anxia Nato,
 Dum trepido amissum quærit per compita gressu,
 Multa rogat Solymasque nurus Solymasque puellas,
 Dilectum si quâ vidissent fortè Puellum.
 Materno hæc desiderio, gemituque vicissim
 Quærere perculsæ. Qualis tuus, Optima, qualis
 Ille tuus ! tecum amissos quæremus amores.

Ah, delapse Puer cælo, mea sola voluptas !
 Quâ tua, quâ caros exscribat imagine vultus
 Purpureos niveosque Parens ? ubi lilia vivâ
 Mistâ rosâ velut areolas pinxere genarum.
 Aureus effulget vertex ; nitet æmula palmæ
 Cæsaries foliis, nigroque simillima corvo.
 Lacteolæ mites oculi de more columbæ,
 Illecebrisque micant, vivâque à luce renident :
 Coralio rubuere madentia nectare labra.
 Collucent teretes palmæ, ceu plurimus auro
 Stellantes digitos hyacinthisque annulus ornet.
 Major & humanâ species, blandissima toto
 Corpore Majestas Virtusque augusta coruscat.
 Quis desiderio, amisso pignore tanto,
 Sit modus, aut quæ digna meis solatia damnis ?

Talia divino Salomonis carmine Mater
 Visa queri ; donec longo jam exhausta labore
 Spectatum templo in medio Patrumque coronâ
 Reppetit admirans Puerum, gaudensque reduxit.
 Nunc vulgi insanos fremitus æstusque secuta,
 Raptatum ad pœnas totâ mæstissima Christum

*Qualis est Di-
 lectus tuus...?
 Dilectus meus
 candidus &c.
 Cant. 5.*

Quæsit Solymâ ; quæritque gemitque repertum.

Quàm dispar tuus ille sibi ! quàm decolor ille
Aureus, ô Virgo ! tristi quàm lividus ore !
Verticis, en, sacro florens intonsus honore
Nazaræus hic est ! manibus direpta potervis
Cæsaries ; quæ pars superat, concretaque tabo
Et capiti immixtis silvescit squallida dumis.
Ut sputa indecores onerant graveolentia malas
(Ludibrii genus !) atque atro confusa cruori
Sideream incessant faciem, cælestiaque ora,
Lurida jam plagis colaphisque immitibus ora !
Vix adeo, vix ipsa suum dignoscere, vultusque
Informes potuit, totos & inhorruit artus.
Nec verò pudet opprobrii : confessaque Matrem,
Officiis, si quâ liceat, membra ægra trahenti
Subveniat durum per iter : sparsumque cruorem
Sublegat, heu, pedibus calcari quæsta profanis.

Divinæ indignum nil majestate Parentis,
Nil humile aut fractum patitur. Non illa dolore
Dirigit ; linquente animo non illa suorum
Collabi inter visa manus. invicta theatro
Golgotheo stetit, & tragici spectacula furoris
Sustinuit, propriâque oculos in cæde morata est.
Sub pedibus titubante solo, jam jamque ruinam
Cum trahat & scopulis disjunctet Golgotha ruptis,
Ipsa immota loco & diræ vicina Cruci stat.

Gratia, ut indomito surgentem robore palmam,
Mentemque & fragiles sustentat corporis artus.

Haud minùs illa tamen cæco depascitur intus
Supplicio. collectus amor Matrisque Patrisque
Corde in virgineo, Naturæque addita Virtus,
Unigenæ merita, & truculentæ crimina gentis,
Immensum teneræ incumbunt simul omnia pondus.
Mille agedum compone cruces, uncosque rotasque,
Mille neces. levia hæc ; & quidquid barbara quondam

Invenit

Invenit feritas, quidquid vesana Tyrannis
 Christicolas mox in pugiles exprompsit acerbis,
 Famoso ingenio & Stygias grassata per artes.
 Ante aras durâ Symeonis voce reclusus
 Jampridem, tristi oraclo, fert mysticus ensis
 Palmam sævitæ, pœnarumque unus acervos
 Omnigenûm exuperans, & ferro & dirior igni,
 Per fibrasque acer perque ipsam rumpere mentem.
 Sed tacito vastos sub pectore continet æstus,
 Anxiferamque obnixa premens vim atrociûs urget;
 Ac forti tantûm gemitu fletuque decoro
 Testatur vivo mollissima viscera Mater
 Discindi sensu, & Nati cruciatibus uri.
 Concutit misero Christi Mariæque dolores
 Respondere sibi, & duplicis commercia lethi.
 In luctus animosa tuos, miseranda vel hosti,
 Ah! Genitrix, ah! parce oculis Natique tuisque.
 Ut stare orbatam J E S U S cruce vidit ab altâ,
 Fatiferoque ictam præcordia ad intima telo;
 O Mulier Fortis, nec mole oppressa malorum,
 Ecce tuus (simul hæc multâ vi pectore ab imo
 Eluctans, caro advertit languentia Alumno
 Lumina, & obtutu placido nova munera signat)
 Hic nostri instar erit; viduam hoc solare senectam.
 Ore dehinc Juvenem appellans oculisque remulcet
 Adstantem, & Nato pariter Matrique dolentem;
 Dilectum Juvenem ante alios, & flore pudoris
 Virgineo insignem. Pietas interrita casu
 Fecerat extremo comitem, truncoque propinquum,
 Unde suus pendebat amor. nam cetera fœdo
 Turba metu Sociûm diffugerat: ilicet horto
 Sparsit Olivifero terror, latebrisque recondit.
 Carnifices inter solus turbamque furentem
 Constitit hic, Dominum fata ad suprema securus;
 Et Mariæ in casus Juvenis Zebedæus omnes

Assecla, nec spem tantam agitans, fidissimus hæsit.
 Cui Christus moriens. Nati tu concipe curam :
 Exemplis accède meis, succède perenni
 Obsequio, Matrem ac Dominam veneratus eandem.

Felix fortè piâ, fortunatusque dolorum
 Ille Comes, sua quem vocat ultro in jura Theander !
 Nimirum hoc aliquid majus, quàm nocte supremâ
 Per cœnam, divinæ inter præludia mortis,
 Cervicem augusti gremio requiesse Magistri.
 Tempore quanquam illo Socios stupor altus habebat :
 Dumque metu suspensi hærent, dumque omine diro
 Turbati inter se mussant, atque ipse latronis
 Infandum trepidat Cephæ exquirere nomen ;
 Pectoris hospitio & noto confusus amorì,
 Prodere prodentem Christo parcente, Joannes
 Elicit indicium. porrecto dextera libò
 Præscia, vipereo cœcum sub corde venenum
 Tartareumquæ nefas furialiaque ausâ retexit.
 At partes nunc ipse suas, sua munia tradit
 Rex Superùm ; & Matrem, toto quæ carior orbe,
 Assignat famulo, supremi pignus amoris.
 Heredem ipse novis tabulis & sanguine sacro
 Scripsit, vos, scopuli, testes, & Golgotha Christo.
 Ac sensum Natique Deus Matrisque vicissim,
 Mirâ voce potens, communem afflavit amorem,
 Cordaque cælesti junxit castissima vinclo.

Qualis ubi invidiâ præceps furisquæ Cæinus
 Infontem, & niveis similem, quos pastor agebat
 Pinguia sacra litans, agnis mactavit Abelem,
 Fraternoque rudem violavit sanguine terram
 (Prima, nec expertæ documenta immania Mortis !)
 Horruit infelix, & jam non vana minatum
 Eva parens didicit præsentì funere Numen.
 Prolis at ereptæ miserans solatia fecit
 Prole aliâ, Sethumque Deus subjecit Abeli.

THEANDRICON LIBER III.

341

Sic populi rabido Isacii livore peremptam
Progeniem lugens, semenque caputque piorum,
Alterum ab alterius suscepit funere Natum
Diva parens. genus inde novum, nova pignora sur-
gent.

Primigenæ partu ante alias felicior omnes
Virgineo, & solitos Matrum haud experta labores;
Nixibus hîc quantis abrupto corde minorem
Parturiit sobolem! tunc inter carmina læta
Aligerum; nunc sacrilegæ convitia turbæ,
Scommata Avernalis stridore accensa colubri;
Speluncâ in mediâ tunc clarescentibus umbris;
At nunc deficiente die, pallentibus astris.

Nos quoque, nos, primæ extinctos jam crimine
Matris,

Una omnes dio recreatos semine adoptat
Virtutumque virumque Parens: nos posthuma proles
Christiparæ orbatæ subito succrevimus ortu.
Humanæ illa vicem gentis Zebedeïa gessit
Progenies. Fratrem, nec servi nomine dignum,
Me sibi Christus amat, Genitrici adjungere Natum.

Sic ô! sic Matrem præsta; Natum ipse vicissim
Rite geram! finge, Alma, tuum, geminumque
Joanni,
Nec Christo absimilem, atque indignum sanguine
tanto.

LEONARDI FRIZON EFFATUM IV.

Priorem hanc *Deus meus, Deus meus, ut quid dereliquisti me?*
primi versus *Matt. 27.*
partē ita Chri-
stus pronun-
tiavit ex He-
braeo : qua sic
habet ē Græca
versione LXX.

PSALMI XXI. PARAPHRASIS.

O DEUS ! ô scelerum non exorabilis ultor !
(Non ego te Patrem solito jam nomine dicam ;
Dulce Patris rigido mutasti Iudice nomen)
Huc illos adverte oculos, quorum imbuis æthram
Luce sacrâ, noctisque horrentes discutis umbras.

1. Deus, Deus
meus, respi-
ce in me,
quare me de-
reliquisti ?

Respice me, Christi indecores nunc respice vultus.
O Deus ! heu, quianam morientem tu quoque Na-
tum

Longè à sa-
lute meâ ver-
ba delictorū
meorum.

Hostiles inter furias, sævosque dolores

Infontem, & longè meritum potiora relinquis ?

Nempe Adamae delicta immania prolis,
Supposui queis me ipse reum, pœnisque volentem
Addixi, optatam procūl avertēre salutem.

Ferrea vox scelerum, cæli ad convexa remugit,
Nec patitur nostros audiri ex æthere questus.

2. Luctifono incassum lucem clamore replebo ;
Ut frustra, sub nocte, tuas clamoribus aures
Montis Oliviferi funesto abjectus in horto
Appetii, statio nostrorum ubi prima dolorum.
Nec verò insani quisquam mihi nomen iniquus
Impingat, vanasque preces derideat ultro
Insultans inopi rerum, auxiliumque roganti.

3. Tu sanctam ætheriæ Solymes, fulgentia templa,
Sedem habitas, Deus, Isaciæ laus unica gentis:

2. Deus meus, clamabo per diem, & non exaudies ; & nocte
& non ad insipientiam mihi.

3. Tu autem in sancto habitas, Laus Israël.

Mosæum hospitio nec dedignatus amico
 Legiferæ delubrum Arcæ; nubisque per umbram
 Aurea majestate implens penetralia, sacris
 Ipse tuis aderas. 4. In te velut anchora jacta est
 Nunquam expectato Patrum spes cassa favore.
 Incolumes tua dextra dedit, mediisque malorum
 Fluctibus exemptos placido confidere portu
 Annuit. 5. Orantùm quoties clamoribus æther
 Insonuit, non tarda salus pia vota sequuta est:
 Irrita nec dubios inter fiducia casus
 Erubuit, sædamque tulit delusa repulsam.

6. Tenuis ego, ac dudum subrepens pulvere vermis,
 Nunc rigidus attritus pendens è caudice; nec jam
 Forma super, vix umbra mihi, confusaque imago
 Semihominis, monstrum invisum, seu publica labe,
 Terrarum opprobrium, plebisque & ludus & horror.

7. Qui me cunque oculis, expositum ad spicula si-

gnum,
 Signum infelici præfixum stipite lustrant;
 Protinus ostentum exagitant lacrymabile, acutis
 Sannarum aggressi telis; risuque feroces,
 Projectisque labris & adunco illudere naso,
 Succussant capita & linguis convitia jactant.

8. Scilicet ex genitore olli suspensa Deo spes.
 Illum adeo eripiat, salvumque à morte reducat,
 Si probat ipse suum, atque ingentibus asserat actis.

4. In te speraverunt Patres nostri, speraverunt, & liberaasti
 eos.

5. Ad te clamaverunt, & salvi facti sunt; in te speraverunt,
 & non sunt confusi.

6. Ego autem sum vermis, & non homo; opprobrium ho-
 minum, & abjectio plebis.

7. Omnes videntes me, deriserunt me; locuti sunt labiis, &
 moverunt caput.

8. Speravit in Domino, eripiat eum; salvum faciat eum,
 quoniam vult eum.

9. At tu me clausâ extractum complexus ab alvo,
 Spes mea, virgineoque ex ubere Matris, alumnum
 Fovisti exceptum gremio. 10. Jamtum mihi Numen,
 Primitiasque tibi vitæ, cursumque sacravi,
 Antè sub ærîi quàm luminis editus auras.
 Et concreta mihi Pietas, adolescere mecum
 Relligio visa est : nec pars ævi ulla vacavit
 Jurato immunis cultu. ne me, Optime, solum
 Destituas ; sanctique memor quæ vincula nexûs
 Adstringant, præsens sociali numine firma.
 11. Horrida quippe instat duri tritura doloris :
 Nec quisquam auxilio subit, atque inimica refellit
 Agmina, sed longe absistunt, fugiuntque propinqui
 Sanguine ; & infidos pudet, agnovisse, sodales,
 Tristitia ceu metuant diræ contagia noxæ.
 Ac si quos, molli tactos præcordia sensu,
 Haud pudor avertit mistâ formidine ; & hostes
 Per medios stat mœsta Parens, & rara Parenti
 Juncta manus comitum ; suspensum haud ulla juvandi
 Copia. 12. Concurrunt acres in me undique tauri,
 Pingues, indomiti, & validâ cervicè laceffunt,
 Inclusumque feris obnixi affultibus urgent.
 13. Rictu inhiant hostes avido, dentesque cruentos
 Exacuunt : quo more leo rugitibus ardens,
 Quem longa impasti stimulant jejunia ventris,
 Mite pecus rapit & vasto vorat improbus ore.

9. Quoniam tu es qui extraxisti me de ventre : spes mea ab
 uberibus matris meæ, in te projectus sum ex utero.

10. De ventre matris meæ Deus meus es tu ; ne discefferis
 à me.

11. Quoniam tribulatio proxima est ; quoniam non est qui
 adjuvet.

12. Circumdederunt me vituli multi ; tauri pingues obsede-
 runt me.

13. Aperuerunt super me os suum ; sicut leo rapiens &
 rugiens.

14. Sanguinea eluvio, venis undantia ruptis
Flumina præcipitant : compagibus ossa soluta ;
Dispersi frustatim artus, corpusque recessit.
15. Pectore sub medio liquuntur cerea corda,
Quæ teneri duram in gentem vis urit amoris ;
16. Coctilium ritu testarum arentque rigentque
Cetera dum succo defecta & robore membra :
Linguaque adhærescens siccas coquit aspera fauces.
Jam vitâ exhaustâ, gelidæ me in pulvere mortis
Stravisti, tumulique incumbo cernuus umbris.
17. Eheu, quàm circum densi latratibus instant
Et rodunt rabido ore canes ! obsedit inermem
Concilium infaustum Solymæ, proceresque maligni,
Ac nimum studiis Procerum servire paratum
Vulgus, & innumeris collecti à gentibus hostes.
18. Humanam assiduas, grave opus, versare salutem
Transfodere manus & acutâ cuspide plantas,
Quæ cæli sua per vestigia sternere calles
Angustosque aditus exemplo aperire laborant.
Plagis ossa resecta, rubentibus oblita rivis,
Luxaque, distentosque extant numeranda per artus.
19. Spectant læti odio & successu criminis hostes :
Detractasque mihi vestes, ut opima tulere
Partiti inter se spolia; & non futile textum

14. Sicut aqua effusus sum : dispersa sunt omnia ossa mea.
15. Factum est cor meum, tanquam cera liquescens, in medio ventris mei.
16. Aruit tanquam testa virtus mea, & lingua mea adhæsit faucibus meis : & in pulverem mortis deduxisti me.
17. Quoniam circumdederunt me canes multi : consilium malignantium obsedit me.
18. Foderunt manus meas & pedes meos : dinumeraverunt omnia ossa mea.
19. Ipsi verò consideraverunt & inspexerunt me : dividerunt sibi vestimenta mea, & super vestem meam miserunt sortem.

Talaris tunicæ, damnoſo exercita ludo
Carnificum forti ſubicit manus : ac mea rident
Vulnera, quosque ipſi ludos fecere dolores.

20. Ne verò, ne me auxiliis hoc cardine rerum,
O Domine, ô trepidos nunquam fruſtrate clientes,
Orbatum patiari : ſed huc adverte benignos
Obtutus, Natumque manu defende potenti.

21. Intactam ſcleri hanc animam, caput hoc tibi ſa-
crum

Subtrahæ præſenti exitio ; frameamque minacem
Et noſtro intentam lateri procùl excute ſævi
Militis arma manu : vindex frange hoſtica tela ;
Vimque canum rabidam & morſus compelſce fu-
rentes.

22. Comprime ſanguineos riſtus irasque leonum ;
Terribiles cornu frontes averte ferarum ;
Afflictosque artus, humilem diſcernere prædam,
Ah, prohibe miſerans Opifer ! totne hoſtibus unum,
Tot jaculis Deus obiectum necibusque relinquo ?

23. Fratribus inde tuum narrabo in ſecula nomen
Rite memor ; cœtu in medio tibi carmina dicam.

24. Vos, ô, quos ſummi reverentia Numinis afflat,
Splendida cæleſti Domino præconia laudum
Fundite : tuque, Deo ante alios qui carior omnes,
Iſacida cane feſta libens encomia ſanguis.

20. Tu autem Domine ne elongaveris auxilium tuum à me:
ad deſenſionem meam conſpice.

21. Erue à framea Deus animam meam ; & de manu canis
unicam meam.

22. Salva me ex ore leonis, & à cornibus unicornium humi-
litem meam.

23. Narrabo nomen tuum fratribus meis : in medio Eccleſiæ
laudabo te.

24. Qui timeris Dominum, laudate eum : univerſum ſemen
Jacob glorificate eum.

25. Illum Abramigenæ iusto venerentur ovantes
 Obsequio, quoniam non aspernatus egenum est :
 26. Nec faciem averſus, pronas clamoribus aures
 Indulſit, precibusque ratis ſua præmia ſanxit.
 27. Tu mihi materies laudis : ſolennia dona
 Concilio in magno voti reus, inque clientis
 Conſpectu populi noſtras operatus ad aras
 Perſolvam: 28. Atque inopi convivias pinguiæ turbæ
 Inſtituam templis. Cæleſti accumbere menſæ
 Fas erit, & læta ad ſatiem myſteria paſci.
 Tunc ſaturi auguſto luxu dapibusque beatis
 Convivæ grates Domino laudesque rependent
 Soliciti illius divinam exquirere legem,
 Imperiumque ſequi, placidosque capeſſere nutus.
 Nec qui immortales epulas guſtaverit olim
 Ore pio, mortis vim duram & ferrea jura
 Permetuat. ſacrâ decerptus ab arbore fructus
 Sontibus indiſtam peſtem fataliaque arma
 Longè arcet, vitamque æterna in ſecula propagat.
 29. Tunc nulla obrepent animis oblivias cæli :
 Terrarumque oræ, quas nunc letalibus umbris
 Fœda ſuperſtitio ſuperique ignara Parentis
 Oppreſſit, mundique Potens ſua ſub juga traxit;
 Omnes ætherii converſæ ad luminis ortus
 Agnoſcent rerum Dominum. 30. curvoque tremendos

25. Timeat eum omne ſemen Iſrael; quoniam non ſprevit,
 neque deſpexit deprecationem pauperis.

26. Nec avertit faciem ſuam à me; & cum clamarem ad
 eum, exaudivit me.

27. Apud te laus mea in Eccleſia magna: vota mea reddam
 in conſpectu timentium eum.

28. Edent pauperes & ſaturabuntur; & laudabunt Dominum
 qui requirunt eum: vivent corda eorum in ſeculum ſeculi.

29. Remiſcentur & convertentur ad Dominum univerſi
 fines terræ.

30. Et adorabunt in conſpectu eius univerſæ familiæ gentium.

Poplite adorabunt populorum examina vultus.

31. Namque Dei imperium est. latè Rex ille per omnes
Explicuit sceptrum gentes: folia ardua Regum,
Cervicesque premit, vestigalesque coronas.

32. Atque ubi sacratum vesco sub tegmine corpus
Excepere Orbis Proceres, Cælique faginâ
Felices hilarant animas; tunc supplice verrunt
Pectore humum, dignos meditati Numine cultus.

Ipsius ante oculos, ævi quocunque peracto
Curriculo, effossæ revoluti in viscera terræ,
Unde genus duxere, abeunt; prius ore caduco
Sternentur Domini ante pedes, pacemque rogabunt.

33. Primus ego ætutum superas rediturus in aures,
Nilultrâ morti debens, pœnisque solutus;
Discussâ ceu Stella nitens caligine, ab umbris
Exurgam infernis, matutinâque coruscus

Luce dies agitare novos, longisque sequentum
Ordinibus signare vias. jam munere pleno
Omnipotens animam & consortia membra beabit.
Utque ego, sic nostrâ venturi à stirpe nepotes

Impendent alacres vitam, obsequiumque fidele
Navabit gradiens per avita exempla propago.
34. Et Domini benefacta patres in postera sæcla
Transmittent famâ memori: cælestiaque ora
Justitiam illius celebri sermone loquentur;
Justitiam, cujus clarum & spectabile signum
Crux erit hæc, cui me affixum Deus immolat ultor.
Auribus hanc olim atque animis ingentibus haustam

31. Quoniam Domini est regnum: & ipse dominabitur
gentium.

32. Manducaverunt & adoraverunt omnes pingues terræ:
in conspectu ejus cadent omnes qui descendunt in terram.

33. Et anima mea illi vivet; & semen meum serviet ipsi.

34. Annuntiabitur Domino generatio ventura: & annun-
tiabunt cæli justitiam ejus populo qui nascetur, quem fe-
cit Dominus.

Inscriptus est
Psalmus ex
Hebr.

Pro Stella Ma-
zusiâ.

Quo se titulo
Christus ipse
afficit.

Apoc. 22.
eoque Resur-
rectionis indi-
catur gloria.

Usque colet populus surgens melioribus annis ;
 Quem Pater ipse meo prognatum sanguine terris
 Educet, rutilamque super dabit ire Siona.

EFFATUM V.

Sirio. Joan. 19.

AUDIERAM sanctos liquida inter gaudia fontes ,
 Soteris fontes, æternum fundere nectar,
 Communes Orbi latices : nunc illa perennis
 In Cælum salientis aquæ defecit origo.
 Mellitas rigido qui cautis ab ubere lymphas
 Extudit, inflicto Mosææ verberare virgæ ;
 Samsoni defesso & vastâ cæde calenti
 Egelidos pecudis projecto è dente liquores
 Elicuit ; jam ardente siti confectus anhelat.
 Aenea Theſbitæ qui claustra resolvit Olympi,
 Fecundum aëriis demittit tractibus imbrem,
 Fluminaque Oceanumque immenso evolvit ab ore ;
 Venarum exhausto tabescit sanguine Christus.
 Nec tû, mœsta Parens, gelidæ solatia Nato
 Ferre potes, dum labra siti dolor arida torret.
 At non & Phariæ cæli indulgentia servæ
 Defuit, errantem vasto per devia saltu
 Consumptus simul utre latex defecit inani.
 Semianimam patulâ substernens arbore prolem ;
 Cesserat, ah, lento puerum ne occumbere fato
 Cerneret infelix, tantisque doloribus impar.
 Interea lacrymis (qui jam super unicus humor
 Ora sinumque rigans, lamentis sidera pulsat :
 Nec queritur surdis, Agaremque exaudit Olympus
 Et pueri gemitus : oculis quæ lympa cucurrit,
 Aligeri indicio puteales evocat undas.

Ismaël:

Quamvis illa animis Dominam aspernata superbis ;
 Fratribus hic discors olim, ferus, asper in omnes,
 Nec patrem Abramum referens, silvestris alumnus
 Cresceret in rixas & prælia, publicus hostis :
 Præsentes ambo Superos discrimine tali
 Sensere, oblato nec-opini munere fontis.

Tu, Virgo, tu, rore madens quam Vellus adumbrat ;
 Imbre gravis sancto Nubes, penitusque chelydro
 Signat inaccessus castâ Fons mysticus undâ ;
 Marmoreo aut Rivus trepidans argenteus alveo,
 Spargens florea prata, torisque nitentia pictis :
 Tu, cui larga sinu torrensque in corda Voluptas
 Voluitur, ambrosiis restagnat Gratia labris ;
 Nunc inopi succurrere inops, sudore cruento
 Exhaustos pœnisque immanibus aspicias artus.
 Aspicias, heu ! tristisque pias vox vulnerat aures,
 Quam Christus testem incensæ per viscera flammæ
 Pectore singultanti & gutture rumpit anhelò.
 Vertice decurrens, lacrymis confusus amaris,
 Ora excocta cruor pressit. nec labra gementis
 Tingere aquâ potis es, Mater ; nec te, Alma, dolori
 Subtrahis ipsa tuo, contabescisque videndo.

Ah, Solyme, Solyme, quam sanguinis urit hiantem
 Necdum expleta sitis per vulnera mille profusi !
 Sic tibi nulla super sinceri gutta liquoris ?
 Infaustam usque adeo Siloën Cocytia labe
 Corruptit, mistisque Acheron Phlegetonque venenis !
 Spongia, suppliciis non tales addita in usus,
 Vulneribusque appressa (cruento ubi concita fluctu
 Vita fugit) sævosque extendere sueta dolores ;
 Spongia contactu (indignum !) cælestia labra
 Funesto violat, fæces immitis aceti
 Imbuta, & sanie taboque infecta latronum ;
 Oraque viroso potu sitientia torquet.
 Vineæ pestiferæ talem vicina Gomorrhæ

Denier. 32.

Dat laticem, infamis regio : nec tristius offert
Exitium, ultores Superos testatus, & iras
Fulmineas busto redolens lacus, atra vorago,
Ætheriâ flammâ & Stygiâ confusa palude ;
Squallida cui Mortis facies & inhospita Vitæ
Stagna jacent latè, tumulus Jordanis amœni.

Golgotheæ rupes, mollitaque saxa cruore,
Nunc faciles aperite sinus, scatebrisque micate :
In pluvias totis solvatur nubibus aër.

Vos, oculi, vos, ô, potiùs decurrite in amnes,
Unde bibat Jæsus ; hic illi suavis amaror.
Hospita Magdalios inter convivia fletus
Accepitque libens, & amicâ laude rependit.

Quippe alia, exercens mentem, fitis acrior ardet ;
Ardet Amor vestram, genus ô mortale, salutem.

Quin sanctam restinxê sitim properatis amico
Obsequio, & votis Christum haud ingrata vicissim
Corda piis sitiunt & inextaturabilis ardor ?

Scilicet Ægypti nigro deformia limo
Flumina, væ, miseri petitis ; putresve lacunas,
Unde maligna sitim atque insano expressâ labore
Stilla avidam irritet ; crystallo purior unda
Dum vocat, & vivi sacro micat ubere Fontis.

Huc agè, cervorum ritu (postquam halitus angues
Extraxitque cavis, odioque incensa peremit
Pugna ferum genus & stridentes plurima frustra)
Huc juges ad aquas, ad mystica flumina læti
Currite, mortales, superæ queis ipsa Sionis
Compita perfundi gaudent, feliciaque arva
Purpurei assiduo veris nitidissima cultu.

Hic posuisse sitim & plenis mersisse fluentis
Fas ; hinc sollicitæ duxisse obliviam vitæ.
Quamquam acuere sitim latices castæque bibendo
Deliciæ, accensique æternum pectoris æstus.

Uritur infelix, &, jam non fabula, creber

Lacus Asphaltites, seu mare mortuum.

Jerem. 2.

Eceli. 24.

Captat ubique inhians fallaces Tantalus undas.
 It, redit alludens ori, alternansque laceffit
 Credula labra, fugaxque repente elabitur amnis.
 Ille autem siccas media inter flumina fauces
 Indignans stupet & vacuo frustratus hiatu.
 Sic, auri quem dira sitis, quem turbida versat
 Ambitio, fluxoque Voluptas improba luxu;
 Faucibus elusis sequitur fugientia secli
 Commoda nequicquam. aut, si quâ Fortuna renidet,
 Muneribusque sinus congestis inflat avaros;
 Corda implere negat: pariterque increfcit habendi,
 Re crescente, furor; perque intima viscera regnat.
 Terrenæ sitis incumbens turpissima faci.
 Quali morbus iners & aquosus gliscere languor
 More solet; potuque indulgens, acrius hydrops
 Æstuat; aut Libycâ quos torrida dipsas in orâ
 Percussit, falsosve trahant qui gutture fluctus.
 Sed magis atque magis, divinas quisquis amando
 Illecebras expertus & usu docta beato
 Corda gerens, instat Superis, gestitque potitus.
 Cuncta sibi negat ipse libens solatia Christus,
 Et tenui fraudat marcentem aspergine linguam.
 Bacchantum commissa luit, quos ignea vasto
 Sub Phlegetonte manet sitis, æternûmque flagrant
 Pœnæ exercebunt; miseris ni debita fata
 Avertat, piceoque undantes gurgite flammæ.
 Nempe sitimque siti & potûs mordaci aceto
 Tartateos redimit potus, spumasque draconum
 Sulfure cum liquido, tetroque bituminis haustu.
 Purgandis animis porgit medicata salubri
 Pocula amaritie bonus; invitansque sodales
 Præguſtat calicem ingratum, tactuque remulcet.
 Nec summæ cyathi illecebras tantum allinit orâ,
 Blando extundere amans agris fastidia fuco,
 Quâ labra appreſſit. penitus cratera severum

*Fel draconum,
 vinum eorum
 &c. Deuter. 32.*

Condiit, & felli aspergens caelestia mella
 Temperat horribilesque jubet mitescere succos.
 Nectare inexhausto sensusque animosque clientum
 Exsatiare parat : lateris jam effundit aperti
 Largus opes ; gemina ex uno dat fonte fluentia,
 Cordis agens roseo commistam sanguine lympham.

EFFATUM VI.

Consummatum est. Joan. 19.

JAM labra hiulca siti, linguamque immerfit aceto
 Arentem & rauco torpentem gutture Christus.
 Scilicet hoc pœnis deerat fatalibus unum.
 Omnia jam perfecta : fides sancita Deique
 Pollicitis, Vatumque minis : & mystica rerum
 Sublustres quondam simulacra excusa per umbras,
 Sacrorum arcanæ penitus patuere figuræ.

Fraternâ invidiâ atque odiis mactatus acerbis
 Heic placidi ille gregis custos, innoxius Abel,
 Pastorum Princeps, nec post sua funera mutus
 Occubat, & cælum vocali sanguine pulsât.

Naufraga Lamechides felici secula ligno
 Eripit, humanæ servator gentis, & alter
 Purgati melior recidivique Orbis Adamus.
 Cui portum ærii montes, templumque dedêre ;
 Numen ubi, gratis adolens altaria flammis,
 Placavit; certumque & non violabile pacis
 Pignus, inermem altis curvari nubibus Arcum
 Vidit, purpureoque auras describere tractu.
 Calcatâ inde rubens uvâ, mustoque Noëmus
 Ebrius indormit ; nudusque procacia verba
 Degeneris patitur, nec inulta opprobria, Chami.
 Ah, Genitor, fessæ spes & solatia vitæ,
 Unigenam Isacum duro sub robore Abramus

*Defunctus ad-
 huc loquitur.
 Hebr. II.*

Ducit anhelantem, ferro ipse armatus & igni.
 Quo Deus ante omnes defixit lumina terras,
 Vertice sistit agens, magnisque accingitur ausis.
 Fascem humeris, aram ille suam cervice subivit,
 Extructâque super faciles componitur artus.
 Fulgurat Astrææ gladius : fortissimus ignem
 Subdit Amor, pulcrumque furit sine more furorem :
 Naturæ illecebras tenerosque elidit amores,
 Pectore concordi regnans Natique Patrisque.
 Obsequio explorata Fides, tantoque periculo
 Tentata Heroïs sese approbat inclyta Virtus.

Nota Deo tamen, & cædi jam instructa voluntas
 Una satis. cœpto sua laus, sua præmia constant
 Nec minùs ampla operi, vetitâ procedere dextrâ
 Longiùs, & Nati jugulo demergere ferrum.
 Isacumque aries præsentî à morte redemit
 Cornua vepreto implicitus : vilique litatum est
 Tunc animâ, & brutos mitis bibit ara cruores.
 At non libratos heic sustinet Aliger ictus,
 Arrectamque manum Patris, gladioque coruscantem :
 Hostia Golgotheis nec succidanea sacris
 Apparet, medium in sentes caput induit ultro,
 Isaci pariter monstratus & arietis umbrâ,
 Fata aliena ferens Christus ; solusque litare
 Unigena æterno valuit par Victimâ Patri.

Cetera quid longo rerum præludia versu
 Persequar admirans, ævi documenta prioris ?
 Jacobi casus varios ? livore maligno
 Vexatum, ingratos nec feciùs avia fratres
 Per loca quærentem, & patria ad mandata volentem
 Josephum ? pretiò ut fœdè distractus iniquo,
 Mox ficto luerit crudeles crimine pœnas ?
 Quid Jobi informes artus, vivumque cadaver ?
 Quid Mosè, ut vastâ Colubrum prælagus Eremo
 Extulerit ? (Stygii medicina hæc morsibus Anguis)

Quid,

Quid, quæ Jæssides passus, quæque ipse ferenda
Præcinit, Vatumque alii; simul ista Deo mens;
Et speculi objecta effulsit vibrantis imago?

Æterni Genitoris opus, sollennia sacra,
Scelorum fastos, perfectum exegit ad unguem;
Non apicis Christus, tenuis non immemor umbra;
Fanda, infanda tulit; præscriptæque ordine vitæ
Ac toto moriens obsignat sanguine Legem.
Hæc finis fatorum, hæc meta novissima rebus.

Dixerat: & paribus servos incumbere curis;
Ne quid inexpectum linquant; mortalis ad ævi
Curriculum extremum divina facessere jussa
Instituit, justoque alacres certamine palmam
Quærere, Olympiacas ceu qui petiere coronas.
Heu quantos illic levia & ludicra labores
Præmia amant! ut delicias & inertia pellunt
Otia, nec luxu patiuntur mollia frangi
Corpora Pisæi ritus, victuque severo
Robur alunt! membra assiduâ durata palæstrâ.
At non ventoso spectandum in pulvere fingit
Relligio pugilem; plaususve ostentat inanes,
Aut in honore brevem foliis marcentibus umbram.
Victori ætheriam, spatio quæ fixa supremo,
Porrigit, æternâque micantem luce coronam.

EFFATUM VII.

Pater, in manus tuas commendo spiritum meum.

LUC. 23.

SPLENDIDUS æterni fetus Genitoris ab ore,
Fecundæ resonans Mentisque & Vocis Imago;
Humanam sese in faciem terrenaque membra
Induit, ac duræ petiit commercia gentis.
Et jam terrificus linguâ vultuque Tonantem
Gestabat, scelera exagitans: jam blandus, & omnes
Y

Oblato invitans divinæ fœdere pacis,
 Ibat, agrisque humilem vulgum civesque superbos
 Urbibus instituens; & quam sermone præibat,
 Exemplo munire viam dignatus ad astra.

Illum etiam Morbi, illum etiam sensere Tyranni
 Tætarei, & membris dejecti & mentibus hostes.
 Idem & nimbofo turbantes aëre ventos
 Increpuitque minax, tumidoque silentia ponto
 Arduus indixit; putribusque excita sepulcris
 Corpora vitales jussit remeare sub auras.
 Ilicet attoniti compresso murmure fluctus,
 Infanque Noti & rapidæ siluere procellæ:
 Mors trepido ipsa gradu longè spoliata refugit.
 Quid loquar, ut surdasque aures & muta reclusit
 Ora, deditque suas audire & promere laudes?
 Dulcibus imperiis animi cessere volentes;
 Seu lucro instantes, & vectigalia avaro
 Corde avidâque manu captantes evocat ultro;
 Seu gremio è patrio natos, rigidique laboris
 In partem legit, atque inopis consortia vitæ.
 Protinus accurrunt alacres; monitique relinquunt
 Et jam parta domi, & quæ mox speranda manebant:
 Naturæque modum superant, & acerba capeffunt,
 Quà Verbum trahit omnipotens, & amica Dei vis.

At non Judæi Proceres, fastuque nefando
 Pectora & invidiæ stimulis agitata, loquentem
 Accepere Deum, Genii quem audire beati
 Gaudebant, dominisque arrectus vocibus Orbis;
 Arcanas evolvere opes, oracula tanta,
 Assiduam; & Superis leges, terrisque ferentem.
 Aspidis in morem, dictis cœlestibus aures
 Obstruxit Solymæ furor; augustumque Magistri
 In caput exacuit stridentis spicula linguæ,
 Spicula felle atro & Stygiis armata venenis.

Non voci ille tamen moriens precibusque pepercit.

Hostibus oravit veniam : consortia regni
 Promisit pœnæ socio cœlumque Latroni :
 Subsidium orbatæ curavit amabile Matri,
 Virgineos socians animos : tum supplice questu ;
 Delertus , magnum inclamans veneransque Parentem
 Congemuit : sævamque sitim , & jam rite peracta
 Omnia testatus , summâ nunc voce perorat.

Hanc manibus , Pater alme , tuis animam ecce
 repono.

Suscipe commissam gremio ; vinclisque solutam
 Corporis , & longâ perfunctam denique pœnâ ,
 Amplexu refove patrio : suspensaque dudum
 Gaudia , & opprobriis pactæ decora extima lucis
 Redde bonus. mihi me , Genitor , teque ipse redona.

Hæc simul , auditus toto super æthere , fatur ;
 Demittitque caput , animamque in voce reponit.
 Ausonius diro pendendum è stipite Custos
 Clamorem stupet insuetum morientis ; & actâ
 Sic animâ infontem Ductor , vitæque potentem
 Exclamat , Natumque Deo. stupefactus & omnis
 Prodigio miles : clypei que hastæque supinis
 Exciderant manibus. turbam pius occupat horror ;
 Discedensque ferit mœrentia pectora vulgus.

Ac sacro iste volens , Jesu , se corpore solvit
 Spiritus , & patrii emicuit securus amoris.
 Nequicquam insidias molitus & impia bella
 Venerat Umbrarum Princeps , Mundique Tyrannus :
 Nullam adeo labem tenebrosi Rector Averni
 Deprendit , scelerique aditus tentavit inanes.
 Manibus in mediis liber , latèque tremendus
 Clara triumphato Victor spolia abstulit hosti ,
 Carcere quem flammeo ac vinclis infrænât ahenis.
 Nos rerum ignari , gemina inter fata paventes ,
 Extremo quos urget atrox discrimine pugna ;
 Fraudibus & circum Stygiis , armisque petitos ,

Luc. 4.

Ioan. 13.

Quos super & pondus noxarum immane fatigat;
 Luctantes animas, & opis cœlestis egenas
 Ægrè exhalamus; miseri, ni corde paterno
 Obvius & placidis animas Deus excipit ulnis.
 Temperat hic manibus nostras & numine sortes.

O, cuicumque fugax labris jam spiritus errat;
 Patri agedum, Christi vocem exemplumque secutus,
 Nec minùs & Nato trepidæ certamina Mortis
 Commenda, & tanto faciles sub Vindice casus.
 Tædia, mœrorem, tremefacti pectoris æstus
 Sensit, & immensas letho non simplice pœnas:
 Audiet orantes, & non rudis ipse malorum
 Proteget auxilio. mortis solatia acerbæ
 Suggestit, & dulci terrorem abstergit amore.
 Christigenæ, augustoque Dei sata sanguine proles,
 Golgotheo æternam trahimus de funere vitam.
 Ne metue; effossis ingenti vulnere palmis
 Condita rite anima, & nulli rapienda sedebit:
 Purpureamque novo sese mirabitur astro
 Tartarei assultus supra furiasque Draconis.

Ioan. 10.

Apoc. 1.

EPILOGUS.

HAc-suprema-tenus Divini oracula Verbi:
 Nunc extincta riget lethali frigore lingua.
 Ille quidem obticuit; sed & ipsa silentia clamant,
 Omniaque absumpto pœnis in corpore membra.
 O surdi, queis tanta silent monumenta dolorum!
 Discite, quid sit amor Christi, quid criminis horror.

Tuque adeo, quem nec Mortis fatalia jura,
 Ferrea nec domiti tenuerunt vincla sepulcri;
 Perge, precor, cœlo sanctas expromere voces:
 Horrendi ante oculos Ultoris & ora, Patronus
 Causam age Terrigenûm; & membris quæ multa
 rubescit,
 Fulmineum inflectat Genitorem oblata cicatrix.

Altiùs Abeli proclamet sanguine sanguis ;
Atque ipsis veniam , quorum per crimina fusus ,
Oret adhuc. folio Victor sceptroque potitus ,
Vive memor nostri & regna : sobolemque Mariæ
Adde novam , & Magnæ blandus Genitricis amorem
Concilia. ne tu abjectos , ne funditus unquam
Desere : sed vivi sitientia prolue corda
Munere inexhausto fontis. da claudere vitam
Obsequio , atque omnes virtutum absolvere formas.
Denique complexu hanc animam dignare paterno.
Queis factum manibus , queis tantâ mole resectum ,
Hoc opus , hunc proprii fructum cape, Christe , laboris
Exiguum : Superisque Choris adjunge Clientem,
Qui sacra Verba sequi , & *septem discrimina Vocum*
Ausus mortali Vates resonare Camœnâ.

PARTHENICA.

C*V* M latissime pateat Deipare Virginis cultus; & communis in eam singularisque studii sensum, ab ipsa Religione insitum, acuant rationes artesque peculiari venerationis innumera: tum hoc vere, sancteque affirmare possum, instituti genus esse nullum ad illius saluberrimi cultus propagationem Parthenico Sodalitio felicius. Quod quidem Sodalitium, ex Academica primum iuventute apud Societatem JESU conflatum, subinde maturiorem aetatem conditionesque vite varias complexum; idem Pontificum & collaudatum oraculis & largitionibus locupletatum sacris, ac rebus eximia cum virtute gestis inclitum, per orbem utrunque MARIAE signa fixit, pietatis castra quaedam collocavit. Extant Parthenici annales omni genere laudum insignes, exemplorum immortalium documenta in summis etiam Principibus atque in viris plane coelestibus consecrata. Sodalibus tamen haud ita Musæ nostra canunt, ceteris ut MARIAE clientibus conticescant. Nam & Mytheria preconiaque Virginis, & Beneficia in omnem Christianæ reipublicæ partem diffusa colligunt; honoresque Magnæ Matri vicissim exhibitos, grati animi publica privataque monumenta. His unum omnium, quæ viderim, ornatissimum Parthenium depingitur. inde multa rerum splendidaque varietas. Tractatio partim contexta, partim interjuncta; prout vel dignitatis ratio, vel opportunitatis ferre visa est. Ab argumento certe nec majestatis deest, neque suavitas: & utraque apud te, Candide Lector, ad commendationem valeat operis, quod elaborare pro merito ac voluntate auctori non vacavit.



PARTHENICON

LIBER I.

ICONES, SIVE ORNATUS PARTHENII.

*Magnificentia Deipara, ipsiusque Clientium pietas
illustribus expressa monumentis.*



IRGINIS imperium Matris, cœ-
lestia jura,
Factaque mira canam; quos illi Na-
tus honores,
Quàm largas cumularit opes; sub-
limia corda

Queis trahat illecebris Mariani gratia cultus.
Hæc alacrem intendens rerum ad fastigia cursum;
Alternis Dominamque inter gratosque Clientes
Splendida muneribus commercia, dein sacra ritu
Fœdera sollenni, atque illustres ordine fastos
Exequar, Aoniisque intexam lilia lauris.
Fervere jam vario fulgentes agmine pompas,

Pontifices dare tura focis , procumbere Reges
 Ac votis Dominam sceptrisque ambire dicaris
 Aspicio , totasque aris se advolvere gentes.

Ergo ad te , mea lux , mea cura & gloria , VIRGO ,
 Nunc avidus redeo , & supplex altaria presso
 Post varios bellique obitos pacisque labores ,
 Humana effuso toties in ludicra cantu.
 Nec tu , Diva , tamen numeris exclusa profanis :
 Belli eadem Pacisque potens , in carmina semper
 Venisti ; MARIAE palmasque oleasque sacravi :
 Talibus instantem nec tu averfata Camœnam.
 Si quis honos Musæ ; si quo dignata favore ,
 Castrensesque inter sonitus audita tubarum ,
 Doctorumque aulas Procerum , Regumque triumphos ;
 Muneris omne tui est. agnosco indebita cœptis
 Præmia , rite memor , necdum perfecta vicissim
 Accelero æterni monumenta & pignora cultûs.
 Hic propius vati adspirans , nova suggere dona ,
 Quæ referat ; votique reus , sibi numen amicum
 Altiûs , ac toto ingeminet resonabilis axe.

Tum vos , ætherii Proceres , quos gloria tangit
 Christiparæ ; tuque ante alios , Josephæ , benigno
 Virginis æternæ consors huc respice vultu ;
 Cumque Anna Joachime parens , Natiqûe beatas
 In partes moriente Deo subleste Joannes :
 Tuque adeo , tu , Cœligenûm fortissime Princeps ,
 Nazariam Orator pacisque interpres ad arcem.
 Unâ omnes , Divæ quos aut spectabilis alto
 Sanguine Natura , aut propior quos Gratia junxit ;
 Præcones pariter , vigilesque ad jussa Ministri
 Communis Dominæ , placitam huc advertite curam.
 Virgineæ autorem laudis , cultusque magistrum
 Vos mihi , vos , Sponsumque Deum Natumque Pa-
 tremque
 Augustæ , atque ipsam precibus placate sequestris.

Ac dum Partheniæ ingredior penetralia sedis ;
 O Superi, ô, vivis quorum spirantia cerno
 Ora notis, picti Indigetes, clarissima nostri
 Argumenta operis, Magnæ decora addita Matri;
 Et vos, Parthenici, lectissima corda, Sodales,
 Accipite hospitio subeuntem, & sacra ferentem
 Vestra novo geminos cantu celebranda per orbes.

Quam Deus eximiâ delectam sorte Parentem
 Consilii magni partes implere secundas
 Constituit, nova fata parans; & crimine lapsi
 Terrigenæ in melius diras convertere clades :
 Hanc titulis longè ante omnes illustribus auctam,
 Extulit aspectandam orbi, rerumque potentem.
 Commissas diffundere opes dedit æthere aperto
 In populos; & quam semel alvo protulit, usu
 Curarum assiduo miseris adhibere salutem.
 Dilecto neque enim tantùm concessa Joanni
 Alma Parens; ubi Golgotheo stans vertice Christus,
 Sanguineo affixus trunco, supremaque dona
 Pignoraque illa sui moriens transcripsit amoris.
 Unigena, & fratrum servos dignatus honore,
 Communem jubet esse suis, dulcique fovendos
 Christigenas penitus complexu ambire, beatisque
 Appressæ uberibus Matrem se ostendere genti.

Ipse etiam, superas acies qui numine versat,
 Sponte suâ Matri florentes subditus annos
 Egit; & obscuris adolevit sedibus, ultro
 Obsequium impendens, fabrili exercitus arte.
 Matris & ad voces, intactâ conditus alvo,
 Zachariden inclusum utero commorat anili,
 Læto exultantem sensu; properataque mentis
 Lumina, concretæque admota piacula noxæ
 Carpentem, & Sancto instinctum jam Flamine Vatem.
 Sic medicas animis vires quæ prima Theandri
 Gratia lustrandis, radiosque exprompsit amicos;

Nec minùs & Matri primùm famulata potestas;
 Extima quæ versis edit miracula rebus;
 Dum Canæa inopis miserans convivia mensæ,
 Nec fontis memor unda, mero rubefacta cucurrit.

His adeo exemplis, tacitisque afflatibus urget
 Rite pios; sacrorum acuens per templa sonantes
 Præconum hortatus, & non sine pondere verba;
 Autorumque ciens chartas monimenta disertas
 Christus; & augustos Genitrici sancit honores.
 Ergo Virgineæ quis non fastigia laudis
 Miratus, poscensque avidis vincla aurea votis
 Gestiat, & Dominæ leges cœlestis adoret?
 Omnis Majestas, omnis cui purpura servit;
 Servitioque omnes *MARIÆ* cessere coronæ.
 Et meruit virtutis apex, atque inclyta factis
 Gloria, & indulgens humili clementia turbæ,
 Sublimesque tegens aulas, & regia castra,
 Tanta sacros passim Dominæ præstantia cultus
 Incitat & casti vis plurima fervet amoris.
 Quantæ hinc deliciæ, maternique uberis hâustu
 Quàm liquida, & dulces pascentia gaudia flammæ!
 Ac sua mortales insignibus obvia donis
 Commoda prolestant. pietatem incendit honesto
 Utile conjurans pariter, suavique decorum.

Sive, Machaonias frustra quæsita per artes,
 Corporibus captanda salus, aut mentibus ægris;
 Seu commissæ acies campo, seu mœnibus hostis
 Ingruit, aut Stygio portenta immania bello
 Supremam intentant cladem; quæcunque pericli
 Objicitur facies, quisquis præsentia casus
 Subsidia exposcit; stat publica gentibus ara,
 Sospita terrarum Virgo undique & undique Virgo.
 Optima Cœlestum, nec surda aut sœra precanti
 Diva Parens, Nati quem tota potentia miros,
 Quò res cunque vocant, operum succinxit in usus.

Non ego Franciadûm crebris fulgentia templis
 Munificæ documenta sequar votiva Patronæ,
 Signaque, & infractis morbis armisque trophæa :
 Qualia Parisiis delubro aggesta superbo
 Sequana, Salmuriaſve Liger ſuſpexit ad aras ;
 Qualia, *Letitia* aut *Virtutum* nomine claris
 Apparent adytis, aut quâ telluris operto
 Carnutum ſedit Druidum domus, aut ubi ſecto
 Marmore *Berharamam* Pyrene aſſurgit in ædem,
 Dona tamen ſiluiſſe nefas ſollennia Regum ;
 Ut Lodoicæi rea voti Gallia Divam
 Æternûm colat, & ſuperos imitata triumphos
 Annua Virgineas inſtaurent gaudia pompas.
 Auguſtamne Domum, Galilæa ex urbe proſectam
 Aërium per iter ; brevibuſque per arva micare
 Dalmatica hoſpitiis priûs, & Picena per arva,
 Gentibus attonitis viſam ; nunc ſupplique mundi
 Concurſu celebrem, ſtabilique in ſede repoſtam,
 Laurifero in clivo, Cœleſtis conſcia Nunci
 Alloquio taceam & genito ſacraria Chriſto ?
 Serratine admota polo ſaſtigia montis ?
 Quâmq̃ Superſtitio Romanam inſtruxerat arcem,
 Divinæ ſubmiſſum alto Genitricis honori
 Pantheon ; ac medio nivibus deſcripta ſub æſtu
 Exquilii juga collis ; & Indi conſita ponti
 Littora Luſiadûm palmis, latèque ſubacta
 Victricis Dominæ aſpicio Gangetica regna ?
 Cuncta ſed anguſtæ numeris comprehendere char tæ
 Haud licitum : & celeri ſat erit ſtrinxiſſe Camœnâ
 Sparſa per immenſos operum veſtigia tractus.
 Tot decorum capita, & variæ ſpectacula formæ,
 Parthenii ornatus, Magnæ dona ampla Parentis,
 Præmiæque egregii cultûs privata revolvam,
 Et ſolidas urbes populosque amplexa, vel ipſum,
 Quâ patuit, terrarum orbem ; quâm commoda cœptis

Grandibus auxilia , & sancto quàm blanda labori
 Maternis affusa legam solatia curis ,
 Mutuaque in Dominam gratorum facta clientum.
 Splendida jam rerum picto simulacra sacello
 Discite Parthenici , decora immortalia , Cœtus ,
 Certiùs & vestras Divæ concredite sortes.

VIRGO SOS-
 PITA.
 Romam peste
 liberat , ima-
 ginem à S. Lu-
 ca pictam cir-
 cumferente
 Gregorio M.

Æthere , proh , qualis telorum incensus ab alto
 Nimbus , agens pestem ruit , & miserabile Romæ
 Exitium importat ! quis erit modus , Aliger , iræ ?
 Aut quàm-strage-diu tantâ populaberis ultor
 Funestatam urbem , desolatosque Quirites ?
 Ille quidem summas infederat arduus arces ,
 Necdum etiam iussas explerat sanguine pœnas.
 Illum insistentem pinnis , & cæde rubentem
 Viderat Ausonii Pastor gregis. ut pius olim
 Isâides , Jebosæi Ornæ quâ lata jacebat
 Area , sublimem & Solymæ stricto ense minantem
 Ætherium vidit juvenem ; qui Numine lævo
 Ipsius ob culpam Regis , Judæa per arva
 Censentis populum & numerosâ gente tumentis ,
 Confusæ ingentes cumularat cladis acervos.

Haud secûs irato pennatus ab æthere miles ,
 Jam populum immisâ grassatus peste per omnem ,
 Gregorii Magni ante oculos spectabilis altè
 Constitit , asper adhuc , & adhuc sævire paratus.
 Nam sollennem inter pompam , templisque sub ipsis ,
 Perque vias subito ceciderunt corpora fato
 Plurima. nec finis porro , ni sospita Mater ,
 Mater , Romuleæ gentis spes ultima (cujus
 Producta ex adytis urbem lustrabat imago ,
 Divini Pictoris opus , priscoque Quirini
 Palladio potior) tristes miserata ruinas
 Afforet ; & nunquam cassâ prece passâ vocari ,
 Ipsâ manu medicâ diri contagia morbi
 Opprimeret , pœnarum avidos exstingeret ignes ;

Et gladium largos sitientem sanguinis haustus
Frænaret, Moles Adriana ubi surgit in auras.
Fama memor facti serum transmissa sub ævum est;
Mutavitque loco nomen, qui desuper hæsit
Angelus, & Castrum titulo meliore notavit.

Nec semel auxilium *MARIÆ* sensere Quirites,
Cum funesta lues miseram depasceret urbem.
Nuper & experti, penitus dum labe carentes.
Conceptus Divæ celebrant; & supplice cultu
Ipse præit, plebem arcta piis jejunia votis
Jungere Alexander facto docet. Inde levari
Cœpta lues; cultuque Italas crescente per oras,
Parthenope simul & Ligurum Regina salutem
Hauferunt, templisque novis nova munera signant.
Sic morbos pestesque fugat placidissima Virgo;
Justitiæ ultricis mucronem, ardentis & iræ
Sic telum vaginâ hebetans lethale recondit.
Nec minùs & sævos debellat Regibus hostes,
Tartareasque acies frangit cœlestibus armis.

Stat Constantinus, quo principe vera per orbem
Visa oculos aperire gravesque attollere vultus
Religio; cœlumque obtutu figit acuto.
Bellipotens Virgo fatale è nubibus effert
Purpureis Labaron. hoc stat Victoria signo.

Talibus auxiliis Superùm, & duce Virgine fretus
Maxentî domitor, debellatorque Licinnî,
Mille acies stravit campis, & pace reductâ
Aurea Christicolæ fundavit secula genti.
Disiectas video moles abruptaque faxis
Saxa, & fanorum vastis oppressa ruinis
Numina vana Deùm. templorum rudera sanctæ
Substruxere trophæa Cruci, quam luce serenâ
Descriptam cœlo, & radiis (mirabile visu!)
Florentem latè, victriciaque arma secundo
Omne spondentem Cæsar suspexerat ipse.

*VIRGO VIC-
TRIX ET PA-
CIFICA.
Constantinus
M. templa ur-
bemque ipsam
Constantino-
polin Virgini
consecravit.*

*Per te Crux
pretiosa cele-
bratur & ado-
ratur &c. Cy-
rill. Alexandr.*

Atque illam, certi pretium pignusque triumphi,
 Dum res ambiguae Romae Tyrannus in armis;
 Obscura intexam Labaro per symbola primum
 Tectus adorabat, non amplius ille biformem
 Devenerans Aquilam castrorum more vetusto.
 Deinde potens rerum, & Christo jam largius hausto,
 Luce palam invidiae coluit securus; & altè
 Vexillo inscriptam, & Capitoli in vertice fixam,
 Insuper augustam dignatus fronte, coronam
 Insignem addiderat, gemmisque ornatam & auro.

Dextera non brutum jaculatur fervida fulmen.
 Fulmine quo percussa ruunt immania templa,
 Infanae scelerum moles, araque profanae,
Omnigenumque Deum monstra, infelicis Avernì
 Natale in gremium, & piceos revoluta sub amnes.
 Ut jugulum imposito pressus pede deficit æger
 Flamen, & amissos capitis deplorat honores;
 Ereptumque sibi, & Christi sub jura redactum
 Affectat nequicquam oculis errantibus Orbem!

Vicisti, Galilae! & victum occumbere campo
 Videre Ausonii, Persae audivere fatentem.
 Juliades vocem hanc rabidus cum sanguine fudit.
 Vicisti, Judae Leo! tibi concidit ingens
 Ille Draco, Latiis antehac conspectus in armis.
 Rite triumphalem cantent Pæana cohortes,
 Christe, tuæ; seu castra tenent ardentia signis,
 Quam micat Orion auroque armatus & igni:
 Sive intra teli jactum versantia terris
 Agmina militiam sub te Ductore fatigant;
 Debita utrinque tuæ properent diademata fronti.

Tu quoque Christiadum fortes in praelia turmas,
 Virgo, armare potens; gravidam fulgentibus armis
 Davidicam referens Turrim; vel qualis in hostem
 Sese instructa acies castris erumpit apertis.
 Scimus, ut invictus Fidei certamine Præsul,

Gloria Cappadocum, rerum discrimine summo
 Juliaden contra supplex tua numina poscens,
 Christicolûm exitium post Persica bella minantem;
 Scimus, ut (appictum tua quem gestabat imago)
 Mercurium hastatum ex oculis vanescere primum;
 Mox eundem bello reducem jam cæde peractâ
 Viderit admirans ultorem, hastâque cruentum.
 Pugnam in Achæmeniam, MARIA mittente, profectus,
 Desertorem illum, patrui virtutibus altis
 Degenerem Constantiadæ, Christoque rebellem
 Fœdifragum, Imperii pestem, Divûmque superbum
 Mancipium occulto mactavit vulnere Martyr.
 Mercurium caduciferum, citharæque potentem
 Dum colit, armorumque Deâ Tritonide fidit:
 Longè alia huic Virgo, Nati quæ fulmina torquet;
 Mercuriusque alter fuerat metuendus in armis.

Hesperiaë infestam quid cùm infatigatus opimæ
 Strage Cypri, raperet classẽ Byzantius hostis?
 Tu Naupactæo præsens Victoria ponto
 Velivola in Turcas vertisti flamina; quosque
 Horrificæ piceo fumantes turbine nimbos
 Bombardæ ediderant, & tela inimica retorquens;
 Afflasti sancto sociatas fœdere naves;
 Cœruleos Getico mutasti sanguine fluctus.
 Depressæ Ottomanûm pelago, captæve triremes;
 Præda ingens; scalmo ter millia quina soluti
 Christiadæ: veteres renovavit Roma triumphos;
 Et Capitolinæ sacrata Columna MARIA
 Rostrato argento Cœlestem insigniit Aram.
 Nec post Actiacam vicino è gurgite laurum
 Interno par ulla Mari victoria venit.
 Ante aciem, & tanti medio in certaminis æstu,
 Militibus Ducibusque, & quos fera classis habebat,
 Remigibus, MARIAE oratum respondit ab alto
 Auxilium. votis damnati ingentibus omnes;

*Ædes Virgini
 sacra in Capi-
 tolio, Ara celi
 dicta.*

Rupta alii, Dominæ, jam libertate receptâ,
 Vincula dicant; spolia ampla Duces & præmia belli:
 Lauretanæ opibus crescunt donaria Cellæ.

B. Pius V. ob
 Neupactæam
 victoriam ope
 relatâ D. Vir-
 ginis, eam ri-
 te Christiano-
 rum Auxiliū
 nuncupavit,
 Nonasq; Oct.
 in quas præliū
 inciderat, Vi-
 trici Domi-
 næ inscripsit
 &c.

* S. Dominici.

Maximus ipse Pater, pietate insignis, ovantum
Christigenū Auxiliū pulchro cognomine dixit:
 Addidit & meritum tituli palmaris honorem,
 Pendeat ut MARIÆ domino Victoria nutu.
 Jussit & Octobres Nonas accedere fastis,
 Egregiæ testes pugnæ; queis annua sacra
 Gusmanidæ * ritu geminum vulgata sub axem,
 Dum fera commissas agitent prælia classes,
 Divam implorabant; rosæque exinde quotannis
 Texuntur festâ florentes luce coronæ.

Quare age, barbaricam vim quisquis & impia contra
 Tela paras animis acrique insurgere bello;
 Vexillum Nati & Matris commune secutus,
 Auspice victricem Christo Mariâque secundâ,
 I, palmam præsume. favet queis conscius æther,
 Bella cie, Magnique exemplo Cæsaris insta.
 Regificō postquam hic sumptu spectabile templum
 Christiparæ inscripsit vastisque operosa columnis
 Marmora; tum, sacro Byzantia mœnia cultu
 Quâmpque novam proprio signavit nomine Romam,
 Eoī caput imperii, tantâque superbam
 Mole operum, mundi spoliis censuque refertam,
 Eternâ monumentum ingens pietate dicavit.
 Ex illo quanti series accita favoris,
 Augustos ipsamque fovens protexerit urbem,
 Obsidiis toties Arabum varioque solutam
 Barbariæ assultu; quantis decora aucta trophæis,
 Quis nescit, vel quis iusto præane renarret?
 Felix ô nimium, si nunquam ingrata Patronæ,
 Antiquo steterit sensu, patriumque secuta
 Flaviadæ exemplum, nec Relligionis honores
 Dissidio effræni fœdisque erroribus ausa

Proterere,

PARTHENICON LIBER I.

351

Proterere, haud unquam Scythico frangenda tyranno!

At veterum partæ laudes memor addere laudi,
 Usque patrocínio gaude cultuque *MARIÆ*,
 Barbariæ fulmen, columnenque immobile Sedis
 Francia Romanæ ! nec tantum Regia servit
 Ætheriæ assurgens Dominae Lutetia templo.
 Imperium Assumptæ Francum Lodoicus honori
 Virginis addixit; nec Iusti degener Heres,
 Nomine magnificum referens animoque Parentem.
 Cœruleâ insignis pallâ, quam lilia pingunt
 Aurea, bisgeminæque ferens insignia torquis,
 Nudus uterque caput, sceptroque ornatus uterque;
 Reginæ duplicem gaudet stravisse coronam.
 Omnis quos populus, lætæque ingentibus urbes
 Sectatæ studiis; alias nec promptior unquam
 Regia iussa sequi primosque capeßere nutus
 Gallia, quàm *MARIÆ* cultus augere jubentum.
 Ergo rite sui Dominae celebrantur honores,
 Terraque sollennes pompas imitatur Olympi,
 Annua cùm Assumptæ redierunt sacra Parentis.
 Ipse diem exercet Rex festum, & supplice pompâ
 Fert manibus liquido florentem lumine ceram;
 Cordis & accensi pietas toto emicat ore.

Haud magis impermixta lacu rapuisse Lemano
 Flumina victor amat Rhodanus torrentibus undis;
 Quàm scelerum intactus fugit consortia Princeps;
 Illecebrasque inter medius, mollissimaque aulæ
 Gaudia inoffenso Justus candore cucurrit.
 Inde animi vigor, ac palmaris robora dextræ,
 Quam sensit Rupella furens, domitique Rebelles,
 Et conjuratas impellens Anglia classes;
 Oceanusque jugo, frustra indignantibus undis,
 Subditus, aëriisque evictæ gressibus Alpes.
 Haud sterilis cecidit pietas, & inania vota,
 Juste, tibi. scit Belga ferox, Germanaque tellus;

*VIRGO PATRONA GAL-
 LIA RUM;
 quas ipsi Lu-
 dovicus Justus
 inter Assum-
 ptionis solen-
 nia dicavit; ac
 subinde Lu-
 dov. Magnus
 &c.*

Mincius, Eridanusque, & cornua fractus Iberus.
 Sed proprium hoc doni pretium, majusque triumphis,
 Et regno dignum solido venale rependi,
 Exoptata diu proles, certumque MARIÆ
 Pignus, avos superans, primoque augustus ab ævo.

Quippe, triumphali non inferiora Parente
 Jamtum, Borbonide, tenero meditatus ab ungui;
 Natus victrices, victrices inter adultus
 Florescis palmas, Europâ major, & orbis
 Aut amor aut terror, Divâ sub præside regnas;
 Regum idem, laudumque tenes fastigia, Princeps.
 Quis memoret fusas acies, deletaque campis
 Agmina? quis captas urbes; cum præpes, & uno
 Corriperet solidas gentes victoria cursu?
 Præsertim Assumptæ sub tempora Virginis ingens
 Successus vulgò, felicitis adorea belli.
 Hinc messes tibi laurorum crevere superbæ,
 Quas Dominæ in magnæ gremio temploque reponas,
 Muneris auctorem agnoscens; ereptaque victis
 Hostibus appendas totam vexilla per ædem,
 Non magis illa tui certa argumenta triumphi,
 Quàm grati monimenta animi, monimenta favoris
 Virginei; quo nec belli magis illa trophæa,
 Dulcia quàm blandæ subierunt gaudia pacis.
 Hinc Regni sperata salus, Concordia venit.
 Copdidit illa manu gladios, aut vertit in hostem.

Namque illi Francos ante omnes curâ tueri.
 Deditione auctus, verùm haud novus iste MARIÆ
 Venit amor, nostris ex quo decessit ab oris
 Cœca superstitio; mitis cùm colla Sicamber
 Demisit, suavique jugo successit; & undâ
 Lustrali imbutus, Druidum simulacra cremavit
 Culta priùs; coluitque pias, quas antè cremarat
 Effigies; Christi jurare in sacra ferocem
 Compellens populum, & fidei cum lacte recenti

Sugere Divinæ studium cultumque Parentis.
 Nec minùs & Regem Virgo populumque vicissim
 Pacta sibi. Rubra expunxit diademata signis
 Franciadùm; innocuique notâ meliore coloris
 Lilia suffecit, Gallorum insignia morum.

Non ea Junonis candent fata lacte caduco;
 Garrula quas olim cantavit Græcia nugas.
 Lacte ab virgineo niveum traxere colorem,
 Cœruleo è campo, quâ se Via Lactea duxit,
 Virgineâ delecta manu, præque omnibus uni
 Gallorum transcripta solo. radice tenaci
 Hærent, vel ferro abscindi, frangique procellis
 Nescia; quanquam hiemes ventis immanibus actæ
 Sæpius horruerint contrâ; infensique Leones,
 Et mare tranantes Iardi, tum Cæsaris ales,
 Haud semel obnixa pedibus convellere aduncis.
 Illa invicta manent, bisseque secla virorum
 Durando superant; adeo consistere multum est
 Virginis auxilio! & si quando vertice fesso
 Jam propè humum tetigere; suo mox illa decori
 Reddita, & ad patrium tollunt capita inclyta cœlum
 Altiùs, & pictis latè dominantur in hortis.

Quid, quod & altricis non unquam oblita MARIE
 Fatales inimicitias æternaque bella
 Cum Stygio serpente, anguisque propagine nacta,
 Hæreticam exagitant labem? Nec lilia discunt
 Fœmineas tractare colos, & inertia pensa.
 Masculus huic flori vigor est, & gratia formæ
 Ætherii linguâ quondam laudata Magistri.
 Non sic magnificus Regum, quem gloria circum
 Vestiit, angusto non sic effulsit amictu
 Purpureus Salomon, argento totus & auro
 Contextus, tantâ quamvis se mole ferebat.
 Procero sic caule virent; sic candida in auras
 Attollunt capita; & nativo fidere lucent!

Inter odoratas fegetes, Regaliaque inter
Lilia dilectus palci gaudetque, colitque
Candorem; purâque cubans requiescit in umbrâ
Agnus in ætheriis *MARIÆ* nitidissimus arvis.

V RGO SA-
P IENTIÆ
S CIENTIA-
R UMQUE PA-
R ENS.

D. Gregorium
T haumaturgū
coram edocet
administro
J oanne Apofl.

Haftenus impensum bello pacique favorem;
Nunc doctam, pulsâ ingeniis caligine, lucem
Virgineo infusam dono eloquar. aspice, quanti
Muta magisterii speciem subjecit imago.

Hic Antistes, hic est, cujus miracula nomen
Grandè sonat: siccare lacus, propellere verbo
Ardua terrarum, fluvioque imponere leges
Ille potens; rapidis agros vastantibus undis
Quem ripam ad fragilem certo pro limite fixit,
Arboream in faciem baculo se attollere viso
Protinus, & patulis umbram diffundere ramis;
Aggeris & vires & ineluctabile vallum
Obiectare Lyco, ac solitos arcere furores.
Imperiis idem Phœbum simulacra tenentem
Fatidica ejecit, Stygiæque oracula fraudis.
Insidiis obsessus & indeprensus Avernis
(Agmine dum varius denso circumstrepit error)
Æternum Triados sincero dogmate Numen
Perdidicit *MARIÆ* studio curâque magistrâ.

Ecce viro, dubias agitans ubi pectore curas
Nocturnus, stratisque jacens haud mollibus, al-
tum

Insomnes animos attollit in æthera Præsul;
Ecce gravis, niveoque senex placidissimus ore
Adstitit, insolitoque nitens venerandus amictu.
Majestate simul sublimior adstitit, aureo
Lumine circumfusa micans, & Numinis instar,
Numinis alma Parens, augustoque ore Joannem
Imperat arcani seriem depromere veri.
O fortunatum, Dominæ quem cura clientem
Erudiit! studii quàm suaves carpere fructus

PARTHENICON LIBER I.

355

Gregorio, pretia ampla, datum est! Nec nulla sequuntur

Præmia discentem, Sophiæ quicumque Parenti
Dulcem operam dederit, solidoque incumbet honesto.
Sic doctus, stellæ in morem fulgebit Olympo.

Maturè disce, ô, MARIAM, quem splendidus urit
Doctrinæ cœlestis amor. Summo illa Tonanti
Æquævum, omnipotens & inenarrabile Verbum
Vindicat, æterno diffusum à lumine lumen.
Illa suum, quo nunc interprete visâ docere est,
Suffectum Christo media inter funera Natum,
Et tonitru assimilem pariter, melleâque fluentem
Voce piis; Lucamque, & quos grege Christus eodem
Præcones cœli, & legis dedit esse magistros,
Instituit prius; ac Sponso sua præbuit ora,
Infantis puerique Dei mysteria pandens.

Nunc quoque divinas aperit mortalibus Artes:
Sæpe etiam humani descendit adasque minores
Ingenii curas, inventaque monstrat avorum;
Ac rerum latebras, Naturæ arcana recludit,
Per varios & cœca regit vestigia flexus.
Quamquam crebra sui dispensat luminis usum;
Paulatimque acuit, tacitoque obtusâ favore
Pectora. fraude piâ capti, invitâque Minervâ
Provecti studiis, quæ maxima turba, nec ipsi
Sensere, aut dextram satis agnovere juvantem.
Nonnunquam & subito collustrat fulgure mentem
Indocilem, ac penitus discussâ nube serenat.
Ecce repentinis socios progressibus anteit,
Miraturque novas luces, & non sua sensa.

Quid latè fuscum contracto in corpore narrem
Ingenium Hermanni, aut Ruperti plumbea corda
Auro versâ loquar? Mariano munere Magnum
Quid referam Albertum? & Genii cœlestis ab ore
Exceptas Dominæ laudes, scriptamque salutem

Hermannus
cognomento
Contractus.

* Sic olim per
cavillum ap-
pellatus, sed
in laudem à
M. Alberto
conversum.
In divino cur-
ru facies bovis
à sinistris &c,
Ezech. i.

Mandere nutrici visus quod prodit Aquinas;
Illa sacrum mugire Bovem *, terrasque per omnes
Felici Thomam docuit resonare boatu;
Ætheriæ qualem exercet pars læva quadrigæ,
Mira Bovis facies, pennisque accincta jugalem
Equiparans aquilam, & candenti concolor ari.
Suaresiumne canam, primo quem tarda Lyceo
Mens habuit? gravibusque ultro desistere cœptis
Suadebat; ni Virgineam spe jussus amicâ
Poscere opem juvenis, votisque optata pacisci,
Continuò insuetæ radios emittere lucis,
Tiroque attonitos jamtum exuperare magistros;
Et seclis dignos operum signare labores
Haud tenui ductu curâve aggressus inani,
Sublimemque altâ socians virtute micantis
Doctrinæ gazam; cœlesti utranque Magistræ,
Rite memor, librisque animi documenta sacra vit.
I, silvas Academi, & Suadæ exquire medullas,
Pimpleosque hauri latices, veterumque virorum
Cuncta vora monumenta; & quidquid Græcia,
quidquid

Ansonia effudit, vasto complectere sensu.
Funditus ignaros nihilo tu feciûs inter
Ablegêre mihi, nescis si fortè MARIAM.
Hanc illam ut scirent, quid non fecere verenda
Majorum capita & studio canentia longo?
Illam disce rudis cœli, imprudensque salutis,
Verbiparamque audi breviter scita ampla docentem.
Connubialem inter mensam, defectaque egenis
Vina cadis, Virgo quæcunque faceßere Nati
Dicta monet celeres haud frustra ad jussa ministros.
Præscriptum hoc, Mariane Cliens, tibi quisque putato,
Ac legem obsequiis maternam ingentibus imple.
Sponte præit, clarisque facem virtutibus effert
Altera lux mundi, nec deficientis imago

PARTHENICON LIBER I.

357

Sideris, ipsa suo seu Luna simillima Soli,
Seu matutinis splendoribus imbuat alnum
Stella diem, noctisque umbras Aurora fugavit.
Hanc sibi delegit propriam Sapientia, & altè
Sapphiris fundatam ædem, nixamque columnis
Rite dicans habitat, Mosæâ sanctius Arcâ
Oraculum, Hesperiiis auditum Indisque repostis.

Huc animos, huc verte acies, quâ plurimus horror
Objicitur, stratoque super Virgo imminet hosti.

Quæ monstri facies! aut quis liventia Præsul
Colla terit plantâ insultans? deforme bidental,
Nestorium (an fallor?) nosco. tune ille MARIÆ
Hostis ades? tu, Cerbereo qui gutture magnum
Allatrare ausus nomen, Matremque negare
Numinis? & quæ tanta animum furiavit Erynnis?
Quod tantum scelus! è MARIÆ tu fronte coronam
Deripere, ô Stygii rabiem transgressæ Draconis!
Ille quidem caudâ implicitas detraxit Olympo
Præcipitans stellarum acies: tu vertice in ipso,
Majus adorte nefas, Divinæ in vertice Matris,
Heu, linguâ incestâ crinalia sidera tentas!
Sed tantum impuro fluxum vomere ore venenum
Reginam contra potis es, linguâque bisulcâ
Sibila vibrare, & morsus agitare caducos.
Terrigenis atri caput exitiale cerastræ,
Et jam olim talo insidias tendentis inanes,
Contrivit fortis Mulier, primæ inscia noxæ.
Divinoque potens & victrix semine Virgo;
Dux Fidei custosque, & opem submittere præfens
Christiadis, verique potens, ac lucis origo;
Portentum infelix, fictâque nocentius hydrâ
Elidit; terrarum oras utcunque pererrat
Bellua Tartareo in populos emissa barathro
Silvescens capitum turbâ, & fecunda malo. am.

Virginis in partes veniunt, causamque tuentur

Z iij

VIRGO
ΘΕΟΤΟ

KOC,
Hæreleon De-
bellatrix.

Concilio augusto Patres, lectissimus ordo,
 Doctrinâ, pietate graves; princepsque verendos
 Cyrillus procures inter, sacra expedit arma.
 Nec jam Ephesus *magnam*, insano clamore, *Dianam*;
 Sed Magnam, hospitio cujus dignata, *Mariam*,
 Et Diæ titulum assertum nomenque Parentis,
 Mitrati celebrat scitum immortale Senatûs.
 Jamque adeo in noctem extracto redeuntia cœtu
 Cana virûm capita, & sanctis exercita pugnis,
 Lampade cum densâ incensis gratantur acerris
 Matronæ, ac festo plausu deducere gaudent.
 Tota renidentis faciem referebat Olympi
 Stellatis Ephesus vicis. flagrantia passim
 Civibus ora, Dei certam sonuere Parentem,
 Cœlestes imitata choros. dirisque profanum
 Nestorium probrisque onerant: fremitu omnia fervent.
 Ipse autem quali vesanus imagine frendet!
 Lethiferâ exangues horret ferrugine vultus.
 Mitra excussa procûl capiti: introrsusque revolvens
 Lymphatos oculorum orbes, passisque lacertis
 Respicit infestam, flammâque instare tremiscit,
 Et Divam extremâ sentit jam clade Parentem.
 Nec tamen ipsa manu dignatur mittere fulmen:
 Legato Patris Aufonii sedenim ore tonanti
 Intorquere dedit, meritis locus utque vacaret
 Cæsareis; causamque ageret Pulcheria virgo
 Virginis, abstinuit; donec proscriberet ultor
 Funestos primùm libros Augustus, & ipsum
 Nomen in aternæ damnatum oblivia noctis
 Sollicitus, penitusque infandum mittere dogma:
 In loca sola procûl, mundo execrabile monstrum,
 Pelleret ærumnas quovis furiasque trahentem.
 Tum lentis hostem consumpsit denique pœnis,
 Præguſtare Orci vivace piacula letho
 Virgo jubens. Quâ parte nocens, tormenta recepit.

D. Pulcheria,
 Junioris Theo-
 dosii germana.

Namque in sacrilego putrefactam ulciscitur ore
 Vermis edax linguam, scelerataque guttura rodit.
 Atque alius, graviorque, & non moriturus inhæret
 Infelici animæ, scelerum vis conscia, vermis,
 Tetrior & colubris, atque omnis tabe veneni.

At Virgo, quæ lavam igni metuenda trifulco
 Armavit, dextrâ confertas flore coronas
 Theudosio castæque offert, sua dona, Sorori.
 Imperium sævos circumvallavit in hostes,
 Principis ingenio placidi curæque puellæ
 Subnixum & pietate, regens. Sic præmia pœnis
 Permiscet, ne quis nomen violare *MARIÆ*
 Audeat, & merito cuncti venerentur honore
 Numinis æterni Matrem. Quàm blanda clienti,
 Tam gravis est hosti. mores finxere *MARIAM*
 Cuique sui: geminæ fortis discrimina prostant.

Tu quoque, tu, Domina impensæ quæ præmia *VIRGO* Suo-
 cultus,

Ildephonse, doces, cujus memorabile libris
 Ingenium augustæ pro Virginitate Parentis
 Militat, obscænosque fodit stylus aureus hostes,
 Socraticæ nil tale domûs laudata supellex
 Suggestit. æternâ lita pagina luce coruscat,
 Incenditque animos divini copia veri.
 Materiâ ignotâ pallam tibi Regia Virgo,
 Ipsa suis factam manibus, mirabile donum
 Detulit, atque novo Myrtam insignivit amictu,
 Posthuma quo castos exornat Gloria manes.

Regalis trabæ in morem qui lumine amictus,
 Graminibus campos, squammis pecora humida ponti,
 Et volucres plumis, radiis & sidera vestit;
 Virgineo voluit contextum sanguine corpus
 Induere, ac sese peregrino obtexit amictu.
 Maternam quoque pro nobis gerit optima curam,
 Ceu quondam bene amica suo Rebecca Jacobo:

*RUM EXOR-
 NATRIX:
 Ildephonsum
 perpetuæ suæ
 virginitatis e-
 gregium de-
 fen'sorem sacrâ
 candidaque
 veste donat.*

Ex Proverb.
Apoc. &c.

Germanique aptat vestes majoris odoras,
Quò patria heredes optatò gratia dicat.
Frigora nulla domi, tempestatemque nivofam
Permetuit: duplici indutum nam tegmine curat
Omne ministerium. Byssusque, & purpura Fortem
Matronam, variæque decor virtutis honestat.
Arte novâ parat ipsa suis, quotcunque sequaces
Ildephonfus habet, nitido cœlestis in Agni
Sanguine quas jubeat mersas albescere vestes;
Sordis ut immunes, connubia ad alta vocatos
Pura toga, & mensis candens cœlestibus aptet.

O quam terreni moribundos corporis artus
Induxisse Deo; proprio cum se exuit ore,
Certa fides; tu me Christo indue, Diva, vicissim
Squallore absterfo vitiorum, & splendida inire
Da, precor, Aligerûm cultu convivia festo.
Cæsareo non huc adspiret symmate fastus;
Nec quæ fœmineo fulgent bombycina luxu,
Barbaricisque opibus pulchrisque onerata lapillis;
Palmatæve Ducum tunica, velamina picta,
Mortali celebres partis ex hoste triumphis.
Hos aliæ pugnæ, hos melior victoria poscit
Ornatus. MARIE quisquis pro laude nefandos
Aggreditur, mentis connixus viribus, hostes;
Promeruit niveos pompæ victricis honores.

VIRGO IN
SOCIETATEM
JESU BENEFI-
CENTISSIMA.
Ignatium Filii
sui militiæ au-
torat &c.

Exere te, Loiola pater, non Virginis inter
Eximios postreme Duces, qui Tartara contra
Direxere acies. tibi pugnæ tessera Jesus.
Auspiciis agedum Christi, summæque Parentis,
Jam sacra bella para, Dominique ad prælia dignos
Finge animos. tua signa petit lectissima Turma,
Sacramentum ingens ultro dictura, neque ullum
Pro Christo exhausti finem factura laboris,
Per maria, & terras, & cuncta pericula rerum.
Fracta Superstitio, atque accinctus fraudibus Error

Sternetur, Pietasque exul remeabit Olympo.
 Te duce, qui sævis Titanum exterritus ausis
 Fugerat ad Superos, Virtutum exercitus ardens
 Castra inimica premet vitiorum, & opima subacto
 Dite feret spolia, & regno potietur avito,
 Virgo aderit, mirasque suis dabit inclyta vires
 Militibus. namque illa suos, quos nomine Nati
 Scripseris, agnoscet, non te aspernata precantem,
 Cum decumbenti parvum cognoscere Numen,
 Conspectuque frui dedit, Idaliosque calores
 Protinus extinxit; cœloque accepit aperto
 Sensibus abductam mentem, dum sabbata vesper
 Octavus placidâ sopito morte referret.
 Militiæ ipsa tibi Leges, Asceticaque arma
 Tradit Manresæ, multâque in luce refulget.

Antè etiam, ne quid Mariæ non debeat Heros,
 Hac tirocinium Serrati in vertice Montis
 Imbuerat; sævo abscedens cùm transfuga Marti,
 Virginis ante aram, belli melioris amore,
 Sollemni excubuit ritu. Nec defuit omen;
 Æthere demissæ quando lux festa Salutis
 Insomnem excepit Loiolæ conscia noctem.
 Armorum nova cui facies, de fune retorto
 Cingula; lorica aurato pro tegmine, sacci
 Munimen talaris erat. gladium ille profanæ
 Militiæ, pulchro victum confessus amore,
 Affixitque tholo Dominæque in secla dicavit.
 Ipsa autem gladium flammâque auroque micantem
 Pro ferro, mentesqueabilem penetrare, rependit.
 Nec talem quondam Machabæo porgere visus
 Ductori Vates, demissum à Numine munus.
 Mysticus en, Loiola, tibi datur, accipe, mucro,
 Tartara quo victor scelerumque immania monstra
 Concidas, dum vota probans Regina secundat.
 Nempe suburbanum quâ parte Lutetia montem

*Accipe sanctum
 gladium munus
 à Deo. 2. Ma-
 chab. 15.
 Gladium Spiri-
 tus. Ephes. 6.*

Martyrii insignem titulo sacrauit, Olympo
 Juratas animas ædes Mariana recepit;
 Quo rediviva die, circum plaudentibus alis
 Cœlicolûm, rutilas Virgo conscenderat arces.
 Hospitibus tum rite favens Patrona, sequestris
 Pertulit ad Natum manibus rata vota; Deoque
 Acceptam, ipsa suo Turmam succinxit honori.
 Munere quo devincti animi, succensaque corda,
 Nec Matrem abjungi Nato patiuntur; & unâ
 JESUM Ignatiadæ MARIAMQUE inscribere signis,
 Atque omnes gaudent terrarum solvere linguas
 Christiparæ in laudem; per agros resonare, per urbes
 Dulce decus. tercentum effusa volumina prælis;
 Structa Sodalitia, & suggestis ardua templa,
 Ac templis similes MARIAM coluere palæstræ.
 Conceptus maculâ imprimis defensus; & alrè
 Cœlituum cunctas superedita gloria sortes.

Nec studia Europe, nec jam capit unicus orbis.
 More gigantæo exultans, aut fulguris instar,
 Limite ab Hesperio Phœbi surgentis ad oras
 Pervolat incensus geminos Xaverius axes.
 Non illum, Pellæ erumpens qui sedibus arctis,
 Ambitione avidus trans ultima Bactra cucurrit;
 Non, qui laurigero invecus Capitolia curru,
 Europamque Asiamque tribus Libyamque triumphis
 Devinxit, rapidâ æquiparet vi Numinis actum.
 Squallentes cumulo campos ardentis arenæ,
 Horrentes glacie saltus, noctemque diemque
 Acer, anhelus, hians, animarum in lucra fatigat.
 Jam sacrâ undantes populos affusaque regna
 Collustrat lymphâ Mystes. pius ecce lacertos
 Lassavit labor, & defectas robore palmas.

Sed tanta hæc, & quæ vario mox plurima versu
 Perstringam, MARIE assiduo perfecta favore.
 Quippe immensum aggressus iter; sublimia cœpta,

Heroumque animos & vim poscentia Divum,
 Instituit noto, Laureti operatus ad aram,
 Credere præsidio; cujus felicibus astri
 Nauticus auspiciis ignotos cursus ad Indos
 Commisissus, terrasque novas, nova sidera pandit.
 Virginis auxilio fructus mandare laborum
 Suppliciter solitus; rudibus quæcunque catervis
 Traderet, indictâ Mariæ obsignare salute.
 Hinc sacras obrepere amans nocturnus in ædes,
 Haud ullis atri larvis & motibus Orci
 Territus aut plagis, Dominæ perstabat ad aras.
 Et Rosæ tutos dono haud fallente Coronæ
 Præstitit, Oceani media inter funera, nautas.
 Quin etiam extremos Japonum recludere tractus
 Assumptæ per amica datum est sollennia Matris.
 Quid, quæ Virgineo Malacæ vel sacra litabat
 Templo instans, aut quæ mittebat fervida vota?
 Seu scapha ludibrium furiali abrepta procellâ,
 Spes ubi nulla super, viduæ revocanda carinæ;
 Sive Acenûm vasto turritæ robore classes,
 Lusadûm tenuique manu brevibusque phaselis
 Vincendæ: certas MARIA spes vindice fixit.
 Ac moriens animâ Dominam fugiente vocavit.

Ignatî quæ prima manus; tot fortia corda,
 Tot Mariæ sacrata novem capita alta virorum.
 Lænesium, Alphonsumne loquar, spectata Tridenti
 Lumina concilio? tene, ô Faber alme, Salefi
 Laudibus æquatum cœlo? te, Borgia*, Divis
 Adscriptum? vel te fasces, Gonzaga, superbos
 Calcantem, Procerum exuto splendore beatum?
 An queis alta rubet crudeli laurea fato;
 Quos sua, primitias Japonum, crux intulit astris,
 Tergeminos Socios, Spinolamve igne rubentem?
 Mastrillum, secli decus & mirabile nostri
 Ostentum; & quas una tulit centum insula palmas

Indicæ naviga-
 tionis ab Hen-
 rico Lusitaniz
 Principe aus-
 pex instituta
 MARIA.

* V. lib. 5.
 Heroic.

Gemmiferâ , Berzæ , Sinus te Persicus undâ
 Obstupuit , pulsoque Crucis Mahomete trophæum
 Figentem , & MARIÆ delubra evicta sacrantem.
 Silveriæ ornato MARIAM stupuere facello,
 Cœlesti specie florentem , barbara Castrum
 Pectora. Asevedio perfusus sanguine pontus,
 Virgineam effigiem non ipsâ in morte remissam,
 Complexu stupuit fluitantem hærerè tenaci.
 Lessiaden , Berckmannum , & quo te carmine dicam,
 Canisi ; aut Triplicem * nectens , Poiræ , Coronam?
 Edmundi rutilant gemini , virtute potentes ,
 Eloquio illustres ; hic Francis , ille Britannis.
 Nobile Toleti nec tantum purpura nomen ,
 Quantum ornat pietatis honos , cultusque MARIÆ.
 Vocibus & scripta , & scriptis facta æmula testor.
 Exquilix vivo testes , testesque sepulto.
 Alvarusque duplex , geminusque Aquaviva Camœna
 Exciderint ? tuque ô nostras , Anchieta , per artes
 Qui Brasilos inter saltus , celebrate novorum
 Prodigiiis operum , Dominæ exaudita canebas :
 Tuque Italis , Realine , modis ; tuque inclyte plectro
 Sarbieviskiade Latio ; & tu , docte Petavi ,
 Claromontanas toties audite sub aras,
 Parthenios acuens sollenni carmine cœtus.

Sed neque Carrafam Picolomineumque , Patronæ
 Legibus ardentes factisque extendere cultum ,
 Præteream ; vel te , Francæ venerabilis Aulæ ;
 Eloquio sacras regnans , Cotone , per ædes.
 Virginei præco nec suavior alter honoris.
 Nunc & viva tui spiransque affulget imago,
 Regia quâ gaudet , spectent quam postera secla.

At , vel mille sonent ærato gutture voces,
 Cuncta quis evolvat Mariano splendida cultu
 Nomina , Loiolæ patrios reddentia mores ?
 Quot Divæ nova regna parant ! ut Mexica rura ?

* Librum in
 signem de B.
 V. sic inscrip-
 tum.

Ut MARIE passim titulis Canada arva notarunt!

Et quacunq; piis Americæ inscripta trophæis.

Scilicet & cunctam Ignatî blandissima gentem

Gutterio velare & circumfundere Virgo

Conspecta ingenti regalis tegmine pallæ,

Materno imprimis animo gremioque tuendam.

Illa venenatos telorum infringere nimbos,

Hostilesque iras impacatosque furores

Una solet, Natoque aptam præstare Cohortem,

Aut jaculis illasam, aut ipsis crescere natam

Vulneribus, lætasque adversis ducere vires.

Hîc te, materni suavem cui nominis usum

Annuerat Virgo, hîc proprio te, Koftka, favore

Fovit amans, finxitque sibi. puerilis & ævi

Candorem, ingenui roseo cum flore decoris

Ornabat, nec passâ rudes prudentia sensus.

Virgineum ætheriæ Mentis, penitusque nitorem

Assimilem stupuere suo; purissima amore

Corâ pio liquefacta, modis flagrantia miris.

Gratia totum adeo sibi vindicat; imbuit artus,

Inseditque animam: faciliq; per omnia versans

Arbitrio, turbâ secrevit; & aspera lætum

Multa pati, jamtum cœlesti nectare pavit.

Nec semel Aligeris dignus conviva ministris,

Fercula suscepit venientis ab æthere Christi.

Ac lethi mediis rapiendum è faucibus, ægrum

Visere & affari Genitrix dignata, genusque

Sectandæ admonuit vitæ; amplexuque Puelli

Æterni puerum, divinâ forte, beavit.

Pars & felicitis curæ, properata receptûs

Emerito quod signa dedit; secumque triumpho

Tironem abduxit, festæ inter gaudia lucis,

Ætherio in vectam solio referentia Matrem.

Sic raptim emicuit terris, maturus Olympo,

Secula transgressus perfectæ munere vitæ.

B. Stanisl.
Koftka.

Letho crevit honos ; floret vis posthuma mundo.
 Assiduus Kostkæ omnipotens clarescere signis
 Dat Genitor , sanctique parat fastigia ritûs.

Res Polonicæ
 Heroic. l. 1.

Quid recinam duplicem , Chocimi prælia , laurum,
 Seu Ladislaus , seu quam Sobieskius offert ?
 Plaudit , utramque suo gratata Polonia Kostkæ.
 Proditā nec dubiis Patroni gratia signis :
 Testibus & fidis cœlestia visā , per omnem
 Sarmatiam depicta aris , celebrataque pompis.
 Luce triumphalem ducit per nubila currus
 Et lactis candore viam. premit ardua sellam
 Fulgentem Regina , caput stellata coronâ.
 Pro sceptro Puer est , nutu qui prælia torquet.
 At , coram supplex , Divinæ Kostka Parentis
 Visus opem extremo patriæ submittere fato,
 Et Ladislao Thracas domitare feroces.
 Auspiciisque pares iisdem Dux Magnus honores
 Chocimo retulit ; victricis præmia dextræ
 Nunc bene parta gerens , ferro defensa Lechæi
 Imperii sceptrā , ac medios firmata per hostes.
 Quanquam Sarmatici porrecta insignia regni
 Distulit ; obsessam donec ferventibus armis
 Barbariæ , ac belli crebro revolubilis æstu
 Infestam penitus patriam servaverit ultor.

Et jam primitias ingentes regia dextra ,
 Ac dudum armorum imperiis notissima virtus
 Edidit. ipse minax retro pavitantia flexit
 Agmina Sultanus : progressoque obvia Regi
 Cesserunt , aut vi perruptis oppida muris ,
 Aut quæ ultro subjecit amor , terrorve subegit.
 Tartarus & regni depulsus limite prædo ;
 Concisi passim Osmanidæ : pacemque Rutheni
 Antiquam , & leges optant revocare Polonas.
 Hæc monimenta tui stant , optime Kostka , favoris ;
 Cui Princeps , dum bella petit , regalia cœpta
 Credidit,

PARTHENICON LIBER I.

363

Credidit, innumeroque cruentos hoste labores.
Tantum posse dedit Genitrix, cui Numine prono
Omnia posse datum est. Kostkamque illustrat, &
omnem

Ignati sobolem donis cumulavit amicis:

Quæ memori instabant documenta exemplaue Vati.

Nec mihi, Bernarde, oblitus, cœlestis alumne
Virginis. ô felix, iterumque iterumque beatus;
Cui niveo expromens fecundam nectare mammam,
Quo pasci lactens voluit Deus ipse, liquorem
Immulsit, riguoque almam probat ubere Matrem!
Ex quo facundæ manavit gratia linguæ,
Lactea perfusus labrorum aspergine sermo.

O quas tunc cecinit laudes illo ebrius haustu!

Quos MARIE ad cultum stimulos currentibus ultro

Subdidit, & quantos injecit cordibus ignes!

Seu Stellam spectare jubet surgentibus undis;

Seu Scalâ eniti, superasque evadere ad arces;

Seu prece pulsare, aut Portam jam intrare patentem;

Perque manus, quæcunque offers, transmittere gratæ

Virginis; & certo liquidissima gaudia Ductu

Derivare polo, Charitumque uberrima dona.

Omnia quæ Divæ altricis præconia, Claræ

Bernardi eloquio didicere silentia Vallis.

Partem aliquam, libri, nostras retulistis ad aures.

Si mihi, limoso veteris pro fonte Camœnæ;

Ceu quondam, Bernarde, tibi; si candidus imber

Defluat ætherii materno ex ubere lactis

Arentem in linguam, & tantâ dulcedine pectus

Imbuat! ô quali devolvam flumine laudes

Virgineas! non me Pindi juga summa tenentes

Aut Latii vincant aut Graii carmine Vates.

Protinus & cedant longè, quicumque profanos

Aut olim cecinere, aut nunc meditentur amores.

Jam pietis anima, & mutis vox addita rebus.

Aa

VI R G O ,
M A T E R .
S U A V I S S I M A ,
M A , Bernar-
do lac instillat,
sensumque te-
nerrimum pie-
tatis in scripta
redundantem,

*Lib. 2. de Vir-
ginibus.

S. Joan. Da-
mascenum. l. 5.
Heroic.

Ipſa adeo nobis velut ingens adſtat imago
Virginitas; vitæque exemplum ac publica forma,
Quâ nil ſplendidius, ſupremæ vita Parentis,
Ambroſii * depicta coloribus; ac mihi poſthac
Subtexenda, pii ſeges ampla & meta laboris.
Necdum hîc exhausta, & Marianos ſcena Clientes
Aggerit; en, tacitum viſa exprobrare Damafci
Reſtorem quondam, & patriæ cognomine clarum;
Cæſam, virgineo quæ reddita munere, dextram
Virginis armantem in laudes, ſcriptiſque micantem;
Vique doloque furens, ſacris cùm bella tyrannus
Movit imaginibus, nec ferro ignive pepercit.
Martinum, Anſelmum, Caſimirum, ac vivida mem-
bris


Stigmata portantem aſpicio; totamque MARIE
Progeniem addictam Franciſci, acremque tuendo
Conceptûs decori. priſcorum hinc ardua Vatum
Objicit umbroſo Carmelus teſta reſeſſu:
Hinc alias Dominæ titulis diſtincta catervas
Religio adducit; Mariæque Agnique ſequaces
Inde puellarum turmas rapit, inde virorum.
Pannonici Stephanus regniſque inventor, & almæ
Per domitas Fidei ſator & dux maximus urbes,
Mancipii nexu MARIE ſeque ipſe ſacravit;
Et quodcunque illud ſceptri, quodcunque coronæ,
Acceptum retulit Dominæ, famulumque profeſſus
Commiſſamque regens Legati nomine gentem.

Plura quid ornando involitans aſſingere tendam
Parthenio? victus numeroque & laude reſiſto.
Alphonſos, Carolos, & quos aut Franca Philippos
Reginæ addixit Superûm, vel Iberica tellus;
Fulbertosque & Remigios, totque ordine Reges,
Eximios virtute Patres, ſpectandaque mitto
Sidera terrarum, flammis accenſa MARIE.
Omniſ ab hoc ſemper Dominæ pius arſit amore.

Tot pariter meritisque graves, animoque virili
 Matronas, multaque insignes dote puellas;
 Birgittam, Radegundim, & Regum à stirpe Joannam;
 Cæciliam, Catharin; teque, Heroïna *, Britannæ
 Victricem gentis, Francæ columnenque decusque,
 Arquia, virgineo auspicio : Mariæque clientum
 Suspirans seriem immensam veneransque relinquo.
 Suscepto stat meta operi, tempusque malignum
 Arcet, & infixam premit alto pectore turbam.
 Crebra tamen vario sparsim præconia cantu
 Edita : tum cursu in reliquo, librosque per omnes
 Obvia subnectam Marianæ insignia pompæ.

* Aurelian,
 Puella l. 2.
 Heroïs.

O VIRGO, ætheriæ stellantia templa Sionis
 Æternâ ditione tenens, cœloque secunda
 Parthenia, Heroum picto splendentia cultu;
 Respicias hæc mutæ simulacra canora pœsis?
 Si mihi Apelleæ, & summis quæ Vatibus artes;
 Bisgeminum pictura tuis decus afferat aris;
 Quam nimirum avidis inhians oculisque animisque
 Omne genus legeret MARIÆ, arderetque legendo.
 Sed tamen hæc quæcunque rudis monumenta Camœnæ,
 Partheniis appensa tholis, cum corde clientis,
 Quæ non ulla manus, non ulla refixerit hora,
 Rite dico; magnum si fors dignaris amorem,
 Augusta imparibus venerantem altaria donis.



PARTHENICON

LIBER II.

INSTITUTA PARTHENII,

Sive Marianorum Sodalium

Propria Deiparæ colendæ ratio.



U r tēneras mentes cultus , matura-
que firmet
Pectora ; quo deceat Proceres cum
plebe teneri
Servitio ; cœtusque sacros , augusta-
que clari

Jura Sodalitii geminum diffusa per orbem,
Virtutum genus omne , piosque ex ordine ritus
Prosequar , & Magnæ caros Genitricis honores.
Nec fugit incautum , quàm duros vincere tractus

Aggrediar. *MARIÆ* sed Vatem dulcibus urget
Incensum stimulis amor, & sentire salebras
Non patitur molli subvectum protinus alâ.

Sic, tibi sacrato, sic, ô Regina, labori
Blanda fave. suspensa tuo spes ardua nutu,
Carminis ætherii Princeps, quam candidus Agni
Ille chorus sequitur præeuntem haud vocibus æquis;
Virginæ quanquam eximium pæana cohortis,
Inconcessum aliis, totus miratur Olympus.
Parthenii susceptum adytis, per singula, Virgo,
Dirige, sidereo prælucens igne, clientem.
Te duce jam discent rigidi mansuescere vepres,
Floribus & nitidis pingues accrescere fetus.
Huc modò, Parthenici, lætos appellite sensus,
Huc animos, Dominæque novas aptate coronas,
Divite nec vacuos fructu contexite flores.

Publica jam vario pietas efficta colore,
Parthenium vestit formis quæ nobile pictis.
Christicolas, quæ pars operis jam exacta, per omnes
Virginis actus amor. tot passim templa, tot aræ,
Tot cultûs genera, & festæ sollennia lucis,
Donaque inexhaustum votis testata favorem.
Quippe animos Deus ipse movet, statuitque Patronam
Humano facilem generi, quam quisque prehenset
Sedulus obsequio, Mariaque interprete Numen
Haud timidis adeat votis, pacemque reportet.
Inde Sodulitium, ac miræ pietatis origo:
Parva quidem, & pueros primùm fortita Quirites;
Ut niveas Christus mentes, innoxia corda
Diligit; & quondam Judæa per arva puellâs
Sponte vocans, ac bissereno monstrare sodali
Dignatus, capitique manus imponere amicas;
Felices dabat amplexus, & dulcibus ulnis
Accipiens, tales proprio assignabat Olympo.
Tales Diva Parens, & Nato consona poscit.

ORTUS PRO-
GRESSUSQUE
MARIANI
SODALITII.

Hinc rudibus cœptis, tenuique ab origine crescens
Religio cunctas Româ profluxit in oras.

Prima Sodalitii hæc sedes, quod Nuncius Ales
Inscripsit *MARIÆ*. subjuncti huic undique cœtus
Accessere, piis devincti legibus omnes.

Ceu quâ, Naturæ infontis comes, alma voluptas
Purpureâ insignem specie descripserat hortum;

Ubere fons patulo riguas crySTALLINUS undas
Impulit, & circum rorantibus undique gemmis
Suave-renidentes divini ruris ocellos

Gestit imbuere; ac terris divisus, amœnos

Quattuor æquavit mundi cum partibus amnes.

Nec se intra juvenum cœtus, Academica septa,
Continuit pietas, immenso exercita cursu;
Inque dies major, vires collegit eundo.

Illa viros, arisque sacros, & castra sequentes,
Addictosque foro; quodque est tolerabile munus
Cunque super, variâ fortunæ sorte gerentes,
Comprendit, cœlique vias duce Virgine monstrat.

Ascetum ordinibus laudata hinc copia surgit,
Purpureos Patres, sancti decora ampla Senatûs,
Parthenium celebrare videt, Sociumque deserto
Audit Roma pias hortatu accendere mentes.
Nobilium eximium generosa Neapolis agmen
Parthenio exercet. Præfecti Stiria quondam
Parthenici augusto sese jactavit honore.

Ferdinandus
II. Imper. præ-
fecturam gessit
Sodalitii.

Ferdin. Episc.
& Princ. Pa-
derb. Coad.
Monaster.

Scilicet & dignum Fernando Cæsare jactet,
Hoc titulo imperium, hoc regales munere curas
Augere, & famulos *MARIÆ* summittere fasces.

Haud minùs illustri Paderæam nomine gentem
Qui regit, & doctas Antistes splendidus artes
Præsidioque usuque fovet, pietate Patronam
Assiduâ tenerisque colit veneratus ab annis.

Jamque sacro fervet Princeps insistere cultu,
Sæpe magistratum lectos obiisse Sodales

Inter amans : duplicemque³ suas deponit ad aras
Et mitram, & baccis fulgentem auroque coronam.

Alex. VII.

Te quoque Germano, Senarum gloria, Chisi,
Parthenio insertum spectasse Colonia gaudet,
Tunc Patris Aufonii partesque vicesque gerentem
Legatum, & placitæ jungentem fœdera pacis.
Mox Vaticanâ sublimis ab arce per omnes
Christiadûm regnas populos; Christoque secundum,
Maxime Alexander, caput inter sidera tollis.
Non oblita tamen supremo in cardine rerum
Parthenia; & quæ cuique dari consueta viritim
Tessera, ut instituant sancti decurrere menses.
Quam, Rheni Arctoïs rediens à finibus olim,
Transmitti longè Tiberini ad fluminis oram
Mandas; etiam triplicis sub luce tiaræ,
Ut priûs, exposcis, Marianaque sacra frequentas.

Nec Dominæ in Francis desunt, quos gloria vulgo
Secrevit, folioque genus dedit esse propinquos.
Contynum Clari qualem sacraria Montis
Laudarunt studiis regnantem & amore MARIE;
Undique Francigenûm collecto flore, sed uno
Salesio ante omnes, Sancto decorata Sodali.
Condæum & molli Biturix miratus in ævo;
Quem palma ingenii, quem bellica laurea cinxit
Heroem, celebratque perenni fama triumpho.
Mitto alios Proceres, quæ plurima turba, superbos
Servitio facili, & Dominæ juga læta ferentes
Liberiore animo. Sub leges Virginis ivit,
Militat & populis delectum ex omnibus agmen.

S. Franc. Sa-
lesius in Claro-
montano Par-
thenio Sodali s
fuit. de hujus
in D. Virginē
studio &c. vi-
de panegyri-
cam orationē.

Stant niveis MARIE signis florentia castra.
Ipsa, velut ferroque acies auroque corusca,
Delicias Sulamitis ovans pompamque remiscet
Terrori cladique, & pulchro fulminat igni.
Vimque animosque suis afflat, victriciaque arma
Induit; & cantu lituorum, acrique tubarum

SODALITII
LAUDES
è ff. litt.

Voce choros , sacro argenti clangore sonantes ,
 Diva ciet ; pugnasque acuit , præitque triumphos.
 Hac duce , & auspicio tanto , juvenumque virumque
 Delibata manus superas contendit ad arces.
 Qualis ubi directâ phalanx longo ordine sese
 Explicuit , junctisque in prælia viribus ardet :
 Tale Sodalitium , pallentis terror Averni ,
 Collectis pugnat meritis : sociataque Virtus
 Crescit. & ignavos fortesque exempla laceffunt.
Væ soli. collapsus enim quam prendere possit,
 Nulla subit manus auxilio. fraterna ruentem
 Dexterâ sustentat fratrem , & per lubrica plantæ
 Fallentis titubata solo vestigia firmat.

Fratris & auxilio munitam imitaberis urbem ,
 Quam valli , turreſque & mœnia lata coronant ;
 Nequicquam admotis oppugnent molibus hostes.

En , quàm fraternum (Jesseo credite Vati)
 Suave Sodalitium ! summo velut unguina fragrant
 Vertice ab Aroni , vultum spargentia & oram
 Purpureæ vestis , divinâ textilis arte.
 Ac velut , Hermoni cùm roſcidus incidit humor ;
 Aut matutini cùm per juga sancta Sionis
 Volvitur , ac teretes suspendunt gramina gemmas.
 Scilicet unanimes Domini clementia fratres
 Usque fovens , lætos vitæ dat carpere fructus ,
 Et gratas satiat cœlesti nectare mentes.

Quòd si fortè duos pietas tresve auspice Christo
 Junxerit ; ille , pii qui vincula nectit amoris ,
 Christus adest , mediusque intervenit æthere ab alto ,
 Promissi memor , & præſenti numine blandus ;
 Nec tellure super concordia vota repulſam
 Ferre finit , quæcunque instent Natove Patrie.
 Parthenici quid non cœlestia pectora cogant
 Stipatis focii precibus ? conspirat amicè
 Innumeri in gentes pietas porrecta Sodalis ?

Quid, quod & interpres votorum & conscia Virgo?
 Felices, quos tanta domo Regina ministros
 Excepit, patulâve obtendit cyclade Mater:
 Congregat ut pullos, milvo impendente, sub alas
 Provida avis; fido securos tegmine obumbrat.
 Quæ silvâ capitum ramosa in cornua surgit
 Bellua septemplex, monstroque immanior omni;
 Quanquam, excussa fero squammosæ verberare caudæ,
 Sidera conglomerans populato everrit Olympo;
 Non Jesu dextrâ stellas, non fronte MARIE
 Deripiat. sedes animis hîc firmior hæret.

Mutuane inter se auxilia & suffragia dicam
 Parthenici gregis? ut sacrarum plurima rerum
 Littore ab occiduo primos Titanis ad ortus
 Relligiosè agitent commercia? si quid amicum
 Cœlitibus; si qua est virtus, mercesque laborum;
 In partem, Mariane, venis, quocunque remotus
 Terrarum spatio. manant consortia laudis,
 Ceu diffusum oleum, aut radiantis missile Phœbi.
 Instar habet colli Virgo; caput ipse bonorum
 Filius. hinc animans fluxit per mystica membra
 Spiritus, & magno perspersus corpore regnat.

Nec sua Parthenicæ defunt æraria genti.
 Lydius immenso quidquid congeffit acervo
 Cræsus, ubi spumans auro Pactolus inundat:
 Quidquid & orbe alio petiit navalibus armis
 Hesperius; non ille Tago contentus; & Indi
 Fonte sitim, totoque ardens extinguere Gangis
 Flumine, Peruviâque famem saturare medullâ:
 Denique quidquid opum mortalibus invidet alto
 Pressum terra sinu, quidquid gemmantia celant
 Equora, Parthenii thesauro cedite, dixi.
 Non furum insidias per amica silentia noctis
 Permetuunt, iterum telluri infossa, metalla;
 Quæ curâ insomni trepidus servare laborat

THESAURUS
 SODALITA-
 TIS,
 sive Indulgen-
 tiæ pontificiis
 diplomatis cõ-
 cessæ parthe-
 nio &c.

Possessor; qualis custos draco velleris aurei,
 Fictus & Hesperidum custos prædivitis horti
 Excubuit, spirisque insignem amplexus inhæsit
 Circùm ingens silvam, fortunatosque recessus,
 Pervigil observans fulgentia mala satelles.
 Nec verò sacram rapiet vis hostica prædam:
 Nulla situ ignavum rubigo deteret aurum.
 Thesauros alios, non coctæ pondera glebæ,
 Quam vel Luna suo, vel Phœbus lumine tinxit;
 Divinas sedenim cumulans Clementia in altum
 Parthenicis extruxit opes, astrisque locavit.
 Multæ divitias, pretiosa talenta, puellæ
 Contraxere sibi: tu cunctas una beato
 Exuperas censu meritorum, opibusque Sodales
 Eximiis auges, Virgo. nec vincere tendat
 Hospita Carmeli, aut Pæsti gens hospita sacri.
 Quæ charites! quàm larga Petri de sede redundant
 Munera! Pontificum quanta indulgentia gazam
 Cœlestem, Christi meritis & sanguine partam,
 Parthenio infudit! seu cùm te prima cooptat
 Rite dies Sociis, Mariæque adscriberis albo;
 Seu cùm extrema dies & ineluctabilis hora
 Judicis æterni ciet ad fatale tribunal;
 Noxam omnem veniæ plenissima copia tollit.
 Quoque die certam felix tulit ore salutem
 Nuncius, ex alto MARIÆ demissus Olympo;
 Quoque Assumpta polo est, rerumque accepit ha-
 benas:
 Cùmque diu sterili grandævæ matris ab alvo
 Tristibus illuxit terris caligine pulsâ;
 Atque ubi conceptam regali sanguine finxit
 Gratia: Bethlææque Deum cùm rupis in antro
 Deposuit, partu sancti decus aucta pudoris;
 Ac sua ubi ascensu superantem sidera vidit
 Læta parens, Natumque oculis animoque secuta est.

His adeo scelerum pœnas abolere diebus,
Parthenicis, dum castæ obeant mysteria mentes,
Posse datum est. veniæque eadem feret obvia dona,
Parthenium quisquis subiit pius advena, sacris
Dans operam, dignâque gerens virtute sodalem,
Lux MARIÆ cùm festa redit, quam quisque colendam
Præcipuè legitque sibi propriamque dicavit
Parthenii cœtus, tituli que inscripsit honorem.

Jam solidus bissex decedit mensibus orbis
Pœnarum, quoties indicto tempore sedem
Partheniam celebras; quoties ascetica misces
Colloquia, aut sacris præbes hortatibus aures.
Sive, chorus Superis dum publica munera laudum
Exequitur cantu alterno; seu luce profestâ
Intentus spectator ades, cùm cordis ad aram
Golgothæ non vana ciet simulacra sacerdos.
Si vespertino districtam examine mentem
Consciis expendis, commissaque pondere libras
Quæque suo, tristi quoties aut carcere clausos,
Aut inopem invisis turbam, morbove jacentem.
Sive in amicitiam revocas, quos ira diremit,
Concilians pacem; seu corpora luce carentum
Prosequeris; vel membrorum compage solutam
Procuras precibus (nec vana hæc februa) mentem.
Horum aliquid quoties divino impendis honori,
Tot, Mariane, tibi pœnarum detrahis annos.
Denique, Parthenio si cui deprompta libello
Præsidia expones, artemque viamque salutis;
Bisdenos tibi noxa simul decrescet in annos.

Atque hanc Parthenicis propriam largitus opum
vim

Pontificum favor, & summæ reverentia Matris.
Gregorii immensam & Sixti diplomata dotem
Aggessere ultro, communiaque esse dederunt,
Quot propè eunt soles, animorum ingentia lucra,

Quanta referre solent Latiam stata templa per urbem
Lustrantes. eadem pariter meruere Sodales,
Loiolæam ædem aut quodvis adiere sacellum,
Ætheriumque Patrem Christo præeunte vocarunt,
Et Dominæ bis terque piam dixere salutem.
Culparum ultrices pœnas aut funditus omnes,
Aut partim redimunt : nec longa piacula debent
Posthuma, quæ multo MARIE quoque diluit imbrei
Dulcis amor, famulos nec post fata ipsa relinquens.

Quæ tibi ne vilis veniæ sit gratia tantæ;
Disce adeo, quibus urantur post funera pœnis
Terrigenûm exuto purgandi corpore manes.
Cæca jacet terræ specus in penetralibus altis,
Vasta, capax populorum, atroque bitumine fervet,
Hospitium infelix animarum, immite sepulcrum.
Heu miseri manes ! quàm vellent corpore in ipso
Omnes pœnarum numeros, & quidquid acerbi est
Setoso Cilicum in textu, durisque flagellis,
Fletum inter gemitusque pios, jejuniaque arcta,
Exhaustissè ultro, & lacrymis commissâ luisse,
Quæ rigido nunc ultor agens Deus expiat igni!
Quàm curis piget indignis fudissè labores;
Nec veniæ oblato susceptam munere pacem!
At serò incautos damnum irreparabile tangit.
Egit quippe suas Patris clementia partes,
Dum vixere : suas mox, haud frustranda, vicissim
Occupat à morte incumbens vindicta tremendi
Judicis, & pœnis culpas atrocibus æquat,
Acri suspendens fatalem examine libram.

Scilicet haud ulla cœlestia limina sordes
Admittunt; maculamque omnem posuissè necesse est
Regno adscribendos supero, sanctæque Sioni.
Ergo ubi jam excedunt mortali corpore mentes,
Nec Domino exosæ, noxâ levioze tenentur;
Seu passæ tenues impune inolescere culpas;

Seu graviora ausæ, veniam sed rite precantes
Læso instaurarunt abruptum Numine fœdus,
Necdum etiam explerunt meritas pro crimine pœnas:
Antè, Dei aspectu & stellatâ sede potiri
Quàm cupidis liceat, lustralibus omnia flammis
Cœlo exclusæ abolent veteris vestigia noxæ.

Concretas ut cùm terræ massa aurea facès
Sustinet; excoquitur labes, vivoque subacta
Artificis fugit igne: manet sincera metalli
Materies, puroque oculos splendore laceffit.

Sic ipsos animis penitùs vis torrida nævos
Eximit; & Stygio haud impar vis illa camino.
Æternæ sedenim barathrum irremeabile cladis
Interiore Orco, rescissaque gratia Christi.
Tum furiaè insultant; non quales fabula Diras,
Tartaream canit Alecto, geminasque sorores,
Sanguineas pallam, & colubris stridentibus hirtas;
Verberibus piceisque accingi in crimina tædis.
Sævior hîc facies; & desperantia corda
(Nec requies) agitat factorum conscius horror;
Ac toto incumbens æternum pondere fatum.
Præcipitesque acti cœlo, gens turbida, fratres,
Lucifugi, immanes, similesque draconibus ora;
Tortores, gens tota, & inextaturata nocendo;
Atque eadem scelerum consors, consorsque dolorum.
O furor! ô rabies, tempestatesque profundæ,
Assiduo infestæ tonitruque & fulminis ictu!
Gurgite sulfureo stagnans ignique vorago!
Cœlo irascentum, & mortem clamore vocantum
Plangores fremitusque, & luctifoni ululatus!

Talibus hærebunt Mariæque & Numinis hostes
Supplicii, mersæ flammâ & caligine pestes,
Quos odiis cunque impietas succendit apertis,
Munificæ ingratos Dominæ, lucique rebelles:
Aut specie obrepit queis religionis inani,

Lubrica dum serpit Novitas ; blandoque veneno
Grassari , & sacris fallax miscere profana ,
Vellicat invisos augustæ Matris honores.
Talibus at contrâ pœnis Regina cliëntes
Præripit : & levioze manu cùm stringit amicos ,
Justitiaque Deus manes purgante suburget ;
Ipsa levat , flammæ aspergens solatia , Virgo.
Jam cœli spes certa , brevi statione retentas
Demulcet mentes , & nobile Gratia pignus.
Aligeri placido Custodes ore revisunt ;
Fidaque viventum medii commercia jungunt
Manibus , effusasque preces ad sidera portant.
Præsertim , sancti cui credita cura peculî ,
Largitur summus quoties pia munera Præsul ;
Morte salutiferâ , nec decrefcentibus usu
Assiduo Christi pretiis , sacroque cruore ;
Ac meritis Divûm reliquis , primæque MARIÆ,
Congestam expromens pœnæ ad compendia gazam.
Triste , horrendum , ingens versurâ solvere nomen
Incensæ gaudent animæ , vinclisque resolvî.

Atque ea cùm faciles exposita piamina in usus ;
Quâ non ipsè tibi , dum spiritus incolit artus ,
Quâ non deinde aliis sortem hanc mercede pacisci
Debueris ? vel ne qua animæ mora Numen amanti
Objiciatur , & in duro tenebrosa recessu
Compingat spelæa , viamque occludat Olympo.
Ut quondam Ifacidæ segnes deserta per arva
Usque moram jussi trahere , & squallentis arenas
Ferre soli , vastosque siti flagrare per æstus ;
Ubere dum lactis riguas & mellis oberrant
Summotique inhiant terras , desponsaque regna.
Hîc patriæ extimulat præsens melioris imago ,
Fragranti manant ubi gemmea nectare prata ,
Aureaque æterno rutilant pomaria fetu.
Et divinæ animos urit vicinia sedis ;

Infernâ & fornace dolor misto urit amore.
Felix, in serum qui nulla piacula tempus
Distulit, instanti subducens pabula flammæ.
Sed paucos quando emeritos ita Numen amicum
Excipit, abjectoque micans è corpore virtus
Sidera inoffenso docuit superare volatu;
Proxima cura vices fuerit prævertere acerbæ,
Mitiùs ut saltem penetrabilis excoquat ardor.
Nec brevior, quàm Parthenio via secta salutis.
Elatum ut tumulto jam composuere cadaver;
Tum privata precum memores & publica fratri
Officia exolvunt, placidamque exinde quietem
Parthenici octonis instant meruisse diebus:
Dilectæque animæ lustralia sacra laborant.

Christiparæ usqueadeo sese addixisse clientem
Profit, & egregios inter meruisse Sodales.
Gratia ubi vitam sese Mariana per omnem
Explicuit, meritisque insontem implevit alumnum;
Præsertim extremo in spatio, cùm æterna vacillat
Momento suspensâ salus; tunc optima Mater
Subsidio accelerat, vimque insidiasque refringit
Tartareas, sævire odiis non passa cruentis
Orcum inhiantem animæ, supremæque bella moventem.
Nec tantùm Aligeræ mandat portanda cohorti
Auxilia, & summo ipsa favens discrimine rerum,
Sæpe laborantes animas placidissima Virgo
Solatur, visu ipsa pios dignata beato.
Dehinc gremio acceptam mentem super æthera tollit.
Aut si fors crasso suscepta in corpore labes,
Quam non eluerit toties, ac morte sub ipsâ,
Munere Pontificum, veniæ concessa facultas;
Flammiferos mollit nexus, carisque suorum
Manibus opportuna ciet suffragia, vivos
Exanimùm curâ instigans, pia corda, clientes.
Quin etiam sæpe ipsa suo pro jure (Tonanti

Sic placitum. indulget blando Genitricis amorì,
 Et longos meritis compensat grandibus ignes)
 Parcius atra jubens favire incendia, pœnæ
 Tempora contrahere atque ereptos carceris antro
 Sideream Regina solet transcribere in arcem.

Et quisquam MARIÆ nomen, cum nomine quis-
 quam

Cor dare, sacratoque locum sibi poscere cœtu
 Cunctetur? certatim omnes, puerique patresque;
 Quos toga, quosve sagum Proceres insignit; & ipsi
 Cum grege Pastores lituo mitraque verendi,
 Divæ accenseri famulis, conscriptaque libro
 Nomina Parthenio casti latentur amantes.

Haud temere quosvis tamen, at discrimine certo
 Delectos Magnæ domus excipit alma Parentis.

AGGREGA-
 TIONIS SO-
 LENNIA.

Huc ades, ô Tiro, si te observata probavit
 Parthenio virtus & pulchra modestia morum;
 Discretusque loco, rebusque exercitus imis
 Omne rudimentum posuisti; & rite paratus,
 Jure Sodalitii ac tanto dignaris honore.
 Cuncta memor vitæ evolvens delicta prioris
 Prode sacerdoti, & lacrymis commissa repurga;
 Victima ne maculis, ingratum & inutile munus,
 Cœlestem offendat Dominam. tum Numine pastus,
 Sanciat ut Proles MARIÆ tua fœdera, puram
 Stringe facem, admotusque aræ tua concipe vota.

SANCTA Parens, quam nec veteris contagia noxæ
 Afflarunt Evæ in seros transfusa nepotes;
 Nec propriæ aspersit labes tenuissima culpæ;
 Larga sed ante omnes superis quam Gratia donis,
 Omnigenæ virtutis apex fulgorque coronat!
 O MARIA, imperio natum, stellisque coruscis
 Inscriptum, & radiis mulcens maria aspera nomen!
 Cum Patre supremo Nati communis honorem
 Consocias Genitrix Virgo; fratremque dedisse

Terrigenis gaudes illæsi candida floris
Diva Deum; & summi regnas dextræ assita Regis;
Unâ Prole minor, Christoque simillima Mater,
Publicam & humanæ curam sortita salutis.

En ego Partheniam supplex abjectus ad aram
Sacramentum ingens & non revocabile dico.
Te Dominamque hodie, cui tota ex ordine vita
Serviat; & cœli cunctis præ civibus unam
Patronam ipse mihi, æterno devotus amore,
Rite lego, haud dubius fatalem vincere causam;
Quanquam haud æqua gravi scelerum sub mole la-
borat,

Si patrocinio miserum amplectare clientem.
Felices te orante reos sententia nunquam
Horrida fulmineo percussit Judicis ore;
Libera sed vinclis exultant corda solutis;
Ætheriumque forum Verbo regis Alma Sequestro.
Jam quodcunque meum est, meque in tua dulcia
jura

Transcribo penitus, Magnæ sacer usque Mariæ.
Nulla dies pactum hoc, nulla inviolabile fœdus
Solvat: & antè sui divulsos corporis artus
Spiritus hic, quàm te male-felix transfuga linquet.
Nec te lingua procax, nec te manus improba lædet.
Aridam utramque priùs, præperatâ & morte rigentem,
Diva, velim. desponsa tibi, jurataque rerum
Dictorumque fides. Nec, quos mihi cunque potestas
Subdiderit, decus ire tuum atque offendere contra
Perpetiar, minimumve tuæ decerpere laudi.

Ergo si justis precibus mollissima flecti,
Hæc mea vota probas, & mutua vincula nectis;
Suscipe, Diva, tuum, natisque adscribe clientem.
Aut Nati si fors titulus nomenque superbum est,
Perpetuum numera famulum, neu vilis amorem
Despice mancipii; præsensque per omnia Virgo

Adspira, & fragilis labentia tempora vitæ
 Dirige, nec solum extremo me desere in actu.
 Terrificâ defensum horâ, lethique periclo
 Servatum æternæ regno, precor, adde Sionis.

Hæc puer, haud sensu indocilis, cùm prima facultas,

Edat, & integros Dominæ sic dediceret annos:
 Aut, si quem casus pigræve incuria mentis
 Longius extraxit, properet maturior ævi.
 Serò etiam sapuisse juvat. Nec, fervida quanquam
 Præstitit & viridis pietas juvenilibus annis,
 Nec tardum omnino Deus aspernatur amorem,
 Extremisque senum votis accommodat aures.
 Felix illa dies, alboque notanda lapillo,
 Quæ te cunque dedit *MARIÆ*, adjunxitque Sodalem.
 Auspiciis non ulla tibi pignusque salutis
 Majus habere dedit. cœlestum opulenta bonorum
 Hinc facili ad plenum manabit copia cornu.
 Jam te complexu Mater dignatur amico,
 Grataturque sacro resonans præne facellum.
 Jamque tuum accipient monumenta perennia nomen,
 Ceu *vita* liber, aut Agni cœleste volumen.
 Parthenii ingentis longo capita ordine servant,
 Delectam *MARIÆ* gentem. cum Virgine sancti
 Fœderis hîc tabulæ, testis quas excipit Ales,
 Quisque tibi Custos & Numinis armiger adstat,
 Quisque Sodalitii excubitor, Mariæque minister.
 Excipit haud fluxas voces, sparsamve per auras
 Propositi formam, & cœli in tabularia condit.

Illuc nos terrâ venientes obviam Virgo
 Accipiet, matrem confessa. & jam inter utrosque
 Parthenios cœtus, terraque poloque colentes
 Communem Dominam, rerum commercia jussit;
 Ut Superos precibus, merito & celebremus honore;
 Ipsi autem curam vigilem auxiliumque vicissim

Cœlicolæ impendant nobis. Quas dicere grates,
Diva, parem, quæ me obsequio Cœlestibus æquas;
Nec te degeneris pudet, ô pulcherrima, nati.
O mihi suave jugum, potioraque torquibus aureis
Vincula, queis me dius Amor metuente resolvi
Nexu felicem æternos devinxit in annos!

Nunc age, continuis quæ sint præstanda diebus
Parthenico, expediam. vitæ memorabilis esto
Quæque dies specimen, magnæ virtutis imago.

EPHEMERIS
PARTHENI-
CA; sive So-
dalis, præfer-
tim Academi-
ci, quotidiana
vitæ ratio.

Prima sub Auroræ consurgens lumina, cœlo
Tolle manus, summumque piâ prece Numen adora.
Plenâ in te congesta manu gratare benigno
Dona Patri, lapsæque averſa pericula noctis.
Tum, cœpto quæcunque die peragenda sequentur,
Rite offer, lumenque rogans & robur in hostis
Tartarei assultus varios. quo munere fretus,
Exin nulla Dei sacrata resolvere jussa
Promittas, animumque ingenti pignore firmes.
Nec verò augustam Christo disjunge Parentem.
Ac Superos votis alios flagrantibus ambi,
Ordine quemque suo, Tutelaresque saluta.
Queis festus renovatur honos, clarissima certè
Sedulus Indigetum venerari nomina; cultu
Præcipuè insignes MARIE, coluisse memento:
Nec nullâ ignotos generatim amplectere curâ.
Hæ tibi primitiæ rerumque exordia sunt.
Exsomnis flores animi præcerpere anhelat
Orcus, & insidians male-cauto irrepere cordi;
Spargit & atra sagax fecundæ semina culpæ,
Si torpere animum segni patiari veterno.
Quin rectam accelerans efferre ad sidera mentem,
Arma rape, & primis sceleratum finibus arce.
Ægrils ejicitur, quam regno excluditur hostis.
Mox alias alii curas, quos grandior ætas
Fluctibus implicuit variis; seu Principis aulâ;

Seu templis castrisque, aut pulvinaribus altis
 Justitiæ, ac quemvis fas est, agitate laborem,
 Dum MARIE semper memores; ac debita nullum
 Christicolæ eludat pietatis munera munus.
 Primas prima ferat quæ rerum, & maxima, curas.
 Ast animum vigili imbutus pietate recentem,
 Tu, lætum cui ver agitur, florentis & ævi
 Castaliâ excolitur mens haud ignava palæstrâ;
 Jam studiis te accinge volens, gratoque labori
 Strenuus indulge pulchras volitare per artes.
 Doctrinæ ingeniiq; dator, Superûmque magister
 Vibrantem afflabit divini luminis auram
 Spiritus, haud sterilem passus trivisse palæstram.

Sed prius attigerit libros quàm dextera, cùmque
 Verba rudes blæsâ primùm connectere linguâ
 Instituunt, jamtum hæc teneris elementa puellis
 Præscribam, blandæ nomenque decusque MARIE.
 Atque ubi crescendo explicuit se firmior ætas;
 Hæc eadem perdiscere ament; tum cetera faustis
 Ducere ab auspiciis. En, matutina juventam
 Æra cient, totâque Lyceum accurritur urbe.
 Gymnasii notam, quâ te via ducit, in ædem
 Qui tandem orando labor est subiisse Tonanti?
 Terrenum quo more cohors solet aulica Regem
 Visere, & officio certatim ambire frequenti.
 Tu magis ante aras, submissus genva, saluta
 Præsentem niveâ frugis sub imagine Christum;
 Ceu puer Austriacæ quondam hospes Kostka Viennæ.
 Haud operoso insta supplex, Mariane, favori.
 Phœbeam veteres tenebroso à Principe lucem
 Expetiere sibi, cæcumque hausere furorem.
 Sol tibi divinus sanctâ penetralis ab umbra
 Arcanos fundet radios. tu pectore aperto
 Excipe (neve atro vitiorum exclude recessu)
 Ut liquidi maris unda micans, ut candida nubes;

Aut speculi solem tersissima lamina reddit.
Pollutæ hospitium mentis, sedemque profani
Corporis horrescit, longeque averfa refugit,
Munere quæ optato castos Sapiencia mores
Exornat, doctoquo addit sua præmia ludo.

Jam te sacra vocant, nostræ devota saluti
Victima ubi recidiva polo delabitur ultro;
Mysticaque augusto peragit Deicidia ritu
Golgothei collis referens monumenta sacerdos.
Aligeros inter purâ cum mente venito,
Sensibus & castis; ac mundo corde beatus
Nosce Deum occultum. Fidæ modò credulus auri;
(Nos oculique manusque, & odor gustusque fe-
fellit)

Sanguinis undantem ambrosiam lætissimus hauri.
Tot riguos aperit fontes, quot vulnera Jesus
Semper aperta suis semperque recentia gestat.

O si pervigilem ante aras, neque frugis egentem,
Cœlicolarum instar liceat traducere vitam!
Sed refici accisæ vires, & damna caduci
Corporis usque novis sarciri accessibus optant.
Finibus his pastûs teneat se justa cupido,
Ne pronæ in ventrem pecudis de more saginam
Quæsisse, ingluviemque cibis expleffe labores.
At tu sume cibos, tanquam medicamina; & inter
Vescendum cave jejunam dimittere mentem.
Illa magis pascenda tibi est. sunt & sua menti
Fercula; quasque epulas alieni haud indiga sumptûs
Ipsa parat, meditando, sibi; quasque auribus haurit,
Dum mensis lectorem adhibet Convictor honestis:
Obrunditque gulæ stimulum, illecebrasque palati.
Sic bene conditis dapibus sincera voluptas
Insinuat; reparata novo stant robore membra,
Non ignava situ putrisque trahentia morbi
Sentinam; & nullo, aut nimio marcentia somno:

Verùm habili cunctam in partem succincta vigore,
Atque animæ facili ductu frænoque regenda.

Post, ubi jam sedata fames, mensæque relictæ;
Ne tibi continuo quisquam tam tetricus autor
Imperet à mensis opera ad graviora labori
Cessurum transferre animum. Ni fune remisso
Laxentur, ductis intentos cornibus arcus
Ruperis : & , quæ fulmineo tormenta fragore
Intonuerè, crepant, si crebrior arserit ictus;
Nonnullam & requiem vel ahenea corpora poscunt.
Ne tamen effusis animum procurrere habenis
Imprudens patiare; sed intra septa coërce:
Ulteriùs si quando illum vagus egerit ardor,
Officii in gyrum revoca; linguæque severa
Exerce imperia, & juveniles comprime motus.
Neu quemquam factò violes, dictove laceffas:
Nec verò insulsis salibus, risuque protervo
Colludas; sed amica piis confortia verbis
Respergas, quacumque via est; sociasque per aures
Jacto venturam expectes de semine messem.
Mox dispersi animi partes, utcunque receptum
Hora canet, properè sua quamque in castra coactas
Compones; avidusque moram pensare, solum
Acrius ingenium intendes, reddesque labori.
Otia sic profint; cursum mora parva citabit.

Prava sodalitia exhorre, Mariane Sodalis:
Virginitatis honos, Dominæque injuria tangat.
Heu fuge fatales scopulos, fuge naufraga saxa,
Quamvis omne sonet Sirenum cantibus æquor.
Nec te decipiat crater CIRCÆUS hiantem,
Aureus ille licet, ac dulcibus oblita succis
Labra gerens circum. illuso latet humor in auro
Virofus, quo pota virum tot millia fœdos
Degenerant pecorum in mores, non corpore verso,
Sed falsâ monstruosum animum celantia formâ.

Nescia mens juvenum, & blandi secura pericli
 Per vetitum ruit infelix. Ea saga, Voluptas,
 Parthenici. vos fidum oculis prætendite velum;
 Munitas rigidis obducite sentibus aures:
 Neu gustate quidem, aut summis attingite labris.
 Pocula, Tartareas intus claudentia pestes.
 Suadet enim vefanus amor; suasere sodales,
 At non Parthenici; non, qui Solymæa frequentant
 Concilia; at Babylon putri quos ubere lactat.
 Aude age: nec spurcas impune licentia voces
 Te coram eructet. monitu, ne parce, salubri
 Increpita; aut taciti saltem censura pudoris
 Damnet, & adductæ castigent nubila frontis.

*Sepi aures tuas
 spinis.
 Eccli. 28.*

Parthenici à pluteo procùl, ô, procùl este libro-
 rum.

Molles nequitia, totoque absistite tecto.
 Infantes Musea libros petiere, magistros
 Virtutum, cœlique duces: nec gratior ulla est,
 Quàm pia quæ MARIAE circumfert pagina laudem.
 Hæc versare manu, hæc animis monumenta Sodali
 Edico, & magnos factis traducere in usus.

Denique, ut ætherii Regem veneratus Olympi es
 Exoriente die: sic, cùm nigrantibus alis
 Somnum amplexa ferens operit nox humida terras,
 Sidereum votis ferus venerare Parentem.
 Hæc Orci insidias contra, nocturnaque tela
 Ægis erit. Væ, qui nudus cœlestibus armis
 Permittet somnis oculos, animumque periclis
 Tristibus objiciet; præsertim conscia noxæ
 Lethalis si corda gerat. Tu, si qua salutis
 Cura super, justo perpende examine, quidquid
 Vel conceptum animo, aut linguâ manibusve pro-
 fectum,

Numinis æterni sanctos detrivit honores.
 Excute te, penitusque sinus evolue latentes.
 Cordis, & anfractus; productaque monstra latebris:

Siste tibi. arcanum mentis conscende tribunal
 Judex ipse tui, fidusque ad singula testis;
 Præsentisque in te pœnas expromere vindex
 Ne dubita; & totis Metanœæ viribus insta
 Contriture reum. *Prima est hæc ultio*, quâ se
 Quisque nocens damnat meritum, absolvitque fa-
 tendo.

Justitiæ leges non improba gratia vincit.

Quod superest; dum strata petis, mollique cubili
 Per tenebras fuscum velaris sindone corpus,
 Jam consanguineum letho per membra soporem
 Ducturus; pheretri subeat minitantis imago,
 Et mortis facies, tumulique inamabilis horror.

Sed non ulla prior fuerit tibi cura *MARIÆ*
 Assiduo cultu. niveis da lilia palmis,
 Necte rosas capiti, & nardis asperge volentem,
 Aurorâ surgente, æris pulsu excitus illam
 Æterni Auroram Solis, quâ concidit ingens
 Nox scelerum, & cœci domitricem Acherontis O-
 lympo

Appella; mediaque die, primaque *MARIAM*
 Nocte voca; precibusque horas signare memento.
 Jam manibus, quæcumque offers, committe *MARIÆ*,
 Si vis grata Deo, si non latura repulsam.
 Sordida Virgineo splendent munera tactu.
 Huic vitam lethumque, animam corpusque repone.
 Virgineum non corde pio, non ore recedat
 Nomen & , auxilii certum meriture favorem,
 Virtutis materna sequax vestigia adora.

COMITIALI-
 BUS DIEBUS
 PIÆ SODA-
 LIS EXERCI-
 TATIONES.

Hac-memorata-tenus vero peragenda Sodali
 Privatim quocunque die : nunc publica porrò
 Accipe quæ crebro poscantur munia ritu.

Sabbata (quos Magnæ sacros dixere Parenti
 Christiadæ, ritumque dies coluere vetusto)
 Partheniam solitâ sedem pietate recludunt,
 Cùm fluvio impendet jam sol devexus Ibero.

Tunc admota pias subeunt hortamina mentes;
 Conscia supplicibus fervent penetralia votis.
 Conventûs hæc illa tamen præludia cense,
 Quem simul, ac Domini signatam nomine lucem
 Phosphorus inducet. proprii delubra sacelli
 Maturè petito; atque illic, dum fruge sacerdos
 Divinâ, & superæ litet almo sanguine Vitis,
 Aut Dominum supplex Dominique affare Parentem,
 Submissus genua; aut tacitus confide, Sodalis,
 Indigetumque vaca mores & facta legenti,
 Suavis ut areolæ lætos verno ubere flores.
 Proh, qualem Abelyus, jugi per secula cultu
 Virginis insignem, pretioso in munere, librum
 Parthenicis misit, quæis Francia gaudet, alumnis!
 Temporibus digesta suis decora omnia cernas,
 Pontificum Regumque ingentes ordine pompas,
 Sollennes populis fastos, votivaque dona,
 Conciliis decreta, Patrumque effata coegit.
 Christiparæ gratas artes, laudumque medullam
 Excerpens, gravibus documenta exemplaue chartis
 Lecta dedit, multùm illa pio volvenda Sodali.

Plenior ut cœtus; Jessei carmina Regis
 Alternò resonare choro, laudesque MARIÆ.
 Nec rarâ prece fraternos exolvere manes
 Ardor agit, diro expurgans quos carcere flamma
 Alligat, incensis poscentes æthera votis.

Longa fenestratum series adit, ecce, tribunal.
 Justifici solium hîc posuit Metanœa doloris.
 Hîc densi tenues animæ detergere nævos.
 Solliciti maculas etenim cavêre Sodales.
 Incusat sese ipse reus, pœnamque reposcit
 Et veniam. uberibus lacrymis permista cruoris
 Balnea, quem rubrâ cæsus Crucis Agnus in ara
 Omnibus è venis laniato corpore misit;
 Piscinâque animos jussit mersare salubri.

Ludov. Abel-
 ly, Episc. Ru-
 thenensis, Ec-
 clesie Traditio-
 nem circa Dei-
 paræ V. cultum
 &c. scripsit;
 donoque misit
 omnibus Frâ-
 ciæ Sodaliis

Atque ubi purpureo sese emersere lavacro;
 Albatos videas superi ad convivia Regis.
 Esurie sanctâ & totis inhiare medullis.
 Divinam humani vescâ sub imagine panis
 Fas libare dapem, viresque ad grandia rerum
 Colligere, ac dulci mentem recreare saginâ.
 Partheniô apta quies & digna silentia sacris.
 Turbam extra strepitumque tuo, Mariane, recessu
 Virtutum exequeris secluso munia vulgo.

Postquam aræ perfectus honos; mactataque Patri
 Hostia, frugifero satiavit corpore Christus
 Convivas; lumenque Dei spirabile pronis
 Excitum precibus: tunc vividus ille coruscât.
 Ancipitis ferrum gladii penetrabile sermo
 Exuperans. ignitâ acie pia corda recludit,
 Et graciles certat vitiorum excindere fibras,
 Ac penitus Christo & MARIÆ submittere mentes.
 Increpitatque moras, si quem mala fortè tepentem
 Segnities tentat, sanctoque in munere languor.
 Mox varias obeunt Divæ laudesque precesque;
 Conceptos referunt animis majoribus ignes.
 Grande sonat titulorum agmen, cùm Numine ab
 ipso

Litan. Lauret.
 B. V.

Exorsi decora agglomerant Mariana Sodales;
 Quæ Lauretanus primùm cantata sub aras,
 Nomen & inde trahunt, mundoque audita resultant.

O MARIA, infestum sceleri prece vince Tonantem;
 Quem sublapsus utero, fragili quem corpore amictum,
 Ætherio fecunda satu, sub luminis auras
 Fudisti, ter-Sancta Parens, ter-Maxima Virgo.

Te Matrem Christus pariter, Divinaque fecit
 Gratia, Bethleo mortalibus edita partu;
 Purior & nivibus Genitrix, & purior astris!

Quis tibi devinctum æterno se nolit amore,
 O Mater, quâ nil melius, nil pulchrius usquam,

Nil mirandum æquè Deus edidit, editus alvo
 Ipse tuâ rerum ille Opifex : quo condita Verbo,
 Per te eodem rursus Verbo instaurata, salutem,
 Alma, tibi debent & amicum secula Numen.

Te, Virgo, Solymas inter Prudentia Nymphas
 Extulit illustrem meritis, orbique Verendam,
 Et magno Superûm atque hominum dignam ore fo-
 nari.

Nulla tibi sese, Virgo, conferre Potestas
 Audeat : ipsa tibi divina Potentia servit.

Nec durâ miseros, Clemens, averteris aure:
 Nec servis Dominove fidem scis frangere pactam;
 Semper & obsequio Numen, dulcique clientes
 Allicere imperio multoque assueta favore.

Justitiæ Speculum, & spirans Virtutis imago!
 Te sibi molita est habilem Sapiëntia; & in te
 Hospitium æternum, soliumque immobile fixit.

A te nostra fluunt, plenoque à fonte redundant
 Gaudia, gemmatum, & cœli fragrantibus auris
 Opplerum Deus ipse suo Vas signat honore.
 Ambrosium divinæ afflas pietatis odorem.

Mystica purpureo florum Regina decore
 Suavè micas; vivoque tener Pudor igne rubescit:
 Ducit odor castos tua per vestigia amantes.

Isâidæ Turris, quam propugnacla coronant
 Fetam armis, tutosque aptam præstare receptus;
 Atque eadem murali eboris spectanda nitore,
 Candentis Libani Turris : roburque decusque
 Jungis, & aërios despectas vertice nimbos.

Stas solido flagrans auro, distincta pyropo;
 Humanæ non tu artis opus, dextrâve parata
 Mortali Domus, aut Domini mortalis in usus.

Fœderis Arca novi custos, & Numinis ingens
 Augustale ! patens utroque à limine Porta,
 Sidereæ invitans patriæ & felicibus arvis !

Occiduo nunquam mutandus Vespere, mundi
Lucifer, Aegrorumque Salus, Portusque Reorum!

Tu ferre afflictis potis es solatia rebus,
Auxilioque levare virum famulantia Christo
Pectora, tu pigro secretas corpore Mentis
Cœligenum, terræque homines super æthera vectos
Sub tua jura vocas; primæque ab origine Patres,
Afflatosque Deo Vates, legisque beatæ
Præcones, Testesque sacros, Confessaque Christum
Agmina, Virgineosque greges, & quidquid Olym-
po est

Indigetum, ac totum regno complecteris Orbem.

Diva Parens, Agno similem similemque Leoni,
Natum inflecte pio nobis Patrona rogatu;
Supplicibus votis ut amicas applicet aures,
Qui mundi commissa luit, placabilis Agnus,
Nosque suas miseratus oves; idemque luporum
In rabiem victrice Leo desæviant irâ,
Corporibus stratis humilique ignoscere prædæ
Magnanimus, Pacisque Dator, Vindexque salutis.
Sic Dominam, longo texentes ordine laudem,
Concelebrant. pius hæc eadem tecum ipse frequenta
Christiparæ cultor, præconiaque ampla renarra.

CELEBRIORES
ALIIQUOT
RITUS, Pom-
pæ sacræ, facta-
que insignia
Sodalium.

Nec mihi Parthenias vacuum res carmine justo
Usque sequi; aut celebres ritus, pompasque sacrorum
Fas penitus siluisse. brevi perstringere cantu
Magna juvat. vulgi nec me fastidia tangant.
Non hîc ambitio cassos venatur honores;
Non temere movet aura levis suffragia turbæ.
Consulto decus hîc meriti spectabile cœtu
Rite magistratus statuit, lectosque ministros,
Quiue adytis foribusve adstent, memoresve sacelli
Asservent tabulas, Mariæque impressa sigilla;
Quique alias intræve gerant extræve piarum
Commisissas rerum partes, onerosaque jura.

Parthenicis quondam perfunctos, inspice, fasti
 Muneribus referunt Proceres. jamque Austria talem
 Fernandum ostendit, Fernandum Bructera tellus,
 Salesiden magnam Lutetia. Nec leve pignus,
 Menstrua Cœlestum quoties tutela recurrit,
 Virtutem inscripto mandat *sententia* cultu
 Cuique suam. Nil casus agit: casum ipse gubernat,
 Arcanoque Deus tessellas numine ducit
 Providus, ut sortes agitarâ temperat urnâ.
 Hunc olim morem coluit, dum Borgia blandas
 Inter agit pestes, aulae speciosa pericla:
 Et MARIAE castos fidus servavit amores.
 Hunc fociis ritum (Loiolæ castra secutus,
 Mox idem sancti dux agminis) ipse fovendo
 Virtutum invexit studio, cultuque perenni:
 Ex quo Parthenicos pietas deduxit in usus.

Alma dies, teneram seu rerum excudere molem
 Aggressi, seu jam recreato operosius orbe
 Ætherias infernâ umbrâ surgentis in auras,
 Nomine & augusto Domini signatur honore.
 Christiadum hæc censu princeps, rexitque sequentes
 Perpetuo senas revolubilis ordine luces.
 Hæc, ut prima novi rediit sub limina mensis,
 Parthenicæ indicit celebranda Charistia genti.
 Cetera quid referam cupido præscripta Sodali
 Tempora, inexhaustæ sacra queis convivium mensæ
 Ore animoque petat; præsens ubi Numen, & orbis
 Triticeï clausum specie, niveaque latebra
 Gaudet, perpetuæque agit miracula cœnæ?
 Ipsius, quem præbet Amor, sollertia Christi
 Crebra piis celebranda epulis, Christoque fruentum
 Præcipuæ Divum luces, & festa MARIAE.
 Alter & his cultus. parcâ dape proximus ibit
 Antè dies; sociosque in cœtum ad pensâ vocabit
 Virgineæ, ascesin tradens in crastina, laudis.

Sententiæ sub
 exordium cu-
 jusque mensis
 virtutem Soda-
 libus tribuan-
 tur, ceteræ cu-
 jusdam virtutis
 commendatio-
 ne præscripto-
 que sancti Tu-
 telaris nomine
 insignes, pii
 salutarisque u-
 sūs autore D.
 Fr. Borgia.

Postera cùm decori Mariano illuxerit Eos ;
 Omnia Parthenio fervent ; Regisque Sodales
 Nablia fatidici , *MARIÆ* queis debita solvant
 Officia ; impellunt ; divinaque fercula pasti ,
 Vota quibus Dominæ primùm se quisque dicarunt ,
 Instaurent , unâque omnes voce edita firmant.
 Nec vesper sociùm linguas patietur inertes.
 Tum fidibus vivoque sonabunt omnia cantu
 Virginis in laudes : nec mystica Suada tacebit.

At Clari hospitio Montis , doctaque sub arce ,
 Musæ ubi Christiades propiùs meditantur Olympum ,
 Arguti viridem compostæ fontis ad oram ;
 Parthenica implebit festum sacraria carmen ,
 Textilis intendit sese pictura superbis
 Undique parietibus , nitidamque insignia sedem
 Distinxere. oculos pariter suspendit hiantes ,
 Pectoraque accendit cœlestis imagine formæ
 Ipsa loci præses , rerum pulcherrima Virgo.
 Argento , purisque micant altaria flammis ;
 Centenasque faces inter , simulacra *MARIÆ*
 Dulciùs effulgent cælato augusta metallo.
 Parthenii spatio in medio stellantibus ardent
 Quattuor assimiles signis , ramosaque lychni
 Lumina crystallo , radios acuate , refundunt.
 Certatim allucent Juvenum , & spectanda theatro
 Ora canunt Dominæ laudem : tantæque Patronæ
 Ingenuas docuit Parnassus sanctior Artes
 Virgineoque chorô faciles servire Camœnas ,
 Atque ea Parisii læto splendore Sodales ,
 Agmine qui terno Clari penetralia Montis ,
 Antraque & inscriptos *MARIÆ* coluere recessus.
 Est , ubi jam primo sacris Oriente litatis
 Velatus blandaque Deus sublustris in umbra
 Parthenium , quàm longa dies , altare superstat.
 Assiduâ tum rite pii statione Sodales

Exercētque vices , interque halantia tura
Suaviūs adspirant incensum corde vaporem ;
Ac Domino adstantes Genios imitantur Olympi.

Quid , cū infana trahunt effusos tempora mores,
Larvasque choreasque , infandique orgia Bacchi
Hos inter strepitus , urbisque incondita passim
Gaudia , Parthenici pompam induxere suorum
Templo Ignatiadūm ; tempestatemque profanam ;
Fœdasque adversâ turbas pietate retundunt.
Procedunt gemini serie , nomenque canentes
Virgineum. fax cuique manu , longo agmine , candet.
Clariūs exemplo spectata modestia , & oris
Compositi species pietasque accensa refulsit.
Barbita nec pompæ defunt , citharisque remistæ
Concentu liquidum pulsarunt æthera voces.

Scit , tacito quâ Clenus obit pede vitreus arces
Pictonicas , Magnæque obnoxia mœnia Matri ;
Vindicis auxilium Dominæ testata quotannis
Supplicibus totâ diffusis urbe catervis.
Non adytis tantū regnant simulacra **MARIÆ**,
Servatæque urbis specimen gestantia , claves
Argento solidas ; & amictūs textilis auro
Splendida , magnifico doni sollennis honore.
Templo etiam prolata sacrum duxere triumphum ;
Clauisq̃ue imperitant lustralia fercula portis.
Illic eximio speciosam incedere pompam
Parthenii cultu aspicias ; trabeisque nitentes ,
Turma Sodalitio floret quæ plurima , Mystas.
Propositum altari Numen venerantur : & omnes ,
Publica sacra modis ut tandem expleta canoris ,
Suscipiunt animas pascentem corpore Christum ;
Corpore , Virgineo excusum quod sanguine vitam
Morte semel peperit , renovatâ & cæde perennem
Servat , alens caræ præsertim pignora Matris.

Franc. de la
Fayette, Episc
Lemov.

Sæpè etiam Præsul cœlestem operatur in usum
Parthenicis, festasque dapes & liba ministrat,
Immensum complexa brevi sub tegmine Numen.
Lemovicas sic ille sacris qui flectit habenis,
Sic alium gaudet pius exercere laborem.
Nobilitate animi geminata gloria stirpis
Ore micat; dignamque gerens Antistite formam
Cingit honoratis majestās tempora canis.
Virtutum sese chorus undique circumfudit.
Pectore sic avidi Christum excepere Sodales,
Descriptisque adeunt vicibus, dum prostat in ara
Ternos ille dies, & Bacchanalia vincit;
Excubiasque agitant summi ad tentoria Regis.

Nec minor elucet pietas, cum vita Sodem
Deseruit, funusque suum comitantia fratrum
Agmina condecorant, quin ipsum efferre cadaver
Nobilis ardor habet, supremi exercet honoris
Ambitio, natas opera ad servilia dextras
Rejecere, ultroque vicem subiere ministram.
Gloria miscetur luctu, simul undique pompæ
Visendæ studio concurritur, illa per urbem
Progreditur, longusque in vicos tenditur ordo:
Insolito albescunt flammæ compita tractu.
Funereum & nonnulla decus spectare voluptas,

Illam quidem consueta pio, nec vilia, cœtu.
Nempe catervatim, vel quos custodia vinctos
Detinet, hospitiumve inopes ægrosque tuetur,
Invisunt, placidisque adhibent solatia dictis:
Collato simul ære juvant, monitusque salubres
Adjiciunt, nec non Cererem laticemque Lyaum
Submittunt, escisque annonam dulcibus augent.
Annua jam facta, & coram spectata renarro
Rite memor, procul externas discenda per oras.
Tempore quo Christi recolens atrata dolores

Relligio;

Relligio, Autorisque sui venerata potentem
 Exemplo legem, sanctæ inter fercula cœnæ,
 Illustri per templa, per aulas more capeffit:
 Vivisco lecti hospitio subiere Sodales.
 Utque pedes inopum tepido lavêre fluento;
 Certatim obsequio accincti, mensasque paratas
 Circumeunt hilares. opere omnis dextera fervet:
 Patritiique micant juvenes. & copia raras
 Accumulat pretiosa dapes, gratosque sapes.
 Nec pretio caret ipsa, nitetque opulenta supellex:
 His super, & pastos aggesta sequuntur egenos
 Munera, & ægrorum turbam diffusa per omnem.

Sed majora canam. cui non audita Carasæ
 Gloria, magnanimo Heroum qui sanguine cretus
 Transcendit virtute genus, rexitque Cohortem
 Summus adorato sacratam nomine Ductor?
 Testis Parthenope, Procerum clarissima nutrix,
 Nobile Parthenium ut patria moderatus in urbe;
 Non duram repulisse famem contentus egenis,
 Usque ad delicias (tua enim, tua, Christe, fovebat
 Membra pater) struxit lautis convivia mensis.
 Hospitium picti circum vestire tapetes,
 Incendi pretiosus odor, tenuissima lina
 Sterni mapparum, argento lucere supellex.
 At pia Nobilitas detecto vertice lympham
 Irorum fundit manibus, lancesque ministrat.
 Assedere inopes. Ne Saturnalia fingas,
 Qualia Romani quondam luisse feruntur.
 Seria agit pietas. descendere ad infima lati;
 Servorum officiis ultro Comitesque Ducesque
 Succedere alacres. mensisque relictæ secundis
 Immane exuperant æris bellaria pondus.
 Haud alio spectanda magis generosa theatro
 Nobilitas; & quæ vilescere nescia Virtus

Splendescit medias inter pulcherrima fordes;
Sumptum in regalem laudato prodiga luxu.

Qui facer usus opum, quæ casti fœnoris artes;
Egregiè novit pietas; sic credita egenis,
Et debere Deum, largâque rependere gazâ.
Scilicet & donis Americum excurrere in orbem
Aggressi, Canadæ auxilium misere Sodales,
Virtutis gentisque caput Lutetia Francæ

* Domus Pro-
fessa S. J. Pa-
ris. D. Ludo-
vico inscripta.

Quos Lodoicæam * Proceres collegit in ædem.
Parthenici curis partiti ingentibus urbem,
Quin orbem amplexi geminum; quacunque potestas,
Flagitii illecebras tollunt; fontesque malorum
Obstruere, & scelerum cursus inhibere laborant.
Contrâ autem propriasque domos alienaque tecta
Grandibus incendunt factis; & publica passim
Munera solliciti meritis illustribus implent.
Colloquiis, tacitoque habitu, pietatis amorem
Afflant: adversisque oppressos casibus, ultro
Subsidiis multoque levat miserata favore
Sacra cohors: & quos inclemens creditor urget;
Aut mala fraus vexat, vinclis exolvere gaudent.
Tristibus afflicto morbis, lethoque propinquos,
Præsertim quos Diva sibi Patrona Sodales
Conjuxit, crebrique adeunt, fataliaque adsunt
Laturi auxilia: & cœlo tutamen amico
Demerere pias sibi provida corda per artes,
Nunc, olim, quacunque minax mors ingruet horâ.
Talibus incumbunt studiis; nec Virginis usquam
Indecores nati frustrantur amabile nomen;
Semper & illius divino ex ubere pendent.

Jam bona sævities membris exprompta domandis,
Totque aliæ species, operumque exempla piorum,
Parthenicæ implerunt monumenta illustria gentis.
Si libet annales tantarum exolvere laudum;

Virtutis decora omnigenæ, miracula passim,
 Facta nec heroum factis cessura terendo,
 Attonitus pulchrâ pascêris imagine rerum.
 Quantis illa virûm virtus celebrata triumphis;
 Qui flammâs olim Paphias insignibus ausis
 Extinxere? vepres alius membra inter acutos
 Versat agens, niveoque alius convolvit acervo.
 Tantas, Armoricæ & nôstri lux aurea seclî,
 Nobletzus retulit palmas: Mariæque Sodalis
 Unus ovat Divûm pugnas æquasse duorum,
 Sanguineus dumis laceros silvestribus artus,
 Tresque ipsas altè nivibus demersus in horas.
 Sic stimuli obtusi stimulis; sic frigore victus
 Ardor hebet: redit emeritæ pax ardua menti.
 Atque illum templo inducens, pietate puellum
 Conspecta imbuerat Virgo, matremque probarat.
 Mox juvenem in turbas abreptum, in tela ruentem;
 Compressit, Christique eadem succedere signis
 Jussit; & ardentem campoque immisit aperto,
 Ditavitque opibus cœli, virtutibus altis
 Egregium, spoliisque animarum ornavit opimis.
 Quin etiam triplices Regina offerre coronas
 Visa pio, cœpta exacuens generosa, Sodali;
 Quas & virgineus candor, sacrique gerenda
 Cura magisterii, & vani contemptus honoris
 Exciperet mirâ vibrantes luce coronas.
 Vivite Parthenici, divinæ cura Parentis;
 Crescite, Nazarium terris diffundite odorem;
 Inscripti MARIÆ stellantia nomina flores.
 Vos tenerâ colit illa manu, cœlique benigno
 Imbre rigat. vobis & iniquos temperat æstus,
 Frigora & Arctoi Boreæ defendit acerba,
 Vernantem adspirans Zephyris felicibus auram;
 Inque aliam ex aliâ Virgo socialibus hortis

Michael le
 Nobletz, sacer-
 dos ex Armo-
 ricâ, vir sancti-
 tate illustris,
 cujus extat vi-
 ta cum primis
 egregia.


E minoribus
Partheniis ad
majora Sodali-
tia transitur
adolescentium,
indeque ad vi-
rorum.

Areolam transfert viridis fecunda juventæ
Germina; & innumeram sobolem, serieque perenni
Pignora læta fovet, maturos ordine fructus
Eliciens; donec mortalis casibus ævi
Eximat Alina suos, Patrona Parensque, Sodales.
Blandâque ipsa manu, ceu spinis obsita carpit
Lilia Parthenicos, & amicis inserit astris.



H. Watelet jn.

L. Coffin sculp.



PARTHENICON

LIBER III.

FASTI PARTHENII,

Seu Deiparæ Virg. Mystéria

præcipuâ Sodâlium religione veneranda.



I L E C T A M augustæ sedem regnum-
que Parentis

Ingressus, pictosque loci miratus ho-
nores,

Tot veteris monumenta ævi, pom-
pasque recentes

Muneraque, & sacro devinctos fœdere cœtus

Personui, studia & mores, & splendida facta.

Nunc tua, quæ pulchros acuant virtutis amores,

Tergeminum, Virgo, claudent sollennia carmen.

[Cc iiij]

Mox aliis operata sonis tibi, Diva, laborem
 Parthenicum explebit festo lyra concita plectro.
 Hic apis in morem, florum quæ gestit amœnas
 Per segetes, condensa levi mysteria obibo
 Laude supervolitans, vario jam carmine passim
 Libata, & varias operum relegenda per oras.
 O tantum laudique tuæ, laudisque ministro
 Perge favens notam, Regina, affundere lucem,
 Seminaque ætheriæ spargentem vivida flammæ.
 Da, Genitrix; non vana rogo. partem, Alma, la-
 boris

Respice supremam, & placitos ori inferere cantus.

DEIPARA
 VARIIS FIGU-
 RIS ADUM-
 BRATA &c.

Vicinum auricomi ceu prima crepuscula solis
 Præcurrunt spondentque jubar, blandoque serenas
 Jam risu nebulas misto crocus imbuat ostro:
 Sic MARIAM crebræ, sublustria signa, figuræ
 Pigraque & magni terris præfagia fati
 Ostendere. illam, specioso consitus arvo,
 Deliciis Eden florentem effinxit Olympi.
 Hortorum in gremio nitidâ quæ gemmea conchâ
 Lympha natat; cursuque plagas se fundit in omnes,
 Quadrisido cursu, fluviorum illimis origo;
 Virgineum pulchrâ signavit imagine fontem.
 Tum medio nemorum caput & regina theatro
 Sublimis, fructuque arbos & nomine vitam
 Ostentans, Divæ simulacrum insigne Parentis.
 Diluvio ratis insultat, spes unica rerum;
 Quâ seclorum heres, immensi nauta profundi
 Ille bifrons, gentisque pater melioris, ad arcem
 Appulit aëriam, & summos pro littore montes.
 Custodem humani generis complexa; nec ullo
 Turbine, non totâ mundi labefacta ruinâ,
 Quanta animas primâ clades ab origine merfit;
 Omnibus una malis supereminet ardua Virgo.
 Haud secus hæc eadem, jam subsidentibus undis

Naufraga cum primum cœpit se emergere tellus,
 Felici viridantem oleam tulit ore columba.
 Ipsa Dei, terras certo miserantis amore,
 Conscia, juratamque fidem pacemque sagittis
 Nunciat abjectis & non violabile fœdus,
 Vêrsicolore Iris suspendens nubibus arcum.
 Illa & Abramigenæ dulces objecta per umbras,
 Scala ingens, duplicis mundi commercia junxit,
 Aligeras agitans ultro citroque catervas;
 Mortalesque Deo, telluremque admovet astris.
 Scilicet & flagrans bifido inconsumptus Horebo
 Mœas rubus ante oculos: subitoque comata
 Flore, simul fetu Aronis lætissima virga.
 Nec non & flavo circumvestita metallo
 Legiferi sedes, oraculum & Numinis, arca:
 Ambrosiamque sinu clausit quæ nobilis aureo
 Urna, adytis composta, & cœli munere dives.
 Virginis hæc totidem simulacra umbræque Parentis.
 Quid vellus, sitiente solo dum squallida circum
 Area tota jacet, bibulis penetrabile villis
 Optatum excipiens, Gedeonis in omina, rorem?
 Non cœli patriis venturum è sedibus olim
 Virgineæ sine labe Deum portenderat alvo?
 Quid, quam Buzides, Solymi sacraria templi
 Ingrediente Deo, portam prospexit Eoam
 Transmitti Vates clausam clausamque relinqui?
 Nimirum effigies Mariani expressa pudoris.
 Quot prius illustres meritis Heroidas ævum
 Progenuit, tot viva dedit præludia Magnæ
 Virginis; haud indicta meis abitura Camœnis,
 Christus ubi jam victor ovans lætissima sistet
 Agmina, quæ merito Dominam venerentur honore.
 Ecce polo accrescens decus immortale, Jacobi
 Sanguine, quæ maria ac terras nimbosque serenet,
 Stella oritur. Virga exurgit Jesseia, nullo

D R I P A R Æ
 C O N C E P T U S
 I M M A C U L A -
 T U S & C.

V. Sacram
Oeconomiam
l. r. Theandr.
ac l. p. Lycic.
&c.

Stirpis Adamæ vitio ; florem illa beatum,
Divinæ placitam sedem requiemque Columbæ,
Virga efferre potens , ac regia vincere sceptrâ.
Hæc illa est, angusto uteri quæ fœmina septo
Circumdet pariatque *Virum* , gratissima Virgo
Captanti jam nostra Deo commercia, summam
In sortem delecta Parens ; & Numine jamnunc
Plena capacem animam , primævæ nescia labis.
Nam quæ fatalis violarint semina culpæ ,
Quam neque conceptus prolis temerabit , & ipso
Sacra puerperio florescens lætiùs ornet
Virginitas ? leviùs cordi num Gratia dote est
Corporis externâ , atque integræ gloria mentis ?
Candida nec tenui facies animæ illita nævo.

Quàm procul immundos Solymæis arcuit aris,
Ipso etiam prohibens templorum à limine vindex
Omnipotens ; purosque adytis adstare ministros
Jusserat ! in sacros quæcunque excuditur usus ,
Materiæ pretio perfecta operisque supellex.
Nuda tamen species , simulacraque inania rerum,
Ferculaque & tabulæ , cultu celebrata superbo.
Et , sibi quam Numen cunctis è gentibus unam
Designat vivamque domum caramque parentem ,
Conceptæ dubites labem avertisse puellæ ?
An medium sese fœda in contagia Christus
Induat ? augustum penetrale insederit hostis
Tartareus ? Matremque sibi servisse Tonantis ;
Reginam & Superûm confixam stigmatè jactet ?
Hæccine , quæ sævi caput obtritura colubri ?
Materiem humanæ Christo præbere salutis
Delecta , & fontes quo lustret sanguine terras ?
Ergo Matrem odiis Deus aversetur acerbis !
Matrem irâ Deus excipiat ! primordia vitæ
His Virgo auspiciis inimico à Numine ducat !

Qui vitio locus , aut Stygiæ quæ pervia fraudi

Pars, ubi cœlestis jam totam Gratia sedem
 Occupat, æternoque Deus se infudit amore?
 Pignore quo firmatam animam, penitusque malorum
 Intercluso aditu, Domini blandissima versat
 Vis facili dextram imperio; culpæque negatam,
 Virtutisque intra gyrum, spatia ampla, solutum
 Libertatem agitans, *extincto fomite* regnat.
 Hactenus exiles terris aspergere guttas
 Purgandisque animis visus; simul ecce reclusis
 Thesauris sua dona, suos immittere fontes
 Prodigus accelerat divinâ Spiritus aurâ.
 Ætheriæ quid enim gazæ accumulasse negarit,
 Cui proprium Genitor supremo in munere Natum
 Destinât, & Sponsam vocat in consortia regni?

Nec deest muneribus, jam respondere parata
 Autori mens alma suo. vix edita flatu
 Numinis emicuit: nec inertes passâ latebras;
 Ceu rationis egens animarum, & luminis exors;
 Maternis gremiis desedit inutile vulgus;
 Haud segnes mens alta moras, genitricis in alvo,
 Bruta rudimenta ac menses tranlegit inanes.
 Quin etiam dum membra quies sopita foveret;
 Insomnem exercens animam cordisque laborem
 Assiduum, Sponsi ad superi Virgo ignea dulces
 Evolat amplexus, divinum spirat amorem.
 Parte vacat nullâ, quamvis immensa, MARIÆ
 Gratia: temporibusque operando pervigil instat,
 Vimque implet solidam; & semper crescentia (mi-
 rum)

Conduplicans merita, immanes attollit acervos.

Jamque utero primum exoriens sub luminis auras,
 Sidereos longè radiis vibrantibus orbes
 Exuperat, terrasque eadem cœlumque remulcet.
 His tamen, his audent sancti se orbare parentes
 Deliciis, voti memores, temploque triennem

VIRGINIS
OBLATIO IN
TEMPLO &c.

Rite dicant. mitrâ redimitus cana bicorni
Tempora, sollennes Præsul sublimis ad aras,
Quam Domino sistunt Joachimus & Anna, puellam
Regalem admittit. vivo nivea ora ligustro
Purpureos ignes rosei traxere pudoris.
Eminet è tenero vultu sincera voluptas
Transcriptam augustas sese gaudentis in ædes.
Concussis gestire adytis fulgentia templa:
Aligerique dato circum penetrabilia plausu
Hospitiis læti accipiunt, densique puellam
Officiis humilem celebrant; epulisque ministri
Ambrosios præbent rores, cœlestia liba.
Ætheriæ Mentēs, ardenti vivida motu
Sidera, & humanæ custodia fida salutis,
Dicite, quæ sacro toties arcana recessu
Spectastis; quas illa faces, quæ pectore vota
Fuderit. & nulli certè concepta priorum,
At longam posthac seriem tractura, pudoris
Jurati princeps, sacrato corpore vota
Edidit, aut primum Solymæ cùm se intulit ædi;
Aut patriis, vitæ jam primo à limine, rectis
Edita congeminans augustas sanxit ad aras.
Sed neque fas vobis, Genii, spectata canendo
Tantum æquare decus: nec vestro credita sancti
Præsidio tutela animi; lucemve Mariæ
Ingenio data cura, & flammæ corde ciendi.
At castum volucris stipantes agmine corpus,
Armatoque satellitio prætorica castra
Metari vigiles, & pompam ducere jussit
Bellipotens. namque intus agit Deus ipse, profundo
Alloquio auritam ducens ad grandia mentem.
Ipse jubar liquidum, nullâ turbante procellâ,
Compositæ infundit solidaque in pacē sedenti;
Ipse altos agitat placido sub pectore motus,
Virgineamque animam pleno Deus ubere inundat.

Sensibus infedit custos; tenerasque paternis
Providus excubiis aures & lumina sepsit;
Debitaque ipse sibi sacros adyta instruit artus.

Paciferum nam quis deducat ab æthere Regem,
Angustoque ævo claudat gremioque puellæ,
Omnia complexum dextrâ, seclisque priorem?
Talia quis fando æquiparet, quæ maxima longè
Divinorum operum reliquam miracula turbam,
Ceu tenuem exuperant ludum? Non ipse supremi
Molem operis, cujus divinâ missus ab aula
Nazariæ Gabriel successit Nuncius urbi,
Eloquio comprehendat; uti se Numen in artus
Induit humanos, infirmo corpore robur
Explicat, abjectumque novo succrescit honore;
Coram aspectandum & manibus tractabile Verbum.
Aureus ille comam, pallam aureus, aureus alas,
Fœderis æterni Interpres, lætaque salutem
Voce ferens; & jam pro re formosior, aras
Quàm cum inter Solymas Panchæosque inclytus
ignes,

Luciferi lætos trepido prænunciat ortus
Zachariæ, ancipitique senis retinacula linguæ
Injicit. adventum hîc æterni pandere Solis
Jussus adest; diæque fides hîc certa puellæ.
Ætherii decerpta soli stellantibus areis
Lilia consurgunt dextrâ; tutoque pudore
Mystica connubia, & suscepto Numine sanctos
Conceptus MARIE partusque insignia monstrant.
Plurimus & circum radiorum affunditur imber.

Talis ab æterno veniens Genitore puellam
Sidereus Legatus adit, pronusque salutat;
Cœlituum quanquam haud mediâ de plebe, sed unius
Ante alios Princeps folioque adstare tremendo
Assolitus, vultusque Dei spectare coruscus.
Et non ille quidem MARIE, dux agminis Ales

COELESTIS
AD VIRGI-
NEM LEGA-
TIO, DIVI-
NAQUE IN-
CARNATIO.

Ætherii, ignotus. sed enim fatalia mundo,
Qualia Cœlitibus nunquam delata Ministris;
Summa decus mandata novum cultusque verendos
Addiderant. niveum picto gerit aëre corpus,
Digna ministerio tanto, flagrantiaque ora.
Externo præstricta habitu stat regia Virgo;
Quæ prius Amosidæ volvens oracula Vatis
Tota salutiferæ conceptu in Virginis hæret,
Ipsaque adhuc ignara suos miratur honores;
Et fortunatam, si fas exolvere Matri
Divinæ obsequium, cupido meditatur amore.

Numinis ô sensus, humanæ impervia menti
Consilia, arcanus tenebroso luminis horror!
Ipsa adeo, terræque decus cœlique voluptas,
Spes hominum MARIA & sortes, promissaque Divûm
Sustinuit, Vatumque fidem. MARIE omnia pendent
Arbitrio! stupet aspectu Legatus, & altâ
Virtutum specie & merito defixus honore.
Jam Dominam agnoscit; jam se collegit in alas,
Majestate gravis, facie sed blandus amicâ:
Mulcet & augustam venerans firmatque puellam.
Virginei nempe hinc studium vôtumque pudoris;
Hinc pudor & laudum, teneræque modestia frontis;
Et curis tacita alternis prudentia librat
Turbatam divina inter præconia mentem.
Pulchra simul roseo cum sanguine flamma cucurrit
Lactea in ora micans, atque intima corda retextit.

Nam quos Aligerûm Princeps memorabat amores
Numinis! ut pleno infudit se Gratia fluctu,
Virgineoque animo sacros cœlestia in artus
Dona redundarunt: placita intra pectora sedem
Ut Deus, & puris ardentes ignibus aras
Constituit; matresque unam superextulit omnes.
Tum genitore Deo censendam Nuncius addit
Progeniem, sanctam, ingentem; quam nomine signet

Iussa Parens, lætæ auspicio signoque salutis ;
 Davidis folio imponat Deus ipse paterno ;
 Æterno , immenso amplexam simul omnia regno.

Virginis assensu res constitit ardua , & omnem
 Naturæ exuperans captum. vis Numinis alti
 Hic agit , huc tota incubuit , factoque triumphat
 Omnipotens. viden' , ut nitidis argentea pennis
 Forma superveniat cœlo delapsa Columbæ ?
 Sponsæ impendet agens fecundâ Spiritus umbrâ ;
 Sanguinis illæsi florem delibat , & arte
 Supremâ informans graciles concinnat in artus.
 At non , ut reliquis consueta coagula sensim
 Corporibus , taboque obscœna , & inania vitæ.
 Mox etiam sublapsâ animâ motuque reperto ,
 Cœca tamen nullosque diu rationis in usus
 Aptæ jacent , sensu haud pecudum distantia , corda.
 In Christo non ulla operi mora. protinus infans
 Expletus numeris : animumque exilia membra
 Felicem accipiunt ; radio nec præcoce tantum
 Ingenii , & solidâ jamtum ratione vigentem ;
 Ætheriâ sed luce Dei nuda ora tuentem.

Nec dimensa venit donis cœlestibus Aura:
 Humanamque vicem transit favor. omnis in unum
 Gratia congeritur. simul ipsum ad munera Numen ,
 Bisgenitum accessit Numen ; corpusque animumque
 Induit , æternoque hominem sibi fœdere nectit.
 Christo hinc stare datum est. discludi nescia , Verbo
 Composuit junctura virum. se major , & ipso
 Numine homo perfectus , & alta in jura receptus ,
 Haud temere Patri æqualem se conscius infert.
 Tantum mortali fas , & provectus ab imo
 Surgit apex , quantum summi depresso Tonantis
 Sidit majestas. quem non stellantia templa ,
 Non sola terrarum capiunt , non æquoris undæ ,
 Virginis æternæ felix complectitur alyus.

*Non enim ad
 mensuram dat
 Deus Spiritum.
 Joan. 3.*

Ilicet augustæ conceptum ventre Parentis
 Prona Deum toto coluerunt agmina cœlo.
 Namque ubi Primigenam terrarum inducit in orbem,
 Mandat adorandum Genitor : superæque Sionis
 Alati exultant Proceres ; humilesque salutant
 Regnantem Puerum , atque orbi nova jura daturum.
 Debita nec Divæ cessant ex ordine Matri
 Obsequia Aligerum. quanquam se vertice tanto
 Dejicit ipsa volens , nec dedignata senilem
 Ætatem officio , montanam invisit Elisam.

ELISABETHAM
 INVISITAM
 SIT MARIA.
 V. Lyr. l. 5.
 Silv. 4. &c.

Nimirum seno latitantis mense pudorem
 Prodidit indicio , MARIE certissimus autor ,
 Qui sterilis gravidandum uterum prædixerat Ales :
 Virginis & , jam primo aditu , decora ampla vicissim
 Arcano Deus alloquio detexit Elisæ.
 Quippe humilis , Sponso non ipsi effata supremos ,
 Æthere quos Virgo nuper suscepit honores.
 Quin etiam , cum jam matura tumesceret alvus ,
 Suspicioque ægrum perstringeret anxia pectus
 Josephi ; miro tamen alta silentia Mater
 Virtutis studio rebus pertendet acerbis.
 Sed tacitæ peraget causam Genitricis ; & Auræ
 Divinæ afflatum , sancti miracula fetûs ,
 Mentis opus superæ , fidus per amica docebit
 Somnia Legatus claro submissus Olympo.
 Jam quæ occulta Deus reseat , proferre sub auras
 Urget , sublimique ad sidera tollere cantu.
 Quid repetam lætos motus , præsensque piamen
 Zachariæ ? ut primo Christi se gratia dono
 Matre effudit agens , cognataque Numina sensit
 Et puer , & genitrix , uno ambo munere Vates ?
 Qui lucem ingeniis , ardorem cordibus addit ,
 Spiritus ora ciet Magnæ in præconia Matris.
 Contra autem , quam supra homines , supra extulit
 axes

Astriferos Divinus Amor, premere inclyta Virgo
Sese infra terras; solidamque refundere laudem
Laudis in autorem, dulcique liquefcere sensu.
Parca loqui, decorisque fugax, nunc plurima grato
Ore sonat. quo plena, Deo sic incita fatur.

Magna canis, necdum mortali prodita linguâ,
Insignem quæ me ante alias, fetuque beatam,
O bona, cognatam celebras. Simul hospitæ amica
Verba salutantis maternas acta per aures;
Exiliisse utero testatam gaudia prolem
Acclamas, nec vana fidem promissa secutam;
Grandia cœpta Deum, jam obstricto pignore tanto,
Rite peracturum, superique effata Ministri.

Virginis Ma-
tris Canticum.

At mihi (quo Vates illapso arcana recludis)
Muneris autorem Dominum, rerumque parentem
Tollere magnifico, quâ fas, mens gestit honore.

Inque salutiferi præconia Numinis ardens
Spiritus, ac læto salientia pectora motu
Emicuerè. pias mea lux, mea Gloria laudes
Et iusto referat conceptas carmine grates.

Umbras collectam in ténues, humilemque puellam
Respexit, famulæque Deus non horruit alvum.
Omnigenis exin linguis, plausuque perenni,
Ecce, Beata ferar, præque omnibus una favore
Dignata eximio, atque opibus ditissima cœli.

Magnifico, dona accumulans, indulsit amorì,
Sidereas nutu Genitor qui temperat arces;
Cujus adoratum, & nulli violabile Nomen.

Sic aliam ex alia miserando invisere prolem;
Mortales æterna fovens clementia, gaudet:
Præcipuè quas casta fides, patiensque morarum
Nec titubans sancto exercet spes mista timori,
Infantes animas & fervida corda remulcet.

Hoc caput, hoc rerum. terrenum scilicet orbem
Ludenti similis Deus extudit, extudit orbem

Ætherios, lunæque globum, consortiaque astra;
 Stringere vix digitis visus, mollique lacerto.
 Nunc dextram omnipotens contentaque brachia versat;
 Ac solidum toto expromit cum Numine robur;
 Mirum, augustum, ingens & non imitabile factum
 Molitus: partemque operi sese addere summo
 Summus amans Opifex, sacrata in fœdera venit.
 Aëre ceu folia, aut spumas rapit æquore turbo,
 Pectora vesano difflavit turgida fastu,
 Ardua consilia evertens, vasta ausa Gigantum.

Regali immanes abjecit sede tyrannos;
 Extulit abjectos plebejâ è fæce clientes;
 Hinc, folio impostos, regnando adscivit Olympo.
 Exfariat cœlestum avidos, terrestrium inanes:
 Distentos epulis ac divitis ubere glebæ
 Idem aspernatur longè, vacuosque repellit.

Isaciam legit sobolem, propriamque dicavit,
 Sanguine quo fictos humani corporis artus
 Indueret: patriæque memor pietatis, acerbo
 Collapsum erexit miseratus crimine mundum.

Quæ proavis quondam, caro quæ pactus Abramo,
 Pactus Abramigenis, promissa ingentia solvit,
 Antiquam renovans meliora in secula pacem.

Hæc cecinit Virgo: nec quidquam carmine tali
 Suavius, aut majus fuerit mihi; templa diebus
 Quod cunctis resonant, totoque assurgitur Orbe.
 Ætherii nec quâ recolantur dona Parentis,
 Aptior occurrat, nec gratior ulla Deo vox.
 Dictum eventa probant: mundique Beata per omnes
 Perque ævi tractus, uno celebratur & ore;
 Materno quos & studio complexa, beatos
 Præstat; & acceptâ laudem pro laude reponit.
 O ego non aliâ tactus dulcedine famæ,
 Quàm famuli, Regina, tui; nimiumque clientis,
 Si pateris, titulo atque optatâ sorte beatus,

Te, mea Diva, canam! tibi enim citharæ tubæque
 Servierint. aliter, miseræ væ laudibus artis!
 Dissiliantque fides; abruptaque cornua, plectris
 Cum laceris confusa, gravis tela omnia Musæ,
 Ah, jaceant; & si qua sedet nunc laurea fronti;
 Temporibus nudis excussa arefcat, inertī
 Pulvere sordescens; ac faucibus hæreat ipsis
 Lingua ingrata rigens, mutumque & inutile pondus;
 Contingat si fortè tuas, Virgo inclyta, laudes
 Fallere, & innumero justas pro munere grates;
 Ac nī principium lætæ finisque Camœnæ
 Tu mihi, materiesque pii pretiumque laboris.

En aliam ex alia curam trahit; & nova tecum,
 O Virgo, rerum series accrescit eundo,
 Illa quidem cantu blandissima: sed tamen arcum
 Ingentis captare viæ compendia tempus
 Admonet; & quæ rite prius modulata, Theandri
 Linqvere adorantem tacito fastigia cursu.
 Parva, sed augusto partu clarissima Bethle;
 Turritoque Sion templo, Galilæaque sedes,
 Hospitaque Ægyptus profugis, Judæaque rura;
 Assimilis pelago Genesar, deserta locorum,
 Montesque fluvii, & hiantibus oppida turbis;
 Et quæ Cana mero versis notissima lymphis,
 Golgotha, Oliviferumque nemus, stellataque regna,
 Quam vacuo segetem præberent obvia vati!

Ceu radium candens innubi fundit Olympo
 Stella; vel ardenti radius Titanus auro
 Transmeat illæscæ crystallina septa fenestræ:
 Sic nivæ obstructâ nascens Genitricis ab alvo
 Emicuit Deus (hinc sordes labesque pudoris
 Cuncta procūl:) digna hospitio quæ præmia, solvit,
 Aternosque sacris penetralibus addit honores.
 Jam signo impressus patrio, Christusque vocari
 Princeps ante alios lato perfusus olivo

VIRGINALE
 PUERPERIUM
 &c.

Hunc pater se-
 gnavit Dom.
 Joan. 6.

Promeruit. sedenim probrosi stigmatis instar
 Sanguineam excipiens tenero nunc corpore plagam;
 Aeterni donum & pignus fatale Parentis
 Induitur J E S U S , dubia inter gaudia Matris ;
 Quæ lacrymas pulchro miscet nomenque cruori,
 Par effuso oleo , & sanctæ fragrantibus auræ
 Illecebris traxisse potens inhiantia corda.
 Nomine progeniem signat , populique salutem.

Rustica pastorum, nec verò spreta , Puella
 Obtulerat jam dona Parens : nunc splendida Regum,
 Tergeminos auri myrrhæque & turis honores,
 Munera suscipiens libat ; pretioque recepta
 Auget , & attrectans divino consecrat usu.
 Ac tacito eliciens Nati potiora favore
 Dona refert , stellæ ipsa ducis formosior igni
 Purpureo affulgens , majorisque indicat ortum
 Sideris ; & blando cœlestes lumine flammæ ,
 Divinosque oculis & vocibus afflat amores.

Nec minùs & placitam , Regum post aurea dona,
 Pauperiem Virgo Solymæis approbat aris ,
 Quæ volucris geminâ ritus purganda vetustos
 Mater obit , templi multos ubi limine soles
 Abstinet ; solitæ ceu matrum obnoxia pœnæ
 Ac tetram passâ illuviem , secreta resedit,
 Sanctior & templo , & stellanti purior æthrâ.
 Pallentes certè maculas suffusâ laborat
 Lunaque , defectâque obscurus lampade frater.
 Una exors maculæ , semperque incrementa visa,
 Plenaque semper agens perfectò Luna decore ,
 Et vivo Mulier circumflua Sole refulget.
 Sponte suâ tamen indecori se obduxerat umbrâ.
 Ast illam splendore novo , radiisque coruscam
 Explicat ante aras Genitor ; dum fervidus ulnis
 Dulce jubar stringit senior , cunctasque profundâ
 Noctè soluturum gentes , gratatus adorat.

LEGALIS
 EXPIATIO.
 Videl. Heroic.
 f. &c.

Fatidico simul ore sacræ vetus affonat ædis
 Incola, supplicibusque instans castissima votis,
 Ac precibus saturam jejuno in corpore mentem
 Anna fovens. cœlique piis venerabile munus
 Exultans aperit vates, celebratque Puellum.
 At quis deinde gravis pia vertit gaudia casus
 Terribilem intentans gladium, Matrique minatur;
 Intima fixurus diro præcordia ferro?
 Jamque adeo extremum prælagâ mente dolorem
 Occupat: expositum linguis telisque petendum
 Prospicit, heu, Natum. nec longè dissitus hostis
 Scilicet, aut crudi vis expectanda furoris,
 Frendet ubi elusi rabies infanda tyranni.

Nox erat; & seram fabrili fessa labore;
 Nec molli in strato, carpebant membra quietem:
 Aurea cùm facies recluso effulsit Olympo
 Siderei juvenis, Josephique impulit aures
 Talibus extimulans certa inter somnia dictis.
 Surge age, divinaque sacram cum Prole Parentem
 Avehe, & Ægypti profugus defende latebris,
 Dum nova supremi referam mandata Parentis.
 Imminet Herodes curâ furiatus iniquâ:
 Cœlestem, ne sceptrâ manu Solymæa Tyranni
 Excutiat, Puerum exitio jam jamque reposcet.

Dixerat; & rupto teneri jam Numinis Altor
 Præcipitat somno corpus; Natumque Parentemque
 Amovet, & Pharias tendit nocturnus ad oras.
 Nil jussis turbata Fides, tantove periculo
 Spes concussa Viri. curam non ille potentem,
 Servandoque petit Patris miracula Nato,
 Fulmine præsentis inimica in crimina pœnas,
 Aut Superûm cingi excubiis & præpete turmâ:
 Nam quid, Cœlicolas contra, mortalia possint?
 Longinquas non ille plagas & barbara regna
 Horrescit: nec Judæâ tellure latebras,

FUGA IN
 ÆGYPTUM
 &c.

Non spatia ulla fugæ, dum res componat & ipsa
Linquendas patriâ, & tenuis quas posceret usus;
Mitiave exiliis saltem loca tristibus orat.

At cæco raptim obsequio, tacitamque per umbram
Lumina transportat Divûm, mirantibus astris.

Nec caput ipse suum, nec dulcia pignora cœli
Mempheos infidis dubitat concedere regnis,
Omnium egens, cunctisque objectus calibus hospes.

Ecce autem, medio properat dum transfuga cursu,
Verberat attonitas sonus illætabilis aures,

Plurimus & ferri stridor, fremitusque virorum,
Vagitus puerorum, & fœminei ululatus.

Respicit, incertus rerum, venientia longè
Murmura confusoque effictos aère planctus.

*Rachel plorans
filios suos.*

Tum lacrymas gemitusque ciens, parvæ hospita
Bethles,

Squallenti ante oculos Rachel sese obtulit umbrâ;
Qualis erat, prolem infelix cum enixa secundam,

Ipsa sui nomen supremâ voce doloris

Imposuit Nato moriens: heu, tristis imago,

Et jam deformis simulacrum inamabile vultûs;

Dum malè secundam pœnis discerpitur alvum.

Interpres, dux ille viæ, subit aureus Ales;

Et luctûs quæ causa, docet; quàm fœda cruento

Barbaries ferro Bethleam excurrit in oram;

Infantesque metens immani cæde puellios,

Ah, Regem Puerum ferali involvere acervo

Quæsitivè frustra, infelix, & crimine inani

Triste furens; divinum & inobservabile furtum.

Purpureum advolitans animarum examen ad ora

Christiparæ, dulcem coram gestantis alumnum,

Nec quidquam attonitæ visis, blanditur utrique;

Ac venerans gaudet vitam impendisse recentem

Prærepto Domino, & fata ad meliora vocanti.

Interea virides frondosa cacumina palmæ

V. Theandr. l.
2, in Anastasi.

PARTHENICON LIBER III.

415

Hospitibus curvant; mitescunt aspera monstra:
 Exiliunt fontes; & queis servire *MARIÆ*,
 Queis sacros Pueri velato corpore pannos
 Contigit abluere, hinc medicæ promanat aquæ vis;
 Irriguisque vigent hortorum balsama lymphis.
 At Divûm, *Ægyptus* quorum turbâ impia forder,
 Cassa ruunt simulacra; novoque exterrita motu
 Ignotum sensere Deum, pueroque latentem.
 Semina concepit tellus pietatis; & olim
 Tot fecunda viris florentem ornabit Eremum,
Ætheriæ assimilis, suscepto à Numine, sedi.
 Tanta *Pharo* sacri hospitii stat gratia! colli
Nazario proprios invidit *Memphis* honores,
 Ingemit. & *MARIA* patrias remeante sub arces.
 Providus huc revocat, sævi post dira tyranni
 Funera & absumptos pœnis ultricibus artus,
 Aligero rursus misso Pater. Arbitra rerum,
 Omnia collustrans, justis ante omnia curis
 Excubuit Christo *Mariæ*que intenta Pronœa.

Cardine supremo & speculâ consedit Olympi,
 Ac pede Fortunam pressit; folioque revinctos,
 Quâ libet, emittit Casus, revocatque solutos.
 Ardua sublustres umbræ prætoria servant,
 Audacesque arcent hominum vaga nubila visus.
 Bisgeminum fortis pariter suavisque per axem
 Tenditur, extremosque coercet dextera fines.
 Dextrâ ingens, solidumque adamante, oculoque co-
 ruscum

Pervigilat sceptrum, explorans mortalia facta;
 Gentium & imperia, & Procerum decora aurea trans-
 fert,

Æternisque regit libratum legibus orbem.
 Hinc pendet Natura ferax, hinc Gratia, & Artes;
 Hinc puræ, densò volitantes agmine, vitæ,
 Aligerûm manus omnis, & insuperabile robur.

D d iij

Providentia,
 in Theandri-
 cis maxime
 rebus admi-
 randa.

Qui, volucrem ardenti molitus nube columnam;
 Ductor Abramigenas freta per bipatentia & altis
 Eripuit suspensa jugis; crebroque tremendus
 Fulgure, mox rapido involvit Pharaona profundo.
 Mille alii, seu qui pœnis mactare nocentes,
 Præmia sive piis virtutum expendere jussi.
 Mystica qui Patrum ante oculos simulacra dedere,
 Quique sacros olim vates docuere futuri
 Temporis eventus, & amictum corpore Numen.
 Præpetibus circum famulis, pulchroque Pronœa
 Septa satellitio, partem dimisit in omnem
 Felices populis Genios; tum cuique viritim
 Assignat capiti. Superos descendere ad ima
 Nec piget officia, & tenuës curare clientes.

Quid Christum, Altoremque Dei, Matremque tueri?

Sed neque opes variæ terrarum, auræque salubres,
 Fluminaque Oceani in gremium revoluta parentis,
 Quadrifidique vices anni, noctesque diesque
 Alternante choro, dimensique æthere cursus
 Astrorum, innumerisque animantium corpora formis;
 Non ita vim cuncta hæc summam restantur, heriles
 Docta sequi nutus, divinaque arte cieri,
 Carpere & ignotos præscripto tramite fines.
 Talia nec, longo seclorum prodita lapsu
 Exempla, aut pœnæ aut clari monumenta favoris;
 Qualia summisso in terras sancita Theandro.
 Mortali quam mira Deo Sapia vita
 Struxit! & humanos sensus turbavit, & hostis
 Elusitque dolos viresque infregit Averni.
 Non radiantem auro, non majestate superbum
 (Quâ specie venturum olim Judæa propago
 Finxerat) aut dextrâ latè victrice pavendum
 Ostendit Christum Genitor, solioque locavit.
 Sed quanquam antiquo Jessidûm à stemmate Regum,
 Nil generis splendorem & opes servante MARIA

Eduxit, multâque volentem condidit umbrâ.
 Ceu virgulta inter despectum, ignobile germen,
 Quantis jactari placuit sternique procellis!
 Jamque fugâ vix parta salus. custodia mundi
 Cui data, & arbitrium est animarum, æthræque po-
 testas,

Servatus Puer exilio. nec spernet adultus
 Infestæ latebrâ sese subducere genti.
 At non cuncta Deus tamen horrida, & undique pœnas
 Destinat & for les Christo invigilante Proncæâ.
 Splendida probrosis intexit, tristitia lætis.
 Natales tenebras stabulumque insigniit astro;
 Ætheriis humilem celebravit cantibus ortum:
 Mox probris alios aliis appendit honores.
 Aligeri quoties Regem agnovere Ministri!
 Summa tamen caræ, divinâ sorte, Parentis
 Usque ministeria: & solidam se impendere Nato
 Mater amat, cretumque suo de sanguine corpus
 Pascere virginei jucundo munere lactis.

Ah, quo sollicitam commissa puertia Matrem
 Exercet studio! quo candida pectora sensu
 Imbuit! ut sacro Genitrix in pignore tota est!
 Aspice, vel simplex tabulâ quid spiret imago.
 Sic & Virginitas & picta Modestia vultus,
 Sic oculos, sic ora ferat. quàm mitia terræ
 Lumina declinat! teneri quàm viva pudoris
 Purpura, quàm suavi igne rubens! quæ gratia frontis!
 Ut neglecta decet species! quàm blanda serenâ
 Majestate micat, castosque accendit amores!
 Ponè humeros adducta tenet materna puellum
 Dextra Deum, velique extremas colligit oras
 Ilia oberrantis Parvo. nam cetera nudus
 Stat nixus Matris genibus Puer. ille MARIE
 Dilectus rubro variat candore decorem.
 Floret apex molli rutilæ lanuginis auro:

DEIPARÆ
 Virg. cum In-
 fante Jesu ef-
 figies.

Cincinnus nitidæ frontis procurrit in æquor ;
Sidereoque natant ridentes lumine ocelli.

Carbaseosque sinus (tenui quo tegmine subter
Translucent frontisque nives & eburnea colla
Virginis) undatim vicina ad corda fluentes
Conscia lacteoli stringit dextella Puelli.

At Matris tacitam perfundunt gaudia mentem.

Non tamen illa pio conspectu affixa tenetur
Prolis & amplexu , cunctos oblita labores ;

Exiguæve domûs neglectis otia curis

Blanda terit. Cœlo nil dignas illa moratur
Delicias , præsens operam si causâ requirit.

Fervet amor ; Genitrixque Deo Nutrixque laborat.

Artifici dextrâ tunicam , non futile tegmen ,

Sedula contextit , parvo cum corpore doctam

Crescere , quam cursu annorum non deterat ætas ;

Sed jactæ excipient scelerato à milite sortes.

Ardua mens , curasque inter , rerumque sub æstu

Tota Deo collecta vacat. neque cordis agendo

Interrupta quies. coràm sua Numina , & altum

Paupere sub tecto assiduè speculatur Olympum.

Cella capax Superûm , divinis conscia factis ;

Plusque aliquid cœlo tenuis complectitur ædes.

Æterno par hîc Genitori , orbisque redemptor

Degit Homo , Patri & Sancto connexus Amori.

Has diâ cum Matre Deus sacrat incola sedes.

Numinis hîc folio assistunt , lætique ministrant

Turmatim Genii , vivæ sine corpore flammæ.

Ac Puero & Magnæ obsequium præstare Parenti ;

Quàm rutilos versare globos , flagrantiaque astra ,

Seu solem & ductu lunam torquere magistro ,

Malunt , aut olim rapida inter fulgura Sinam

Infedis , metu Isacidûm trepidantia castra

Vibrantes , legemque tubæ clangore jubentes.

Legem , cujus amor (quamvis nec lege tenetur)

VIRGINIS
PRO FILIO
DOMESTICI
LABORES &c.

Christiparam longas agit instaurare quotannis
Ad Solymæ templa alta vias. duodennis & addit
Se comitem J E S U S, magnumque adit ipse Parentem.

De Christo.
puero amissa
in Effato IIX.

At seges, heu, quanti, soboles amissa, doloris!
Quo gemitu durum per iter, spatioque remenso
Per Solymæ vicos ternis quæsita diebus!

Mox cœtu Procerum in medio, temploque repertus;
Lætitiæ quæ causâ, sui cùm nobile jamtum
Ederet ignotus specimen, primisque senatum
Stringeret attonitum radiis Puer! inde regressus,
Miro jussâ sequi Matris dignatur honore.

IESUS MATRI
SUEBITUS.

Quem Genitrix formâ puerili conscia tectum
Admirans veneransque Deum, sub inane residit,
Tantum humilis sese ipsa premens, quantò altiùs
effert

Abiectus Matrem Deus, & fabrilis tractans
Primævique Opifex, quassi Reparator & orbis.
Consilio servit supero, ducitque volentem
Diva Parens; ac rite pio memor omnia corde,
Quæque oculis haurit, quæque auribus, atque ministris
Fida terit palmis, penitus mysteria totâ
Mente fovet, doceat mundi quæ deinde Magistros:
Pascit & ipsa suos compostis rebus amores.

Maria autem
conservabat
omnia verba
hæc, conferens
in corde suo.
Luc. 2.

Ara velut fulgens congestis aurea prunis
Perpetuos adytis Solymæ incendebat odores.

Dulcia quis Nati & castæ commercia Matris,
Sermonumque vices, & mutua pignora narret?
Plurima Nazarii tecti suppressa latebris.
Divinas neque Cana tamen, nec Golgotha curas
Virginæ ignorant documenta ingentia laudis.
Splendida quid latè Christi miracula; morbi
Perdomiti, pacatæ undæ, fractæque procellæ;
Tortorum infessis genus implacabile pulsum
Corporibusque animisque, inferni monstra barathri;
Excussæ morti prædæ, conversa que fata?

MATRI PRIMI
MUM A
CHRISTO
MIRACULUM
IMPENSUM.
de quo in l. l.
Parth.

Quid, Domino crebrâ populi quod laude, Patrisque
Partum voce decus? quantâ hæc dulcedine Matris
Perfundere animam! quæ sanctum gaudia pectus!

Materiem primi Galilæa per oppida Virgo
Prodigii Christo suggessit, & intus agentem
Senserat Alma Deum, Natiq̃ue amor impulit ultro,
Exhaustisque cadis Sponsi pudor. obvia, nullisque
Excita occurrit Dominæ clementia votis.

Ecquid aget precibus Mater votisque vocata;
Sic externa pio curare incommoda sensu
Sponte suâ, & tenui facilis succurrere casu?
Quâm, sacros inter thalamos & mystica præsens
Jam Christo desponsæ animæ convivium, largam
Præbet opem! quas delicias, & germine vinum
Fertile virgineo! Matri quid cara negarit
Progenies? nutu, necdum matura, potenti
Virginis accelerata novum tulit hora favorem.
Fortunatam utero Matrem, sacrisque beatam
Altricem uberibus probat alti gloria Nati.

Eheu, quid Solyma, horrendum, quid torva
reclamat

MATERNI
DOLORES EX
injuris crucia-
tibusq; Christo
illatis.

Judæa insurgens furiis? proh cæca potentum
Invidia, & tumido quæsitâ licentia fastu,
Censuræ impatiens; scelerumque exercitus omnis!
Queis non verborum jaculis confixus, & atro
Felle venenatis Christus, dum publica totam
In gentem benefacta serit, miracula passim
Dividit, & superi vocat ad commercia regni?
Nec verbis tenuis, & linguâ gens sævit inermi.
Ingrata heu nimium, tantoque indigna favore,
Quæ Christo patria haud ullum persolvit honorem!
Quin contemptim etiam Matrem objectare MARIAM
Ausa, supercilio Jesum detrudere montis
Barbara Nazariæ molita insania turbæ.
Atque illum, patrio fundentem oracula templo,

Bis Selymæ arrepti jam jam petiere cruento
Maestandum nimbo lapides, ceu Numinis hostem.
Ah, quoties vinclis, quoties dare perfida morti
Tentavit, Regemque Sion ad probra vocavit!
Quanta piam hinc Matris lacerarunt vulnera mentis!

Haëtenus indignos felici lumine tractus
Lustrantem, & sacri spargentem semine verbi,
Alma Parens Natum longo sectata labore est,
Quà licuit; pagosque & iniquas plurimus urbes
Dum peragrat, certamque offert Deus ipse salutem.
Ac dum odiis pensatur amor divinus iniquis
Judæum procerum, & donis injuria certat;
Corde graves Mater sensus partita malorum est.
Nunc, ubi jam præfixa dies sacro ultima fato
Volvitur; atque Erebo conjuratæque Sioni
In summum permissa caput funesta potestas:
Nunc ferie horrendi Virgo tractuque doloris
Raptari patientem extrema per omnia Natum,
Montem ad Golgotheum & diræ fastigia pœnæ
Insequitur, flagris lacerum furcæque gravatum:
Materno (annueret Genitor) quem solvere letho
Ardeat, immanemve crucis sociare dolorem.

It MARLÆ memor; & sublatus stipite JESUS
Adstanti indoluit. tum mutua dona, Parenti
Tradit adoptivum juvenem, juvenique Parentem.
Grata licet, maternum augent solatia luctum.
Dantis amor, geminæque urunt discrimina prolis.
Patri etiam desertum, & pectore singultantem,
Omnibus exhaustum pœnis, arentiaque ægrum
Ora siti exaudit; neque opem potis anxia Mater
Ferre laboranti: atque exangui concolor adstat.
Heu, segetem opprobrii spectat metamque furoris,
Sentibus infixis & adaëtis corpore clavis
Pendentem, laniatum. uno stat vulnere Christus;
Quo totum-expirans habitu conterruit orbem.

V. Theandr.
l. 2. & 3. Lyr.
4. 5. 6. &c

CHRISTUS
DE CRUCE
IN MATRIS
SINUM DE-
POSITUS.

422

LEONARDI FRIZON

Tandem Golgotheo dilapsâ vertice turbâ:
Attigerat sacri monumentum aramque doloris
Orba Parens ; cui fida manus , Natiq̃ue Joannes
Jussus obire vices , paribusq̃ue exercita curis
Magdala ; tum Cleophæ Conjux , cognata Salome ;
Atque aliæ , pia corda , nurus , magnamq̃ue Parentem
Et Christum ad Solymam Galilæa è gente secutæ ;
Lugubris officiis sese comitatus agebat.

Ecce autem Pontî veniam pacemq̃ue precatus ,
Consilio Ifacidûm factisque aversus iniquis ,
Josephus simul accelerat ; simul inclytus alter ,
Qui florentem olim , & Numen cœleste probantem
Mirâ operum serie , agnovit coluitq̃ue Magistrum.
At luci primûm hic veritus committere apertæ
Furtivos aditus cœcis prætexuit umbris ;
Nunc audax , & jam exanimi confessus amorem.
Ambo præsignes opibus , virtutibus ambo ,
Quadrifidi scalis invadunt cornua trunci
Cum gemitu , clavosq̃ue tenaci forcipe vellunt.
Cætera circumstat lecti pars agminis , ultro
Sedula ; detractisque cruento à stipite membris ;
Dum sanctæ nitida exuviæ per lintea pendent ,
Imminet , & molli ad terram deponere lapsa
Affectat venerans vulgo execrabile corpus.
Ante omnes oculis inhians & pectore toto
Captabat Genitrix mœstum , haud infracta , laborem :
Obviaque erectis tendebat brachia palmis ,
Complexura sui funus lacrymabile Nati.

Hei mihi , quæ facies ! sapphiro clarior ille ;
Ille ebore intincto , roseo vel amœniûs ostro
Antè rubens , nivea & puro cum lacte ligustra
Floridus intacti superans candoris honore ;
Nunc elephantiaco similis , teterque rigensq̃ue
(Infandum !) & toto maculosus corpore sordet.
Sputorum viscosa lues , crassique cruores

Ora gravant, crebroque impacti verbere cæstus
Turgentes malas : oculis nox incubat atra.
Funibus evincti, contusi fustibus artus,
Flagris concisi servilibus. omnia livor,
Omnia vulnus habet. sulcis immersa profundis
Fragmina virgarum restant. Immanis ubique
Carnificum furor, & sævæ spectacula mortis.

Caro succumbens oneri spolioque cruento,
(Quæ steterat defixa malis, dum extrema trahebat
Vitam in tormenta Christus) tum denique rupi
Funestæ insedit, defessa, exanguis, anhela.
Tristes reliquias & lamentabile funus
Sustentat miseranda Parens, Natique, Deique
Præfica. concreto squalientes sanguine plagas
Abstergit lacrymis; & consors pignoris, haurit
Totum oculis, animoque expressit faucibus corpus.
Sævit Amor, gladioque Dolor sub pectus adactō;
Verax, heu nimium verax, quem Cycneus olim
Præcinit Matri Vates, longèque minantem
Ostendit; tantæque animam gnaram antè malorum
Jamtum acie stringens, dictis haud vanus acerbis
Dulcia corrumpit Solymæi gaudia templi.

Ah, quoties medio lanienæ in crimine amantem
Extorquere animam potuit dolor! aut ubi letho
Depressum caput & fugientia lumina vidit:
Seu cùm informe, horrens & opertum vulnere corpus
Perpetuo, clavis supraque infraque refixis
Demissum accepit gremio mœstissima Matrum.
Hic MARIÆ impletum nomen, cum vastus amaro
Obruta corda mari turbo vexavit, ubi altis
Vulneribus Natum aspiciens pia Mater hiantem;
Arctabas laceros artus populataque membra,
Inque omni nusquam tangebās corpore corpus.
Ceu fera tempestas ruptis cùm nubibus imbrem
Æstivæ incussit segeti; aut ubi grandine multâ

Increpitans lætis vernantem floribus hortum;
Lilia disjecit, & sanguineos hyacinthos.
Sic decor extinctus Christi, vultusque recessit
Divini species. jam humano inglorius ore
Excidit, horrendusque suis, & fallere visus
Vel Matris potuit, non fallere Matris amores.

Proh scelus ! ætherii frontem venerandaque Regis
Tempora vulnificæ textum crudele coronæ
Sepfit, & angustos capitis derisit honores.
Pœnarum tibi silva rubis increvit acutis,
Alma Parens; densoque infesti vulnere sentes
Altiùs ac penitùs tenera in præcordia adaecti.
Felle calix, misto inclemens mox spongia aceto
Exsucci imbuerat Nati morientia labra;
Diluit infuso tibi lactea corda veneno.
Qui palmas Christi duplices, plantasque trabali
Ferro effoderunt, animum effodère doloris
Arma tuum, clavi; quæque ultra sæviit ipsam
Hasta necem. Extremos venis haurire cruores
Ausâ, Dei templum lato patefecit hiatu.
At non exanimi Nato, sensuque carenti
Hoc doluit: Matrem viventem, ac dira videntem
Ludibria, infelix sceleratâ cuspide telum
Transiit, heu ! geminamque uno plagam intulit ictu.
Cuncta simul relegit longæ vestigia pœnæ,
Collectosque sinu pascit renovatque dolores.
Ac ni sancta Patris fatali in morte voluntas
Clarescat, culpam letho mactantis eodem
Terrigenum ad vitam, pactamque cruore salutem;
Ni plusquam heroo firmatum robore pectus:
Jam semel occiderit, toties cum Prole nefandis
Cæsa modis, tanto necdum confecta furore.
Pars obiit Matris melior: sua viscera, Natum,
Jam consumpta videt pœnis; vitæque superstes
Ipsa suæ, mortis complexu immobilis hæret.

Mille pio plagas, maternæ vulnera mentis,
Ore premit; penitusque avido sub corde receptat,
Quantùm, heu, mutatos! alvo quos edidit artus,
Heu Virgo, heu nimium Genitrix fecunda dolorum!

Verum age, mœsta Parens, fletus absterge decoros.
Discussâ rediit jam tempestate serenum.
Redditur, en, Matri, vitæ jam reddita Proles:
Tertia lux crudo revocatam a funere sistit.
Nec tibi nulla sacer peperit solatia cultus;
Principibus curata viris funebria, & amplis
Muneribus supremus honos, præsensque sepulcri
Gratia, quosque olim sollennes mundus honores
Suppliciter pompasque feret Regumque triumphos.
Divinâ quæ mente datum est præsumere secla,
Votivasque Ducum palmas, peregrinaque dona.
Justa sed immensi veniens solatia luctûs
Ipse tulit, solus tantos mulcere dolores
Qui potuit, tumuli Natus redivivus ab umbrâ.
Primam te, domito lethoque Orcoque, revisit
Sic meritam; ante omnes quæ faucia mater amore;
Ante omnes mœrore gravis; sed conscia rerum,
Vivâ sola fide stabas, certissima voti,
Victorem expectans promisso tempore Natum.

O quantùm hîc specie, quantùm diversus ab illâ;
Quam modò ferali divulsam ex arbore, Virgo,
Funditus exhausto pallentem sanguine, pœnis
Absumptam, horrentem, gremio miserranda fovebas!
Vulnera nunc, hastâ clavoque infixâ trabali,
Purpureæ totidem lucis, totidemque beatæ
Ambrosiæ fontes. cunctos obit aureus artus,
Surgentis fulgor superet qui lumina solis.
O amor! ô teneri amplexus, vastumque dolorem
Equiparans Mariæ conspectâ Prole voluptas!
Queis oculos radiis, quo mentem Numine complet
Æternæ species & candida Lucis imago!

REDIVIVUS
MATRI
CHRISTUS
APPARET,
EXHIBETQUE
ANIMAS
LIMBO LÆ-
ETAS.

Agmen agit Christus geminum; atque utrumque Pa-
renti,

Hinc cœli Genios, illinc tellure profundâ
Eductas animas Victor, spolia inclyta, monstrat:

Heroes pariter, pariter virtutibus altis
Egregiæ factisque ingentibus Heroïnæ
Divinam læto circumstant agmine Matrem;
Miranturque coluntque, & grates laudibus addunt:
Ante alios, par eximium, Joachimus & Anna;
Tum citharâ Proavus sceptroque insignis Hebræo;
Virgineique tori Josephus lilia dextrâ,
Lilia fronte gerens. Tuque, ô, genitricis ab alvo
Qui **MARIÆ** ad vocem cœlesti concitus aurâ
Lætitiâque micans, & jamtum Numinis Index,
Magnifico antiquos vicisti munere Vates;
Sublimis flore in Procerum, Christoque propinquus
Incedis, tuque, & casti, Baptista, Parentes,
Ambo fatidici, præstantes moribus ambo.
Nec minùs illa annisque gravis meritisque, paternas
Ante aras Matrona Deum venerata puellum,
Interpres factorum, expectatæque salutis
Nuncia delectis populi; cum dona beato
Accipiens promissâ sinu, cantumque coloremque
Assimilis niveo Symeon gestiret olo.

Heu nimium funesta suis Conjuxque Parensque;
Mollibus illecebris fragilem quæ prima Virago
Decepit decepta Virum; quæ crimine totam,
Necdum etiam natos involvens funere, gentem
Perdidit: haud falso Viventum nomine Matrem
Agnoscit **MARIAM**, vafrique ultrice colubri
Elisisse caput plantâ miratur, & unam
Pestifero denti intactam, Stygioque veneno.
Jam tantâ exclamat felicem Vindice noxam,
Ipsaque & infauftæ consors uxorius escæ.

Hinc generis lecti sanctæque propaginis auctor
Abramus;

Abramus, qui tot gremio deposta capaci
Millia rite fovens, exutas corpore Mentis;
Servavit, placidâque Pater statione remulfit;
Dum Christus meliore sinu complexus, Olympo
Infereret. Stellis numeroque & luce nepotes
Equatos, sterili quondam vernante senectâ,
Uno Sara tulit partu, populosque beavit
Isaco gaudens, Natoque & nomine visa
Terrarum Dominæ ac Magnæ proludere Matri.

Legiferi ecce autem Vatis Soror, ipsaque Vates;
Vividaque & Mariæ spectabilis umbra refulsit.
Palmarem agnosco Deboram, claramque Jahalem.
Virgineos simul ante pedes stravere coronas,
Victrices animæ; & Solymæi gloria regni,
Quæ caput Assyrium truncique Holophernis opima
Obsessæ retulit patriæ, temploque sacravit
Feminei lecta appendens monimenta triumphi.

Tu quoque Achæmenio Conjux gratissima Regi;
Quæ tenui in fluvium crescens ab origine fontis,
Luce redundasti (sic mystica visa ferebant)
In roseum conversa jubar; vis publica legis
Mortiferæ solam eximiâ quam sorte refugit:
Esther, proscriptæ spes ô non irrita gentis,
Appendisse cruci, quam fixerat ipse, superbum
Criminis & pœnæ artificem letaris Amanum;
Augustam pulchrâ Mariam sub imagine gaudes
Præmonstratam orbi, Servatricemque reorum.

Splendidus officiis Reginam exercitus ambit,
Cœligenûmque hominumque acies. nec castra solutæ
Tantum animæ, volucresque movent sine corpore vitas.
Multæ etiam, (dum terra tremit, patefacta sepulcra)
Rursus, in antiquum hospitium desuetaque membra
Accitæ, & Solymam visæ volitare per urbem.
Non tamen, induti jam corpore, civica Manes
Tecta peragrarunt vulgò : delecta piorum

Lumina sed Christi testes, melioris & ævi,
 Arcanis subiere modis, felicia visa.
 Virginea advolitant crebri sacraria Divi,
 Ac Divum Rex ipse frequens; dum parta laborum
 Præmia, victoremque vocantia regna moratur
 Luce quaterdenâ, jam fractâ morte superstes.
 Ingratâ captus miro telluris amore,
 Bissenos rarusque tamen raptinque sodales
 Visebat, veterem ostendens per amica figuram
 Colloquia; augustos necdum prodebat honores
 Sidereamque oris speciem, quam ferre tuentum
 Infirmi nequeant orbes. caræ ille vacabat
 Assiduè, blando manifestus lumine, Matri:
 Venturique dabat seriem prænoscere fati;
 Quantum ipsam per secula decus, quæ dona per omnes
 Terrarum populos superâque in sede manerent.

Tum quoque cum patrii sedem remeavit Olympi,
 Respectansque suos placidus, faustoque catervam
 Mirantem signo lustrans, majorque videri,
 Jam nive candidior vestem, jam sidere vultum;
 Ipse sibi *currus*, proprioque *auriga* triumpho:
 Illum ascendentem Genitrix, aurasque secantem
 Longè alio, quàm tota cohors, fulgore coruscum;
 Aligerisque choris septum Patrumque beato
 Agmine suspexit, cœlestis & ordine pompæ.
 Nec, quæ sublimem spectantibus invida nubes
 Jesum interceptit, Mariæ subduxit, acuto
 Nubila vincenti rimantique æthera visu.
 Si patuit Baptistæ oculis penetrabile cœlum,
 Abluto nivèâ Christo illabente Columbâ;
 Si Stephano mox ipse polô se dexter apertô
 Obtulit, adstantem Genitori, Virgine Natus:
 Ecquid adorantes Superos, solioque sedentem
 In patrio Regem, nudato Mater Olympo,
 Dulciaque in sese conversum lumina vidit?

Vidit, & ambrosius stillantia roribus astra
Sensit læta Parens, & ovantia carmine templa
Audiit æternæ, Domino gratata, Sionis.
Illic nempe locum, Virgo, tibi Filius ornat
Omnipotens, sedemque parat: quâ deinde paratâ
Adveniet rursus; & cujus placito ipse receptus
Hospitio quondam, castæ penetralibus alvi,
Dilectam excipiet solia ad suprema Parentem.
Interea semotum oculis supplere labora,
Subtracti ceu luna vices & munia Solis
Suscipit: avectoque pios solare Magistro.

Et precibus flammæ, & votis addere pondus
Apta, fovet sacros materno pectore cœtus;
Nec semel apta Deum terris accersere Virgo.
Fecundo unius Verbum Patris ore sonandum,
Condita quo rerum moles, ingentibus una
Promeritis traxit: nunc Sancti Flamen Amoris;
Vitales ex quo subeunt mortalibus auræ,
Allicit, & Nati accelerat Spirabile Donum.

Ecce repentini vis æthere concita flatûs,
Spiritus ignipotens, concussæ infunditur ædi;
Sectilibus capita & flagrans innoxia linguis
Insedit, penitusque animis sublapsus inhæsit.
Blandam inscripsit Amor præcordia ad intima legem;
Omnigenis Mysteria ora sonis Galileia solvunt:
Miratur Solyme, populi mirantur hiantes,
Undique terrarum sacra ad Solymæa profecti.
At quæ Sanctum animo Flamen, quæ corpore Verbum
Flaminis illapsu conceperat, intus agente
Numine progenitum Numen; cœlique beatis
Muneribus primo jam vitæ infantis ab ortu
Plena, sed ipsa sibi donisque sequacibus instans
Auxerat usque novas, acer quas congerit usus,
Gratiæ opes: dona hic Sponsi sollennia cunctis
Largius exceptans, divino exæstuat igni.

Be ij

DEIPARA
in Ecclesiam,
post Ascensum
Christi, officia
&c.

Defixos in Matrem oculos animosque piorum
 Exemplis monitisque acuit clarissima, & omni
 Virtute exuperans; roburque accersit ab alto
 Christiadûm genti, precibusque Heroas obarmat.
 Præcones magnos Fidei, Testesque cruenta
 Fata laceffentes, vincendum firmat in Orbem.

Non acie ferri domitus, non viribus auri,
 Ingeniive opibus; sed inermis præda manipuli,
 Arte rudis, fortunâ inopis, Cruce bella moventis;
 Jam cedit mundus, sancto mitescere cultu
 Jam patiens, nec molle genus condiscere morum.
 Auspice per terras Christo vulgata refulsit
 Relligio, lateque infernas discutit umbras.
 Nequicquam furit infelix, qui corda Tyrannus
 Errorum tenebris vitiisque oppressa tenebat;
 Judææ rabiem pronasque in crimina gentes
 Frustra agitat. sparso pietas fata sanguine crescit,
 Christicolûmque seges, palmarumque ardua silva.
 Signum, Tartarei quo vis infracta Tyranni,
 Excelsæ arripiunt animæ. Cruce, quidquid acerbi
 Sævities, quidquid blandi meditata Voluptas,
 Vel teneri pueri, teneræ vicere puellæ.
 Splendida transformant populos miracula rerum.

Victori gratare Parens lætissima Nato,
 Ipsaque cœlestis partem cape, Diva, triumphi.
 Te quoque victricem furialis Tartara monstri
 Horrescunt; Æther mirantibus evocat astris.
 Et dudum, Regina, tuos suspirat amores
 Ignea gens cœli, tellurique invidet æthra:
 Et te Dius Amor totâ supera alta petentem
 Mente rapit, blandâque volentem morte soporat.
 Sacrato felicem animam jam corpore solvit;
 Rursus & adstrictam redivivo corpore tollit
 Æterni, meritis parta, ad fastigia regni.
 In MARIE occursum totus se effudit Olympus.

Obvius immensam educens rutilo agmine pompan
Processit, Matremque sinu folioque recepit
Christus : & augustâ Reginam luce coronat
Alma Trias , Nato admotam , rerumque potentem;
Cœlicolas omnes , vario totidem ordine Reges ,
Sceptra , Dei famulos , Matri summittere jussit;
Auxilia hinc petere , & miseros sperare salutem
Mortales , tantâ Natum prensante Sequestrà.
Laudibus admista ingeminant , resonantiaque altè
Vota piis terræ pulsant clamoribus æthram.

Optime regnantum Princeps , & Maxime rerum
Idem Opifex Custosque , Deus , miserere tuorum ,
Assiduos inter casus & sæva pericla
Pacem implorantium , ac rebus tutamen egenis.
Christe , humiles audi gemitus & vota clientum :
Supplicibus facilis , posito ceu Judice , mites
Exere Patroni curas , dextramque benignam.
Cœlestis Genitor ; Genitori æquæve supremo
Nate , salus mundi ; tuque , ô Spirabilis Ardor ;
Dia Trias , simplex & inenarrabile Numen ,
Humano generi fatalem averte ruinam.

Tuque adeo , lacrymis pondus vimque adde caducis;
O Domina , ô mœsto jubar adspectabile seculo!
Sancta fave , placidasque aures adverte MARIA ,
Et nostras admitte preces : Natum ipsa sequestris.
Mater adi precibus ; genitoque oblata Tonanti
Viscera , facundo simul ubera lacte perorent.

Virginei Dux , Alma , chori ; Christique Theandri ,
Et Charitis fecunda Parens ! Castissima Mater ,
Nec fetu æterni florem violata pudoris ,
Intemeratum animo candorem & corpore servas.

Materno stirpem immeritam comprehendis amore ;
Omnes Evigenas , omnes telluris alumnos.

Quia etiam averfos longè , noxaque gravatos ,
Ultro ardens captas. hinc publicus ipsa vicissim

Ecce III

ELOGIORUM
DEIPARÆ
SERIES, latius
quam in II. l.
Parth. explica-
ta.

&
MYSTERIO-
RUM ANA-
CEPHALÆG-
SIS.

Orbis amor, pulchri pulcherrima Mater Amoris!

Omnia tu rerum exuperas miracula, mundi

Autorem Genitrix Servatoremque beato

Ventre amplexa Deum, quem non ingentis Olympi

Regia, non spatiis arcet labentibus ætas.

Sanguine quod caræ pretium fatale salutis

Penderet, ac totum materno jure dedisti

Rite volens nostros impendi Numen in usus.

Prudens ante alias Virgo, cui vivida lampas

Atque olei exhausto non defectura liquore

Cœlitis innuptos Sponsi celebrat hymenæos!

Pectoribus Veneranda piis, linguisque Canenda,

Quot cœlo terraque sonant! capita omnia ludum

Promeritis imples, præconiaque omnia vincis.

Nec tamen hæc despecta tibi, quæ nomina mille,

Mille colendi artes mortalia corda frequentant.

Tellurisque marisque Potens, atque ætheris alti;

Fortior insanâ Mulier Styge; quæ caput Angui

Tartareo, primâ damnatum ab origine mundi,

Conterere impressâ Victrix potes ardua plantâ.

Ast homini Clemens, & lactea tota, perennes

Larga manu devolvit opes, ac divite nimbo

Munera per terras latè cœlestia fundis,

Et veniâ ingratae dissolvis crimina gentis.

Si quem olim concepta tui spes, Virgo, fefellit;

Si quando miseris furda, auxilioque ferendo

Segnior inventa es; te jam abneget ille Fidelem,

Virgo, tuum quisquis meminit sibi deesse favorem.

Limpida crystallus, nec labe afflata, renides,

Sidereamque flagras Speculum; quo judice, vultus

Non vitium eluitur, non gratia fingitur oris;

Sed maculas nævosque doces abstergere cordis;

Perfectam ætherio formam componere Amanti

Desponsas animas, thalamumque in Regis ituras

Justitiæ solidam speciem, non splendida visu

Illuso simulacra & inanes objicis umbras :
 Conceptasque faces , infuso à Sole , coruscis
 Missilibus spargens , & vivida Solis imago .

Tu Sophiæ Sedes ; cui nec Salomoniam certet ;
 Illa licet famâ terras jactata per omnes ,
 Secto elephante nitens , fulvoque superba metallo .
 Istinc & responsa Deus certissima reddit ,
 Et nova submissum placidus dat jura per orbem .

Credula serpenti , demens , prolisque noverca
 Eva suæ , tristes offenso à Numine diras
 Immanesque puerperii miseranda labores
 Sensit ; & in seros decurrit pœna nepotes .
 Tu fœdum sarcire nefas veteremque ruinam
 Consilio arcano superi delecta Parentis ,
 Aligeri lætam simul excipis ore salutem ,
 Obstruis & scelerum venas , scatebrasque dolorum .
 Hospita feta Deo , cognatæ limen Elisæ
 Vix pede contigeras & amicis vocibus aures ;
 Cum subito , materna uteri quem septa coercet ,
 Zachariæ insinuans tenues sonus excitat artus .
 Jantum primitias hausit , sensumque recentis
 Lætitiæ haud dubiis prodens (mirabile !) signis
 Gestit , adventuque tuo purgatus avitâ
 Labe Puer , diæque illapsu percitus Auræ .
 Mox & virgineo diffundis gaudia partu
 In populos , nova Bethleo quæ Nuncius Ales
 Gaudia Pastori cantat sub nocte serenâ .
 Heu , duro exilio & lacrymosa in valle jacentes ;
 Felicem in patriam , sancti ad fastigia montis
 Summa vocas , quâ nectareo ruit amne voluptas .

Luctantes animos , vel Olympi ad culmina raptos ,
 Ah , grave terreno depressit pondere corpus ,
 Letiferis dum vita malis corrupta fatiscit .
 Discors ipse sibi , & turbis agitatus iniquis ,
 Pugnat homo , infelix nimium ; victusque gemenisque

Ipse sibi vincla, ipse sibi juga ferrea necit.
 At tibi nec-minimæ patiens contagia culpæ,
 Virtutisque intra placitos excurrere fines
 Libera mens gestit; puræque simillima menti
 Membra vigent, penitusque internæ consona legi.
 Nec te iræ flagrans, extincto fomite, motus,
 Nec molli insidians sensu tentare cupido
 Evaluit; faciles nutu sed temperat artus
 Spiritus, intus agens, & amico in corpore regnat.
 Quàm fragiles passim testæ, atque ingloria limo
 Finguntur Samia, & lucem fugientia sordent!
 Vas auro solidum, multoque adamantis honore
 Sapphiroque micans, rutiloque insigne pyropo;
 Artificisque manu summi, celoque magistro
 Mirum opus, & sacros devotum assurgis ad usus.

Ut Rosa, quæ spinis circumsepitur acutis,
 Seu Jerichuntis agro, viridi seu consita Pæsto,
 Ipsa illæsa manet, suavemque adspirat odorem;
 Viva simul teneras incendit purpura frondes:
 Sic & Adamigenas inter Dilecta puellas,
 Virtute exuperans, neque avitæ conscia noxæ,
 Deliciis & corda trahens inhiantia mulces;
 Plurimaque exempli stimulis vis acribus urget.
 Jam fervent alacri sectantùm examina cursu.

Urbe Sionæa qualis Davidica Turreis,
 Ardua quam circum stant propugnacula, mille
 Una gerit clypeos, Fortes unde arma capestant:
 Tantâ mole sub ætherias attolleris auras
 Arx invicta tuis, & inexuperabile vallum:
 Nec pateris famulos Orco concurrere inermes;
 Tegmine sed fido, Stygii tela ignea contra
 Principis, & vasto obtendens umbone coronas.

At bello in medio soliti mansere decoris
 Dulces illecebræ. dum ferro instructa, Tyrannum
 Umbrarum horrificas, & Turreis athena videris;

Diversa interea famulis apparet imago,
Pacifici Sponsam referens Sulamitida Regis;
Et nitida Turrim cervice imitaris Eburnam.

Nos luteas habitare domos, & vilia nati
Corpora: tu septem Domus Aurea nixa columnis,
Æternæ quam fabra sibi Sapiencia mentis
Ornavit, templisque colit magis omnibus unam;
Et Domino minor, & major Domus æthere toto.

Illum tu nobis compostâ pace volentem
Concilias. per te irato detracta Tonanti
Tela cadunt, tela arrecto librata lacerto,
Fulmina mortales acuunt cùm ultricia culpæ.
Obses amicitia & placidi tu Fœderis Arcus;
Terrigenûm sancti cum Numine Fœderis Arca.

Tu gemmâ perfecta nitens, & cardine ab omni
Noctes atque dies patefacti Janua Cœli.
Qui summo per te in terras egressus Olympo,
Per te homines Christus Cœli intra tecta recepit;
Aspera que ascensu mollivit limina regni,
Angustos laxans aditus, atque invia claustra.
Porta Triumphalis turbâ celebraris ovantûm.

Stella velut, Solis, cùm Matutina, satelles,
Naturam informem vastâ caligine solvit,
Noctem abigens, mundumque diurnâ luce recludit:
Discutis errorumque chaos, scelerumque tenebras
Evincis, MARIA, & stellato nomine fulges.

Infirmis tu, Diva, Salus: te, Sospita Virgo,
Pallentes fugiunt Morbi, Letumque, Dolorque.
Ægra Machaoniæ valeant inventa medelæ,
Pæoniæque artis, meditans tormenta, supellex;
Scilicet & tristes succos, pretiosa venena,
Miscet; & immitis, nec ferro parcit & igni,
Vulnera vulneribus curans, & sæpè malorum
Asperior sensu, Mortique operosa ministrat.
Blanda laborantes animos medicaris & artus;

Arbore Edemæâ melior vitamque tueri,
 Fructu immortalî gaudens, & frondibus ipsis
 Æternûm sanas felix defendere gentes.
 Vix prece conceptâ, jam larga salutis inemptæ
 Copia. testantur crebris altaria donis,
 Religio geminum quâ fusa est cunque per axem.
 Divûm alii febres, alii contagia pestis
 Cedunt; & proprio se limite quisque coërcet,
 Atque uno illustrem commendat munere famam.
 Obvia tu noxæ omnigenæ, terrasque per omnes
 Excurrens Panacea, & præsens Ara Salutis.

Pinguior inde tuæ cumulatur adorea laudi,
 Quod commune Reis & non violabile præbes
 Perfugium. justas si quando exarsit in iras
 Omnipotens; & jam vindex Astræa nocentum
 Tergo instat, toto in pœnas accincta barathro;
 Quam trepidi prestant arcem? terræque marique,
 Cœlo Ereboque atrox urgens terroris imago,
 Intentæque minæ male-conscia pectora turbant.
 Ad te concurrunt miseri; similesque columbis,
 Quas ferus accipiter, vel quas niger aëre turbo
 Præcipitat, fugiunt notæ in stationis amica
 Præsidia, & sacrae condunt sese Urbis Asylo.

Denique, mortalem incursant quæ plurima vitam,
 Solando Afflictos, lenire incommoda gaudes,
 Christiadûm Auxilium, & dubiis spes altera rebus.
 Terrarum prædo sic cùm savissimus in nos
 Thrax rueret, Cypri excidio sublatus opimæ;
 Italiam & contra velisque animisque tumentes
 Lunatæ Ionio volitarent æquore classes:
 Christicolûm socias præsentî numine puppes
 Texisti, Romana sacrum per templa tiaram
 Dum Pius abjiceret, successuque anxia pugnae
 Te votis precibusque pavens Europa vocaret.
 Auspicio demissa tuo Victoria venit:

-Unde tibi partum agnomen; laudumque catenam
Auxilii titulo Præful non immemor auxit.

Aligeri plaufere Chori; pennisque micantes
Et nutum observant Dominæ, rapidoque volatu
Jussa ministeria expediunt. posuere coronas
Reginæ ante pedes magni capita alta Senatûs,
Et citharis JESUM, citharis sonuere MARIAM.

Tum Neptis regnum agnoscunt, sceptrique potentis
Aurea submissi Patres fastigia adorant:
Et Mariana procul speculati sidera Vates;
Ac sua, pæne fidem quondam superantia, lati
Virgineo repetunt impleta oracula fato.

Hinc Præconum, oras terrarum missa per omnes,
Acclamat divina cohors; festoque tubarum
Reginam clangore docet resonare MARIAM.

Discit uterque polus, laudesque per astra volutat.

Nec minûs & Christi Pugiles, fortissima turma,
Palmatis fulgens trabeis, palmâque rubentes
Nexa comas, propriique ostro decorata cruoris;
Martyrii Reginam, & acuto corda dolore
Transfossam, crudæ innumero ceu cuspidis ictu,
Concelebrat: palmasque, manûs gestamina, coram
Deponunt Heroës, & altæ insignia frontis.

Vincla alii, citrave necem crudelia passi
Vulnera, & infandos pro Relligione labores;
Sponte sibi duras alii consciscere pœnas
Assidui quondam, & membris instare domandis;
Fallaci exempti seculo, fata ante sepulti.

Jam quos civili Pietas immiscuit æstu;
Seu, justis apti componere legibus urbes;
Extera tractarunt; seu mystica jura dedere,
Et cœli, spatia arcta, viam docuere, ferentes
Antè gradum implexis per saxa rigentia dumis;
Pastores populorum, in publica commoda nati.
Tot pariter dictisque Fidem factisque professi,

Reginam studio Indigetes cultuque frequentant
 Christiparam ; quæ prima olim, quæ Maxima sacris
 Pontificis summi & votis flagrantibus Ara
 Imbuitur ; supremo eadem quæ sella Magistro,
 Doctrinam factis præeunti, & grandè tenellâ
 Infantis specie mitisque humilisque sonanti.

Quæ simul obscuræ latebrofa silentia vitæ,
 Pauperiem, exilium, fannas, & quidquid acerbi
 Filius exhaustit, consorti pectore Mater
 Pertulerit, nec morte semel defuncta, superstes
 Ipsa sibi, in luctum vivax, victrixque dolorum.
 Nunc interque suas, fortunatasque suorum
 Delicias Princeps, junctosque exultat honores.

At colles supra ætherios non pulchrior alter
 Ordine Virgineo ; quæ te & tua signa secutæ,
 Lilia, fiderei cultis felicibus horti
 Lecta, tibi nivæ adsternunt, Regina, Puellæ.

Unâ omnes, Sanctæ quos extulit aula Sionis,
 Concordi Proceres Dominam te voce salutant,
 Bisgeniti Regis Matrem, Natoque secunda
 Imperia æquantem mundoque ævoque MARIAM.
 Tot laudum titulos, & Divos sparsa per omnes
 Præmia, sublimi gestas collecta coronâ.

O tu isto, prona in miseros, è culmine rerum
 Respice nos, Augusta ; potes quippe omnia : nec te
 Filius incassum regnis præfecit Olympi.
 Per te, perque tuos divinæ Proles amores,
 Mutua & obsequia, & donis certantia dona ;
 Mysticaque ante omnes vigilis tibi fata Pronæ,
 Delectusque sacros æternæ munere fortis.
 Per, qui te intactam culpæ genuere Parentes,
 Felicemque ortum sterili senioris ab alvo,
 Virtutum stipante choro ; pignusque favoris
 Æthere susceptum, & puram cum nectare lucem
 Usque trahens, MARIE venerandum & amabile No-
 men,

Votivum Oblatæ per Virginitatis honorem;
Trimula ubi Solymas iniisti Numinis ædes;
Conjugii posthac velatum ignobilis umbrâ,
Dum luci assuescant, oculos fallente profanos;
Perque salutiferi cœlestia gaudia Nunci;
Perque obitos montana super Judæa labores,
Visendi officium gravidæ cum impendis Elisæ;
Quæque subis, nullâ contacta Puerpera labe,
Haud tibi præscriptos, Mofæa piacula, ritus.
Perque breves lethi somnos, & inane sepulcrum;
Quo surgis rediviva micans, investaque Cœlo
Lætâ triumphalem ducis per sidera pompam.

Si precibus mortale genus, Patrona, tueris;
Ille tuus (cui sola præis, dum tota sequuntur
Agmina Virgineæ censu splendentia dotis)
Sanguineâ incestas lustrans aspergine gentes
Dux ovium, Pastorque Agnus, victorque luporum;
Te monstrante, homines rutilis spectabit ab arvis;
Et septemgemino radiantia tempora cornu "
Lenè movens, parcat famulis, veniamque sequestrâ
Te dabit, ô Mater: vota exaudita, misertus,
Sanciet optatæ perfectæ munere Pacis.

ERRATA

in Theandricis & Parthenicis sic emendanda.

- P**agina 246. versu 29. Camœnam. *dele punctum.*
 Pag. 283. in nota ad marg. Christo, *dele virgulam.*
 Pag. 261. linea 4. lege antonomasticè.
 Pag. 274. vers. 24. mansuescere.
 Pag. 287. vers. 2. tenero, lege, dulci.
 Pag. 297. vers. 15. infixi.
 Pag. 317. vers. 33. Repperit.
 Pag. 318. vers. 5. protervis.
 Pag. 328. vers. 13. auras.
 Pag. 344. vers. 34. quam.
 Pag. 363. quatuor consequentes paginæ repetitis numeris consignatæ.
 Pag. 370. vers. 19. Aronis.
 Pag. 383. vers. 22. Gymnasii.
 Pag. 386. vers. 26. Nomen &c. *corrige*, Nomen; &
 Pag. ead. vers. 30. ritu. lege, cœtu.
 Pag. 411. vers. 1. citharæque.
 Pag. 416. vers. 33. ostendit.
 Pag. 421. vers. 5. mentem.

ORATIONES

ORATIONES
PANEGYRICÆ III.

IN

S.FRANC.SALESIUM

EPISC. AC PRINC. GENEV.

D. RADEGUNDEM

FRANCIÆ REGINAM;

NICOLAUM

COMITEM SERINUM.

AUTORE

LEONARDO FRIZON S. J.

PARISIIS,

Cum Regis Privilegio.

AD LECTOREM.

ORATIONES hæc Panegyrica tres, Erudite Lector, habitæ fuerunt ex occasione, prima quidem, consecrationis B. Francisci Salesii; altera, Regiæ pietatis in Reginam Franciæ sanctissimam, Radegundem; tertia, luctuosissima necis viri fortissimi, & invictissimi copiarum Pannonicarum Imperatoris, Nicolai C. Serini. Quanta verò festinatione, quàmque paucis diebus scripta fuerint, temere fecisse videar, si aperiàm. & sane vereor, ne se ipsæ prodant. Quales tamen cunque sunt, datus illis est locus in Selectis Orationibus Panegyricis PP. S. ꝑ. Lugduni editis. Hic demum apponuntur ob conjunctionem argumentorum, cum intexta sint Poëmatibus superioribus nonnulla de S. Episcopo Genevensi, ac de augusta Regum Patrona; & plura tomo posteriori de huius pio divortio palmarique Transfugio. nam Serini Comitibus justum Epi-cedum extat Heroic. l. II. Sic finitimus est Oratori Poëta. suis tamen uterque se finibus continet; neque in Poësin, ultra quàm Cicero præceptis exemplisque patitur, Oratoria excurrit.

Alterius sic

Alter a poscit opem res, & conjurat amicè.
Dissertatiunculam quoque poscat fortasse, aut universè in genus Epidiæticum, aut in hos propriè Panegyricos. At enim de genere ipso spero me scripturum, quantum satis sit, in Rhetoricis Commentariis Delphino Serenissimo debitis. Subjectis autem Orationibus, me silente, dabis veniam pro tua æquitate, Lector Erudite, quamvis inelaboratis, materia certe rerumque dignitate placituris.

Pagina 5. linea 23. lege, inhumanissima.

Pagina 15. linea 6. Ternarium.

Pagina 59. linea 16. terroribus.

DE FRANC.



D. E.

FRANCISCO SALESIO
EPISCOPO AC PRINCIPE
GENEVENSI,
COELITIBUS ADSCRIPTO,
PANEGYRICUS.

FUIT illa Romanorum veterum ab
heroïcis repetita temporibus su-
perstitio (Auditores clarissimi) ut
parentem urbis Romulum, imperii
conditorem Julium, aliosque subinde
Cæsares ad venerationem consecra-
tos in Deorum numero collocarent. Eò scilicet pro-
gressa, principum ambitu, populorum credulitate &
assentatione impietas; ut homines perditissimos, quos
gravissima atque inexpiabilia scelera ad ignes depresse-
rant Tartareos, Cælo dicaret, positis fanis inaugura-
tisque Flaminibus coleret.

Atenim profligata jamdiu sunt immortalis Dei be-
neficio fœdissima flagitia; nec tam caligine vetustatis,

quàm luce Christianæ legis oppressa. Cessit error veritati, superstitio Religioni, profana Apotheosis piæ justæque consecrationi. Felici rerum conversione, jam non vitia templis & altaribus ad exemplum perinde atque cultum proposita adorantur: sed commentitorum Numinum & criminum abrogato cultu, quam unam è Sanctissimi Magistri disciplinâ colendam intelligimus, virtutem in spectabili atque illustri monumento Christiani veneramur.

Alex. VII Salesii sanctitatis piæque doctrinæ summus admirator.

Tacitâ ipsi cogitatione orationi meæ præcurritis, Auditores, neque opus est à me divinum Præsulem ac Principem FRANCISCUM SALESIUM nominari, cui jampridem æternum gloriæ præmium patrimoniumque Deus beatissimum exhibuit; debitos in terris ac legitimos honores rerum interpretæ divinarum, Ecclesiæ Antistes Maximus casto nuper solennique ritu decrevit, flagrantibus Principum ac populorum votis expetitos, omni gratulationis magnificæque pietatis genere celebratos. Personat adhuc Europam publicæ vox hilaritatis: versatur ob oculos festorum ignium splendor: occurrit animo Pontificiarum Regaliumque pomparum majestas: collucent undique speciosissima multiplicis triumpho, de infernis hostibus, de Genevensis Hæresis portento, de vitiis omnibus relati simulacra.

Venio in partem longè latèque diffusi, nec majoris quam religiosioris gaudi; non quò crescere immensam gloriam tenui vocis meæ præconio posse confidam; sed ut insigni scholarum nostrarum alumno quondam atque exemplo, nunc, uti sperare fas est, Patrono ac Tutelari, qualecunque hoc vestigal persolvam; & annuas Rhetorices primitias Cœlesti consecrem Divinoque Oratori. Et verò si scholas imperatoriæ templæ gloriæ dixit Eumenius; quantò augustiùs Regium hoc gymnasium Salesii laudibus honoribusque instante Lu-

PANEGYRICUS.

3

do vico Rege Christianissimo constitutis dēdicetur?
Quā porro vobis aptum omnibus, Aud. illius viri
exemplum, qui Theologiam Jurisque prudentiam acer-
rimo cursu studiorum emensus, lauream ex utraque tu-
lerit: qui Senator primū supremæ Camberienſi Cu-
riæ adscriptus, sacra deinceps munera sic gesserit, ut
admiratione invidiam extingueret, fructu pietatis uber-
rimo admirationem ipsam fidemque superaret: qui de-
nique Pontificio ex Oraculo planē *omnis homo* extiterit
ut omnes Christo adjungeret.

Sed quoniam in amplissimā rerum silvā statuerendus
est orationi modus; Franc. ego vobis Salesium, Audi-
tores, propono, qualem Phœnix ille Homericus virum
principem ac totius Græciæ fortissimum sibi ex patris
mandato fingendum atque elaborandum dicebat, *Oratorem verborum actoremque rerum*. Vos aures faventes
animosque tantisper adhibete, & Oratorem veriùs
quā Periclem, Olympium, Actorem planē Thaumatur-
gum vobis dum exhibeo, non admiratione solum,
sed etiam veneratione cœlestem virum prosequimini.

Cic. 3. de Orat.
ex 9. Iliad.

Majus esse quiddam, Oratoris munus, quā homi-
nes opinentur vulgo, & pluribus ex artibus studiisque
collectum; non Tullii magis, quā ipsius veritatis ac
sapientiæ pronunciatum est. Sed apertum de Oratoris
dignitate campum sanē ingentem, ubi tot eloquentissi-
mi volitarunt laudatores, silentio prætervehor: neque
committam, ut illā quasi jactatione plus invidiæ for-
tasse quā gloriæ videar facultati, cūjus à me suscepta
profectio est, domestico præconio collegisse. Unius ego
Salesii vim facundiæ mirificam victoriasque celebro,
victis salutare peræquē ac victori gloriosas; victorias
linguā, non manu partas, nisi cū hęc stricto ad salu-
tem animorum calamo armaretur; & orationem quo-
dam, ut ita dicam, literarum amento intorqueret.

Atque ut nobili Catonis sententiā mea prætexatur

oratio, Virum bonum dicendi peritum oratorem describentis ; quis illo viro vir melior , qui suâ sponte nativisque virtutum seminibus sic ad omnem laudem effloruerit, ut nullâ funesti patrimonii parte, noxæque ab Adamo in posteros manantis labe aspersus cōtactusque videretur ? (quæ sententia pietate doctrinaque eminentissimi Baronii fuit) cujus Amorem divinum prima vox sonuerit ; profanum invicta mollissimis illecebris constantia obtriverit : cujus adolescentia , cunctaque adeò vita, innocentiae specimen, modestiae speculum, censura vitiorum, sanctitatis miraculum extiterit ? Jam Salesio quis dicendi peritior ? quis omnibus eloquentiae præsidiiis , animi & corporis dotibus ornatio ? Pars est felicitatis vel præcipua, Magistri præstantia ; idemque suam intelligentibus felicitatem stimulus ad discendum acerrimus. At noster hic , supra ætatis captum sapiens , cū alii à parentibus ostenderentur , præceptores ipse delegit eos , quorum & mores & doctrinam consequi duceret pulcherrimum. Quanquam is Franciscus fuit Salesius , ut eo potius institutores censeretur debeant & gloriari. O te beatum , eruditissime Maldonate , teque Sirmonde præstantissime ; & auditore hoc singulari, multò quàm frequentissimâ Parisinæ juventutis coronâ celebriorem ! ô musæ scholæque Claromontanæ, quæ tantum Ecclesiæ lumen, non solum ut plurimæ Galliarum Italiæque sedes aspexistis ; verum etiam purissimis accensum radiis , orbique Christiano suspiciendum ad altissimum fastigium extulistis !

Et ille quidem amœniores omnes disciplinas miræ ingenii concitatione severioresque pervagatus ; cū excellens omnibus , quâ potissimum parte emeretur , ambiguum esset : minus tamen ex Rhetorum officinis quàm ex cœlesti afflatu illapsuque traxerat. Quid enim putatis , Auditores, voluisse nitidissimam illam, quæ Salesii caput insedit , Columbam , nisi ut vim , auram ,

PANEGYRICUS.

efficientiam divini Spiritûs, cujus tunc maximè sacris operabatur, haud semel adoptato symbolo declararet? An verò lingua ignea defuit, qualis procusa fuit Apostolis, *ut ignea verba loquerentur*? Quoties ardore spectabili inflammatus Salesius est; nec linguam tantum ardentem, sed multò vehementiùs cor incensum accepit! Testis ignea columna, quæ animum ab Evangelicis laboribus aliquando colligenti adfuit; ut ipsum ab architecta vivi æternique templi, Sapientiâ, sic tanquam sublimem, splendidam, nulloque concussu labefactandam augustissimæ molis columnam, erectum excitatumque designaret. Testis flammeus globus, qui cœlo demissus incumbentem precibus Salesium, suavissimis ignibus, non modò innoxiiis circumfudit; ut pium orbis terrarum incendiarium, amoris divini libros commentantem opportuno instrueret subsidio, & auspiciato prodigio meritissimum illustraret. Testis illa radiorum ex adverso Christi de Cruce pendentis simulacro in concionantis vultum emissio; cùm suspensis admiratione auditoribus, totus è corpore Salesii animus emerneret, præsens atque intimus toto dicentis ore Deus emicaret. Theorhetorem intuebatur, posteaquam divinitus egerat, inhumanissime patientem; è purpurato suggestu non delectationi servientem aurium, sed acerbissimis doloribus saluti consulentem animorum; brevi efficacique omnia docentem sermone, & saxa ipsa non clamore magis quàm silentio commoventem.

Hæc cùm spectaret animo; cùm oculis quos acuebat fides, usurparet Salesius: nimirum exardescibat in Deum amore incredibili: sic autem Dei capitalem hostem unicè detestabatur, ut nefario illi tyranno mancipatos homines æstuanti infinitaque caritate quæreret, ambiret, prensaret, diligentissimus ac solertissimus captator animarum; quasi desertores ac transfugas in castra obsequiumque Imperatoris Optimi Ma-

Bernard. de
Pentec.

Esther. c. II.

ximi revocaret. Quibus ille blanditiis publicè privatimque in aures animosque influebat, ut ipsa orationem finxisse gratia videretur ! quid illo amœnitus ingenio ? quid ubertate melleâ eloquentiæ beatius ? Apis Gallica, itidem ut Bernardus, jure appelletur, quæ acerbitalis sensu nullo, aculeum tamen infigat mentibus acrem pariter & salutarem. Purissimo fonti simillimum dicas, qualem sacræ loquuntur litteræ ; qui mox in amnem excreverit adeo lucidum, ut conversus in solem videretur, ac radiis potiùs quàm aquis redundare.

Quater-millies
concionem sa-
cram habuisse
dicitur.

Nec verò præclarissimus Antistes celeritatem magis primarii sideris, quàm benignitatem exhibuit. Taurinos, Allobrogas, Salyos, Segusios, Lugdunenses, Burgundos, Delphinates, Parisios indefessis excoluit laboribus ; ita populosas & Regias pervagatus urbes, ut oppida tenuissima non aspernaretur ; sic Principes aulicamque coronam affatus, ut infimam plebem rusticamque solitudinem oratione creberrimâ dignaretur. Etsi (post illa expeditionis Apostolicæ primordia, quibus incredibilem exprompsit patientiam imbuendâ Antuatium Orthodoxorum paucitate) nullus erat Salesio dicente infrequens locus ; cùm verus hic Gallicus Hercules aureis quibusdam facundiæ catenis homines traheret ; aut potius, concionatoris instar cælo delapsi, nec fabulosi eloquentiæ scientiarumque omnium Numinis, multitudinem blandissimâ caritatis vi captam devinctamque in deserta loca raperet ad dena auditorum millia : neque multitudinem solum plebeiam, sed ipsos Dynastas, Palatinumque comitatum, excussis aliis deliciis negotiisque, alliceret in pagos ; in campum, in pulverem, in solem educeret. Non capiebat tantos animos Annæcium ; non Sabaudia tota ; non Italia, non Gallia universa. Excurrebat Apostolici viri spiritus in Christianas omnes gentes ; & quò viva pervenire vox non poterat, eo literarum monumentis adspirabat. Pervasis enimvero

Christianum orbem , actuosissimique otii fructum in omnem partem disseminavit.

Ecquis vestrum, Auditores, *Theotimum* ignorat , librum Amoris ipsius manu ingenioque scriptum; itaque expresso doctrinarum succo saturum , ut quatuordecim omnino lineas , ducentarum supra millenas ingentium paginarum lectione sibi sterisse asseverarit is, quo nemo facti locupletior testis esse potuit ? Nam quid ego de *Philothea* dicam (ut alios fileam libros , & multitudine innumerabiles , & dignitatè singulares) aut quo satis elogio divinam illam ad pie sancteque vivendum Isagogen prosequar ? quem libellum Henricus Magnus laudibus in cœlum extulit ; quem Maria Medicea Regina Christianissima , xeniorum nomine , Magnæ Britanniae Regi obtulit ; quem hic , licet ab sacris nostris alienus Princeps, longè omnibus suorum omnium scriptis anteposuit ; autorisque cernendi cupiditate flagrans , viri sapientiam sanctimoniamque non sine stupore prædicabat.

Et jure quidem , ac meritò. Virtutem enim multi , non modò inimici , sed etiam affectu inconsulti , duram , intractabilem , ferream ; denique monstri nescio quid simile finxerant , quod amores ita non excitaret sui , ut horrorem potius incuteret. Itaque vulgò in Ereum , in asceteria virtus relegabatur : nullum illi cum Aula commercium , nullam cum populari vita societatem jungi posse temere jactabatur. Non tulit falsam hanc importunamque speciem Salesius. Virtutem non fucam , sed sinceram ; non umbratilem , sed solidam ; non inhumanam , sed civilem ac parabilem , qualis est reapse , produxit : suosque illi , formidolosa austeritate detracta , lepores , suas illecebras , quibus omnes conciliare debeat , felicissime restituit. Quibus ille prudentium omnium studiis acceptus liber est ! quo plausu celebratus ! cunctarum fermè Christianarum gentium sermone ex-

pressus, id auctori suo præstitit, ut Deum Opt. Max. tot simullinguis ubique collaudet; ubique ipse, communis institutor populorum instauratorque pietatis, in ore, in manibus, in oculis versetur.

Sic linguâ calamoque docuit; sic pie frugifereque delectavit; sic, quod caput est, permovit Orator verè palmaris. Atque ut intelligatis, Auditores, quàm commodè lumen illud Galliæ, fulmen Ecclesiæ, Cardinalis Perronius, qui heterodoxos confideret sponderetque à se vincendos disputatione ac profligandos; eosdem ad Genevensem Antistitem mitteret persuadendos: attendite, quantum hic voce scriptisque fuerit consecutus; quantam hæresi stragem ac vastitatem importarit. Septuagena (rem pro istiusmodi hominum contumaciâ pænè incredibilem) septuagena hominum millia ad Catholicam traduxit fidem: plus undena ipse millia recepit, in iisque viros illustres* plurimos, nec paucos erroris antesignanos; qui eo præside ac susceptore prava dogmata ejurare voluerunt, cujus operâ veritatis lucem absterfis Dæmonum tenebris aspexerant.

* Ducem Iediguerium &c.

Numerent profani duces concisos exercitus, populas urbes, desolatas regiones, ac generis humani exitio triumphantes insolescant. Salesius non clade, sed salute mortalium exultat; gentes non imperio suo, sed suavissimo Christi jugo subditas gratulatur. Ac si Capitolini coronas civicas sex, Sicinij Dentati quatuordecim ambitiosè ostentat antiquitas; quam, Deus immortalis, vim coronarum Salesio debent non homines singuli, sed populi ab teterrima immanissimaque servitute in dulcissimam tutissimamque libertatem asserti; ab corporis animique interitu sempiterno in beatæ jura æternitatis vindicati: *Tantam*, ut ajebat Tullianus Antonius, *vim habet illa, quæ rectè dicta est Flexanima omnium Regina rerum Oratio, ut non modò inclinantem erigere, aut stantem inclinare, sed etiam adversantem* &

repugnantem, ut Imperator bonus ac fortis, capere possit.
Dilectissimi viri sententiam, Salesij victrix eloquentia comprobavit.

Atenim facundiam nolite, Auditores, eam tantum cogitare, quæ dictione aut scriptione continetur: alia quædam est, multoque efficacior corporis eloquentia, non tam in pronuntiatione sita, atque illa quæ vulgò ab Rhetoribus appellatur, actione; quam in conformatione vitæ operumque præstantia. Orator est Salesius, in quo nullum cordis, atque linguæ dissidium, sed mira cum utroque manûs consensio. præcepta factis confirmat: sapientiæ fideique oraculis virtutum omnium adiicit miracula. Orator Actorque planè cælestis.

Videor mihi, Auditores in amplum quoddam induci magnificumque atrium, signis undique pulcherrimis convestitum atque exornatum; quæ artis ingenio & pretio materiæ admiranda omnia; sed & varietate marmorum & sculptoris operâ dissimili magis quam dispari, & propriâ formæ cujusque majestate aspectabilia, sic oculos pascant atque oblectent, ut splendidâ simul copiâ specieque confundant. Talem se mihi offert Salesij vita, rerum præclarè gestarum numerone, an dignitate insignior? Errat distractus animus, & certantium inter se meritorum admirabilitate suspenditur. Sanctissimam vitæ privatæ disciplinam exequar? quæ licet in umbra & recessu, effert se tamen atque elucet suavissimè. At publici muneris virtus rapit ad sese oculos, non major, sed illustrior. De lenitate dicam, quæ fellis humorem, ut in dissecto corpore apparuit, penitus consumpserat; neque veniam modò, sed & gratiâ & beneficiû injuriis rependere gestiebat? At validissima in tuendis Ecclesiæ juribus, refellendis infringendisq; sceleratis cōstantia orationē sibi vendicat.

Mirer agentem, quatenus res divina posceret, in Palatiis Principum, Aulicum assentationis expertem, im-

motum calumniâ, pietatis magistrum, præconem veritatis? Avocat me strenui Pastoris laboriosissima diligentia, pedibus caulas mysticas obeuntis; per invia montium juga, per abruptas cautes, per acervos nivium, per lapsus horrendos torrentium enitentis, venatoris aucupisque animarum. Opum, dignitatum, honorum, ab Henrico IV. virtutum Salesiarum æstimatore magnifico, multisque Gallia Proceribus oblatorum despicientiam prædicem? Occurrit in egenos homines, in loca sacra, tam effusa liberalitas, ut dignam opulentissimis Præsulibus munificentiam exhiberet. Mensæ, vestium, familiæ totius modestia summa & priscis Ecclesiæ temporibus consentanea, quamvis tenuem censum, pios in usus copiosum reddebat. Nunquam ille sustinuit Genevensi Ecclesiæ, quamlibet afflictæ, spoliatæ, dote cassæ, tanquam libellum repudiij dare. Et cum designatum se ab Leone XI. Cardinalem audisset; ego verò, inquit, non aliter vestem hanc, quam meo sanguine purpurascere velim; felix si mortem meam repræsentari vita salutis Calvinianis erronibus potuerit. Quid agam igitur, Auditores, tot virtutum, tot eximiæ factorum impar encomiis? Duo ad specimen explicanda è tanta rerum serie prorsus heroica facinora decerpo.

Scitum illud est, Auditores, Prodicti commentum Xenophonteis intextum libris, de Hercule, cum primum pubesceret, in solitudinem egresso, ut remotis arbitris secum ipse deliberaret, quam potissimum in illo flexu ætatis sequeretur viam. Atque hinc Virtutem, illinc Voluptatem obviam factam adolescenti, certatim ad se utramque tenerum animum invitasse; Virtutem aperto laborum ad gloriam curriculo; Voluptatem mollissima proposita via, quam inertibus, otiosisque circumfluens deliciis ambularet. Non ita Salesius, cui nunquam in deliberationem vocatum fuisse videtur, utram se in partem daret. Non pependit animo, non fluctuavit beatif-

simus Adolescens; qui naturæ ipsius bonitate, seu potius dono providentiæ simul in vitam atque virtutis viam ingressus appareat.

Sed eâ viâ cum ingentes faceret processus; ecce tibi è transverso blandissima juvenum conciliatricula Voluptas, quæ institutum abrumpat iter, suamque in potestatem incautum transferat, quò dulcior, eò periculosior domina. Quibus verò lenociniis nec opinantem adorta est! quas adhibuit machinas, constantiam ut labefactaret! Audite pestiferæ grassationis genus, Academici Juvenes; & crimine ab uno insidias pudicitiae salutique vestræ paratas cognoscite.

Quaquam Salesij consuetudine nihil fieri poterat suavius, cum esset ad unguem factus omnique urbanitatis cultu perpolitus; gravis erat ille tamen Academiæ Patavinæ perditis adolescentibus nonnullis, quibus impudentiam Juvenis castissimi ac modestissimi pudor tacitus exprobrabat. Statuunt itaque, ut molesti deinceps censoris notam effugiant, hominem in licentiæ societatem pertrahere dissimulanter (neque enim ipsam probum Adolescentem impudentia palam esset ausa interpellare de flagitio) animum minimè suspicacem, atque ex se de aliis æstimantem, facile in fraudem induci, facile objectâ peccandi illecebrâ inescari capique posse. Non illi pectus marmoreum, quod ignem subjectis ardentibus tædis non conciperet; nec Samsone fortiorem, nec sanctiorem Davide, nec Salomone sapientio rem; hominem porro, non Angelum concretione liberum corporeâ, Salesium: invictum hactenus, quem nullus attentasset hostis; cessurum, si oppugnaretur. O consortia hominum lubrica, sævioremque capitalibus odiis amicitiam, quæ socios expetat vitiorum; & pignus exigat fidei, conscientiam delicti! Hem, Salesi! Tunc etiam in funestos illos sodales incidisti? ne tu quidem, tam erecto atque excitato, tam vigili at-

que omnia circumſpectante animo laqueos illos & plagas declinare potuiſti ? Sed nullæ ſplendori tuo allini fordes, nullæ adhæreſcere labes potuerunt. Nec cœno lux inquinatur ; nec virtus alienis unquam maculis obſoleſcit.

Laborat oratio, Auditores , in locum inveſta difficilem ac ſcopuloſum ; cùm neque invictiſſimo Juveni debitum laudis teſtimonium obruere ſilentio , nec ſatis amplè diſtinctèque factum exequi præ verecundia liceat. Rem præcido , quæ nullâ pro merito commendari eloquentiâ poſſit. Perducitur in libidinum diverſorium, quam doctrinæ officinam rebatur Salesius ; ubi fœmina matronali habitu compoſita , ut ſcenæ ſerviat , exceperit nimium familiarem catervam , ſermonemque miſcere cœpit cum ignaro fabulæ totius hôte. Senſim dilabi comites, ut opportunitatem præbeant nequitie ; Salesium, ut exiſtimant , jam irretitum , atque inexPLICABILI hærentem nexu deſerere. Tunc enimverò , poſitâ illâ modæſtiæ perſonâ & pudoris fuco detracto, cùm omnes libidinis faces admoveret impudiciſſima mulier ; quid ageret proditus Juvenis & circumcluſus ? quâ vi, quâ indiſtriâ nefariis reſiſteret hoſtibus, vim propemodum innocentie afferentibus ? Fuit, fuit is animus Saleſij, quem neque intèſtini corruptelarû ſtimuli ad flagitium incitarent, neque externæ flagrantefque blanditiæ emollirent.

Ea demum perfectæ virtus eſt, ſi Philoſopho credimus, quæ tam altas egit radices, nullo ut turbine commoveatur, ſed pacatè atque expedite ſuis partibus officiis que deſungatur. Ecquid intelligere libet, Auditores, quàm levi ac nullo ferè negotio tam inſperatum , tam horribilem aſſultum exceperit propulſaritque Salesius ? Sputo in os famoſæ conjecto per ludibrium explicuit ſe præſentiſſimo irreparabilis jacturæ periculo. Nec ſanè dubitaſſet linguam ipſam, ut olim Nicetas, dentibus

amputatam in vultum formæ præfidentem, impudentiâ deformem expuere, si aliter extricare vincula illa nodosque fœdissimos non licuisset. Sed nimirum plecti contemptu proterviam decuit, & tam expeditâ victoriâ rubor flagitiosæ fuit impudentiæ accersendus. Nihil ergo aliud egistis, insidiatores, proditoresque turpissimi; nihil estis affecuti, nisi ut heroicam Salesij constantiam probaretis experienciâ, oppugnatione firmaretis.

I, Victor fortissime ac sapientissime! Castimoniam inviolabili voto obsignatam; Magnæ Virginis, cui te tuaque consecrasti omnia, præsidio illasam clarioremque ex illo circumfrementium libidinum incendio refer. Dum evolantem è suis castris insano clamore Venus illa jam in furiam conversa insectatur; spectatores periculosissimi certaminis ac defensores Cœlites plausu te cantuque triumphali prosequuntur. Tu illo, quem tanquam Africanum inter Deos Lactantius appellat, Hercule major; cùm is citò ab inita Virtutis via deflexerit, post sublatos Tyrannos factus imperiosissimæ mulierculæ mancipium vilissimum. At voluptatibus ita non cessisti, ut, partâ de istis semel iterumque nobilissimâ victoriâ, piam in te sævitiem exprompseris; corpus virgineum voluntariis afflictationibus, gravissimo inde contracto morbo, prope confeceris; sive ut alieni flagitii pœnam dolore tuo persolveres; sive ut fractis domesticis perturbatoris viribus, fortior in externum hostem prodires, corruptâque importunæ formæ elegantiam, non modò arma, sed etiam laceffendi tui voluntatem omnemque belli materiem præriperes.

Laudetur sanè suo merito, ac seculorum omnium gentiumque prædicatione celebretur sanctissimus Juvenis, & animi pudore quàm oris decore speciosior, qui *adamat non redamavit, rogatus non acquievit, comprehensus aufugit*; vestem in adulteræ manibus quasi contagio insectam reliquit, ut ansam excuteret flagitij.

De falsa Relig:
c. 9.

Ambros. de
Joseph Patriar:
cha. c. 5.

Tua, Salesi, victoria Josephi laureâ, si fas est dicere, magnificentior. Hic, non servitute magis, quàm beneficiis hero obstrictus, & perfidiæ labem horruit, & pœnas metuere acerbissimas potuit. Tū nullo rerum humanarum obice impeditus, cū & solitudo faveret securior, & majores adessent quàm ab Ægyptia illecebræ; unius beneficentissimi Domini reverentia scelertam impurissimi gregis conspiracyem discussisti. Fugâ Josephus victor evalit, spolio sui relicto ne captus teneatur: Tu non inultus è pugna te recipiens, victoriæ tuæ notam in cerussato vultu, quem dignissimo affeceris opprobrio, defixisti. Illum calumniâ procax mulier appetiit, & innocentissimo famulo, qui non libidini serviret, sed egregiè sibimet constanterque imperaret, meditatum adornatumque ab ipsa flagitium imposuit, ac doloris ex repulsa sensum contemptoris malo leniit. Te ne suspicio quidem afflare ausa est: bacchantis sceminae convivium, integritatis fuit tuæ palmariique facti præconium.

Inconcussus igitur esse Salesius non potuit, Auditores, invictus esse potuit. Sed hætenus Christi militem egit excipiendis hostium impressionibus, eludendis stratagematis exercitatum: age nunc, partem aliquam expendamus laborum, quos exantlavit infinitos, arma hostibus inferendo. Et ille quidem jam inde à primæ ætate ad extremum vitæ spiritum acerrimè cum vitiis & ubique conflixit, nullas cum Tyranno Tartareo ejusque satellitibus pactus inducias, semper in eorum cladem intentus atque imminens. Quot eorum copias cecidit! quot fugavit duces! quot arces diruit! quot adversa propugnacula excitavit! Non plures ille peragravit passibus quam victoriis illustravit regiones: nec bello tantum, sed singulis omnino præliis superior, ac vix unquam sine præda spoliisque discessit. Verùm hic ego non percensenda Herois mei gesta sumpsi, vesti-

giaque omnia conſectanda. ſacræ unius expeditionis limitibus, quod reliquum eſt orationis, circunſcribam; laborioſæ proſectò Apoſtolicisſque viribus & animis digniſſimæ expeditionis, quam ſummi Pontificis auſpicio ſuſcepit in hæreticos Genevæ circumjectos. Caballiacū dico, Tenerium alioſque infelices tractus, quos Bernenſes Helvetii cū armis quondam occupaffent, non Sa-
baudiæ magis Duci, quā ſummo cœli terræque Principi Chriſto abſtulerant.

O ſpectaculum acerbum tibi, Francisce, & luſtuoſum, cū cerneres paſſim antiquiſſimæ religionis proſtrata, diſjecta, conculcata monimenta! non templum, non aram ad obeunda ſacræ inviolatam, ac nullum orthodoxæ pietatis, præterquā in ruinis veſtigium. Quo tu animo ſitum ac ſquallorem deformium locorum repurgare inſtituiſ! quā conſtantiā onus Alpium mole gravius ſuſtines! quā alacritate moleſtias omnes exhauris; fruſtra interponente ſe, ne aſperrimam adires provinciam, cum lacrymis patre; fruſtra ex iſto laborum curſu, cū tuis exanimaretur periculis, revocante! Nec tu es ille ferreus, qui ſenis optimi atque amantiſſimi mœrore non movearis: ſed manu ſemel ad opus expe-
dita, pedem aut oculos referre non patitur divini regni ſuſcepta inſtauratio. Senſus humani molli-
tiam tenerior multò ſanctiorque obtundit charitas, ne diutius calamitoſiſſimam gentem jacere in tenebris, & quaſi errabundum ſine paſtore gregem à latronibus, à feris diripi ſinas & laniari. Atenim quid miſerius ſuas non agnoſcentibus miſerias? quid ægris deſperatius in medicum inſanientibus? ita dementati Caballiaci erant finitimique populi, cū opportuna publicis malis remedia Saleſius attulit: oculis auribuſque ſalutem oblatam reſpuebant.

Magnum certamen, Auditores, benignitatis cum atrocitate, Religionis cum hæreſi, patientiæ cum furore,

sanctitatis denique cum omni vitiorum genere ! septennium ipsum tenuit ea contentio ; & laboris fructum si spectas, seculum enumeres. Unicum primis temporibus Salesio fuit receptaculum arx Alligenfis , unde multa quotidie passuum millia conficiebat pedes, litan-di gratiâ : hoc est, plurimis , ad unum in urbe Thonone peragendum sacrum, suimet præmissis sacrificiis veniebat. Quoties inter Alpinas nives tendenti, vestigia rupto, quem penetrabili frigoris vi contraxerant , tumore cruenta rubuerunt ! quoties in casa, in maceria, sub arbore, sub dio per sævissimam hiemem pernoctavit ! quamdiu, effractis dejectisque torrentis fluvij pontibus, per trajectitiam tabulam obducta glacie lubricantem manibus genibusque obnixus perreptavit ; non sine horrore vel Hæreticorum, vitam hominis è tenui malignoque ponticulo pendentem , atque in apertissimum discrimen projectam intuentium !

Quid, cum avidissimè caput suum pro lue pestifera contactis devovit ? quid cum in medios armatorum globos se immisit impavidus , ut ad solita Religionis officia progrederetur ? Fremebant omnia seditionibus ; unus omnium vocibus ad necem tanquam fœdisfragus pacisque turbator deposcebatur ; objectis telis iter ad templum obstruebatur : pergit nihilominus eodem vultu Salesius , Deoque fretus duce , inter conferta perduellium agmina ruinas templorum excitat ; aras instruit, cruces erigit , sacris operatur. Tantam, credo , animi firmitatem aptissimo symbolo exprimere voluit Allobrogum regia Princeps Christina , quæ Præsulem sibi eximiè cultum , sacrisque largitionibus consultissimè præfectum, adamante insigni donavit. Sed adamantina vis erat animi ; corpus fragile morbisque obnoxium , quos gravissimos & tantum non letales immensis laboribus collegit , nec minori tolerantia laude superavit.

Parum tamen Salesio fuit, fines hostium pietatis incurrere : caput ipsum rebellionis sacrilegæ petebat ; opima spolia è Duce Heterodoxorum ambiebat. Genevæ ergo , arcem illam impietatis , flagitiorum omnium asylum , Calvinianæ Sectæ Metropolim aggreditur ; Primipilos vocat ad legitimam concertationem : & cum elicere castris latentes non possit, in hostilia munimenta impetum facit ; privatis congressibus fundit fugatque obvios ; captivos abducit , seu potius Christi libertos : Bezam ipsum , perfidiæ coryphæum , scriptis factisque procacissimis infamem, ter quaterve adortus, sic perturbat, sic implicat , ut vocem extorqueat conscientiæ indicem , testem veritatis. Nec destitit blanda vi , officiosissimaque pertinacia labem illam ac pestem perurgere ; quoad intellexit improbissimi desertoris obduratam longo usu flagitiorum obstinatamque pereundi voluntatem, ut homo ad multorum perniciem fatalis, suâ se ipse demum salute fraudaret, qui toties alienam evertisset.

Liceat hîc tecum agere liberiùs, Salesi, ac de prudentia tua quærere , satiusne provide in sinum urbis inimicissimæ aut irrepseris aut irruperis ? Tûne illud scelerum gurgustium ingredi ? Tu os illud Bezæ ferreum aspicere & laceßere ausus es ? Tu Principis Tartarei administrum primarium ad ea, quæ turpissima defectio-
ne reliquerat, Ecclesiæ signa revocare ? nec timuisti piis omnibus infestissimæ civitatis furorem, cum gravissimam nationi Calvinianæ securim infligeres ? columnen illud partium, & quasi Atlantem Genevæ labefactares ? cum prædas non solum è finitima circumquaque regione ageres , sed ex ipso urbis gremio averteres ? sectarios & signiferos abduceres ? occultos aliquot Orthodoxos mysteriis procurares ? An elusurum te hominum oculos sperasti, Genevensibus frequenti sua clade nimis cognitus ? Tûne etiam, cum protectionem rei Catholi-

cæ perutilem exundans Rhodanus intercluderet; tu per mediam Genevam iter habiturus, ubi nomen ad portas edere pro more iussus es, *Episcopum* te *diœcesis* indicare non dubitasti? atqui tutius Rhodano effusis late undis favienti, quàm colluvioni scelerum Genevensi credideris. Utrùm te, Francisce, amoris, quò gregem effertum deperibas, incensa vis; an hostes divinæ miraculum providentiæ occæcavit? illius adeò Providentiæ fiducia impulsus, ope subnixus, ab iis emissus es incolomis, qui deinde stupori suo indignantes, feroci timè jactarunt, audaciam tibi istam, si fuisses deprehensus, capite luendam. Vitæ scilicet, quam factionis suæ funus numerabant, pepercissent, qui venenum tibi aliquando miscuerint; à quo tu exitiali poculo, non nisi certissimo Deiparæ subsidio convaluisti. Quid Genève non fecisset immanissima bellua Hæresis, rebus à te sanctissime gestis exasperata, ut damna ignominiamque suam tuo cruciatu solaretur; quæ percussores ante adornasset immisissetque in absentem?

His periculis non terrebatur Salesius, Auditores, qui vitam libens sanguinemque iis ipsis, à quibus petebatur, impendisset: & verò tormenta in ea causa pro beneficiis suscepisset. Id certè adeptus est, ut maximâ finium parte multaret Hæresim, velut pomœrio nudatum hostem in arcem intimam compingeret; per Lemantum lacum explicatis salutaribus signis festo cum cantu pompam ad D. Claudij duceret triumphalem: in ipso Genève aditu ac faucibus crucis trophæum defigeret. Jam victoriarum innumerabilium censum quendam inij, cum hominum septuagena millia retuli ad Romanam fidem aggregata. Hoc unum, ne cui fortè liberalius agere videar, addidero; tractum ad Genevam sanè amplum ac plus sexaginta distinctum pagis & oppidis, ita expiassè trienni labore unum Salesium, ut centum omnino Calvinianos relinqueret discedens, ubi centum

omnino Catholicos adveniēns reperisset. Quā ille rerum commutatione, felicius multo quā crebritate miraculorum, Neocæsariensem * Antistitem expressit; * D. Gregorius Thaumaturgus.
eā quidem parte superior, quod breviori longē tempore majorem, quā celebratissimus ille Thaumaturgus, regionem Christo subjunxerit.

Quare Salesij virtutes alias alij, longāque præclaræ factorum seriem oratione persequantur: conflata Viro-
rum augustissimo Crucis Labaro addictorum sodalitia commemorent; sacrarum Cœlesti Reginæ Mariæ, ad Elisabetham invisenti, Virginum instituta religiosa prædicent; miracula inclyta, honoresq; passim & vivo & mortuo habitos extollant. mihi ego Salesij laudes universas collegisse videor. uno tam multiplicis victoriæ compendio, cumulateque *potentem opere ac sermone*, Oratorem Actoremque divinum comprobasse.

Te nunc appello, Vir Beatissime, cui pro benignitate ista singulari probatum hoc meum studium non diffido; collatisque in Rempublicam Christianam, in Societatem nostram officiis & plurimis & maximis pro mea parte respondendi voluntatem. Tu Cœlitum cliens non factus, sed natus es; à parente, pia nobilique matrona, Christo Virginique jam inde ab utero consecratus. Nasci * properatō visus es, quō citius è primigenij concretiq; peccati fordibus emergeres. Naturam Gratiamque amicissimo fœdere nexuisti, utriusque donis ornatissimus; ut neque illa Gratiæ obluçtaretur, neque hæc vitiis exuendam haberet Naturam, sed virtutum accessione divinarum cumulandam. Franciam Sabaudiamque ita meritis devinxisti tuis, ut de te ceteret utraque: & natales quidem generosissimos ortumque Sabaudia vindicet, morte verò sanctissimā Francia gloriatur.

Si lectissimos viros designare prodigiis solet rerum sapientissimus Moderator; magnus à prima usque pue-

ritia Angelo Justiniano , Genevensi tunc Episcopo , illuxisti; dum te aliptes mysticus *confirmatione*, ut vocant, sacrum Athletam & militem autoraret; jamtum extitutum aliquando temporis tui miraculum augurato. Quantus verò in amplissimo Christiani orbis theatro apparuisti, cum te Clemens VIII. Pontifex non tam ad solenne Præsulum examen, quam ad probatissimæ vitæ doctrinæque gratulationem ac plausum vocavit! Quantis in Belgio lætitiis, quo triumphi apparatu exceptus, Pacis Angelus, Principum Arbiter, populorum Conciliator, Philippi III. Regis Catholici Albertique Archiducis cum sanctiori Sequanorum ordine controversiam, Romani * Patris nomine & autoritate diremisti! Nunquam imago animi veriùs appellata oratio, quam ore calamoque tuo profecta, quæ suavitatem unice spiraret, purissimis cœli deliciis perfusa & delibuta; placidissimæ vultûs majestati, atque interritæ formidolosissimis locis ac temporibus constantiæ adjuncta, feriorum in caput tuum strictis gladiis involantium furias deliniret, facinorosas manus exarmaret; & quæ jugulum petebant, ad genua supplices abjiceret.

Non tu intento digito viam indicasti pietatis; sed aliis apertum curriculum dux ipse grandibus impressisti vestigiis: sanctimonix præcepta è propriis hausisti moribus: ore vitæque spectabilem amabilemque Virtutem expressisti. Quis *verba vitæ* (ut hoc è sacris usurpem litteris) quis *verba vitæ* habuisse, atque in cœlo vim obtinere immortalem negarit eum, cujus *mortuum prophetet corpus* geminis excitatis funeribus? Sed plures quotidie, graviorique morte oppressos ad vitam revocas æternis laudatissimorum librorum exemplorumque monimentis.

Respice, Antistes Sanctissime ac Beatissime, respice Genevenses illos quondam tuos, etsi curis laboribusque tuis ingratisissimos. Qui unâ vicorum ali-

Pauli V.

genua

PANEGYRICUS.

15

quot lustratione tyrannos octoginta tortoresque infernos occupatis infestisque corporibus ejecisti; Hæresimne suâ illâ arce deturbare atque exterminare minùs poteris? Magnam certè spem, rerumque expectationem futurarum suggerit recens illa tot execratorum in Gexensi regione fanorum uno Regis Christianissimi jussu strages edita: spondetque fore aliquando, ut prisca ubique sinceraque religio non revirescat modò, sed etiam floreat auspicio tuo; Adeodati, Victoris, Pacifici, semper-Augusti Principis imperio: & quæ agentem in terris Oratorem Geneva parum audiit, audiat è cœlesti suggestu magnificentius perorantem.

Dictus AN. M. D. C. L X I I.



IN DIVAM
RADEGUNDAM
FRANCIÆ REGINAM,
REGUM PATRONAM,
PANEGRICUS
AUGUSTORITI PICTONUM HABITUS

A N. M. DC. LXIII.

SANCTUM fuisse Gallis Regium nomen jam inde à priscis illis barbarisque temporibus, & ipso naturæ ductu gentisque genio impensè cultum accepimus, Auditores Ornatissimi. Nimirum illustri quadam spectabilique notâ divinitatis & mutuato quasi radio dignitas regalis insignitur: atque in vitiosis etiam Principibus extat eminetque tamen aliquid quod suspiciatur ac pæne adoretur. Ubi verò excellens admirabilisque species virtutis cum splendore fortunæ conjuncta est; nec justâ modò legitimaque potestate summi Numinis adumbratam imaginem, sed eximiæ sanctitatis absolute expressum vivumque ac spirans Dei simulacrum intuemur: jam non profano tantùm & politico, sed augustiori planeque cœlesti honore fastigium illud veneramur.

Talem ego venerationi vestræ materiem propono, Auditores; Reginam, cui se Ludovicus ipse Regum Maximus, Christianissimæque Reginae supplices abjiciunt; Heroïnam virtute; Pictaviensium, commoratione civem, patrocínio Tutelarem, Radegundem, credo, vestram intelligitis, regio quem calcavit, apice superiorem; inexhaustâ mirâque beneficiorum perennitate in Principes ac populos quos communi clientelâ

complexa est, assiduè profluentem. Quid ergo aut loco temporique congruentius, aut mihi ad dicendum illustrius, vobis ad audiendum jucundius exquiram? Cùm Regiæ pietatis & magnificentiæ crebra recentiaque monimenta videam ad Sanctissimæ Reginæ cultum defixa & consecrata; cui se potiùs quàm Regum Patronæ addicat, cui serviat gloriosius ea quæ à veteri laudatoque scriptore appellata est *omnium Regina rerum Oratio*? Cùmque urbs hæc florentissima, non vestigiis modò impressâ consignataque sit religiosissimæ ac beatissimæ Principis; sed ipsa divinæ illius opis tutelæque solidum amplissimumque stet monumentum: veniant in partem pii gratique animi litteræ nostræ Scholæque Regiæ; & cui Rex Adeodatus sospitatem refert acceptam, præconium aliquando in solenni clarissimâque istâ Panegyrici persolvant.

Atenim, quoniam & ab inopia temporis & ab ingenii tenuitate laborat oratio; vestrum erit, Audit. quod ex utraque parte deficit, humanitatis subsidio atque ipsius commendatione argumenti supplere. Neque ego facilitatem istam pluribus evocabo aut eblandiar operosius, ne videar aut vestræ in munificentissimam Patronam pietati diffidere; aut parum memor perspectæ jam erga me, probatæque benignitatis. Ac ne infinitus sim, Reginæ sanctissimæ virtutes si pertexam, quarum est concentus omnium admirabilis, incredibilis excellentia singularum: unâ Excelsitate animi, quo se Rade-gundis in cælum extulit; & Beneficiâ, quâ publica & privata hodieque sublevar incommoda; duabus maxime regiis dotibus, quidquid est hoc Panegyricæ orationis, circumscribam.

Vetus est ille quidem ac longè latèque dissipatus error, in armis unicè versari fortitudinem, in castris atque in campo totam animi magnitudinem spectari. Nihil videlicet acuti sapientesque rerum existimatores

magnum judicant, nisi quod infanis viribus & artē gladiatoria gestum sit; nihil splendidum, quod ferro non effulgeat; nihil pleno ore laudandum, nisi quod tubarum tormentorumque strepitu sit permixtum. Laureas non amant, nisi cruento pulvere sordidas; trophæa fumantibus ruinis urbium excitant; hominis denique præstantiam immanitate belluæ metiuntur. Sic iidem, ni fallor, minaces funestosque cometas placido salubrique siderum nitore; montes eruptione flammarum & subjectarum vastitate regionum infames, collibus opacarum arborum proceritate, limpidorum fontium irrigatione, omnique florum suavitate amœnissimis anteposunt. Sed age, concedamus sanè universam in re bellicâ fortitudinem & magnanimitatem occupari. Hoc tu mihi tamen fatearis vicissim, necesse est, aliud esse quoddam multoque periculosius & difficilius belli genus, in quo se Radegundis exercuit; alios hostes, quàm qui oculis usurpentur, aut manum pedemque conferant: arma telaque ab iis quæ ferro aut ære procedantur, longè diversa. Sexum audaciâ magis quàm habitu dissimularit Semiramis; Imperatricem in acie perinde atque in aulâ gesserit; eò demum expeditione felicissimâ pervenerit, quò vix adspirare postea Magnus potuit Alexander. At illa multarum gentium victrix fœdissimæ cessit libidini, externaque decora domestico probro maculavit, ac penitus obruit. Radegundis non Semiramidem, non Tomyrim, non Zenobiam, non Amazonum Reginas æmulata, bellum armis cœlestibus instructa suscepit, quo sanguinem funderet suum, non alienum; quo non prædam adspectabilem referret, non manubias & opima spolia; sed proprio se splendore ac regno spoliaret.

Militiæ nati sumus, Auditores, quotquot in hanc lucem editi susceptique sumus: in præliarem nos campum Deus induxit, simul atque in orbem terrarum emisit.

PANEGYRICUS.

27

Quibus autem adversariis, vel potiùs quàm immanibus
monstris objecti sumus? Publicù quidē hostē piorum, sic
tanquam triformem Geryonem, unicus ille è Christi 1. Joan. 2.
sinu Theologus effinxit. Quid? alterum hostem illum,
inauditæ formæ atrocitatisque portentum, non ita estis,
Auditores, admirati, ut nunc ex ipsa recordatione co-
horrescatis? cujus eam vim Deus prædicat, quæ ne Job. 41.
fulmine quidem moveatur; durissimum metallum eo-
dem, quo putridum lignum, ordine habeat; omnia
belli tormenta perinde quasi stipulas contemnat. An
tertium hostem producam, tantò sæviorem, quantò
blandiorem? Domi (ô rem cùm dictu acerbam, tum
sensu exitiosam!) domi hostem habemus inclusum,
in sinu infixum, hærentem in visceribus, individuus
atque intimus circumfertur, alitur, fovetur. Maximus
ille apud Romanos, qui labentem Rempublicam susten-
tavit ac restituit, novam de Annibale victoriæ artem
commentus erat, non pugnare. Verùm in hoc bello
animorum non dimicare, vinci est. nemini hîc locus est
cunctatori. non viro, non mulieri, non puero, non seni
vacare aut cessare licet: nullis arma suspenduntur in-
ducis: nihil vel ad respirandum liberi spatii relinqui-
tur. nunquam extra teli jactum, nusquam extra peri-
culi aleam versaris, Fugamne ab hoste circumspicis?
effuge te, si qua via est. pugnam meditaris? quibus ar-
mis superes hostem, qui te toto pugnat? O bellum
grave & importunum, nec ipsâ victoria terminandum!
cùm ex Hipponensi oraculo vitia, & *que resistunt, peri-*
culoso debellentur pralio; & que victa sunt, nondum secu-
ro triumphentur otio, sed adhuc sollicito premantur im-
perio.

August. de Ci-
viti. Dec. 1. 19.
c. 27.

Quantam igitur fortitudinem exprompsit Radegun-
gundis, ne fœdè proditus & circumfessus à perduellibus
membris effrænatoque sensuum satellitio animus arce
suâ detruderetur? ut hostes multitudine innumerabiles,

assiduis omnium seculorum congressionibus exercitos, dolis æquè ac viribus paratissimos, inexpiabili & furiali in genus humanum odio inflammatos, ubique in nostram perniciem intentos, ubique insidiantes, semper integros nulloque pertinacissimæ oppugnationis labore fatigatos fœmina debellaret? præsertim eorum in ditio- ne atque imperio genita; parentes nacta superstitione irretitos, Tartaræque tyrannidis jugo oppressos.

Calamitas illi gradus exitit ad felicitatem; servitus ad libertatem aditum aperuit. Patre Bertario, Thuringiæ Rege, per fraternali scelus interempto, ipsa Christo salutis publicæ parenti renata est: ultoris Clotarii thalamo folioque captiva immigravit. Hîc verò cum se ex immanissimi teterrimique prædonis faucibus eripuis- set; omni ratione ceteros homines ab ejusdem iniquis- simâ durissimâque potestate vindicare instituit. Ditio- nem ejus invadit non virili, sed divino prorsus animo; atque ut erat igne cœlesti succensa, faces profanis tem- plis subjicit, ut Galliam expiet nonnullis adhuc super- stitionis nefariæ reliquiis deformatam.

Nunquam acrior capitaliorque contentio est, quam pro aris & focis. Conclamant undique concurruntque ad arma inanium Deorum cultores; ad facinoris locum advolant irâ ardentes; & flammæ delubro injectas, sacrilegorum, quos vocant, cruore extincturi, fremitu omnia tumultuque complent.

Quid tibi tunc animi fuit in illo turbarum æstu ac repentina tempestate, Regina sanctissima; cum ad convivium vocata, in pugnam cædemque incidisti? cum eas quas fano admoveri tædas jussisti, ut pii ac salutaris incendii conspectu lætissimo animum oculosque pasceres, pietatis tuæ ministris ad funus præluxisse; & quâ ruinâ commentitiorum numinum signa involuebantur, eadem cohortem illam tuam ac te ipsam obrui posse intellexisti?

Quid vos, Auditores, quid suspicamini de muliere in apertum vitæ discrimen adductâ, inter medios impetus furentis populi deprehensâ? receptui cecinisse? suos ab incœpto revocasse? restingui incendium præcepisse continuo, aut certè permisisse? nihil nisi de incolumitate suâ effugioque cogitasse? Majoris erat animi, majoris constantiæ Radegundis, quàm ut aliquid ex incenso divinæ gloriæ studio remitteret, aut affectum opus frigescere pateretur. Stat interrita audacis religiosique facti dux fœmina: non subtrahit se concitatae multitudini; equum, in adversum agmen objectumque periculum impellit: urget, acuit, confirmat pios incendiarios; aggerant ignes, excindant, funestent receptaculum dæmonis, arcem superstitionis. nec priùs abscessuram se, quàm altaria, tecta, muri deflagrarint, corruerint, tota funditus everfa moles consumptaque cum impio cultu interierit, severè denunciat. Simul oratione ad tumultuantem plebem conversâ, sic gravitatem lenitati, precibus monita, majestati religionem admiscet; ut scelus anhelantium hominum manibus arma defluant; sacræ ac velut cœlo delapsæ flammæ obsistendi consilium animis excidat; novus quidam ardor pectoribus concipiatur Christianæ Religionis amplectendæ.

Sed cùm tantum invicta Reginæ constantia potuerit in antiquissimo Dæmonis propugnaculo & munimento inflammando ac diruendo; civilique, an hostili motu componendo; & mentibus ipsis adversariorum, quæ una omnium speciosissima certissimaque victoria est, sibi adjungendis: tum verò nunquam Heroïna Christiana vicit magnificentius, quàm fugiendo.

Quod si à me dictum quispiam est fortè miratus; recogitet secum ipse, quantis illa Clœliæ Virginis Romanæ fuga laudibus ornata sit & celebrata; quanto etiam apud Regem Porsennam hostem in pretio habita: non dubitabit profectò, quin meritò in Cœlum ex-

tollatur fugitiva fortitudo, aulam, conjugium, opes, delicias, honores ultrò deferentis atque abdicantis ; cum eam quæ vincula, quæ carcerem fugiebat , ut patriæ in finem recurreret , equestri statuâ dignatam insignitamque meminerit.

Omnino magnus & sublimis animus nullâ re clariùs quàm rerum externarum despicientiâ cernitur ; ut ait ille non dicendi solùm, sed etiam intelligendi Magister. Quæ vulgò ampla splendidaque habentur, ea parva ducere nihilique facere, virtutis est tam exaggeratæ atque arduæ, ut complures invenias, qui ferrum, qui vulnera mortemque ipsam contemnant; per-sanè-raros, qui dignitates, qui gloriam omnemque fortunæ pompam conculcare audeant.

Seneca de
Tranquill. ani-
mi.

Tenet me summus amor parcimoniæ, inquebat è Stoicorum natione sui magnificus Ostentator. placet non in ambitionem cubile compositum, non exquisita vestis & pretiosa : placet cibus parabilis, nec patrimonio gravis, nec corpori : placet minister incultus, & mensa quæ nullius convivæ oculos nec voluptate moreretur, nec accendat invidiâ. Sed idem præstringi tamen animum querebatur apparatu delicatæ suppellectilis, ceterâ fervorum nitentium, divitiis per omnes ædium partes dissipatis. Placebat nimirum in secessu, in exilio, in rerum angustia frugalitas : ubi circumfuderat è longositu venientem multo splendore luxuria ; titubare aciem ; faciliùs adversus illam animum quàm oculos attolli fatebatur. malebat denique in rosa & viola, quàm in spinis dumetisque, hoc est, in opulentia & voluptate, quàm in paupertate ac doloribus, mollem jucundamque virtutem exercere. En, quò Stoici post elatum altè supercilium, post ampullas verborum phalarasque descendunt ! Non ita Radegundis, quam Christiana disciplina non dicere magna, sed facere docuerat.

Regia puella cum elegantissimæ formæ morumque

pulcherrimorum laude floreret ; ad eamque Rex Clotarius explorandæ probandæque famæ causâ venisset , vidisset , arsisset ; victus captusque à sua præda , nobilissimæ captivæ conjugium expetiisset : quis non omnibus lætitiis incessuram arbitraretur puellam iniquitate fortunæ de gradu dejectam ; eâ sorte oblatâ , cui parem stante ac vigente paterno Thuringiæ regno vix reperire potuisset ? Ex honesta liberalique custodia , sed è custodia in aulam dominatumque traducebatur ; unam omnes tam læta rerum conversione beatam prædicabant : quis illum in Fortunæ gratiam reditum , & quæstuosa detrimenta , optandumque casum quo altius extolleretur , non sibi gratulaturam faciliè credidisset ? At ipsa secum infelicitè agi , quæ Regi placuisset , ingemiscit ; lacrymisque ingratam oris speciem corrumpens , dat se in fugam , nihilo segniùs quàm si ad pœnam cruciatumque vocaretur . virgineas quippe cælestis Sponsi nuptias meditatâ ; unicè Christo addictos amores illibato corpore animoque servatura .

Sed quò te inconsultam agit pietas , Radegundis à alienis finibus circumclusa , Regis te manus evasuram sperasti ? nec sentis à Deo , cujus fiduciâ & studio rebus te aulicis humanisque abripiebas , amplissimum celeberrimumque pandi theatrum , in quo multiformis tuæ virtutis spectaculum explices ad communem cœli terræque applausum , neque unius seculi vel exemplum , vel probum ? Hactenus privatæ ac puellaris vitæ numeros obiisti ; nunc matronalis regiique status implendæ tibi partes sunt : mox tibi Deoque planè reddita , Parthenonem informabis : quo mortalia sint omnia loco & ordine ducenda , publicum extabis atque immortale documentum .

Mores suos Radegundis aulæ intulit , Auditores : atque ut fontes quidam & fluvii sinceris & impermistis aquis per lacus mariæque volvuntur ; sic in tumidis

illis fluctibus & palatinâ jactatione institutum vitæ
 cursum & præclare cœpta promovit : neque tot satelli-
 tum, quot virtutum comitatu choroque stipata, Regiam
 adventu suo, & censuræ vim ac pondus obtinente
 exemplo consecravit : de superbia, de voluptate, de
 fortuna victrix fortissima triumphavit. Purpurâ, gem-
 mis auroque distinctâ induebatur? at cilicinam corpori
 tunicam, blandorum hostium debellatrix acerrima, velut
 loricam apprimebat. Mensæ assidebat regalibus deli-
 ciis circumfluenti? at vitam interim plebeio cibo, eo-
 que tenuissimo, furtim in medio luxu tolerabat.

En quàm citò Regiâ evolavit ; Auditores ! quàm se
 providè fallacium bonorum illecebris subduxit ! quàm
 fortiter splendida sanctæ mentis onera abjecit ! Jam
 immensam illam virtutem aula non capiebat : emine-
 bat foras erumpebatque diu collecto asceticæ vitæ stu-
 dio Radegundis : quæ decora invitissimo animo susce-
 perat, haud sanè leviùs quàm Aslueri quondam uxor,
 modestissima & religiosissima fœmina, sustinebat. Tunc
 demum sibi captiva veriùs, quàm in Atheïensi priùs
 castro, videbatur : & quæ ad laxandas custodiarum
 compedes referendaque ergastula fufis ad Deum preci-
 bus valeret ; aurea quibus constringeretur, vincula &
 quovis carcere molestiorem Aulam effugere se non
 posse tacita lugebat.

Ergo, ne quid intentatum relinquat, novam felicio-
 remque superiori fugam, Deo duce & auspice, adornat ;
 sacro flameo vultum obnubit, ut dicatam Christo atque
 in ejus jura transcriptam nemo ignoret ; desponsam ac
 devinctam Deo interpellare audeat nemo. Vincit deni-
 que piâ pertinaciâ Conjugem amantissimum : revocatâ,
 quam concesserat, veniâ instantem fugienti, & jam jam
 injectâ manu retracturum eludit miraculo : majori ad
 extremum curâ & labore, quàm ab ambitiosissimis
 quæri captarique fœminis soleant, regalem & torum &
 aulam effugit.

Ô fugam maximis clarissimorum Imperatorum victoriis anteferendam ! ô factum omnibus historiarum monumentis, omnium stupore seculorum, omnium mortalium immortaliumque linguis celebrandum ! ô diem vobis, Piclavienſes, candidiſſimum ac triumphalem ! cùm Regina ſanctiſſima poſt varias Galliæ provincias longo victoriarum cœleſtium beneficiorumque curſu peragratas, in hanc urbem veſtram ſe tranſtulit, ubi caſtra quædam virtutis poneret piæ ſanctæque militiæ Imperatrix.

Quid attinet hîc novæ Ducis excubias perpetuas, voluntarios & gregariis longè aſperiores labores, ac ſingularem vitæ rationem perſequi ? Cum in Aulâ tenerum innocentiffimumque corpus aſſiduo jejunio maceraret ; cœleſti contemplatione, diu noctuque, vel inter acerbiffimi frigoris vim ad rigorem uſque membrorum productâ, mentem avidiſſimè paverit ; qualem in Aſceterio atque in extremo actu ſe præſtitiffe neceſſe eſt !

Sic verò agit, quaſi nihil eatenus actum ſit ; ſic ſavire in ſe ipſa cœpit, quaſi tota in deliciis fuerit : eâ fertur incitatione & alacritate tantâ, ut prima merere ſtipendia videatur ; exercitatione tali ac firmitate, ut emerita jam & laureata non dubiè agnoſcatur. Conſtantiam in ſua cauſa probaverat antea Clotario : in aliena cauſa probavit Childerico, cùm is filiam ſuam ſemel Deo attributam è ſacra ſtatione repeteret.

Aliudne fortiſſimi pectoris ac palmaris animi ſpecimen expectatis, Auditores ? Ne nihil in hac umbratili arcanaque militia ferro actum putetis ; ne incruentum hoc quidquid eſt myſtici belli : ferreis cingulis & catenis ita corpus arctarat, ut altè impreſſa ac demerſa, dolore tantùm ac vulnere ſe proderent ; adhibitoque ferro equendum ferrum fuerit, miſerandum in modum concifo laniatoque corpore ; unde tanta viſ prorupit

sanguinis, ut ferè spiritus unâ eâdemque viâ seque-
retur.

Jam verò cum in re militari nihil antiquius sit & sanctius, quàm vexilla servare, ut ea Signiferi diligentes & animosi, non nisi cum vitâ extorqueri sibi patiantur: arte singulari providit Radegundis, ut ne morte quidem avelli sibi detrahiq[ue] posset salutis & victoriæ fatale signum & instrumentum. Quod Constantino Magno luce descriptum in nube apparuit, in pectore suo Regina ignito metallo insculptum atque inustum extare voluit; quo signo ac telo armata pariter ornataque vinceret.

Vicit enimverò, ut jam exposui, Auditores, vicit triplices illas, quas indicavi, copias hostium, quâ vi & atrocitate, quâ fraude & insidiosis blanditiis grassantium. vicit Dæmonas, quorum occultos impetus à se suisque propulsavit; quorum impios ritus exustis aris fanisque exturbavit. vicit Aulæ, fortunæ, corporis corruptelas; improborum calumnias, potentium machinationes heroicâ virtute animique celsitate superavit. Ut interim ventos, fluctus, procellas, morbos, mortem, pestes furiasque Tartareas humana corpora insidentes; ea quæ nullo, præterquam divino robore debilitari frangique possint; absentis etiam ac sepultæ precibus & promeritis victa profligataque conticescam. Nam quid ego de Britannis dicam, quos fusos, fugatos, mutuâ internecone confectos ab hujus urbis jugulo & cervicibus rejecit, depulit, exterminavit?

Atenim hujus superiorumque mentione victoriarum ad partem orationis alteram de Regiâ Cœlestique Radegundis Beneficiâ sensim ac molliissimè defluxi. Et verò quid prius aut potius huc afferam, quàm quod extremum attigi publicum beneficium, & anniversariâ pompâ æternitati consecratum? Quid enim, Auditores, supplicatio ista solennis? quid urbis lustratio? quid
populi

populi concursus ? quid sacra fercula , ritusque ceteri volunt à piis gratisque majoribus ad vos transmissi ; nisi urbem ope ac beneficio Patronæ Radegundis servatam & liberatam ?

Equidem haud ita sum hospes ac peregrinus , ut nesciam quid augustissimæ primariæque Tutelari hoc speciatim nomine debeat Pictavium. Video, cui claves urbis assignatæ et commendatæque sint; cujus in excolendo templo atque simulacro magnificentia certatim Urbis Præfectorum enitescat ; cui populi, opere materiæque spectabilis , quasi liberale splendidumque vectigal quotannis offeratur. sed annuente tamen ac libente Mariâ beneficium illud amplissimum cum Radegunde communicabo, quæ unâ cum Hilario Magno adstitit Optimæ Maximæ Liberatrici; cujus in gremio vixerat; cujus in sinu , in templo à se exædificato, condidit se mortuam sacrosanctâ obtestatione mandaverat. Ergo Imperatricem cœli terræque potentissimam, Immortalium cohortibus succinctam, & ipsam quavis acie terribilior, vobis, Pictavienſes, suamet quidem sponte indulgentissimam, sed tamen impensius quàm valebat apud eam gratiâ Radegundis conciliavit. Illo, illo tunc præsidio fœdissima exitialisque proditio prodita discussaque est ; præreptæ claves, obstructæ portæ, defensa mœnia; quique in procinctu stabant ad irrumpendum , in urbis vastationem imminentes Angli, objecta cœlestium Patronorum ac Defensorum specie turbati lymphatique in suapte viscera manus gladiosque converterunt.

Quo loco finite me , Auditores , dum antiquissimæ virtuti vestræ, adversus Britannos fortitudini, in Franciæ Reges fidei, erga Superos pietati gratulor ; simul admonere, ne præclara majorum instituta obsolescere patiamini, ne patrocinii cœlestis hereditatem negligi ; sed ut eam , quæ jam à quatuor seculis ad nostram ætatem perducta est festiva triumphalisque gratiarum

agendarum celebritas, non ullâ ex parte imminutam; sed ipso temporis processu confirmatam, ac nova in singulos annos accessione splendoris & religionis amplificatam, ad posteros diligenter sancteque propagetis.

Nec semel urbi se Tutelarem approbavit Radegundis, Auditores; neque in hostes præsentior adfuit, quam in cives: si tamen cives appellandi sunt, quolibet hoste infestiores; aut homines, cuncto ferarum genere immuniore. Cum famosus Thalassiarcha totis sceleratæ in Deum Regemque perduellionis viribus armatus Pictavium circumfideret; admotisque machinis primam è Radegundæi templi regione mœnibus labem impressisset: sensit, sensit impius Hagiomachorum Dux proximum templum, idem urbis certissimum esse ac validissimum propugnaculum. sensere Catholici milites, qui sese ad Reginæ Tutelaris aras pro salute patriæ devoverant, inde sibi robur animosque afflari; non modò ut aggressionem illam, atque ut primam, sic vehementissimam recentium agminum impressionem, sed reliquos assultus omnes impetusque felicissimè refellerent, eluderent solertissimè, fortissimè infringerent.

Age verò, quantis hospitam urbem operibus opibusque locupletavit Radegundis munificentia, sive sacris ædibus regali sumptu excitatis, sive Martyrum Lipsanis undique summa curâ & religione contractis! Aurum, margaritas, cetera quibus pretium fecit luxus hominum & insania, depereant arcessantque vulgò ab Indiis Principes faminæ; terrarum mariumque jactent spolia; mundique illius muliebris commendationem à labore ducant periculoque institutorum. Nobilior utique commercium instituit pia Regina: Heroum Christianorum exuvias, ossa tormentis ipsis doloribusque consecrata, in votis, in deliciis habet. Hos amat vestigare thesauros; Hierosolymis, Constantinopoli colli-

gendos devehendosque curat cineres, cœlum aliquando illustraturos, mortalitatis reliquias, semina æternitatis.

At quo te piaculo præteream, Orbis terrarum ex-piatrix, non jam infelix arbor, necis cruciatusque feral-
le instrumentum, sed vitæ felicitatisque parens, Crux
Sanctissima? quæ novæ hujus Hienæ immenso studio
& amore expetita; Sigiberti Regis Privigni sui auto-
ritate & legatione ad Imperatorem Justinum II. cum
amplo Lipianorum comitatu impetrata; insulati * Poë-
tæ carminibus, mox in solennem usum Ecclesiæ diffusis,
rite celebrata, æternum Pictavi decus & ornamentum
addidisti. Fabuloso Palladio gloriata Troja fuerit; An-
cile cœlo delapsum splendidè mendax Roma jactaverit.
Tu salutis publicæ pignus mirificum: tu victoriæ divi-
næ trophæum clarissimum; tu Radegundis in urbem
hanc beneficentiæ monimentum omni veneratione cul-
tuque dignissimum.

* S. Fortunari
Pictav. Episc.

Jam beneficia in egenos (privatane dicam, quæ viri-
tim singulis conferrentur, an publica quæ calamitoso-
rum innumeros greges comprehenderent?) quis non
consequi laudando, sed vel percensere possit numeran-
do? Nunquam illa facultatibus frui regiis sustinuit: sic
verò usa est, nihil ut ex omni fortunæ copiâ, nisi bene-
faciendi materiem usurparet. divisas opes in templa
atque in egenos, altera Dei templa, profundebat. spo-
liabat se aureis gemmatisque vestibus, quibus aras ex-
coleret. neque officiosè tantùm & humaniter homines
miseros (quanquam hac Radegundis curâ felices) sed
reverenter quoque, prorsus ut res sacras; nec modò
ut templa & simulacra, verum etiam ut membra Christi
habebat tractabatque: & majestatem cum ad humilli-
ma quæque obsequia dejiceret, sordidissimis ministeriis
augustâ pietate splendorem allinebat. Vel fœdissimis
morbis afflictos prolixè studiosèque fovens, abluabat
regiis manibus purulenta ulcera; faciebatque interdum

(id quod citra horrorem nec spectari tunc potuit ab Regina comitibus & ancillis, nec fortasse à vobis audiri poterit) ut elephantiacarum mulierum ora sanie taboque diffluentia exosculetur suavissimè. Tantam inter afferendum inopibus ægrisque subsidium ac solatium de se ipsa victoriam referebat !

Ecqua porro facundia benignitatem exequatur singularem, quæ captivis libertatem, tranquillitatem naufragantibus, ægris sanitatem, mortuis vitam restituit ? Quoties verò animos corporaque à Tartareo nexu acerbissimaque vexatione vindicavit ? & autoritate quidem tantâ, ut hospitem importunum tyrannumque superbissimum ac crudelissimum, insultans juguloque pedem imprimens, non facilius quàm imperiosius abigeret ; nocturnas infernorum monstrorum catervas, uno lustralis signi ductu trepidas & præcípites Ascetrij muro deturbaret.

Ea vis est magnetis, ut cum ipse arcanâ quadam illecebrâ ferrum attrahat ; tum quidlibet ex ipsius affrictu potestatem eandem in obsequens metallum exerceat. Regina sanctissimæ virtus sanitatem bonaque accersabat omnia simul & mala refutabat arcebatque longissimè ; ac rebus etiam vilissimis eam dotem affundebat, ut quidquid ab Radegunde fuisset contactum, adversus omnes casus humanos instar Alexipharmaci obtineret. Vivit adhuc vigetque vis illa in Tumulo planè Thaumaturgo ; ad quem non hæc modò civitas, sed ipsa suis propè sedibus convulsa provincia ; cuncta, citius dixero, Francia confluit, Misericordiæ aram Atheniensi indulgentiorem prenfatura.

Gestit oratio jamdiu, Auditores, ad ea venire quæ novitate alliciunt oculos, animum rapiunt majestate. Obversantur Corda Principum auro expressa, pij amoris & symbola & pignora ; Serenissimi Delphini jam tunc in cœlestem clientelam dati speciosissima effigies ;

Immortalis Victimæ stata quotannis gemina maximo cum apparatu litatio ; Divæ Reginæ marmoreum ingentis pretii simulacrum. hæc videlicet regalem Christianissimamque pietatem explicant Ludovici , Annæ , Mariæ-Teresiæ.

Vos, vos altaria vetustissima sanctissimaque, appello, quæ toties augusta capita vobis submissa & venerabunda aspexistis ! vos , illustria æternaque obtestor monumenta , quæ initiatis celeberrimo Radegundis Sepulcro Sodalibus adscripta consignataque tanta nomina posteritati ostendetis ! Vos maximè appello , Auditores, qui, siye turbulentis temporibus urbi fidissimæ immorante , siye ultro citroque commeante Principe spectaculum pulcherrimum regalis in Beatissimam Regnam observantiæ , frequentiâ vestrâ studiisque celebrastis. Et adest, non juris quàm Justitiæ consultior ; nec magis in foro quàm in templo, inter liliata subsellia quàm inter aras & delubra, Regiarum Actor causarum, idemque Radegundis & Cultor & Scriptor clarissimus.

III. V. Joan.
Fillæus.

Norat, Auditores, Ludovicus, non hanc modò urbem variis temporibus, obsessam, proditam, occupatam, & à Britannis hostibus. & à Calvinianis perduellibus sanctæ Reginæ ope assertam; sed Galliam universam à transmarinæ gentis imperio, aut funesto veriùs latrocinio purgatam ; cum pridie idus Augusti, quo die festæ Radegundi lucis celebritas initur, Cæsaris - Burgo totâque adeò Neustria Angli exceßerint. Quare in eum ipsum diem Carolus ille Victor Franciæque Restaurator solennem indixit Pictaviensi civitati pompam & supplicationem, ut eodem tempore, & sanctæ Principis in cœlum, & Anglorum in suam insulam discessus è Francia recolatur.

Audierat Adeodati Mater, laudatissima Regina, palmarium hoc liberatæ receptæque Galliæ beneficium à

Caroli VII. uxore, lectissima fœmina, piè agnitum; & quoad vixit, inextinctæ ad Radegundæam cryptam facis testimonio declaratum. Sed cui post funus suum alendæ luci sumptus constituere tunc Regina non potuerat, eam fouere Anna instituit Austriaca; Mariæ Andinæ in voluntatem ac liberalitatem nunquam intermoriturâ religione successit.

Quid, quod benignam sibi propriè munificamque cum optima Parente Rex invictissimus agnoscit? sanitatem Reipublicæ saluti panè fatalem, uterque sibi è periculosissimis morbis restitutam illi se debere profiteretur: civilem Pacem atque externam; Nuptias & Delphinum Galliæ spem ac delicias, ambo cum Maria-Teresia Regis maximi Conjuge dignissima, ut amore, sic pietate concordēs Principes Radegundi gratulantur. Nec desunt sibi Serenissimi Aurelianensium Duces, quin eandem sibi Patronam adoptent, ut uno tota Regia præsidio & quodam Majestatis numine contineatur.

Sic lumen istud ac præsidium ab Aula suscepisti, Pictonum Augusta Metropolis; auctius cumulativisque Aulæ reddidisti. O te felicem in primis, quæ à sapientissimo Rege conquistam olim Mulierem invenisti Fortissimam, animi celsitate propemodùm singularem; quæ Reginam, Regum Patronam, in Principes populosque Beneficentissimam tuis sedibus excepisti!

Suas hîc Pyramidas Ægyptus deprimat, suum Cælia Mausolæum abjiciat; Regum ambitiosa conditoria, orbisque terræ miracula. Quid enim tandem insanæ substructionum illæ moles, improbi laboris sumptusque infiniti monumenta? quantumvis extimâ specie niteant; quamlibet fucatis, gypſatis, conditisque funerum sordibus, funeribus tamen impiorum Principum squallida, & horrenda magis quàm admiranda monumenta. Hîc sensum afflat suavissimum pietatis & venerationis se-

pulcrum planè *gloriosum* Regij corporis , non balsamo ceteroque superbiæ funebris apparatu ; sed immortalī virtutis honore incorrupti ; miraculorum fons perennis & inexhaustus. Nec tam ubertim lampas , ab Rade- gunde Cruci divinæ accensa , oleo succrescente redun- davit ; quàm salutiferum hoc monumentum commise- rationis perpetuâ , ut ita dicam , exundatione circum- quaque diffluit.

Animadvertite , quæso , Auditores , quàm præclare si- bi Radegundis consuluerit , cum à sole in umbram tran- siit ; ab aulâ in Asceterium profugit ; rerum terrenarum excussis projectisque sarcinis , & præstigiis voluptatum , ad Crucis amplexum evolavit.

Vitam egisses tu quidem omnibus copiis abundantem & multis invidendam , Regina , si fortunæ tuæ te per- misisses : sed brevi formam , honorem , luxum extinxis- set gravis & invisa mors. tum eodem tumulo , quo de- forme ac tetrum cadaver fuisset contestum , memoria quoque tui , aut certè observatio , itidem ut reliquarum illius sortis Matronarum , obruta jacuisset. Nunc il- lustrior ex recessu , ex demissione sublimior , omnium in te admirationem laudesque convertisti , sanctissima Heroïna.

Pro fragili & caducâ venustate quam neglexeras , omniſque corporis afflictatione attriveras , oris dignita- tem humanâ præstantiorem & quæ gloriosam spiraret Anastasin , in morte atque in tumulo aperto explicasti. Solio exscenderas ; altaria meruisti. Galliæ imperio cum religiosâ servitute commutato , Antistitæ quoque ab- dicato munere , in ordinem te gregemque redegeras : numeras in clientibus Reges ; & quæ pulverem ady- torum abstergere purpura tua gaudebas , Ludovici Reginarumque supplicem purpuram adsterni sæpe tuis altaribus , mancipari sceptrâ , appendi corda vidisti.

Pio te divortio à mortali Principe sejunxeras ; Spon-

sum adepta es Regum Imperatorem Deum, ejus te
 amantissimè invisentis vestigium, cubiculi tui saxo im-
 pressum, hodieque veneramur. Coronam deposueras
 baccis unionibusque micantem; ad *Christi diadema*
 * pervenisti, rerum omnium caput *gemma* fideribus cla-
 rior exornasti.

* Ex ipso
 Christi, appa-
 rentis Rade-
 gundi, effato.

Perge, Tutelaris ac Patrona Beatissima, ex arce ista
 & fastigio lucem Beneficentiæ tuæ in omnem partem
 effundere: Principes populosque tibi, cultuique tuo
 arctius in dies novis donis adstringe: Galliam univer-
 sam, sed hanc maximè urbem, virtutis ac munificentiae
 tuæ sedem, quam sæpè servasti, æterno patrocínio in-
 columem florentemque complectere.

Tum verò his laudum tuarum studiosissimis Audi-
 toribus, quas habeo nec agere pro merito ac voluntate
 possum, gratias refer, fructus expromptæ in te pietatis,
 in Oratorem tuum benignitatis. Et hanc tenuitatem
 officij mei, cum accenseri Regales aras convestienti-
 bus ornamentis verba non debeant, sic tanquam epi-
 graphen marmoreis aureisque donis subjunctam ad-
 mitte, Religionis in te meæ votique non irriti argu-
 mentum.

INCLYTO HEROI
NICOLAO
 COMITI SERINO,
 TURCARUM TERRORI,
 FUNEBRIS PANEGYRICUS

AN. M. DC. LXV.

HEROEM celeberrimum, cujus acerbissimum funus publico luctu Christiani, Barbari festis ignibus prosecuti sunt, factorum gloria immortalem produco ex ultimis Pannoniæ oris in hunc cœtum amplissimum, confessumque vestrum, Auditores lectissimis; externum hominem, sed commune Christianæ Reipublicæ decus & ornamentum. Habent peregrina admirabilitatem: vultus alienigenarum habitusque diligentius intuemur, quàm popularium; &, quæ Franciæ laus est, hospites humanitate complectimur singulari. Quod si virtutem vel in hoste dignam laude judicamus; quis meum de fortissimi Viri clarissimique Imperatoris laudatione consilium improbarit, ut non continuo virtutis præconio invidere videatur? Præsertim cum is fuerit in magno Serino amor, ea Gallici nominis existimatio, ut Gallorum auxiliares copias unice expetierit: quibus si fuisset instructus atque armatus, jam sibi nec Turcarum vim & impressionem reformidandam, neque aliarum præterea gentium subsidia requirenda sentiebat.

Accedit autoritas, quanta potest esse maxima, præ-

dicandæ fortitudinis illius heroicæ , Regum idem maximus & sapientissimus , unusque ex omnibus rerum præclarè gestarum Censor ac Judex spectatissimus ; qui non honorificentissimis modò verbis expeditiones , pugnas, victorias præstantissimi Ducis in Aula jactavit, verùm etiam transmissis insignibus donis ac splendidiore omnibus præmiis gratulatione decoravit. Felicem planè Ducem, ac fortunatiorem eximio tanti Principis testimonio atque elogio, quàm si tota in plausum & acclamationem effusa theatra circumsonarent ! Quid igitur mihi, Auditores, speciosius ad dicendum contingere potuit, quàm ut interpretem augustissimi geram oraculi ? quod vobis acroama jucundius, quàm si Ludovicæ voci, velut imago, in hoc Regali Athenæo mea resonet oratio ? quid opportunius denique facere licuit, quàm ut hoc * funebri die funebrem instituam Panegyricum ? neque justo seriore, cùm hic primus ab illo casu funestissimo agendi locus datus sit, gratique in publicum rei Christianæ propugnatorem animi contestandi.

* Solenni defuncti, commemor.

Honorem inesse lacrymis & voluptatem, vetus est pronunciatum. Ego verò non squallore, non planctu & lamentatione summo Imperatori justa persolvenda duxerim, sed apparatu longè pulcherrimo ac triumphali. Fingite vobis animo, Auditores, distinctam hanc aulam signis & vexillis militaribus, quæ crebrâ valideque præliorum contentione Turcis eripuit Serinus: trophæa vobis illa, quibus Croatiam Hungariamque illustravit, proponite : concentum illum Europæ atque Asiæ, quo Vir bellicosissimus & multarum palmarum Imperator exornatur, cogitatione gratissimâ usurpate: dum ipse pro meâ tenuitate laudes persequar Herois invictissimi, de Religione, de Imperio egregiè magnificèque promeriti; Christianorum omnium & Principum & Populorum admiratione encomiisque celebrati.

Sed antequam ad excelsas exaggeratasque Serini virtutes aggredior; quibus quamque generosis radicibus ea bellicis in rebus decora nixa atque excitata sint, indicabo. Equidem, si nihil esset aliud in Serinorum stirpe ac fastis commemorabile, quàm splendor nobilitatis, ditionis amplitudo; facilè morem Oratorum atque institutum omitterem de genere illius, cujus exornationem susceperint, differendi; neque in tantâ singularium laudum copiâ communibus & usitatis immorarer. At enim cùm Serinus ejusmodi sit ortus Majoribus, ut hereditariâ fortitudine Terror Barbarorum extiterit; non committam, ut laureatæ imagines honestandæ exequiarum pompæ defuisse videantur. Tametsi nec omnia producenda mihi arbitror Avorum simulacra, ne diutiùs oculos vestros longa series occupet triumphalium virorum. Specimen edam totius gentis; unumque vobis, unde conjecturam de ceteris capiat, exhibebo Nicolaum Serinum, quem hic noster Avum & nomine & animo & omni virtutum genere prorsus retulit atque exscripsit. Ac ne illius quidem laudatissimi, & omnium gentium, omnium literarum monumentis ornatissimi Herois dignitates, imperia, vitam martiis operibus contextam evolvere: supremum actum duntaxat propono, mortem quâ memoriam sibi gloriamque peperit sempiternam.

Solimanus, longâ jam octoginta ferme annorum ætate in Christianorum direptionibus exercitâ; tot Principum cladibus, tot regnorum excidiis nobilitatus; integrâ viridique senectute acerrimus, Sigetho Pannoniæ oppido supra ducenta armatorum millia admoverat. Locum infidebat munitissimum Serinus; at ipsâ munitorum varietate & multitudine debilitatum ob exiguam manum prædiorum militum; qui omnino trecenti supra duo millia, in duas urbes, totidem arces divisi ac dispersi, nullâ ex parte sufficerent, nisi unus

maximi validissimique instar præsidij Serinus præfectus obtineret. Hic ego quid molitiones, aggeres, cuniculos, impetus Barbarorum exequar? cum prætorianos Turcas urgeret imperiosa atrocis Sultani præsentia; cum propugnacula cæcis laboribus suffossa corruerent; cum innumerabilium immanissimorumque tormentorum assidua explosio mœnia labefactaret, turres excuteret, tecta disjiceret. Sileo pulcherrimum jusjurandum, quo se Præfectus suosque ante obsidionem religiosè obstrinxerat; prudentiæ scientiæque militaris instituta, quibus urbem civitatemque munierat; præsentissimum animum, quo se periculis objecerat, & concidentibus saxis aditum ferro obstruxerat. Compendio rem transigo: ad quindecim assultus lectissimarum ex universâ Turciâ copiarum sustinuit; & quidem interdum ad ipsas quatuor & viginti continentes horas, dum ex immenso exercitu subinde aliis alij, defessis recentes, faucis integri succederent: ad triginta hostium millia inter propugnationem, in iisque Bassas quatuor cecidit; eò Solimanum adegit, ut ægritudine animi veriùs quàm corporis morbo consumptus obsidioni immoreretur.

Verùm eâ morte à Mahomete purpurato vaferrimè celatâ, ut nulla ejus vestigia extarent in castris; ut ne tenuissima quidem tanti casus aura domesticos afflaret, nedum ad hostes emanaret: numero obrutus Serinus, qui duo propugnatorum millia ducentis oppugnantium millibus opponeret; inflammatâ novâ primùm urbe, veterem diu servavit; veteri urbe disturbatâ, arcem majorem eatenus retinuit, viris ignibusque pertinacissimè obluçtatus, donec incenso propugnaculo infinita vis flammæ conspirantibus ventis ad sulfurati pulveris acervos pervenisset. Tum demum ad interiorem arcem extremasque rerum angustias contrusum; annonâ, machinis, militibus, loco denique ad repugnandum, ad

consistendum absumptis, foedissimè grassante penitusque omnia depascente incendio; quid consilij cepisse suspicamini, Auditores? fugam esse meditatum, ubi nihil esset reliquum fortitudini? deditionem cogitasse? aut (quod maximum à probatissimo Duce expectari possit) omnibus armis instructum, in medias hostium acies sese immisisse, necessitate furem, desperatione præcipitem? Nihil egit trepidè, inconsultè nihil: mortem ratione digessit; ad decus, egressum è vitâ Sigethoque composuit.

Jam inde à primo designatæ obsidionis rumore, ad victoriam aut necem paratus; posteaquàm urbem geminam, arcem utramque, dum stetere, tutatus est, eorum se ruinis jacentium involvere statuit: neque arma ad repellendam mortem, sed telum ad inferendam deligit. Triumpho se accingere credideris: sic ad splendorem excultus; galero ardeatinis pennis adamantibusque insignito pro galeâ, paludamento pro thorace ornatus; claves arcis sinu conditas ad ultimum vitæ spiritum servaturus, erumpit cum aliquot nobilium, frequentissimis cruentisque dimicationibus superstitum, globo; exoneratis interim, quæ restabant, minoribus bombardis ad opportunitatem eruptionis stragemque Barbarorum. Præeunte signo Cæsareo progreditur in pontem, devotus non Diis Manibus, sed vero æternoque, cujus piè magnificèque nomen inclamavit, Servatoris hominum ac Vindicis numini. Gladio inter confertos & undique prementes Janissaros rem ita per dimidiam horam gerit, ut obstupefacti fortitudinis miraculo hostes ultrò ad deditionem invitarent. Quid plura? vivus in Tûrcarum manus venire non sustinet: gloriosissimis in adverso pectore & capite exceptis vulneribus occumbit; ingens omnibus urbium obsessarum præfectis exemplum ac documentum.

At enim sibi propriè unicèque natum ac propositum

exemplum hoc domesticum semper arbitratus est noster hic Serinus, Auditores. In Avi simulacrum & imaginem, ut speculum, intento erectoque animo intueri solitus, ad ejus quàm-proximam similitudinem vitæ suæ rationes exegit; neque tam sanguinis, quam heroicæ virtutis communionem vindicavit. Et verò sic Avum Nepos dignissimus exprimere amavit, ut vel habitu referret; eoque maximè cultu corporis & ornatu, quo mortem illum suam honestasse jam audistis, splendidus in aulâ Viennensi apud Cæsarem versaretur. Id enim ab oculato locupletissimoque teste accepi; Dynasten qui bellico pulvere sordescere pariter ac decorari gauderet, nitidum eundem atque elegantem in palatio; virili tamen & imperatorio quodam luxu, non ad molitiam & delicias, sed ad magnificentiam & pompæ speciem triumphalis. Eminebat, inquit, serico pileolo ardeatinarum pennarum fasciculus, ex adamantinâ palâ in modum cristæ assurgens: vestis, pro gentis more, fluxa & pretiosa, cui acinaces incumberet aureâ catenâ suspensus. Prorsus ut, qui fortitudine parem in acie haberet neminem, in Purpuratorum cohorte unus omnes formæ amictusque dignitate facilè superaret, nec sine terrore aliquo voluptatem offerret spectantibus.

Quàm acris memoria in optimi Nepotis pectore viveret ac vigeret æmulandi Serini majoris; quàm altè infixi stimuli animum incitarent ad ejus sequenda vestigia honorisque curriculum emetiendum; testis illa planè magnifica vox, quam reddidit Augusto amicè monenti, sibi ut maturè caveret consuleretque, si fortè à Barbaris in suâ arce circumfideretur. Negavit Dux præstantissimus, qui se non sibi, sed reipublicæ natum existimaret, alio se tumulto quàm versis in ipsum mœnibus obtegendum: ita Majorum exemplis admoneri, ut sanguinem suum ad muri labem pro patriâ & Religione profunderet. Quare non est, Auditores, quòd me

quisquam temere in præclaræ necis commemoratione nimium censeat ; longiusque , nec sentientem fortasse , ipsâ rei admiratione provectum. Nam cùm eam partem laudationis , quæ petitur à Progenitorum virtute & gloriâ , quamque latissimè crebri persequuntur Oratores , universam in unius hominis factum famamque contulerim : tum præterquàm quòd ea laude strictim cursimque defunctus sum , istiusmodi virum ac virtutem exposui , unde tanquam ex pulcherrimo fonte laudes posterioris hujus Nicolai Serini uberrimæ profluerent , ac reliqua sese diffunderet oratio.

Num verò , dum Sigethanam propugnationem & palmaria invictissimi Præfecti facinora adversùs Solimanum oculis vestris subjicerem ; cuipiam vestrùm , Auditores , subiit verè , ut satis expectationem avitæque fortitudinis dignitatem nepos quamvis egregius sustinere possit ? Adeste securis animis , & aliquid auditis non inferius accipite. Sigethum superior ille Serinus propugnavit ; hic expugnavit : ille Solimani vitam extinxit ; hic mausolæum ejus superbissimum diruit. Quam urbem totis adortus viribus potentissimus Imperator , infirmam præsidio , iniquâ tempestate pæne proditam , cùm exsiccataë fervoribus æstivis paludes facilem ad muros aditum præberent , expugnare tamen per diu non valuit ; sed bimestri oppugnatione attritus , incepti tædio ac desperatione extabuit : eam junior Serinus , jam rebus omnibus instructissimam , cùm novam , tum veterem urbem , difficillimo anni tempore ; paucis ac tumultuariò collectis copiis invasit , occupavit , diripuit. Divinâ certè providentiâ factum est , ut quasi ex ossibus Avi & cineribus exortus ultor , cladem Barbaris post nonagesimum annum rependeret ; cenotaphiumque infestissimi Christianis sacris Tyranni ac trophæum de Pannonicis cladibus & ruinis erectum funditus exscinderet.

Age sanè, jacta ceteræ laudationis semina colligamus : cumque jam in Arce, in Ponte ac strage Turcarum defixa ad immortalitatem monimenta spectaverimus ; quid simile, quid comparandum in Heroë nostro animadvertimus ?

Seriniam quidem Arcem qui nesciat, hospitem esse in Europa, ne dicam in orbe terrarum, oporteat. Hoc illud Pannoniæ validissimum propugnaculum, Turcicæ potentiae ac tyrannidis frænum, hostium acervatis spoliis opulentum, conditoris nomine celebratissimum, quis satis pro merito commendarit ? Quam arcem primum suscipere ac moliri propè à Canita ad coërcendas Barbarorum excursiones, cujus vel consilij vel magnitudinis animi fuit ? substruere in media insula, loco palustri & stagnantibus aquis ferè invio & inaccessio, cujus artis & prudentiæ ? Tantam efficere, quantam nulla vis hostium diu aut invadere ausa sit, aut concutere potuerit ; cujus peritiæ dicam, an magnificentiae ? attentatam interdum & subito incursum oppugnatam, disjectis profligatisque Turcarum copiis, solvere metu, periculo liberare ; cujus virtutis & vigilantiae fuisse prædicare ? Tantane unius hominis privati vis, opum tanta profusio ; ut sua sponte, suis impendiis arcem operosam designarit, munierit aggeribus, machinis instruxerit, ornarit com meatu ; totam Barbariem armatam, effervescentem in Romanum Imperium atque erumpentem, cervicibus interclusam suis sustinuerit ac propulsarit ?

Graviter omnino tulit Sultanus id sibi objectum claustrum : & qui summos Christianorum Principes haberet ludibrio, ac liberè in omnem partem vagari omnique vastitatis genere sævire soleret ; sibi à Comite præfixas imperij metas, scopulumque ad æstum insanæ ambitionis retundendum. Quid, quod ex arce illa in Othomanorum fines atque adeo in Turcicarum provinciarum

ciarum finium penitus irrumpere, populationisque fructus amplissimos eo Serinum convehere, nec ferre poterat, nec prohibere? Inde minaces illæ denunciationes, expostulationesque armatæ. in Augustum pariter atque in Serinum, (quæ ipsi conjunctio gloriosissima extitit) ore furibundo intonabat. inde, cum ageretur de pace, illud in primis expetitur, Serinia ut arx deleteretur. Sentientes injecto fræno urgeri ferocitatem, ac compressam oblectantemque huc atque illuc se torquere & impatientissimè agitare. Ubi conditiones istiusmodi surdiùs audiuntur, immittitur exercitus, qui captatâ Serini absentiam invisam arcem adoriatur. Sed, ecce tibi, audito adventu hostium, repente ingenti voratâ viâ incitatissimo cursu Dynastes advolat: ipsoque accessu sic percellit, sic de omni statu dejicit formidabiles copias, vix ut se venisset, ac videndo vicisset potuerit gloriari.

Hic audire mihi quempiam videor obstrepentem: quam tu arcem canis & venditas, quæ tormentorum vi lacerata, cuniculis subruta & convulsa, certè nulla est? capta, expilata, ferro flammæque dissipata evanuit. Quasi verò sit aliqua humanorum operum tanta firmitas, quæ non manibus humanis armorumque viribus infringi conficique possit. Quin ipse, quisquis obloqueris, fatum arcis excidiumque diligentius consideras? agnosces profectò ex ruinâ magnitudinem; & Seriniam Arcem sic esse disjectam excisamque à Barbaris, ut ad Autoris Dominique laudem adhuc integra stet, consecuturisque porro ætatibus constituta sit, nullâ temporum, nullâ hostium injuriâ & labe imminuta. Quis enim arcem, & quâ maximè viâ expugnavit? Primarius imperij Administer Othomanici, qui eo Christianorum vallo everso prædarumque ex Turcis receptaculo, longissimæ atque operosissimæ fructum expeditionis cepisset sibi visus est, avidissimoque talium nuntiorum Sultano Musulmanici probrium nominis limi-

temque sublatum imperij gratulatus.

* Barone d'A-
vaugour.

Gentiles Croatarum copias interim ducebat Serinus; arcis custodiæ præfecto (ut intelligas, quanti Gallicam virtutem ac solertiam fecerit) homine Gallo, * nobili expertoque Duce. ipse, quando nulla permittebatur iusti pralij facultas, in omnem carpendi agminis Turcici occasionem intentus atque imminens, Muræ fluminis trajectu hostes prohibebat; multas armorum suorum & corporis objectu provincias tuebatur. nec tamen deerat suis in arce ab infinito Turcarum exercitu circumfusus : opem ferebat laborantibus : arcem ingressus, semel lunato munimento potitos Barbaros plurimâ cum strage deturbavit. Jam certissimum dedecus, præsentissimum exitium capiti suo impendere sentiebat Turca Polemarchus; acinacemque illum gemmis insignem, anceps munus & terrificum ab Sultano missum, si parum feliciter dextræque tractasset, cervicibus se excepturum. Itaque summam impressionem comparat; &, antè sauciato graviter arcis præfecto, atque in proxima Christianorum castra deportato (brevi post extincto) promovet nubilo tectas copias; admotisque scalis, furentes strictis gladiis prætorianos in arcem immittit, panè superato priùs muro, quàm vel ascendere, vel aliquid meditari, sive à præsidiariis militibus, sive à vicino Cæsarianorum exercitu adverterentur.

O caliginosum, atrâque notâ dignissimum diem; nec magis Dynastæ fortissimo, quàm universæ Croatia, Hungariæ, Germaniæ perniciosum ! Quid primùm conquerar ? quos potissimum accusem ? quò castri ad annuam obsidionem tolerandam omni copiâ instructissimi, reipublicæ Christianæ tam salutaris, tam necessarij, non diutiùs retenti ac defensi rationem & culpam, quæ nulla in Serinum cadere potest, quò conferam, Auditores ? Repentino atque improvise oppugnantium cominus Janissarorum aspectu perculsi & panicis qui-

busdam acti custodes, non pugnam, sed fugam cogitarunt : ipsaque trepidatione præcluso effugio, pœnas ignaviæ quas Serino debebant, hostibus dederunt.

Equidem alias scio ad Cæsarem perlatas querelas : & suspicaces malignique consiliorum interpretes, de illo belli nodo ac morâ quid subodorentur, haud ignoro. Utinam licuisset, Auditores, optanti Serino imperum in castra hostium facere ! non spiritus illos Martios, non oculorum ardentium conjectum, non vocis Imperatoris terrorem, non dextræ fulmina Barbari sustinissent. Atenim negata sunt, quæ firmando Croatarum suorum agmini expetebat tria duntaxat millia, cum Franci nondum advenissent, Germanorum. Quod si adfuisset flos ille delectus Galliæ ; quid iis adjunctis non effecisset, cum illos animos, artem illam vimque adhiberent, quibus subinde ad Arrabonem fluvium planè fractum est robur hostilis exercitus ? Non arcem unam modò, sed, fuscis ac fugatis Europæ atque Asiæ copiis, totam quàm latè patet, Pannoniam ab importunissima teterrimaque servitute liberasset. Verumtamen Cæsariani exercitus Prætori venia danda, quod expetitas cohortes roganti tradere ad oppugnationem castrorum recusavit : laus tribuenda, quod Augusti stetit mandatis, neque ullâ se ratione abduci passus est à præscripta lege disciplinaque militari. Multa vererî coguntur ii, quibus summa commissâ est reipublicæ ; ancipites præliorum exitus, cladi connexam ignominiam & calamitatem, urbium expugnationes, direptiones provinciarum. Prudentius nimirum est timere, quàm sperare. Habenda est Principibus in consilio fortuna publica : damno aliquo, gravioris detrimenti periculum aliquando redimendum.

Atque ut illud etiam attingam, quod re ac tempore conjunctum est (nihil enim est in Serini vita factisque dissimulandum) solutam Canisæ obsidionem quis au-

deat reprehendere: id quod & necessitas imperavit; & si quid est vitio dandum, totum est fortunæ peccatum. Neque enim temerariæ illi (si licet cum profanis loqui) eventuum dominæ ita cum Virtute convenit, ut non assiduè consiliis ejus cœptisque infidietur, ac quidquid potuerit, de gloria decerpat. Non tamen suspensas ex illa Virtus suas rationes habet; apta est ex sese: felicitatem præstare non potest; industriam, vim, constantiam præstat. Ecquam igitur partem omisit Serinus bellicarum artium? quâ providentiâ, quâ celeritate omnia circumquaque populatus, Canisæ oppugnationi incubuit! Jam olim exustis suburbiis proluserat; atque hinc palustribus aquis, illinc artefactis ignibus eluvionem atque incendium pariter urbi immiserat. Quâ constantiâ labori institit; cùm è quatuor strenuis Comitibus, simul arcem obsidentibus, unus acerrimè suos promoverit, dum iniquo & palustri loco in multam noctem fossis insisteret; mediisque militem inter & ducem, testis idem actorque operam non magis exigeret auctoritate, quàm exemplo intenderet! Eo denique civitatem adduxerat, ut suffossis undique mœnibus & propugnaculis ultimum desperationi solatium Canisensis Præfectus appararet, cuniculorum incendiario pulvere se suaque consumpturus.

Canisam cùm dico, Auditores, urbem dico firmissimum Imperij. Turcici adversus Hungaros Germanosque munimentum & armamentarium: cujus liberationem usque adeo cordi habuit summus Othomanicorum exercituum Prætor, ut omnia ejus causâ in discrimen se daturum pollicitus, vires omnes ad perrumpenda Christianorum castra nec munitissima contraxerit. Id quidem sapientissimè caverat, majori etiam fortitudine egerat Serinus, ut pontem Essexianum abrumperet ad Barbarorum impetus retardandos. Auditâ collectorum hostium famâ, castris excurrrens ipsemet omnia recogno-

vit, impendenti malo occursurus : quidquid usquam hostile reperit, discussit ac pessumdedit. At verò postmodum aut minus fidi aut parum seduli Cursores, dum urgetur obsidio, Ismaëlis Bassæ cum immensis copiis adventum non antè renunciant, quàm is proximè à Christianorum castris abesset. Deus immortalis, quæ viri fortis ac sapientis illa conflictatio fuit ! quam acris asperaque virtutum inter se, non pugna quidem, sed agitatio atque in varias partes distractio ! cum hinc Fortitudo hosti cedere non sustineret ; illinc Prudentia cum paucis agminibus effusam illam cunctæ Barbariæ tempestatem expectare omnino prohiberet ! Cessit demum Fortitudo Prudentiæ, sine qua non Fortitudo, sed temeritas fuerit ; seque ad æquiorem locum & Christianæ Reipublicæ commoda reservavit.

Alia prætereo consulto, Auditores, quæ ipsi me silente intelligitis : cum essent quatuor pari potestate Duces, quàm impedita esset obsidio. Illud quidem usu venit in re bellica multis Præfectis credita, ut pares inter æmulosque haud minor sententiarum inter se, quàm cum hostibus, armorum, existat contentio. Atque ut invidia prætermittam ; auxiliorum certè ab Ordinibus Imperij submissorum difficultas & cunctatio expectatione Serini, qui successum obsidionis in festinatione repositum habebat, fefellerunt.

Commodiùs dixerit aliquis fortasse ac speciosiùs ; non Martem illum communem, non Fortunam plurimum in re bellica potentem ; sed unicum belli præsidem ac moderatorem Deum, cujus maximè gloria in altissimorum capitum dejectione triumphet, victoriam naturæ ferocem castigare ac reprimere infelici casu voluisse. Et quidem in tanto rerum secundarum impetu perpetuaque triumphorum serie, quis admonendum infirmitatis humanæ Serinum fuisse (ne felicitate nimia & quasi propria certaue vincendi facultate corrumperetur)

subsidij cœlestis necessitatem insigni exemplo perdō-
cendum quis facillè sibi non persuaserit?

At pius Imperator, veri solidique decoris appetens,
ab inani fastu insolentique elatione alienus, satis intel-
ligere se ostendit, unde manaret felicitas, unde victoria
descenderet; cùm suam in arcem redux ab ea, quam
mox persequar, felicissimâ excursionē, multiplicique
unius expeditionis victoriâ, solennes Deo Opt. Max.
gratias nulla interpositâ morâ venerabundus agere in-
stituit; unique omnem illam triumphorum segetem, cui
debuit, retulit acceptam. Æquiùs igitur, Auditores, con-
venientiusque asseram, immortalem Dominum, qui suos
explorare adversis atque acuere soleat, ingenti animo
partem deesse præcipuam victoriæ materiemque gloriæ
non sustinuisse; ut qui semper eatenus in rebus prospe-
ris & jure causæ & virtutis merito volitasset, ex altera
etiam fortuna sanctiorem Christianæ militiæ lauream
adeptus invicta patientiâ constantiaque triumpharet.

Num vobis, Auditores, in defendendo Serino labo-
rare videor, atque ab ignominia vindicando? Sed quò
summa denique recidit criminis & calumniæ? Discessit
ab arce, quæ vulgo inexpugnabilis haberetur, cùm eam
plurimis gravissimisque incommodis vexasset, ac tantùm
non diruisset. discessit, ingruente hostium insanâ vi, per-
tinaciùs inhærere obsidioni tum bellico Senatusconsulto,
tum paucitate militum & consternatione prohibi-
tus. Felix profectò Imperator, cui tandem ab iniquissi-
mis objici possit, non fœda fuga, sed providus fortis-
que instructâ acie receptus: non clades prælio accepta;
sed indefesso labore mirâque virtute affecta, defectu ac
tarditate auxiliorum imperfecta victoria. Hæc una belli
offensio, communis illi cum summis ætatum superiorū,
nostrorumque temporum Ducibus; ac sanè levior eâ,
quæ Archiduci Ferdinando sub hujus exordium seculi
contigerat, cùm hanc ipsam urbem magnis validisque

copiis esset aggressus, obsidionem solvere amissis tormentis & sarcinis coacto: hæc, inquam, una nec gravis offensio, nomen tanti viri non obscuravit; sed fortunati in omnibus, quæ propriis auspiciis liberaque potestate administraret, Imperatoris famam adversitate potius ipsâ collustravit. Majorem verò in modum receptus ille utilis accidit Reipublicæ; cùm, disposito ad Muræ oram agmine, Serinus Barbaros Stiria, Croatia, Carinthia vicinisque gentibus minantes ac vastitatem longè latèque importaturos coërcuit; & frustra tentato sæpe transitu, nec sine magna ipsorum clade, interclusit.

Qui me locus, Auditores, admonet, ut plura de celeberrima, cujus suprà mentionem intuli, Essexiana expeditione commemorem. Jactat suum antiquitas verbosa Coclitem Horatium: pontem illum, quem institit, amplissimum gloriæ campum ac theatrum ostentat. Magnū facinus! quis negat? Statorem hunc suum Roma, veriùs quàm Jovem, appellare potuit; qui labentem Rempublicam stitit, Hetruscorum ingruentes copias sistendo. Sed aude, miratrix veterum historia, pontem istum Sublicium cum Essexiano conferre; Thuscòs è Lydia profectos, cum Scythica Turcarum immanitate: brevem aliquam moram, adversis hostibus, dum à tergo pons revelleretur; cum acerrima dimicatione pontem invadentis, ferro ignique corrumpentis. Enimverò, sive pontis magnitudinem, sive usum consideremus, Auditores, jam vix decantatos illos Darij, Xerxis, Cæsaris, Trajani pontes, nedum Horatij, cum Essexiano comparandos necesse erit confiteri. Ac ne quis fortè rem à me nimium exaggerari verbis suspicetur; ex jis quæ pauca de molis hujus exædificatione & structura dicturus sum, opus totum æstimet ac metiatur.

Cùm properans ad Sigethanam obsidionem is qui se Regem Regum, Europæ Asiæque Dominum, terræ marisque Possessorem inscribere solitus erat, Hamsæ præ-

tori pontem imponendum insternendumque Dravo flumini mandasset : scribit ad Solimanum, strenuus alioqui vir & ingentium consiliorum administer idoneus ; pontem, per altissimum ac rapidissimum Dravum fluvium & refusas ab exundante Dravo paludes, nihilo facilius quam per ipsas nubes agi extruique posse : rem jam sæpè tentatam, semper aquarum violentiâ abruptam & disturbatam. Quid ad hæc superbissimus Tyrannus ? mantile ad Hamsam mittit, cujus in orâ mantilis legem aureis literis exararat fatalem ; nec verò jis mitiorem legibus, quas olim ab Atheniensi Dracone latas, sanguine perscriptas orator Demades affirmavit : jussa curet utique ; ni maturè ac tempori perfecerit, eodem illo mantili ad ejus quem pontis impatientem causabatur, fluvij ripam elisis faucibus suspendendus. Quid non audeat desperatio ? quid non labor improbus efficiat ? Tam imperiosa diraque denunciatione Hamsa perterritus juxta & incitatus, insanam substructionem totis viribus opibusque aggreditur, operarum quinque & viginti millibus ad ejusmodi molitionem adhibitis ; militum ac nobilium hominum vi simul cum plebeia multitudine opificumque catervis enixissimè in id operis incumbente. Ubi trabes tignaue altitudo fluminis ac rapacitas defigi non patitur, navigia validissimo inter se ferrearum catenarum nexu religata constituit : pontem denique instruit latitudine ad quatuordecim cubitos, longitudine ad plura milliaria porrectum.

Nec verò, ut incredibili celeritate perfectum, ita brevi dilapsum est stupendum Turcicæ potentia monimentum pariter atque instrumentum. Stetit operosa moles, non paucis diebus, ut veterum illi Persici Romanique pontes ; at solido sæculo, ab Othomanis summâ curâ diligentiaque conservata ; &, si quid interdum aut vetustate labefactatum esset, aut quasi fluctuum arietatione, restituta, interpolata & confirmata : stetit, quoad oppugnaretur à Serino.

Neque otiosus deinceps , quemadmodum ille in Danubio excitatus pons Trajani , & ad ostentationem propositus restitit. Quàm frequens , quàm , non dicam opportunus , sed planè Turcis necessarius hujus Essexiani pontis usus ad belli commercium , ad transmittendos in Pannoniam exercitus , ad commeatus invehendos , ad urbes provinciasque in officio continendas ! Quamobrem plurimo eum lectissimoque præsidio infederant , castellis obvallarant , firmarant repagulis ; omni munitorum ratione instructum , non ab injuria modò , sed à metu etiam injuriæ defendebāt. Adde quòd eò perveniri non poterat sine longissimo in hosticum procursu , sine insidiarum periculo , sine crebro in locis iniquissimis conflictu. Per continuas , nexasque alias ex aliis contentiones ad majus , periculum graviolemque contentionem veniendum.

Age nunc , inusitatâ quadam felicitate per tantum hostilis soli tractum incolumes Dux copias traduxerit ; commodè pontem oppugnarit , resciderit : quid tum ? quâ se viâ expediet ? quâ vi , quâ industriâ redditum explicabit ? per asperas semitas malignasque valles , per vastos saltus abruptosque montes , per tumentium restagnantiumque obices fluviorum & sexcenta incommoda remetiendum iter , atquè in singulos motus pro capite dimicandum. Christianis nulla certè fædior in Pannonia clades ; quàm ad Essexium contigerat ; cùm ornatissimum exercitum Barbari , & quidem incruentâ victoriâ (rem ante illud tempus nostris inexpertam) iniquitate locorum oppresserant. Miserandum in modum Ferdinandi milites circumventi , dissipati ; alij paludibus hausti limoque obruti , telis alij ad victorum satietatem concissi periere.

Adest , vices Deo mutante , adest qui labem illam Christiani nominis inveteratam atque inolitam sanguine hostium eluat ; trophæumque sibi in superiorum

AN. M. D.
XXXXVI

Ducum & Imperatorum sepulcris constituat. Ille, ille pons magnitudine immensus, munitione præsidioque invictus (cui reficiendo atque instaurando sex ipsos menses à Turcis impendendos fuisse narrant) à Serino abruptus & comminutus, perpetuum extabit ejus consilij sapientissimi, excursionis mirificæ, incredibilisque virtutis monumentum. Altæ illæ paludes & lubricæ oræ quæ oppugnantem non retardarunt, quæ cruore hostium redundarunt; quæ fragmentis fumantibus membrisque tantæ molis sparsæ, opertæ, obstructæ, immanis speciem naufragij misto inter aquas incendio retulerunt: montes illi, quos ultro citroque commean superavit; campi ac saltus, quos expeditissimè peragravit; fluvij, quos ne levissimo quidem accepto damno trajecit, imperatorias Serini virtutes mutæ ipsæ regiones prædicabunt. Et tanta quidem Essékianæ illius expeditionis fama gloriaque extitit; ut hanc nominatim Rex in victoriæ sinu genitus adultusque, nec tam Regiis insignibus quam triumphis augustus, illustri præconio commendare; & cum ipse pulcherrimum omnium sit exemplar, aulicæ tamen Nobilitati celebrem excursum ac receptum, victoriamque in paucis memorandam ultro ad æmulationem proponere admirationemque non dubitarit.

Reliquum est, ut passim editam stragem vastitatemque provinciis Turcarum illatam, ad implenda Herois nostri encomia, generatim obeamus. Date hanc mihi veniam, Auditores, ut quasi ad caput se reflectat oratio, eaque subnectat, quæ differre hæctenus coëgit ipsa rerum inter se implicatio.

Erat illud in more positum institutoque veterum Germanorum, si Tacito credimus, ut Duces ex virtute fumerent. Id adeò factum à Pannonibus est, ut bello instante barbarico Imperatorem sibi Nicolaum Serinum, non ex dignitate quâ eminebat generis, verùm ex singulari, quâ præcellebat virtute, communibus votis à

Cæsare impetrarent. Belli molem gravitatemque periculi, quam nullâ fatis oratione consequi atque explicare possim, verbo complectar, Auditores, si modò autorem belli, calamitatis fontem caputque Turcam dixerò. Ubi fatale hoc funestumque nomen aures vestras percussit; ecquid continuò immensam potentiam, quæ Asiam, Europam, Africam uno imperio devinxerit, barbariem omni immanitate teterrimam, & inexpiabili ac plusquam hostili in Christianos odio bacchantem, cogitatione informastis? Hic ille prædo regnorum & insatiabilis helluo, magnâ jam parte devoratâ terrarum, avidius orbi reliquo inhians; cum Daciam jamdiu spe ac designatione occupasset, in eam demortuo mutatoque subinde Regulo, sic tanquam in caducam & vacuam hereditatem involarat. Jam arce Varadinâ & Nehusaliâ, velut januâ effractâ revulsâque, minis, terroribus, populatioribus omnia miscebat. ferale Othomanorum signum Adrianopoli fuerat elatum Mahometico ac detestando ritu, fanaticisque in Christianos diris intortis. fervebant insani apparatus; influebant in Pannoniam innumera- biles copiæ: tormentorum omnisque generis machinarû tractu ingemiscebant flumina, campi contremiscebant.

Magnum, usqueeò formidolosus temporibus, fuit, ductum exercitûs, nec numero militum, neque comiteatû fatis instructi, adversus potentissimum Barbarum non recusare. Quid Serinus? ita bellicum suscepit magistratum & imperium, ut, inter obligandam Cæsari fidem, omnem curam adhibiturum se sponderit, ut Magni Veziri caput ad Augusti pedes reportaret. Nec verò magnificentius dixit, quàm acturus fuerit; dedisset modò se ille in discrimen, & manus cum Serino ausus fuisset conferre. Eandem profectò vim sensisset, quam expertus alias Bassa fuerat adornatæ Seriniam in arcem expeditionis ductor, fatali Comitissæ invictissimi dextrâ prostratus, vidisset opimis spoliis ovantem Serinum

Vienna ; & caput belli , ab emerito Duce amputatum ,
plausu tota fuisset Pannonia profecuta.

Sui securus, ne quâ parte timori esset obnoxius, uxorem liberosque in sinum deponit ejus Reipublicæ , quicum societatem consiliorum bellique in Turcas fœdus conjunxisset. quæ quidem tanti Viri pignora summo cum honore apud Venetos habita , nec sine amplissimis donis ac muneribus postea sunt remissa. Tum fortissimus Imperator eâ curâ solutus , totusque in publicam Christianorum causam incumbens, id etiam piè splendideque excogitavit , ut solenni jurejurando sese ad aras obstringeret ; præsentique, cui præliaturus erat Deo , planè devoveret.

Machab. l. II.
c. xv.

Eant nunc Romani Decij , ridiculis juxta & impiis ceremoniis ac superstitionibus execrati veriùs quam consecrati. Hic supremo Imperatori & Præsidi victoriarum Deo sacramentum coram sanctissimo Eucharistia mysterio dicit : inde animos, inde vires accipit , & largissima stipendia. Ac si Judæ illi Machabæo visus olim fuit Vates gloriosissimus, sanctum gladium , munus à Deo porrigere, quo gladio adversarios dejiceret Israël ; ecquid novo Heroi , pro aris pugnaturus, ex aris arma suppeditata creditis, Auditores, quibus hostes capitales Christianæ Religionis caderet ac profligaret; pios jampridem crudelissimè vexatos & graviora passuros regeret ac vindicaret; *Dei præsentia magnificè delectatus*. Deo duce & comite cunctis humanis viribus superior ?

Majore profectò quadam vi præditum & animatum esse oportuit, qui tanta non modò supra spem gerendorum, sed ultra gestorum fidem præstiterit. Parum illi fuit hosticos limites perrumpere : in Othomanicarum provinciarum sinum ac gremium penetravit. sua in Barbaros exempla convertit sævitie necessariâ : Quinqueecclesiensem urbem amplam & opulentam , quæ simulatâ deditione turmam è Serinianis interceperat , exulsi :

vastitatem ad quadraginta leucas Sigetho & Canisæ circumtulit. Tardior est mea Serini progressu oratio. agmen non ducit ; sed rapit : neque ille cursus est victoriæ , sed volatus.

Ut assiduas Turcis Tartarisque ab summo Duce illas passim clades omittam ; una instar omnium expeditio fuerit. Mediâ & scilicet asperrimâ, ut iis oris, hieme, dum alij nullo satis tecto vim frigoris defendunt, incensus animo Serinus in subditas Mahometanis regiones irrupit. post excisum immanem illum Essexij pontem, plurimas urbes quâ vi, quâ deditio occupat : multas consumit igni ; præsidium aliis imponit : supra sex Tartarorum ac Turcarum millia concidit ; innumeros in captivitatem abripit. Quid terna equorum, vicena pecorum abacta millia percenseam ? quid supra quadragena ænea tormenta, signa & vexilla creberrima, è quibus septena in specimen transmissa ad Cæsarem ? vel gregarij & tenuissimi quique milites prædâ locupletati, cum quæ quisque ex hostico rapuisset, ea publico magnificoque Serini concessu, propria ut jure optimo parta obtineret. Denique, ut rem præcidam, mille hostium vicos & oppida Serinus unâ hieme, nec totâ inflammavit ; totamque adeo Turcicam in Pannonia ditionem deformavit incendiis, cædibus funestavit. O Virum Humiadis & Scanderbegis accensendum ! ô celeritatis, magnificentiæ, fortitudinis prodigia & miracula !

Illud tamen, quanquam ad exitum festinat oratio, transilire, Auditores, nullo modo possum, quod Serino ad urbem Canisam, quò ipsemet ante obsidionem explorandi causâ accesserat, insigne ad stuporem accidit : ubi duodecim tantum equitibus stipatus, in silva à pluribus Turcarum cohortibus circumclusus est. Quid ageret in iis deprehensa Virtus angustiis ? Scimus iniquo & saluoso loco interceptum Romanum Consulem jugum non detrectasse ; circumventum ab Fabio Maximo An-

nibalem, vix astu & stratagemate evasisse; Marcellum, illum imperij Romani gladium, cum speculatoris munere Dux ipse fungeretur, exceptum insidiis, miserè cum suis trucidatum. Serinus neque ignominiam servitute subiit, nec incolumitatem dolo quæsivit, neque infidiatorum impetu vitam amisit: verum, submisso divinitus Croatarum manipulo, in circumfusam multitudinem erumpens, sibi Turcarum cæde libertatem, vitam, gloriam asseruit. Et quidem in latronum illorum agmine fuit, qui loricâ invictâ & impenetrabili plagas omnes captus eluderet; ut bovis instar mactari hominem necesse fuerit. Atque is adeo certus ad prædam, ut rebatur, in casses delapsam accurrerat, ut laqueum ingentem è serico contortum attulisset ad vincendum Serinum, quem Sultanus proscripsisset infinito proposito pretio, si quis vivum mortuumve exhibuisset. Ita quem ferro vincere non valebat, auro oppugnabat.

At verò, dum taciti liberato Serino gratulamini, acerbâ sanè recordatione conturbor, Auditores. Silva illa, ubi solus fermè Barbarorum copiis obsessus, extremum necis & servitutis discrimen adierat, id obtrudit quod à me vos dudum expectare videmini; ego invitus ac reluctans, vix adducor ut admittam animo, nedum oratione expromam. Cogitatione, mihi credite, perhorresco; cum Imperatorem omnibus virtutum numeris & partibus absolutum; post Sigethanas, Essebianas expeditiones; post æquatas pugnis victorias, post urbes gentesque uno armorum impetu & continenti serie triumphorum domitas; illum Pannoniæ Vindicem, illum Christianæ reipublicæ Assertorem; quem modò è silva, sic tanquam leonem in canes venaticos, in confertos hostes erumpentem sternentemque cataphractos Barbaros vidimus, atroci tragicoque exitu ab apro oppressum necatumque cerno.

Tot igitur pericula evaserat? toties è medio igni ac

ferro salvus & incolumis redierat? toties Othomanos fuderat, fugarat, ceciderat, ut apri mole obrutus, morsu cruentatus, infelicissimam mortem oppeteret? Quàm optaret in hostilium castrorum oppugnatione animam & sanguinem profudisse! quàm dignum suo genere tumultum in urbium arciumque ruinis invenisset! Nunc bello abstinere per inducias coactus, atque à Mahometanorum vexatione temperare; dum paria cum bello facit aprorum acerrimâ venatione, fauciam feram infectatus per confragosa silvarum, vix equo defiliit ad conficiendam acinace belluam; cùm illa, ad innatam feritatem accedente vulnerum dolore, in rabiem acta, furioso insultu dejecit venatorem; incumbensque totâ mole corporis, victorem iteratis in collo dentibus indignissimè jugulat; idque tandem assequitur, quo frustra hostium vel elusa vel infracta tela adspirant.

Hiccine tibi, Serine fortissime, ad necem campus gloriæ servabatur, silva & solitudo? hiccine hostis, cujus dignitate ultimam calamitatem levares, aper debebatur? hoccine præmium ardor iste ulciscendæ profli-gandæque impietatis? hoc ista solennis ad aras capitis tui devotio? hoc egregia virtus tot laboribus exhaustis pro Christiani nominis gloriâ meruerunt? O casum acerbum Pannoniæ, gravem Germaniæ, piis omnibus luctuosum! uni Turcarum genti lætum, ac sanè multis in urbibus festorum ignium pompâ celebratum! Cùm viderent Pannonici Bassæ adhuc fumantes vastissimæ populationis reliquias & horrenda busta regionum; non potuerunt non gestire lætitiâ, extincto illo fulmine, cujus impetu conquassata, protrita, incensa circum omnia squallebant. Sublato illo scuto, ineluctabili veriùs propugnaculo Romani imperij, gaudiis omnibus triumpharunt.

Est illud tamen solatium in malis, quòd talem ac tantum virum vir nullus superare potuit; nec nisi victor

vulnerati morientisque portenti casu elisus occubuit. Vixit carus suis, magnus etiam summis; Regum Imperatorumque gratulationibus ac donis cultus & ornatus; Christianorum omnium & sermonibus & scriptis, nec verò minùs Tartarorum ac Turcarum terrore, fugâ, exitio illustratus. Deerat jam exercendæ virtuti bellicæ materies; imperatoriis artibus explicandis campus interclusus. evocatus est ab Cœlesti Duce & Principe, post immensos labores, ad certam honestissimamque quietem; post pugnas innumerabiles & victorias, ad palmam & coronam immortalem. Providentiam rerum omnium dominam & moderatricem sapientissimam rite castèque veneremur: ac rei Christianæ commodatum servatumque ut populos servaret, quoad belli Turcici necessitas postulavit, memori pioque animo gratulemur. Non aliquâ fortunæ invidiâ mors illi prærepta est gloriosa; sed arcano altiorique Numinis consilio vita quàm-brevissimo doloris sensu repetita, seu potiùs cum beatissimo ævo commutata.

Quòd si longiùs prospicientes, Christianis rebus à perfidia timemus Barbarorum; non totus obiit Serinus, Auditores: vivit adhuc spiratque in Filio, florentissimo maximæque expectationis juvene, qui jam se abunde Venetorum sapientissimæ Reipublicæ approbavit. Certè cum domos stirpesque Deus aliis alias dotibus notarit & insignierit; Serinorum gentem eximio, ut Christianè loquimur, *Spiritu fortitudinis* armasse videtur ac decorasse, ut excubent in Sancti limitibus Imperij; furoremque Turcicum oppositu suorum pectorum à Pannonia, Germania, ceterisque nationibus Christianis, transfusa Majorum in Posteris virtute, avertant. Hanc illis propriam laudem perpetuamque, Auditores, precemur; ut Mahometanorum Terrores iidem sint & Orbis Christiani Deliciæ, belli præsidia & pacis ornamenta.

Videsis, Lector, nostra de Serinis Comitibus carmina l. 2. Heroicò, ubi misera vicissitudo rerum attingitur.

LEONARDI FRIZON

E SOCIET. JESU

OPERA POETICA,

LIBRI XXIV.

Tomus Posterior.



P'ARISIIS,

Apud SIMONEM BENARD, viâ Jacobea è regione
Collegii Claromontani Societatis JESU.

M. DC. LXXV.

Cum Regis Privilegio.



POEMATUM
PARS TERTIA,
LYRICON
LIBRI SEX.

ERUDITO LECTORI.

PREÆFATIONEM huic ego posteriori tomo non præfigam, Erudite Lector, iis dissimilem, quibus partes Operum Poëticorum singulas prætexere institui. Satis amplè videlicet à primo jam vestibulo prolocutus in universam meam Poësin, de Lyrica breviter subijciam; cum multa sit in his libris omnibus argumentorum varietas; tum in hac parte tantam esse, quantam ipso titulo indicent Ode prope ducentæ. Stesichorus quàm sit ingenio validus, materiæ quoque ostendunt, maxima bella & clarissimos canentem duces, & epici carminis onera lyrâ sustinentem; ut ait *Quintilianus*. at ipse, meam infirmitatem ne granditas & pondus argumentorum detegat obruatque, pertimesco. Ac primus quidem liber in rebus temporum nostrorum maximis & splendidissimis totus occupatur; iisdem ceteri libri persperguntur. Secundus *Transfugium ab Aula*, sacraque Solitudinis delicias exhibet. *Theandrica Parthenica*que, jam libris heroï numeri tribus affecta, quartus quintusque perficiunt. Atque hi tres, qui pietatis nomine suspecti cuiquam esse possint austeritatis minùs Poëtica, alio quovis argumento suaviores fortasse non surdo atque hebeti palato reperientur. Sed reliquis copiosiores tertius ac sextus, magisque miscelli sunt; & verò nonnulla cum aliis libris habent argumenta communia. Neque id tamen imprudenter factum argues pro tua sapientia, Lector, si attenderis, & quædam inter ipsam editionem enata, ut odas tres de rebus ab invictiss. Principe *Condao* gestis in *Belgio*; & inscriptioni peculiari cuiusque libri non eam inesse vim, ut neget alibi quidquam extare, quod ad hunc locum facillè revocetur. quin & gratiora occurrent quæ non sperabantur argumenta. Lyrica autem Poësi quæ sit præcipua subiecta materies, præclarè docuit *Horatius*, ubi scripsit *Mulam* dedisse fidibus *Divos*, puerosque *Deorum*; ac *Pinda-*

rum Deos Regesque canere, Deorum sanguinem.
& ipse Flaccus quoties in Apollinem & Dianam, alia-
que Numina profana odas hymnosve modulatus est! Ita
divinis rebus, at veris & Christianis, servientem lyram
celo inferui, sideribus consecravi. atenim de piis carmi-
nibus abunde in prefatione generali. Jam Lyricorum
principi ducique sic institi, non ut centones consuerem,
crebrasve parodias; sed ut formam exprimerem Poëti-
cam. Idque sine gloriatione (neque enim hoc ingenii, sed
voluntatis curaque negotium est) à me prestitum dicere
licet, quod à nemine præterea factum memini; ut his Ly-
ricon libris sex (qui variè inter se referuntur, sibique &
argumentis concinunt, & multiplici genere carminis res-
pondent) odarum ab Horatio usurpatarum modos & om-
nes tractarem & solos. nam quæ sunt diversæ formæ ly-
rica, in extremum rejeci librum Silvarum. Epodos au-
tem proprio libro distinguere non placuit, sed tribus
libris posterioribus spargere, varias ob rationes, ac nomi-
natim Theandricon Partheniconque membra ne distrahe-
rem. Accedit, quod nec Flaccus ipse librum illum suum
Epodon ex omni parte à superioribus libris distinxit.

Pro carmine demum Seculari Epitaphiaris succinui
Delphino Sereniss. ut à quo Lyrica auspiciatissime cœpe-
rant, eidem officii debitam constantiam desinerent; Principi, qui
jam seculi non tantum certissima spes, verum & gloria,
summi Parentis ad votum crescit, ad Gallie totiusque
adeo nominis Christiani felicitatem. Adjeci nobilissimos
fortune publicæ felicitatisque artifices duos, assidua cura
intentos huic seculi fingendo elaborandoque præsidio &
miraculo.

TERTIÆ PARTIS ERRATA sic emenda.

- P**agina 20. vers. 17. Salus.
Pagina 25. vers. 24. Lodoix.
Pagina 27. vers. 27. prius.
Pagina 30. vers. 7. folium.
Pagina 39. vers. 19. & pagina 44. vers. 31. Lodoix.
Pagina 41. vers. 27. trepidante.
Pagina 52. vers. 6. amore.
Pagina 58. in 2. titulo, XXIII.
Pagina 61. vers. 18. metanda.
Pagina 71. 73. 75. inscribe, Liber II.
Pagina 112. vers. 3. Herois.
Pagina 118. vers. ult. victor.
Pagina 123. vers. 6. vincere, lege, frangere.
Pagina 132. vers. 15. Et mixtæ.
Pagina 139. vers. 22. uberes.
Pagina 140. vers. 25. redimit. *ibid.* honoribus.
Pagina 142. vers. 19. Decerpesque, tuis quidquid.
Pagina 144. vers. 32. tradidit. & vers. 33. afflavit.
Pagina 172. vers. 2. iniqua. & versu 5. strinxit.
Ibidem vers. 14. suorum. & vers. 15. hospitiiue.
Pagina 174. vers. 7. fervent. & vers. 12. genitore.
Pagina 175. vers. 26. coronæ.
Pagina 176. vers. ult. quærit.
Pagina 177. vers. 5. lege; paciferam, ceu pia Mag-
dalis,
Pagina 200. vers. 4. revirescit, lege, juvenescit.
Pagina 216. vers. 23. lustralis.
Pagina 233. vers. penult. jubet.
Pagina 279. vers. 28. splendidius.
Pagina 292. vers. 25. insultans.
Ibidem vers. 29. nitenti.

Pagina 301. vers. ult. facē.

Pagina 315. vers. ult. petat.

Pagina 321. vers. 4. copias.

Pagina 331. vers. 8. Purpureum.

Ad emendationem erratorum Quartæ Partis

hæc adde.

Pagina 442. vers. 16. rigidi. & vers. 17. voces,

Si qua occurrent alia inemendata , festinationi recognoscentis operam Typographicam variisque casibus ea condonabis pro tuâ humanitate , Lector ; pro tua eruditione corriges.

FACULTAS P. PROVINCIALIS
Societ. Jesu in Aquitania.

CUM aliquot Societatis nostræ Theologi legerint *Opera Poëtica & Orationes Panegyricas* P. LEONARDI FRIZON ex eadem Societate; eaque censuerint ob materiæ dignitatem elegantiamque formæ posse ad utilitatem publicam typis excudi; potestate ad id nobis factâ à Patre nostro Joanne-Paulo Oliva Generali Præposito, facultatem Autori concedimus Opera illa sua Poëtica & Oratoria in lucem emittendi. In quorum fidem has litteras manu nostra subscriptas, & officii nostri sigillo munitas dedimus, Burdigalæ 19. Martii, an. 1674.

MERCURIUS VERDIER.

SUMMA REGII PRIVILEGII.

CHRISTIANISSIMI Regis autoritate patentibusque litteris cautum est, ne quis *Opera Poëtica & Orationes Panegyricas* P. LEONARDI FRIZON è Societate JESU, absque ipsius auctoris consensu, excudat excudendave curet, aut ullo modo effingat intra quindecim proximos annos à die primæ impressionis expletæ numerandos. Qui secus faxit, indicta pœna confiscationis librorum coercebitur, aliâque multâ Regio diplomate contentâ. Datum Parisiis die 27. Junii, an. 1675. Sic signatum, de mandato Regis, GUITONNEAU.

Perfecta hæc prima editio fuit die 14. Augusti, an. 1675.



LYRICON

LIBER I.

DE PRINCIPIBUS

AC REBUS ÆTATIS NOSTRÆ CLARISSIMIS.

A D

SERENISSIMUM DELPHINUM

ODE I.

A N. M. DC. LXI.



U G U S T E Divûm Sanguis, & aureo
Formosè DELPHIN fidere clarior,
Terrisque latè, duplicique
Oceano dare jura natus!
Dum te superbis in penetralibus
Aulæ recentem densa clientium

Corona, adoratasque gestit
Officiis celebrare Cunas:

A

Miris ovantem lætitiis Chorum
 Admitte, Princeps, candida quas tibi
 Sistitque commendatque Musas
 Pax tenero socias Alumno.
 Gravi frementes murmure buccinæ
 Optata turbis gaudia nuncient :
 Aures Puelli delicatas
 Ne sonitu quatiant molesto.
 Mulcere blandis assiduæ lyris
 Amant Camœnæ ; jamque tuas, Puer
 — Divine, laudes, jam beatos
 Voce hilari modulantur ortus.
 Non sic ahenis edita molibus
 Longè audiendum ferre tonitrua
 Nomen per auras, non faventes
 Sic populi valuere plausus.
 Et, artefactis quæ micat ignibus
 Turrita festi machina gaudij,
 Nigrante mox busto fatiscit
 Sordida, pulvereoque fumo.
 At orbi & ævo Pierides canunt ;
 Phœboque amicæ, luminibus Duces
 Ornant inextinctis, & Umbras
 Morte obitâ super astra tollunt.
 Agnosce jamnunc artifices tuæ,
 DELPHINE, laudis. quo Genitor solet,
 Condisce jam vultu labores
 Ingenuos recreare Vatum.
 Utrumque mixtis Magne refers Puer
 Notis Parentem : nec dubiis faves
 Micans ocellis, & potenti
 Plectra cics animosa nutu.
 Ut illa blandæ forma ferociæ
 Arridet ! ut circumflua lilia,
 Gemmisque florentes, & auro,

LYRICON LIBER I.

3

Prænituit facies amictus !

O nate Divis auspiciis Puer,

Quem Pax & almo cana Fides sinu

Suscepit, ac Ludis frementem

Gaudia concelebrant per Aulam !

Astræa te circum, & niveis comes

Plaudit choreas Gloria Gratiis,

Et juncta Majestas Lepôri, &

Purpurei volitant Amores.

Huc & Napæas, & Dryadas rapit

Ardens cupido, rustica Numina.

Sed fulgor ardentem repressit

Tot decorum : solitæque major,

Et par Olympo Regia summove.

Stupore DELPHINUM, ac tacito colunt

Pudore ; suspensâque Phœbi

Aure bibunt geniale carmen.

Qui Patris altum magnanimi decus,

Martis triumphos, Pacis adoream,

Laurosque consertas olivâ

Extulerat, Paphiâque myrto ;

Te, dulce pignus, te columen canit

Secli ruentis, lux hominum, Puer,

Divûmque munus. jam tenellæ

Nectit Honos diadema fronti.

Apollinares docta sequi modos,

DELPHINE, primum * Gallia fervidi

Vestigal æternique cultûs

Obsequio properat fideli.

Cal. Nov.

Cœlicum om-
nium festo io-
lennem diem
habet natalé
in regio Fon-
tis Bellaquei
castro.

* Genethliaco;

1.4. Heroicon.

LUDOVICI MAGNI

NOVA BELLI DISCIPLINA.

ODE II.

J A M, consorte fui Rege periculi,
 Spretâ morte ferox miles, & inclyto
 Quidvis auspicio fervidus aggredi,
 Sudoremque alacer sanguine miscuit.
 Spectatore animos Principe sentiat
 Et vires pariter crescere prodiga
 Vitæ Nobilitas ; quid, socio & Duce ?
 Urget terribili regia vox tubâ
 Et cantu lituorum acrior æreo ;
 Exemplumque acuit voce potentius.
 Hinc ardor Procerum, militis hinc vigor.
 Oppugnanda vocant mœnia ? cominus
 Nudo profiluit Gallus acinace.
 Flexu nec vario protegit aggerum
 Accessus tacitos, lentaque prælia.
 Curet quis solitos obsidij gradus,
 Ingens B O R B O N I D E S dum regit horridos
 Assultus ; laceris ingruere arcibus,
 Lunatîve operis difficiles moras
 Et prætentâ docens rumpere cornua ;
 Augustumque caput, more gregarij,
 Cœcis, ah nimiùm, casibus ingerit ?
 Obstent vorticibus spumea flumina ;
 Adversoque minax stet Batavus solo,
 Et densam objiciat Franciadis necem
 Sparso per medios sulfure gurgites,
 Plumbi cum volucris grandine flammeâ.
 Ivit flos equitum, quâ solitæ rates ;

Et Rheni tumido victor ab alveo,
Nequicquam oppositos, scilicet & loco
Præfisos, Batavûm dispulit ordines.
Ipso fulmineus nomine L U D O V I C
Æratas acies, hostica robora,
Castrorumque obices stravit & urbium.

INVICTISSIMO HEROI LUDOVICO BORBONIO

PRIMO STIRPIS REGIÆ PRINCIPI

CONDÆO,

SUB IPSUM EXPEDITIONIS BELLIÆ TEMPUS

EX GRAVI MORBO DECUMBENTI,

ODE III.

QUÆ te fecundis invida Galliæ
Fortuna rebus, prælia dum paras,
Tentare, Princeps, insolentis
Audet atrox per acuta morbi ?
Illa, illa Belgis scilicet hostibus
Amica pugnat vis nimio potens
Dolore : CONDÆUM, quod armis
Haud licitum, scelerata vincit.
Ergo vel ipso nomine gentibus
Longè tremendum sternere ovat Ducem,
Heu, sæva labes ! Nec minacem
Ferre Viri potuere vultum,
Fractura ahenas mœnia machinas,
Tot septa circum Vefala molibus,
Fossisque & undis. occupato
Providus obsequio Batavus.

Non usitati Martis imagine
 Ultro subibant prætrepidæ obvio
 Arces triumpho : jam superbas
 Ambitio rapiebat urbes.
 Victore tanto dulce capi decus.
 Ac fulminantis Tholusiâ plagâ
 Herois, ah, lævam cruento
 Ni laceram violasset ictu,
 Plumboque & igni vulneris artifex
 Glans dirâ, cæcus quam mediâ furor
 In strage displosit ; reclusis
 Amstela nil remorata valvis,
 Tendens inermes suppliciter manus,
 Francos vocabat. Plus globulus, seges
 Quàm cuncta telorum, peregit,
 Aut Isalæ fluviale vallum,
 Arausicani viribus agminis,
 Ductisque Druso gurgitibus ferox,
 Aut ipse torvo Rhenus amne
 Cæsareis metuendus armis.
 Nunc & Batavis, nunc & Ibericis,
 Immitis, acer, subsidio venit
 Morbus catervis, Martiumque
 Apta lues cohibere fulmen,
 Latè paventis turbida Belgij
 Per arva cæso jam toties fugam
 Suadens Leoni terror, & jam
 Teutonicas Aquilæ per auras
 Tantis repulsæ motibus, & graves
 Victrice plagas jam toties manu
 Passæ, remisit ; jamque Rheni
 Liberius volitat per oras.
 Gaudetis, hostes ! sic bene publicis
 Curis medetur B O R B O N I D Æ labor,
 Unius & languore visa

LYRICON LIBER I. 7

Austriacis revalere virtus.

At, ecce, membris tetra fugit lues.

Tot ille Victor splendidus agminum,

Tot urbium, Princeps, furentem

Et valuit superare morbum.

Timete fastus hostica vindicem,

Crebroque notam fulmine dexteram

Timete, propugnacla, castra,

Agmina. Jam validus resurgit

Heros, & armis expedit inclitas

Viresque & Artes; ingenium sagax,

MAGNOQUE sacrum LUDOVICO

Consiliique animique robur.

Tu verò amantis prælia Franciæ,

Princeps, & arcis lux Heliconiæ,

Qui nostra dignatus requiris

Carmina, præcipitemque Musam;

Hæc gratulantis suscipe munera

Blandus Poëtæ. Pignore jam tibi

Devinctus, augustos amiceo

Præcinit augurio triumphos.

AD SERENISSIMUM

HENRICUM BORBONIUM,

ENGUINEUM DUCEM,

BURGUNDIÆ COMITIA DIVIONE HABENTEM.

AFFLICTA PARISIIS VALETUDINE

INVICTISS. PRINCIPIS GONDÆI, PATRIS,

ODE IV.

HEROIS Soboles, Patri

Heros assimilis, seu vocat horridæ

A iij

8 LEONARDI FRIZON

Clarus militiæ labor,

Seu doctum placidæ Palladis otium !

Ah, quid te patria procul

Aspectu rapidis curribus abstulit ?

En suspensa periculo,

Languens, ægra metu, magna Lutetia,

CONDÆIQUE doloribus :

Curis Aula simul tristibus æstuat ;

Morbo sollicita ingemit

Confors emerito Gallia Principi.

At tu, deliciæ Patris,

Ingentisque animæ dimidium avolas ;

Pars & carior altera,

Inter fata jacentem aspera deseris !

Sic, quæ dulcia vincula

Sanctus nectit Amor, quæ Pietas fovet,

Pulchri vincula sanguinis

Sic divellit Honos imperiosior ?

Ibas haud medicabili,

Dux, confixa gerens vulnere pectora,

Res quò publica Principem

Regalisque sacrum fas agit obsequi.

Quin testem ipse gravi fugit

Te morbo Genitor, conscius indolis.

Visu scilicet acrior

Urat, languidior qui subit auribus

Cor sensus penetrabile,

Amotâ leviùs Prole dolet Parens.

Heu quò vis recidit virûm !

Ut gaudet Proceres Numen, & arduos

Rerum sternere vertices,

Mortalesque sui pulveris admonet !

Urbes ille potens manu,

Gentes & rapido dejicere impetu,

Sævis ecce doloribus

Princeps ac miseris dirigit modis.
 Et tantum potuit malus
 Stringens articulos humor, & intimis
 Flammas ossibus implicans;
 Invictumque domat morbus iners Ducem!
 At stratis animus tamen
 Membris exuperans, acer & igneus,
 Duræque impatiens moræ,
 Gradivum meditans imminet hostibus.
 Nec tam fervida febrium
 Torquet membra lues, quam studii ferox
 Ardor belligeri, novos
 Armorum ad strepitus corda micantia.
 Jam vernus rediit tepor;
 Turmas jam residues tympana concitant:
 Vitæ Gloria carior
 Regisque & Patriæ BORBONIDEN rapit.
 Morbi sed retinacula
 Erumpentem animum lenta premunt, neque
 Accingi violentia
 Ferro terribilem dira finit manum.
 Haud ignobilis otii
 Passus segnitiam; quod superest, libris
 Longos interea dies,
 Noctes & solidas condere amat vigor
 Celsi splendor ingenii,
 Doctrinæque avidus, nec saturabilis.
 Et jam bella sonantibus
 Aures historiis commodat, aulicis
 Et jam dividit artibus
 Indefessa suas mens agitans faces.
 Hæc morbo requies adest,
 Priscorum monumenta, & variæ recens
 Artis quæ labor extudit,
 Lenimen rigidis suave laboribus.

10 LEONARDI FRIZON

Ingratâ fileam lyrâ,

Queis Musas facilis spargit honoribus ;

Pasci carmine lætior,

Vel Silvas tenues obuius excipit ;

Communemque probat sibi

Tecum , HENRICE, novæ laudis adoream.

Hinc vati calor additus ;

Summis qui rudior laudibus artifex,

* In Silva ad
Cicobulum.

Obliquâ timidè * fugâ

Vestras ille prius carpere laureas.

Aufus , nunc etiam leves

Cantu delicias tentat idoneo.

Tandem victus , iô , cadit

Morbus , Franciadûm nec tulit anxia

Divis vota faventibus :

Diffugitque Metus , publicus & Dolor.

Nunc Soteria Sospiti

Musæ Pieriis accelerent modis :

Nunc Mavortia classica,

Lætis & resonent tympana plaûibus.

Jam Sol dulciùs enitet ;

Formosam faciem gratior explicat

Natura ; & cupidis fremit

Certans officiis Aula , Lutetia ,

Quanta est Francia : nec minùs ,

Franci quidquid amans nominis , accinit

Grates Cœlitibus pias.

Palmarique vovet secula Principi.

Tu pars optima gaudii.

Salvo Pegaseis huc age curribus ,

Princeps , huc revola Patri :

Accrescant cumulo mutua gaudia.

Burgundæ stupuit Ducem

Flos gentis , Procerum lumina ; Regio

Quantus munere , quàm Patris

LYRICON LIBER I.

11

Instar, magnifici splendidus eloqui,
 Pronis auribus influas,
 Regi subsidium strenuus appares.
 Huc, optate, novas redi
 Laudes usque ferens. Mox aliam redux,
 Obsessamque periculis
 Belgas in medios corripies viam.
 Quò te Regis ager decus,
 Ibis dura alacer quælibet aggredi.
 Jam latè trepidantibus
 Terris, imperio clarus, & impetu
 Ardens fulmineo, tuas
 Infer Dux acies. Auspicio Patris
 Exemploque, per hostium
 Stragem purpureas collige laureas.
 Rursus cum Patre sospitem
 Festis excipiat Gallia cantibus.

VENETORUM

HELLESPONTIACA VICTORIA

DUCE LAURENTIO MARCELLO.

ODE V.

UT laureatæ crescit adoræ
 Felix acervus! nempe sequacium
 Nescit triumphorum catenam
 Relligio; Venetasque Ponto
 Referre palmas latior advolat,
 Jam non inermis, jam bene fordida
 Cruore Turcarum recenti,
 Barbariæ domitrix virago.
 Quæ Pontus Helles, aggere nautico
 Junctus, paventi Persida Graciæ
 Infudit, insanique vastum

Ferre jugum gemuit Tyranni ;
 Ibant latenti sub ratibus freto
 Byzantiorum examinâ militum ,
 Cretæque supremum ferebant
 Exitium ; properare Bassa ,
 Faucesque jussu vincere Dardanas ,
 Quas bellicosi viribus Hadriæ
 Obsedit , Ægæo imminentem
 Certa Getam prohibere Virtus.
 Tu Christianæ murus æheneus ,
 Scutumque gentis non superabile ;
 Ac publicæ Europæ Salutis ,
 Gens Venerum , Fideique Custos !
 Ite , ite fortes æquoris incolæ
 (Undas , & auras conciliat Fides ,
 Cælique turmas) ite toto
 In jugulum Mahometis ense .
 Vel si trecentæ portubus hosticis
 Naves agantur cum fremitu sali , &
 Labore ventorum , atque arenas
 Janifaris Libycas adæquent .
 Virtute constat , non numero virum
 Fortuna pugnæ sic Marathonii
 Campi docebunt : Xerxe testis
 Nobilior Salamis fugato .
 Armenta Lunæ sternite inertia ,
 Marci Leones ! spargite , rumpite ;
 Fretumque , phocasque , & carinas
 Sanguineis cumulate acervis ,
 Neptuniorum Martia militum
 Experta fœdis pectora cladibus
 Horrebat , oblatamque pugnam
 Threicius fugiebat hostis .
 Ergo in recessus abdere se fretri ,
 Amare litus , fulmineis ubi

Eroæ, Abydenæque turres
 Molibus intonuere in altum;
 Puppæque amicas præsidio tegunt,
 Arcent Latinas missilibus globis.
 At nulla præsentis moratur
 Euganeos facies pericli.
 Circumsonantum per medios volant
 Nimbos pilarum, sulfureas neces:
 Ardente nec fractos procellâ
 Fluctibus explicuere cursus.
 It Mocenicus turbinis in modum;
 Classẽque vectus trans Othomanicam;
 Angusta victrici carinâ
 Occupat, & trepido receptum
 Præcludit hosti. Tum Melitenfium
 Devota sacræ militiæ cohors,
 Remisque velisque insequentum,
 Per domitas equitavit undas.
 Fauces easdem jam tenet agminis
 Dux Hadriani, Thracibus acrior
 Instare; Marcellique nomen;
 Atque animum referens Quirini;
 Qualis Sicano victor in æquore
 Spectatus olim. Quis latebræ locus,
 Fugæve, Thraces? quid recessus
 Ilte maris, rapidaque ripæ
 Flammâ furentes? quid speculæ juvant,
 Brevisque propugnacula Nereo
 Imposita, & ignitum carinis
 Naufragium Hadriacis minata?
 Perrupit omnes Euganeus vias;
 Proræque proris, & manibus manus
 Confert; inaccessumque littus
 Belligero populatur igni.
 Fatale telum, sæva necessitas,

Turcas obarmat. Christiadas agit
 Invieta virtus, & coruscis
 Septa Fides Superum catervis.
 Iô Triumphe! velivolos, age,
 Incende currus; cæruleas comæ
 Accinge frondes, quas rubenti
 Coralio bene Creta neſtat.
 Phryxæi iniquos antè ſinus freti
 Tentare inaudax, vicit in hoſticâ
 Latinus undâ; barbaramque
 Jam Tenedos patefecit arcem.
 At decolori Pontus inhorruit
 Fluctu cruentus. denſa cadaverâ,
 Arcusque lunataſque peltas
 Miſcet agens, lacerasque puppes.
 Vix tale quondam Threicio decus
 Ex hoſte partum, cùm Tagus Hadriæ,
 Tibrique junctus, fœderatam
 Marte pio dedit ire claſſem
 Naupacti ad oras. Baſſa breves fugâ
 Claſſis ſuperbæ reliquias rapit.
 Fugère biſſeptem triremes:
 At reliquas inimicus hauſit;
 Quo nullus uſquam lætior ardeat,
 Igniſve, pontuſve; aut ſpoliis ovans
 Viſtor, celebrandæ reſervat
 Per populos monimenta pugnæ.
 Tibine tantæ præmia lauræ,
 Haud partè ab omni Chriſtiadis favens
 Fortuna, Marcelle, invidebat
 Fulmine percutiens caduco;
 Ne gratulantum muneribus Patrum,
 Ducisque pulchris laudibus auctior,
 Dum Fama victorem ſonaret,
 Ad patrios veherere portus?

At, si relatæ non licuit frui
 Honore palmæ ; major Olympia
 Per templa ducetur triumphus ;
 Digna tuis statuente Christo
 Trophæa factis. Hic tua , nœniâ
 Indigna, Pæan funera concinet :
 Rostrata , pro tristi cupresso ,
 Palma teget tumulum virentem.
 Feres perennis lumina Gloriæ
 Pro luce , cujus glans fragilem ignea
 Effôdit orbem , Mocenice ,
 Difficilem ut penetrare Ponti
 Sinum docebas. clavum agè debitum ,
 Non imperandi tu rudis artium ,
 Victoriæ Princeps , capesse ,
 Laurigeram moderare Classẽ.
 Nec te triumphi prætereat decus ,
 Virtutis ingens Farnesiæ jubar ,
 Horati : Alexandrique avitam
 Vise mari retulisse laudem.
 Id , Getarum strage superbior ,
 Id Triumphæ ! (sic meruit Fides
 Invicta) navali piorum
 Tempora cinge Ducum corona.

MORS LAUREATA
LAZARI MOCENICI
VENETÆ CLASSIS PRÆFECTI.

ODE VI.

*Turcas navali pralio Laurent. Marcellus ad Helles-
ponti fauces an. 1656. profligarat : eaque in pugna Mo-
cenicus jam privatus (cui Marcellus in maritimam
præfecturam successerat) egregiam Reipublicæ navarat
operam , oculumque amiserat ignite glandis ictu effossum :
ac Marcello in ipsa victoria extincto , iterum classis de-
lectus Imperator Lemnon ac Tenedon ceperat. sed parem
cum Marcello fortunam expertus ; dum Barbaros eodem,
quo anno superiori , loco funderet ; tormentario globo in
sulfurati pulveris acervum illapso , cum navi prætoria
interiit bis victor.*

TERRIS exiliens , ærias fecat
Mors falcata vias : ebria sanguine ;
Flammis cincta , ferox , nec sine laurea
Sigæo involitat freto.
Hellepontiacum , Barbariæ novâ
Mocenicus ovans clade iterat sinum :
Lemnonque ac Tenedon , quâ peperit manu ,
Belli præmia protegit.
Quantus se ille Duci , tot decorum capax ,
Angusto explicuit campus in æquore !
Quantis attonitum ferrea miscuit
Tempestat mare fluctibus !
Hinc Europæ oculos , hinc Asiæ tenent
Conserta in medio prælia gurgite :
Hinc Æther Veneto militat ; hinc Scythæ
Orcus cum Furiis adest.

Sed quid belligeri classica Tænari
Possint fulmineas in Superûm manus?
Marcus fracta Erebi, ceu rapidus leo,

Turpi monstra dedit fugæ.

Marci per medios auspicio Getas,
Mocenice, ruis: nec tua, qui rates
Disperfit socias, corda movet Getis

Conjuratæ Hiemis furor.

Totis Ottomani viribus imperi
Dux oras pelagi maximus infidet:
Turritis coit Dardanium in fretum;

Quanta est, Turcia classibus.

Ferro ignique manus innumeræ premunt:

Tu devota neci pectora martiæ

Offers, tela volans inter ahenea,

Terræque & pelagi minas.

Quò tanto raperis concitus impetu,

Heros? ah! patriæ, parce, periculo

Nè fortis nimium, gaudia funebri

Planctu civicâ deteras.

Infesto propior desine littori

Disiectis Arabum incumbere puppibus:

Marcellique memor, Barbaricis cave

Dum circumtonat ignibus.

Quis tormenta ferus repperit ænea,

Haud invento animum mollior artifex?

In mortefne parum vulnificus chalybs

Et ferri fuerat rigor?

Cyclopum horrisono, crediderim, specu

Artis letiferæ condidicit modos,

Gentes qui docuit martia fusili

Ære accendere fulmina.

Nam quo se clypeo provida muniat

Virtus, alitibus cum petitur globis,

Qui perrumpere ament stantia ferreis

Propugnacula mœnibus?

Ardens sulfureo dum pila turbine,
Et cœcis glomerans aëra nubibus
Ventos antevolat; perdidit in malo

Terror præcipiti fugam.

Marcellum, ah! Venetos certior in Duces
Victorem abstulerat; nunc etiam tuum,
Mocenice; caput vis rapit acrior,

Lauros promeritum novas.

Pugnæ sorte pari redditus & dolor,
Et solenne decus. Plumbea nec satis
Antehac glans oculo sæviit eruto!

Tanti vix Tenedos fuit.

Quo centumgeminus conciderit Gigas;
Telum flammivomis molibus editum
Nitrati ut cumulo pulveris incidit,

Navis diffidit alveum:

Prætozemque suæ fragminibus ratis
Involvens, piceo jam medium rogo
Effert, sanguineo jam temere freto
Vulcanus lacerum abjicit.

Sublimem fugiens aura perhorruit
Jactatumque Ducem fluctibus igneis:
Victorem trepido spumea vortice.

Tethys deciduum tremit.

Nocturno haud aliter cernitur æthere
Sidus præcipitans ducere flammeos
Tractus, & liquidas imbriferi Jovis

Signare augurio vias.

Heu! magnæ spoliū sic animæ cadit:
Et nunc Odryfios inter acinaces,
Contosque & pharetras, signaque bellica, &
Remos transtaque fluctuat.

At lessum prohibet certa Ducis comes
Virtus. Degeneri ne querimoniâ

Heroïs meritâ laude superstitis

Victtricem increpita necem.

Sic effata, sacro splendida funeri

Pompæ non solitæ fercula congerit;

Exceptum armifono corpus ab æquore

Reddens Hadriacæ rati.

Sævis & suus est vulneribus decor.

Dignum horrore coli, semirutum caput,

Armatam retinens ore ferociam,

Spirantes animi notas.

Tum taram placido Diva fovens sinu

Mentem fidereis intulit arcibus;

Queis Christo emeriti signa micantia

Heroës super explicant.

Illic victa premens monstra Georgius,

Et qui Mauritium circumeunt Ducem

Thebani Socii; quotque aliis piæ

Gestus militiæ labor.

Cincti purpureis tempora laureis

Læto concelebrant prælia carmine.

Palmâ dextra viret fortis Olympicâ

Et pictus trabeæ nitor.

Felix morte obitâ victor, iô, chorum

Mocenicus init, non sine plausibus

Gratantum Superûm; clarus & aureis

Armis vincit Oriona.

Illic & rutilis auget honoribus

Heroas Venetos, quos animus flagrans

Bellatrixque Fides vexit ad æthera,

Marco haud indecores duci.

Marcello graditur præcipuè comes;

Lunamque Odrysiam sub pedibus videt;

Raucarumque terit fulmina nubium

Et Martis dubias vices.

ALEXANDRO VII.

PONTIFICI MAXIMO

CUM IPSI AUTOR FIDEI TRIUMPHUM DICARET.

ODE VII.

O Qui supremæ tergemino potens
 Regno tiaræ sidera contines,
 Terrasque, Alexander, Deique
 Vindicibus loca feta flammis;
 Quem, dedicatis pingue liquoribus
 Trans astra tollens Relligio caput,
 Omnisque Virtutum corona,
 Pieridum chorus omnis ambit!
 Tuis triumphans auspiciis Fides
 Nunc evolutis nubibus emicat,
 Romamque victrix laureato
 Per populos volat acta curru.
 Sceptro abdicato magnificè tuos
 Christinam ovantem dejicit ad pedes,
 Gestitque regalem beato
 In gremio posuisse laurum.
 Hanc Spes, & albo conspicuam Salu
 Velo sequuntur, non sine Gratiis:
 Auroque præfixis, & igni
 Castus Amor jaculis coruscat.
 At implicatis horrida viperis
 Fugit rubentem fulmine dexteram,
 Et nocte se condit profundâ
 Hæresis, atque Acheronte toto.
 Quod vivis, una est, quodque agitas, Fides.
 Vin contra, & hostis multiplicis dolos
 Servare inoffensam laboras

LYRICON LIBER I.

Christiadûm , sine fraude , terris.

Sanctis ut altè Montibus infides

Custos ; in omnem lynceus excubas

Europam , & instantes procellas

Sidereâ specularis arce ;

Ne Turca Cretæ reliquias breves ,

Agrosque & urbes Dalmatiæ voret :

Tandemque deprensos Quirites

Cornibus impediât dolosis ,

Quæ Luna in Orbem crescere sedula ,

Pejor cometis sanguineum rubet ;

Ventofque , & immanes tumultus.

Hadriacis minitatur undis.

Pacisque eodem pectore concipis ,

Bellicue curas , quale decet , sacri ,

Vocando civiles in hostem

Auspicio meliore pugnas.

Viros , triremes largior , & tuos

Præbere Divos , Euganeis opem

Hortaris , exemploque adurges

Christicolas properare Reges.

Cælo evocandi certior auxili ,

Bene-ominatas suppliciter manus

Tollis Quirino colle Moses ,

Belligerâ pietate vincis.

Sigæa , testor vos , freta , nobilis

Theatra pugnae. fumat adhuc Thetis

Agæa , Turcarumque latè

Spumeo atrox recalet cruore.

Neque occupatam turbine Martio

Jacere passus Sarmatiam , graves

Sacrorum , Alexander , ruinas

Subsidio relevas amico.

Commisssa nulli , quàm tibi , pulchrius ,

Divina rugis Sponsa cadentibus

*Custos mon-
itum , Alexan-
dri lenuna ex
D. Malach.*

Primæ reflorescit juventæ

In speciem sine labe Virgo.

Non tu profanis spargere sumptibus

Gazam sacratam prodigus, aut sacros

Avarus in sumptus, profusus

Sanctū agitas opibus Triumphum.

Hæc nempe tanto debita Præfuli,

Servata tanto laurea. Chisius

Adhuc, & Arcani Minister

Magnificis segetem Triumphi

Curis pararas. Ac meritum probat,

Cum rite * sacro perlita balsamo

* In Sacram.

Confirmat.

Maria-Ale-

xandra cogno-

minari voluit.

CHRISTINA ALEXANDRÆ decorum

Nomen amat, MARIAEQUE nectit.

AD CHRISTINAM

SUECIÆ REGINAM SERENISSIMAM,

DE SUA ROMAM TRIUMPHALI PROFECTIONE.

ODE VIII.

AULÆ deliciis marcida pectora
Æterno jaceant in latebris situ,

Informemque sepulcro

Vitam turrigero premant;

Quales Memnoniis gentibus imperant

Reges lucifugi, Barbaricum genus,

Indignique videri, &

Lucem cernere publicam.

Gustavi Sobolem non ita turpibus

Involvi tenebris degenerem juvat,

Nec mutare superbo

Mollem carcere Regiam.

Haud tu fœmineo ingloria pectore,

Majoresque viris, Virgo, animos gerens,

Regni culmine Sueci

Calcato altior emines.

Arctoi neque te septa palatii,

Immensæve labor detinuit viæ :

Terras curris, & undas,

Quò dux cumque Deus vocat.

Germanos levibus tu populos rotis,

Et Scaldis peragras littora Belgici.

Subsedere nivali

Alpes artonitæ jugo :

Nec Pœni memores Hannibalis. notas,

Nec mox aërios, quos vagus Hercules

Impressit, nebulosis

Ostentant scopulis gradus.

Transcensu melius nempe superbiunt,

Heroïna, tuo; magnaue posteris,

Quæ vestigia adorant,

Vix credentibus offerent.

Dein pictâ Eridanum classè perambulas,

Apennina volans dorsa micas super :

Emensamque triumpho

Lætas Ausoniæ plagas

Roma excepit ovans, nunc quoque gentium

Princeps, quamquâ aquilæ fulmen, & imperi,

Quo Germania gaudet,

Amisit veteris decus.

Numquam sanguineis Martia præliis

Urbs, quantum placidis Christiadûm sacris,

Latum jura per Orbem

Vano sub Jovè protulit.

Major Cæsareo nomine Pontifex

Terris imperium longius explicat :

Pro sceptris gerit alti

Claves ætheris arbitras.

Sed nec laurigeros dum Capitolio

Curru Roma duces invehit aureo ,
 Pompam vidit honori ,
 Heroïna , tuo parem.
 Pompæ materies , ac decoris caput ,
 Incorrupta Fides : palmaque sanctior
 Aris insita fulget
 Victâ nobilis Hæresi.

AD E A N D E M
 DE SUO IN GALLIAM ADVENTU.
 O D E I X.

S A C R O R U M domino sat Latio datum ;
 Necdum expleta licèt Roma , cupidine
 Ardens usque tuendi ,
 Longis ambit honoribus.
 Fido nota vocat fœdere Gallia ,
 Parnassi ingenuis notior artibus ,
 C H R I S T I N A M Q U E sonare
 Musis docta clientibus.
 Ceu Phœbus liquidum permeat æthera ,
 Et mundum radiis lustrat , & arduas
 Splendens axe viator
 Mutat Signiferi domos :
 Tu , quam non patriis Suecia finibus
 Cepit (magna aliis , sed dominâ minor)
 Regno , Augusta , relicto ,
 Europæ varias obis
 Illustrasque plagas , publica Gentium
 Lux , & Castalii gloria seculi :
 Optato quid amantem
 Fraudes munere Galliam ?
 Spargit mortiferam Parthenope luem
 Latè per populos. Desere , desere

Terras peste nocentes ,
 Cælo debita Gallico.
 Fluctus , ne dubita , scinde Ligusticos ;
 Applaudunt virides Nereidum Chori ,
 Festivisque triremem
 Læti flexibus ambiunt.
 Phocææ rutilant testæ Coloniæ :
 Turritos agedum Massiliæ sub
 Portus , unde salutans
 Tormentis fragor intonat.
 Quantis exiliens Francia gaudiis
 Illustrem hospitio suscipit Advenam !
 Quam Regalis ubique
 Pompæ lux oculos ferit !
 Te Princeps meritis officiis colit
 Legatus celebri Regius agmine ,
 Reginaeque triumpho
 Nomen ducere idoneum ;
 Florens Austrasio sanguine Guisus ,
 Cui junctæ Charites , Aulicus & Lepos ,
 Hyblæoque madentis
 Linguae copia nectare.
 Nec Francas Italiam cedere honoribus
 Fert urbes Ludovix. Jam video proci
 Extra mœnia fuis
 Campos fervere civibus :
 Jamque alas equitum , jam peditum globos
 Ludicrâ innocui Martis imagine
 Ferri , non sine grato
 Spectantis populi metu.
 Toto signa volant aëre serica ;
 Pennis conspicui versicoloribus ,
 Auratisque coruscant
 Telis cum duce milites.
 Claris rauca tubis tympana concinunt ;

Murales reboant pulvere machinæ ,

Confusæque tumultus.

Pulcher lætitiæ fremit.

Procedunt meritis , ac trabeis graves ,

Gratanturque Patres Regificum decus ,

Quo , Christina , inhiantes

Urbes hospitio beas.

Te , major Tiberi , cæruleus Liger ,

Te ridens niveis Sequana liliis ;

Phœbi Regia poscit

Te formosa Lutetia.

Famâ , perge , venis major , & artium.

Princeps , & soliis altior , & sacro

Jam divina triumpho ,

Quem Romana tulit Fides.

FIDEI

EX CHRISTINA TRIUMPHANTI

ODE X.

IO , triumphis læta recentibus ,
Interpres almi , Dia Fides , Patris ,

Qui visu inaccessam profano

Lucem habitat , folioque circum

Fundit tenebras , septaque nubium :

Virgo , cruentâ quam bene purpurâ

Nigramque , formosamque Christus

Induit , edomitisque jussit

Regnare terris. Te Capitolii

Æterna sedes , relligionibus

Purgata fœdis ; te coronæ

Cæsareæ , positoque fastu

Ad ima strati Regum apices colunt :

Gentesque ab ortu Solis , ad Herculis

LYRICON LIBER I.

27

Quaecumque porrectæ columnas,
 Supplicibus venerantur aris.
 Miratur Orbis, sponte jugum novæ
 Sub legis actus. Suada tibi loquax
 Cessitque, & arguti Lycei
 Conticuit stupefacta turba.
 Quanquam impolito dogmata non pri u
 Audita sermone objiceret Sophis ;
 Truncoque suspensi colendum
 Numinis opprobrium sonares.
 Delubra & aras vertis inanium
 Victrix Deorum. purpureæ Crucis
 Sublime defigis profanas
 Inter ovans Labaron ruinas.
 Vis illa Cæli (nec dubiis, Fides,
 Signis, agentem numine conscio
 Deum probabas) voce motos
 In freta præcipitare montes,
 Sanare morbos, tela retundere,
 Extinguere ignes, obstruere efferos.
 Rictus leonum, cumque Letho
 Tartareas superare vires.
 Inter catenas libera, sordibus
 Nunquam obsolescis carceris; & probro
 Decora, tormentis beata,
 Ipsa tuis opulenta damnis,
 Per crebra vivax funera, Martyrum
 Fecunda gaudes sanguine, & altius
 Præstas Tyrannorum furore
 Virginibus puerisque robur.
 Vibrantis instar fulguris emicas
 Sione ab altâ: sic rapidâ plagam
 Longe per omnem luce curris,
 Discutiens tenebras Averni.
 Vocem Tonantis non fragili sono

Mittis , remotos usque sub Hesperii
 Fines , & Austrinum sub axem ,
 Ac gelidos Boreæ Triones.
 Tu Christiano Dux populo , Fides ;
 Abramidarum qualis iit Pharos ,
 Nubes biformis. Quin tu Hebræis
 Sternere iter ; pelagique secti
 Transferre siccum castra per alveum ,
 Hostes refusis mergere fluctibus
 Conspecta ; manantesque lacte , &
 Melle piis aperire terras.
 Utcumque vivâ lampade prænitens ,
 Hæret columnæ Spes , & Amor comes.
 Tædam igne flagrantem coruscat
 Sidereas imitante flammæ.
 Magistra Virtutum , & decorum parens ,
 Puroque mentis conscia lumini ,
 Sensusque Naturamque supra
 Ætherium in penetrabile tendis.
 Scitis Sophorum certior , unicè
 Gaudes Magistri fallere nescii
 Secura verbo. nec profana
 Stant solido ex adamante fata.
 Frustra rebellantum Hæreseon dies
 Commenta delet. Tu viridi , Fides ,
 Firmata clarescis senectâ , &
 Pontificum serie perenni.
 Oracla dotes , Sancta , canunt tuas :
 Flos & virorum moribus integer ,
 Clarusque doctrinâ ; Patrumque
 Quidquid habent meliora seclæ.
 Tuis , Olympi filia , militant
 Delecta castris agmina : liliis ,
 Laurisque præinctas , & astris
 Nexilibus retulere frontes.

Percussa tantæ laudis imagine
 Christina, Sueci gloria nominis,
 Novos adornavit Triumphos;
 Diva, tibi, celebresque pompas.
 Supplex coronam, & sceptrum adamantinum
 Laureti ad aras, Christiparæ dicat,
 Palmasque, felicesque lauros;
 Hæreseos monimenta victæ;
 Quæ non malignis dentibus invida
 Corruptat Ætas; non Aquilonibus
 Armata tempestas revellat;
 Non trifidus labefactet ignis.
 Quantum illa mœrorem intulit hostibus,
 Quantamque cladem! jam populus frequens,
 Magnique Luthero ejerato
 Regia signa Duces sequuntur.
 Ecquid moretur? non Pudor improbus,
 Non cæcus Error, non brevium tenax
 Opum Cupido. Sueca Amazon
 Vana docet superare monstra.
 Ergo catervatim Aufonii Patris
 In verba nuper Teutonas hospites
 Jurare, Romanamque vidit
 Parthenope geminare pompam.
 Augustus & jam Sultzbachius piæ
 Vestigia implet grandia Virginis.
 Tantas Alexandro Triones
 Primitias, Fideique sacrant.
 Nec vos triumphum pœniteat sequi,
 Calviniani relliquiæ Gregis;
 Dum Gallicas vivum per urbes
 Advehitur Fidei trophæum.

ARMANDI JOANNIS PLESSÆI
CARDINALIS RICHELII
LIBER POLEMICUS

Ad revocandos in Ecclesiam Heterodoxos.

O D E X I.

POSTHUMA bella ciet mirantibus incruenta terris
Cæli triumpho jam superbus Heros.
Felix ille quidem regalibus antè victor armis
Stravit rebelles Hæresis catervas.
Cætera si taceant ; Neptunia non satis Richeli
Rupella nomen laureasque canter ?
Sed propria hæc laurus , folium sibi nullus unde carpat,
Ducisve jactet militisve partes.
Tota sua est , Martis neque pulvere sordidata laurus,
Labore parta mentis crudito.
Bellonæ medio Scriptor velut otiosus æstu ,
Et Pacis inter arma fovit Artes.
Ingenio alta quies , dum tympana buccinæque circum
Vastoque tormenta obstrepunt fragore.
Illum in castra Fides, Pietas, Themis, additæque sacris
Musis Olympi Gratia sequuntur.
Christicola mores sic *perficit* , elegante pennâ
In astra tollens , invidens Averno.
Sic Romana vagos , cælestibus expeditus armis ,
Ad signa Princeps *Transfugas* reducit.
Docta *Carentonii* præludia senserant *Ministri*,
Omen supremæ visa ferre cladis.
Victis , turrigeras quorum eruit acer ultor arces ,
Armandus offert hîc Salutis aram.
Oceano extructos supereminet hoc opus labores :
Hoc purpuratæ Gloriæ trophæum.

LUDOVICI XIII.

JUSTI, PII, VICTORIS

TRIUMPHALI MEMORIAE.

Cùm an. M. DC. LXVI. Templum, cujus ipse, redux ab expugnata Rupella, primum lapidem jecerat an. M. DC. XXIX. jam perfectum ornatumque MARIAE VICTRICÆ dedicaretur.

ODE XII.

SECURIS amicum, nec violabile
Stabit trophæi Borbonii decus,
Nimbosa dum stabit Pyrene
Magnanimo superata Regi;
Dum fronte Olympum terrificâ minax
Invadet Alpīs : quo bene provida
Natura vallo, destinatam
Imperio Ausoniam, Comata
Formidoloso gentis ab impetu
Munivit. At vim quæ mora Gallicam
Objecta sistat ? non fragosus
Saxa rotans scopulosque torrens;
Non frigus æternum, & rigidæ nives
Cæloque mistæ ; aut vallibus horridis
Patentia in præceps sepulcra, &
Vix aquilis juga transeunda.
Per inviorum confraga montium,
Ceu prata Virtus mollia permeat,
Collesve formosi supinos
Tiburis, aut nemorosa Tempe.
Virtus periculis latior emicat,

Rebusque robur ducit ab arduis.

Nec solus Alcides, & audax

Hannibal acris ferentur

Transcendere arces. Ivit, aeneas

Moles agendo, fulminis æmulus

Bellator, & longè tremendis

Intonuit LODOICUS armis.

Coram ipse primos instruere ordines;

Pugnæ ipse princeps, ore, manu suos

Urgere gaudens, perque anhelus

Nubivagas volitare turmas.

Segusionis dira repagula,

Ferroque vastisque aspera cautibus,

Disjecit, insultare nimbis

Victor ovans, trepidisque castris.

Casale captum nec potuit capi.

Terrore magni nominis haud semel

Servatum, & Hispanos labores

Risit & indecores receptus.

Vis jura firmat. Mantua Francico

Asserta in hostes Austriadas Duci.

Regis triumphos, mox amicum

Allobroges subiere fœdus.

Exin revulsâ Ruscino januâ

Latè trementem pandit Iberiam;

Perrupta ut olim Pigneroli

Claustra, Italæ patuere fauces.

Quid Atrebatum mœnia, Belgici

Dicam Leonis rapta cubilia?

Quid clara Germanas per oras

Palmiferi monumenta Regis?

Cadente Nancejum Austrasiâ rapit;

Sedana cursu robora proterit:

Rhenumque captivo Mosellæ

Adjicit, Alsatiâ Brisaco.

Fractos sed annes, & domitis stupens
 Trophæa ripis prosequor ! en , mari
 Depacta , jamdudum vagantem
 Prodigia increpitant Camœnam;
 Ducto æstuosas aggere per vias
 Obstructa Rupellæ Oceanus freta
 Sensit , reluctantique frustra
 Sustinuit juga dura collo.
 Frustra procelloso infremuit sinu ;
 Tumenſque ſpumanſque, & ſocios vocans
 In bella ventos , & furentum
 Agmina conglomerans aquarum.
 Terrâ potitum denique Principem
 Et ipſe adorans , imperioſum onus
 Demulſit ; ac, pulſo Britanno,
 Fræna pati docuit Rebelles.
 Ergo illa Regum ſpernere contumax
 Divûmque leges , illa diu ferox
 Rupella , telluris ſuperba
 Præſidiis pelagique , ceſſit.
 Artis ſtupendo tandem operi ſuos
 Inſana faſtus mœnia , funditus
 Excifa , ſummiſere , Francis
 Dignæ animis opibusque moli.
 Quânquam caducis non opibus ſtetit
 Superba moles , non animis virûm.
 Vim tanta cœleſtem probavit
 Machina , bellipotenſque Numen:
 Dux belli, & autor conſilii, Deus ,
 Sux ipſe vindex cauſæ agit , & pios
 Juvat labores , ſæva Regi
 Proſubigens elementa Chriſtus.
 Florent amicâ Virgine lilia ,
 Suſpenſa nutu quam domino colit
 Victoria; & plauſis MARIAM
 Tom. 2,

Advolitans comitatur alis.
 Agnovit altam Borbonides opem ,
 Lustrale in urbis compita ferculum
 Secutus ; augustamque pompam
 Rex humili celebrat triumpho.
 Tunc erutarum informibus arcium
 Surgunt acervis splendida Numini
 Trophæa : Rupellæque prisco
 Templa micant renovata ritu.
 Tunc auspicatâ magnificum imbuit
 Dextrâ laborem ; dum pia Virgini
 Victor Patronæ , sumptuosas,
 Digna refert monumenta , grates.
 Augusta primi quam lapidis manus
 Jactu dicarat , crevit ad æthera
 Tot ducta in annos , Conditori
 Posthuma laus , operosa moles.
 Nunc Templa sacrant Regia Præfules :
 Infusa fervet supplice civitas
 Pompâ ; vaporatumque thuris
 Nube locum facibus coronat,
 Gemmisque & auro sidereus nitor :
 Tubisque plectrisque , & liquido virum
 MARIA cōcentu , MARIA
 Regifico venerata cultu.
 Discant, MARIÆ quid valeat favor ,
 Ducesque Regesque. Et solidam cliens
 Mox Galliam Divæ sacravit
 Rex memori celebrandus ævo.

ANNÆ AUGUSTÆ,

CHRISTIANISSIMI REGIS PARENTI,
DE PRÆCLARA PUERITIÆ REGIÆ
REGNIQUE ADMINISTRATIONE.

ODE XIII.

O Lux Austriaci sanguinis ! ô decus
Ingens Borboniis addita liliis !
Regum Progenies, Nupta, Soror, Parens,
Cognatum Superis caput !
Tu donum referens, ANNA, suum Deo,
Gaudes magnifico splendida fœnore,
Et congesta refers munera Filio,
Supplesque officiis Patrem.
Materno Pietas ex utero comes,
Et canæ Fidei Religio tenax
Accrevit Puero, sedula dum tuis
Natum moribus imbuis.
Formæ fidereis floret honoribus,
Vultusque imperio par animum refert,
Majestasque suæ conscia purpuræ,
Vivis confita liliis.
Felix Prole Parens, an magis aureâ
Felix Matre Puer ? mutua gaudia
Certant, & paribus blanditiis Amor
Alternas geminat vices.
Nec tantum placido Mater in otio
Formasti Sobolem ; crebra laboribus
Durasti tenerum, nec metuens tubas
Armorumque pericula.
Implumes aquilæ ceu super incubans
Pullos cura fovet ; mox, ubi puberes

Alas succutiunt, in vacuum evolans

Nido provocat aëra ;

Et sublime docet rumpere iter ferox

Nubes per medias, atraque fulmina :

Et Reges avium fingit, & arduo

Exercet propior Jovi.

Sic tu sexum animo vincere fortior ;

Eduxti Puerum rebus in asperis,

Longas ire vias, Martis opus grave

Primâ ferre puertiâ,

Civilesque acies vincere & hosticas ;

Castrorum ô eadem Mater, & obsequi

Regalis memorem concilians Deum,

Arisque eliciens opem !

Palmas usque tibi sic meritæ novas

Bellator referat, pulchrior aspici,

Utcunque os calido flumine regius

Sudor pulvereum lavit.

Mox pacem cupidus, quam patriæ dedit ;

Europæ solidam condât ; & impios,

Tot jam perdomitis gentibus, acrior

Thracas marte petat sacro.

Tunc Francum Solymæ regia Vindicem ;

Tarpeioque jugo Golgotha clarior

Perfusa Odrysi sanguine lauream

Augusto excipiet sinu.

REGIA SOTERIA

AN. CIO. IS C. LVIII.

AD FRANCIAM

DE LUDOVICI VICTORIS
gravi periculoſoque morbo.

ODE XIV.

PÆANE ovantes junde lyræ modos,
Et martiales, Francia, laureas:
Defuncta fatali periclo;
Magnifici rea surge voti.
Converte in hostem luctificos metus,
Gravesque curas, queis modò saucia
Regem ambiebas, jam propinquo
Ægra jacens simul ipsa letho.
Communis, cheu, quàm tenui salus
Filo pependit! terret adhuc minax
Imago cladis: mens refugit;
Attonitos vibrat horror artus.
Quàm pænè merſum funere vidimus
Recens trophæum! dirigit metu.
Gradivus: effluxit ſariſſa;
Puniceæ cecidere criſtæ.
Inviſa lauros trudere palidas
Cœpit cupreſſus: tunc pede languido
Victoria hæſit. tunc & hostis
Arma novò ſtupefacta caſu.
Jam fuſa campis agmina Belgii;
Dunkerqua Iberis rapta leonibus:
At hoſte Rex fracto tremendus;
En, medio immoritur triumpho.

Illum æstuosis turbida febribus

Vis carpit : illi nec rapidum levat

Aut umbra palmarum calorem,

Liligeræ decus aut coronæ.

Non forma Eoo fidere clarior ,

Non flos juventæ purpureus , neque

Cognata Majestas Olympo

Implacidum repulere Morbum.

Frustra superbos ænea roborâ

Postes obarmant , & vigilum cohors:

Ahena nec fatum retardant

Claustra , nec Helvetius satelles.

Mors prædâ onustos expoliât duces ,

Vanamque pompæ mutat imaginem;

Axem triumphalem pheretro

Vertit , ebur tumulo curule.

In pulverem , ex quo primum homini genus ,

Jussos resolvi non revocabilis

Lex urget ; & noxam parentis

Terrigenum luit omnis ordo.

Addicta letho turba semel , patet

Casus in omnes. hunc gladius metit ;

Hunc fluctus haurit. flamma, plumbum,

Cuncta , avidæ data tela Morti.

Pars prima cladis quisque tamen suæ ,

Mortem armat in se corpore noxio.

Casasque pastorum pèrerrat ,

Morbus atrox, luparasque Regum.

Tuum ille totis, Francia , viribus

Caput petebat : magnanimum labor

Feralis excepit laborem ;

Bella domi graviora Martem.

Nam militari pulvere sordidus ,

Pacisque mixtas ore ferens notas ,

* Dunkerquæ.

* Neptuniæ Princeps revicta

LYRICON LIBER I.

32

quam ad urbē
recens expu-
gnatam cum
Ludov. excu-
risset, morbo
inde contracto
gravissimè Ca-
leti conflictatus est.

Mœnia pervolitarat urbis,
Hic jura captis debita civibus
Sancit Britanni fœderis arbiter ;
Vindexque libertatis Heros ;
Relligio , tua sacra firmat.
Castrensi arenâ vix reducem , aulicam
Sedem ad Caleti , protinus occupat.
Insana Febris ; sævit , ardet ,
Ceuspoliis inhians opimis.
Immane , quantum est ausa lues nefas.
Sacrum veneno nec timuit lues
Rubente funestare corpus ,
Et niveos violavit artus.
O quæ doloris lethiferi seges !
Hoc , quem medentum vulnificæ manus
Haurere , quot quæri cruore
Francigenis potuere regna!

A D

CHRISTIANISSIMUM REGEM,

DE SUA IN MORBO EXIMIA PIETATE,
Fortunæ vitæque contemptu.

ODE XV.

IMAGO summi vivida Numinis,
Mortale numen , quis, LUDOVIX , tibi
Tunc sensus , heroïque virtus
Pectoris , indomitumque robur;
Nil te fugacis Gloria moverat
Regni , aut Voluptas. Omnia, splendorum
Inane , claræ visæ menti ,
Aura levis , tenuisque fumus.
Imaginofa qualia fascinant
Sensus inertes gaudia somni ;

C iij

Errore vel grato morantur
 Picta vagæ simulacra scenæ.

Ludicra rerum despicias arduus;
 Nec te virentis blandus amor tenet

Ætatis, & vitæ cupido;
 Finitimæ neque mortis horror.

Apud Tun-
 quinenſes præ-
 ſente Rege ne-
 ſas mortem ap-
 pellare proprio
 nomine.

Exegit Rex
 æger, ſibi ut
 maturè diſcri-
 men extremū
 denunciaretur.

Mors nudo & abſens nomine vulneret
 Formidoloſos, barbara quos colit

Aurora, Reges; & nefandum

Verba tegant ſinuoſa monſtrum.

Tu nescienti obrepere ſubdolam
 Mortem vetabas; præcipere obuius,

Totamque metiri irretorto

Viſu avidus, ſolidaque mente.

Scit, regiarum teſtis idoneus

Laudum, Adminiſter, purpureo ſinu

Qui Principem educens alumnum

Conſiliis, animiſque finxit.

Morbi inter æſtus, non tamen immemor

Fatalis horæ, jam ſuus, & polo

Ereſtus, ac maior dolore,

B O R B O N I D E S ſua fata vincit.

Sicco perennes lumine lacrymas

ſpectat ſuorum, immobilis unicè,

Qui fletur; æternamque verſat

Morte vigil properante ſortem.

Ah, perſicacis cedite, cedite

Venena Morbi. Jam Pietas moram

Fatis, & incenſo medelam

Attulit ætheriam dolori.

Votis calentes aſſiduis Deus

Reſpexit aras, dum populos rapit

Templiſque certatim aſſuentes

Regiæ amor cruciat ſalutis.

Quin ipſe ad aras victima, regii

Solvit pericli grande piaculum ;
 Steritque delubro sub alto
 Propositus , panacea , Christus.
 Quid , Sospitator cum pavidam Deus
 Intravit Aulam ? viseret ut gravis
 Levamen ad Morbi vocantem ,
 Sidereâ Deus arce venit.
 Non ille amictu luminis aureo ,
 Sed orbe passus triticeo tegi :
 Præsens & augustos honores
 Dissimulat sine fraude Numen.
 Sublustri in umbrâ visum acuit Fides.
 Agnovit , & Rex pectore candido
 Totaque adoratum recepit
 Mente humilis , famulumque gessit
 Mox æstuantî pax animo redit ,
 Quiesque membris. Scilicet hospitis
 Tanti sub adventum remisit
 Tetra lues , Dominumque sensit.
 Vis inde morborum emicuit potens ;
 Mortali ut olim plurima corpore
 Manabat in turbam sequacem ,
 Omnigenas medicata pestes.
 Vis alma sensim Pæoniis favet
 Infusa succis. Non hominis manu
 Mors fracta , non artis magistræ
 Parta Salus trepidente curâ.
 Votis redemptam fruge Opifer dedit
 Mirâ Salutem. Major agit Deus ;
 Regemque majora ad trophæa ,
 Quem patriæ dedit , ipse servat.

Utro divinam
 expetiit Eu-
 charistiam ; ac
 diem , celesti
 cibo refectus ,
 multo quietio-
 rem habuit,

REGINÆ MATRI

OB SANITATI RESTITUTUM A DEODATUM
GRATULATIO.

ODE XVI.

REGINA, sævis parce doloribus
 Secura Nati. sollicitam diu
 Ah, Mortis elato sub ictu
 Jam nimium est tremuisse Matrem.
 Cadente Nato, noctem oculis procùl,
 Procùl quietem pectore pervigil
 Arcebat acri cura morfu:
 Ipsa dies sine luce fluxit.
 Exesa curis, te dapibus negas;
 Salso cruentum flumine flebilis
 Pascis dolorem, visâ caræ
 ANNA supermoritura proli.
 Affixa Regis perpetuum toro
 Sic allaboras! Collige te, Parens
 Augusta, nunc tandem: revixit
 Matris honos, timor antè, Natus.
 Sic ille pictæ candidus areæ
 Rex, imbre largo. fessam ubi liliū
 Cæleste cervicem reclinat;
 Flora comas laniata mœret.
 Nubes iniquas, invida sidera,
 Ferumque culpans increpitat Jovem,
 Quod Veris, heu, latos honores
 Fœdat hiems populante nimbo.
 At, imbre pulso, firmam ubi liliū
 Cervicem apricâ sustulit areâ,
 Blandâque majestate risit,

Flora comas religare gaudet.
 Tunc Sol amicus, tunc Zephyri placent :
 Laudat sereni tunc faciem Jovis,
 Gratatur & salvos honores.
 Nympha avidis relegens ocellis.
 Ut mollis argenti ille nitet calix,
 Lactive puro concolor, aut nivi !
 Jam forma post tristes procellas.
 Gravior & species relucet.
 Ergo (profana absistite nomina)
 Votiva felix dona Parens, age,
 Christoque tutelæque Regni
 Solvere Christiparæ memento.
 Tecum Philippus gestiet, altera
 Spes ille Matris, gloria Franciæ;
 Cui vita Germani, coronâ
 Dulcior, obsequiumque regno.
 Proh mira Fratrum gratia ! perdius,
 Pernoxque (tantum verus Amor potest)
 Andinus iratum premebat
 Supplicibus lacrymis Tonantem.
 Privatæ amantem legis, & arbitri,
 Fratrum quietâ lite modestiam
 Cyri super sceptro vetustas
 Jactet, Achæmeniâque gazâ.
 Hac regnat Aulâ pulchrius indoles.
 Fraterna, & omni fortior ambitu
 Natura; Fortunæque calcat
 Illecebras, tumidosque fastus.
 En, ANNA, morum, queis geminam parens
 Prolem imbuiſti, præmia colligis;
 Gaudesque concordi tuorum
 Fœdere, pacificoque nexu.
 Uterque, certans officiis, tibi
 Natus, nec unquam degener approbat,

Sereniss. Phi-
 lippi, tunc An-
 dium Ducis, in
 Regem fratris
 amor.

Quid sanguis, & materna possit
 In teneros pietas amores.
 Lux alta magni, Julius, imperi,
 Fidumque Regi pectus, & asperos
 Lætisque per casus probatum,
 Quos animo celebrat triumphos!
 Quid Aula, luctu sordida publico,
 Quos deinde cultus induet aurea?
 Quas castra, florentisque signa
 Militiæ paritura lauros?
 Jam tota festis emicat ignibus,
 Jam tota ovanti carmine personat,
 Gratasque sollennem per urbes
 Gallia Lætitiâ reducit.
 Hygia Morbos, & trepidos fugat
 Longè Dolores. Regis, iò, Salus,
 Quot Gallus hostili superbos
 Clade tulit, superat Triumphos.

LUDOVICO REVALESCENTI

ODE XVII.

Actum fuerat
 de vehiculo, in
 cubiculi spe-
 ciem confor-
 mato, quo re-
 valescens Lu-
 dov. molissi-
 mè deportare-
 tur à stipatori-
 bus.

Q U O Dædalei te novus ingenti
 Labor, superbæ regia machinæ,
 Portabit à morbo recentem,
 Lux patriæ rediviva, Princeps?
 Prætorianos gloria milites
 Urit vehendi. Pondere quæ premit
 Imposta Majestas anhelos,
 Claro eadem reficit labore.
 An & quadrigæ jam patiens tibi
 Corpus, viarum nec metuens, torum
 Rejecit, ac tecum Salutem
 Rheda feret, populique vota?
 I, molliores quò, Ludovix, vocant

Auræ volentem : seu tibi Lalii
 Amœna, Vicennæve Saltus,
 Seu lepidi placuere Fontes.
 Quodcumque perges, huc ô Etesia,
 Huc mitis Æstas. frangat & igneum
 Virgo leonem : nil minetur,
 Et rabiem Procyon remittat.
 Hic se innocentis Regia Gaudii,
 Hic Franca Tempe lætiùs explicant :
 Viresque detritas labore
 Otia restituent amica.
 Ruri invidentis regna Lutetia,
 Suis revulsæ jam propè sedibus,
 Quot regiam optarunt salutem;
 Tot reditum precibus reposcunt.
 Adversa nudant, prospera quos solent
 Celare sensus. jam tibi civium
 Gratare jam certos amores,
 Corda virum retegente morbo.
 Effusa sospes gaudia conspicias ?
 Francos per omnes qui præiit Dolor,
 Fidem ille præstruxit secutæ
 Lætitiæ, fugiente morbo.
 Damno excitatur ; segnior est Amor
 Securus usu. Cara periculum
 Commendat ; & præsens carendi
 Sollicitos timor addit ignes.
 Cultu & Tuorum jam mediâ redis
 E morte notus dignior. hîc fides
 Probata morum ; clariorque
 Morbo animus, pietasque fulsit.
 Deliria inter, nil nisi Celticos
 Spiras triumphos, grataque prælia :
 Ad te reversus, nil Olympum
 Præter amas, Superumque pacem.

Nunc lapsa tecum volve pericula ,
Prudens futuri , jamque tuis mori
 Doctus periclis ; redde grates
 Cælitibus , patriæque curas.
Semel fugatam non fugies tamen ,
Inviète , Mortem , tempore cùm suo
 Recurreret olim. Nunc superstes
 Vita novis geminanda factis.
Quodcumque retro vitæ abiit , tenet
Mors ; & peractos nil revocat dies.
 Impende , cui debes , salutem :
 Vive Deo , patriæque , Princeps.
Mentem caduco corpore segrega ;
Cæloque , terris altior , immine :
 Et pacis , & belli labores
 Sic tacita meditare in umbra.
Terræque , pontoque interea tibi
Trophæa crescent undique sospiti :
 Palmisque , Vicennæ sub arces ,
 Fertilibus nova silva furget.
Salute cari gaudia Principis
Concepta miles nunc alacri manu
 Effundit infirmos in hostes ,
 Damnum avidus reparare morbi.
Tu mox receptis viribus integer
Sanabis ægræ vulnera patriæ :
 Errore firmabis labantem
 Perdomito Fidei columnam.
Pacemque , bello quam cupidus petis ,
Præfers triumpho , victor , & , hostibus
 Æquam subactis ferre legem ,
 Otia Christicolis reduces.
Huc belli , & idem Justitiæ potens
Exemplo adurget magnifico Pater.
 Nomenque , Virtutemque servas ;

LYRICON LIBER I.

47

Cœpta pii Genitoris imple.

Adest, Parenti Cœlituum favor

Expertus olim, Regem ubi territus

Jam morte anhelantem propinquâ

Vidit Arar, lacrymisque fluxit.

Postquam tremendas Herculeo gradu

Subegit Alpes, fulminis in modum

Nimbosque perrumpens, & armis

Feta ruens scopulisque claustra:

Lauris onustum non superabilis

Heroa morbus stravit; & igneo

Cedebat æstu, qui frementes

Oceani domitarat undas.

At nascituro provida, Rex, tibi,

Funus paventi provida Galliæ,

Tunc visâ sustentare vitam

Sidera præcipitante fato.

Sacrâ refectus convaleuit dape;

Novasque pingui lætus adoreâ

Surrexit ad pugnas, & altos

Auspicio Superûm triumphos.

Patri quod unum defuit inclyto,

Cœleste Pacis perficies opus.

Servata in usus vita sacros;

Grande Deo repetente fœnus.

Ludovicus
XIII. Lugdun.
periculosè de-
cubuerat an.
1630. suscepta-
que convales-
cat Eucharis-
tia.

EIDEM CHRISTIANISS. REGI

Pro Societatis Jesu in Venetam ditionem
confecta per Legatum revocatione.

ODE XVIII.

NON semper tumidis Hadria fluctibus
Spumantes agitat cum fremitu minas;
Infestamque procellâ

Præcludit tatibus viam.

Austros cùm revocat mollior Æolus ;

Et clausis hiemes montibus obruit ,

Emittitque nitentes

Puro vere Favonios ;

Stratas risus aquas mulcet amcenior ;

Decurrunt liquido marmore navitæ ;

Lætas portus amico

Puppes jam recipit sinu.

Sic Ignatiadas publica Res diu

Exclusos Venetis finibus advocat ,

Fracto mitior æstu ,

Irae nec veteris memor.

Perfectum arbitriis grande tuis opus ;

Rex Auguste ; pii nec tibi muneris

Partem , sponte secuto ,

Romanus Pater invidet.

At non liligeris hæc nova Regibus

Venit , nec subitas cura dedit preces.

Longum causa laborem

Sacri moverat Agminis.

Et , pacis , dubium , major honoribus ;

An belli titulis , Borbonius Pater ;

Et qui deinde secutus

Princeps , Justitiæ potens :

Ambo sollicitis , haud semel , invia

Aggressi studiis claustra revellere ,

Obstructamque severis

Urbem pandere legibus.

Frustra. namque tibi , Rex , memorabilem

Servabant Superi laudis adoream.

Tempestitiva negatos

Concessit reditus diës.

Rerum certa suos fata regit tenor.

Quod poscebat Avus , quod Pater , elicis :

Legatusque

LYRICON LIBER I.

49

Legatusque repulsæ

Præcidit similem moram.

Felix clade cohors, Regia quam levat
Transfusa in sobolem cura parentium!

Lævâ quam pius ornat

Jactatam invidiâ favor!

Sacris Oïmanidûm ferrea pandere

HENRICUS valuit regna coloniis,

Et Chalcedone sedem

Fixit Christifero gregi.

Pacato volitant per freta Bosphoro,

Primævamque ferunt in populos Fidem.

Romæ discedit olim,

Heu, jam barbara Græcia,

Et fœdâ miseros implicuit lue

Errorum populos, nunc DIONYSIUM,

Et, quam Gallia debet,

Græcis restituit Fidem.

Agæo instabiles Cycladas æquore;

Nec non igniferis horrida quas vadis,

Emergente profundo,

Tethys protulit insulas;

Tractus & Syrios, pinguem & Ioniam

Puris missa colit religionibus

Loiolæa propago,

Tanti numine Principis.

Certum Ignatiadis præsidium domi

Hic idem statuit, cum Furor impius,

Tortosque Hæresis angues,

Atrasque incuteret faces.

Quin tractanda animæ vulnera credidit;

Et quæ Corda pius viva dedit, nece

Idem functa sacra vit

Mausolæum animans Amor.

Nec Magni Soboles Borbonidæ minor,

Tom. 2.

D

50 LEONARDI FRIZON
Auxit mox patriæ munera gratiæ;
Quæ tu, Maxime Regum,
Accessu cumulas novo.

SERENISSIMÆ REIPUBLICÆ

OB REVOCATAM SOCIETATEM JESU.

ODE XIX.

REGINA, celsum quæ caput Hadriæ
Turrita tollens marmoreo finu,
Neptunios Trojæ labores
Vincis, Apollineosque muros;
Terris & undis imperio potens,
Infanientis cornua Bosphori,
Viresque Byzanti superbas
Frangere, Barbaricæque Lunæ!
Tibi Lacenæ fama vetus rei,
Regina, cedit; cedit & Atticæ
Confessa vinci; nec Senatum
Martius æquiparare Collis
Ausit verendis cum Duce Patribus.
Nec ipsa, quanquam Regibus æmulos
Divis que Conscriptos stupebat,
Roma tuos superet Catones.
Non hîc beatâ partum opulentiâ
Jactare nomen; non Italis decus
Auctum triumphis, & vetustas
Fert animus revocare palmas,
Quas transmarinis Relligio parit
Asserta bellis. Quid Syrias loquar
Pugnas, & insignes trophæis
Euganeis Orientis oras?
Nunc & furorem, vimque Othomanicam,
Invicta tanto pondere, sustines;

LYRICON LIBER I.

59

Et sola communem repellis,
Christiadûm velut agger, hostem.

Sed altiori carmine, nec lyrâ,

Famæ sed omni bellica laus tubâ

Sonanda vênit, sæpe iniquo

Antè mihi tenuata plectro.

IGNATIANÆ quid sacra debeant,

Dicam, Cohortis; quam propriis volens,

Et rite purgatam, reponis

Sedibus, ac solito flagrantem

Reddis labori: publica cui Salus,

Summique in omnem Gloria Numinis

Spectata partem. Sic Parenti

Magnanimo, placitumque Natis.

LOIOLA lecti Dux bonus agminis,

Non ille vobis cum focia manu

Ignotus olim, dum benignam

Egregius colit hospes urbem.

Istinc solutâ vector inops rate,

Mortalis ivit conscia Numinis

Ad arva, & imbuti cruore

Lustrifico juga sancta montis.

Istic, phaselo navifragas putri

Remensus undas, moribus imbuir

Plebemque Patresque, & coruscas

Sparsit agens pietatis ignes.

Noctis per umbram vox quoque Numinis

Audita, servum quærere pauperem

Jubentis: & nudâ cubantem

Nactus humo, gelidumque Egenum.

Marci ante valvas, Patritius domo

Civis recepit. Neu grave deforet

Omen futuri; posterorum

Fata suo Pater aspra visus

Signasse casu: quippe calumniis

52 LEONARDI FRIZON
Fœdè petitus, difficili tamen

Emersit illæsus procellâ,
Clarius & rediit periclo.

Queis non egenos officiis, inops
Et ipse; quo non cum Sociis pio
Amore complexus jacentes,
Et studio recreavit ægros?

Magno secundus XAVERIUS Duci

Quantus refulsit! pleno avidus bibit
Dirum ore tabum. Dedicatus

Haud meliùs labra carbo purget;

Linguaque feri temporis angurem,

Quæ Christum Eois gentibus intulit.

Torrente nunc tetros Voluptas
Nectareo bene pensat haustus.

Vestro eruditi pulvere Calites:

Isto explicavit se, VENETI, Patrum

Virtus theatro, mox per Orbem

Belligero spatia cursu.

Heroa nusquam degeneres agunt

Exempla Natos. ilicet ordinem

Rectum, & vaganti fræna ponent

Tramite in ancipiti juventæ.

Doctrina mores format, & integri

Legem pudoris. Palladiâ nitet,

Segesque virtutum palæstrâ

In patriæ decus alta surgit.

Quo pubis illos lubrica pectora

Firmare cultu, fingere cereas

Mentes renarrem? quas profanis

Cum studiis pietatis artes?

Jam templa felix ætherii satus

Verbi replebit: jam populus frequens

Ritusque sacros, nec caducæ

Præsidia excipiet salutis.

LYRICON LIBER I. 33

Et inter audax classica, qui sacro
Devota bello pectora militum
Procuret, exultat Sodalis
Vim socians, Superosque ducit
Commilitones. Ausoniam Fidem
Graiis remiscens involitat plagis
Jesu manipulus. crescat urbis
Imperium, Fideique crescat.

CYPRIANI SPECULA,

SEU

LABORANTIS SEculi CONTEMPLATIO

AN. CIO. IO. C. LVII.

ODE XX.

ASCENDE, quò te Punicus evocat,
Donate, Præsul: montis in arduum
Subductus eluctare culmen,
Nostri etiam Speculator ævi.
Hinc Argus olim mysticus Africæ,
Longè trahentis funera seculi
Latèque prospectum petebat
Acri acie radioque mentis.
Heu quanta fati nubila flebiles
Mersere terras! ah-miserum chaos!
O fluctuantum scena rerum!
Proh Stygiæ facies Erynnis!
Obsessa cernas arva latronibus;
Infesta cernas æquora, & undique
Horrore castrorum cruento.
Sparsa truci monumenta belli.
Privata mitto crimina, publici
Censor furoris. Sanguine mutuo
Et cæde confusâ redundat.

Alluditur ad
epist. S. Cy-
priani Donato
inscriptam, &
ad Isaia caput
XXI.

Orbis atrox, scelerumque tota
 Jam mole certat. Francigenûm, Dolor,
 Obvolve clades; ne patriæ (fatis
 Externa collustrasse) tactu
 Vulnera dilaceres acerbo.
 Procella quo se Bætica littore
 Franget? quid auro turbidus æstuat
 Tagus? quid aversus remugit
 Mincius, Eridanusque discors?
 Quid tauriformi Vistula concitus
 Vultu minatur? Vandalici jugum
 Superbus excussisse Regis,
 Armisonâ modulatur undâ
 Grates Gedano. Sed quis erit modus
 Tot luctuosæ Sarmatiæ malis?
 Victosne post Suecos pericla
 Silvicolis iterata Dacis?
 Gotho imminentem colligit impetum;
 Balthinque Cimber fervidus infilit.
 Borussiæ infundenda, tractus
 Moscuâ Liyonicos inundat.
 Iô, furentes Cæsareâ domo
 Restingue flammâs, Austria. Regiæ
 Jam parte consumptâ, Viennam
 Corripiet populator ignis.
 Funestus, eheu, quot lacrymas tibi
 Portendit ardor! scilicet Imperi
 Flagrantis, extinctique fato
 Omen habet grave Ferdinandi.
 At, ecce, versum jam solium excitat,
 Regalem Olivæ fronde Britannia
 Nectens coronam; sed rebellis
 Prodigio tremefacta turbæ.
 Fecunda monstris Tænara pullulant.
 Jactata terris Occiduis Fides

LYRICON LIBER I. 35

Transmigrat Auroram. ferorum
 Nil Japonum laniena terret,
 Dum regna pandant Sinica Tartari.
 Europa telis induitur suis,
 Gentisque cognatas in arma
 Hesperii rapuere Reges.
 Nec Christiani gratia nominis
 Pacavit iras? Barbarus ingruit.
 Marique terraque, hinc Zacyntho,
 Dalmaticæ hinc metuendus ora,
 Gustavus alter cuncta sub ultimam
 Permisset Arcton. dira repentibus
 Grassata tempestas ab Austris.
 Ausonias viduavit urbes.
 Seclis misertus, jam speculam fugis.
 Donate? fletum parturiens dolor
 In corda sævit. jam Videntis
 Genua labant, animusque linquit.

LUDOVICO XIV.

SEDANENSIS COLLEGII SOCIETATIS JESU
 REGALI MUNIFICENTIA FUNDATORI.

ODE XXI.

O RB I tremendum nomen, & Arbiter
 Auguste rerum, Cœlituum genus;
 Sceptrumque, & altam, Ludoïce,
 Exuperans animis coronam!
 Thracum furores frangis, & Imperi
 Vindex paventem protegis Austriam;
 Cogisque Chattorum rebelles
 Jura pati Dominumque turbas.
 Ubique curam plurimus explicas
 Sacris laborans: porgis ab Hespero

Esfordia Fran.
 cis armis E-
 lect. Mogun-
 tiæ asserta.

Manus ad Auroram ; ultimisque
Francigenæ sociantur Indis.

Templa Cal-
vinianorum
excisa , cum
rota passim
Galliâ , tum
verò in Dyna-
stia Sedanensi
plurima.

Calviniani septa ruunt gregis.

Sic expiatam splendida Galliam

Strages levavit : non-caducæ

Sic statui monumenta laudis ,

Et Christiano surgere Principi

Trophæa gaudent. Nec minus & pias

Moliris , Ædilique dignas

Rege domos , Superûmque cultu.

Quot erudito pulvere ferveant ,

Aperta narrem curricula ingenî ,

Morum palæstras : tardiori

Cuncta nefas peragrarè versu.

Stet meta Sedanum , insuperabilis

Arx illa bello , quæ caput arduum

Intentat astris , quantum in auras

Ætherias , media inter actæ

Moles superbo nubila vertice ;

Tantum refofso præcipites solo

Minantur , abruptæ dehiscunt

Gurgite circumeunte cautes.

Hic auspiciatum Gymnasii decus

Regalis ; & nunc Aonidum choro

Amica Gradivi patescunt

Castra , pio fociata Phœbo.

Dum structa saxo cornua & aggeres ,

Tutisque propugnacula mœnibus

Labore crescunt pertinaci ,

Arma virûm furiasque contra ;

Arx , ecce , Francis addita finibus ,

Et non inermis præsidii Cohors ,

Erroris infestam profani

Disjiciet scelerumque labem.

Quid Lupoico quæ proavo dicans ,

Rex, templa delubro objicis impio,
 Sanctos receptus, & paranti
 Transfugium loca fida turbæ?
 Quin mista Francæ Belgica confluet
 Pubes juventæ. nobile gentibus
 Artesque Virtutesque pandit
 Regifici hospitium Lycei.
 Ergo & benigni munera Principis,
 Et vota sancti grata Sodalium,
 Quicumque cœlestem fatigant
 Militiam, tua, CHRISTE, signa
 Crucemque toto, quâ geminus patet,
 Mundo secuti; Nomine quos tuo
 Ductuque dignatos & armis
 Tartareum extimulas in hostem.
 Neque improbas spes, esse jube ratas,
 Rex summe Regum! Pax redeat sacris;
 Sceptroque componat sub eodem
 Una Fides Pietasque Gallos.
 Orbi regendo crescat idoneus,
 At serus heres, flos tener imperi
 DELPHINUS, Augustoque Princeps
 Longa Patri societ trophæa.

LUDOVICI DELPHINI

PALÆSTRA,

SEU

REGIÆ PUERITIÆ
EXERCITATIONES.

PRÆSENTIO AD SERENISS. PRINCIPEM.

ODE XXII.

QUALEM, purpurei fideris excitus
Ortu, nec-timidâ præcinui lyrâ,
Jam DELPHINE refers : augurio fidem
Sancis, & citharæ jam superas modos.
Toto quàm species Regia corpore
Florens attonitis obvia sensibus,
Permulcetque oculos, cordaque pellicit!
Quàm, DELPHINE, tuæ vivida lumina
Spirantis Clarium mentis Apollinem!
Quàm vibrant animi Martia fulgura!
Hæc Vatem rapiunt: nec dubias alit
Tanto spes Genitor pignore, conscius
Quid virtus valeat sanguinis inclyti,
Heroæque animæ cultus & indolis.

EXERCITATIO GEOGRAPHICA.

ODE XXII.

NON te, Auguste Puer, deliciis capit
Et molli vacuum detinet otio.
Miris Laja nitens compta leporibus,
Aut quæ Versalias Gratia prætulit

Vinceno nemori, Bellaqueo lari.
Belgarum domitor ceu rigidas Pater
Dextrâ tendit ovans carpere laureas,
Et fines gladio promovet imperi;
Gestis nobilium tu quoque gloriâ
Palmaris studiorum, acris & ingeni
Progressu rapido fervidus emicas.

Primis ingenuas lufibus imbuis
Artes : & facili quæ populos manus
Ductu circumaget, jam radio volat
Axes per geminos; ac sua dædalas
Latè per tabulas regna patentia
Designare sagax, oppida & insulas,
Terrasque Oceano consociabiles,
Et cursus fluviorum, & juga montium.
Hic Isthmon bimarem, flâmi feram hîc Pharô;
Hic saltus Libycos, hîc Brasilos notas:
Vastis quæ regio mœnibus ambiat
Sinus, æriis obsita cautibus;
Extremos hominum quæ Japonas plaga,
Nostris oppositos calcibus, urgeat.
Euro jam Zephyrum, jam Boream Noto,
Francos & Canadæ jungis & Indiæ.

I, docto studii concitus impetu,
Ride, Auguste Puer, quas vagus Hercules
Metas Hesperia fixit & Africâ.

HISTORICA EXERCITATIO.

ODE XXIV.

QUÆ gratis oculos picta coloribus
Demulcent, animos muta docent loca:
Mille inscripta notas, seu solidum globum
Librat cardinibus terrâ volubilis;
Seu molem attenuans, latius explicat,

Adversisq; simul partibus obviis
Totam se nitido porrigit æquore.
Sic & nuda juvat nomina gentium,
Regnorumque situs discere. at inelyta
Dant brutis animam facta virum locis.

Externas peragrans ingenio plagas,
Princeps, longa memor secla recolligis;
Regnandique duces Historias, virum
Insignes animos, grandia nomina,
Pleno magnificè prosequeris gradu.
Ævo nempe tibi sistis ab ultimo
Gentes sceptriferas, Assyrium genus,
Medorum sobolem, Persica stemmata.
Quos victrix Macetum robore Græcia,
Quos septemgeminis ardua collibus
Mundi Roma potens extulit; arbitros
Terrarum omnigenas haud rudis æmulus.
Chartis excutiens, vincere jam paras.
Gallis ante alios Regibus immines;
Sublimes Atavos suspicis: & libris
Quæ spectata, refers lumina moribus.
At vastos nimium parce vagantibus
Annales studiis volvere Principum.
Uni sollicitus rite vaca Patri.
Hic, Heroa tibi secula contrahens
Ac veris superans dotibus, excitet.
Curaꝝ hinc vigiles, corda sagacia,
Pacis disce vias, militiæ modos.
Regi fida comes Relligio sacrum
Tanto læta caput vindice sustulit.
Mirantur Dominum cum populis duces,
Quantus consilio, quantus agat manu.
Hunc unus, reliquis haud imitabilem,
Tu non-degeneri proximus indole
Et laudum titulis omnibus exhibe.

POLEMICA EXERCITATIO.

ODE XXV.

QU AN QU A M emissa semel carceribus volat
 Ætas, par Zephyris, nec patiens moræ;
 Quam testudineo repere, L U D O V I X,
 Tractu visa tibi, laudis & invida,
 Annorum series; dum petit ignei
 Martem vis animi, blandaque & acribus
 Raptans illecebris obvia Gloria!

At tu magnanimam siste cupidinem,
 Aut solare, levi quâ specie licet.
 Artis belligeræ jam decus occupas,
 Haud segni meditans Pacis in otio,
 Quî partes obeas militis ac Ducis:
 Seu commissâ palâm prælia dant pedem;
 Dant conferre manum; dira tonantibus
 Aut torquere jubent fulmina machinis:
 Seu grassans tacitâ fraude cuniculus
 Muris exitium parturit & viris.
 Quo metandu situ castra; quis aggerum
 Vallorumque modus. sive aciem struas;
 Densis quæ potior forma cohortibus
 Armorum varios explicet ordines,
 Campo si pateant æquora libero:
 Sin saltûs latebras, horrida vel juga
 Hostes insideant, sive palustribus
 Intersepta locis agmina muniant;
 Quâ vi, quo subiens dejicias dolo.

Hæc, annos superans, ilicet omnia
 Jamnunc ingenio Belliger arripis.
 Et plura, & brevius discis, ubi arduum;
 Princeps, te referens erigis ad Patrem.

Ut ductor rapidi strenuus agminis
Totum affixus equo conficias diem,
Et noctem solidam sub Jove transigas;
Æstus sole graves, acre feras gelu:
Nec tantum patiens pulveris aut nivis,
Nubes sulfureas inter & igneos
Sævis obsidiis pervolites globos.
Quâ Magnum attonitus vi Batavus ducem,
Quâ turbatus Iber senferat, asperis
Trajecti validum incumbere mœnibus;
Aut quâ terribilem mole Vesuntio
Vidit Sequanicos diruere aggeres.

Non tu solum oculis arma vel auribus
Captans, ac docili pectore bellicum
Jam tirocinium ponere gestiens;
Dudum primitias parvus, equo ferox,
Lustrum inter patrium, fortia ludicra,
Libasti placitâ Martis imagine;
Et strictâ ipse tuas cuspide copias
Præfulgens alacer, jamque animis Ducem
Et curis agitans, imperii capax.
Effusis Proceres, ac populi fremunt
Certatim studiis. Aula Parentibus
Gratata & Soboli, plaufibus æssonat.

Belli quid reliquas effigies sequar?
Aut ut vis teneri corporis aspero
Venatu & rigidis aucta laboribus?
Ut cælo exanimas dejicit alites
Flammatis jaculans dextera glandibus?
Sic Bellonæ habilem rite probas manum
Dianæ studiis; funera & hostibus,
Crebris innocuus cædibus apparas.
Ceui cladem in Phrygiæ natus, & Ilio
Fatalis didicit militiam puer,
Venando Æacides membraque roborans

Audacesque animos. Hectoreæ neci
Cæsis lustra feris per nemoralia
Prælusit validi fervor Achillei.

Quo, DELPHINE, tuis laudibus imparem
Ad scenam referor, ludicra prælia?
Regales animos pascere inanibus
Umbris & specie dum placidâ fugis,
Veri Martis amans, Famæ inhians Puer;
Instas belligero fervidior Patri,
Ducat, quo studium fert generosius.
Agnoscit propriam Martius indolem,
Nec votis Genitor grandibus abnuvit.

Ergo magnanimus castra petis Puer,
Victis, læta ferens omina, Sequanis.
Magni Dola Patris fracta laboribus,
Princeps, ecce tuos ante cadit pedes.
Jam nunc pulchra tuis laurea gressibus
Subnascens, tenero quid capiti parat!
Quam clæræ auspiciû surgit adoræ!

Sereniss. Del-
phini primam
ad castra adi-
tum excepit
Dolæ deditio.

POETICA EXERCITATIO.

ODE XXVI.

REBUS certa suis tempora dividit,
Describitque ratas officiis vices,
Blandis dura levans, serâ ludicris
Intexens variæ lex Sapientiæ.
Hæc, DELPHINE, tuas digerit ordine
Exercetque operas. Mentis, & impigri
Alternant numeros munia corporis.
Membris dum requies, ingenio labor
Et laudis solidæ læta subit seges.
Ac dum terrificos ære cavo sonos,
Quamvis pugnæ avido, classica differunt;
Dulces interea Castalidum lyræ,

Cælesti meritum quæ sociant choro,
Doctis apta canunt auribus. & suum
Tali stat pretium, stat decus otio.

Quondam & post Danaos Romulei Duces
Sævis militiæ functa laboribus
Hac demum requie pectora leniunt.
Victarum exuvias claraque gentium
Musis emeriti nomina consecrant,
Ambo Scipiadae ; principe Julio
Omnis Cæsareæ progenies domûs.
Et , rerum dominis addita fascibus ,
Campo lecta rubens laurea Martio ,
Parnasso enituit lætiùs insita ,
Sacris Pegasidum sparsa liquoribus.

Suaves tu numeros doctus Horatii ,
Nasonisque modos , & gravis aurea
Lætâ mente foves pignora Virgilî.
Vel silvas fragili cāntet arundine ;
Non indigna tuis cantat amoribus.
Et te arbusta juvant ; & properat tuas,
Princeps , grata comas cingere laurea.
Totis mella tibi pura fluunt libris.
Jucundo neque abest utile. temperat
Miris juncta modis splendidus artifex.
Arvis edomitæ imperitat Maro ?
Vinci nempe docet cuncta laboribus.
Ridens ipsa Lepos arva perambulat ,
Hac mollita manu, quæ rigidos vepres
Et rupes violis conserit & rosis ;
Parnasso statuit jura bivertici.
Acres fingit equos , pulvere qui sacro
Grajarum referant præmia frondium ?
Ferventes spatio multus Olympico
Spectator celebras sponte ruentium
Pugnas alipedum , non sine gloriæ

LYRICON LIBER I.

65

Sensu. tangit honos & fera pectora.
 Virtus pro stimulo est; ardor & æmulus
 Urit palmæ agitans nobilis ambitu.
 Quid, cùm Dardaniden altior intonat
 Vates, Cæsareæ gentis originem?
 Pelidæ assiduus facta revolvere,
 Æternæ monumenta inclyta fabulæ,
 Pellæus Juvenis non ita fortibus
 Exarsit studiis; ut tibi bellicos
 Accendens animos, cordaque Martia
 Exemplis resonans grandibus incitat
 Præco Pierius; quem tua, vel parem,
 (Si quem fortè darent Numina) dignior
 Quondam Trojugenâ, fama reposceret.

REGIARUM EXERCITATIONUM

PRÆSIDIA ET ORNAMENTA.

ODE XXVII.

PRINCEPS major Avis (plaudite, Galliæ)
 Naturæque opibus dives, & ardui
 Fortunam exuperans dotibus ingenî,
 Heros laurigeris fingitur Artibus.
 Divis orte Puer rite faventibus,
 Spes ô Franciadûm! secula Filio
 Decurrent patriis condita legibus,
 Ac vi terrificâ, quam Pietas regit,
 Ultrixque ensiferâ juncta Themis manu.
 Latas certus ager res decoris tenor,
 Fortunæque inhibens Prosperitas rotam,
 Curâ mactæ Patris, quâ tibi providus
 Morumque artifices addit idoneos
 Doctrinæque, Puer Regie! tu novâ
 Virtute, & placitis mactæ laboribus.

Tom. 2,

E

Privatâ neque tu laude , nec impari
Contentus titulo , publica munera
Tractas , officiis nec pueriliter
Respondes Procerum. Quàm jubare ingenî!
Oris quàm specie Regificâ stupent
Legatî , & decoris mira canunt tui
Suspensis timidè credita gentibus !

Sic MAGNUS patrio sanguine LUDOVIX
Natum ad summa vocans , egregiis simul
Exemplis habilem perficit. huc Amor ,
Huc Regalis Honos assimilem Patri
Te , DELPHINE , rapit : Gallicus & suis
Defixam radiis Sol aquilam probat.
Aut pictâ croceis nube coloribus
Formam congeminans exprimit auream ,
Solemque ætherio Sol speculo creat.
Clarâ quantus agens ipse puertiâ ,
Sensu jamque gravis , nil pueri sonans;
Qualem nunc populi suspiciunt , virum
Jantum prætulera Semideis parem:
Talem te solio spectat idoneum ,
Vivâque ipse sui gaudet imagine.

Sic pulchris geminæ Palladis artibus
Orbi conspicuus , scilicet unicè
Te versans animo , vixque memor sui ,
Te Dux alloquio format , & incubans
Curis magnificè dulcibus excolit ,
Cui commissâ tuæ regna puertiæ.
Felicem assiduâ perpoliens manu
Naturam , in patrias crescere spes docet ;
Bellonæ pariter clarus adoreâ
Princeps , & placidæ Pacis honoribus
Surgas ut solio major ad æthera.
Justi quæ referant præmia posterî ;
Quo confixa probri stigmatè inertia;

Virtutem excipiat quæ decoris seges ;
Blandis usque monens vocibus influit.

Quid Præses studiorum , eloquii potens ;
Et puro ingénii quem lita lumine
Ornarunt monumenta ; & resonans libris ,
Post suggesta , procùl Suada volantibus ?
Rivis ambrosiæ fusa pèrennibus
Latè per populos , flumina tu prior
Et vivis avidus fontibus hauseris.
Nec tanti sua pars muneris , inclytum
Doctrina & meritis , Huetiaden fugit.

An , quos Borbonii gloria sanguinis ,
Confors & studii gratia Principes
Annectit , fileam ? ceu duo lacteos
Attollunt apices splendida lilia,
Hortis , astra soli , consita Regiis.

Tum delecta cohors , flos tibi Gallicus ;
Latos ingenuis partibus affeclas ,
Quos , DELPHINE , tibi dat comites Honos ;
Felices Pueri circùm hilares micant,
Accensasque tuis luminibus faces
Phœbeisque agitant ignibus Aulici.

Perge , Auguste Puer ! sic tua gaudia ,
Casti delicias semper ama Chori ;
Exemploque præi summa petentibus
Montis lauriferi Nobilibus juga.
Quanquam Francigenùm dissita finibus ;
Et jam vasta loquor quid loca , Græciæ
Nudis saxa jugis triste rigentia ?
Francæ clara patent limina Regiæ ,
Et doctis inhiant hospita Vatribus.

IN

CELSISSIMI PRINCIPIS
FERDIN. FURSTENBERGII,
PADERBORNENSIS EPISCOPI,
COADJUTORIS MONASTERIENSIS,
HONORIFICENTISSIMAS AD AUTOREM LITTERAS.

ODE XXVIII.

NAM quid, serenis missa Trionibus,
Fers laureatis, Gratia, litteris?
O luce Phœbeâ renidens
Charta sacrae perarata dextræ!
Salve benigni splendide Principis
Labor; neque uno Regia nomine,
Lactisque mellisque & beatis
Ambrosiæ lita charta succis.
Te Suada, laudum nobilis artifex,
Et ipsa finxit Gratia, clarius
Auroque & Indorum superbis
Eloquium meditata baccis.
Tot illa, & ultro munera Regiæ
Aggesta Musæ, nec fuerant satis?
Tot mentis altæ, tanta cordis
Palladio monumenta cultu?
Quàm sumptuosus magnifici libet
Donis Patroni, Littera, gratior,
Spirans amorem, prodigumque
Immerito studium clienti.
Fastidiosam, Præsul, inertiam
Seculi repensas. Principibus viris
Placere, sed rerum peritis;

LYRICON LIBER I.

59

Hoc decoris caput, hic triumphus.
 En, tu ille Parnassò altior, & Chori
 Summus per orbem Phœbigenæ Arbiter,
 FERNANDE, regnas, Artiumque
 Neuhusiâ dominaris aulâ.
 Nec tota, si quem fervida plausibus
 Theatra circum perpetuis sonent,
 Favoris æquarint honorem.
 Magne, tui, solidæque laudis.





LYRICON

LIBER II.

SACRUM AB AULA TRANSFUGIUM,
ASCETICAQUE SOLITUDO.

DEO OPT. MAX.

ODE I.



EBITA sanctos operum labores
Laude libamus tibi, Summe rerum
Auctor & Custos, dominoq; torquens
Omnia nutu.

Ante quem curvatur Atlantes Orbis;
Et sacro permistus amor tremori

Vibrat immenso Genium ministras

Ordine turmas.

Fervido pennæ sonuere plausu ;

Ora sublimi sonuere cantu :

Unde ter-sanctum venerata Numera

Astra resultant.

Stantis æternùm Sator alme Verbi ;

Editum fluxâ sine voce Verbum ;

Mutuis ardens radiis , duorum

Unica Flamma !

Cuncta , Mens mundi , penetras & ambis ,

Intimùm præsens , & ubique tota ;

Splendidis latè manifesta signis

Publica Causa.

Ast inaccessæ latebrosa septo

Lucis ; & sensum , tibi rite soli

Nota Majestas , animique acuta

Tela refringis.

Audiunt sævi tua fræna Venti ;

Vasta præfixas metuunt arenas

Agmina undarum ; tenuere jussos

Sidera cursus.

Supplices cogis populos ad aras ;

Arduos sceptro subigis Tyrannos ;

Fulmine ultricis tremefacta dextræ

Tartara mactas.

Gratiâ mentes renovas , & altè

Erigens visu satias beato ;

Gloriâ Virtutem , opulenta donis

Dona coronas.

Tu fugâ blandi superare fraudem

Edoces hostis , Stygiumque robur :

In tuam vanâ profugos ab Aulâ

Asseris Aulam.

IN SACROS TRANSFUGAS.

ODE II.

AULA beatos cedere Transfugas
Quos non inaudax , providus & timor
Adegit , Heroum superbas

Fert animus celebrare laudes.
 Pars artis ingens belligeræ , probat
 Ducem Receptus ; si validum sagax
 Elusit hostem , si periculo
 Incolumes retulit catervas.
 Æterna quid cùm Pax animam , loco
 Ereptam iniquo , suscipit & Salus ,
 Vulgique secluso tumultu
 Blanda quies & amica Divisæ
 Sin pugna restat ; mystica suggerit
 Cælum arma : & ipso castra situ minas
 Rident & assultus inanes
 Tartarei inviolata belli.
 Stat ære vallum ; fulmine plurimus
 Coruscat agger : vis cadit hostica ;
 Pompasque despectans , triumphat
 Splendidiùs super astra victor.
 Signa evolantes ad sacra Transfugas
 Pæan sequatur. Vos , tacito pios
 Stupore mirati Receptus ,
 Mox alacri resonante plausu.

JOSAPHATUS

AULAM FUGIENS.

ODE III.

HE U longa blandi tædia carceris ,
 Gravisque dudum sarcina purpuræ
 Sordentis , & probro remissa ,
 Gloria , magnificæque nugæ !
 Fastigiatis ardua molibus
 Castra incolentes , turrigerâ domo
 Fulmen perhorrescant. Tonantem
 Inde nefas propiùs laceffit.

Aulæ timendâ luridus imminet
 Flammâ Cometes : instabilis rotam
 Fortuna volvit ; & dolorum
 Fluxa trahit seriem Voluptas.
 Illa , illa densis obsita vepribus ,
 Utcunque baccis picta renideant ,
 Formosa regalem cruentant
 Sceptra manum , diadema frontem.
 Et ausa cœptam non bene amantibus
 Fugam morari Patria brachiis ;
 Nexuque gaudentem expedito
 Tristibus illaqueare curis !
 Frustra molestæ non revocabilem
 Prensis urbes : præpetis in modum
 Accinctus evasi columbæ ,
 Cui celeres timor urget alas.
 Nobis , Abenner , parta simul quies.
 Vincis solutus corporis evolas ;
 Magnoque succedens Olympo
 Regna , Pater , meliora carpis.
 Curarum amaris fluctibus enato ,
 Jussas reponens imperii vices ;
 Tutique , succedens Erebo ,
 Jam sedeo statione portus.
 Nodum , ecce , voti rescidit & moram
 Mors , Patre rapto. Nil ego civibus ,
 Nil rebus humanis , & Aulæ
 Debuerim , emeritus Parenti.
 Pium esse nec me jam Pietas vetat ;
 Ceu , dum caducæ insignia Gloriæ ,
 Ah , durus Heredi coacto ,
 Exueres , spoliisque Mortem
 Fraudans opimis. Ad Superos viam ,
 Regale Nato tradere onus celer
 Moliris , ac serò petitam

Rite brevi peragis volatu.

Patri superstes, commorior libens.

Corona, sceptrumque & solium vale.

Æterna mortalis capeſſo.

Dulce mihi specus est sepulcrum.

JOSAPHATUS IN EREMO.

ODE IV.

FIDI recessus, umbriferi lares,

Deserta sacris culta Sodalibus,

Salvete. ô arcanis Eremum

Deliciis opibusque fetam!

Pulso beatè vivitur Ambitu,

Luxu reciso. Me rigida endromys

Ornatque & armat: limpidumque

Fonte bibo saliente nectar.

Non pascor auro? scilicet & fame

Intactus auri, nec pretio gulam

Irrito: cælestemque agrestes

Ambrosiam sapuere fructus.

Ecquid renidet lætiùs igneum

Mundi lacunar, quàm laquearia

Crustata flaventi metallo,

Cæruleo saturata fuco?

Fragrante si non in violâ torus,

Rosâque & ostro; nec vigilem coquunt.

Curæ incubantes: aut sopora

Vita perit malè feriato.

Si non ad altum plurimus excubat

Limen fatelles; sollicitam obsident

Nec densa speluncam pericla,

Vi procul insidiisque tutam.

Antrum coronat, Numine conscio

Dulcem latebram, Cæligenûm cohors,

Decusque tutamenque ; Averni

Lucifugis metuenda monstros.

Jam spes Eremus , nec solido satis

Regno empta , vicit ; Gratia ubi rudem

Virtusque dilecto Salusque

Hospitio recreant Alumnum.

Ergo maligni , ferro avidæ manus

Terrena puncti segmina distrahant ;

Sævisque convellant procellis

Belligeræ Oceanum carinæ.

Gangesque & Indus gemmea flumina

Volvant avaris , quos teretis capit

Nitor lapilli , quos superbi

Aut ebena aut elephante postes.

Fictâ Aulicorum laude ferocior

Sibi ipse plaudat , nobile qui suis

Ludibrium , & vulgi frementis

Indomito laceratur ore.

Me nec protervis ambiit artibus

Inane jactans obsequium cliens :

Nec vexat armatis paventem

Turbida plebs odiis Tyrannum.

Pax alta filvis : gratus & otio

Sese haud inertî consociat labor ;

Vilemque dedignata glebam

Mens superos inhiavit orbes.

Absunt procellæ , fœdaque nubila,

Titane puro candidus it dies ,

Natura dum latè patentî

Pictam aperit faciem theatro.

Nox pura fulget , supplicibus favens

Votis , amico fida silentio :

Visumque mites inter umbras

Suavius irradiare Numen.

Hæc nulla Siren , blanda freti lues,

Captat doloſo carmine credulum ;
 Tristemve contemptu fatigat
 Aucupium popularis auræ.
 At innocentes undique perſonant
 Ruris Camœnæ. Me volucer chorus
 Parentis in laudes ſupremi
 Excitat , Aligeriſque miſcet.
 Totus caducâ ſpiritus eminet
 Compagne membrorum ; ac tenui, fugax
 In aſtra , vix filo illigatus
 Emicat , ætherioque geſtit
 Jamnunc Olympo perpetuam ſibi
 Metatus aulam pro fragili caſâ :
 Paulique & Antonî trophæis
 Ardet ovans ſociare palmas.
 Seceſſu Eremum Chriſtus ut imbuit ;
 Sparſit rigentes illecebris locos :
 Veſtigia impreſſit , piorum
 Magnanimo relegenda greſſu.
 Exemplum adoro , nec timidus ſequor.
 Regno abdicato ſuave feram jugum,
 Deique Barlamique pendens
 Lege magiſteriſque Tiro.

D. RADEGUNDIS

PIUM DIVORTIUM.

ODE V.

QUas accendit Hymen purpureus faces,
 Altæ luminibus non ſine Gloriæ,
 Ceu tædas Radegundis
 Horret funereas ſequi.
 Pignus connubii quem digito annulum
 Inſertavit Amor ; collaque gemmeum

Ad stellata monile,

Nexum mancipii putat.

Ah, victoris Heri ferre gemens juga

(Ferro nec leuius vincla jugalia,

Auro illusa, premebant)

Aulamque & thalamum fugit.

Quid, Medarde, moras ambiguus trahis?

Flavas jam secuit sponte sua comas,

Abjecitque superbi

Ornatum diadematis.

Poscenti dubitas reddere Numini,

Spargunt ætheriis quam Charites rosas;

Castoque igne flagrantem

Sponsam obnubere flameo?

Quæ conjunxit homo, nunc dirimit Deus;

Nec divisa sibi pectora vindicat:

Cordis regna pudici

Certo jam solio tenet.

At tu sollicitâ quò trepidam fugâ,

Clotari, revocas mobilis & ferox?

Concessoque recessu,

Facti cur piget inclyti?

Sta; frustra rapido, dure vir, agmine

Frustra præcipitas; jamque pedem pede

Urges fervidus, & jam

Injecture manum, advolas.

Deprensæ fer opem (territa clamitat)

Raptori pavidam subtrahe, nec tibi

Vano more sacratam,

Præsens auxilio Deus!

Arctum vitæ inii, te duce, tramitem;

Auspex consilii protege, si meos

Nondum exosus amores,

Sponsæ & Rex melior tuam.

Oranti neque abest ille viæ comes;

Affertamque sibi prodigio Deus

Silvescentis amicâ

Sementis latebrâ regit.

Miratur subitas agricola, & satû

Effusas segetes. ipse adeo stupet,

Qui, nudus modò, avenæ

Fluctu campus inhorruit.

Hic, quam Rex calido afflabat anhelitu,

Dilapsam ex oculis & manibus petit,

Inventamque requirit

Ostento attonitus novo.

Spes fluxas queritur, votaue inania:

Qualis, cervæ inhians, tesqua per avia

Si frustrata sequentem est,

Prædæ mœret inops Lacon.

Sic desideriiis æstuat; &, levis

Ut somni vacuâ elusus imagine,

Rex vestigia pressit,

Anceps, vix sibi credulus.

Longas esse manus credite Principum:

Major Longimanos dextera comprimit,

Vallum effingere ahenum

Vel culmo fragili potens.

Tum verò profugam, non sine Numine,

Franco objecta peti relligio vetat;

Ingentisque tenacem

Tradit propositi Deo.

Illam, fidereas concutiens faces,

Læto ducit Hymen carmine sanctior:

Augustoque perennes

Jungit fœdere nuptias.

Lectarum trahere examina Virginum

Princeps ardet ovans; Gallica nobiles

Quot non Aula Puellas

Reginæ prius addidit:

Puris quæ saturas rite liquoribus,
 Vivo pervigiles lumine lampadas
 Sponsi, nocte serenâ,
 Gestant ad Superi toros.

ARSENIUS

AB AULA IN SOLITUDINEM

CÆLESTI VOCE EVOCATUS.

ODE VI.

NON turda votis anxius, Arseni,
 Dudum fatigas sidera : supplici
 Respondet oraculum, salutis
 Ecce viam, resonans Olympo.
 Mirâ per auras voce receptui
 Audis canentem? Corda avidus Deo
 Præbe loquenti : tum sequaces
 Finge animos, volucresque gressus.
 Fugâ salutem, dum licet, occupa,
 Fugâ triumphum. rumpe moras, age,
 Aulæ tenaces rumpe nexus :
 Collige te, tacitisque vitam
 Manda latebris. Desere, desere
 Humana, pulchro si pius ambitu
 Divinâ anhelas; & vocantes,
 I, Superos sequere expeditus.
 Permitte vanis vana, negotio
 Curas in uno figere providus;
 Vagasque partes, dissipatum
 Coge animi trepidantis agmen.
 Fuge, ô, fugaces res prior, & caput
 Actutum iniquis subtrahe casibus.
 Hæc summa. Jam stricto minatur
 Threïcius gladio fatescelles,

Ingratus, eheu, nec pueriliter
 Dolensque & audens Arcadius nefas,
 Atrox cruentam tiro fraudem
 Barbaricâ meditatur irâ,
 Pestem magistro. Tu mediis iners
 Cessas periclis! an fragilis vitri
 Splendore delusus, vel ostrî
 Visum habetem capiente fucos
 Ubique cœcis insidiæ dolis.
 Quid lentus hæres? proripe te fugâ;
 Aulæque desertor, quieto
 In te animo penitus recede.
 Labore multo nempe odium paras:
 Pœnas amicis tot studiis graves
 Accerfis; infaustoque dirum
 Officio extimulas furorem.
 Soluta postquam debita Cæsari;
 Deo vicissim nunc solidum & tibi
 Te redde: sacrabisque curas,
 Nec vacuos pretio labores.
 Byzantium concilio Patrum
 Adlecte frustra, nunc melioribus
 Vacare consultis memento,
 Ipse tibi sapiens Senatus.
 Magno Parenti degener, impius
 Puer Magistro, sceptrâ ubi ceperit
 Augustus, Eoum virili
 Imperium moderatus ævo;
 Te te ille (quem nunc exitio petit)
 Abstrusum Eremitæ, nec facilem tegi,
 Coletque Legatisque supplex
 Thebaidos celebrabit oras.
 Securus illic dulcibus afflues
 Æterna quærens gaudia lacrymis,
 Majorque fulgens ab recessu, &
 Cæsareos superans honores.

ALOYSIUS GONZAGA

S. R. I. PRINCEPS

RELIGIOSO TIROCINIO SE ADDICENS.

ODE VII.

JAM vincla tandem rupimus aurea :
 Tandem beatâ pauperie frui
 Concessum ; & optatas piorum
 Jam teneo , mea regna , sedes.
 Mecum esse , mecum vivere nunc licet ;
 Curasque Olympo tollere , sordidâ
 Terrâ revulsas. Hîc silentem
 Alloquio Deus ipse mulcet.
 O meta votorum ! ô Charitum Domus !
 Denso furentis turbine Tartari
 Concussa , sed major procellis ,
 Arx solido bene fixa saxo !
 Huc evolavi , certus ubi meæ
 Nidus quieti. Nec gelido magis
 Gaudet fluento , quem per altos
 Præcipitem nemorum recessus ;
 Montesque vallesque ignea vis rapit
 Cervum , volucris jam similem feram ;
 Collecta dum torvos anhelos
 In colubros fitis ardet ore.
 Non hîc venenis dulcibus ebria
 Pestis , Voluptas. Ambitus exulat ,
 Dolusque , Luxusque , & nefandus
 Arma Furor quatiens cruenta.
 Heu tetra rerum nubila , & horridas
 Monstra inter umbras ! luctiferum Chaos ;
 Quantumque vel Memphi profanæ ,
 Tom. 2.

Vel Stygio incubuit barathro!

Æstu procaci lubrica volvitur

Fortuna : & Aulæ limina tristibus

Curæ catervatim frementes

Excubiis scopulosa servant.

Quò bracteata lumina Gloriæ

Offers , tuorum Mantua cantibus

Evecta Cycnorum sub auras ,

Dives avis , opulenta natis ?

Augusta cedant stemmata , purpuræ ,

Fasces , coronæ. Mors Ducibus ferox

Insultat , extinguens Honorum

Funerem breve fulgur umbræ.

Marcere lauros pulvere sordidas ,

Sterni colossos , exuviis graves

Fatiscere arcus , & caduci

Fracta vides monimenta fastus.

Victrice felix vel solidum manu

Lucratus Orbem ; ludibrium hostibus

Si mox Avernis , ferreoque

Mancipium recidas Tyranno :

Ventosa quid te Fama , quid inclyti

Terras per omnes vis juvet Imperi ?

Tunc Principem immanes catenæ

Excipiant , rapidæque flammæ.

Suprema jamnunc præcipe tempora ;

Occurre fati : subtrahe perfidæ

Te Sortis , ac Lethi minantis

Arbitrio ; fragilesque cælo

Reconde gazas. Pignora sic refer ,

Parcos in usus credita , Numini :

Et sarcinis acer repostis

Arduum iter levior capeffe.

Calles per arctos ire juvat , pede

Raro notatos. Irriguo micant

LYRICON LIBER II.

83

Vestigia Heroum cruore

Per rigidos animosa sentes.

Aspræ laborem meta levat viæ :

Mollit , supremo quæ radiat jugo ,

Corona rupes. Hâc piorum

Signa gradu sequar irretorto.

Sceptro abdicato , vile tulit pedum ,

E Rege Pastor : quæis onus Imperiî

Sedere visum , Carlomannus

Fessam humeris subiit bidentem.

Regni quid Heres Trinacrii potens ?

Suavi coronam posthabuit jugo ?

Sacramque projecto redemit

Pauperiem Lodoïcus auro.

Et tu , Beatis æmule Mentibus,

Ignatiano confere te gregi ,

Gonzaga (tot læto Sodales

Antevolant acuiuntque cursu)

Sortem superbam , donaque Cæsaris ,

Pericla prudens splendida fortiter

Fugisse. Fraternis opimus

Castilio data præda curis.

Odi coruscæ insignia purpuræ ,

Dum nuda tingit membra Dei cruor :

Christique me involvo decoris

Sordibus , opprobriisque jacto.

JESUM togatæ militiæ Ducem

Secuta gressu magnanimo Cohors,

In bella Tironem recepit

Sidereis agitata telis.

Non Taurus illam , non Rhodopeiæ

Morantur arces ; non Libycæ tenent

Syrtes , nec immensum utriusque

Terruit Oceani profundum.

Ignota priscis nomina seculis ,

Marchionatu
Castilionensi
cessit fratri.

Vel Stygio incubuit barathro!

Æstu procaci lubrica volvitur

Fortuna : & Aulæ limina tristibus

Curæ catervatim frementes

Excubiis scopulosa servant.

Quò bracteata lumina Gloriæ

Offers , tuorum Mantua cantibus

Evecta Cycnorum sub auras ,

Dives avis , opulenta natis ?

Augusta cedant stemmata , purpuræ ,

Fasces , coronæ. Mors Ducibus ferox

Insultat , extinguens Honorum

Funerem breve fulgur umbræ.

Marcere lauros pulvere sordidas ,

Sterni colossos , exuviis graves

Fatiscere arcus , & caduci

Fracta vides monimenta fastus.

Victrice felix vel solidum manu

Lucratus Orbem ; ludibrium hostibus

Si mox Avernis , ferroque

Mancipium recidas Tyranno :

Ventosa quid te Fama , quid inclyti

Terras per omnes vis juvet Imperi ?

Tunc Principem immanes catenæ

Excipiant , rapidæque flammæ.

Suprema jamnunc præcipe tempora ;

Occurre fati : subtrahe perfidæ

Te Sortis , ac Lethi minantis

Arbitrio ; fragilesque cælo

Reconde gazas. Pignora sic refer ,

Parcos in usus credita , Numini :

Et sarcinis acer repostis

Arduum iter levior capeffe.

Calles per arctos ire juvat , pede

Raro notatos. Irriguo micant

LYRICON LIBER II.

83

Vestigia Heroum cruore
 Per rigidos animosa sentes.
 Aspræ laborem meta levat viæ :
 Mollit , supremo quæ radiat jugo ,
 Corona rupes. Hâc piorum
 Signa gradu sequar irretorto.
 Sceptro abdicato , vile tulit pedum ,
 E Rege Pastor : quæis onus Imperi
 Sedere visum , Carlomannus
 Fessam humeris subiit bidentem.
 Regni quid Heres Trinacrii potens ?
 Suavi coronam posthabuit jugo ?
 Sacramque projecto redemit
 Pauperiem Lodoicus auro.
 Et tu , Beatis æmule Mentibus,
 Ignatiano confere te gregi ,
 Gonzaga (tot læto Sodales
 Antevolant acuiuntque cursu)
 Sortem superbam , donaque Cæsaris ,
 Pericla prudens splendida fortiter
 Fugisse. Fraternalis opimus
 Castilio data præda curis.
 Odi coruscæ insignia purpuræ ,
 Dum nuda tingit membra Dei cruor :
 Christique me involvo decoris
 Sordibus , opprobriisque jacto.
 Jesum rogatæ militiæ Ducem
 Secuta gressu magnanimo Cohors,
 In bella Tironem recepit
 Sidereis agitata telis.
 Non Taurus illam , non Rhodopeiæ
 Morantur arces ; non Libycæ tenent
 Syrtes , nec immensum utriusque
 Terruit Oceani profundum.
 Ignota prisca nomina seculis ,

Marchionata
 Castilionensi
 cessit fratri.

Gentesque Christi sub juga barbaras
 Vocavit; & pulchro rubentes
 Sanguine ovat retulisse palmas.
 Hæc me, perosum degeneres moras,
 In castra blandis imperiis agit
 Dux ipse Christus : cingit armis
 Ipse suis, animisque firmat.

FRANCISCUS BORGIA

AB ISABELLÆ AUGUSTÆ PHERETRO
 AD IMMORTALIS DOMINI FAMULATUM

SE TRANSFERT.

ODE VIII.

EN, quò Terrigenûm Gloria, quò brevis
 Majestas recidit ! Cæsaris, ah, jaces
 Conjux, imperii fidus, & alterum
 Aulæ Numen Ibericæ !
 Quò fugit species, quò decus aureum ?
 Regnans ore tener purpureo lepos,
 Spirantesque rosæ, vivaque lilia,
 Et quas jactat Amor faces ?
 Florentis cecidit purpura gratiæ;
 Letali facies dirigit gelu ;
 Successit placitis horror amoribus ;
 Nox regale premit jubar.
 Dejectam folio sarcophagus tulit.
 Heu, qualem exhibuit, quàm sibi disparem !
 Informem, horrificam vidimus : & gradu
 Vix ipse, atque animo steti,
 Dum cedit trepidè cuncta retro cohors.
 Quam, plenam illecebris antè rapacibus,
 Certatim officiis ambiit ; ultimùm
 Spectare impatiens fugit.

Anceps, attonitus, funereâ metum
 Ignoti facie corporis hauseram,
 Monstri nescio quid pænè ego credulus.

Augustæ vice subditum.

At mors delicias orbis, & inclytum
 Mutarat facie monstriferâ decus:
 Mortis ludibrium regia cesserat

Fœdæ forma tyrannidi,

Hoc ergo celebrat nuper Iberia!
 Hoc mundus coluit! Splendidus hinc mihi
 Captatus cupidis obsequiis Favôr!

Ah, sortis piget Aulicæ.

O curæ fragiles! ô miser ambitus!
 Nunc, nunc indecoris servitii pudet.
 Haud ultrâ, morituro assecla Principi,

Scenæ Borgia serviam.

I trans Herculeos, Carole, limites;
 Europâ, Libyâ congere laureas:
 Non caræ licitum flectere Conjugi

Legem, non tibi, ferream.

Nec vi belligeram Cæsareâ manum,
 Nec formidat opes duplicis Indiæ
 Mors, terræ spoliis & pelagi gravem.

Proturbare superbior.

Dum ludos agitat Regia publicos:
 Extremum solitus carpere gaudium;
 Importunus, atrox, in medium irruit

Luctus Lætitiae chorum.

Et nunc quid putrido pompa cadaveri?
 Quid Regum monimenta, & Parius lapis,
 Suggestuque sonans proderit arduo

Clari buccina nominis?

Heu fordes, tenebræ, virus, & infimo
 Confundens Procere tristè chaos gregi!
 Huc demum recidit Gloria Principum!

Toleti, inter
 ipsa castellæ
 comitia, Impera-
 ratorisq; spe-
 ctacula magni-
 ficentiæ. Au-
 gusta extincta
 est.

*Injice pedem
 tuum in com-
 pedes illius, &
 in torques il-
 lius collum
 tuum.
 Eccli. 6.*

Pulvis pulvere solvitur.

At tu quid dubitas , Borgia ? quin graves

Maturè pedicas providus excutis ?

Mortalis Domini si bene pœnitet ,

Aulam strenuus evola.

Sacras , eia , volens indue compedes ,

Collum rite sacris inferre torquibus :

Regno servitium pulchrius occupa ,

Uni vivere amans Deo.

IDEM VIR SANCTISSIMUS

Ex immani sacrorum strage per Gallias ab

Hæreticis edita, mortis causam contrahit.

ODE IX.

NON , vagus cæco per operta motu
Cum quatit terras, neque cum profundo

Incubat ventus , tumidoque pulsat

Sidera fluctu ;

Non sinu accensos glomerantis ignes

Montis , aut nubis fragor æstuosæ ,

Hæresin fœdo trepidam tumultu

Vincere certet.

Conscias nec te peragrarè visu

Teutonum gentes jubeo , aut Britannos ,

Sæva quos turbis propè funeravit

Dira cruentis.

Cerne civili toties labantem

Galliam motu ; sacra cum profanis

Mista , divisos odiis penates ,

Oppida castris.

Tetra quàm rerum facies ! ubique

Ignis & ferrum , pavor atque luctus ;

Omne tormenti genus, omne lethi ;

Fasque nefasque.

Phœbi ad occasum Latio verendus
Ire Legato comes , ac salubris
Consilii notas adhibere jussus.

BORGIA vires ;
Franca dum longo terit arva cursu ,
Vidit horrendæ monimenta cladis ,
Squallidas urbes , & acerba versis

Rudera templis.
Vidit , heu , labes scelerum ; ac superbas
Regiæ quondam pietatis aras ,
Tunc & informes cinere & favillâ
Planxit acervos.

Corda sed quantus gemebunda magni
BORGIA effudit dolor , ut , litandis
Fervidus sacris , laceræ ruinas

Institit ædis !
Triste sordentem , superâque dudum
Victimâ cassam peregrinus aram
Diluit Mystes lacrymis , & almo
Expiat igni.

Frigidus primùm rigor , inde toros
Ardor invasit violentus artus :
Concidunt vires , superant propinquæ
Semina mortis.

Febris haud æstus , sed Amoris instat.
Criminum sensu , tragicæque cladis ,
Icta mens vastum duplicat per ægra
Membra dolorem.

Dum profanatas gemit inter aras ,
Hostiam cædens placitam Tonanti ,
Ipse procumbit pia consecrato
Victima fato.

IN EFFIGIEM

D. FRANCISCI BORGIAE

CORAM SS. EUCHARISTIA SUPPLICANTIS

ODE X.

QUEM stellantibus elicit
 Templis Relligio voce potens sacrâ,
 Terras hospes init Deus,
 Mortalesque colit, queis colitur, domos.
 Purâ se nebulâ tegit,
 Prodit Sol radiis mysticus aureis;
 Viva luce micans flagrat,
 Et FRANCISCI animis torridus influit.
 En, flammæ veteris memor,
 Æternas habitu BORGIA supplici,
 Ceu quondam, excubias agit,
 Aras devenerans, par Superis Cliens;
 Aspectuque avido rapit
 Præsentem nivea sub specie Deum.
 Proh qualem se adytis Pater,
 Augustis operans ritibus, intulit!
 Quantas pectora, suavibus
 Spirabant lacrymis irriguas faces!
 Tecti Numinis hospita,
 Circùm fulmineis obsita nubibus,
 Sinæ regna biverticis
 Vilis Legiferum scandere post Ducem,
 Horrore intremuit sacro,
 Altari subiens, contiguus Polo.
 At non hîc tonitru minax
 Ales, nec tabulis jura rigentibus.
 Condensò Aligerûm globo
 Septum Numen adest, ignipotens Amor.

Cogitabat mō-
 tem Sinam
 Borgia, cū
 aram sacrificā-
 turus adbat.

Molles huc aditus patent.

Nec tantum patiens hic Deus aspici,
Umbris lumina temperat :

Tractari facilis, quin etiam cibi
(Mirum !) & vitigeni modo

Dignatur laticis faucibus excipi.
Sed quanquam placidus vocat,
Tantæ mens pavitat conscia gloriæ.

Allapfos medius choros

Inter Cælituum BORGIA constitit,
Sancti carminis æmulus
Christi concelebrans splendida munera.
Cæso & Mysta litat Deo ;

Vivo perpetui, quotquot agit dies,
Agni funere pascitur,
Et se nectareo sanguine proluit.

Hinc cælestibus ebrius
Fluxit deliciis, incaluit rogis.

Docta pictus Amans manu ;
Ipsa nunc etiam flagrat Imagine.

Phœbeum veluti jubar
Exceptat nitidos in speculi sinus,
Ac vibrantibus obvia

Incendit rutilans fulguribus chalybs.
Sic hausto penitus Deo

Ardores oculis fidereos refert ;
Spectantumque, Pater pias
Transfusis animas urit amoribus,

EJUSDEM

APOSTOLICÆ CONCIONES,

AC LIBER

DE RATIONE CONCIONANDI EVANGELICA

ODE XI.

Borgia post
initam socie-
tatem, in Og-
nati Eremum
secessit, quoad
prodire ad u-
sum Proximi
jussus est à S.
Ignatio.

TUMULTUOSÆ, BORGIA, palmifer
Desertor Aulæ, jam latebris diu
Collectus, umbrosoque gaudes,
Ah, nimium tacitus recessu.
Løjola quò te Numinis evocat
Interpres, i nunc Actor idoneus,
Sacroque maturus labori,
Magnificis operare curis.
Orator alti fervidus eloqui,
JESUM secutus, perge, age, publicæ
Insta saluti. Corde regnans,
Ore suos Amor edat ignes.
Postquam profanæ fulgura Gloriæ,
Fumos & Aulæ Gratia dispulit;
Jam Cælitum arcanis paratus
Colloquiis, adytisque sancti
Prodit Lycei BORGIA, Numine
Accensus; & Fax fidere clarior
Per templa sublimis coruscat,
Dulce jubar, validumque fulmen.
Ut atra latè nubila discutit,
Et pigra inertis frigora seculi;
Summosque & imos victor urget,
Voce potens operâque Mystes!
Adhuc per Orbem vivida vox sonat;
Perenne chartis eloquium viget,

LYRICON LIBER II.

91

Ardensque lucensque, & salubri
Arte oculos animosque captat.

Cælestis ô quâ vi Sapientiæ
Conferta doctos Mens peperit fatus,
Flammâque permistos, & almæ
Nectareo Pietatis imbri!

ODE XII.

AUGUSTA quisquis scandere pulpita
Moliris, en quid BORGIA prædocet
Orbis Magistros, Christiani
Eloquii generosus Autor.
Aude vocantem rite sequi Deum;
Sancto sed aude sollicitus metu,
Fatale ne munus capeſſas
Degeneri periturus usu.
Amoris ardens Spiritus excoquat
Sparsura voces ætherias labra;
Ceui Vatis Hebræi piavit
Ora sacer taciturna carbo.
Jam, tanto adornans debita muneri,
Oracla Cæli consule, & intimos
Scrutare Divini recessus,
Agno aditum referante, Verbi.
Æternum adorans Lucis adi Caput;
Pioque supplex antè silentio
Vincens Tonantem, disce fando
Dura virum exuperare corda.
Ne blanda fallat fortè licentia
Gaudentem acutis ludere sensibus,
Patrumque Doctorumque certo
Pura teras monumenta gressu.
Et lingua cordi concinat, & manus
Responset ori. Sic animos movet

Isaie 6.

*Agnus Librũ
aperit signatũ.
Apo. 5.*

Ultro sequaces, qui decoris
 Verba præit speciosa factis.
 Væ, qui paventes imperiosior
 Mentis fatigat; non tolerabile
 Collo quod imponit gementum,
 Stringere onus digito refûgit.
 Tibi ipse, crebram qui loqueris Crucem,
 Primum severus, moribus assere
 Præcepta; doctrinamque vitæ,
 Delicias metuente, sancti.
 Errore vulgi quid Logodædalos
 Conflata pascit Fama, crepantibus
 Bullis tumentes? Quæ recenti
 Verba nitent operosa fucō,
 Texunt caducis non sine flosculis:
 Euripus aut quo more reciprocas
 Alternat undas, æstuoso
 Solliciti trepidant recursu.
 Deo obstrepentes, plaudere amant sibi:
 Arguta ut æris cymbala tinniunt;
 Vanoque delusi laborant
 Aucupio fugientis auræ.
 Divis honorem tu solidum refer,
 Committe fructum. Quid rigui juvant
 Sermonis imbres, ni benigno
 Crescere dat Genitor favore?
 Hinc omne munus. Tu sacra deferens
 Theatra, planctus plausibus antefers;
 Cordisque & oris luctuoso
 Concipe dissidio pudorem:
 Sic ipse fuetus, dicere sic docet.
 Jam seculo abacto, moribus è suis
 Præcepta ducens, actuosi
 Splendidus eloquii Magister.

ODE XIII.

QUAM læta amico Numine copia
 In sancta crevit pulpita, BORGIAE
 Sacras per Artes! at Quirinæ
 Gloria delictumque Suadæ,
 Longè unus omnes inclutus anteit
 OLIVA, tanto par subiens Duci,
 Par Urbis æternæ theatro;
 Ipse suum decorare munus,
 Suggestu in Orbis principe, nobilis:
 Dictisque rerum pondera sustinet;
 Ac frugis æternæ Satores
 Voce Patres ahimoque reddit.
 En, qui corusco vivus & efficax
 Ab ore sermo! corpore nec filet
 Spectata majestas agentis;
 Perque oculos, avidas & aures,
 Romæ subactis cordibus influit
 Vis alma, miris obsita gratiis:
 Christique Legatus, Magistro
 Digna sonat, rutiloque Cœtu.
 Et jam quaternas Pontificum Eloquens
 Regnat per Aulas, liber & arduus
 Cenforque, Virtutumque Præco.
 Fida Libri documenta servant,
 In concionem excurrere Gentium,
 Fructumque latè fundere seduli.
 OLIVA seclis audiendus
 Sic stabili eloquio perorat.
 Divum, nec uno munere, sed magis
 Virtute & alto pectore BORGIAM
 Successor explet, cui dicatos
 Toto agitans præit Orbe cultus.

Joan. Pauli
 Oliva, Soci-
 etatis Jesu
 Præp. Gen.

Concionator
 Apostolicus
 sub quatuor
 Pontificibus.

Jam plures
 Tomos edidit
 suarum in Sa-
 cro Palatio
 Concionum.

S. Borgia so-
 lennes honores
 passim habens
 curavit, &
 ipse Romæ
 quam splendidi-
 ssimos exhi-
 buir.

SOLITUDINIS MIRACULA:

ODE XIV.

O H E canoras parcite, parcite
 Jactare nugas, vos quoque transfugæ,
 Sacrosque secessus relicto
 Carpite nunc Helicone, Vates,
 Quid fabulosi laurea Cynthii,
 Cyrrhæve fontes? quid bifidus juvat
 Parnassius, & Bacchi corymbis
 Luxurians ederisque silva?
 En, hospitali bisgeminus jugo
 Chorebus aurâ vaticinâ sonat:
 Rubus sereno floret igni;
 Nectarei saliere fontes:
 Quos non feroci Pegasus ungulâ,
 Præpes Medusæ filius extudit;
 Mosæa sed virgâ potenti
 Elicit manus, & subactis
 Mellita duxit flumina rupibus.
 Sancto tubarum, pro tenui lyrâ,
 Auditus olim monte clangor,
 Et Superi tonitru loquentes.
 Eamus. hæc se stelliferæ via
 Pandit Sionis. Barbara Mempheos
 Dum vincla, & immanem catastam
 Ifaciæ fugerent catervæ;
 Per sola caram progeniem loca
 Vindexque ductorque auspiciis Deus
 Vocavit. ardenti coruscus
 Aliger antevolat columinâ.
 Paratu inempto roscida Cælitum
 Annona miras assidue dapes,
 Latèque constratâ pruinâ

LYRICON LIBER II.

95

Omnigenum explicuit saporem ;
 Quæsitam opimæ dum Chananæidos
 Sedem capellant , & proavis humum
 Pactam coloni , quos sacrandæ
 Arx Solymæ , nova regna possunt.
 Vastas ut inter mellea copia
 Lymphisque arenas suavibus & cibis
 Ultro affluebat ; sic Eremum
 Mystica nunc satiat Voluptas ;
 Vivæ beato cautis ab ubere,
 Venâ perenni , purpureus latex ,
 Cæloque decurrens aperto
 Ambrosii seges alma roris.
 Quo te , piorum , carmine prosequar,
 Magistra vaturnâ blanda silentia ,
 Vocesque adorandas , & aulis
 Assyriis potiora tesqua ?
 Tu castra Divûm , tu superas domos ;
 Tu nube amictum Legiferi jubar ;
 Oracla tu fortis futuræ
 Pandere , fatidicisque mentem
 Afflare gaudes oribus entheam ,
 Terrisque & astris splendida jungere
 Commercia , & mistis pacisci
 Dulce Viris Geniisque fœdus.
 Hic commeantes aëriis videt
 Scalas Ministros Regis Olympii ,
 Sacroque sublustris Jacobus
 Alloquio fruitur per umbras.
 Flammâ innocenti sidereûm micans ,
 Sancta hæc , profano nec temere gradu
 Calcanda tellus. hic Tonantis
 Abramæ data jura genti.
 Congressu amici Numinis unicè
 Augusta Moses in penetralia

Petra æugeni
 erat Christus,
 1. Corinth. 10.

Elias.

3. Reg. 19.

Admissus, arcanoque corpus
 Verbo inhians animumque pascit.
 Quid ille Horebi saxa biverticis,
 Non usitato jam profugus metu,
 Mosi sectundus scandit Heros?
 Diam avidâ bibit aure vocem.
 Immotus atro turbine constitit,
 Illæsus igni, sed tenuis virum
 Collegit auræ, post fragorem,
 Sibilus, horribilemque motum.
 Hic fata Regum præscius accipit,
 Gravesque casus; sceptrâ nocentitum
 Transferre, & ultrices tremenda
 Jussus ad arma ciere dextas.
 Carmeli opacas incoluit specus,
 Claudens, recludens imperio polos:
 Idem axe flammato triumphans
 Per rutilas equitavit auras.
 Deserta quondam personuit loca,
 Flavi astuantem concutiens plagam
 Jordanis, incestique Regis
 Delicias populique labes,
 Baptista vivo percitus impetu,
 Vocale fulmen, quo Domini viam
 Sternente, mox lustris ferarum
 Ætherius latitavit hospes.
 Mox & latentis prodere Numinis
 Verso emicantem corpore gloriam
 Dignatus, insuetam profanas
 Haud speciem induitur per urbes.
 Secreto amicè credita Thabori
 Spectacula versi corporis; & nivem
 Candore, fulgentique solem
 Visus honos superare formâ.
 Quot plebis illum millia in avios

Secuta saltus , dum placidis trahit
 Ab ore pendent catenis
 Christus , & immemores ciborum
 Sacris voluptas eloquiis alit !
 Partes in omnes almus iit favor ;
 Novoque cælestis beavit
 Cura gregem subeunte pastu.
 Castis Eremum Sponsus ad intimam
 Mentis inescans ducit amoribus ;
 Cordique , summoto tumultu,
 Lenibus insinuat susurris.
 O silvæ ! ô umbræ ! dulcia gaudia ,
 Tuti receptus , hospitibus sacris !
 O antra , cantandisque in ævum
 Splendida prodigiis theatra !

*Lactabo eam ;
 & ducam eam
 in solitudinē ,
 & loquar ad
 cor ejus.
 Osce 2.*

D. IGNATII LOIOLÆ
 CONTEMPLATIO ET LACRYMÆ.

Quàm mihi sordet Terra , dum Cælum aspicio !

ODE XV.

U T noctilucas purpureo faces
 Accendit igni Vesper ; & humidis
 Sublapsus umbris corda mergit
 Victa Sopor , residesque sensus :
 Summas domorum clam pius occupat
 Loiola fauces , unde micantium
 Suspectus astrorum sequaces
 Longè oculos animosque pascat :
 Atque heic sereno pervigil æthere ,
 Stellata mundi cœruleo supèr
 Dum scena versatur theatro ;
 Missilibus petit alta voris.
 Rimis Olympi dulce flagrantibus

Sionis arces sublegit igneas ;

Ardetque cernendo , & beatæ

Sedi inhians lacrymatur exul.

Sic illa puri nectaris artifex

Stillare fornax vi tacitâ solet :

Liquescit arcano rosarum

In lacrymas vapor actus æstu.

Quos , Tutor Ales , lucida fervidæ

Ad templa perfers mentis anhelitus ,

Dum corde conceptum refundit

Parturiens oculis amorem !

Hic ille fons est , unde volubili

Malas inundant flumine lacrymæ :

Quos aureâ exceptat Minister

Sidereus paterâ liquores.

Cælestem ad aram rite preces pio

Fletu natantes libat , & arduum

Mulcet Tonantem. Fons vicissim

It nivei pede pulsus Agni.

Largo clientem Gratia proluit

Illapsa ductu. Proh sacra gaudia ,

Rogique vivacis voluptas

Ambrosio sociata nimbo !

Nunc ima terrarum , & lacrymabiles

Rerum tumultus despicit editæ

Ab arce mentis , & caduci

Fata Pater miseratur Orbis.

Quàm fœda gentes Cimmeriæ premit

Imago noctis ! terrificæ fremunt

Cœcisque inhorrescunt procellis ;

Monstra sinu glomerante , nubes.

Væ , quàm æstuoso gurgite turbidus

Euripus , aut quæ vorticibus rapax

Charybdis , aut puppes virosque

Scylla avidis lacerans molossis !

Jam Bella multo sordida sanguine ,
 Fidesque castris & Pietas procul
 Fugata , fas versum nefasque ;
 Flebilibus subiere formis.
 Heu bruta avari Mygdonidæ fames ,
 Ac Tantaleæ ludibrium sitis ,
 Fastusque vesani Gigantum ,
 Et Paphiæ mala blanda pestis !
 Hinc illa magni nausea pectoris ;
 Hinc ille fœtor , nec tolerabilis
 Sentina , terrarumque sordes ;
 Hinc oculis lacrymosus imber.
 O læta Amori balnea , Lacrymæ !
 O criminosis mœsta piacula
 Terris inundate , ô decoræ ,
 O liquidæ teretesque gemmæ !
 Non myrrha tales , non Phaëtontiæ
 Pingui Sorores cortice lacrymas
 Misere , gestandos honores
 Auribus Itolidum superbis.
 Turis calentes non ita lacrymæ
 Fragrant Sabæi : non ita suavibus
 Fecunda , pendendis & auro ,
 Balsama dant lacrymis odorem.
 Nec tam nitentes roscida lacrymas
 Aurora fundit. Naufragiis licet
 Petantur , Indis viliores
 Concha parit generosa baccas.
 Ergo perennes currite lacrymæ ,
 Ignatiani flumina gaudii ,
 Sulcate malas ; perge sancto
 Diluvies pretiosa luctu.
 Terris amaras det lacrymas Dolor ;
 Dulces Olympo det lacrymas Amor ;
 Igni remistas. Quàm disertæ

Pondus habet pia lympha vocis !

Quin , prodigorum torrida luminum

Fluenta , cursum sistite , sistite.

Vultu quid exeso canales

Mobilibus fecat unda rivis !

Ah, ne intuendo sidera, lynceam

Stagnantis ignis vis aciem obruat !

Extincta ne gentes salutis

Astra fleant , vigilesque flammæ !





LYRICON

LIBER III.

VARIIS CONTEXTUS ARGUMENTIS.

ROMÆ SANCTÆ CONSPECTUS

AD CLEARCHUM IN URBEM PROPECTURUM.

ODE I.



BIS Quiritum nobilis advena,
Clearche; Thybrimque, Cœano diu
Latéque regnato tumentem,
Velivolâ superabis alno.

Theatra, Circos & Capitolia
Vulgus requiret: Cæsareas domos;

Arcus triumphales stupebit,
Marmoreæ monimenta Romæ.

Te Christianæ insignia Gloriæ,
Urbisque Sanctæ Relligio potens
Desiget ardentem, ac profanos
Magnanimum super ire fastus.

Cælo propinquis ardua turribus
 Delubra , & arces ; nec minùs & specus,
 Armata dum sævit Tyrannis ,
 Christiadùm latebras , tueri
 Juvabit. illinc scilicet entheus
 Afflatur horror pectoribus piis ;
 Dulcesque Cryptarum tenebræ
 Sidereos jaculantur ignes.
 Vicos per omnes quæ loca nobili
 Adhuc rubescunt sanguine , consciam
 Mentem remulcebunt , & annos
 Nil metuens Fidei trophæum.
 Heic (dicet hospes) quadrifidâ trabe
 Pronus pependit Janitor ætheris :
 Cervicis heic Pauli recisæ
 Tergemini micuere fontes.
 En, curiosis dulce labris , age,
 Liba fluentum. nam memori latex
 Lactis saporem servat undâ
 Virgineus , liquidumque nectar.
 Ferro heic tremendus sanguineo stetit,
 Dum pestis Urbem perfurit , Aliger ;
 Sed blandus objectâ Mariæ
 Effigie , veneransque cessit.
 Hanc (Exquilino templa subis jugo)
 Hanc ipsa tantis molibus aream
 Descripfit , Augustique mirâ
 Virgo avidos nive fregit æstus.
 Gaudens Agrippæ , nunc melioribus
 Sacris dicatum , visere Pantheon ,
 Magnæque persolves Parenti &
 Purpureis tua vóta Divis.
 Congesta acervis ipsâna Martyrum,
 Thesaurus ingens , corpora barbaros
 Experta tortorum furores ,

LYRICON LIBER III.

103

Jamque suis sacra membra pœnis;
 Auroque gemmisque ossa micantia
 Videbis, olim quæ sibi maximus
 Reposcat æther, ac beatis
 Corporibus nova fundat astra,
 Quæ Vaticanæ lumina Regiæ!
 Quantus benigno sidere Pontifex
 Affulget! I sacris, per Alpes,
 Auspiciis, pelagove Thusco.
 At te ille, partes qui Ducis ac Viæ,
 Sanctis & idem meta laboribus
 Mercesque, gessit, rite Christus
 Sospitet, incolumemque reddat.

SAMSON MORIENS.

ODE II.

LUMEN Heroum, populique * *Solem*
 Non ego intonsâ rutilum juventâ
 Concina, oraclo præeunte, Cæli
 Nobile munus.

* Ea subjecta
 notio est Sam-
 sonis nomini.

Ut puer miro generosus ortu,
 Robur immensum, neque fabulosis
 Viribus fictisque minor Gigantum
 Gesserit ausis;
 Corde cælestes simul hausit auras,
 Entheo jam sese, hominemque supra
 Impetu assurgens, penitus recepti
 Numinis instar.

Ut feri ardentem catulum leonis
 Verus Alcides, avidumque prædæ
 Fregerit nudis manibus, tenello
 Mollius hædo.

Ut Palæstinas acies, rudentis
 Fortè maxillâ pecoris repertâ

Straverit , visus trifidi rotare

Fulminis arma.

Limpido victrix mola , post cruorem ,

Fonte manavit : cibus & voraci

belluæ innatus ; maduere sævæ

Nectare fauces.

Flamma ceu stuppas , inimica funes

Vincla dissolvit ; mediâque clausus.

Urbe , ferratas rapuit revulso

Cardine portas.

Nil moror vitam : Lyricis sonari

Dignior Musis , animæ superbæ

Prodigus Samson bene laureatâ

Morte triumphat.

Hinc procûl mœstæ foliis cupressi ;

Hinc sepulcrales procûl este taxi ;

Funeri lectas merito , Camœnæ ,

Reddite palmas.

Næniæ , ac fœdi procûl ite planctus :

Debitam , Hebræi , celebrate pompam

Vindici magno , & memorem sepulcro

Sculpite laudem.

Alta concussis graviter columnis

Tecta subvertit : malè feriat

Hostis immani jacuit ruina &

Strage sepultus.

Patriæ Assertor , sterili sacrat

Matris ex alvo , Domitor ferarum ,

Gentium Victor , Juvenis doloso

Captus Amori ;

Lucis extincto velut orbe Titan ,

Sidus Hebrææ columenque gentis

Sordet ; & Cæcus , velut umbra magni

Nominis , horret.

Interim festis epulis calentes

Et Palæstini Proceres , & omnis
Vulgus , infandi quatiunt tumultu
Carminis auras.

Audiit Samson (neque enim tueri
Erutis fas est oculis protervæ
Gentis insultus : ea sola diræ
Gratia noctis)

Audiit vulgi strepitum , & profanas
Principum voces. celebris Dagoni
Hoste captivo reboat per alta
Templa triumphus.

Ah miser quantos animo furores
Concipit Samson ! subit ira iusto.
Gaudia invisæ malefana turbæ
Vertere luctu.

Ille præreptum vacuis Olympum
Orbis quærens ; Deus , Abramæ
Gentis ô Custos , ait , ô , precantem
Respice Cæcum !

Triste fatalis spoliū capilli
Perfidæ tonsor Dalilæ minister
Abstulit , sancto simul & capillo
Pensile robur.

Cum comâ primæ cecidêre vires ;
Nec queror : turpis meruit libido ;
Quâ lupæ demens potui verendas
Prodere leges.

Sed vides , quanto fremitu protervus
Hostis insultet ? Tua , cæciores
Barbari Cæcô , superata mecum
Numina plaudent.

Redde nunc , oro , placidus priores
Redde mî vires. duo rapta vultu
Lumina informi tuus ultor unâ
Clade rependam.

Jam profanatus vetito capillus
 Forfice increvit ; veterisque floris
 Rursus amissum decus expiato
 Vertice surgit.

His ubi cælum tacitus querelis
 Flexit & votis , miserandus alto
 Corde suspirans , petiitque fessis
 Otia membris :

Vincla tum laxat , geminæque Cœcum
 Admouet ductor facilis columnæ :
 Hinc & hinc prensas medius columnas.
 Propulit Heros.

Cum Philistæis moriamur , inquit.
 Subrutis ædes cecidere fulcris :
 Solvitur casus tragici voluptas
 Comica luctu.

Cantus in diros abit ejulatus :
 Intremit tellus , tonat æthra , fanum
 Clade cultores pariter Deumque in-
 volvit inanem.

Unde ludentem peritura Cœcum
 Turba spectabat , labefacta vasto
 Porticus secum tria cum fragore
 Millia traxit.

Hostium oppressus cecidit ruinâ
 Latus ; ac plures moriens peremit ,
 Quàm prius , vivens patriæque pugnæ
 Straverat ultor.

Quid gravi elisum , pia turba , casu
 Quæris , insanos removens acervos ?
 Erutum frustra patrio laboras
 Ferre sepulchro.

Publico Samson tumulo potitus ,
 Splendidè horrendo tegitur trophæo.
 Gravior nusquam locus est : perempto
 Incubat hosti.

STEMMA RAMBOLLIETANUM

LUDOV. ELISAB. ANGENNIAE

S. STEPHANI REMENSIS ANTISTITAE.

ODE III.

AUro superbam vidimus Arborem,
 Regnare silvis, hospitio sacram
 Cultuque Vatum: bracteatis
 Fulget honos pretiumque ramis.
 Hic scena latè multiplicem explicat
 Augusta pompam: nominibus sonant
 Inscripta magnis, & decoro
 Luxuriant folia ampla fastu.
 Quot regiarum insignia torquium!
 Quot sceptræ pendent Martia, & inclytæ
 Gemmis coronæ! quæ trophæi
 Insoliti facies coruscat!
 Laurumque palmamque & Libanitidem
 Vicisse cedrum nobilis emicat
 Arbos, & astris invidendum
 Jungere amat generosa florem.
 Non tanta dices Hesperidum plagas
 Beavit arbos: non Dryadum hæc domus,
 Cum Graja Nymphas fabuloso
 Infereret nemori vetustas.
 Angennianæ Stemma propaginis
 Agnosco, & altæ lumina gloriæ,
 Stirpemque * Regalem, nec unquam
 Degeneres Atavis Nepotes.
 Est*, cui ferocis regna Poloniæ
 Henricus absens credidit. Huic, Parens
 Tutorque Musarum, supremi
 Ferre dedit monumentum amoris

* A. D. Ludovico
 vico ducta
 materna linea.
 * Nicolaus
 March. Ramboll.
 Jacob. Angenn.
 Francisco L.
 casimirus

Franciscus , ingentem edere suavis
Angennî in ulnis Rex animam libens.

Joan. VI.
Ramboll. Ca-
roli VI. Regis
Gubernator
&c.

Hic Carolum Gallis Amores
Fingere Deliciasque visus;

Idem Viennam primus , & additum
Delphina Francis flectere liliis.

* Carolus E-
pisc. & Cardin.

Nec Vaticano * Præsul ostro
Defuerit lituoque clarus.

Armis tremendos , consilio graves ,
Fecunda Virtutum & Procerum Domus
Diffudit Europam per omnem ,
Bella manu , placidave Pacem

Leo Angenn.
Marchio Pifa-
nius.

Linguâ ferentes. Jam rapidus ruit
Per tela & ignes per medios Leo ;
Vastâque Nortlinguæ sub arces
Strage fremit juvenilis ardor.

Immite fatum ! sic decuit tamen
Cæforum acervis grandibus hostium ,
Tuoque , Pisani , trophæo , &
Purpureo incubuisse letho.

Ramos per omnes vivida stirps agit ,
Ille , ille , gentis Borboniæ caput ,
Rex Divus , æternoque frontem
Sideream redimitus igni.

Ductu perenni per memores iit
Transfusa fastos gloria Principum ,
Rambollietos nuptiali

Fœdere consocians Penates.
Antistita ex quo Maxima sanguinem
Decusque traxit , candida virginis

Puella regnatric catervæ ,
Jam Supero bene pacta Regi.
At, quam superbo Montosides jugo
Nuptam revinxit , magnificas soror
Aulæque Parnasloque curas

LYRICON LIBER III

107

Dividit, ingenioque regnat.
 Spes administrat Julia publicas;
 Et, qui volentes per populos dabit
 Mox jura, Delphinum gubernans
 Imperio tenerum elaborat:

Dux Montos
 ferâ, Delphi
 ni primum
 Gubernatur
 &c.

Cælestis Agni dum niveum gregem,
 In arva læto roscida nectare
 Collesque tendentem Sionis,
 Agmine liligero puellas,
 Elisa sanctis imperiis regit,
 Aula & faventem linquere Regiam;
 Purosque vivo pascit igni &
 Dulcibus illecebris amores.

Elisa felix, quæ popularibus
 Majora votis pectore fervido
 Concepit; insultansque terris
 Ætheriâ volitat sub Aulâ!

Nec verò amicos interea fugit,
 Digna eruditæ Progenies Domûs;
 Castesque Musarum lepores;
 Et pretiis animos laceffit.

Sic & flagrantès Aligerûm choros
 Cantu frequentat consona mystico;
 Dextrâque mortales Camœnas
 Munificâ stimulare gaudet.

ANGELO TUTELARI.

ODE IV.

QUISQUIS es, Cæli genus & Sionis
 Fulgidæ Civis, volucerque terræ
 Hospes, aspectum fugiens, & idem
 Clarior astris;

Purior flammâque animâque, Princeps
 O Peregrini Comes, exulisque

110 LEONARDI FRIZON:

Dulce solamen , pavidi benigne

Tutor Alumni !

Horridos inter , mala nostra , casus

Degis & luctus ; at ubique felix ,

Læta dum excelsi facie Parentis

Lumina pascis.

Interim umbrosis metuenda turbis

Castra metaris vigil , & Clientem

Plurimus vallas , placidæque curâ

Providus ambis.

Lumen obscuræ , gelidæ calorem

Admoves menti : Dominoque vota

Offerens servi , pretiosa velox

Dona reportas.

Sic ama , semper studiis probari

Corporis præsens animique Custos ;

Neu parum grati vitiis repulsus

Cede Clientis.

ANTHOMANIA,

SIVE IN SUMPTUOSIORES FLORILEGOS

ODE V.

Luxu quis hortos Assyrio furor

Ornare ? pictis errat in arcis ,

Vanosque venatur Colores

Ambitio malefana Florum.

Venalis auro bulbus , & improbo

Cultu superbit. quin pretium supra ,

Censuque jam major Tulippi

Forma fugax , folio caducus

Marcente fulgor. Quam cupidi tamen

Labore tanto Florilegi , rosæ

Ostro priorem , liliove

Extuderint speciem nivali ?

LYRICON LIBER III.

III

Fætidiosis nempe oculis placent
Non pulchra , sed quæ rara. nec exteram
Gentilis æquet Flora Chlorin.
Barbaries peregrina , laudis
Pars prima rebus. Vertere dædalo
Molita Naturam ingenio manus,
Corrumpit ; & multam per artem
Monstra parit variante ludo.

ANTONIO VERJUSIO S. J.

Cùm de laudatissima Vita D. FRANCISCI
BORGIAE , à se editâ , demissè scripsisset
ad Celsiss. Principem FERDINANDUM
Episcop. Paderborn. Coadjut. Monaster.
Epistolâ Nuncupatoriâ Carminum in eun-
dem S. BORGIAM.

ODE VI.

PARUMNE claris aucta laboribus
Æterna magni gloria BORGIAE ?
Nec Vita , quæ tanto per Aulam,
Per populos celebrata plausu,
Explevit acrem , quo Pietas flagrat,
Divinæ amorem laudis ? & inclyta
Supplere , VERJUSI , Camœnis
Historiæ monumenta curas !
Tot ista florens charta leporibus
Nec sat renidet ; tot radiis micans
Insignis , augustoque cultu ,
Charta sacris opulenta gazis ;
Quàm lata Virtutum enituit seges
Doctæ beato munere copiæ ,
Rerumque majestas amicâ
Eloquii decorata pompâ !

Cælo Minister dignus & Artifex
 Astra elaboras ; aurea lumina ,
 Purasque in Horoïs coronam
 Texto acuis rutilante flammâ.
 Pulchro eruditâ fers operi manus ,
 Jam laureatas , jam meritis graves ,
 Notasque Divis : & sequaci
 Scripta volant numerosa Famâ.
 Dudum Nobletzi splendida grandibus
 Factis , & ingens Armoricæ decus ,
 Auctore facundo stupentes
 Vita oculos animosque cepit.
 Et secla vincet. par Superis tamen ,
 Romæque fastis debita , BORGIAE
 Prælusit , immensæque Vita
 Stravit iter bene victa laudi.
 At tu , sacratio mentis adhuc calens
 Partu , labores longâ alios viâ
 Ordiris : & Fratri sagaces
 Egregio sociare curas ,
 Rhenique ad oras tendere Regio
 Urgente missu ; non tacitæ magis
 Natum Minervæ , quàm potentem
 Consiliis , habilemque rebus ,
 Scriptorque & Actor nobilis exhibes ;
 Illustris ardor quàm rapit obsequi ,
 Sacroque ovantis Marte Regis.
 Auspiciû , Fideique cultus.
 Tibi per Aulas , castraque Teutonum ,
 Junctâ Arte Virtus. fœdera Principum
 Tractare solers , rite causâ
 Interea Superûm allaboras.
 O te beatum , Neuhusiâ datur
 Cui FERDINANDUM visere regiâ ,
 Numenque Vatum , sanctiusque

Aonio penetrale fano !

Illic salutē (vera refert ?) meæ

Inter remissas attabalas tubas

Libastis ; absentisque tantas

Nomina personuere mensas ;

Dum sumptuoso lætior Hospites

Honore Princeps accipit ; ingeni

Lepore , doctrinæque claros

Largus amat celebrare Fratres ;

Hunc tu Patronum concilias mihi ;

Et cujus autor , testis idoneus

Favoris , huc illo superba

Creber agens Helicone dona :

Quæ digna tali carmina gratiæ

Olim rependam ? Nec placitiæ modus

Benignitati , jam nitentes

Præla typos operosa versant :

Jam dedicato littera carmini

Præfixa ; laudes nec modo Principis

Collegit , indignum sed amplis

Accumulat titulis Poëtam :

At fortè si me Castalias placet

Efferre in arces ; parce modestiâ

Gaudens iniquâ , cur te ab astris

Sponte humilem redigis sub umbrâ

Ingratus , ah , Famæ obstrepis , & sacris ,

Suggesta volvunt quas pia , laudibus.

Non antè sat notus (Quirino

Vel meritum celebrante ritu)

Donec stupendæ lux nova proderet

Arcana Vitæ ; B O R G I A jam tuus

Triumphat : & Præco per alta

Templa frequens tua dicta jactat :

Qualem ipse narras olim habitum rudi

Cultumque Vitæ , magnanimi datum

* Ducis &
Marescalli
Franciæ, ad
Religiosum
Ordinem ex
lecta D. Bor-
giæ vitâ, re-
versâ.

J O I O S Æ * iu usus, dum priora ad
Castra dolo revocat salubri

Subletus armis egregium Ducem,

Librique formâ pellicit extimâ;

(Ridebat, encaustoque picta,

Et solido radiabat auro)

Talem, elegantis mirum opus ingenî,

Nunc Vita læto ditior übere,

Majorem & ornatum requirat

Digna oculis manibusque Regum.

Tunc, noctis inter fida silentia

Perlectus, exemplo acer & efficax,

Non sponte desertas, sed ultra

Immemorem repetisse partes,

Liber subegit, religiosius

Merere Christo; delicias, opes

Calcare, FRANCISCIQUE dura

Signa sequi, rigidasque leges.

Palmaris & vis ardua BORGIAE

Quem non caducas res super efferat,

Crucisque vexillo advolantem

Sidereos agat in triumphos ?

D. CATHARINÆ VIRG. ET MART.

ODE VII.

Q UAM tibi struxit, CATHARINA, tortor
Machinam sævi tragicam doloris;

Te, Triumphalis Rota facta Currûs,

Invehet astris.

Tu Sophos fastum sapientiamque

Dedoces falsam : neque te Magistrâ

Discere ignotum puduit Tonantem, ac

Morte fateri.

Post feros victi gladios Tyranni,

Dote pœnarum locupletem, & olim
Annulo pactam sociat volenti

Pronuba Nato.

Deipara.

Lustrica invisum patriæ colorem
Unda purgavit prius : at pudico
Lacte nunc lotæ Genii volantes
Funera curant.

DE TRAGOEDIA;

AD JULIUM HIPPOLYTUM MENARDERIUM

ACADEMICUM, SACRIQUE CUBICULI LECTOREM;

Cum eam Poëtices partem doctissimo ele-
gantissimoque opere illustrasset,

ODE VIII.

REGINA longo turbida fymate
Verrit theatrum. Non calido coma
Vibrata ferro, non odorum
Assyrio madefacta rore.
Nec forma mendax, splendida nec genis
Venena, vultum castus habet decor,
Mistus dolori, pars decôris,
Ipse dolor : placet ipse luctus :
Fortuna sævo quidlibet insolens
Peccare ludo, funeream movet
Scenamque, famososque casus,
Et Procerum revoluta fata,
Terror per omnes it cuneos virum,
Utcunque pœnis culpa sequacibus
Urgetur : effususque Mœror
Corda quatit, lacrymasque miscet.
Ut rerum hiantem mirus amor tenet
Pascitque turbam ! jamque alacrem stupor

Plausum repressit. Ne loquaces
 Cruda Sophi documenta jaçtent.
 Gentes Poëtæ blandiùs edocent,
 Moresque purgant. Hinc tibi laurea
 Surgit, Menarderi, perennis,
 Dum Tragicæ vitiis Camœnæ
 Severus obstat. Corduba nec suum
 Censuræ alumnum turgida subtrahit,
 Pingue & peregrinum sonantes
 Fundere quam memorant Poëtæ.
 Vecors recluso quid gladio parat
 Noverca, & artus Hippolyti super
 Effusa? probrosone castum
 Sanguine commaculat cadaver?
 Phædræ otiosus (marmoreum putes)
 Spectator adstat, nec gladium eripit
 Conjux, & infandi cruentas
 Tot patitur furias Amoris.
 Quid ille, natos & Megaram Hercules
 Coram trucidans? aut muliebribus
 OEtam fatigando querelis
 Quid meruit maleficus Heros?
 Quæcunque, Vatum languidioribus
 Sublapsa curis, fœda Tragœdiam
 Labes notavit, five Graias
 Illita, seu Latias per urbes:
 Priscas, recentes emaculat notas
 Nitens jam ab omni parte Tragœdia;
 Graviq[ue] Thymbræi parentis
 Exuperat genus omne formâ.
 Tuæ illud artis munus & ingeni,
 Mirande Scriptor, picta leporibus
 Cui charta, doctrinâque fulget
 Mygdoniis potiore gazis.
 Sed te per Aulam nunc alius labor

Exercet, ipso dignus Apolline.
 Tu Gallico Phœnix Achilli;
 Teque animo Lodoïcus haurit
 Blandum eruditis influere auribus,
 Scita actuosæ dum Sapientiæ
 Evolvīs, exemploque torum
 Colligis ac superas Lyceum.
 Regum triumphos & memores amat
 Fastos doceri, nunc Babylonios,
 Nunc Pellæ Alexandro superbæ, aut
 Cæsareæ decora alta Romæ.
 Virtutis ingens at propius movet
 Avitæ imago: quæque tulit ferax
 Virūmque virtutumque tellus,
 Franca avidus repetit trophæa.
 Simul flagranti corde micat, suæ
 Moras juventæ, factaque Principum
 Audita præcurrisse lætus,
 Et patrias geminasse laudes.

IN S. APOLLONIÆ TORTOREM.

ODE IX.

BARBARE, cur revulsos
 Stirpitus dentes niveæ comminuis puellæ,
 Dentibus ô cruentis
 Digne quem pardi lanient, Armeniæque tygres?
 Nil agis, ut Deorum
 Monstra, latratuque ferum devenerans Anubim,
 Cornigeramque cultu
 Iſin aut Apim celebrans degeneret profano.
 Quid truculente cessas
 Carnifex? ardente rogo quid minitans resistis?
 Exprobrat ipsa lentos
 Involans ultro mediis suppliciis furores.

Fervidus in coruscas

Emicat sedes animus ; sacrilegæque victrix

Perfidia Virago

Despicit cælo Pharias jam nova stella flammæ.

AD JOANNEM STRADÆUM S. J.

Cum officiosissimum Vatis emeriti testimonium de Autore promulgasset.

O D E X.

* Tolosa.

Q U I D urbe * missas Palladiâ juvat
Efferre laudes Aonii Senis,

STRADÆE, majoremque vero

Invidiâ cumulare Famam ?

Abstiste plausu. Non ego credulus

Lactari amicæ nectare Gloriæ.

Cycnea THERONIS probavit

Canities juvenile carmen ?

Venæ beatas divitias canit ?

Sic non avaræ munere fabulæ

Tagusque, Pactolusque, & Hermus

It liquido pretiosus auro.

Si vena tantis veriùs affluat

Superba gazis ; non ego te meâ,

STRADÆE, inornatamque Fratris

Progeniem patiar Camœnâ,

Qui Celtiberis finibus explicat

Nunc arma Ductor maximus agminum,

Vanosque Iberorum retundet

Consiliis animisque motus.

At te refractis Tartara cornibus

Horrent, togatâ militiâ ducem

Experta, quid virtute possis

Hæreseos scelerumque victor.

Angusta sacris terra laboribus.

Quondam & profundi cœca Palæmonis

Pericla, mortalesque in alto.

Non timidum penetrare pugnas

Classis stupebat Regia; quàm vigil,

Solerisque curâ non humili, Ducum

Et militum ambires salutem;

Dum volucris fera grando plumbi,

Dum jacta ahenis undique molibus

Circumtonarent Martia fulmina, &

Cruore fumantes & igni

Ferrea nox operiret undas.

Nec ipsa pulchris fessa laboribus

Cessât Senectus. Eloquio potens.

Hortaris, ac doctâ flagrantem

Voce animos acuis piorum.

Fastidiosi nulla supercili

Timenda nubes, nil tetrici geris;

Et integro cani lepore

Vim placidæ gravitatis ornant.

Ut ore mulcens Nestoreo, Pater,

Lætos sodales, melleus influis!

Pondusque, majestasque verbis

Constat, & in nitido renidet

Spectanda vultu, dignaque Principe.

Quodcunque clavis gentibus eminet,

Juventa Regales per aulas

Nobilibus peregrina curis

Contraxit, omnes moribus exprimens.

Formas decoris. Itala sed magis

Cordi venustas, & Quirinûm

Alta Patrum species inhæsit.

Hinc laureati te, Patruum, Ducis,

Hinc infulati stemmata * Præfulis

Cinxere; Aquitanæ Patronum

* Episc. Con-
domensis anti-
quissimi.

D. RAPHAELIS ELOGIUM

ODE XI.

TESTIS Euphrates , rapidumque Tigris
 Flumen , & muri Ninives superbi ,
 Tobiaë quantus comes , & viarum
 Rector adhæsit.
 Ille mortales habitus , & ora
 Nostra gestavit : simulare servum
 Nec fuit Divo pudor ; & benignâ
 Fraude fefellit.
 Ille desertis homicidam in arvis
 Dæmonem vinxit : rediviva , lucis
 Angelus diæque potens medelæ ,
 Lumina Cæco
 Extudit , magnos acuens in usus ;
 Quò , sacros inter Proceres Tonantè
 Intimum , cernat nitidâ Ministrum
 Corporis umbrâ.

IRIS IN FONTE

ODE XII.

VIDES , ut altè limpidus emicat
 Cælumque jactu fons liquido petit ,
 Gemmisque rorans , & sereno
 Plaudere amat recidente nimbo ;
 Triton , supinâ cæruleus comâ ,
 Plenis coactam faucibus evomit ,
 Conchæque diffundit sonantem
 Ære cavo jaculatus undam.
 At Phœbus amni , qui vagus aëre
 Byssi nitentes fingitur in sinus ,

LYRICON LIBER III.

121

Adversus immiffis renidet
Mille ferens radiis colores.

Ceu vellus album purpureo inficit
Humore Sidon, læta superbiat
Quo deinde majestas amictur
Regia, fideribusque certet.
Sic luce Titan plurimus imbuat,
Tingitque lymphas. hinc viridem trahit,
Hinc luminis flavum repulſu,
Hinc rubeum bibit unda fucum.

Nubes nec arcum roſcida finxerit
Amœniorem, pacti ubi fœderis
Signo refulgenti vetantur
Diluvium timuiſſe gentes.
Nec, dum trigonum ludat amabili
Errore vitrum, cunctaque in Iridem
Transformat, inducitque pictis
Elyſii ſimulacra campis.

Haud tale quiſquam verſicoloribus
Filis tapetum proferat artifex.
Titanis & quiſquam æmuletur
Sidereos Phrygio labores?

MOSES. ODE XIII.

V I N D I C E M Hebræi generis Puellum,
Fulmen Ægypti, vaga portat unda.
Scirpeæ mites Pueri carinæ
Parcite fluctus.

Mollior duro Pharaone Nata,
Ipſa fatalem Puerum & natantes.
Suſcipit cunas gremio, futuræ
Inſcia fortis.

Cuncta permiscens elementa Vates,
Efficax virgâ, Domitor Tyranni,
Luminisſque inſtar, populis tremenda

Monstra ciebit.

Dux Erythræo bipatente callem
Sternet intactum ; pluviumque cælo.
Manna diffundet , rigidaque largum
Nectar Eremo.

Amne sublatum , sacra flamma poscit
Saxeis fœdus tabulis inustum
Fronte lunatâ referet coruscus
Monte Sequester.

VIRGA MOSEA.

ODE XIV.

QUÆ gregem rexit, populis & omni
Jura Naturæ ferat. O biformis,
Jam pedum, jam sceptrum eadem, per agros
Nota, per urbes !

Ut repentini faciem colubri
Induis, Moses trepidus refûgit ;
Mox redis in te, rapiente caudam
Mose colubri.

Tanta quò sceptro vigeat potestas ?
Hæc Magos fregit, Strygiaſque vires ;
Ac Dei certis operosa signis
Virga refulsit.

Impium attrivit Pharaona plagis ;
Regna subvertit ; geminos Erythram
Struxit in muros ; scopulis fluenta
Mellea duxit.

Ardui telum Ducis una, palmas
Implet elatas Superis, & infrâ
Temperat pugnas, gladiisque robur
Addit & hastis.

Inde suspensam fluitare laurum
Nunnii * ſenſit Soboles ; ſuiſque

* Joſue.

Fortiorem armis , dominamque fati
Surgere Virgam.

JOSUE , DUCI MAXIMO.

ODE XV.

TE quis , Hebræum generose Ductor ,
Nunni sanguis , tacitum relinquat ,
Sceptra victrici Chananæa fortem
Vincere dextrâ ?

Te tetro versâ fugientis undâ
Flava Jordanis stupuere regna :
Pervium sicco pede transmeasti
Fluminis alveum.

Te sacris pompas agitantem in armis
Viderant clausæ Jerichuntis arces ;
Bellico latè cecidere quassa
Mœnia cantu.

Te , Deo humanæ famulante voci ,
Audiit cælo vetitus moveri
Siderum princeps , stabilique noctem
Luce repressit.

Arduus prono stetit axe , pugna
Testis & fautor ; penitusque fusos
Grandinis vasto crepitante nimbo
Præbuit hostes.

Quinque mox antri latebrâ Tyrannos
Eruis , jussâ pius ultor irâ.
Penduli furcis , species trophæi
Horrida , Reges.

*Obeliscus Præ-
tatio Voci He-
braeæ.
Josue re.*

FELIX SENECTUS.

AD LUDOVICUM MÆRATIUM THEOLOGUM.

ODE XVI.

ECQUEM, Sicanæ mole premi-ratum.
 Etnæ, fatigat non tolerabilis
 Senecta, cælestisque doni
 Actum odiis Stygiæve pœnæ
 Huc vertat aures ad citharæ sonum :
 Turpes querelas & gemitus premet
 Ingratus, æratemque parceret
 Immeritis onerare probris.
 Lecto sepulti membra cadaveris,
 Spirare solis visâ doloribus,
 Seu morbus exercet, furores
 Carnificum superare visus :
 Seu primæ inanem mentis, & ultimæ
 Sorti relictum, colloquio fugax
 Dignatur haud ullo juventus,
 Noctivagam velut horret Umbram
 Seu jam propinquo funere palluit,
 Timore manes jam patitur suos,
 Et mortis & vitæ moratur
 Impatiens, dubiusque voti.
 At tu innocentes, quisquis es, ô miser,
 Culpare canos desine, mox tibi
 Iratus uni. Non senectæ,
 Ast animi vitio laboras.
 Sero Juventæ sordida fæx malæ
 Subsedit ævo. Disce adeo Senem,
 Me teste, nil vitæ arguentem
 Degeneres gravioris annos.
 Non hic, Quirinæ grande decus togæ,

Narro Catonem. sanctius offeram
 Felicis exemplum Senectæ :
 Mæratius mihi carmen esto.
 Stupore nam quis pectora plumbeo
 Bæota pressus, nesciat inclytum
 Nomenque, virtutesque, & alti
 Tergeminos operis labores?
 Hic ille, diæ quem Sapientiæ
 Sacro Magistrum Gallia pulpito
 Mirata, bis-ternisque lustris
 Doctam avidâ bibit aure vocem;
 Dum nil profanum, nil rude tinniens,
 Lepore priscam barbariem novo
 Detergit; Arpinumque Aquino
 Confociat, teretique linguâ
 Volvit profundæ mentis opes, sui,
 Thomæque largus. Mæratia extulit
 Se luce * Clarus-Mons, Olympi
 Sidereas imitatus arces.
 Quid consulenti nota Lutetiæ
 Oracla narrem? Regia, nec semel,
 Suspensa responsum petisti,
 Et dubiis, Richelæe, rebus.
 Turbâ remotus nunc placido Pater
 Gaudet recessu, bisdecimum quater
 Ætate prætervectus annum,
 Et facili superans senectâ.
 Longæva nullis membra doloribus
 Tentare morborum ausa cohors, procul
 Absistit, & sanctæ veretur
 Hospitium violare mentis.
 Vitæ elegantis quantus adhuc lepos!
 Quam morum amœnus candor & ingeni!
 Nec frontis aut tantum senectæ,
 Quantum animi Sophiæque, cant.

* Coll. Claramont, Paris,

Septum latebris & Proceres, neque
Obscurum in umbrâ visere amant Senem :

Auditque gratantem benignus

Liligeræ Dominator Aulæ,

Si quando in Aulæ publica Faustitas

Lucem evocavit, Pacis & aureæ

Ridens imago. Regis ardent

Obsequium generosa corda.

Extremum ad ævi discere cardinem

Legis repertor Cecropiæ Solon

Jactabat olim : tu docendo

Emeritam vegetas senectam,

Mystes sacrorum splendide, Mæراتи ;

Henr. Borbo- Quo se Magistro extollere Principum

nus, Dux

Vernelius &c.

Felix alumnorum juventus

Visa, tuas celebravit Artes,

Pulchri laboris nunc quoque pertinax

Docere tendis. Non ego, quæ triplex

Perennis excudit volumen

Ingenii monimenta, canto,

(Volat per Orbem Mæратиæ decus

Insigne mentis : publica vox sonat

Scholas per omnes, & Lyceo

Cælum aperit, solidumque Numen)

Privata laudo. Quas ego litteras

Legi, & senili quam stupui manu

Tantum exaratum, cuncta melle &

Ingenuis salibus remissa !

Quæ cura ! rerum quo seriem notas

Labore, quantâ sollicitus fide !

Testesque & autores renarras ;

Acta, dies, locus, ordo constant.

Dicam, otiosæ si liceat chely,

Opes relictas, gesta que munera,

Gentis magistratus togatæ ;

LYRICON LIBER III.

127

Cujus amor , medias frementis
 Inter procellas invidiæ, domo
 Florentem Ephebum fervidus abstulit,
 Oraſque in externas ſecutum
 Addidit exilio Sodalem.
 Votis canoras denique litteras
 Obſigno ; & annos vel Dionyſii,
 Magni vel Antonî precabor,
 Et niſe parilem ſenectæ
 Curſum ac tenorem. Tu prece mutuâ,
 Mature Cælo , crudum & inutilem
 Juva Clientem , dum ſacrata
 Fruge litas paterâque Myſtes.
 Neu ſcripta raptim deſpice carmina
 Vatis , Minervæ quem gravior trahit
 Curisq; diſtriſtum ſeveris
 Piærio labor arcet antro.
 Et quem Camænis nuper inemori
 Toſa vidit Palladium Senem,
 Favebat occurrens benignâ
 Laude rudi facilis juventæ.

P. Vitalis
 Theron.

DE BUBULCIS FLANDRIS FRANCISQUE MILITIBUS. ODE XVII.

PUGNA furentes æriâ canat
 Alter Gigantas fulmineum in Jovem;
 Divûm , Pelasgis alter armis
 Mixta canat Phrygiisq; bella.
 Novus decoris ſeria cum jocis
 Grandi remiſcet Neſtor epiſtolâ ;
 Palemque Bellonamque narrat
 Inſolitâ ſtrepiſſe rixâ.
 Hinc Panes ibant cornibus aſperi ,

Fauni petulcum capripedes genus,
Trucesque Silvani ; & Gradivum
Imparibus petiere telis.
Quos non Iberi militis agmina
Tulere Gallos, Belga procacibus
Mordere dictis Pastor audet :
Trans fluvium loca tuta servat.
Quid Francus ? alti nec vada fluminis,
Nec linter usquam. Consilium ferox
Dat ira. transmittit natatu
Et fluvium secat ense miles.
Bubulcus oris belligeri minas
Ferrumque cernens, ilicet aufugit,
Pratis & armento relicto,
Par avibus levibusque ventis.
Cessere Marti rustica Numina,
Panisque, Faunisque : ipsa suis Pales
Depulsa regnis, major instat
Tristibus auspiciis Enyo.
Prædam per undas miles agit redux
Frustra rebellem : flumine territas,
Crebroque mugitu querentes
Ense quatit capuloque vaccas.
Haud, fabulosæ Pastor Iberiæ
Triformis æquas nutrierat boves,
Quo victor Alcides opimo
Geryonis spolio superbit.
Sic prædæ agendæ : parcere Civibus
Miles memento. Quin age, Bosphorum
Perrumpe raptor : transmarinam
Victor, iô, pete classe gazam.

VIRTUS ADVERSIS ILLUSTRATA.

ODE XVIII.

QUædã vera possit rebus in asperis
 Virtus, cruento læta periculo;
 Probavit invictus Clearchi
 Barbaricis animus catervis.
 Frustra reluctans fortibus invidet
 Fortuna cœptis, deterere inclytos
 Molitur Heroum labores:
 Victa decus geminat triumphis,
 Pars ipsa pompæ, clarior emicat
 Offusa acerbis Gloria casibus;
 Cœcasque per nubes superbum
 Purpureo jubar ardet ore.

SS. PETRUS ET PAULUS.

ODE XIX.

CLAVIGER Cæli, Domitorque latè
 Gentium Paulus; cruce pendet alter,
 Alter effundit niveos resecto
 Vertice fontes.
 Par decus vitæ, pietasque mortis.
 Mille post gentes Domino subactas,
 Splendidam Heroes retulere casto
 Sanguine laurum.
 Sideri fidens gemitu carina
 Gaudet, insani domitrix profundi:
 Præsidum fato micat expiata
 Gloria Romæ.
 Cæsarum everfis superant trophæis,
 Altius surgunt soliis sepulcra,
 Et peregrino venerata mundo
 Limina Divum.

IN ILLUD VIRGILII;

Capitoli immobile saxum.

Unam esse Petram, ex Christi promisso
ac dono immobilem.

ODE XX.

NIL satis fixum gerit, aut moveri
Nescium tellus. fragiles virorum
Concidunt vires, etiam caducâ
Mole Gigantum.

Artis infani pereunt labores;
Coctiles magnæ Babylonis arces;
Lirtore illustris Rhodio Colossus,
Et Pharos ardens.

Vasta Naturæ cecidere membra:
Ausâ quæ Cælo propius minari,
Alpium sidunt capita & superbæ
Saxa Pyrenes.

Quidquid immenso stetit orbe, passum
Corruit: seu vis inimica quassum
Stravit, aut ætas tacito perêdit
Invida morsu;

Bruta seu Tellus moyet, ac ruinam
Sponte dat rerum, nimio laborans
Pondere, & crebro solidas tremore
Subruit urbes.

Ille Tarpejas ineunte sedes
Pertinax olim Jove, nunc Quiritum
Terminus cessit, CAPITOLIQUE
MOBILE SAXUM.

Publicos inter sedet una casus
PETRA, nec mundi labefacta motu:

Numinum obtritis super alta signis
Mole suâ stat.

Stabit & nullo violanda casu ;
Quam suo æternum , rata verba fatus ;
Stare promisso jubet , ac fideli
Munere Christus.

Si qua fatalis metuenda labes
Arduæ moli : toties tremendis
Quassa tormentis , toties fragosas
Passa procellas ;

Funditus convulsa jacens , vel Austro
Jamdiu sparsus Boreâque pulvis ,
Nulla restaret , sed adhuc superstes ,
Perferet ævum.

Machinis frustra quatiens , & igni
Sævit & ferro rabies Neronum ,
Juncta Vis Fraudi , Stygiique motus
Omnis Avernî.

Spumeos , Cephæ generosa Sedes ,
Frangit assultus furiasque ponti ,
Et procellarum rapido frementes
Agmine pugnâs.

Quin sacram firmant agitando Cautem
Turbidi flatus ; & inane circum
Murmur invictam sonat , impotentum
Questus aquarum.

Sulfure admoto piceaque flammâ ,
Clarior vivis rutilat Pyropis ;
Durior plagis , adamanta præstat
Mystica Rupes.

VOX PAULI

ODE XXI.

Ex Chryso-
stomo.

S A C R A divinæ monumenta Vocis,
Litteras, Cæli velut arce missas,
Pronus & lætis avidus sonantes
Auribus hausi.

Qualis extremos hominum recessus
Acta flagranti penetravit ore,
Vivit in chartis, & adhuc per Orbem
Corda quatit Vox.

Ceu tubæ clangor tremefecit hostes;
Ceu lyra mulcet strepitus clientes:
Intonat bello, Charitumque plenos
Spirat amores.

JULIO CARD. MAZARINO;

DE SUO AB EXPEDITIONE BELGICA,

CÆSIS HOSTIUM COPIIS, URBIBUS EXPUGNATIS,
TRIUMPHALI REDITU.

ODE XXII.

Prefixa Currui Gloriæ AN. M. DC. LVIII.

C E L T A R U M nova Lux redi,
Quò te Régis amor sollicitus vocat,
mixtæ imperio preces,
Claris digna quies lausque laboribus.

Urbes urbibus additæ;
Circumsepta nitent lilia laureis:

Aulæ te cupidæ refer,
JULI, perdomitis major ab hostibus.

Belgarum exuviis graves ,
 Congestâ rapidi Martis adoreâ ,
 Currus instruit aureos ,
 Plaudentemq; trahit Gloria Franciam.
 Stipatæ populis viæ
 Affusis reduci : nec Procerum brevi
 Excurfu mora neçtitur ;
 Gratandi studio non humili calent.
 Quin pompam ipse etiam tibi
 Regum ducere amat Maximus obviam.
 Tum vox publica , non metu ,
 Non spe ficta sonat : sponte volant suâ
 Laudis carmina liberæ.
 Pars est ingenii, gaudium ; & impetu
 Ingens pectoris emicat ,
 Nec par ille tamen promeritis Amor.
 Tu Mens inclyta Galliæ ;
 Princeps Consiliis , ac geminis dare
 Castris jura potens ; togæ
 Idem , ac militiæ Præses , & Arbiter.
 Jam vis arte sagax novâ
 Crescit ; barbaricâ nec temere manu
 Cæcus bella gerit Furor.
 Et Flammæ suæ sunt sidera Martiæ.
 Hic, JULI, tua bellicos
 Cursus Astra cient lumine prospero ;
 Regique , & populo micant :
 Gallis purpureum blanda vibrant jubar ;
 Hosti sanguineum rubent ,
 Acrique assidue fulgure militant.
 Fraudum splendidus artifex ,
 Deprensus stupuit consiliis Iber ,
 Devictus cecidit tuis ,
 Et vexilla retrò cum gemitu tulit.
 Dunkerquæ meditans opem ,

Væ, fœdæ subitam cladis imaginem
Mœstis civibus objicit;

Auger damna gravi Belgica prælio.

Arcto mœnia carcere

Circumfessâ premens, Austriadæ obviû

* Turenæum. Erupisse mones * Ducem.

Nimirum attonitis hinc pavor, hinc fuga, &

Strages incubat hostibus;

Delectâ opprimitur subsidium manu:

Capti militis agmina

Francis victor ovans dividis urbibus.

Quid mox oppida præpere

Cursu rapta sequar, cùm subiit jugo

Undarum imperiosior

Regina, & domitis Oceanus vadis?

Fortunæ invidiam querar,

Morbi triste nefas, publica cùm Salus,

Augustumque suis propè

Palmis succubuit BORBONIDÆ caput:

Ah, vexare recentia,

Vates, parce sacri vulnera pectoris,

Magnum quæris modo JULIUM

Consecrat gladio savor hostico,

Quamvis magnanimus Dolor,

Fatalemque pui spe superans ætatem.

Qualem prociis aspexit

Te Burgas, incolumi Rege, Virevici?

Quænam consilio stuper,

Princeps, impio cùm celatum non o

Gravidum quæris amor,

Pendentisq; operum persequeris minus!

Jamjam vincta ligacibus

Cursu, ecce, nos volvitur ad pedes

Gravelinas, Caletas

Felix cùm vigilem te retinet mors,

Absentemque vicariis
 Regem bellipotens partibus exhibes.
 Castris providus exuebas,
 Ingentesque animos finitimâ sedens
 Afflas urbe cohortibus.
 Educto medius nec semel aggere
 Inter pulvereas agis
 Nubes, ærisonæ fulmina machinæ,
 Conspectuque acuis Duces;
 Et subdi stimulos miles, & igneis
 Sensit pectoribus faces:
 Spectatore avidus se reficit labor,
 Ergo rite sequacibus,
 JULI, compta refers tempora laureis.
 Captis lætus ab urbibus,
 Ferventem celebri laude Lutetiam
 Festivâque superbiâ,
 Intra regificis Victor honoribus.
 Currus ipsa tibi suos
 Tali pro Reditu Gloria consecrat.

IN FUNERE PETRI MOURY S. J.

VIRI RELIGIOSISSIMI, PRO SALUTE PUBLICA,
 Infestis pestilentia temporibus, Novies Devoti.

ODE XXIII.

LUGETE, Cives, Burdigalæ memor
 Quidquid piumque est: tuq; gementibus,
 Garumna, ripis, plange mecum
 Cœruleo lacrymosæ fluctu.
 Hinc, qua reducto mœnia desinunt
 Lunata cornu, mœnia, quæ Crucis
 Pronis adoratæ fluentis
 Signat honos tituloque sacrat;

Hinc partem in omnem se dolor explicet;
 Portuque classẽm cùm revehet, simul
 Nostras & extremam sub Arcton
 Oceanus referat querelas.
 Quæ causã luctûs? Occidit, occidit,
 Mortis satelles quem toties Virum
 Mirata Pestis luctuosos
 Burdigalæ relevare casus.
 Immissa ab alto vulnera languidæ
 Curavit Urbis, non medicâ manu,
 Non Æsculapî sumptuosâ
 Arte Machaonioque succo.
 Incensa passim Burdigalæ lues
 Dum clade vastat corpora publicâ,
 Ægras laborantum redemit
 Exitio graviore mentes.
 Latum Saluti nam patriæ caput
 Devovit Heros, castraque inhospita
 Lethi subivit, dirus attris
 In foribus stabulabat horror.
 At Mystra in urbem funereo sacer
 Squallore, clausasque assiduè domos
 Processit. Hîc, noxas fatentum,
 Tartareis animos reorum
 Vinculis solutos ferre sub æthera;
 Illic edulem porgere Numinis
 Tecti medelam: jam retusis
 Vim Stygiam cohibere telis.
 Fati sub ictu; sedulus officî &
 Ubique multus, ceu populi Pater:
 Turbanque collatis piorum
 Subsidiis inopem fovebat.
 Nec strata morbo corpora negligit.
 Et ipse, dum vix membra trahens domi
 Caduca marcet; si quod urbi

LYRICON LIBER III.

137

Fortè lues meditata funus,

Alto reſectis pectore viribus

Notum ad laborem continuo Senex

Procurrit, & major per omnes

Explicuit ſua ſigna vicos.

Certare Morti fortis Amor volat

Ultra periculis obuius; arduis

Increscit, inpenſaque Amicum

Obſequiis animâ triumphat.

At dura poſtquam verbera vindicis

Amovit iræ jam melior Deus;

Ceſſitque demum, contumaci

Sæpe malo reperita, Peſtis:

Tunc ille, vaſtus ceu ſine pabulo

Conſidit ignis, robore defici;

Vicesque mutari laborum,

Aſperius ſubeunte morbo.

Quid non dolorum magnanimus Senex

Effeto anhelans corpore pertulit!

Quæ calculi inteſtina peſtis!

Carnificum leviora tela.

Bis ille ſectorum haud faciles manus

Expertus. At nil materiem mali

Exhausit: avulſiſque binis

Inde alios alioſque cogunt

Fecunda pœnis viſcera calculos.

Et jam medentum vulnificas manus

Admittere exciſæ recuſant

Funditus, edomitæque vires.

Conſumpta longis vita doloribus,

Deo probatæ vi patientiæ

Transmiſit Heroem ſub aſtra

Emeritum, rutiliſque neſcit

Frontem lapillis. Deſine ſegnium,

Vates, querelarum, & potiùs ſacra

Post mille cantemus dolores
 Gaudia deliciasque Mystæ.
 Non ille acuti jam meminit graves
 Sensus doloris. fontibus influit
 Totis superfusi voluptas
 Numinis, Oceanoque mentem
 Mergit beatam; depositum quies.
 Optata corpus dum gremio foveat
 Telluris. At somno excitatos
 Summa dies renovabit artus.
 Corpusque purâ cyclade vestiet
 Pro vili amictu. lumina lacrymis
 Absterfa gemmabunt honore
 Sidereo, radiosque fundent.
 Huic tu coronas reddere civicas
 Ecquid moraris, Burdigala? i, pio
 Quercumque palmanque & ligustrum
 Depropera, venerans, sepulcro.
 Fors & benigni præsidium Patris
 Olim reposces pestiferam in luem.
 Sic, vota post Rocho soluta,
 Notum adeas precibus Patronum.

CHRISTI VICTIMA INCENSA.

ODE XXIV.

CE u rosâ in molli violâque Laurens,
 Crate candenti, rigidoque ferro
 Decubat, sensimque feros liquari
 Gaudet in ignes.
 Torridæ scandit supera alta gratus
 Victimæ nidor. procul hinc acerræ:
 Tureos usto superat vapores
 Corpore Martyr.

SCANDERBEGUS AC TORASIUS

à Joanne Bufferio celebrati.

Gemino Poe-
mate, Rhea
Liberata, &
Scanderbego.

ODE XXV.

HEROAS geminos, Torasium Rex,
Croia Castriotum, Bufferiâ gravis
Et sublime sonans Calliope tubâ

Miris concinuit modis.

Illum, dum tenuis finibus insulæ
Impactam validâ mole Britanniam
Propulsare ferox, pectore junceam

Arcem firmat aheneo.

Hunc, dum semiruti mœnibus oppidi
Illisam Odrysis Barbariem Duce
Frangitque, & medios findit acinacis

Ictu fulmineo viros.

Felix materie Scriptor, & inclyto
Macti Vate Duces! Laude beatior

Quæ fors excipiat, quive operum gravi
Fructus carmine lætior?

OLIVA, BUSSERII ECLOGA.

ODE XXVI.

PARNASSI bifido culmine laureas
Quâ sevit facilis Bussenius manu,
Heroo tubicen dum quatit arduus

Montes Aonios sono;

Mitem nunc Oleam lenibus Eclogæ

Alludens numeris pangit, & uberes

Fetus Palladiæ suspicit arboris,

Ranæ pingue nitentibus.

Nimbos exuperans, jam sacra verticem

Infert fideribus ; lætaque frondeo

Exultant avium millia tegmine ,

Succosque ambrosiæ trahunt.

Felix , qui teretes , mystica pabula ,

Baccas , Pontificum nata epulis , metit ,

Hortisque Italiæ dulcibus abdita

Orbi munera dividit.

Lectos areolis suave-rubentibus

Inscripsisse prius dædala * flosculos ;

Cultis mox segetem , lilia , regiam

Arvis extulerat manus.

Jam fructus Oleæ , nec solitas opes ,

Latè fundere amat ; queis decus Hesperæ

Cantatum nemoris , splendida fabula ,

Malis cesserit aureis.

Felix ô iterum , conscia quem suæ

Multo afflavit agens numine Palladis

Arbos , Castaliæ gloria , & inclytum

Silvæ non humilis caput.

Umbrâ , quæ canitur , mulcet amabili

Vatem , sic meritum ; & blandiùs annuens ,

Quercu fatidicâ nobilior Jovis ,

Argutâ resonat comâ.

Circùm docta fluens tempora debitis

Æternæ tedimit frondis honoribus.

Hinc despecta ederæ præmia , laureæ

Serta hinc Aoniæ jacent.

MAGNUS ATHANASIUS

ODE XXVIII.

VIRTUS iniquis crescit ab hostibus ;
Quos & cruentat tetriùs , Hæresis

Infesta clarat : laudum amœnam

In segetem sata probra surgunt.

Sic Magne , Arii terror , & altior

Ex Italico Latinè Gallicè
que vertit aliquot celeberrimi
Concionatoris volumina.
* Historiarum Flosculos edit,
Historiamque Galliæ
universam &c.

Mundi ruinis, Athanasi doces,
 Per mille jactatus pericla,
 Omnigenas sclerum per artes;
 Dum totâ in unum mole caput furens
 Conjurat Orbis, cum populis Duces;
 Cœtusque Mystarum profani
 Arma Erebo sociant amica.
 Hic ille, quem vis Cæsarum, & impius
 Terris & undis expulerat Furor;
 Cæloque præcluso subactum
 Funereas habitare sedes,
 Umbrisque misceri, & patrio regi
 Vivum sepulcro; post sacra prælia
 Ingens Alexandrina Præsul
 Regna pio invehitur triumpho.
 Velata palmis undique gestiunt
 Delubra, festis consona plausibus:
 Victorque defensas recepit
 Et meruit celebrandus aras.
 Asserta Verbi gloria Vindicem
 Suum coronat: Pneumatis & sacri
 Novos in hostes prima forti
 Tela manu jaculatus; astris
 Successit, augustæ in Triados sinum
 Acceptus. Æterni hæc decoris caput,
 Pugnæque & immensi laboris
 Materies simul ac triumpho.
 Ter ô beatum, cujus Olympiæ
 Innexa causæ causa Deum trahit!
 Suprema cui mercès, & alti
 Stat pretium ipse Deus laboris!

ALEXANDRI VII.

PONTIFICIA DISCIPLINA.

ODE XXVIII.

SACRORUM Procerum, non sine Numine;
 Concordi studio lectus, & arduo
 Spectandus folio cùm sua Pontifex,
 Aras, regna capefferet:

Dum septemgeminis excita montium
 Gestit Roma jugis; Claviger hæc Senex;
 Vaticana tenet qui penetrabilia,
 Heredi cecinit suo.

Caulis apte meis, Optime regiæ
 Pastor gentis, ades, quò Dominus vocat:
 Successure meis partibus, & meis
 Jamnunc fingere moribus.

1. Petr. 5.

Sic tu *forma gregis factus*, oves ages
 Exemplo citius, quam lituo. præi;
 Jam grex sponte sequax currit; ut imperi,
 Visu, molle rapit genus.

Rejectans Procerum splendida munera,
 Non-captis fugies muneribus capi:
 Decerpesque tuis, quidquid honoribus
 Fas detraxe modestiam.

Virtus æqua Bonis præmia dividet;
 Ornabitque viris munia: nec Favor,
 Cœcâ nec temere ludicra Fors manu

Sparget dona Quiritibus.

Fiscum effunde libens, ac bene prodigus;
 Apponensque lucro nobilis institor,
 Turbæ crede inopi. debita mox Deus
 Reddet fœnore splendido.

Quæ lethum eripiat, providus occupa
Præmittenda tibi. sic feretrum monet.

Ne quando immemori pectore defluat,

Sit Mors sensibus obvia;

Discaturque diu, quod toleres semel.

Fidum inclusa domi consilium explicat;

Et quas magnanimis insidias struat

Orcus propositis, cavet.

Victu quam tenui corpora sustines,

Tam largâ satia mentem avidam prece

(Hæ sint deliciæ) dum pia mystico

Pastu se stimulat fames.

Jugem Aris operam Sacrificus dabis:

Mundique innocuâ crimina victimâ

Procurans, placitâ fulmineum Patrem

Placabis nece Filii.

Hæc tu nempe agitas, Maxime Præsulum

(Et jam plura tui pignora cepimus)

Gentilemque * tuum, nomine quem refers,

Vinces laudis adoreâ.

Dum submisso animo rerum apicem premis,

Tangis conspicuo sidera vertice:

Orbisque imposito par oneri caput

Portantis Domini canit.

Te norat Melite, cum Fidei sagax

Quæsitior, pavidam fervidus Hæresin

Jamtum discutere, ac sternere disceres

Monstrum vindice dexterâ.

Virus vipereo tetrius insulâ

Purgasti Stygiæ pestis: & impium

Turcam belligero jamtum odio petens,

Totis nunc opibus premes.

Te pastoritio sollicitum pedo

Laudarant Calabri pascua Neriti,

Cornelique Forum, sub tua nec piger

* Alexand. III.
Senensem.

Fluxisse Eridanus juga.

Sævos armisoni frangere vortices

Te Rheni stupuit Tractus ; & Arbitrum

Europæ meminit læta Mimingroda,

Jamtum & Christiadûm Patrem :

Doctrinâ , pietate ac meritis gravem ,

Adversæ medium quem pariter colant

Partes , unanimi laude , vel hostibus

Sacrorum venerabilem.

Florens eloquio , consilio potens ,

Quàm vasta Imperii bella diremeris :

Ornatamque Fidem moribus aureis ,

Et Romæ celebrant decus.

Ergo primitias post memorabiles

Summam impone sacro nunc operi manum ,

Et Pacem solidam gentibus exhibe ,

Justi fœderis artifex.

En , affusa tuos Regna colunt pedes

Legatûm officiis : en tibi publici ,

Privatique (vides ?) omnia gaudii

Festis ignibus emicant.

Noctem sideream vincere candidis

Ardebit facibus Roma , novas tibi

Ponens excubias , dum sibi Montium

Custos arduus excubas.

Almum restitui post tenebras diem

Spondet corda movens augurio Deus ;

Qui lucis genitor montibus extulit

Te Mundi nitidum jubar.

Dixit : tum geminas , quas procul audiat

Cælum , claudere seu pandere vult fores ,

Claves Pontifici tradidit , & novos

Afflavis radios Petrus.

Menti viva Fides , deficere inscia ;

Cordi Cura vigil , Vis adamantina ;

Ex notis hieroglyphicis D. Malachiæ , ac gentilitiis insignibus.

Complexusque homines ac Superos Amor,
Totusque insinuat Deus.

AD S. SILVESTRUM PONTIF.

Ut Magnum Constantinum adeat.

ODE XXIX.

PARCE, Silvester, latebris : cavernâ
Abditum jam te simulacra faustæ
Noctis illustrant, & amica Magno
Somnia produnt.

Perge, Soracti melius relinquens
Nomen ; ut Christi medicante lymphâ
Abluens mentem, simul enitescat
Corpore Cæsar.

Ab ipso deno-
minatus mons
est S. Silvestri.

SOMNIA POETARUM.

ODE XXX.

AT quam soporæ Noctis imaginem,
Somnumque, & Umbras cernimus ! hoc tuum,
Apollo, regnum ? stagna Lethes,
An vitreæ liquor Hippocrenes ?

Ut pota Vatum gurgite mystico
Se turba læto gramine porrigit !

Gratum laborantis, quietos
Aoniæ numerosa lymphæ
Mulcent Poëtas mûrmurâ ; nec levés
Somnos faceffunt. Ennius hîc pater
Accumbit, indormitque Homero ;
Rauca simul meditatur arma.

Infans at illic stertit Horatius,
Gaudetque lauro, non sine Numine,
Myrtoque pressus. jamque eburna
Virgilii patet, ecce, Porta,

Quâ Somniorum examina sedibus

Educit imis. parte aliâ tener

Tibullus oblato eruditum

Ducit adhuc Clario soporem;

Umbereque, sed cui Cynthia dulcior

Castis Camœnis, & Patre Cynthio.

Deliria omnes docta ludunt

Artifici glomerata Somno.

DD. IGNATIUS ET XAVERIUS.

ODE XXXI.

SURGIT, in cælum velut actus ignis,
Acrius IGNATÎ memorandus ardor:

Juncta XAVERÎ radiat gemello

Sidere flamma.

Ille, Dux cælo meritus, manuque

Strenuam & linguâ, superique Regis

Nomine armatam, Crucis advocavit

Signa Cohortem.

Hic per Indorum Japonumque fines

Fulguri victor similis cucurrit,

Et triumphato retulit superbum

Nomen ab orbe.

GUILLELMO DE L'ANGE MNEMOSYNON.

ODE XXXII.

QUAM longis teritur cursibus, *Angeli*
Nomen qui niveis moribus exprimit;

Cælestisque micans laudibus ingeni,

Sacrato imperitat Choro!

Sive Alpes gelidas & Rhodanum legit,

Seu lustrat pelagi littora Gallici,

Poscit quâ vigili gens animo pium

Loioleia Præsidem;

LYRICON LIBER III.

147

Seu lectus meritæ fortis honoribus
Romam tendit iter, quò trietericum
Missos axe vocat bisgemino Patres
Gentis consilium sacræ.

Longinquas etiam, ceu patrio fovet
Musas præsidio, suaviter efficax.
Proh quantis animos suscitât ignibus
Præsens auspicio favor!

Unum hoc ille tamen durior : invidet
Gratis, digna cani, facta clientibus,
Laudes ipse suas; magnaue subtrahit
Luci nomina publicæ.

AD EPHREMUM, PROTREPTICON

Ut vitam ad propositum sibi finem
dirigat.

ODE XXXIII.

QUID cæca inertî tela jâcis manu?
Incerta pandis quid temere Noto
Vela impotenti? Meta jactum,
Certa regat Cynosurâ cursum.
Præfixa cælo meta, Deus; peti
Hæc digna votis. huc, age, nobiles
Intende curas: huc novato
Acer Amor jaculetur arcu.
Inter procellas volveris anxius,
Portumque nescis Navita. Respice
Stellam; coronatamque puppim
Ætheriâ religabis orâ.
Ecquid soluto pectore degener,
Ephreme, torpes? ecquis Olympiam
Invidit infregitque palmam
In manibus, capitique laurum?
Ah, tela nîsu spatgis inutîli,

Stridentis auræ ludibria, & scopo
 Nusquam reperto; vel sine ictu
 Metam acie feriens retusâ.
 Pharo, Capharei perfida lumina
 Præfers! Cometæ funerei sequax,
 Nullis Jacobeam tueris
 Signum oculis miserandus Erro!
 Quin & carinam Syrtibus & vadis
 Illidere excors navifragis amas,
 Portuque neglecto Charybdin
 Quærere, Trinacriamque Scyllam.
 Aut plena dio carbasa Flamini
 Subducis amens, immemor & sacras
 Perferre merces, quas beatâ
 Expositas statione Christus
 Gazis rependat splendidus aureis,
 Quantas Olympo composuit Patris
 Æternus heres. huc secundos
 Expedient pia Vota cursus.

HENRICO D'AGUESSEAU,

MAGNI CONSILII PRÆSIDI,

Libellorum supplicum Magistro, Rei Ju-
 ciariæ ac Politicæ tunc apud Lemovicas
 & Inculismates Regio extra ordinem
 Præfecto.

ODE XXXIV.

JAM DUDUM residem Iyram,
 AGUESSÆE, tui nominis in decus
 Dulci fuscitat impetu
 Lætis Fama sonans ardua plaufibus.
 Nec tantum, geminus tuos
 Quâ fasces Lemovix & vitrei colit

Felix ora Carentoni,
 Auditur resonâ vocis imagine.
 Laudes Gallia publicas,
 Quàm vasta est, avidis concipit auribus:
 Sed Famæ ante alias favens
 Vibiscûm regio; scilicet inclyti
 Nunquam Principis immemor,
 Sanctis Burdigalæ qui fora legibus
 Rexit, Nestoreus senex,
 Augustæque caput nobile curiæ.
 Tu magni genium Patris,
 Virtutis solidâ cum specie, refers.
 Francam moribus exhibes
 Astræam; placidum sive ubi maximo
 Regnum Consilio tenet;
 Seu progressâ sacris è penetralibus
 Cûm sese in populos tulit,
 Et rerum dominâ jura dedit manu.
 Romanæ Proceres togæ
 Sellis extulerat fastus eburneis:
 Te vitæ melius nitor
 Infantis decorat, Celsior emines
 Rarâ, HENRICE, modestiâ,
 Quàm si magnificis acta curulibus
 Spectari procul ambiat,
 Civesque alta premat mole potentia.
 Jam nervo imperii caves:
 Pœnis exagitas jam trepidum scelus.
 At plebis laceræ pius
 Mentem carpit amor, libera fraudibus
 Vestigalia temperas:
 Commissis facilem gentibus Arbitrum,
 Non expromere Judicem
 Gaudes; ipse alias intereâ tibi
 Leges ferre severior,

Æternæ Themidis sollicitus cliens,

Exemplis agimur : domus

Objectâ Domini fingitur indole.

Nil incompositum , aut ferox ;

Sed molles aditus , obvia comitas ,

Invitantia limina.

Nec vulgum tenuem , sævior aspici ,

Arcet turba satellitum ,

Aut questus miserorum , aut timidas preces.

At quàm digna Viro probat

Se Conjux , animi dotibus aureis !

Talonique , Perignio

Mista , & Subletii lumina sanguinis

Claro stemmate colligit :

Factis ipsa suis splendidiùs micat.

Simplex munditiis Decor ,

Florens & Pietas , plurimus & rapit

Mirantes oculos Pudor ,

Luxum qui tacitus damnet , amabili

Censuræ genere efficax ,

Confors ille Viro , laudis & æmulus.

Sic , HENRICE , domum regis

Exemplo , ac populis pulchriùs imperas ;

Dignus , quem studio inciti

Affectent Proceres ! Sic , age , quò vocat

Sublimi properans viâ

Virtus , usque novis auctus honoribus

Pergas , Regia munera

Ac pleno Superos excipiens sinu.

Astræ folio potens ,

Æquandam patriis surgere laudibus

Cernas , & meritis gravem ,

Regnandoque parem progeniem foro.

Hæc , AGUESSIADE , tibi

Longinquâ modulans & voce lyrâ ;

Vatum scilicet & facer

Veri si quid habet spiritus, auguro.

Nec me sola tuæ movent,

In commune piis parta Sodalibus;

Largæ pignora Gratiae, &

Iustis vota jubent addere gratibus.

Privatis etiam ciet

Cantus illecebris Pierius Favor.

Sensit, laurigerò volans

Curru, purpurei *Gloria* Julii,

Victo conscia Belgio:

Nam dum se Aoniis explicat otiiis

Laxandi lepor ingeni;

Observas placitæ fulgura machinae,

Vocalisque operis sonum;

Vatem nec solitis laudibus obruis.

Non tu, quæ stupeat rudis.

Hospes, vel modico tinctus Apolline,

Jactas, aut faciem levi

Delibas oculo. Cenfor idoneus

Parnasso interior subis,

Libras & rigidis omnia lancibus.

Te nexâ Charites manu,

Pulchrarumque chorus suspicit Artium.

Tantis, ne dubita, memor

Urgebar stimulis impatientius.

Sed Pindi viridariis

Abductus, Solymo distineor jugo,

Sacratifque laboribus:

Desuetam refugit lassâ manus chelyn.

Jam nec spes sibi credula,

Famæ parcere amat: triste periculum

Jactâ crebrius aleâ;

Collectæque pavet naufragium rei.

Laudis patritiæ seges,

Phœbeique acies lyncea Judicis
 Audacem quoque terreat;
 Quid, depressum animum corpore languida
 Ast experta tamen juvat,
 Et spondet niveum Gratia calculum,
 Ultra nec finit extrahi
 Pendentis steriles officii moras,
 Qui commercianectere
 Sensûs ille tui mutuus, ac mei
 Interpres studet obsequi,
 Vildonus, tereti Castalium pedo
 Istic Pastor agens gregem,
 Quâ formosa vitent prata Carentoni.
 Notas increpitans fides,
 Hac dilata tenus carmina reppetit.
 Et vim blandæ abhibent preces,
 En, præceps rapior, nunc malè fervida
 Tardum corrigere impetu
 Instat fera dies, & rubor impotens,
 Rursus dum rogat, exprobrat,
 Mirator meriti splendidus, ac tui
 Præco nominis aptior,
 Divinus teneri carminis Artifex.

MAGDALENA LACRYMANS.

ODE XXXV.

MAGDALAM conversus Amor flagrantem
 Solvit in flerus: lacrymis rigatos,
 Osculo sparsoque pedes capillo
 Cernua flectat,
 Quamlibet nardi pretiosa plantis
 Unguina infundat capitique Jesu;
 Suavius fragrant oculis profusi
 Tristibus imbres.

OLOR MANTUANUS,
B. ALOYSIUS GONZAGA.

ODE XXXVI.

DULCE Mantuæ decus
Olor paterna deferit vireta
Mincique lucidis
Longè fluentis evolans, opacas
Thybridis subit specus,
Romæ superbas nil moratus arces,
Jamque candidis nivem
Et casta pennis prænitens ligustra,
Purius novi tamen
Splendere gestit ambitu decoris;
Et sacri modos amat
Ciere cantûs, æmulisque claros
Vocibus choros sequi,
Ad astra librans corpus expeditum.
Vaticanus aureo
Tangens Olympum mons jugo, Beati
Pandit Alitis viam;
Novusque regnat inter astra Cynus.

SUMMO PONT. ALEXANDRO VII.

VENETIIS RESTITUENDÆ SOCIETATIS JESU
Auctori Beneficentissimo Eucharisterion.

ODE XXXVII.

URBEM, furoris Threïcii moram,
Quam ferro & auro, navibus & viris
Juvas, ALEXANDER, tuæque
Sacra ciens Pietatis arma;

Nunc sæviores Thracibus efferis
 Firmare in hostes providus apparas,
 Gentique amicus non inertem
 Restituis Venetæ manipulum.
 Summis negatam Præsulibus diu,
 Quos causâ duri tangeret exili,
 Rem solus exegisse felix,
 Hunc meritis numera triumphum.
 Tu dissidentum cernere Principum
 Causas, & olim publicus Arbiter
 Europæ, anhelantis ruinam
 Imperii cohibere solers.
 Proh quanta sese lux sapientiæ
 Cœtu in potenti visâ Mimingrodæ
 Efferre, Germanæque pacis
 Vestphalicum sociare fœdus!
 Hæc illa mentis dædala vis sacra
 Inexplicati grande negotii
 Textum resolvit, Gordiosque
 Expedit sine fraude nodos.
 Magno Administrum consilio parem
 Legisse prudens. Hadria Nuncii
 Sermone facundo residens
 Difficiles tibi ponit undas.
 O qui sereno fidere discutis
 Caliginosi nubila sæculi,
 Quid grata Loiolæ propago
 Dignum agiter, referatque votis?
 Cæcis ab Orco jacta calumniis
 Tu probra frangens; quâ sacra temperas,
 Ipse, ipse dextrâ, litterisque
 Insolitis memorare laudes,
 Oppigneratâ nec dubitas fide
 Præstare, noti magnificus gregis
 Præcôque, Pastoremque visus.

LYRICON LIBER III.

155

Jam patriâ superasse curâ.

Per te receptis, Optime Præfulum,

Castris, labores Hadriacâ novos

Molitur orâ; sive mores,

Sive opus ingenium salubri

Formare cultu, docta virûm manus;

Quam sensit Orbis quadrifidus, pio

Quid Marte possit, Solis omnem

Per populos comitata cursum.

Alto rigentem per Canadam gelu,

Silvasque & undas; per Brasiliûm rogos,

Per Caffarum infestas secures,

Ac duplices penetravit Indos,

Sinæque muros. Vidit, ab ultimo

Mirata Eoo accurrere Principes

Regumque Legatos clientum

Roma, Petri Fideique sedes.

Neque incruentæ munus adoreæ,

Grandi sacramento in Fidei decus

Jurata, devexit caterva,

Purpureas meditata palmas.

Quot partæ ab uno vel Japonum solo!

Doloris artes mille alacris subit

Necisque formas; & ferendo

Barbariem Furiasque vicit.

At ipsa quamvis Numine concita

Procurrit; ô quem tu stimulum sacræ

Addis Cohorti! quas amoris

Imperium antevolantis alas!

Terras per omnes acrior emicat,

Tuisque flagrans nunc animosior

Parère jussis, quâ vocarit

Relligio, Dominique vocem

Audire pronâ mente vicariam.

Et audit Æther, claudere seu fores,

Seu pandere occlusas jubetur ;

Et domiti specus audit Orci.

Ubique laudes Turma canit tuas ;

Gratesque , nusquam muneris immemor ,

Supplere votis fervet , alinæ

Sollicito pietatis æstu.

Servate sanctum , Cælicolæ , caput ;

Tuque , ô , perennes reddere gratias ,

LOIOLA , pro natis memento ;

Ac proprii decora alta * cultûs

Donis repensâ. Tuque adeo tuas

Partes agentem , moribus æmulum ,

Et Sedis implentem sacratæ

Promeritis Latiale culmen ,

Tuere , Cepha , respice Numinis

Augusta Mater , qui triplicem cliens.

Sternit coronam , templa supplex

Voto adolet bene pertinaci.

Sic , Romæ honores quo celebres die

Nuper ferebas , nullam ab origine

Traxisse Conceptuque labem

Rite piæ celebrata genti ;

Severiori corpora Pontifex

Tuas ad aras pervigili tulit

Jejunio vexatâ , mentem

Toto avidus satiare Cælo :

Longumque inhærens , haud prece futile

Incensâ per suspiria publicam

Causam peroravit Sacerdos ,

Numinis ac populi Sequester.

Præsente casus auxilio graves

Romæ levasti , funeream luem ;

Salvamque Alexandro redonas

Diva suam , miserata , plebem.

O , pace munus perfice , Bistonum

Cum clade. pacem fuscipiant polo
Montes ; Alexandria crescant
Sidera deficiente Lunâ.

TORQUIS MARIANUS.

ODE XXXVIII.

RE-GALE Torquis cœrulei genus,
Gemmisque & auro splendida cingula
Jactent beati, quos Equester
Per titulos celebresque fastos
Claravit Ordo. Virgineus mihi
Torquis renidet, virgineæ manûs
Labore nexus dædaleo,
Non pretio, sed amore carus.
Das, Codre, munus ferre sororium
Jani Calendis. Militiæ placet
Insigne sacrae, quâ MARIÆ
Tartareos domitamus hostes.
O, Matris in Torquem indue liberum,
Amice, collum. hæc te animos pio
Et corda vinco, gestientum
Ferre sacri monumenta cultûs.

ROSEA CORONA.

ODE XXXIX.

DE LIA rami valeant coronæ,
Queis amant doctæ nituisse frontes;
Martia lauri valeant, Ducumque
Gloria, palma.
Me juvat suavi Jerichuntis arvo
Lecta Divinæ Rosa sacra Matri.
Nexilem Thyrsis dat habere grato
Flore coronam.

Floreat longo mihi carus ævo ;
 Cura nec spinis animum cruentet ;
 Ac novo Magnæ diadema Matris
 Augeat astro.

AD JOAN. ADAMUM S. J.

Laudat impensam scribendis libris operam.

ODE XL.

GLEBÆ nec aurum distat inutili,
 Utcunque avarâ merfus humo latet
 Thesaurus, & rubiginosi
 Deteritur species metalli :
 Nec illa, clauso quæ premitur sinu
 Doctrina, fœdæ præstat inertia,
 Nil publicos enixa in usus
 Ingenii tacito recessu.
 Non tu sepultam sic populo invides,
 Adame, gazam divitis ingeni ;
 Linguâque, congestas beato
 Pectore opes, calamoque fundis.
 Calvinus amens immoritur suis
 Confixus armis ; ut validâ manu
 Infesta vertis parricidæ
 In jugulum, metuende, tela.
 Audire clarâ jam videor tubâ,
 Vago receptum quem canis agmini
 In castra Majorum relictâ ;
 Signiferis biviam salutem,
 Scissasque partes incolumi fide
 Constare falsis. Hinc aliò vocat
 Fecunda succrescens librorum
 Materies ; nova pugna surgit.
 Luci rebelles ingenitæ Furor

LYRICON LIBER III.

159

Quos in Tonantem Tartareâ face
 Succendit, aut Prolem Tonantis
 Ætherio solio negatam;
 Discrimen & qui Relligionibus
 Omne abrogarunt, monstra hominum petis,
 Et tela procudis, Gigantum
 Anguiferam domitura stirpem.
 Perge, & deserti vim sacer ingeni
 Huc verte præco; Gallia quâ patet,
 Audite plaudentes per urbes,
 Borboniam celebris per Aulam,
 Committe prælo, ne pereat, pii
 Fetus laboris. Nec sonus eloqui
 Restat, fugaci sparsus aurâ:
 Fixa libris monimenta perstant.

ODE XLI.

Sub fortuitum ex pulvere nitrato incen-
 dium Urbani Prætorii Burdigalensis.

ECQUÆ trementes Burdigalæ domos
 Procella tanto concutit impetu;
 Sedesque Musarum fragore
 Horrifico, tonitruque vastat?
 Non illa ventoso Hippotadæ ruit
 Furens ab antro, pulvereos agit
 Vulcanus ignes. hinc propinqua
 Fulmineo labefacta motu.
 Disjecta sacræ membra volant domûs.
 Musæ relictis sedibus exules.

Labuntur invito Garumnâ:
 Burdigalæ gemitus sequuntur.

Illæ Pyrenen, & Benearnicos
 Visent recessus; buxiferos petent
 Hæ Pictavi colles, amicas.

Gymnasium è
 regione præ-
 torii.

Hospitio studiisque sedes.

Hic certa demum sit statio, & modus

Lassis viarum ! Quondam etiam dedit

Ruina felices, loquoque

Restituit meliore lapsos.

DE CURRU GLORIÆ;

Ad Petrum Labbéum, cum ei Carmen

Heroicum sic inscriptum Eminentiss.

Cardinalis dono misisset, post acce-

ptum ab ipso Elogium.

ODE XLII.

FU LGENTE curru quæ Superos adit,
Urit videndo Gloria : nec pares

Accendit ignes, cum rosarum

Puniceo redimita ferto,

Et rore manans plurima gemmeo,

Aurora puro surgit in æthere,

Primos sub aspectus rubentem

Luce novâ jaculata Mundum,

Regina Eois pulchrior ignibus

Erecta terris corda rapit virum,

Altoque flagrantis amantum

Axe oculos animosque torquet.

Stat densa hiantum turba, cupidine

Fervens eundi, suppliciter manus

Tendunt, & alatis reponi

Haud grave onus properant quadrigis.

Paucos superbo Gloria suscipit

Severa delectu, & pretio unicè

Virtutis, insignique cenfos;

Non opibus, tumidoque luxu.

Qui regna certo numine temperent;

Quo

Qui bellicosus forte laboribus
 Pectus probarint, aut sagacem
 Ingenuas animum per artes;
 Hos secum in auras tollit, & aureis
 Dignos coronat Gloria bracteis:
 Curruque summotam beato
 Degenerem prohibet catervam.
 Atque ut jugales admonuit levi
 Strictos flagello; protinus emicant
 Telluris ignavæ repulsi,
 Et nebulas strepitumque vincunt,
 Quemcunque demens Invidiæ furor
 Brutis per auras fulminibus ciet:
 Umbræque vanescunt inanes,
 Astra supervolitante curru.
 Tentat negatam credula lenibus
 Flabris, & alis Icariis, viam;
 Caditque, vel pendet cadenti
 Assimilis, radiisque versæ
 Districta anhelans Ambitio rotæ.
 Jam cereas vis luminis acrior
 Dissolvit alas: jam procacem
 Destituunt Zephyri volatum.
 At læta Virtus eminet aureo
 Spectanda Curru, munere Gloriæ;
 Cantuque olorino vehementem
 Purpurei celebrant Honores.

Lauri sub umbrâ Pieriæ sedens,
 Pompæ coruscant talis imaginem
 Ut vidit! ut magnis Camœna
 Exiluit stupuitque visis!
 Tunc ille Belgis victor ab hostibus
 Aulæ vocanti se reducem dabat,
 Urbesque captivas triumpho
 Tom. 2.

JULIUS, & populos trahebat.
 Hic dædala audet non imitabilem
 Camæna Currum effingere Gloriæ,
 Festina formosi laboris.
 Nec labor illud erat, sed istæ
 Mentis voluptas, Numinis impetus.
 Et sponte, victrici obsita laureâ,
 Et Martiis cælata factis
 Membra sacri subiere Currûs.
 Ceu lusit olim splendidus artifex,
 Canora saxis fila sequentibus,
 Phœbusve Troiæ, vel Gemellus
 Ogygiæ fabricator arcis.
 Nec ista magno ingloria nomini,
 Dives trophæis, fercula JULIUS
 Sensit; triumphalique pompâ
 Ire dedit simulacra Currûs.
 Dum structa Planco mœnia Principes
 Non usitatis alloquiis beant,
 Et Franca Majestas Sabaudæ
 Hospitio sociatur aulæ;
 Qui tanta rerum pondera sustinet,
 Musis amicas tunc quoque præbuit
 Benignus aures. Tunc superbâ
 E Luparâ veniens, recudi
 Auctore, in usûs commoda, Principe
 Jussus refulsit Currus, & arduas
 Transcendit Alpes: mox sonoro
 Cursu Italas peragravit urbes.
 Neque eruditi nominis immemor,
 Labbée, qui te demum habeat locus,
 Scitatur Heros; ac recepta
 Ingenii monimenta noti
 Gratatus, hæc & præmia rettulit;
 Currus onustos laudibus, ac suæ

Te Gloriæ in partem vocatum,

Stelliferæ apposuit Curuli.

Quæ quisque largâ dona ferit manu;

Et ipse pulchro talia fœnore,

Lætamque collegisse messem

Promeritus, pretium laboris.

Vibrantis ecquid sat pretium styli

Nostro repensat Gloria carmine?

At munus ornavit Datoris

Tanta manus, columenque Sceptri,

Et jam secundo Gallica Numine

Fata administrans. Purpureum allinit,

Quæcunque tractarit, nitorem.

Aureolæ decus inde chartæ.

VICTORI CONDÆO,

POST TRIPLICES HOSTIUM EXERCITUS

GALLIÆ FINIBUS INTERCLUSOS,

Ad Senefum cæsos, ad Aldenardam fugatos,
ex attrito incurfibus ac stativis Belgio

REDUCI PÆAN TRIPLEX.

ODE XLIII.

JAM campis laceras Iber

Subduxit, refugo Teutone, copias:

Jam bis-victa simul phalanx

Decessit Batavum. Sic malè diffilit;

Collectis opibus ferox,

Dudum quæ tumidas increpitans minas

Toto se vaga Belgio

Moles tergemini volverat agminis.

Nunc demum, Armipotens, redis,

Quò, CONDÆE, vocant publica gaudia,

L ij

Et partus meritis honos,

Vastis & requies fera laboribus.

Nunquam clarius æthere

Delabi niveis visa jugalibus,

Curru Gloria fuscipit

Victorem, rutilisnectere laureis

Quercum sedula civicam,

Servata pretium nobile patriæ.

Circum mille, volantibus

Elatæ Zephyris, undique concinunt

Laudes, ac nitidis vagi

Plausus mille sonant undique nubibus.

Rupis nec modò Regiæ

Primævum referunt, jam toties lyrâ

Cantatum & lituo decus,

Tanti primitias non humiles Ducis.

Nortlinguæ aspera nec fremunt,

Friburgive jugis ardua prælia.

Sævis digna periculis

Nec pugnae memorant præmia; quot, trucis

Rheni gurgite subdito,

Urbesque, & solidas, turbinis in modum,

Gentes corripuit plagâ

Victrix Teutonicâ BORBONIDÆ manus.

Non Belgas iterum editam

Stragem per populos, sanguine nobilem

Multò Lentiam, & arcium

Tot versos obices, proruta mœnia;

Contusaque ferociâ

Tum primum docilem Franca pati juga

Dunkercam, maris arbitram,

Regnati spoliis Oceani gravem.

At cunctam supereminet

Palmarum segetem proxima, quæ tibi

Campis addita Belgicis;

Juncto cū triplices fœdere copias
 Arcens limite Gallia,
 PRINCEPS, exitio multiplici domas.
 Seu stas, five moves; statu
 Ac motu pariter vincere nobilis
 Ferro conficis & fame
 Hostes attonitos: pervigil, impiger,
 Usque intentus & imminens,
 Castris castra, aciem Dux acie premis.
 Proh mirum obsidii genus!
 Acres excubiae, pinguis adorea!

SENEFENSIS VICTORIA.

ODE XLIV.

GENTES hastenus hosticas,
 Crebris Victor ovans inclyte praeliis;
 Jam te splendidius novi,
 PRINCEPS, exuperas Martis honoribus.
 Tu Scutum & Gladius tuæ,
 Lux & Vis patriæ, Romulidas simul
 Marcellum & Fabium refers.
 Tu Dux ille ducum, Martis & Arbiter,
 Casum consilio regis,
 Sustentasque morâ providus impetum.
 Et quàm fulmineus manu,
 Tam certo dubias ingenio potens
 Armorum exequeris vices:
 Ceu fata auspicio bellica temperas.
 Muro æquandus aheneo,
 Fines oppositu pectoris obtegens
 Francos impenetrabili,
 Conjurata inhibes obviis agmina;
 Custos strenuus & sagax;
 Ac Vindex, patuit quâ via, tempore

Arrepto superingruis,

Senesque aditu fervidus involas.

Testor conscia Gloriae,

Quæ centena tulit signa, cruoribus

Vixdum sicca, satellitum

Ingens Helvetiûm mole gravi cohors,

Pompæ splendida fercula,

Clangentesque tubas inter, & æreo

Plausu consona tympana,

Templorumque sacris carmina laudibus.

Vatis nec siluit canor,

Festo dum resonant omnia murmure,

Altum vox tenuis decus

Audaci modulans concita gaudio.

Non tu casside tempora,

Non textu rigidus pectora ferreo;

Ceu mollem areolam petas,

Nil mutato habitu, terribilem occupas

Campum, in tegmine serico

Loricata ruens proterere agmina.

Visu cominus hosticam

Collustras aciem, nec præeuntium

Objectu pateris tegi.

Ipsâ in fronte regens omnia, & omnibus

Tollens conspicuum caput,

Francis nota dabas signa cohortibus,

PRINCEPS; nec gladio acrius,

Quàm vibrans oculis; voce, manu, Ducem,

Densas per medius neces,

Flammæque horribiles & chalybis minas,

Procurfu geris igneo,

Unus cuncta movens: quaque pericula

Urgent, latior emicas,

Toto pervolitans plurimus agmine.

Hæc, Vatis subitus calor,

LYRICON LIBER III.

167

Epinicion heroicum, posttridie quàm signa capta Parisiensis Basilicæ illata sunt, editū.

Et pugnae facies omnigenae sonans,
Consortemque periculi
Laudisque addiderat BORBONIDEN Patri,

Idemque ENGUINEI notas;

Quos & flammifero quadrupedes globo
Subtraxit fera Mors tibi,

Tantum afflare tuas ausa furens comas.

Angustos neque tramites,

Pagorum latebras, foeda paludibus

Et silvis tacuit loca,

Fossisque & validis aspera sepibus.

Vicisti, Superis, tamen

Illæsum mediâ in cæde tuentibus.

Vicisti socialia,

Heros, fatiferis castra laboribus.

Confuso exitio jacent

Hispani, Batavi, Teutones. occidit

Assentarus Iberiæ

Turmis imperitans: gens cecidit triplex:

Capti cum spoliis Duces:

Matura Auriacum proripuit fuga.

Magnæ pendula VIRGINIS

Fulgent signa tholis. Venit & inclytæ

Pars pompæ, &, LODOIX, caput;

Bellorum Domino præmia Numini

Augustus LODOIX tulit,

Æternæque sacrat pignora Gloriæ.

ALDENARDA LIBERATA:

ODE XLV.

HUC illæ recidunt minæ

Nexarum triplici fœdere gentium;

Vis intenta Lutetiæ,

Et Francis inhians ambitio plagis!

L iiij

Vix, jactata frequentibus

Tandem consiliis obsidio sedet.

Aldenarda tricornipore

Circumfusa videns agmine mœnia,

Felicem tibi Martiæ,

PRINCEPS, accumulat fortis adorem.

Hostes jam rapidus premis :

Adventu trepidos, & numero impari

Necdum contiguus fugas :

Præcurrente velut, terrificum intonans,

Aurâ fulmen, & efficax,

Ante ictum exanimans, disjicit obvios.

CONDÆUM haud aliter potens

Afflat sollicitos Nomen, & impulit

Justo præcipites metu.

Sic Fama indecori vertit agens fugâ.

Ac ni jam tenebris favens

Nox apto effugium munere præbeat;

Spissusque, altera nox, vapor

Matutina viris arma parantibus

Migrantum invidus hostium

Prospectum eripiat; scilicet aggere

Dum castra è triplici movent,

Plenâ instans trifidum clade ruas gregē.

At fervet laceras Timor

Vastæ reliquias molis, & avios

Dispergat Sociûm greges,

Ausis degeneres, nec sibi consonos.

Irâ mixtus agit Dolor:

Fictæ scena cadit splendida Gloria.

Ventosâ malè credulos

Antehac per populos historiâ triceps

Victam dissimulat phalanx;

Et clade in mediâ ludere gestiens

Festis gratibus ac rogis,

Vulgus magnificâ pavit imagine.
 Tandem prodere vulnera
 Cogit pressa Dolor : cladis & invicem
 Dum culpam exonerant suæ,
 Vanis cœpta levant irrita questibus.
 Sic discordia fœdera
 Inter se tumidis exagitent probris.
 Partis interea frui
 Gaude, Bellipotens, fructibus; & novæ
 Laudis conscia, jam quies
 Exhaustis subeat pulchra laboribus.
 Tecum magnificè asperis
 Defunctum, patrio more, periculis
 Victorem EN GUINEUM canat
 Famæ consocians Musa tubæ lyram.
 Blando compositos sinu
 Aggestis foveat Gloria laureis.
 Jam post horrida prælia,
 Duri Martis opus, magnanimam simul
 Et doctam sobolem trahens
 Partes in geminas principis ingeni,
 Phœbo te vacuum refer.
 Quanquam inter streperas carmina buccinas,
 Heros, sanguineo calens
 Senefensis adhuc pulvere prælii,
 Audisti placidus tamen
 Præconis graciles Aonii modos.
 Obstrictam en iterum fidem
 Præsto; Pieriis debita cantibus
 Voti dona reus fero:
 Nec falsus metuam grandibus argui
 Vates auguriis, quibus
 Lætæ præcinui munera laureæ.

Silva, & Ode
 gemina ad Se-
 reniss. Princ.
 sub expeditio-
 nem Belgicâ.



LYRICON

LIBER IV.

QUARTUS ITIDEM THEANDRICON,
CHRISTI NATALITIA ET PARENTALIA
NONNULLAQUE AFFINIA CONCINENS.

THEANDRO JESU.

ODE I.



CHRISTE, par summo Soboles Parenti,
Luce facundæ generata Mentis;
Orta fecundæ, Genitricæ major,
Virginis alvo!
Tu Deum consors Hominemq; sancto
Colligans vincolo, socias in unum:
Jungis adversas medius perenni
Fœdere partes.
Arbiter fati, veniæ Sequester,

LYRICON LIBER IV. 171

Mortis extinctor, Spoliator Orci,
Aurei seclis Pater, & reclusi
Præses Olympi!
Trunco ab infami, folio receptus,
Explicas regni nova jura Victor:
Judicemque unâ reus & Patronum
Orbis adorat.

INFANTIS BETHLEMII CONTEMPLATIO.

ODE II.

EN, hic Tonans est! proh Superûm fidem!
Hic ille, acuto qui fragiles gelu

Artus inhorrescit sub antro
Bethlemio gemebundus infans!

Adeste, delapsûm ætheriâ domo
Spectate proni Terrigenæ Deum.

Ad antra, Pastores, ad antra:

Agnus adest, oviumque Custos.

Ad antra, Reges; omnipotens adest

Regum Imperator. currite, Cœlites;

Præsepe nec vobis pudori,

Quo stabulans recubat Theander.

Jam verna cunas puniceis Hiems

Pingat rosetis: jam tenebræ jubar

Fundant, vocaturumque gentes

Parturiant supera alta sidus.

O Magne, seclis anterior, Puer,

Æquæve Patri, Matre vetustior,

Cæleste Pignus! ô ruentis

Subsidium columenque mundi!

Nam quæ te ab alto vis folio rapit?

Quis cælo abactum propulit exulem

Ad ima terrarum relegans?

An novus ætherias Tyrannus

Invasit arces, qui spoliis ovet

Tuis opimus? nempe Dicen Amor
 Vicit; triumphatoque iuiqua
 Jura Deo, rigidasque leges
 Dedit superbus: fulmina sustulit,
 Stinxitque inermes fasciis manus:
 Ternique discinxit potentem
 Imperii; trabeamque lucis,
 Sceptrumque & altæ stemmata gloriæ,
 Omnesque sancti verticis infulas
 Detraxit; excussamque summâ
 Stelliferæ patriâ Sionis,
 Sævo sub antro nunc pueriliter
 Vagire cogit. Nudus & omnium
 Egêus, haud ulli suorum
 Agnitus, hospitibusve tectis
 Dignatus, Infans Rex stabulo jacet;
 Regale Amori dum solium vacat,
 Gazisque direptas Olympi
 Spargit opes populis Tyrannus.

PASTORUM ADORATIO.

ODE III.

IT E, quò Numen vocat; ite, felix
 Turba, Pastores! Amor addas alas;
 Dux facem vobis Amor, & serenos
 Præferat ignes.
 Astra nunc rident, mediæque noctis
 Dia lux umbram fugat; & stupenti
 Clarius fulgens remeasse Lunæ
 Creditor Eos.
 Gloriam, Pacemque canunt per auras
 Præpetum densi Geniûm manipuli:
 Lata Pax Terræ venit, alta Cælo
 Gloria plaudit.

Ponite indignos animo timores

(Aureo jussit bonus Ales ore)

Mira , caularum Vigiles , Olympi

Gaudia narro.

Sapè quò pastas agitis bidentes ,

Ad cavam Bethles properate rupem ;

Quò ciet , vobis modò natus Infans ,

Pacifer Agnus.

Ille terrarum scelus expiabit

Sospitans orbem Puer , ille Christus.

Signa quæsitum Dominum notare

Certa docebo.

Ecce præsepi patulo reclinem

Fasciis Virgo brevibusque pannis

Mater involuit : Dominoque coram

Bruta jacenti

Poplitem flectunt , & amicum inhalant

Algidi membris Pueri vaporem.

Tanta vicino latitant sub antro

Gaudia Divûm.

Dona supremi Patris occupate

Prospero visu , patefacta nulli :

Obviæ primi Charitis recentes

Carpite fructus.

Pauperes pauper Superis remistos

Advocat mandræ Deus hospitali :

Et viam signant radiis coruscæ

Ætheris alæ.

Dixit ; & sanctæ penetrale Bethles

Gabriel claro repetit volatu ;

Nota quæ sedes , statioque fidæ

Credita curæ.

Ergo Pastores celerare Bethlen

Invicem portantur ; nova dona cæli ,

Nuncio Divûm celebrata , sanctas

Visere cunas.

Ut specûs primum tetigere limen;
Rusticos vibrat facer horror artus,
Corda perfundit simul alma dolci

Melle Voluptas.

Nec filet vivi pia vis Amoris:
Jam Deo afflati propiore fervent;
Et repentini meditantur antro

Carmina Vates.

Pulchra Davidis Soboles, & illo
Qui pedum sceptris folioque caulas
Junxit, augusto Genitor major

Ecce refulget.

Scilicet miri nova forma partûs,
Passa quo nullos uteri labores
Mater, en, stellam referens decori

Luce pudoris:

Cœlitum & cantus, mediæque lumen
Noctis illapsum tenebris, & ipsa
Spirat oblatis facies Puelli:

Undique Numen.

Fulgidâ linguens Superos Sionē
Squallida immenso petit arva saltu:
Aureas menses, generosa latè

Poma refundet.

Sponte pascentes rubicundus agnos
Vestiet fandyx; rigidaque quercus
Mella sudabunt, & odora rivis

Balsama current.

Lacte manabunt oleoque colles:
Accubans hædo lupo abstinebit:
Et leo & pardus, sociæque ludent

Monte bidentes.

Hæc Amô Natus, venientis ævi
Conscius Vates, aliique sancto

Flamine instincti cecinere quondam

Oracula Patres.

Matris ô risus, Patris ô voluptas;

Parve Pastorum Superumque Princeps,

O salus mundi, Puer, ô corusco

Pulchrior Astro!

Cresce (dixerunt) Deus Agnus; & mox;

Jamdiu sparsas, Bone coge Pastor,

Quas oves læti per opima ducas

Pascua cæli.

Sic ubi alterno modulata cantu

Turma Pastorum; Pueri tenellæ

Supplices dextræ niveisque libant

Oscula plantis.

Cistulam passæ Melibæus uvæ,

Mala Damœtas, pyra Thyrsis offert;

Tityrus lactis, liquidique Mopsus

Cymbia mellis.

Quo Parens frigus roseis acerbum

Arceat membris, foveatque Puppum;

Candidum tonsæ spoliū bidentis

Alphesibæus.

Quæ sacris Vates ego dona cunis

Pauper appendam? mihi si coronæ

Mille; Præsepis caderent ad aram

Mille coronæ.

Quod licet; cunis citharam, loquacem

Carminum matrem, citharam, & clientem

Pectinem affigo. Tibi sacra, JESU,

Accipe plectra.

Inter agrestem mihi cunque turbam;

Fistulas inter gracilescque avenas

Sit locus Vati. Tibi sacra, JESU,

Suscipe corda.

Sensit Augustus, facillique blandum

Græca nomina
etiam apud
Judæos usitata
fuisse constat
ex libris Ma-
chabæorum,
atque ex No-
vo Testamen-
to. Et Virgi-
lius Romanos
Pastores istius-
modi nomini-
bus ornavit.

Ore subrisit Puer ; & micantum
 Orbium noctu pia sanxit infans
 Vota Theander.

PARVUS DOMINUS
 ET AMABILIS.

ODE IV.

ME rerum Dominus Puer ,
 Matris Virgineo dulcè cubans sinu,
 Flammis jam toties sacris
 Devotam repetit , nec moror , hostiam.
 Ut vivas oculis faces
 Accendit ; tenero confita lilia
 Vultu lacteus explicat ;
 Intextasque rosis purpureus genas
 Rifu floret amabili !
 Nec certare labris ausa corallia ,
 Fronti non ebut Indicum ,
 Aut quæ nix Libani cedrifera caput
 Et canos humeros tegit.
 Crinali radio plurimus emicat
 Vertex , cui neque Lucifer ,
 Nec Sol cæsariem conferat auream.
 Heic altaria supplices
 Albis , ô Socii , non sine tæniis ;
 Heic prunas & olentia
 Pleno tura foco ponite , cordaque
 Exurenda super. Deus
 Tales quæris Amor (reddite) victimas.

AD STAUROPHILUM

PARÆNESIS

ODE V.

HEu s, qui bisgeniti funera Numinis
Castâ mente colis, cùm tragici sacrum
Immortale doloris

Sollennes revehunt dies;
Ardens paciferam, Magdalis in modum;
Amplexare Crucem; & criminibus grave
Pronus flecte cruentis

Christi sub pedibus caput.
Venarum scatebris vulnera concitus
Per millena latex, diluvie novâ
Jam felicius Orbem

Mersis sordibus expiat.
Aut, conferta avido quæ rapuit sinu
Bernardus, venerans omnia tristium
Pœnarum monimenta

Plenis collige brachiis.
Myrrha fasciculus, qui sibi Golgothæ
Crudeli nimum lectus ab arcâ,
Messis cara dolorum

Nunquam pectore defluit.
Complexu tenero stringit, & arctius
Cordi appressa foveat, quæ patiens suis
Christus cunque sacra vit

Instrumenta cruoribus.
Auro Peruvix ceu pretiosior,
Cæli dives opum, luctificos amat
Granatillus honores;

Pœnarum segetem explicat.
Ne repat, fragilem quadrifido crucis
Tom. 2.

Nativæ videas stipite furrigi,

Admotumque pedamen

Lentisnectere brachiis.

En, ut purpureis picta rubet notis,

Attollit patulus quam gremio calix,

Flagrorum columella

Flexu cincta virentium.

Plagas sanguineis flos maculis refert:

Clavos assimulans cuspis inhorruit,

Hirsutumque corona

Ambit spinea verticem.

Claræ-vallis honos, inclyte Gallici

Granatille soli; perpetuum virens,

O Bernarde, cruenti

Flos ò mystice Golgothæ!

Christi lethiferis arma doloribus

Sic imbuta geris. Sancta tibi, sed, heu!

Immansueta supellex,

Cordi pondus amabile,

Telorum incubuit silva rigentium:

Castisque ipse cubans uberibus super

Signat cerea Christus

Dulci pectora vulnere.

Sponsæ totum animæ se Deus imprimit;

Fingitque, intus agens, assimilem Deo,

Nec mortale sonantem

Vivâ clarat imagine.

Non sensus veteres, vita manet prior.

Motu jam videas fervere non suo.

Christum spirat, & altæ

Mentis seminibus viget.

Mirum! quo premitur pondere, tollitur:

Exutusque hominem, concipit æthera

Votis, & novus ales

Terris igneus emicat.

O, quicunque piæ numen amas Crucis,
Huic succede oneri. Sarcina, Crux, levis,
Et fert sponte ferentem,

Ac suavi decorat jugo.

Hinc rivis panacea effluit, & Salus.

Vitam hæc morte parit : nectare diluit

Sævi pocula fellis,

Flores sentibus elicit.

Aude ; & regna petens, i, Dominum cruci

Confixus sequere ; & stigmata, corporis

Sætri pignora, amoris

Circumfer memores notas.

Felix, qui rigidi vertice Golgothæ.

Preffit fiderei culmina Thaboris,

Implexasque coronæ

Spinas prætulit aureæ !

THRENODIA,

EX ALLEGORICO JEREMIÆ VATICINIO.

ODE VI.

CIVIBUS florens opibusque nuper
Gentium Regina, laborque Divûm,
Illa terrarum caput, illa cælô

Vix minor uno ;

Heu, quid exhaustis viduata turbis ;

Jam suas inter Solyme ruinas

Sola, servilique jugo & tributo

Obruta sedit !

Merfa nocturno gerit ora fletu ;

Nec graves quisquam lacryinas amicus

Tergit, aut tantos facili remulcet

Carminibus luctus.

Fœdere infracto focii relinquunt ;

Prodidit civis : malè blandiendo

Ex Cap. 1.
Lamentat.

Dira conjurans, odiis Amicus

Sævit iniquis.

O, iter quicumque legis, Viator,
-Siste dum cernas, similisne nostro
Sit dolor rerum, lacrymisque clades
Dignior usquam.

ODE VII.

Ex cap. II.

SICCINE incenso Dominus furore
Inclytam obtexit tenebris Siona?

Siccine excussit supero coruscum

Sidus Olympo?

Hostis in morem, pharetrâ sagittas

Fudit intento violentus arcu;

Machinâ, heu! turres, rapidoque vertit

Ariete muros.

Cui tuum æquabo, Solyme, dolorem?

Major haud moles pelagi tumentis,

Cum sali fluctus scopulis procella

Impingit amaros.

Calce deductis caput ad supremum

Quis manum plagis medicam admovebit?

Nulla contritos olei salubris

Vis foveat artus.

Sibilo insultans manibusque plausis

Ridet, & motat caput hostis atrox.

Hæccine urbs, inquit, decus & voluptas

Publica terræ?

ODE VIII.

Ex cap. III.

NU DA paupertas, olidæque sordes
Conscios torquent oculos pudore:

Tristior mentem refugosque sensus

Terret imago.

Vindicem ex alto scelerum tremendus

Censor intentat, graviterque virgam

Sentio in pœnas vigilare nostras

Verbere iusto.

Plurimæ, heu! circum tenebrosus horror

Obsidet mortis: mihi felle cuncta

Et venenatis madüere succis:

Omnia, pœnæ.

Stridulis linguæ repetita telis

Vulnera hostilis rabies, acerbatur.

Pauperis num quis memori regustat

Aspera corde?

Pulvere insternet sua pronus ora,

Si locus voto; colaphisque mites

Offeret malas, saturandus omni

Denique probro.

ODE IX.

U N D E sic aurum malè decolorat
Plumbeus livor! penetrale templi,

Ex cap. xv.

Heu! sacros mœret lapides, plateis

Undique sparsos.

Filius claræ nitidus Sionis,

Aureo dignus radiare cultu;

Jam luto æquatur, Samiâque testâ &

Vilior algâ.

Purius candens nive Nazaræus,

Gratius fulgens elephante picto,

Pulchrius sapphiro, Erythræque ridens

Divite conchâ;

Squallidus, verso neque notus ore,

Et genus spectri metuendum oberrat.

Sordet, ac totum lacero recessit

Corpore corpus.

Spiritus vitæ dator haud fugacis,

Christus, heu! captus, sceleris pendit

M iij

Non fui pœnas, placidô qui obumbrat
Numine gentes.

ODE X.

Ex cap. v.

RESPICE huc tandem, Deus, & memento
Tot Sionæi monimenta luctûs,
Jam satis longâ fatiate pœnâ
Criminis ultor!
Respice, ô, Christi faciem cruentam,
Nosque per Nati latus & rubentes
Trans pedum rimas manuumque, caro
Sanguine tinctos.
Quem Patrem seclî dederas futuri,
Occidit. Mater viduata luget,
Virgo, jam nudum sine prole nomen
Matris & umbra.
Qualis excisæ species Sionis!
Rupta portarum jacuere claustra:
Flamma turritas populavit arces:
Nunc cinis urbs est.
Barbara infaustam Babylon Sionem
Vertit à fundo: cecidit coronæ
Regiæ lumen, capitisque nostri
Gloria fluxit.
Væ mihi! indignam sceleratus urbem
Perdidi. Sed qui folio moveri
Nescio æternus, Genitor, caducum
Despicias Orbem;
Quamdiu abjectam Solymen relinques
Inmemor nostri, sobolemque duro
Visus exosam repulisse vultu,
Horridus irâ?
Respice, heu! nostrum miserate funus;
Quamque clamori querulo precantum
Objicis dudum, radiis opacam
Discute nubem.

CHRISTI PATIENTIS
CUM GENTE JUDÆA EXPOSTULATIO.
ODE XI.

Popule meus, quid feci tibi &c. Mich. 6.

DILECTA gentes inter, ac populis Sion
Prælata, mea fors! dic age, & factum exprobra
Si quod molestum est: scelere quo peragis reum?
Nam quas omisi muneris partes? quibus
Curis peperci? nempe felici solo,
Omniq; cultu vineam & largo super
Cæli faventis imbre florentem dedi,
Vernantiumque palmitum gemmis gravem.
At tu laboris quos mihi fructus refers,
O nimium amaris degener liquoribus!
Pingues racemos dulcis expectans meri,
Spem pavi inanem; nil nisi immites lego
Tristis labruscas: obruit dentes stupor.
Propago Sodomæ vitis, obscenæ improbum
Genus Gomorrhæ! felleo vino sitim
Meam exacerbans. hos mihi fetus paris!
Sic bene colono grata respondes Deo!

Ego te catastis asserens Memphiticis,
Flagella, plagas vindice incussi manu;
Fractamque docui cedere Egyptum malis.
Tu, vilis instar ausa mancipii Deum
Jactare, vinclis premere, clamore insequi:
Servilibusque, militum ad fastidium,
Lanians flagellis membra; ceu tygres solent,
Viso efferatos sanguine acuiisti impetus.

Tibi ego reclusi maris Erythræi sinum
Pharaone merso, virga quando eadem scidit

Scissumque junxit, hostis in cladem, fretum.

Mihi tu recludis lanceâ immersâ latus!

Tibi ego per auras mobilem accendi Pharon,

Solis refingens igne nocturno jubar;

Flagrantem opacâ nube subtexi diem,

Viamque signans Ductor, & castris locum

Metatus, ac te patrio exceptam sinu

Fovens ferenſque; qualis aërias iter

Docet per oras, & rudes passis amat

Subvehere pennis aquila pullorum metus,

Sinæ coruscum, mille Cælestum globis

Septus, tribunal arduo infedi jugo,

Tabulisque inusta jura marmoreis dedi.

Tu, cum Tyranno fræna Tartareo Pater

Laxavit; Orco socia, furiali manu

Tædas flagrantæ armaque & fustes gerens

(Inter latebras more quo petitur latro)

Venalis animæ proditum indicio capis,

Tempus nocendi noctæ fœdifrago Duce.

Hinc per Cedronis aspra torrentis vada,

Solymam per omnem funibus prætoria

Ad sæva raptas, Golgothæ ad montis juga;

Legemque & unâ scelere Legiferum opprimis!

Per invia ego te spatia squallentis soli

Vastasque arenas, dum quaterdenos trahis

Annos egena frugis & potûs inops,

Almo beatam rore, Divorum cibo

Pavi saporis mirus omnigeni artifex;

Rigidâque laticem rupe nectareum extudi:

Ac te in fluentem melleis rivis humum,

Niveoque passim lacte manantem intuli.

Quid tu? venena torridæ linguæ admoves;

Exsucca potu labra mortifero coquis.

Vestes ad istas cura descendit mea,

Ut ne quid usu longa lustrorum orbita

Detereret. at tu corpori & tunicam & cutem
Nostro revellis ; mox & immanes jocos
Rubræ pudendo chlamydis injectu cies ;
Et Rege atrocem ludicro scenam instruis.

Tibi Chananæos faxeo nimbo tonans,
Validâ tremendus dexterâ , infregi Duces.
Huic tu palustrem dexteræ calamum inseris ,
Insigne regni ! dexteræ exemptum procax
Impingis ori : sente vallatum caput
Placidosque vultus ferreo cæstu quatis.
Sic tu coronæ splendide ac sceptri memor ,
Quo te superbam decore donoque inelytam
Fulgere jussi , Principum collo pedem
Imprimere , denso gentium obsequio coli
Late clientum ! scilicet dignum Deo
Supplex honorem poplite incurvo exhibes :
Sputo , cachinno , verbere insultans æolis !

Tibi ego supinos ponte substravi novo
Scopulos eunti : néve subductas fugâ
Pugnæ reliquias noctis eriperet favor ,
Fixo caducam sole sustinui diem.
Tibi ruinas gentis Enaciæ super
Solum excitavi ; totque Amorrhæum simul
Captiva Regum corpora in furcam indui.
Tu me in cruentam , perfida , egisti crucem.
Ah cœca , & ipsis durior scopulis Sion !
Horret furori consciam lucem tuo
Præbere , & umbris refuga se involvit dies ;
Rumpit gementes publicus cautes dolor.

DE CHRISTO CRUCIFIXO

PERIALGIS ET AGAPETI

CARMEN AMOEBAEUM.

ODE XII.

- Perialges.* **F**LEAMUS. ecquid Caucasus præcordiis
Tigresque cautesque incubant?
- Agapetus.* Amemus. ecquid pectora Hyrcanæ nives
Roburque ferrumque occupant?
- Perial.* Pias (moramur ?) Christus ad lacrymas vocat
Sponsus cruoris prodigus.
- Agap.* Sacras, eamus, Christus in flammis rapit
Flagrans Amoris Victimæ.
- Perial.* Fleamus. en, ut regium horrendæ caput
Fixus coronæ spiculis,
Vasto flagellorum exaratus impetu
Et grandibus sulcis hians,
Ut squallet ore informis, ac mixto genas
Sputoque taboque oblitus!
Fel triste labris, virulentos auribus
Sales jocantùm combibit.
Clavo trabali, sanguine undantes manus
Clavoque trajectus pedes,
Dirisque mentem faucibus doloribus
Cum morte luctatur Deus!
- Agap.* Amemus. en, ut nomen augusto caput
Florat sacrorum stemmate;
Palmisque acutâ cuspide inscriptæ rubent
Amoris æterni notæ!
Ut ore anhela temperat suspiria,
Mistæque singultu preces!
Et jam tonantem, voce mellitâ, Patrem
Supplex remulcet hostibus.

LYRICON LIBER IV.

187

Largo trifulcas sanguine oppressit faces,
Sordefque terrarum abluit.

Tyrannum, amore victor, infernum Deus
Lethumque confixit cruci.

Perial. Nuda ossa, lacera membra tormentis rigent,
Distenta ferali trabe.

Sibi grave ipsi corpus, & acerba asperat
Sublime pendens vulnere.

Letale fittas permeat venas gelu,
Artusque livor luridos.

Fletu, cruore, morte jam jam oculi natant,
Extincta mundi sidera.

Agap. Clementiæ jam tota divinæ patent;
Jam se profundunt viscera.

Ac dum per artus gelidus obrepit rigor
Mortis propinquæ nuncius;

Cælestis ardor corde vivaces agit
Per densa flammæ vulnera:

Lethoque in ipso, qualis extremo cadens
Sol axe, dulciùs micat.

Perial. Scelestus, cheu, lanceâ exanimum latus
Miles tremente perfodit.

Matrisque, eodem bis nocens ictu, piàm
Mentem cruentat carnifex.

Agap. Iô, receptus lateris effossi specu,
Latebra fida panditur:

Animasque Christus hospitas plagæ fovet
Salubris almo nectare.

Perial. Fleamus. aut si temperare lacrymis
Ingrata possunt lumina;

Ah, digna fletu lumina æterno, pice
Fumans Avernus terreat.

Agap. Amemus. aut si nil ahena molliunt
Amoris ignes pectora;

Odiis nefanda capita congestis premens
Væ, terra calumque obruat.

CHRISTI ET ZACHARIÆ DIALOGUS.

*Quid sunt plage iste in medio manuum tuarum ?
His plagatus sum &c. Zach. 13.*

Zacharias. **N**AM quid cruentis in manibus duplex,
Jesu, cicatrix, quidve pedum notæ
Volunt, & abrupti profundo
Vulnere hians lateris caverna ?

Christus. His me cruentant vulneribus mei.
Ne quære, nam quos assiduo fovens
Amore dignabar, furentes
Sic odium retulere amor.

Zachar. Certare amor sic potuit furor ?
Heu monstra rerum ! Sed quis erit tui
Ufus cruoris ? ne caduco,
Ah, pretium pereat liquori !

Christus. Caræ Sioni, quo scelera abluat,
Vulgò patentem sufficiet cruor
Fontem, salutareque thermas.
Hinc maculam mihi Sponsa nescit.

Zachar. Suave ô lavacrum, tincta ubi, sordibus
Corda expiatis purpureus nitor
Illustrat ! Et lævæ figilla
Mortis adhuc, redive, gestas !

Christus. Victorem honestant vulnera, provocant
Clientum amorem, corda movent Patris.
Foramina hæc, nido Columbæ
Fida vacant, latebræque dulces.

Zachar. Vivâ hospitata nil volucres petrâ
Ungues tremiscant vulturis inferi.
At membra confixa intuentes

Qui pavor excipiet rebelles !

Christus. Videte, dicam, quæ mihi vûlnera
Infixtis ; & quæ, carnifices, tamen
Intrare fugistis vocati.

Antra Erebi tenebrosa inite.

Zachar. Digna illa sedes perfidiam manet.
Serò agniti tunc fulmine Judicis
Gens ista, ceu mater necatò

Primigenæ immoritura, planget.

Christus. Agnosce, plagæ quàm scelerum graves,
Queis vulnerandi causa Dei stetit ;
Et, ira dum transit Tonantis,
Condere humo penitus refossâ.

AD SACRA STIGMATA

ZACHARIAS VENERABUNDUS.

ODE XIV.

ÆTERNA amoris pignora, publica
Fontes salutis, purpurei decus
Insigne Victoris, corusca

Sanguineæ monumenta pugnae !

Queis, sacra, laudum vos ego, Vulnera,
Ornem coronis? queis lacrymis rigem

Lugenque gaudensque ; ah, meorum

Hinc scelerum laniata acerbis

Per membra pœnas, hinc veniæ obsides

Plagas retractans, blanda piacula ;

Orco triumphato, beatæ

Signum eadem pretiumque pacis !

Clamorem in altum semper hiantia

Vos ora, læsi flectere Numinis

Iras, & ultrici potestis

Rapra manu superare tela.

Reis asylum non violabile,

Præfens in hostes perfugium, obviam

Nigrisque inaccessam catervis

Ultro animæ referatis arcem.

O plagæ, amaris dulce laboribus

Lenimen! ô lux, & miseris quies!

O venæ inexhaustæ bonorum;

Lethiferis panacea morbis,

Vos gazam egenis, dona perennia!

Nectarque tato funditis ubere;

Pulchrique cælestes amoris

Illecebras, teneræque flammæ

Vivo micantes semine fomites

Præstatis. & queis cernuus osculis

Augusta delibans per artus

Stigmata fidereos adoro!

CHRISTUS REDIVIVUS.

ODE XV.

MOESTRIS peremptum define, define
Urgere Numen, Christiade, modis:

Omitte plangorem, ac sepulcro

Parce supervacuos odores.

Surrexit; atrâ, non, cruce lividus

Qualis pependit; vulneribus lacer,

Informis obducto cruore,

Funereo cohibetur antro.

Florent refixis vepribus aurei

Crines; & altum sidera verticem

Cinxere, fundunturque lati

Purpureos radii per artus.

Orbæ Parentis jam penetralibus,

Auræque & astri motibus ocior

Subit; repentinoque mulcet

• Magdalidem Sociasque visu.

LYRICON LIBER IV.

191

Illum, Emmaūtis qui Solymâ domos
 Petunt relicta, multaque lugubri
 Sermone volventes nefandâ
 Cade super, tumuloque aperto;
 Novère, quâvis orè prius suo
 Cerni negantem; dum comes additus
 Gressumque sermonemque confert,
 Fata movens latebrosâ vatum.
 Sed hospitali, quò Cleophas trahit,
 Mensâ recumbens ut Cererem sacro
 Fregitque porrexitque ritu,
 Pulsæ oculis animisque nubes
 Illum & Simonis lumina, quæ triplex
 Linguae paventis diluerant nefas,
 Hausere; turbatique, cœtu
 Cùm stetit in medio, Sodales.
 Palmarum hiatus, & memores notas
 Clavorum, & altam fas lateris specum
 Rubentis explorare tactu.
 Huc digitos age pertinaces
 Immitte, Thoma; nec pudeat manum
 Inferre, latum ferrea limitem
 Quâ lancea egit. Perge, tenta,
 Nil dubitans; solidoque demum
 Tactu petitam disce volens fidem.
 Sic clausa JESUS limina permeans
 Affatur. hinc notis videndum
 Dat Galilæa jugis & undis.
 Ubi trophæum, Mors? ubi funebres
 Inter cupressos falcis ovans rigor?
 Mors victa Victori perempto
 Immoritur; stimuloque Christus
 Mortis refracto vividus emicat,
 Vindex paternis clarus honoribus;
 Ac, fulgurum in morem, corusci
 Aligeri tumulum frequentant.

R fact. list.

CHRISTI FORMA.

ODE XVI.

AUREUM Sponsi caput Iris ambit;
 Aureas palmas hyacinthus implet:
 Liliis vultûs niveis rosarum
 Purpura certat.
 Fusa, ceu palmæ, coma densa, frondes;
 Splendet ut corvi, coma fusca, pennæ:
 Lenè odoratis sonat æta myrrhæ
 Copia labris.
 Lactæa mites oculi columbæ
 Prænitent; gemmis eborique pectus:
 Et decent plagæ: velut astra, dulci
 Luce rubescunt.
 Cre mortalem superante formam
 Deditos regnat medius per hostes,
 Ac pio nexos placidus triumphat
 Victor amore.

EUCHARISTICUM SACRIFICIUM.

ODE XVII.

O Incruentæ mysticum cædis genus,
 O insolentis Victimæ!
 Verbo Sacerdos Numen Elicium polo
 Haud fabulosum devocat.
 Nec astra linquis, Christe, nec te aris negas,
 Unusque & idem multiplex.
 Bicolore velo tectus, & frugis nivem
 Refers & vuæ purpuram.
 Utrâque specie pulcher, augustum Deus
 Candet rubetque Absconditus,

Sacrificia

LYRICON LIBER IV.

193

Sacrifica corpus lingua recidivum parit

Et morte vivace immolat.

Quin viva & ipse (qui novo JESUM sequi
Gaudes sacramento ducem)

Quin viva & ipse , sanctaque aetherii venis
Sub cultrum Amoris Hostia ?

Votiva jam te sacra Virtutum infulis
Sertisque comptum postulant.

Quotidianæ , semper antiqua & recens ,
Neci superstes Victima

Suam , beatâ morte mactatam , novæ
Vitæ redonat Hostiam.

SACRUM CONVIVIUM.

ODE XVIII.

*Quando federis ut comedas cum Principe, diligenter
attende quæ apposita sunt &c. Proverb. c. 23.*

MIRA fides ! cælesti epulo mensæque supremi
Fas assidere Principis.

Ergo age , quem magnæ blanda in commercia cœnæ
Regum ille Princeps advocat ;

Appositis vigilesque oculos animumque sagacem
Intende mensæ ferculis.

Non hîc mellita , Isacidûm stupor ille , pruina ,
Non rupe diffusus latex.

Credimus ? instar habens frugis , liquidique Falerni,
Deus , Deus mensæ incubat.

Triticeam objectat speciem , ambrosiamque ministrat
Sacri latentem corporis.

Vitigenum laticem obtendit ; sed amabile nectar
Sancti refundit sanguinis.

O tantis dignate epulis Conviva , Theandro
Mentem recepto pinguior ;

Fallaces ne deinde cibos , sparsasque venenis
Tom. 2.

N

Amens placentas esuri.
 Ceu Stygio afflatam serpenti credulus hausit
 Escamque mortemque helluo,
 Ausus divinæ spes pascere sortis Adamus,
 Fatale posteris nefas.
 Quæ Domini crater felicia labra sacravit,
 Cave profana feceris.
 Circaos calices, Lethæis ebria succis
 Fuge, ô, nefanda pocula.
 Quin pariles epulas, quæ fas, retulisse labora
 Christo minister hospiti.
 Nempe tibi Deus esca; Deo cibus ipse vicissim
 Gratos saporis exhibe.
 Fervidus alta subî præcordia: namque repentes
 Rejêctat indignans cibos.
 Corporis ille sui vivos apponet ad artus,
 Infusus almo spiritu.

Apoc. 3.

REGIÆ PIE-
 TATIS MO-
 NUMENTA
 SEDANENSIA

CRVCIS TROPHÆVM

REGIS REGINARUMQUE

Christianiss. magnificentiâ,

In medio Sedani foro celeberrimisque aliis
 locis festo cum apparatu, religiosaque
 pompâ primùm excitatum inter ipsa San-
 ctæ Divinæque Crucis solennia.

ODE. XIX.

SUBLIME pompis Ausoniis decus
 Ibant triumphantum aurea Cæsarum
 Vexilla; gemmatâque pictus
 Luce diem geminabat aër.
 Caput triumphî nunc Labarum, ac feges

LYRICON LIBER IV.

195

Æterna laudis, purpureo micat
 Fulgore; Crux, signis Olympi
 Splendidior, soliisque Regum.
 Gravem Sioni Persida, & impium
 Christo revincens auspice Chosroem,
 Subveſtat Heraclius almam
 Ipſe Crucem famulante collo;
 Auſtus, oſtroque ac diademate
 Nudatus; & quâ Chriſtus iit viâ,
 Dejecta Maieſtas revolvit
 Golgothei juga dura montis.
 At tu execratam ſupplicio Crucem,
 Lux Chriſtianæ maxima gloriæ,
 Morumque princeps, tu ſalubri,
 Gallia, Cæſaribus colendam
 Monſtrô indicavi. Scilicet è tuiſ
 Convexa mundi dum petit arcibus,
 Bellique turbato pericliſ
 Fortè animo ſpeculatur æthram;
 Clarum ſereno prodigium legit
 Deſcriptam Olympo Flaviades Crucem,
 Victoriæ oblato vocantem
 Rite Deum augurio ſecutus.
 Tunc ille, ſignis ante Quiritium
 Regnans, ſupremis ceſſit honoribus
 Tonantiſ Ales fabuloſi:
 Tunc Labarum venerata caſtra.
 Et jam ſubacſto Crux Capitolio
 Inſedit altè: gemmiſeris apex
 Divinus inſurgit coronis;
 Supplicibus celebratur ariſ.
 Huic ſervit omni religioſior
 Luxus metallô; feta opibus ſimul
 Natura, Virtutumque juncſtô;
 Ecce, chorô famulantur Artes.

Crux auguſtiſſi-
 ſima, Ludovi-
 ci donum, in
 foro Sedan.
 primum deſixa
 ipſo Exaltatæ
 ſanctæ Crucis
 feſto die.

Conſtantino
 Magno in
 Gallia bellum
 adornanti ob-
 lara Crucis ſpe-
 cies, augurium
 pignuſque vi-
 ctoriæ.

Jam in fronte
 Regum Crux
 illa fixa eſt,
 cui inimici in-
 ſultaverunt.
 Auſtus.

Quam sumptuosis Regia molibus
Educta in auras munera ! quæ Crucis

Non ante Sedanas per arces
Structa pio simulacra fastu !

Crucem reflexo succidui genu
Ambite , Cives : Donaue Regia ,
Festamque gratantes triumpho
Bisgemino celebrate lucem.

Centena lato jam tonitru fremunt
Tormenta , circum turrigeris sedent
Quæcunque muris , perque vallum
Terrificâ vigilant coronâ.

Jam totum ahenâ Præsidium flagrat
Ornatque pompam lucis imagine :
Et Regis impubes secundis
Auspiciis moderatus annos,
Dux antecedit Burlius ordines ,
Bellique felix , Pacis & Artibus ;
Virtute ; Guiscardorum & altâ
Stirpe Ducum , Calabrisq; sceptris.

Circumsonantes innumero Lyras
Auditis astro ? nec pariles creant
Labente concentus Olympo
In numerum revoluta signa.

*Sicut Moyses
exaltavit er-
pentem &c.
Joan. 3.*

Effusa toto cernitis agmina
Fulgere Cælo ? Legifer anei
Quondam Colubri signa Vates ,
Anguineis inimica turmis,
Depanxit ; ardens quo caderet lues
Late per omnes Isacidûm tribus
Grassata ; communemque visu
Arriperet populus medelam.
Certâ Dracones in Stygios ope ,
Fatalis & vim pestiferam mali ,
Subvênit Orbi Sospitator :

Terrigenas meliore Signo
Salvos recepit; ceu coluber, truci
Vulgo execratus, stipite pensilis.

Et cæcus oblatae Salutis

Spreta Furor monumenta calcat!

Dio Rebelles pandite Lumini,
Ingrata demum pandite pectora:

Cælestis ostenti laceffit

Dulce oculos animosque fulgura.

At illa sævis edita nubibus,

Crux, qualis olim sanguineas aget

Flammas cometes! Signum apertis:

Ducet atrox glomerata castris

Olympiorum examina militum;

Horrenda terras cum quatiet tuba;

Manesque plangentes ciebit

Fulmineo Cruciatu ore.

Quin, pervicaces, & Fidei manus

Et corda amanti victa datis Deo;

Blandamque maturè sub umbram

Ac patulos juvat ire ramos?

IN EADEM AUGUSTA DONA,
REGISQUE CHRISTIANISS.

De universa Religione promerita.

ODE XX.

FIXUM cruenti vertice Golgothæ
Transcripsit aris opprobrium Deus,
Victorque adorandum sacravit
Principibus populisque signum.

Sedani ad arces conspicuum foro,

Formâ superbam (marmore pars nitet,

Pars ære inaurato coruscat.)

*Tunc parebit
signum Filii
hominis &c.
Matt. 24.*

*Sacrum signū
ex adverso
profani templi
erectum, unde
Christi pendet
effigies, ad piū
transfugium
heterodoxos
invitanti simi-
lis.*

Religio statuit Trophæum.

Hic prona, sanctis non sine gaudiis,
Colensque gratansque; O decorum ferax,

Proclamat, Arbos! ô Salutis

Ætherio generosa fetu!

Inominati tunc odium gregis,

Tandem expiatis confita sedibus

Florescis, Errorumque abactâ

Peste novos parvis alma fructus?

Quo tu profanos ardua numine

Hostes superstas! Liliger hunc tibi

Decrevit augustæ triumphum

Insolitum Pietatis Heros.

Terras per omnes sollicitus Crucis

Urget triumphos. Hinc Libycas quatit;

Ferroque & igni miscet oras;

Belligerâ freta classe purgat.

Illinc feroces Osmanidum impetus

Lecto refranans milite, Pannonas

Erexit. Arrabo cruentum

Strage latet tumefactus amnem.

Quo prisca cultu Rex foveat sacra,

Testes Batavi; tuque Britannicis,

Dunkerca, vinculis exsoluta;

Nec vetito maculanda ritu.

Utrumque Solis tangere limitem

Potens, & Orbes jungere sedulus

Commercio ambos, Christianæ

Spargere opes Fidei laborat.

Obtrita fanis Impietas suis;

Lugēt ruinis impositam Crucem;

Geneva quam portis minantem

Horruit attonito Lemano.

Geneva Sedanum altera, jam Crucis

Imbuta signo tergeminae, rudes

Multæ Barba-
rorum naves,
quæ capte, quæ
incensæ aut
depressæ à gal-
lis sub ipsos
Algerianos
portus.

Excitata Crux
in ipso Gene-
va aditu. Re-
gi authorita-
te, crebris in
circumjecta re-
gione dirutis
Hæreticorum
fanis.

LYRICON LIBER IV.

129

Sacrat plateas. LUDOVICUS

Regifico decora alta sumptu,

Non ille magno Flaviade minor,

Extollit; & quæ, Principe cum Nuru,

Augusta cultricem repertæ

ANNA Helenam Crucis æmulatur.

O Ara verè Maxima gentium!

Crux immolati sanguine Numinis

Rubescit, ac mundi probrosas

Purpureo lavit amne fordes.

Telum corusco fulmine fortius,

Confixus Orbem quo Deus edomat,

Lignoque Regnator potenti

Tartareum tremefecit Orcum!

Telum ac Trophæum, Crux, spoliis grave,

Quæ rapta Averno plurima Principi

Gestans, triumphalisque currus

Ipsè sibi, terit astra Victor!

Hoc vince Signo, Maxime Principum;

Deoque partas Signifero & Duci

Referre lauros, atque opima

Gratus amans cumulare dona.

Sic dona donis quippe sequacia

Fas evocari; sic hominem Deo

Certare. Sed pulchris in ausis

Dulce, Deo superante, vinci.

Geminæ Cru-
ces ab Anna
& Maria Ter-
resa Christia-
niss. Reginis
donatæ Seda-
nensibus, pa-
resque Ludo-
vicæo muneri,
sacrâ Inventæ
Cruci luce di-
catæ depactæ-
que sunt.

EUCCHARISTICA POMPA SEDANENSIS,

Videsis Oden
libri I. XXI.

MIRIFICA RERUM CONVERSIONE INSIGNIS
Ex Ludoviceæ Pietatis Curâ & Autoritate.
ODE XXI.

*Sic quidem oportuit victricem Veritatem de Mendacio
& Hæresi triumphum agere. Concil. Trident.*

NON usque lapsu præcipiti ruit
In pejus ætas. ridet amœnius.

Jam nube dimotâ, serenum :

Purpureo revirescit anno

Veris beatus post hiemem nitor :

Bellum flagello Pax fugat aureo ;

Sævamque Majorum refarcit

Posteritas generosa cladem.

*Veritatē Dei
in injustitia
detinent.
Rom. 1.*

Damnata tetro carcere Veritas,

Cæcis & umbris : conciderat Fides ;

Fœdumque Sedani jacebat

Pressa situ Pietas iniquo.

Vescâ latentem sub specie Deum

Ægro pudebat, luce palam (heu nefas !)

Munimen optanti supremum

Ferre, salutiferumque pignus.

At nunc tremendis constat Honos sacris :

Solennis urbem pompa perambulat,

Victrici Alethiæ Triumphus,

Aufonio celebrata ritu.

Notis, vicissim territa, sedibus

Regniſque mœrens excidit Hæresis ;

Cogitque in obscuræ Clientes

Lucifugos latebræ recessum.

*Hæresi domi-
nante, sacrum
Viaticum in
urbe Sedano
ad catholicos,
qui sane pauci
supererant, fur-
tim affer:batur.*

LYRICON LIBER IV.

257

Et ipsa Calvini extima supplicant
Obtenta jussis sana tapetiis.

Templi instar, urbs est. Jam rosarum

Missilium volitante nimbo,

Simul Sabæis aura vaporibus

Odora, & alto carmine personat,

Longoque flammarum renidet

Ordine, stelliferove tractu.

Tubarum acutis æmula cantibus,

Gravi sonoros tympana murmure

Plausus maritant. jamque athena

Ora pios glomerant fragores;

Quam crebra totis undique mœnibus

Urbisque & arcis machina militat,

Hic læta nubes innocenti

Pulvereas rutilare flammâ.

Togâ virorum clarior & sagô,

Majorque Virtutum agglomerat cohors:

Et splendidam ducis catervam,

Burliade, Superisque miscet.

Sic Arca denso, nobile ferculum,

Subvecta Mystrarum agmine, copias

Agebat Hebræas, triumpho

Mille sacro pariens triumphos.

I, perge tanti Principis assecla!

Versæ nitentem frugis imagine,

Sanctisque gaudentem latebris,

Sedulus officio prehensa.

Hoc ipse Regum Maximus, hoc cliens

Christo per urbes obsequium exhibet

Francas ovanti; candidumque

Lustrifico gerit igne sidus.

Facem ipse præfert, ac populo inclytu

Pralucet; arcana interea Dei

Stipator Ales dum sequentum

Corda virum jaculatur igni.

Qualem & recurvo Pontificem genu.

Spectabilem altè Machina sustulit.

Mirante Româ, dum Supremus

Sub niveo gerit orbe Numen.

Edule Pastor ! Solis, adoreâ.


Tecti sub umbrâ, pompam agitat Fides :

Fercloque adorantem beato

Lustrat Amor satiatque plebem.

Justi Alexan-
dri VII. ex-
tracta machi-
na, quâ Deum
absconditum
in solenni sup-
plicatione cir-
cumferret corâ
ipse provolu-
tus in genua,





LYRICON

LIBER V.

QUARTUS IDEM PARTHENICON,
VIRGINIS FESTA MYSTERIA
CONNEXAQUE ALIA CELEBRANS.

MARIA. STELLA.

ODE I.

Respice Stellam, voca Mariam. Bernard.



IDERAT antiquo monstratum car-
mine Sidus

Phœbeo regnare sub ortu;

Viderat, & longè fatalia signa se-
cutus

Bethlæo Magus appulit antro.

Bisgenitum, ô, quisquis cœca inter nubila Regem
Quærere amas, Cæloque potiri;

Abramidæ clarâ surgentem è stirpe Jacobi
 Suspiciens venerare MARIAM.
 Hanc sequere ; hanc oculis inhians, hanc pectore toto,
 Si qua fides, submissus adora.
 Ceu Graios Helice, Tyrios Cynosura gubernat
 Signiferâ spectabilis arce :
 Sic & inocciduo ventosa per alta clientem
 Igne regit stellata MARIA.
 Vel te vasta voret fluctu glomerante Charybdis,
 Cœruleo vel Scylla molosso :
 Illa enare dabit, medioque è vortice raptum.
 In portus subducet Olympi.
 Nobilis ut magnæ docuit Genitricis Alumnus,
 Lactis agens ex ore fluenta.
 Quò vos cunque ferant mundi revolubilis undæ,
 O Socii, spectate MARIAM.
 Ut Sidus radium, sic Natum candida Virgo
 Progenuit sine labe pudoris.
 Stella gravi informes terras solatur in umbrâ ;
 Purpureo Cælum igne recludit :
 Nec minùs erroris tenebras, noctesque malorum
 Sidereo fugat ore MARIA.
 Ergo quæ vos cunque maris discrimina versant,
 Si rapidis freta concita ventis ;
 Si brevia & fyrtes, faxis vada perfida cœcis
 Naufragium, scopulive minantur ;
 Seu struat insanos spumoso è gurgite montes
 Lymphatæ vis atra procellæ ;
 Seu præceps, fugiente solo, per aperta barathri
 Ad manes turbo urgeat imos :
 Nimbofo in pelago, vitæque horrentibus undis,
 O Socii, clamate MARIAM.
 Incertos reget Hæc sæcli per turbida cursus.
 O patriæ fulgentis amantes,
 Virgineum spectate jubar : duce Virginis astro
 Sidereis appellitur oris.

MARIA

SINE LABE CONCEPTA.

ODE II.

Q UALE, convallis decus, inter acres
Lilium spinas niveum videri
Surgit, ac longè colubros severo

Arcet odore:

Qualis optati vapor imbris augur,
Eliæ Nubes, maris è profundo
Extulit sese, nihil inde facis

Duxit amaræ.

Talis annosa sterilique gaudet
Concipi fetus genitricis major,
Ætheris Regem paritura summum

Aurea Virgo.

Sanguinem, sed non & acerba fontis
Fata Naturæ, veteresque diras,
Una quæ culpæ genitalis exors,

Traxit Adamo.

Altera hæc priscæ capitale Matri
Eva commissum reparare solers.

Jam suo Conceptam hominum Redemptor

Signat honore.

Scilicet tantæ genesis Puellæ

Jure divino sibi vindicavit

Gratia, & mentem replet unam ab omni

Parte beatam.

Jam facem accendit Ratio, Fidesque

Lucidæ summa vigil arce Mentis:

Pectus & flammâ tenerum sacra

Ardet Amoris.

Diva præclaris opulenta donis.

Ut rudem castæ Genitricis alvum

Imbuit (canum revirescit ævum

Flore juventæ)

Siderum alati stupuere Cives

Tantulis ingentem animam subisse

Corporis membris ; agitantque festo

Gaudia cantu.

Quæ (Deus !) terris nova lux oborta !

Quæ procellosi maris ista fluctus ,

Et graves Orçi premit , ecce , felix

Stella tenebras !

Surgit ; undoso velut è cubili

Purpurans Eos croceoque nubes

Irrigat fuso , liquidâque rorat

Plurima gemmâ.

Pulchra , ceu puram sine labe frontem

Luna pallentes micat inter umbras ,

Semper & crescens , eademque semper

Lumine plena.

Lecta in augusti speciem decôris ;

Aurei ceu Sol radians coronâ

Ignis incedit , proprioque regnat

Lætus Olympo.

Hostibus demum Stygiis tremenda ;

Sicut instructis acies manipulis ,

Castra cum linquens , in aperta pugnae

Æquora tendit.

Ante quam Terror volat ; & coruscis

It comes Virtus animosa telis ;

Lauriger curru sequitur Triumphus

Altus eburno.

MARIA NASCENS.

ODE III.

Id Hebræis
Anna sonat.

O Nazareïdos Filia * Gratiaë,
 Infans nota Deo, nascere, nascere!
 Tandem, ô ! Votibus imple
 Promissam toties fidem.
 Te desideriiis acta flagrantibus
 Patrum corda cient : te Solymæ sacra,
 Aternum juga poscunt
 Suspirantia collum.
 Jamtum fœdifragi post hominis nefas
 Ultricem generi pollicitus Pater,
 Quæ fatale biformis
 Monstri protereres caput.
 Te Moses bifido monte super Rubum
 Ardentem innocuis suspicit ignibus :
 Virgam flore salutat
 Fructuque Amramides gravem.
 Nam quid plura sequar ? Legis imagines
 Umbris te referunt, inclyta, mysticis;
 Venturamque saluti
 Omnes Abramidis canunt.
 Tot sæclis agedum, lenta, vocantibus
 Responde. quid adhuc vota clientium,
 Erectamque fatigas
 Spem longâ nimium morâ?
 Quid, si forte parens Anna, tenacior?
 Ah, tu ne miseris gentibus invide!
 Neu terræ, ô bona, differ
 Piguus reddere creditum.
 Maturam sedenim læta puerpera
 Jam Prolem facili deposuit sinu:

Susceptamque Pronæa
 Infantem gremio foveat,
 Immulgens nivei nectaris ubera.
 Lactentem Dominam devenerantium
 Virtutum chorus ambit;
 Pennatique satellitum
 Reginam excubiis circumeunt globi,
 Et cunas agitant, proque crepundiis
 Pulsant aurea plectra, &
 Laudes Virgineas canunt.

M A R I A

DEO AD ARAS OBLATA.

ODE IV.

PRINCIPES Abramidæ
 Dum sacra subter igneo bifulci
 Comparant Sinæ jugo;
 Unguenta, byssum, purpuram, lapillos,
 Divitis Sacrarii
 Pios in usus rite dedicarunt.
 Gratiora Numini
 Jam dona colle missa Nazaræo.
 Regiâ fatum Tribu,
 Sanguis nec alti degener Davidis,
 Par senile Conjugum
 Templo triennem consecrat M A R I A M.
 Liberale qui prius
 Censûs ferebant annui tributum,
 Ocyûs Deo suam
 Grati rependunt Virginem Parentes.
 Non ab æde sanctitas
 Ducenda Natæ. reddet ipsa templum

Inquilina

Inquilina sanctius.

En, ut modesto læta, ceu paternam
Ore jam subit domum!

Ut expedito quindecim triennis
Transiluit gradus pede!

Unius exin vita, virginalis
Disciplina fit chori,
Sodaliūque Cælitum voluptas.

Hic oliva pulchrius

Amat feraces explicare ramos.

Psal. 51.

Ædis uberi solo

Plantata, pingues crescet inter aras;

MARIA

A CÆLESTI NUNCIO ADITAE ODE V.

Ros ecce Olympi, nectare dulcior
Gemmâque & auro clarior affluit;
Ac nube, tot votis vocatus,
It nitidâ pretiosus humor.

Hinc & beato munere fertilis,
Haustoque Tellus germinat æthere;
Cultu nec humano subacta

Fert superas panaceam ad auras;
Natura ruptis legibus horruit

Mirata vinci, dum gremio capit
Jam corporatum Virgo Numen,
Ipsa sui Genitrix Parentis.

Orbem ille portans; nunc tener, & levis
Ferri MARIÆ, se in puerum Deus
Collegit, involuitque nube

Sol, posito radiorum amictu.
Jam virginales in thalamos venit

Tom. 2.

Cum Rege Cælum : jam volucrum , genu
Curvæ Ministrorum cohortes

Primigenam coluere summi
Christum Parentis. Qui fidium sonus !

Quæ viva pulchro sidera Cælitum
Igni renident ! gestientis
Quæ facies , sine more , recti !

Nodi tenaces ducere Gratia
Choros videntur ; Pax oleâ comam

Insignis , & lapsi ruinas
Certa Salus reparare mundi.

Hanc vestit ostro sanguineo chlamys :
Intaminatâ candidior nive

Spem cyclas ambit : nec superno
Anchora abest jacienda portu.

Præit modesto casta Fides gradu,
Caliginosis lumina mentibus

Spargens inextinctâ lucernâ ;
Nec dubias speculo nitenti

Mysteriorum reddit imagines.

Sinæ severos pellit Amor metus ,
Legemque succinctam procellis ;

Ferri acie , lapidumque nimbo,
Tum cælo inurens corda bicuspile

Priscum refringit marmor , & intimis
Præcepta describit medullis

Mosaïco potiora ritu.

Condensa , flammis dulce micantibus
Accincta , sacram pervolitant domum ,

Natumque & augustam Parentem

Ora pio meditata cantu.

Impone tandem luctifonis modum ,

Sion , querelis : excute pulverem ,

Depone sordentes amictus ,

Terge oculos lacrymis natantes ;

Dissolve collo vincula libero ;
Testare festis gaudia plausibus.

Consurge , divinoque gratas

Munere ovans modulare laudes.

Quin cuncta pompas , Numinis hospita ,

Molire Tellus. jam superis potes

Certare regnis : nil Olympus

Majus habet meliusque Christo.

Innoxiorum jam Rubus ignium ,

Sancti sub umbrâ Flaminis integer

Flammis & illæsus eoruscet ,

Ac medios viret inter ignes.

Siccum in madenti ; nunc Gedeonicum

Siccâ madescit Vellus in area :

Sonante mox terram rigabit ,

Qui tacitus fuit imber , undâ.

Virgam superbas , fictilium modo ,

Regum coronas frangere nobilem

Jessæa radix , candidumque

Virga tulit speciosa florem.

O digna , rerum quam Dominam cliens

Agnoscat Orbis ; maxima Virginum

Matrumque ! terrarum voluptas ,

Et dubii Cynosura Ponti ,

MARIA , amantum gloria siderum ,

Et cura salve ; Gratia quam suis

Profusa thesauris , & omni

Dote avidus cumulavit Æther !

Beata , cujus vivâ Dei domus

Templumque , venter ! Fœminæ caput

Gentisque , laudisque , ô Puella

Plena Deo , genitrixque Virgo !

At tu tremendo par Soboles Patri ,

Quo tanto amoris concitus impetu

Cæcas puellaris latebras

Sponte subis uteri, Theander?
 Tune ille rerum maximus artifex,
 Mortale corpus, membraque terrea
 Mirande cepisti tuimet
 Ipse opifex, opus ipse, Verbum?
 Angusta vasti cui spatia aetheris,
 Immenſe, ſic nunc virgineo es ſinu
 Incluſus! & Lunæ morantis
 Ferre novem poteris recurſus?
 Adæ profanis miſte nepotibus,
 Inauſpicati progeniem Patris
 Tuo expiaturus cruore,
 Agnus ades, Dominator Orbis,
 Paciſque Princeps? Aligeros, Deus,
 Non tu rebelles, fulmineâ manu
 Quos arce detrufos Olympi
 Sulſureo in Phlegetonte torques;
 Sed Abrahami ſic reparabile
 Genus prehendiſti; & placidâ manu
 Orco catervatim ruentes
 Tartareis revocaſti ab umbris.
 Tanti Miniſter gaudia nuncii
 Delecte geſtas, ſplendida munera,
 Legatus Interpreſque Amoris;
 Et geminos, Gabriel, per axes
 Commercium ingens ſorte aperis novâ:
 Novique tecum fœderis Arbiter
 Descendit, & magnum potenti
 Conſilium explicuit lacerto.
 Ut ille grefſu fulmineo Gigas
 Viam capſſens, emicuit Deus;
 Summoque decurrens Olympo
 Tranſiluit, juga noſtra, colles.
 Stupenda rerum! Te, Geniis minor,
 Ad uſque corpus, *Spirituum Pater*,

Limumque demittis, probrosam
 Mancipio assimilate formam?
 Verum paternæ debita Gloriæ
 Corona frontem, Magne, tibi, Puer,
 Ornavit: æqualem supremo
 Rite Hominem colimus Tonanti.
 Sic Nazaræis in penetralibus
 Cantant ovantes Cælituum chori,
 Cellamque perfundunt odore
 Ambrosio, roseaque luce.

MARIA

ELISABETHAM INVISENS.

Surge, propera Amica mea, Columba mea &c.
 Cant. 2.

*Exurgens autem MARIA abiit in montana cum
 festinatione &c. Luc. I.*

ODE VI.

EN tacitis, uteri dilectus vocibus hospes
 Pectora nostra movet.
 Surge, age, festinosque mihi formosa vocanti
 Effer, Amica, gradus.
 Cantu lusciniæ, aquilæque Columba volatu
 Exuperare potens,
 Candidior cygnis, phœnice & rarior ipso,
 Alma Columba veni.
 Cessit hiems: pluvio deterfis aëre nimbis
 Floribus ecce redux
 Squallentem ver pinxit humum. jam sidera ridet;
 Parturit omnis ager.
 Trudit odorato vitis de palmite gemmas;
 O iij

Poma, nucesque virent.
 Eia mihi Virgo ante alias speciosior omnes;
 Surge, veni, propera.
 Ardua Judæi submittite culmina Montes,
 Difficileſque vias.
 Ecce venit ſummo genitrix delecta Parenti,
 Virgo, eademque parens.
 Quò properas, montes & ſaxa rigentia ſupra,
 Feta Puella Deo?
 Urget Amor procul aërias Chebronis ad arces;
 Spiritus intus agit.
 Infans infantem genitali exoluere vinclo
 Criminis accelerat.
 Nec Divam conſanguineæ certare priorem
 Pœnitet officio.
 Sternite iter violis, cantuque levate laborem,
 Aligeri Comites.
 Chriſtiferæ ſubter pedibus, Terra impigra totas
 Exere veris opes;
 Nardos, atque roſas, niveoque ſimillima lacti
 Lilia congemina.
 Reginam motâ in numerum cervice ſalutant
 Umbriferæ filiæ.
 Atque illam colles, illam fluviiſque, vagæque
 Obſtupuistiſt aves,
 Et nitidis æſtum prætentæ deſuper arcēnt
 Velleribus nebulae:
 Obſtriſtiſque Auſtris, fragrantès aëra ſoli
 Pervolitant Zephyri.
 Aura levi faciem gaudet mulcere flabello,
 Pectere blanda comam.
 Hinc oleæ, cedrique ſuos, hinc baſſama odores
 Ambitioſa movent.
 Quà via fert Dominam, ſubito dulciſſima * montes
 Lacte fluenta rigant.

*Stillabunt
 montes dulce-
 dinem, & col-

LYRICON LIBER V.

215

Stillat mellis ubique latex. mons omnis, Hymettus, *les fluent lat-*
Hyblaque, collis erat. *10.*

Jocl. 3.

Nec verò Matris venerandum, & amabile pondus
Viscera casta gravat.

Omniferà gerulam vi sublevat illa beati
Sarcina cara sinus.

Zacharia, Conjuxque senex occurre *MARIÆ*,
Tuque, Puerque tuus.

Hospita læta, domo complexuque accipe Divam:
Major adest solitâ.

Jam subit, & dulci cognatam voce salutat
Regia Mater Anum.

Audiit, obscuro materni carcere ventris
Conditus, ipse Puer.

Audiit; ac tenera, divino ex ore profectos
Virginis, aure sonos

Excipiens, fœdis nativi criminis infans
Sordibus eluitur;

Ac subito præsens agnoscit lumine Numen:
Jamque Propheta Puer

Virgineam ignaræ Matrem dat noscere Matri,
Bisgenitumque Deum.

Ut salit insolito testatus gaudia motu,
Jam propiore Deo;

Et Christum ex utero, genibus submissus, adorat,
Cordâ replente Deo!

Qui clamore pio Desertum implebit, & Aulam,
Verbo inhiat tacito,

Vocis inops; miscetque animo commercia, magni
Consciùs alloqui.

Præcursor venienti ardet præcurrere Christo,
Viscera ni teneant.

Indice monstrandum quondam, jam monstrat; &, ecce,
Cum salit, Agnus, ait.

Nec minùs icta Deo gratatur Elisa *MARIÆ*,

O iiij

Grandia facta refert.

Felicem longè ante alias mirata puellam ;

Pignora sacra canit.

Inde fidem , Dominique eventu ingentia fata

Non caritura suo ;

Ac tanto indignam sese visentis honore

Altiùs ore sonat.

At laudem Regina , sibi decus unde , refundit

Carmine magnifico.

Exiliere ædes , lætique per aëra Divûm

Accinuere chori.

MARIA EXPIATA.

ODE VII.

MOSSES Hebræas legifer vulgò nurus
Sorde puerperii

Quo more purgari jubet ;

Bethlæa templo nunc subit Puerpera ,

Et sacra dissimulat

Arcana parrûs enthei.

Augustam Ephebi cælites Matrem piis

Officiis Dominam

Ambire densi gestiunt.

Gestare nec gravantur accensas faces

Lumine sidereo

Instralis ad pompæ decus.

Spectaclum ad ingens , Anna longævo simul

Cum Simeone senex ,

Et ipsa vates advolat.

Quæ gaudii vis , cùm Deus fulsit puer !

Sarcina blanda sinu

Fertur parentis candidæ ,

Deoque dignum fit Patri donum Deus.

Ære redemptus , emet

Cruore mortales suo.

Sed quid Salutis, aureus, pretium, Puer,
Et geminæ volucres?

Quæ dona Matris indigæ.

Bene habet, columbas quod Columba duplices
Unica labe carens.

Sponso MARIA detulit.

Quærendus alter nec sacris Agnus fuit,
Cum tener ambrosio

Christus pependit ubere.

Procul bidentum, procul & hircorum greges,
Magnaque cum vitulis

Armenta taurorum procul.

Toto nitescens vellere, ac nostrum gregem
Emaculare potens

Hic Agnus aris poscitur.

Agnum volentem suscipe, ô Simeon, age:
Hostia fulmineum

Demum hæc parentem leniet.

Cui non furorem sanguis extinxit boum,
Ustaque caprigenum

Fumante templo corpora;

Ultoris ira protinus grato cadet

Munere victa, simul

Admoris Agnum altaribus.

Jam stricta tela dexterâ ponit Tonans,

Pronus utraque manu

Profundere æternas opes.

At tu, propinqua morte, jam viso Deo

Concipe, sancte Senex,

Cycnea latus carmina.

Promissa tandem (cantat) illuxit dies;

Plebis Abramigenæ

Exorta cælo Gloria!

Hanc fida crebro dixerant oracula,

Hanc fore, quæ miseris

Affulgeat Lux Gentibus.

Et hoc petenti dulce responsum mihi

Spiritus ante dedit,

Quod mente seruo conditum.

Matura non te mors prius terræ eximet,

Quàm, Simeon, oculis

Christum beatis haurias.

Evenit. empta mille votorum ambitu

Pignora certa Dei

Ulnæ seniles obtinent.

Quem corda Regum, corda quem Vatum arserant

Eminus, hinc foveo

Orbi paratum Vindicem.

Nunc, ô Senectæ cura vivacis, Puer,

Qui mora mortis eras,

Et sola spes vitæ super;

Dimitte servum, placida quò pridem vocat

Pax & amica quies

Paternum in Abrami sinum.

Ibo, ibo nati nuncius felix Dei:

Sollicitis Animæ

Figent modum suspiriis.

Jam prorogata maximum vitæ tui,

Te, mea, Christe, Salus,

Fructum, moræque præmium.

Compone molli cana somno lumina.

Nam quid ego, mea Lux,

Visurus ultra demoror?

Servatus animus hic tibi, amplexus tuos,

Oscula, Puppe, tua

Liquefactus inter effluat.

Hæc ubi puello præsciis cecinit Senex;

Dehinc MARIE. Sed, ohe!

Resiste Vates cautior.

Quid tu ruinam loqueris, & signum, quod, heu,
Plurima tela petant

Virum Deo rebellium?

Quam liquida turbas gaudia, & quantæ jacies
Semina tristitiæ

Malè ominatis vocibus!

Ah, jam satis, superque fatorum, Senex,

Pectora jam gladius

Materna trajecit; file.

MARIA

IN CÆLUM ASSUMPTA.

ODE VIII.

ALTERA jam struitur cælestis pompa triumphī,
Novæque imago fulget alta gloriæ.

Purpureum sibi Christus iter per nubila fecit:

Per astra Virgo Lactea subit Viâ.

Quam neque primævâ Conceptam labe notavit

Adæ luenda posteris superbia;

Nec talo insidians læsit Cocytius Anguis,

Ferarum hic unus omnium vaferrimus;

Squallida nec tenuit nigro Libitina sepulcro,

Brevem, tribusque vix diebus hospitam;

Splendida suscepit gratantis regia mundi,

Heræque plaussit omnis Ala Cælitum.

Parthenici, redivivam hilares ambite Parentem,

Et omne mortis explicare vinculum.

Kostka velut, Matris festos comitatus honores,

Antoris Ales evolavit igneus;

Mystica sic pullos, avium Regina magistris

Rudes ad alta provocat volatibus.

Auditis volucrum teneras denso agmine voces,

Lyrisque mista nabliisque carmina?
 Cernitis, ut croceis arrident omnia campis?
 Sacro dat una ture virga lacrymas.
 Balsama inexpletum sudant: nec, sponte feracem,
 Humum labore sudor alter imbuat.
 Nusquam spina rigit: lætos viridaria colles,
 Deique vestit arte consitum nemus.
 Stellatæ ramos dat, prospera signa, Columbæ
 Oliva ferre naufragante seculo.
 Frontibus emeritis, Virtuti nota, coronam
 Honore Palma sublegente porrigit.
 Nobilis intonso confurgit vertice Cedrus,
 Suamque Vita non relinquit arborem.
 Mensibus æquantur duodeni ex ordine fœtus:
 Nitente pendet alma fronde Sanitas.
 Ambrosiæ fluitant segetes stellantibus arvis:
 Ubique manna, & unda fusa nectaris.
 Non hæc Hesperidum regio, vel Adonidis hortus,
 Superbum inane, bracteata faustitas.
 Fallacis non hæc Arabis Circeia Tempe,
 Profanæ amica sordibus Licentiæ.
 Non, breve terrarum decus, Eden, Orbis ocellus,
 Ubi venena sparsit atra vipera.
 Omnigenæ procùl hinc noxæ contagia: crimen
 Fores nec audet inquinare gemmeas.
 Stat liquidum sine nube jubar: nec Cynthia Phœbum,
 Diemque versa noctis urget orbita.
 Usque suo incendit Genitor fulgore coruscantem
 Siona, & Agnus ille Sole clarior;
 Dux nivei Sponsusque gregis, fataliaque Agnus
 Sigilla solus efficax resolvere.
 Hic vivos latices, hic mellea prata recludit,
 Rosisque picta liliisque pascua.
 Numinis augusto è folio crystallinus amnis
 Salit, perenne limpidumque gaudium.

Haud ignava Quies, æternaque flore Juventa,
 Salusque Paxque gestit, ac Beatitas.
 Gratia jam victrix, atque incorrupta Voluptas,
 Choroque plaudit accinente Gloria.
 Tanta dicat Christus formosæ regna Parenti,
 Ut excitata funebri emicat toro.
 Dulcia odoratæ spargit vestigia lucis,
 Viamque mollit arduam sequacibus.
 Mirantes animas & corda flagrantia, Virgo;
 Trahens, amore blanda nocte vincula.
 Curramus, Socii! gratum juvat, ecce, laborem;
 Favente mulcet allevatque dexterâ.
 Aurea nos Solyme, puroque simillima vitro
 Manet platea, iaspidisque mœnia.
 Quos rapit illecebris, Nati felicia dona
 Pius MARIA dividit Clientibus.

VIRGA JESSÆA;
 DIVINÆ BENIGNITATIS POTENTIÆQUE
 MIRIFICUM INSTRUMENTUM.
 ODE IX.

Isai x r. qui
 locus illustra-
 tur Heroic. l.
 6. Poem. 2.

VIRGAM te merito nomine dixerim,
 Virgo, non fragilem; sed, capita aspera
 Regesque & populos, fictilis in modum
 Testæ si libeat frangere, ferream:
 Sin vitam miseris & veniam dare;
 (Gratum hoc & solitum, ni prohibent tuis
 Uti fœda virûm crimina moribus)
 Virgam Paciferi Numinis auream.
 Sceptrum læta Sion extulit inclytum;
 Ac telum pariter, Davidicus Nepos
 Quo victor trepidos percutiat Duces,
 Edom, sive tuos, sive tuos, Moab,

Psalm. 2.

Esai. 4. &c.

Psalm. 109.

Num. 24.

Et latè mediis regnet in hostibus.

Exod. 7. &c.

Mosis Mirificâ, Virga celebrior,
 Quamvis & fluvios sanguine tinxerit,
 Et quassum tonitru ruperit æthera
 Misto fulminibus verbere grandinis.
 Quamvis & solidam per patulos viam
 Fluctus, & pelagi marmora pensilis,
 Constrarit, saturo lacte fluentia
 Felicis Solymæ rura petentibus.
 At plagis Erebum tu gravioribus
 Affixti, tumidæ quàm sola Memphæos
 Vindex Isacii perculit agminis.
 Oræ purpureo Golgothæ freto
 Mersisti Pharaona, & Stygiam manum:
 Cæli pandere iter Virga sequacibus
 Et præbere potens dulcia flumina,
 Mellitos latices, qui sitientia
 Undis proluerent corda perennibus.

Num. 17.

Tu Fraternalis, eadem, Virga, Sacrario
 Æternum monimentum addita, quæ malis
 Vexatam invidiæ flatibus insulam
 Aroni propero germinè vindicas.

Fragrat Virga minùs Thurea: viliùs
 Frondescit veteris bractea fabulæ.
 Nec jam credulitas Græcula, præpetis
 Virgam Mercurii jactet, idoneam
 Pallentes animas elicere, aut nigris
 Compulsas gregibus mittere Tænaro.

Quid, quæ vel Geticos inter acinaces
 Tutus, belligeras composuit minas
 Orator, placidi nuncia fœderis?
 Mortales valeat scilicet impetus
 Compressisse. Dei tu rapido potes
 Exarmare gravem fulminè dexteram.

Jerem. 1.

Tu stellata oculo Virga, tuos vigil

Cultores valido præsidio tegis;
 Avertisque graves, prospiciens, metus:
 Ac sub sole pius dum bene sedulos
 Exercet solitis officiis labor;
 Umbrâ tu recreas lenis amabili,
 Formosum teneris confita frondibus,
 Fructu nec vacuas ire sinis manus.
 Te Jessæa tulit stirps, nemorum decus,
 Virgam flore sacram; cui, placidè fovens,
 Ac formâ niveæ splendor alitis
 Septemplex Domini Spiritus incubat.

PARTUS VIRGINALIS.

ODE X.

PARTUS beati conscia Nox adest,
 Piusque circum-deliciis-fluit,
 Nox in diurnam versâ lucem,
 Pervigili prece transigenda.
 Hæc illa Nox est, quæ Phlegetontiis
 Finem tenebris attulit, & suum
 Caliginoso Lumen orbi
 Fudit, inocciduumque Solem.
 At, ecce, Mater virgineo algidum
 Complexa Numen Diva foveit sinu;
 Gemmasque rorantes ocellis
 Aligeri excipiunt Ministri.
 Hinc bos, & illinc membra reciproco
 Tenella asellus mulcet anhelitu:
 Uterque nudas vagientis
 Ante Dei jacuere cunas.
 Durum, magistro Numine, poplitem
 Curvare discunt. Sic Domini, pecus
 Præsepe cognoscunt, Hebrææ in
 Dedecus opprobriumque gentis.

VIRGINI AD CRUCEM STANTI.

ODE XI.

CUM tu sanguine sordidam ,
 O Virgo , faciem , sordida conspicias
 Nati pectora ; tunc dolor ,
 Qualis difficilem parturientium
 Exercere uterum solet ,
 Cor vexat tenerum : fatidici Senis ,
 Ah , septemgeminus tibi
 Vix hærentem animam trans-gladius-fodit.
 Proh , quantam ante oculos scatens
 Matri vim lacrymarum elicit cruor !
 Christi seu flagra lividos
 Sulcarunt humeros , nudaque viscera ;
 Sive infræna procacium
 Tortorum rabies vulnifico caput
 Spinarum diademate
 Lussit , coccineo non sine pallio.
 Clavis fixa trabalibus
 Spectas membra gemens ; hîc , famulo pedes
 Sensit quos Genesâr lacu ;
 Hîc noxæ medicas omnigenæ manus.
 Quid , cùm tristia pocula
 Labris , antè sacro melle fluentibus ,
 Nunc ardente retorridis
 Admovêre siti , barbara toxica ?
 Quid , divino ubi lanceam
 Immanis lateri transadigit furor ;
 Comuni ruit alveo
 Fluctu mistus aquæ purpureo latex ?
 Crudelisne Dolor magis ;
 An , qui ferri aciem , Mortis & asperas
 Vires æquiparans Amor

Urget

Urget Christiparam? Tortor agit duplex
 Juncto savior impetu,
 Certatim excrucians. inde calentibus
 Rivis ora natantia
 Testantur taciti vulnera pectoris.
 Heu flendi tygribus quoque, &
 Vasto cum gemitu dissilientibus
 Rupis Golgotheæ jugis;
 Unâ eademque necem qui geminant Cruce;
 Indivisaque funera
 Pendent, mente Parens, corpore Filius!

MARIÆ SYMPATHIA.

Stabat Mater &c.

ODE XII.

GOLGOTHEO stabat lacrymosa in vertice Mater;
 Nati, cruento penduli
 Stipite, fida comes,
 Suspirantem animam, plagâ nec simplice, mucro
 Perfodit, ah, quondam sacri
 Proditus ore Senis.
 Proh, quanto Genitrix convellitur anxia motu;
 Nunc orba, quo felix priùs
 Claruit, Unigenâ!
 Dat tacitos mœrens gemitus: Christique tremenda
 Tormenta, dum sensu excipit,
 Saucia mente refert.
 Et quisquam tanto laniatam corda dolore
 Spectans MARIAM, temperet
 Ferreus à lacrymis?
 Quem pia non luctûs vocet in consortia, caræ
 Confixa Proli mutuo
 Alma dolore Parens!

Illa suæ immanes gentis pro crimine pœnas

JESUM, flagellis aspera

Verbera mille, pati;

Illa Patri desertum, & anhelâ voce querentem;

Mox dulce vidit horridâ

Morte rigere caput.

Flebilis ô Mater, fons ô cœlestis amoris;

Asperge partem, fons, mihi

Suavis amaritiæ.

Hinc, precor, æternum Christi morientis amorem

Accensa gratis ignibus

Viscera concipiant.

Hoc age, Sancta Parens, & passi vulnera Nati

Infige cordis intimo

Haud medicanda sinu.

Ferre graves pro me dignati corpore plagas;

Acerba mecum Filii

Divide supplicia.

Fac veros tecum lacrymarum effundar in imbres;

Dum vita Cruciato fluet

Immoritura Deo.

Stare Crucem juxta tecum, Fortissima Mater;

Planctusque fido pectore

Confociare velim.

Ne mihi jam inclemens, nivæ Regina catervæ,

Ne sordidum à luctu reum,

Diva, repelle tuo.

Da Christi mortemque feram, semperque salubres

Plagas retractem conscio

Pectore rite memor.

Stigmata me fac sacra notent, & felle cruento

Inebrient piam sitim

Spumea præla Crucis.

Virgo Parens, Christi vivo inflammatus amore,

Umbone defendam tuo

Fulmina iudicii.

Sit mihi Crux vallum, & trepidæ custodia fortis;
Christique viventem nece

Gratia blanda tegat.

Quando animam effeto discludet corpore fatum;
Stellantis altas regiæ

Pande, MARIA, fores.

DEIPARÆ

FILII RESURRECTIONEM

GRATULANTIUM ANGELORUM CARMEN,

Inter publicam D. Gregorii supplica-
tionem exauditum.

Regina Cæli latere &c.

ODE XIII.

QUÆ Cæli dominâ sceptrâ geris manu,
Princeps lætitiæ, Nazari, publica,
Felix virgineo splendida pectore
Iô, concipe gaudia.

Nam quem tu, volucres non tolerabili
Majestate Thronos deprimere arduum,
Gestasti meritis, & tibi non gravem,
Iô! visceribus Deum:

Hic lethi domitis viribus extulit
Se victor tumulo; postque moram brevem
(Dictis certa fides) se tibi reddidit,

Iô, funere pulchrior.

Per, quæ morte redux gaudia pertulit
Tristes post lacrymas; nunc, age, Filium
Exorans, miseris Diva Quiritibus

Iô, lætitiâ refer,

Sic postquàm aërio succinuit choro
 Supplex, & lacero pestiferum gregi
 Propulsare vigil Gregorius malum.

Iô, dira fugit lues.

MARIÆ PRÆSIDIUM;

ECCLESIASTICIS TABULIS VARIISQUE TEMPLIS

Dominae à Victoria inscriptæ.

ODE XIV.

QUISQUIS Christiparæ semel
 Felix rite dato nomine militat;
 Illum nulla periculi
 Exterret facies; non tacitis capit
 Grassans insidiis dolus,
 Non vis armifoni concutit impetus.
 Fido stat MARIÆ sacer
 Miles præsidio, nec violabilis.
 Palmas sponte videt suâ, &
 Silvam sub pedibus crescere lauream.
 Victricis Dominae memor
 Notum Christiadis auxilium cano.
 Scit Naupactus, ubi gravi
 Depressa exitio barbara Thracia;
 Defecitque prius feris
 Fluctus Ionios cornibus arjetans;
 Tunc pallens gelido metu
 Turcarumque rubens Luna cruoribus.
 Neu gentes loquar exteras;
 Quam non auspicio Virginis arduæ,
 Cui florent sacra Lilia,
 Palmarum segetem Gallia messuit;
 Hinc & signa Lutetiæ
 Ædem Virgineam bellica vestiunt;

Augustus MARIAE cliens

Fractis quæ Lodoix abstulit hostibus;

Victricique perennia

Consurgunt monumenta; & nova publici

Cultûs, templa, seges nitent

Passim regificis edita molibus.

O quæ, Diva, tonantibus

Nimbis castra movens, ignea siderum

Progressu rapis agmina,

Centum accincta potens Aligerûm globis;

Cunctisque una cohortibus

Præstas, fulmineâ terribilis manu!

Instar Numinis emicans,

Natique arma ciens, prælia temperas;

Mortalemque superbiam,

Atque Orci furias conteris, & nigris

Vires fraudibus obsitas;

Iustis blanda faves, Diva, laboribus.

Te flagrantibus ambiunt

Votis magnanimi cum populis Duces;

Defunctique periculis

Acceptæ referunt præmia laurea.

O, palmaria robora,

Heroumque animos, vel pueris tuâ

Adspirans Genitrix ope;

Thracum barbaricam perge ferociam,

Quæ nunc plurima Sarmatis

Incumbit, facili frangere dexterâ.

Pacem Christicolis refer;

Aut consueta piis dona clientibus

Lætas congere laureas:

Præsertim domitâ quas Styge nobiles;

Et marcescere nescias,

Pugnis ferre juvat, te duce, mysticis.

Hæc fortes animæ tibi,

Virgo, rite sacrant munera Præsidi,
 Nullo squallida sanguine,
 Puræ sed radiis inclyta Gloriæ.

DE ICONIBUS PARTHENICIS; AD FERDINANDUM

EPISC. PRINC. PADERBORN.

COADJUT. MONASTER.

ODE XV.

PINGENDUM Apelli se Macedo licet
 Permisit uni; non, malè tinnulos
 Idem Poëtas delicato

Reppulit ingenio superbus.
 Fædo linentem splendida carmine
 Facta, invidendo munere Chærilum
 Regalibusque auxit philippis,
 Ridiculi pretiosus emptor.

MARIA nullos respuit inscii
 Tironis orsus, conscia gloriæ,
 Secura majestatis, omni
 Sub specie veneranda Virgo.

Musæ clientis num pretium abnuet
Quamvis inepto dicere carmini?
 Nec tu rudem fastidiosus

Auribus accipies Camœnam.
 Piè superbum Parthenii decus
 Disce, ô piorum Magne Sodalium,
 Scenamque per sacram colenda
 Indigerum simulacra cerne.

At quanta, præsens Numen, adest loco
 Regina Mater! sive Clientibus
 Nectit coronas; sive stratos

Fulminibus sibi maectat hostes !

Jam virginali rorat ab ubere ,

Et lacte pingi nobilius sacro

Tabella gestit : jam corusca

Ætheriâ pluit aura flammâ.

Hinc candidarum præmia frontium

Ligustra florent : hinc roseo flagrans

Pudoris igni purpurascit.

Perpetui seges alta veris.

Illinc tiaræ Pontificum micant ;

Aulæ supellex , sceptraque Regia ,

Gemmisque stellantes coronæ , &

Cæsarei jubar ardet ostri.

Quod si Timantheo haud suus hinc nitor

Constat labori , sæpia diluit

Vivos colores , atque pinguem

Parthenii malè duxit umbram.

Non curiosis tu tamen orbibus ,

Aut otioso pectore , Partheni

Laudata percurres Sacella ,

Virginei documenta cultûs ,

Princeps , inani pastus Imagine :

Qui jam MARIÆ non violabili

Pridem sacramento obligatum

Rite cluens animum approbasti.

Nec tu loquentes spreveris Iconas :

Et ipse claro nempe Sodalium

Spectandus in cœtu , MARIAM

Viva refers animis imago.

Vanâ tabellas arte Philostratus

Effingat. at te Diva coloribus

Suisque Virtutumque pinxit ,

Splendidum opus , Mariâque dignû.

TRIDUANA CHRISTOPHANIA
IN SOCIETATIS JESU TEMPLIS

Inter ipsos Bacchanalium dies solenni Supplicatione, Synaxique Parthenicorum Sodalium celebrata.

ODE XVI.

VINOSA Bacchi sacra, famosi dies,
Noctesque amicæ criminum!
Mollem rotantes ebrîa thýrsûm manu,
Latus tegente nebride,
Dent colla ventis, & comante misceant
Crinem volantern pampino;
Venasque Iaccho turgidæ Evantes suo
Incesta jactent orgia.
Non hæc Sodales festa Marianos trahunt
Bacchea, seu Cōtyttia.
Procul nefastæ pompa nequitiae, procul
Vesana comessatio,
Atque omne turpis Cypridos choragium,
Et quidquid Ethnicum sapit.
Eat Lupercus, Romulam infano procax
Cursu per urbem gestiat.
Eant Latini, posthumum Troiæ genus,
Hausto coloni Libero.
Risu soluto gaudii autorem improbi
Malè-feriantes invocent:
Incompta ludant carmina, & vultum cavis
Corticibus horrendum induant.
Augusta Christi sacra divino pias
Ritu cæteras advocant.
Plenis apertum conflue ad templum viis,

JESU vocante, civitas.

Cælestis illic mensa, cælestes dapes,
Et mentium cupedia.

Altare, mensa est; Numen, appostus cibus,
Cibus, famelique Cælitum.

Non, Pharia quales aula subiecit Deos,
Aves, ferasque Cæsari;

Cum sumptuosos explicaret inclyto
Cleopatra luxus hospiti.

Hic Altor ille rerum, adoratus polo
Terraque Panis mysticus,

Deus ecce prostat, & suo clientium
Mentes saginat corpore.

Sancta paratam conflue ad mensam fame,
Christo jubente, civitas.

Accumbere epulis hic licet Divum; hic pie
Esse helluonibus licet.

O delicatum ferculum! ô vivæ dapes!
O Numinis convivium!

Conviva, & esca est Christus: at tecto venit
Sese ministrans ferculo;

Fucumque solers facere, mirantes sacris
Sensus inescat fraudibus.

Divinus en quo Pastor intuentium
Exercet ostento fidem!

Frugisque servat, fruge subtracta, notas;
Vinoque dilapso Deus

Vini caduca sustinet vestigia
Mirisque & arcanis modis.

Solaris auri regio disco sedet
Latensque, & apparens cibus.

Mundique ab ortu cæsus, & mundum abluens
Piaculari sanguine,

Agnus tenella membra sacrificis jubet
Incocta flammis exedi.

Pratis olympi Vitulus ambrosiis satur
 Dulcem faginam suggerit,
 Utcunque lato Prodigum Natum Pater
 Gratabitur convivio.
 Adstat Sacerdos, & volentem Victimam,
 Summoque labentem æthere,
 Simul efficaci vocis elicitur sono,
 Nec astra linquentem immolat.
 Idem ore Christum conficit puerpero,
 Verbisque conceptis necat:
 Et non-cruento sanguinem innocua manu
 Ori refundens suscipit;
 Qui nectare omni suavior meri latex
 Scypho redundat gemmeo.
 Dulci apparatu ritè felices calent
 Mensæ, Dei Repotia.
 Adeste, adeste, quotquot ætheriæ dapis
 Fames, sitisque vellicat.
 Huc Nuptialem convola ad Cœnam excita,
 Agno vocante, civitas.
 Aulæ sacri parietes triclinii,
 Picti tapetes, vestiunt:
 Auro supellex ridet, & sparsis micat
 Fusæ lapillis Indiæ.
 Laqueari ab alto pensile argenti decus.
 Vivâ refulget lampade:
 Hymettiaque cereus gentis labor
 Præluceat ignes candidos.
 Turis Sabæus fragrat incensi vapor,
 Fumo sequaci nubilus.
 Clauso tepentes igne, pretiosi halitu
 Fallunt odorato foci.
 Templum Sodales duplici versu petunt,
 Matrem canentes Virginem:
 Canamque purâ præferunt dextrâ facem;

Cor ora produnt flammeum.

MARIA Cœnæ Mater, & Convivii

Regina mensis admovet.

O qui piarum cunque deliciarum amans,

Profana Bacchanalia,

Mensas Baalis refugis; ac melle illitum.

Primora fallaci labra,

Sedenim venenis intus obscœnis scatens

Babylonis horres poculum:

Accurre, Sophiæ mensa quo pinguis vocat,

Vesco beandus Numine.

Siticulosas ibit in fauces piæ

Torrens voluptatis Deus.

O liquida cœli gaudia! ô Mannæ sapor,

Sed improbis absconditi!

Non ulla superis dapibus impletum semel

Laceffet esuritio.

Nec verò amaram, quisquis hanc mensam attigit

Conviva, gustabit necem.

Securus adsit, sæpè purpurei maris

Pudor sub æstu naufragus.

Pulchrâ Theandri vite diffusus liquor,

Vitale germen Virginum.

Madere tali nec probrum vino: placet

Sic temulenta mens Deo.

Non, madidus, evœ clamat, Evantem invocans

Inter furentes Mænadas:

Pleno ille Christi pectore exultat choros

Inter faventes Cœlitum.

Hæc Christianis lautia, hi læti dies

Piis quadrant Sodalibus.

PANAGIA

ODE XVII.

PRO TUTELARIUM CÆLITUM
APUD SODALES MENSTRUUA SORTITIONE.

AUSPICES mensis redeunt Calendæ:
 Jam sacræ ritu celebri Patronos
 Divident sortes, & amica lectæ
 Fata Cohorti.

Cœca non istic agitur urna:
 Temperat sortes Dominus, novoque
 More ducuntur superis dicata
 Nomina fastis.

Quanta Divorum series, clientis
 Quò vocant Cœtûs pia vota, Cælo
 Tendit, immensas repetens sequaci
 Agmine laudes!

Regius sanctæ Fidicen camcænæ;
 Sive Jordanis virides ad oras,
 Voce torrentem liquidâ moratus
 Fluminis undam;

Sive natalis per opima Bethles;
 Muta quem stipans pecudum corona
 Carminis longo satiatur haustu,
 Immemor herbæ:

Seu Sionæi super alta montis;
 Numen, ac magni famulos Tonantis
 Calites, mistâ digitorum & oris
 Arte sonabat.

O mihi, allabens tenui vel aurâ,
 Spiritus dulci faveat susurrô,
 Sacra qui pleno rapidus ciebat
 Nablia flatu!

AUGUSTISSIMA TRINITAS

IN MARIAM BENEFICENTISSIMA.

ODE XVIII.

SUMME Rex Divûm, tibi corde vota
Consoni & plectro canimus clientes,
Quem poli sanctæ celebrant perenni

Laude catervæ.

O capax Natura, Triformis, omnes
Una transcendens numeros! bonorum
Fons inexhausto tua regna cursu

Prodigus imples:

Luce Titanem vigileſque furvæ
Noctis accendens oculos; & auro
Montium venas, pelagique ditans

Viscera gemmis:

Mille pennatam sobolem colorum
Pingere ornatu bonus; & vagantes
Per soli deserta feras, & altis

Pascere filvis.

Imbre fecundo riguas in arva
Dividis nubes: pecudum virûmque,
Gramina & lætas segetes in amplos

Elicis usus.

Prima sed dulces animas tueri
Cura; Virtutumque satû feraces,
Et sacris auctas opibus beandi

Providus ardor.

Una divino tamen inter omnes
Floruit cultu; superæque gazæ
Copiâ felix, Domini supremo

Gaudet amore.

Non tot ardentem radiis Olympus

Extulit, nubis sine fraude, Solem;
Tanta nec, puræ vaga signa noctis,
Astra coruscant:

Quot, Pater, claras tua larga dotes
Dextra congeffit MARIÆ, pudici
Corporis solers placitæque formam
Fingere mentis.

Nulla donorum pretio metalla
Talum certent. Ophiræa gleba,
Candidæ, rubri maris illa sordent
Sidera, baccæ.

Lectæ Naturæ Charitumque dona,
Gloriæ immenso cumulata acervo.
Nec parem Augustæ similemve Matri
Suspicit Orbis.

Sola nil traxit maculæ, omniumque
Una collegit superatque dotes
Cælitum, Virgo, nivæque nomen
Sponsa Columbæ.

Unicè affulget, Caput ô bonorum,
Unicè regnat tuus hîc benignas
Exerens vires Amor, & stupendæ
Munera fortis.

Tu gravem terræ potioris orbem,
Templa procudas potiora cæli,
Si ferat nullâ cohibenda rerum
Mole voluntas.

At tuam (quod fas cecinisse) Diva
Vim Dei exhausit Genitrix: volensque
Repperit, nato MARIÆ, Potestas,
Numine metam.

VERBUM INCARNATUM,

DEI MARIAEQUE FILIUS.

ODE XIX.

Q UAM sacro JESUS peperit cruore,
 Publicæ custos vigilat salutis;
 Matris at dulces propiore curâ
 Servat alumnos.

Tartaro illisi Reparator Orbis,
 Pacis ô princeps, domitorque lethi,
 Ultor ac noxæ Deus expiator,
 Pastor & Agnus!

Sponte dejectus, famulique formâ
 Gessit humanos habitus, sacrato
 Rite componens sociansque nexu
 Æthera limo.

Sordido innatus stabulo per umbram
 Phosphorus mundi Superûmque Rector
 Ah, tulit crudo tenerum notari
 Stigmate corpus.

Sed tamen viles radiare cunas
 Jussit, Eoos agitante Reges
 Proditus stellâ: Stygiæque cessit
 Noctis imago.

Mox ubi oblatas Solymas ad aras,
 Impii movit rabiem Tyranni;
 Barbarâ Ægypti fugitivus egit
 Parvulus orâ.

Hinc redux vitæ numeros acerbæ
 Ordine implevit, sua fata, Christus;
 Et probris mixtos alacri subivit
 Mente dolores.

Tum nece exhaustâ superas in auras

Redditus, probris decora alta duxit.

Post Crucem æternus solium capeffit

Victor & aras.

Jam triumphali super astra curru
Extulit pompam; patriaque demum
Sede confedit, paribusque mundum
Flectit habenis.

Procidant imi Superique Christo.
Cuncta submisit famulum gerenti;
Judicis munus Pater omne Nato
Jusque dicavit.

Nec minus gentes miseratus, orbem
Sustinet; Patri simul & Patronus
Supplices offert, & adhuc recentes
Corpore plagas.

Gratiæ sparsis nova corda donis,
Missili flammæ rutilantis Aurâ
Temperans, caris etiam resistit
Incola terris.

Fruge sublapsus fugiente, mentes
Lactat arcano reficitque pastu,
Hostia æternis recidiva in aras

Prodiga sacris.

Sic pii Christum populi frequentant;
Et suis urgent memorem trophæis:
Sic recurrentes operata festis

Templa per annos.

His & optatum meritjs favorem
Seduli poscunt MARIÆ Sodales,
Ut cadit signata suis in orbem

Tessera fastis.

Quam tulit, justam colit ipse legem;
Sancit exemplo; meritosque Magnæ,
Subditus rerum Dominus, Parenti
Solvit honores,

Natus & Matris decus & potestas;
Inque dilectos MARIAE clientes
Larga derivans opifer benignæ
Munera dextræ.

MARIA DEIPARA.

ODE XX.

CERNIS, ut Virgo, pede quo dolosi
Anguis obrivit caput execratum,
Ac venenatæ malefuada fregit
Sibila linguæ;
Nunc laborantis resupina Lunæ
Cornua insistit; rutiloque circum
Funditur corpus, velut alba nubes;
Solis amictu?
Cingit augustam sine more frontem
Splendidum bisflex diadema gemmis,
Quæ sacris vincant radiis coronæ
Sidera Cressæ.
Fida jactatæ Cynosura navi,
Turbido excitos Acheronte nimbos
Ore detergit, tumidisque pacem
Imperat undis.

S. GABRIELI,

DIVINO AD MARIAM LEGATO.

ODE XXI.

HUc ades, Cæli decus, huc supremi
Regis Orator, thalamoque casto
Rite jungendi Paranymphe Verbi,
Pacifer Ales.
Numinis robur, fragiles in artus
Indui miro sociale nexu,
Tom. 2.

Nuncius præfers, operisque molem
 Nomine signas.

Tu Geni fraudem, bonus, anguiformis
 Credulæ innexam reparas puellæ,
 Virgini clarâ juvenis figurâ
 Pronubus alma.

Quære maternum potioris Evæ;
 Fidus interpres, pueris amorem:
 Quamque portasti placidâ salutem
 Voce, redona.

D. PATRIARCHÆ JOACHIMO

SANCTISS. VIRGINIS PARENTI

ODE XXII.

TE R mihi felix Joachime salve,
 Sanguis ô Regum, Proavisque major
 Regibus ! nam quis tibi ceter, almâ
 Prole beato?

Unicus diæ Genitor Parentis,
 Et Deo lætaris Avus Nepote:
 Spes Abramæas, & anhela sancis
 Vota piorum.

Solus optatam Patribus salutem
 Exhibes, Cælique fidem recepto
 Liberas dono, Sobolisque regnas
 Jure per Orbem.

IN D. JOSEPHUM

VIRGINIS VIRGINEM SPONSUM

DIVINÆQUE OECONOMIÆ FIDELISSIMUM

Administrum.

ODE XXIII.

NUBE Josephi decus evolutis
Crevit immensum radiis ; & altum
Nomen , & munus , patriosque Christus
Clarat honores.

Sospitatoris profugus Puelli
Ille servator , Pharias in oras
Splendidum cœca rapuit sub umbrâ
Pignus Olympi.

Sponsus intactæ niveus Puellæ,
Fidus & Testis , pius & Minister:
Et sequax Agnum sacra pavit inter
Lilia Custos.

Ipse miratus suâ regna , leges
Numini horrescens dedit ; & Magister
Architectum Orbis , venerans , fabrili
Imbuit arte.

M. JOANNES BAPTISTA

EX VIRGINIS ADVENTU PROPHETA.

ODE XXIV.

VA'STA Jordanis sola pervagatum
Quis satis Vatem celebrare vates
Possit , & claræ Prodigium flagrantem
Lampadis instar ?

Gratiæ afflatum Puer hausit, auras
 Ante communes, MARIÆ potenti
 Voce subsultans, agitantque miro
 Gaudia motu.

Jamque vocali, generosus Infans,
 Prodit ostento veneratus Agnum:
 Spiritu & Vatis resonat Puelli

 Concita Mater.

Ora dein muto referat Parenti
 Editus Præco: rigidoque, totus
 Viva Vox, turbas habitu & gementes
 Personat undas.

JOANNI APOST. EVANG.
 DILECTO CHRISTI DISCIPULO,
 VIRGINIS PRIMIGENÆ ADOPTIVO,
 ODE XXV.

THABORIS vivam speculate lucem;
 Golgothæ diras etiam per umbras
 Ad Crucem perstas, calicisque partem
 Ducis amari.

Dum fidem præstas; tibi cura Magnæ
 Virginis, Christi placitô, tuique
 Invicem Matri data: tu Magistri
 Splendidus Heres.

Conscium arcanis comitem & ministrum;
 Antè; nunc Fratrem supèr, invidendâ
 Sorte adoptatum, probat inter omnes
 Christus Amicum.

Transvolans nubes Aquila, & supremo
 Lumini infigens oculum irretortum,
 Unicè divina tonas corusco
 Arduus ore.

Idem & Hyblæo teneros amores
 Suavior succo, roseasque flammæ,
 Numinisque haustos gremio, refuadis
 Nectaris amnes.

STEPHANUS PROTOMARTYR,

PRÆSENTI REGINÆ MARTYRUM OPE ROBORATUS.

ODE XXVI.

HORRIDOS audis crepitare nimbos:
 Corpori sancto silicum ingruentum?
 Mille jam plagis caput, & cruenta
 Membra dehiscunt.

Sed graves ictus Pietas amicis
 Attonans blandum precibus rependit:
 Saxa fulgentem pariunt, pyropis
 Versa, Coronam.

Quassat immani Stephanum fragore
 Saxa dum grando, pugilis cruentos
 Spectat ac voto juvat efficaci
 Diva labores.

Supplicem impressus genibus MARIAM
 Sensit, inflexoque lapis rigore,
 Quam notam pronus veneretur hospes,
 Duxit in ævum.

Ex monum.
 Tertiæ S.

S. AUREL. AUGUSTINUS

VIRG. DEIPARÆ VENERATOR EXIMIUS.

ODE XXVII.

AFRICA pulchrum pariente monstrum
 Ingeni, portenta cadunt Averno
 Proruta Errorum: tenebras coruscus
 Dispulit ardor.

Lubricus frustra Pelagi bilinguis

Nexat in nodos sua membra serpens :
 Pressus Aureli manibus , venenum
 Efflat inane.

Dum ciet magnus sacra bella Præsul ,
 Hæresum adspirat domitrix MARIA ,
 Lucis & docto radios clienti

Addit & ignes.

Culpæ inaccessam Domini Parentem
 Eximit turbæ ; Dominoque partæ
 Publicam adnixâ pietate Matrem
 Gentis adorât.

Corâ suspensus , mediufque Natum
 Inter & Matrem dubitat , reclusos
 Vulnerum fontes petat , an vocantis
 Ubra lactis.

SS. DOMINICUS ET FRANCISCUS,

IRATO CHRISTO A B. VIRGINE INTERPOSITI.

ODE XXVIII.

MYSTICO floret MARIE roseto
 Gusmani Proles ; animosa sancto
 Utilem marti Pietas profanos
 Egit in hostes.

Quem Cruci confixit Amor , cruenta
 Stigmata exornant ; & amica Egestas
 Casta præcinctum dedit ire torto
 Illa fune.

Igneis terras jaculis petenti
 Hos Deo , spondens meliora , Mater
 Sistit ; hi subdunt Lateranæ Atlantes
 Colla ruinæ.

D. ANNA DEIPARÆ GENITRIX.

ODE XXIX.

ANNA, divinæ Genitrix MARLÆ!
Elcanæ Conjux tibi, prisca longè
Anna decedit, Solymique Cœlebs
Incola templi.

Prole tu mirâ sterilem senectam
Solvis, & mundi senium caduci;
Alma concepto sine labe fetu
Gratia regnat.

JUSTINA VIRGO MARTYR;

INVOCATA DEIPARA DÆMONUM VICTRIX.

Ex Gregor.
Nazianz.

ODE XXX.

UT Palæstinâ malus hospes aulâ
Regnat, oppressum furians Sautem;
Blanda Jessæus Fidicen moyendo
Arma triumphat.

Illicit victus citharâ refugit
Orcus; & fracto data pax tumultu.
Sic & immissum magicas per artes
Expulit hostem,

Voce dum supplex gemituque pulsat
Virginem Virgo Dominam, suorum
Castra Jessidum retulisse visam
Ære canora.

Cant. 7.

Inde funestas Cyprianus artes
Damnat; & Christum venerans, decorâ
Morte, Justinæ sociat MARIA
Auspice palmam.

AD CÆLITUM ORDINES UNIVERSES
IN SODALITII MARIANI GRATIAM.

ODE XXXI.

JAM DIU summas, capita ipsa Divûm.
Laude perstringens, volito per arces:
Nunc mihi totum citharâ movendum.

Supplice Cælum.

Igneæ Mentēs, volucres catervæ,
Queis Patris semper faciem tueri,
Exequi nutus, celebrare laudes

Una voluptas:

Prima qui Patres tenuere secla,
Principes sancti populorum, & amplas
Moribus finxere domos, & æquis

Legibus urbes:

Sacra qui Vates cecinere fata:
Quisque, Præcones melioris ævi,
Cuncta terrarum peragrarè Missi

Auspice JESU:

Queis novæ Legis tabulas, & almi
Fœderis debet monimenta tellus;
Quotque mortalem studiosa Christum

Corda secuti:

Quæ rudis vitæ scelerisque Turma
Bethleo intentos Puero furores
Lacteo excepit jugulo, nefandi

Tela Tyranni:

Quotque cælestem rapuere palmam
Purpurâ imbuti Pugiles cruentâ:
Quotquot & sanxere piis professâ

Dogmata factis:

Præsules, & qui docili Magistros

Plebe gesserunt : meritoque cultu

Quisquis augustas operatus olim

Flamen ad aras :

Quisquis & mundo profugus , vel intra

Claustra , vel duræ latebras Eremitæ ,

Adstitit , jamtum prope civis , alti

Limen Olympi :

Fortis & mollem superare sexum

Virginum candens Chorus ; & pudoris

Laude præstantes Viduæ , Deoque

Jam bene nuptæ.

Gaudii nunquam fugientis heres ,

Numen abducto speculata velo ,

Numini viso similis , Beata

Turba faveto.

Supplices terræ dominator Agnus

Audiat vestrâ prece motus , Æthræ

Civitas omnis , cupidosque donet

Pace clientes.

Et preci pondus grave Mater addet

Numinis , per quam reparata labes

Prima terrarum , reparata Cæli

Pristina clades ;

Cùm Draco summas Aquilonis arces

Turbidus captans , rapidâque caudâ

Traxit involvens , Stygiisque merfit

Astra tenebris.

Principi quas ô Superi MARIÆ

Debitas grates canitis , neque ullâ

Arduis æquas meritis agendi


Laude facultas ;

Vertite ad caros Dominæ Sodales ;

Et laborantes animas , malisque

Vindice assertas ope , mox amico

Jungite cœtu.



LYRICON

LIBER VI.

MISCELLANEUS.

PERSONATA RELIGIO,
 SEU REFORMATA, UT VOCANT, ECCLESIA.
Ejus Antesignanos honesta specie fefellisse.

ODE I.



U A L I S Sicaniaë tremor
 Ridentem faciem, pictaque floribus
 Vernis explicuit juga ;
 Cæcis interea visceribus graves
 Iras & rabiem coquit
 Lentis dissimulans Ætna vaporibus,
 Dum candentia nubila
 Totis in Superos faucibus evomat,

Ac torrentibus igneis
 Dilectam Cœteri proluat insulam,
 Tali se specie tulit,
 Quæ, fūco teneræ compta modestiæ,
 Labes Relligio novas
 Priscis induerat vāstra coloribus,
 Fraudem Simplicitas tegit,
 Immanemque humilis forma superbiam.
 Error toxica subjicit,
 Chartarum aureolis sparsa leporibus,
 Vultu scenica non suo,
 Et fronte insidias compositā gerens,
 Incauto insidias gregi;
 Dum spirat Charites, dum Superos sonat,
 Imo corde nefas fruit;
 Blando sævitiam nomine concipit.
 Sensim Tartaream luem,
 Francis exitium parturit; ac brevī
 Contractis opibus ferox,
 Insano populos turbine miscuit.

ODE II.

Ex Horat. l. I. Od. XII. expressa.

QUO piā versam trahis arte laudem
 Barbite; Heroas veteres, Deūmque
 Fabulas temnens, superæ canora
 Vocis imago?
 Sive frondosa Libani sub umbra,
 Aut in Horebo, rutilove Sina:
 Fata pandentem nova quò secutæ
 Mosæ turbæ;
 Entheâ Virgâ refugos agente m
 Hinc & hinc fluctus, vitreosque montes;
 Rupium & venis faciles cientem

Verbere lymphas.

Unde fas musæ prius auspicari?
Carminis princeps, Caput ille rerum,
Voce molitus patriisque flectens
Legibus orbem.

Haud minus summo Genitore Verbum;
Par & ambobus sacer ardet Ignis.
Proximos adstans tibi, Christe, cepit
Mater honores.

Aliger nec te fileam, Rebelles
Fulminans armis, fera monstra cæli;
Flammeis nec vos, Socium tremenda
Agmina telis.

Dicam & augusti Proceres Senatûs,
Ensis hunc, illum crucis expetitâ
Sorte palmarem, geminum Quirinâ
Sidus in arce:

Cujus allisu furor omnis Orci
Frangitur, pulsæque Pharo tenebræ,
Ac procellosi cecidere Divum
Numine fluctus.

Abrahæ vernans senium, an, paterni
Victimam altaris, Juvenem; an Rebeccæ
Splendidam fraudem loquar, & Jacobi
Nobile furtum?

Prodigum vitæ Machabæum, & armis
Inclytos Fratres, animasque magnas
Patriæ sacras referam, ac Syrorum
Clade superbas.

Quondam & intonsis validum capillis
Samsonem letho dedit, & trophæo
Cara libertas tumulat, peractæ
Stragis acervo.

Crescit, Eous velut axe fulgor,
Fama Josephi. MARIÆ sed omni

Prænitet cælo jubar : ipsa plantis

Luna ministrat.

Stirpis humanæ Sator ac Redemptor,

Virginis proles ; tibi cura Sponsæ

Virginis , quæ tot peregrina cives

Gignit Olympo.

Illa seu Turcas Melitæ ingruentes

Sustinet sacro generosa bello ;

Sive ad Auroram Japonum cruenta

Regna laceffit ;

Te duce æternas ferat alma lauros.

Tu frementem irâ cohibes Avernum ;

Tu diu cæcas recreas amico

Lumine gentes.

MARIA SOROR MOYSIS,

EXPOSITUM IN CARECTO FRATREM

Observans.

ODE III.

HEU qui te casus labentem fluminis alveo

Excipiet , fragili ,

Germane , cymbæ creditum ?

Parva ratis , cui mœsta suos commisit amores

Mater , & Isacii

Florem decusque sanguinis ;

Molli depositum gremio servare memento ; &

Sicubi Niliaco

Miris vagatur littore ,

Nutrici , precor , aut blandum quæ pignus adoptet

Prolis amans , sterili

Matris feras vicariæ.

O scelerum gurgis ! ô inexsaturabile monstrum !

Cædibus Abramidûm ,

Væ, purpurate carnifex!

Infantes pueros, ut primum lumina vitæ

Attigerint, rabidi

Tristes furoris hostias,

Exitio rapere, atque altum demergere in amnem

Sollicito miseræ

Parentis avulsos sinu!

Quo tanto immanes potuisti crimine pœnas

Commeruisse, Puer?

An crimen, Hebraum genus?

Care Puer, Matris dulce & lacrymabile furtum,

Quid latuisse juvat,

Hic si manebat exitus?

Heu, quâ te tua, parve, Soror queat arte tueri?

Quid dolor, & lacrymæ

Mixtis valent suspiriis?

Ah, vortex ne te rapidus voret, aut mala dentis

Tabæ soporiferi

Aspis tenellum vulneret:

Memphæos aut Numen Crocodilus gutture vasto

Ad sua lacteolam

Carecta prædam exorbeat!

Parcite crudeles piscesque feræque Puello;

Parcite arundinæ

Fluctus tumentes cymbulæ.

Tu sortes hominum varias qui numine flectis;

Omnipotens Genitor,

Periculosas dirige

Ipse manu cunas, felicemque annue cursum,

Una salus Pueri;

Spes una Germanæ, Pater.

En, blandis ut opem poscit vagitibus infans,

Mitia supplicibus

Quærens ocellis sidera!

Ah, saltem ante oculos spectantis & ora Sororis,

LYRICON LIBER VI.

255

Ne meliorem animæ

Fluenta, ne partem obruant;

Neu Matri jam lethiferi sim nuncia luctus.

Sed Pharaonis adest

Superba proles, quò vada

Fluminis invitant, & amicæ balnea lymphæ;

Gramineamque legit

Oram puellaris manus.

Supprime nunc gemitus, frontem compone Maria.

Prodidit ecce meam

Fiscella curam scirpea.

Quid, Patris infandi si Barbara jussa facessat?

Sed meliora piis.

Materna tangat pectora

Aureolus nigris expositus fluctibus infans.

Verte age corda Deus.

Damnet Tyrannum Filia!

RUSTICATIO MUSARUM

AD VILLAM BADIFIAM.

ODE IV.

NYMPHA Carenta vocat, Permeſſo purior anni,
Sinusque pandit cœrulos.

Badifus, Clariis Flamen gratiſſimus aris,

Invitat hospes ſplendidus:

Atque aliud veteris prærupto vertice Pindi

Amœnius præbet jugum.

Ite alacres, ſolidumq; diem ſubducite curis.

Nec ruſticari dedecet.

Seceſſus, nemoriſq; placent umbroſa Poëtis:

Urbes Camœnis obſtrepunt.

Santonicâ ſed jam Muſæ ſcandere biremim;

Napæa quam duplex agit:

Subter & antiqui labuntur fornice pontis,

Magno superbi nomine.
 Romani augustum tituli decus ardua saxa
 Inscripta servant Cæsari.
 Hinc prata immenso funduntur gemmea tractu;
 Mollesque riparum tori.
 Viva loci pictura nitet, lux plurima florum,
 Arti nihil debentium.
 At dextræ insurgunt oræ, tremulisque reudent
 Colles opaci frondibus.
 Læto alios dives prætexit palmite Bacchus,
 Largoque inundat nectare.
 Frigida se attollit rupes, Heliconidis instar,
 Quâ multa confidet Dryas;
 Vernantesque agitatâ comas crispantibus auris,
 Ore adum admisso grege,
 Præterlabentes gestit spectare Camœnas,
 Et fronte demissâ colit.
 Illæ per vitreos serpenti Naiade flexus
 Iter, sedendo, lubricum
 Decurrunt; varioque hilares sermone, nitentis
 Augent voluptatem viæ.
 Corbiacum præter vectis, xystumque, nemusque;
 Clausosque piscium lacus,
 Ardua Bussaci prospectum castra laceffunt;
 Metamque jam linter premit.
 Exscendit Phœbea cohors, cymbâq; relictâ
 Clivosa saxa transilit.
 Mox via, quæ patulis sese explicat obsita fagis;
 Verno tapete sternit.
 Ventum est ad *Plani*; Dominus quo nomine signat,
 Serena *Montis* culmina.
 Atria formosæ subeunt ridentia villæ,
 Cultosque Badifi lares.
 Subjectæ facies urbis, turritaque castra
 Collesque cum filvis patent;

Flumina cum pratis, flavi cum messibus agri,
 Sparsæque, ceu nidi, casæ.
 Itur in apricum spatiis ingentibus hortum,
 Quem spissiora frondibus
 Poma coronarunt, & amœno pondere fructus
 Ramos gementes deprimunt.
 Hic Pæsti cernuntur opes, hic Delphica laurus;
 Vivaxque Ocelli purpura.
 Circumfusa horto Lenæi regna Falernis
 Certare clivis audeant.
 Singula oberrantes meditato carmine creber
 Salutat oscen advenas.
 Præcipue, teneris adolescens frondibus, æquo
 Intratur ut nemus pede.
 Cresce nemus, curâ Domini cultuque beatum,
 Felice consitum manu;
 Ne quis sit lucus, Grynæo cedere jussu,
 Quo plus Apollo gaudeat.
 Pelle graves Badifo æstus, urbisque laborem
 Blandis relaxa feriis.
 At vos hinc illi, Musæ, decerpite rimum,
 Albisque vittisnectite.

V. C. SAMSONI BADIFO,
 CUM ODEN SUPERIOREM
 in Eruditorum corona recitasset, festi-
 voque officii genere Autorem celebra-
 set absentem.

ODE V.

RURIS lepores ingenuos amant,
 Badife, Musæ. mœnibus urbium;
 Ceu carcerum, longè relictis
 In vacuo spatiantur agro.

Fucique fraudisque & scelerum fugax

Chorus beato regnat in otio,

Vestigia Astræe suprema

Hic relegens, niveosque mores.

Musas secuti, delicias petunt

Ruris, Poëtæ: nec sua gaudia

Tacent, & Orpheâ laceſſunt

Aſſidue volucres camœnâ.

Sic ille Mântûs fatidicæ Nepos,

Quo ſuaviorem Mincius, abnegat

Tuliſſe Cycnum, dum ſilentes

Carminibus remoratur undas.

Sic blandæ Alumnus Parthenopes minor

(Alto Maronem Statius impetu,

Sed longe, adoratum, ſecutus)

Sic propriam reſonare laudem

Silvas docebat. Ruris honoribus

Felix, amici nunc jûga Tiburis,

Nunc ille Surrentina cantat

Littora, marmoreasque villas.

Et me vocatu Santonici tuo

Vidère colles (ô patriæ decus,

Badife) Phœbeæque turmæ

Villa capax, ſolidique Pindi.

At non cruentam Synnada, non Thafon,

Afras columnas, ſaxa Caryſtia

Demirer, aut tignos Hymetti,

Aut Libani ſpolia ampla cedros.

Me nec ſuperbis addita poſtibus,

Et ſumptuoſum porticus atrium

Amplexa, criſtatæque turres,

Nec volitans cameris voluptas;

Non Indæ teſtudo, aut Ephyreii

Lux tangat aris, cui pretium hoſtico

Ab igne crevit; non metallo

Dalmatico saturum lacunar.

Ruris modesti me species juvat :

Natura puris culta laboribus

Arridet. hortus, silva, tectum

Munditias faciles amanto.

Badise, talem non sine mutuis

Villam dedisti cernere gaudiis ;

Talemque iussi rusticantes

Ad citharam celebrare Musas.

Ut magnæ amœnam mentis imaginem

Libens retracto, Pictonicâ licet

Semotus orâ ! parte ab omni

Villa tuos imitata mores.

Sic mens apertum surgit in athera ;

Majorque terris, atque humili procul

Seposta vulgo ; sic perenni

Flore nitet, decorumque silvâ.

Sic hospitali pectore Cynthium

Numen receptas, Aonium & chorum ;

Sanctoque Virtutes recessu

Rite colis, focias & Artes.

Solenne Musis hospitium apparas,

Ubi serenum Phœbus agit diem

Æstivus, ac longi sequestra

Otia concilias laboris.

Quo more nuper cùm lepidum Chorus

Monplanum inisset ; nostri etiam memor

Narraris, absentemque amicis

Officiis coluisse Vatem.

Dudum elegantis, munere debito,

Impensa Villæ carmina laudibus

Non laude vulgari ferebas

In mediâ relegens coronâ.

Et ipse nostræ volvere paginas

Frequens Camœnæ, mente etiam geris

Fixas tenaci, nec sonantes
 Digna tuæ monimenta laudis;
 Sed grata cælo te chelys efferet,
 Villamque, mollis cui juga Tusculi
 Xerxisque summittam togati
 Deliciis operosa regna.

GRATIA:

ODE VI.

Cùm Autor post Theologicas de Gratia
 disputationes exhibita sibi officia gra-
 tularetur ANTONIO VERNELIO S. J.

CONSERTA Nymphis jam Cythereias
 Gestit choreas plaudete Gratia,
 Mollesque Bacchantum procaci
 Lætitiis agitare cantu.
 Heu ficta priscis Gratia Vatribus,
 Larvam profani detrahe gaudii.
 Ah, splendide nugax, inertii
 Parce lyram violasse ludo.
 Intacta vanæ Gratia fabulæ,
 Post eruditi classica prælii,
 Carmen reposcit, blandioris
 Artis opus, facilemque laurum.
 Tantam nec ullis nixibus edidit
 Natura prolem, nec sociam innocens
 Exegit; at Christi faventis,
 Agra, pio medicam cruore
 Accepit, ipsâ clade beatior.
 Ubi, malorum luxurians seges,
 Jam culpa regnavit; bonorum
 Gratia ovans cumulo redundat;
 Illam superno progenitam satum,

LYRICON LIBER VI.

261

Séque ipse cordi Spiritus intimo
 Infundit, & donis sacratam
 Mentem animat, similemque Divis.
 Caris inhæret sedibus, & suam
 Exornat aulam, justitiæ parens:
 Vires & acquirit manendo,
 Promeritis opulenta crescit;

Justifica Gra-
 tia.

Ni fors Averno extrudat amior
 Hospes latroni, Tartareæ ilicet
 Pestis sub ingressum, nefando
 Templâ fugit temerata monstro.

Quanquam hostici vim sacrilegam mali
 Certant amicis frangere viribus,
 Ternisque Reginam actuosæ
 Auxiliis Charites tuentur.

Actuosa Gra-
 tia, triplex.

Hæc, dormientem segnius, excitat
 Mortalem, iniquo providus ac vigil
 Occurrat hosti; eorda fido
 Sollicitat male-cauta pulsu.

Hæc fœderatis partibus efficax
 Juvat laborem, militiae comes:
 Hæc & sequetur Gratiaque
 Intus agit sociale Numen.

Ah, sæpe complexu arctiùs improbo,
 Ingrata, Mens somnum excita colligit;
 Pacemque turbatam obstrepenti
 Exprobrat, invidiamque Cælo.

Vibrantem ab alto nec radium ferens,
 Extinguit, umbræ incumbere pervicax;
 Et dura tractanti resistit;
 Thessalicas imitata rupes.

Frustra salubri Numinis halitu
 Afflata, non hac, sed popularibus
 Movetur auris, & quæ ab imo
 Infremuere Erebo procellæ.

Eheu, rebellem subde proterviam
Dulci Voluntas aspera Gratia;

Crebroque prensantes amoris
Officio reverere Divas.

Fatale nomen, bruta Necessitas
Haud ulla menti vincula liberæ
Intendit; aut flecti negantem

Imperio premit arctiori.

Orci catenas Gratia & horridos
Nexus resolvit: ducit ad æthera,
Tollitque victricem decoro

Consocians animam triumpho.

ResponSAT almæ Gloria Gratia;
Virtutem opimâ clarat adoreâ.

Jam vis Olympum, jam capeSSit
Pacta labor generosus astra.

Proh quanta passi vulnera Martyres,
Ne vinculum Amoris nobile Gratia,
Semenque divini Parentis

Excideret, pretiumque regni!

Hoc nempe constant omnia pignore;
Stirpisque supremum ætheriæ decus,
Et illa congestas avari

Orbis opes, adamantas, aurum;

Ceu vilem arenam, gaza supervolans;
Structam hospitali Gratia pectore

Quam servat Heroum, & remensâ
Gloria suscipiens acervo.

Ut me recenti asserta periculo,
Inque erudito Gratia pulvere

Defensa defendit clientem

Ipsa suum, pugilemque textit;

Gratia gratis O si Poëtam nunc agat artifex,
dura, VERNELI, amico munere Gratia!

Et usque debendas & usque

Reddere amans canat ipsa grates;

EX MONODIA DAVIDICA

IN SAÜLEM ET JONATHAN,
AD GEMINOS APOSTOLORUM PRINCIPES
TRANSLATA,

ODE VII.

QUOS amor vitâ stabilis revinxit
Principes terræ geminos, nec ipsa
Fata sejungunt, varioque compar
Gloria letho.

Igneis Virtus animis leonum
Fortior duxit Stygiam in catervam;
Ocyor pennis aquilarum, in orbem
Impetus egit.

Lucidas, ictu metutente falli,
Ore torquebant pariter sagittas;
Corda figebant penitus salubri
Vulnere victa.

Heu, quid indignâ cecidere poenâ,
Casta converso dare jura seclo
Nobiles Mystæ, gemina illa sancti
Fulmina belli?

Regios sacrorum apices, magister
Quos Deus fragante oleo perunxit,
Heu, probro admixti lacerant cruentâ
Mortē dolores.

Hoc quoque immani licuit Tyranno!
Impius postquam Nero cæde Matrem
Sustulit, mundi perimit Parentes
Publicus hostis.

Sed, Quirinali potioris ostro,
Lux pii Romam decorat cruoris;

Lib. II. Reg.
c. I

In Marte quoque non sunt divisi.

Aquilis velociore, leonibus fortiores.

Sagitta Jonathanæ nunquam rediit retrorsum &c.

Quomodo ceciderunt robusti & perierunt arma bellica?

Saul, quæsi non esset unctus oleo.

Quomodo ceciderunt fortes in prelio?

*Clypeus for-
zum.*

Et sacram Virtus clypeo coronans

Protegit urbem.

*Proxima in
Palinodiam
versa.*

Vos piat, Septem, cruor iste, Montes;

Rore fecundo beat. inde pingui

*Montes (Gel-
boe, nec) ros
(nec) pluvia
veniant super
vos (neque)
sint agri pri-
miarum.*

Efferant agro generosa pulchram

Semina messem!

ADAMANTINUS ANNULUS

A CELSISSIMO S. R. I. PRINCIPE

FERDINANDO FURSTENBERGIO,

EPISC. PADERBOR. COADJUT. MONASTER.

AD ILLVSTRISSIMVM VIRVM

LUDOVICUM VERJUSIUM,

*Apud varios Electores aliosque Germania Principes
Christianissimi Regis Administrum &c.*

Sub ejus in Patriam reditum

DONO MISSUS

Cum elegantissimo & officiosissimo Epigrammate.

ODE VIII.

CU i laudes adamantinis

Incisas tabulis debeat unice

Quæsitus meritis Favor,

Magni clara docent munera Principis.

Gaude Teutonicis redux,

VERJUSI, Patriæ gloria, finibus.

Quanquam publica gentium

Longis prosequitur gratia plausibus;

Et te splendida pignora

Regnantum, egregiis digna laboribus,

Insigni decorant notâ;

Pulchro nil Paderæ munere dulcius.

Quæ non Aula tuo gravem
 Frangens invidiam nomine personat?
 Vix florente puertia
 Defunctum stupuit cultaque Tuscia,
 Romanique Lepos chori,
 Et septemgeminò Calliope jugo.
 Jamtum nobilis ingenium
 Europe tenerum suspiciens jubar,
 Quâ mox turbida seculi
 Inter luce micæ nubila, fenserat;
 Quantâ providus & sagax
 Regum imposta geris mole negotia,
 Testis, Lusitani caput,
 Jactat quæ veteris nomen Ulyssæi,
 Aurato tumidum alveo
 Urbs frenare Tagum, divitis & potens
 Gangis barbara flumina,
 Indi gemmiferos Oceani sinus.
 Testis, cœruleum premit
 Densâ quæ Tamesin classe Britannia;
 Tum qui nubiferis plagas
 Latè suppositas temperat Alpibus,
 Electroque fluentibus
 Undis Eridani jura dat Allobrox.
 Quid tu, vortice jamdiu
 Spumans belligero Rhene ferocior?
 Illustrem celebra Virum,
 Dum stabunt Ubæ testæ Colonia:
 Et quàm vastæ frementibus
 Terris, in varios cædua Principes,
 Te, Germania, porrigis;
 Obstantem celebra cladibus Imperi.
 Pacis Vestphalicæ sacris,
 Nexum stringere amans non violabilẽ,
 Vinculis instirrit; & novi

Egit sollicitus fœderis artifex.
 Seu coram alloquiis agit ;
 Seu scripto , indecoris texta calumniæ,
 Vanos diffuit & dolos ;
 Causas actor ovat vincere Regias.
 Illibata Viro Fides ;
 Doctarumque vigens laudibus Artium,
 Lucis conscia Mens suæ,
 Ignavis fugiens artibus infici.
 Quam dexter populos juvat ,
 Invitosque ferè servat ; & intimis
 Illabens animis regit
 Discordes Proceres , blandus & efficax !
 Nec , si quos furor abstulit
 Cæco præcipites hosticus impetu ,
 Fatalis species mali ,
 Curas exuperans ; hic studiis tamen
 Solers ludit inanibus ,
 Arcanoque trahens consilio moras.
 Felix , emeritum probat
 Magnus quem L O D O I X , censor idoneus ,
 Grataturque laboribus !
 FERNANDI niveo tu quoque calculo
 Felix , ac gemino inclytus
 FURSTENBERGIADÆ munere Principis ;
 Quo non æquior arbiter
 Leges imperii condere & ingenî !
 Septemplex Adamas venit ,
 Æternæ memorem quam fidei notam ,
 Pignus mittit amabile ,
 Detractumq; sacrâ Præfulis annulum ,
 Et cordis spécimen , manu.
 Ferro , flammâ Adamas insuperabilis ,
 Junctis fœdere mutuo
 Constantes animos signat amoribus.

O quantum dominâ lapis
 Deduxit pretium fidereus manu !
 Donum quin etiam additis
 Ornat carminibus, jam pretiosius :
 Quod laudes adamantinis
 Incisas tabulis exuperet decus.

EXCELLENTISSIMO VIRO
 D. FRANCISCO DE MELLO,
 MARCHIONI DE SANDE, LUSITANIÆ
 IN GALLIAM EXTRAORDINARIO LEGATO.

ODE IX.

TITANA, longas ætherii vias
 Permenſum Olympi, jam Tagus aureo
 Feſſum receptabat cubili,
 Cœlituum ſpecioſus hoſpes :
 Cùm tu, remotas munere publico
 Luſtraſſe gentes clarus, & ardua
 Sparſiſſe viuos mentis ignes
 Borboniâ celebratus Aulâ ;
 O lux, & ingens Luſiadûm decus ;
 Labore verſem num ſolito ſtylum,
 Melloë, quæris ; quod Camœna
 Cudat opus ſtimulante Phœbo ?
 Squallent inerti barbita pulvere ;
 Stant otioſo plectra ſilentio :
 Seu livor Arti, ſeu gravatæ
 Corpus obest animæ caducum.
 Si notus intret corda ciens calor ;
 Si mente plenâ concipiam Deum :
 Squallore jam abſterſo niteſcat
 Laurigero chelys iſta plectro.
 Oborta cantûs magnifici ſeges,

Utro micantem, sollicitet Iyram;
 Congressu ab hesterno flagrantem
 Obvia laus animum laceffat.

Hinc Martialis fulget adorea;
 Interque ahenis fulmina molibus

Contorta, fumosâque nubes,
 Ardet Honos radiante curru.

Illinc togatis, nec minor, artibus
 Vis splendet alti lyncea consili;

Domique & externis in oris.
 Artifici metuenda Ibero.

Hinc &, Batavô difficiles fretô,
 Acris procellæ viribus ingenti

Cessere; jactatæ per Orbem

Bisgeminum siluere lites.

Illinc jugali sorte Britanniam

Prudens & arcto fœdere patriæ

Innectis; Anglorumque vires.

Hesperiiis sociantur armis.

At magna quantum Gallia suspicit!

Stirpis Sabaudæ flos tibi creditus,

Gentisque non unius ingens

Gloria, deliciæque regni.

Imbellis ecquid te citharæ sonus

Juvet, curules quem bene machinæ

Lateque Præfectum tonantem

Per medias sonuere pugnas.

Tuo decorum sanguine, & hostico;

Ibericarum plurima Turrium

Ruina, & horrendo fragosi

Excidio cecinere casus?

Aut quem per urbes mitior extulit

Præconiorum vox popularium;

Terræque certatim marique

Assidui retulere plausus.

Ah, morbus actis grandibus invidet!

Et contumaci decubuit malo,

Dux martē Legatusque pacis

Fœderibus memorandus Orbi.

Nunc tandem amicā detumuit prece

Votisque victus supplicibus furor :

Morboque jam fracto, profundi

Molle Thetis dabit æqua marmor.

Muros Vlyssēi, sic avibus bonis,

Ventis revisas rite faventibus,

FRANCISCE ! & augustum superbo

Depositum thalamo reponas.

MORTIS PROCREATIO.

ODE X.

QUAS Divūm timuit minas,
Visu qui cupido poma nocentia

Hausit credulus ambitus,

Divinæque fames cœca scientiæ ?

Viles illecebras manu

Invadens avidâ, nec colubri dolos

Monstrique insidias cavens,

Morsu corripuit perdita fœmina ;

Perdendique (nefas !) virum,

Cunctam & progeniē, blandior artifex.

Vix fetum exitiis

Aufis, heu, veritæ contigit arboris

Infelix nimsūm helluo,

Humani generisque & sceleris pater ;

Diro, nec morâ, femine

Fatalis soboles, illa suis prius

Intentata parentibus,

Mors, pœna exoritur publica gentium.

En, ut par Superis homo,

Promissique potens anguinei, malum
 Funesto, ah melius rudis,
 Ufu jam didicit; nudus, egens, probro
 Oppressus, trepidus metu,
 Et Cæli fugiens conscia lumina!
 Demens, qui latebris regi,
 Aternique oculos fallere Judicis
 Sperarit, foliis opem
 Captans, pestiferâ non violabilis
 Pomi raptor ab arbore.
 Serus turbat agens præcipitem pudor.
 Læsum instare Deum ratus,
 Auræ sub strepitum, ceu tonitru, intremit:
 I nunc, i temerarius
 Contemptor Superûm, vanus & æmulus,
 Pelles, ipse sibi gravis,
 Brutus veste novâ jam rubor induat:
 Jam lethi spoliis suam
 Sortem præcipiat terrigenæ pavor.
 Primis cassus honoribus,
 Dejecto ad pecudem sordet homo statu.
 Cælum stultitiâ petens,
 Diffatur tenui pulvis anhelitu.

VANITATIS HUMANÆ SPECTACULUM,

ISABELLÆ AUG. CADAVER.

ODE XI.

ACTÆAM, studiis gens vaga, Porticum
 Longâ quid petitis, nec facili viâ;
 Argutumque nemus, Socraticæ domum
 Et regnum Sapientiæ?
 Vitam Mors tacito fingere certior
 Et mores habitu (disce, hominum genus),
 Rerum vana docens spernere nobili

Laudatâque superbâ.

Novit magnanimo cōficia Borgia,
Et miratur adhuc Illiberis Ducem,
Augustæ pheretro protinus aulicas
Doctum abrumpere compedes.

Ille ut Cæsareæ funera Conjugis
Longo per populos duxerat agmine
Majorum ad tumulos, ardua Baticæ

Quâ se Regia sustulit;
Juratam repetit mos patrius fidem.
Mausolæa suus servat honos sacra;
Sollennique probat relligio loci

Ritu splendida pignora.
Pompæ vix patuit lugubre ferculum;
Tetri cūm facies horrida corporis
Sensus attonitos vulnerat, & procul

Magnates refugos agit.
Non jam Augusta suis nota clientibus:
Ausus nec Dominæ Borgia, quas videt,
Testari exuvias, jam graveolentiâ,
Jam tabo haud tolerabiles.

Heu tabum, heu sanies dira cadaveris!
Quid, si Tartareis pabula debeat
Inconsumpta rogis, sulfureas datæ

In flammæ animæ comes!
Magnos sub rigido maxima Judice
Tormenta excipient. At Superûm pio
Cultrix illa quidem pectore, pauperum
Altrix munificâ manu.

Pollinctorum oculos quin etiam Pudor
Luxusque artifices barbarici manus
Post lethum metuens, fœtida maluit
Exhorrescere funera.

Quæ vixit nitido læta palatio,
Quam sordente mori prætulit casâ!

Et gestata juvet crux, animæ quies,
 Aeternum ad solium gradus.
 Squallet versa novis scena coloribus.
 Quæ partæ meritis, solæ aderunt opes:
 Virtus, fida comes Manibus: aulica
 Raptim deseruit cohors.
 Fluxæ deliciæ, divitiæ breves,
 Mendacisque micans bractea gloriæ;
 Et formæ fragilis splendor & imperi;
 Umbra, somnia, fabulæ!
 O, quem blanda rapit gratia Principum;
 Fucatæ veneres, nomina grandibus
 Ampullata sonis, pictaque detinent
 Pompæ gaudia ludicræ;
 En has, en pheretro, si potes, aspice;
 Nuper conspicuæ, nuper amabilis
 Formæ reliquias. Quæ tua fascinent
 Nugæ lumina, detegis?
 Acres hîc oculos Borgia fixerat,
 Haud frustra meditans; hæccine Caroli
 Isabella? virum publicus hic stupor?
 Lux hæc, flammaque Regiæ?
 Sic secum tacitus (funere nascitur
 Vita, & sarcophago parta salus Duci)
 Mox altè vacuis visa recolligit
 Suspirans penetralibus.

Ejus in sacro
 Transfugio
 sensus expres-
 si.

Præterit figura hujus mundi. i. Corinth. 7.

ODE XII.

FLUXA FALLAXQUE RERUM SPECIES HUMANARUM
 ostenditur ex Iride.

ASPICE quam blandi nebulam pinxere colores:
 Inane rerum, splendidam in scenam datur.
 Fulsit ubi vario Cæli Thaumantias arcu,
 Superba

Superba solvit imbris spectacula.
 Non solus vacuâ mentitur imagine Titan,
 Utcunque fingit nube fucatâ Iridem.
 Omnia fallaci specie mortalia ludunt;
 Natura rerum fragilis, & fluxus decor.
 Mendax, forma, color: primis ubi floruit annis,
 Marcens amœno defluit vultu rosa.
 Gloria vana micans ubi luce arrisit amicâ,
 Obscura tristi Fama contemptu filet.
 Lubrica Fortuna, atque oculos ubi cepit avaros;
 Sensus metallo divite illectos fugit.
 Sic vario nitida ostentant simulacra colore
 Titulos, amores, cumque deliciis opes.
 Picta sed aërii vanescit pompa theatri,
 Fugax imago, splendidum ludibrium.

LICENTIAE MILITARIS DEPLORATIO.

ODE XIII.

AH, piget nullo memorata seculo
 Probra venturos trahere in nepotes;
 Vix pharetratis imitanda Turcis
 Barbara facta.
 Miles infandas meditatur artes;
 Quotquot & formas reperit nocendi;
 Gaudet infantum lacerare atroci
 Corpora ludo.
 Ille & immotâ generosus irâ,
 Igne festivo speciemque Troiæ
 Edet ardentis, referetque visu
 Digna Neronis.
 Fortis est, quicumque Deum læcessit
 Oris effræni petulante linguâ,
 Et gigantæis petit astra, Terræ
 Filius, ausis.
 Huccine exemplum recidit vetusti

Moris ? hæc virtus ? fileo pudoris
Publicam cladem, Paphiasque fordes,
Dedecus ævi.

Mollis enervat Cytherea Martem;
Juncta Bellonæ graditur Megara:
Instat ultrici Nemesis flagello, &
Ira Tonantis.

Fœda morborum sequitur caterva;
Et lues, quò quò mala turba movit;
Errat indignas populata raptis
Civibus oras.

Diruto, quid, cùm violenta muro
Militem irrumpens acies triumphat?
Scena quæ rerum ! miserâ quis urbe
Luctus, & horror !

Prælio instructas, quid, ubi cohortes
Campus hinc, illinc videt; & cadentum
Corporum assurgens cumulis, cruore
Æstuat æquor?

Ecqua ferali caret ora busto?
Ecquod intactum mare purpuratos
Cæde non volvit tremefacta circum
Littora fluctus?

Exules migrant populi : parentes
Parvulis, eheu, gremio receptis
Viva per terras levius dolentes
Funera ducunt.

Nec manus templis cohibens Enyo,
Incolas audet spoliare Divos:
Ferculo abjecti ravidum Tonantis
Numina calcat.

Proh scelus ! sacræ tacuere Musæ:
Cessit Hipponæ locus hinnienti;
Peius aut præcone boat nefandi
Dogmatis ades.

Flamines cultas quoties ad aras
Victimæ casti? quoties Olympo
Debita, heu, fœdis temerata ab hircis
Lilia marcent?

Sic habet Liber sua, sic Cupido
Castra: Vulcanum neque abesse lugent
Templa; & abruptum furialis orbem
Tæda perurit.

Exteris sed quæ probra nota castris,
Exulant Francis, ubi Ludæicus
Regnat immitem cohibens severâ
Lege Gradivum.

Pulchra Condæus validis sub armis
Jura, Turennusque simul secuti,
Digna palmaris referunt ovantes
Præmia moris.

AGRI GARITENSIS AMOENITAS.

ODE XIV.

PÆSTANA rura, vosque, Thessaliæ decus,
Cantata Tempe cedite.

Video supinos mollibus colles jugis,
Læto nitentes gramine.

Ingens theatrum frondeâ scenâ viret,
Cavis reductum flexibus.

Nec-non superbos vite generosâ frequens
Clivos Lyæus infidet.

At flava cultis vallibus regnat Ceres,
Messisque miratur suas.

Garumna pingues amne fecundo plagas
Lato pererrat alveo.

Densæ tumenti carbaso cymbæ natant;
Pars fruge, pars vino graves.

Et glauca ripas, populo admistâ, salix

Longo coronat agmine,
Rident amœno flore translucentia,
Rivisque prata garriunt.
Crebris & oram consitam pagis frequens
Prætexit urbium decus.
Illæ adjacentes; hæ jugo impostæ, arduis
Pendent minaces mœnibus.
Puram explicatis urbium ad portas viam
Xysti remulcent areis.
Ut quina summis collium fastigiis
Procul renident oppida!
Candentum acervos parte diversâ erigi
Montesque dicas nubium.
Nive sed perenni tecta Pyrenes micant
Longinqua, crede, culmina.
O grata pariter diffiti spectacula
Circumque porrecti soli!
Hic alta cernas castra, turritas domos,
Murisque conseptum nemus:
Illic beatas pace, nec Regum invidas
Celsis casâs palatii;
Quas innocentis gaudium vitæ foveat,
Divesque proventu labor.
Pascuntur amplâ nobiles silvâ feræ,
Cervique cum damis vagi.
Opima passim armenta felices agros
Saturique persultant greges.
Hinc blandum avenâ carmen upilio sonat,
Illinc bubulcus fistulâ.
Jocante crispat arborum undantes comas
Aurâ tener Favonius.
Nemorum voluptas, æmulæ alternis canunt
Dulces choris Sirenulæ.
Valete Pæsti rura, Thessaliæ procul
Jactata Tempe cedite.

*Filii hominum, usquequò gravi corde? ut quid
diligitis vanitatem, & queritis mendacium?*

Psal. iv.

ODE XV.

VANI Terrigenæ, quam-miseris-diu
Nugis corda graves, nec memores poli,
Fortunæ aureolæ splendida somnia
Et mendacia quaritis?

Votorum caput ac meta, Beatitas.
Sed cursu temere quæritur avio.
Illam non parient Deliciæ breves,
Non ventosus Honos feret;
Non quas sollicito septus amor metu
Frustra servat Opes, morte citas rapi.
Unum corda fui quippe capacia
Immortale replet Bonum.

ÆTERNITAS HOMINI CONSTITUTA.

ODE XVI.

QUANQUAM caducos vita Terrigenas fugit,
Partusque sævum devorat Tempus suos;
Æternitati nascimur, Cæli genus,
Quæ fluxa vasto secula absorbet sinu.
Vili fatiscit corpus effictum luto;
Nec jus, nec ultra vis feræ Mortis patet.
Vacuo superstes corpori mens evolat.
Quin & supremo corpus excitum die,
Biformis, ibit, quò vocat Perennitas.
Æternitati vive, Mortalis; tuam,
Memor, nec unquam degener, sortem gere.
Supera inter & profunda librato, parem

Anceps metumque spemque fert Æternitas.

INFERI. ODE XVII.

HOc se theatro Numinis explicat
Immensus, ardens, terribilis furor.

O peste congestâ barathrum,
Perpetuæ laniena mortis!

Gurges malorum, fluctibus æstuans
Nunquam enatandis; atra bitumine, &
Nunquam procellæ detonantis

Fulmine mixta fremens vorago!

Ignem salietur. Æquata justusque & sapiens rogos
Marc. 9.

Tormenta noxis irrogat; & salis

Atrocis instar, victimarum

Ille greges penetrans, in ævum

Thesaurus ira servat, & integros

Mactare sævis assiduus modis,

Sic ignis ultrici ministrat

Justitiæ, horribilis satelles.

IN IDEM JUSTITIÆ DIVINÆ THEATRUM

ODE XVIII.

VÆ, stagnum liquido sulfure torridum!

Væ, consors Geniis turba nocentibus,
Ferales animæ, nec miserabiles!

Cæcis, væ, tenebris horrificum chaos!

Fœdum, immane, rigens carcere aheneo,

Vis quem nulla virum, nulla furentium

Infringat Geniorum; aut, miseras prius

Ars mentes acuens, irreferabilem

Fallat; nec gemitus, nec moveant preces.

Haud flecti patiens, vel satiabilis

Tandem suppliciis, ira supertonat

Æterno implacidi fulmine Judicis.

Non hîc Tempus edax , innumerabili
 Nec feclo attenuat membra flagrantia.
 Tortorque ipsa sui conscia mens agit,
 Manes & patitur, nil Furiis egens,
 Et ficto Tityi vulture atrocior.
 Hîc fumum lacrymosum, hîc piceas faces,
 Infani fremitum pectoris, & feris
 Stridentem rabiem dentibus horreas.
 Heu, desiderii faucibus inanibus
 Amissæ patriæ, fiderei Patris,
 Tabescunt sterili corda cupidine:
 Desperansque, odiis mistus inæstuat
 Nunc felicitis amor serior imperi;
 Ardens & stimulis invidiæ, furor.
 O flammæ! ô tenebræ! dira perennitas!
 Pœnarum facies omnigenûm! ah dolor,
 Ah vivax mediâ in morte, nec ultimi
 Sortem explere potens exitii, dolor!
 Væ, noctes scelerum, vincula, turbines!
 Cœcum, immane chaos! dira perennitas!

COELESTIS HIEROSOLYMA. Ex Apoc.

ODE XIX.

QUAM formosa Sion, nubibus altior,
 Fulvâ quam redimit murus iaspide,
 Sapphirisque remisisti

Fundavere ropazii!

Gemmâ conspicuæ stant solidâ fores
 Bissæ, liminibus semper hiantibus:

Insternitque plateas

Aurum splendidus vitro.

Crytallo similis compita perluit

Amnis, pomifero sub viridario.

Templum Solque beato

Ipse adstat populo Deus.
Autorem Solymes ætheriæ Deum
Gratis, Cælicolæ, tollite cantibus,
Terrarumque coloni,
Sedes quos patriæ vocant.

AD DEUM OPT. MAX. ADSPIRATIO.

ODE XX.

DULCIS amplexus, Dominique sanctum
Osculum, fragrans & amoris uber,
Et voluptatis liquidæ beato

Nectare torrens!

Cervus ut fontes gelidos aquarum,
Seu malo pastum sitis urget angue,
Seu fugâ fessum trepidoque cursu,

Ardet anhelus:

Icta flagranti, Deus alme, voto
Sic suum te mens inhians parentem

Ambit; ô idem via, dux, pique
Meta laboris.

Ille mirantem rapiat Sabæam
Gloriâ fulgens Salomon caducâ:

Tu meos pascas oculos amico

Lumine, JESU!

O apex rerum, mea fors, quid ultra

Te, Deus, terris cupiam vel astris?

Mundo inexpletus, satiabor uno

Numinis haustu.

AD ILLUSTRISS. AC REVERENDISS.
FRANCISCUM PERICARDUM,
INCULISMENSEM EPISCOPUM,

*Cum Poëtica declamationis Auditor in scholas publi-
cas descendisset.*

ODE XXI.

POST lauros Mithridaticas,
Romanæque Asiæ finibus additum
Vasti dimidium imperi,
Victor Memnoniis à populis redux
Ludo Palladio subit
Pompejus, tenuem devenerans larem.
Fasces laurigeros, quibus
Summissusque Oriens venit & Occidens,
Summisit foribus Sophi,
Hospes nostræ humilem major in exedram
Ultro Castaliæ venis,
Olim belligeros inter ovans Duces;
Hostem nunc potioribus
Armis Tartareum vincere nobilis.
Palmas cum spoliis refers,
Pacisque interea Numen amabile
Supplex æthere devocans,
Auges templa sacris, Præsul, honoribus.
Solem affulgere mysticum
Ceus *sponsum thalamo* vidimus aureo.
Candentem nebulam induit,
Erumpit radiis dulce tamen jubar.
Te verò ante alios? petit,
Sanctis & propius corripit ignibus.
Nullum sacrificâ diem

Defraudans operâ, te superimmolas.
 Vulgo indicta piacula
 Idem primus obis; ac tua, quas jubet,
 Intendit pietas preces.
 Nimirum imperio blanditiis efficax
 Exemplum populos agit.
 Ut divina, potens eloquio, tuæ
 Plebi pabula dividis,
 Dum censum pecoris Pastor inis vigil,
 Pulchris ruraque & oppida
 Perlustrans, litui regna, laboribus!
 At quàm splēdidus Arbiter
 Discordes animos conciliare amas!
 Rixas frangere providus,
 Iras & gladios Nobilium premis
 Arcens sanguine mutuo.
 Agrorumque inopes hospitio frequens
 Turbas visere sedulus,
 Mœrorem placidis alloquiis levas,
 Largâ pauperiem stipe,
 Et linguâ pariter commodus & manu.
 Nec fortuna severior
 Heroam solidi pectoris emover
 Vim casu insuperabilem;
 Nec, si blanditiis mulcet amicior,
 Incorruptum animum trahit.
 Musarum, egregias pascit amœniis
 Mentes & reficit lepos.
 Cum Musis sua sunt fœdera Gratiis.
 Docto strenuus otio
 Sic se Pieriis explicat in choris
 Laxandi vigor ingēni.
 His tu deliciis ingenuus capi.
 Nec tantum facili manu
 Volvis, quod gravibus præla gementia

Excudère typis epos.

Vocales etiam, Præsul, inis specus,

Pronis excipere auribus

Dignatus gracilis carmina fistulæ.

POETICE

CHRISTIANORUM ANTISTITUM CULTU

Sacrarumq; usu Litterarum Consecrata.

ODE XXII

NON hîc *ex humili potens*

Mystes Aonidum cantat Horatius.

Cælestem meliùs chorum

Docto concelebrant munere Præfules.

Castæ sacra gerunt manus.

Musas Relligio, quas colit, expiat.

His quondam & Damasus litat;

Et cujus teneris involitans labris

Suaves *ambrosiæ* favos,

Ingens augurium, sparsit apum globus.

Et noster fuit, annui

Felicem venerans carminis orbitâ

Paulinus, Latii stupor.

Romanum, an * Danaum Gregorium canam?

An, quem vivida & ardui

Torrens eloquii vis Rhodano parem,

Et Parnassius ingeni

Effert Hilarium magnifici lepos?

An te, Pictonicæ alterum

Seu Musæ referam, seu decus infulæ,

Venantiæ Libyæ jubar,

An te, purpureum sanguine, * Cæcili?

Ten', præco, nec inermibus

O vindex numeris inclyte Gratia,

Genethliacum

S. Felici M:

pangebatur

quotannis.

* Ecclesiæ

Græcæ.

S. Venant. For-

tunatus Ep.

11c.

* D. Cypria-

nus.

Prosper? ten' magis, Alcime, &

Longo Sidonium prosequar ordine;

Ac quos mille tulit pios

Vates Christiadum Relligio, mitrâ

Tectos, non edera caput?

Nec, quanquam studiis asperioribus

Horrent ferrea secula,

Phœbeas citharas implacidis tamen

Mavors cornibus obtudit.

Quin & parta sacris purpura vatibus;

Pindo & crevit honos rudi,

Dum prisco excutiant senta sita loca

Felices operum manus,

Quæ templa imperiis astraque temperant.

Quâ caelestia gentibus

Lingua Christicolis jura dedit Pater,

Cantus movit amabiles

Urbanus, liquidus melleus eloqui;

Flavus cum Tiberis novo

Facundæ intumuit nectare copiae.

En quantos sequimur duces!

Illi tot meritis ac titulis graves,

Ipsi quorum apicem colunt

Reges tergeminâ sidereum insulâ,

Dignabantur amoribus

Musas Pontifices. Quid Chisium loquar?

Ut luset *Invenilia*,

Nullo quæ senio ingloria marceant,

Aeternumque recentia

Crescant in viridi carmina laureâ?

Quid te, olim Chisii cliens,

Rector nunc Paderæ, lumen & Imperi,

Nullâ culte mihi satis,

Furstenbergiade, laudis adoreâ?

Vatum Maxime, & aureis

In Vates animis Optime Principum!

Artes Vaticinas alit

Immortalis Honos, quas facer entheo

Afflat Spiritus impetu,

Miris ipse adhibet saepe Deus modis.

Versa magnifica edidit

Oracula in populos, dignaque Numine.

Sic Jobum placet alloqui

Augustis medio è turbine vocibus.

Sic Mosæa iterum ciet

Sancito Isacidis fœdere cantica;

Abruptam toties fidem

Ingratis animis Legifer exprobrat;

Diris corda rebellia,

Vatisque ore tonans, exagitat minis.

Sic Davidica nabilia

Illabens variis pulsa regit sonis.

Jam castis Salomonios

Adspirans numeros mulcet amoribus;

Jam turbas gravibus monet

Effatis dociles, fingit & integra

Terfis pectora moribus;

Mundi spectra oculis purgat inania.

Sic præcentor agit Deus,

Summus fatidici carminis artifex.

SIGNUM LYRÆ CÆLESTIS,

POETICÆ FERDINANDI GLORIÆ SYMBOLUM.

Insignis splendore sonoque.

ODE XXIII.

LYRAM canori vidimus Orphei
Micare Cælo. carmine gloria
Stat parva. Nec mortale Vates

Antè sonans, dociles trahebat
 Avesque silvasque, & placidas feras;
 Aurita blandus sistere flumina,
 Cursusque ventorum morari
 Arte potens, fidicen superbâ.
 Sic astra, Vatum debita Principi,
 Famâ capeffit notus ad æthera
 FERNANDUS. Ærisque ac tubarum
 Vel medio sonitus triumpho
 Non tam remulcet, quàm chelys aurea:
 Dulcesque vibrans ingenii modos,
 Vel astra vincit, concitoque
 Pythagoræ numeros Olympo.
 Sublimis Heros, qui citharæ fides
 Urbesque eadem Vestphalicas manu,
 Suavisque fortisque, & clientes
 Temperat arbitrio Poëtas;
 Non ille furdis negligit auribus
 Lyras minores, aut tenuis leves
 Venæ susurros, dum sonora
 Affiliunt Paderæ fluenta.
 Splendore multo quem genus inclytum;
 Fortuna, Virtus, Gloria cinxerat,
 Donisque Princeps & benigno
 Splendet opum celebratus usu.

IN D. LUCIAM VIRG. ET MART.

ODE XXIV.

NULLA pœnarum facies Puellam,
 Debitæ Sponso fidei tenacem,
 Nulla vis movit, meditata fœdo
 Trudere lustrò.
 Ære, sic stantem, solido columnam
 Virginem credas, animumque corpusque

Insidens castrum Deus ipse tanto
Pondere fixit.

ORATOR DIVINUS
ILLUSTRIS. GUILLEL. LE BOUX

PETROCHOR. EPISC.

ODE XXV.

CLARO per omnes eloquio plagas,
Flammis Olympus fidereis micans,
Rectoris Autorisque Præco
Magnificus decora alta narrat.
Haud surda Tellus, laudis & æmula,
Mythen Tonanti suggerit, aureas
Per templa voluentem remittis
Fulguribus radiisque voces.
Sic ille Pactolo assimilis fluens,
Cui laude partum divitis eloqui
Cognomen, Antistes potenti
Bosphoron arbitrio ciebat.
Nunc ille blandis insinuans modis
Castos amores; nunc scelera increpans,
Ambone regnabat stupentes
In populos, Procerumque cætus,
Illum, & diserti nectaris ubere
Quondam beatos, ac meritis graves
Heroas Orator suburget
Argolicos Latiosque Francus.
Te, Magne Præsul, vasta Lutetia,
Stellansque amœnis Regia liliis,
Augusta dicentem corona, &
Circum inhians bibit aure mundus,
Urbisque & Aulæ scilicet in sinum
Collectus; utcunque aut dubiis opem
In rebus, & Pacis supremas

Borboniâ petit arce leges;
 Aut elegantis splendida concipit
 Exempla vitæ; seu decus Artibus
 Lucemque, & immensi, eruditis
 Explicitam ingeniis, theatri
 Pompam, & superbæ culmina gloriæ
 Ambire visum est: undique gentium
 Libatus accurrit beatæ
 Flos studio rapiente sedis.
 Jam Suada palmis Gallica laureas
 Æquat Gradivi; primaque jam tuum
 Aurora nomen, jam colonis
 Lætâ novis America jactat.
 Tractare partes rite memor sacras,
 Oris coërces vaniloqui levem
 Et frangis exemplo catervam;
 Utile consocias decoro,
 Ac forte dulci. cordis & ingeni
 Miscentur ignes. Gloria, ceu loquax
 Imago, Virtuti resultat:
 Plebis Amor, vigilesque Curæ
 Certant Honori. pulchrior insula
 Relucet astris, pulvere quam sacri
 Spargunt labores. O Vesunna
 Cæsareis memoranda castris!
 Urbs apta Belli, Pacis & artibus;
 Dejecto Averni stant ubi numine
 Æterna FRONTONIS trophæa,
 Semirutæ monimenta turris!
 Felix, amico quam lituo regit;
 Oracla pandit cui Superûm sagax
 Interpres, ardentique creber
 Ore pios acuisse cives!
 Nec tu Vesunnæ tantùm adytis sonas:
 Vocem magistræ grex Petrochorios

LYRICON LIBER VI.

289

Audit per agros, dum salubri,
Pastor, obis tua regna censu.

Quin & Garumnæ respicis accolam;
Partemque curans vel tenuem hanc gregis,
Honore dignaris Poëtam

Aoniis potiore lauris.

Amplæ favorem testis idoneus
Laudis renarrat, plurimus & tui

Mirator, insignique Francas

Nobilis eloquio per urbes.

Docto benignus carmina provocas

Amore: pondusque, & venerem & decus

Addis legendo. splendor ipso

Allinitur pretiumque tactu.

PSALMI PRIMI PARAPHRASIS.

ODE XXVI.

1. **F**ELIX, virorum quisquis obsecæna impij
Vitans gregis contagia,

Nunquam sinistro devius flexu stetit;

Nec se profani dogmatis

Superbus autor sede pestiferâ extulit,

Virtute derisâ procax.

2. At usque sanctam Numinis legem sequi

Gaudet studetque sedulus:

Noctu diuque corde versata intimo

Præcepta factis exprimit.

3. Palma ut fluentis assidens perennibus

1. Beatus vir, qui non abiit in consilio impiorum, & in via peccatorum non stetit, & in cathedra pestilentia (irrisum; Hebr.) non sedit.

2. Sed in lege Domini voluntas ejus: & in lege ejus meditabitur die ac nocte.

3. Et erit tanquam lignum, quod plantatum est secus decursus aquarum, quod fructum suum dabit in tempore suo.

Tom. 2.

T

- Fetu gravescit annuo;
 4. Nec-defluentum vernat æterno comans
 Arbos honore frondium :
 Sic ille veris affluet lætus bonis,
 Statuque florens prospero.
 5. Non hic beatæ sortis, ac placidi tenor
 Ævi scelestos respicit.
 Sed vita fordens, casibusque exercita,
 Vano rotatur impetu :
 Ceu pulvis atro spargitur, ludibrium
 Ventî furentis, turbine.
 6. Ergo coruscâ cùm reos Judex Tonans
 E nube mortales aget;
 Turbæ jacebunt perditæ, noxis graves,
 Cœtu piorum segreges.
 7. Rerum supremus quippe diversam Arbiter
 Observat amborum viam :
 Visuque amico rite directos probat
 Virtutis ad metam gradus.
 Contrâ impiorum sparsus in cœcos labor
 Erransque calles disperit.

4. Et folium ejus non defluet: & omnia quæcunque faciet, prosperabuntur.
 5. Non sic impii, non sic: sed tanquam pulvis, quem projicit ventus à facie terræ.
 6. Ideo non resurgent impii in judicio, neque peccatores in concilio justorum.
 7. Quoniam novit Dominus viam justorum; & iter impiorum peribit.

AD JACOBUM FRESNÆUM,

AN. M. DC. LVI. *Tolosæ concionantem, primorumque
Poëtæ libellorum officiosum lectorem &c.*

ODE XXVII.

ORATOR alti fervidus eloqui
Dum templa sacris motibus *aurea*
Misce Tolosæ; qualis olim
Igneus, igniferisque Vates
Posthac quadrigis raptus in aëra,
Flammata Hebræis verba paventibus
Tonabat, & victor sequaci
Cum populo proceres agebat:
Ecquid molestis versibus obstrepam,
Fresnæ, Suadæ, in publica commoda
Peccans; & imbelli sonantem
Acrè tubam citharâ morabor?
Annon remotos ambitiosius
Ignotus hospes Tectosagas peto?
Rudi peregrinæque Musæ
Palladiâ vacat arce sedes?
Theronus istic, cujus ovantia
In * ære vivunt carmina regio;
Effeta nec tristi senectâ,
Sed niveos imitata cycnos
Camæna, quovis dulcius Orpheo,
Conceptæ * honores Virginis integros,
Nomenque Alexandrique pacem
Fatidico modulatur ore.
Istic disertus splendidus ingeni
(Cui non profanæ gloria laureæ;
Ligustra sed frontem coronant
Virgineo Mariana Vati)

* Equestri Sta-
tua Ludov.
XIII. Paris.

* Ex Libello
supplice Joane
Euseb. Nic-
remberg. tunc
edito.

III. tomos edi-
dit in VII. B.
V. festa myste-
ria ;
Et paraphrasin
c. VIII. Pro-
verb. ac XXIV.
c. Eccli.

Canutus , & ceu dives aquæ fluit
Septena fusus Nilus in ostia ;
Magna[m]que adumbrantis Parentem
Per titulos Sophiæ cucurrit.
Non his superbum Vatribus inferi
Tironem inanis pellicit ambitus :
Quamquam faventes , obviique
Aonio juvenem Senatu
Patres repossunt. Ah cave , laudibus
Fallas benignis credula pectora ;
Levique ne pondus Camœnæ
Magnificus recitator addas.
Excita doctæ carmina prælegis
Blandus coronæ , primitias rudes ;
Silvasque inornatas frementem
Ore sonas alacri per aulam.
Præco sed alti quid gravis eloqui
Ludicra jactas ? æquiùs hîc , tuæ
Auditor interpresque famæ ,
Plaudere amat , tua cura , Vates.

INVICTA ECCLESIAE FORTITUDO.

ODE XXVIII.

ORBE diffusis animosa ramis
Palma , dum sævis premitur tyrannis,
Ducit insurgens validas ab ipso
Pondere vires.
Ridet insultans furias Virago ;
Vim , dolos , ferrum superans & ignes.
Ipsa victricem decorant cruenta
Vulnera formam.
Fluctibusmersa est ? rediit nitenti
Clarius gemmâ. data præda flammis
Arsit ? excocto rediit coruscans

Pulchrior auro.

Ille nec, cœci tenebris Averni
Pressa, caligat; neque, trunca membris,
Deficit; sed per sua damna crescens
Clade triumphat.

Purpuram sanguis generosus addit.
Martyrum cædes, satus est Olympo
Debitæ messis: geminantque rapta
Pignora Prolem.

CALVINIANA TEMPLA;

Contra fas legesque variis locis erecta, ab Christianiss. Rege LUDOVICO XIV. dirui jussa.

ODE XXIX.

DISJECTAS alii terrificâ Borbonidæ manu
Arces turrigeras, Martis opus fulminei, canant.
Confors hîc Pietas Justitiæ, magnificentius
Victrix regnat ovans, laurifero carmine dignior,
Passim fana ruens sacrilegis addita partibus.

Civile increpuit Franciadas sicubi classicum;
Arder læta malis, & placitæ noctæ licentiæ
Tempus, nempe avido corripiens Hæresis impetu;
Turbati imperii res miseras apposuit lucro.
Sic nuper teneri dum solium Principis horrido
Circum armata fremens Seditio turbine concutit;
Jam fræni impatiens, non timidum jam caput Hæresis
Effert, ac vetitis fana locis excitat insolens,
Justi Henriciadæ nil dominis territa legibus.

At non tu patrium, Rex, temere sic decus obteri,
Nannerum & celebri fas pateris dogmate conditum.

Editum Nannerense.

Increvisse, Babel, armifonis ausa laboribus,
Quid casum, querulis torva sonans vocibus, ingravas?
Templis, ah, quoties tu patriis Tartareâ manu

Visa inferre nigras, præbuerant quas Furæ, faces!
 Aris, heu, quoties mysta suis victima concidit,
 Fœdavitque piis immoriens sacra cruoribus!
 Nam quæ probra latens triticeâ sub specie Deus,
 Sæpe abjectus humi, sæpe cani præda tulit datus!
 At nunc imperiis Relligio Borboniis viget:
 Victrix ruderibus stat Pietas altior hosticis.
 Fanorum excidio Rex solium roborat, ac sibi
 Eternæ monumenta ædificat templaque gloriæ.

IN S. EPARCHIUM ABB.

Hymni tres.

ODE XXX.

DIVE, florenti niveum juvena
 Excolis doctas animum per artes,
 Inclytæ stirpis patriæque lumen
 Gentis, EPARCHI.
 Arbiter Juris, placidusque Vindex,
 Legibus frænas populos clientes
 Cenfor exemplis, & Avi superbam
 Corrigis aulam.
 Mox & auratis pia corda vinclis
 Explicas, seclum fugiens profanum;
 Et sacro gaudes tacitam recessu
 Condere vitam.
 Voce nil tangunt querulâ parentes.
 Non opum, non te species honorum,
 Nec venenato malè blanda cepit
 Melle voluptas.
 Veste setosâ, tenuique victu
 Corpus, ac duro teritur labore:
 Fervidam raptat super astra mentem
 Splendida virtus.

ODE XXXI.

O Deo sacri speciosa cordis
 Servitus ; nullo patiens teneri
 Criminis nexu , faciliq̃ue torquens
 Omnia regnò !
 Supplicum votis Dominus benignas
 Applicans aures , simul ad stupenda
 Præbet intentam famulis , potenti
 Numine , dextram.
 Creber hinc signis radias , EPARCHI:
 Hinc aves jussis pecudesque parent ;
 Sentiant vocem domitæ ferarum
 Protinus iræ.

Naufragos ponto rapis æstuoso ;
 Carceres fractis referas catebis :
 Tristibus morbis , stygiisque purgas
 Corpora monst̃ris.
 Nec semel victam spoliasse Mortem
 Te canit sancto celebrans triumpho
 Turba Patronum , meritoque supplex
 Ambit honorẽ.

ODE XXXII.

PUBLICAS laudes , meritisque partam
 Gloriam Virtus fugit ; ac latebras
 Unico quærit studiosa vitam
 Prodere Testi.
 Abditum silvâ Deus & cavernâ
 Respicit , donis cumulans , clientem.
 Fulget ex ipsis pietas EPARCHI
 Clarior umbris.

Jam fugax Famæ Patriæque sistit,
 Quâ jubet claro manifestus ore

CHRISTUS ad lenem placitas Carentam

Figere sedes.

Hic sacri Ductor gregis alta Cæli

Carpit incensis aperitque votis :

Mox adorati potitur relecto

Lumine vultus.

Sit Patri rerum Domino, Patrisque

Compari Nato decus, ac supremo

Flamini, cujus satiat beatas

Gloria Mentem.

EPEUCTICON FABULOSUM

PRO EURYLOCHO POETA EGROTANTE.

ODE XXXIII.

BLANDA quis Aoniæ turbavit gaudia sedis
 Novoque Musis obstrepat casu dolor ?
 Jam mœstæ siluere fides : aut, si qua sacratiss
 Pindi cavernis barbiti vox est super ;
 Flebile congemuit querulâ testudine carmen :
 Dircesque amarus lacrymis fluxit liquor.
 Ah, dulcem Eurylochum subiti inclementia morbi
 Leto clientum distrahit vatium choro.
 Incidit in venas trepidæ vis ignea febris :
 Malus per artus sævit effetos calor.
 Huc ades, emeritoque malum depelle Poëtæ,
 Pæan, decorum laureâ incinctus caput.
 Accelera Pæan, notasque Salutifer herbas
 Affer benignâ sospes actutum manu.
 Et quicumque juvat cantusque, saporque laborem,
 Panacea odoro quidquid & succo potest ;
 Funde age, Phœbe, tui si qua est tibi cura Poëtæ.
 Feres medelæ præmium, Soteria,

CHRISTO SOTERI OPT. MAX.

PRO SANITATE SIBI RESTITUTA

Sub festum Ascensionis diem an. M. DC. LIV.

Ascendens in altum...dedit dona hominibus Ephes.4.

ODE XXXIV.

PRocul Machaon, & Podalirius,
 Deusque serpens, Romam Epidauriâ
 Advectus orâ, dum Quiritum
 Exitio furit atra pestis.

Artis repertor Pæoniæ vale,
 Fallax Apollo, Pergamei senis
 Coique, succis impotentem,
 Docta cohors premat officinam.

Tu Sospitator, pallida tristium
 Fugare morborum agmina tu potens
 Blandusque, JESU: tu caduca
 Corpora, depositasque mentes

Sanare præsens, quas proprio foves
 Cruore, Numen. tu medicâ manu,
 Quos tangis, elidis dolores:

Et validis operosa verbis
 Lingua, & sacrarum fimbria vestium,
 Mortalis hostes corporis exigunt,

O. si triumphali coruscus
 Dum repetis tua regna pompâ;
 Per te soluto corpore liberam,
 Tuoque devinctam obsequio simul
 Educeres tecum sub astra

Hanc animam, patrioque Cælo
 Civem locares! at gravioribus
 Onusta culpis hæsit iners solo:

Tu victor, ascendens Olympo,
 Læta bonus geminare dona.
 Sic ille in auras dum fugit ignei
 Auriga currûs, invalidum sequi
 Vatem relinquens, axe missum
 Ferre dedit rutilante pignus.

Elias Elifæo.

SOMNUS AMICE SOLLICITUS.

ODE XXXV.

QU I D pavidum fictâ crudelis imagine torques,
 Eheu, doloris artifex veri sopor?
 Crudelis Morpheu! crudelis tu quoque, Damon,
 Sic mentem amicam somnio exercens gravi!
 Horrueram ignotos casus, faciemque pericli,
 Velut recenti trepidus auditor malo;
 Cùm fossæ exceptum insidiis, undaque referres
 Stagnante mersum pænè Lethæâ caput.
 Mortalis cœca ô nimium discrimina vitæ!
 Terrisne, an undis brevior ad lethum via?
 Quid caveas, nunquam cautum satis. Omnia morti
 Vacant: ubique nexiles fati plagæ.
 Tu tamen immanem potuisti abscondere casum!
 Quin variæ amicum fortis in partem vocas?
 Quas ego reddiderim Superis, te sospite, grates!
 Quàm plectro eburnam concitem blando chelyn!
 Talia volvebam, narras dum ferus amicis,
 Colloquia tristi læta corrumpens sono.
 At simul abscessi, primoque natantia somno
 Mitis jacenti lumina insedit quies;
 Turbida sollicitæ subeunt insomnia menti,
 Durosque casus hausta simulacra expriment.
 Quadrupedisque equitisque super Dæmonis imago
 Altum natatu gurgitem dubio secat.
 Cervicem attollit fossæ obluçtatus iniquæ,

Vanoque creber impetū assultans equus:
 Qualem Isalæ, credo, fossam duxisse Batavos
 Fertur per agros bellicus Drusi labor.
 Tunc ego Najadas votis, votisque Napæas
 Vocare supplex pectore attonito urgeor.
 Scilicet auxilio vos, Numina casta, vocarem,
 Homines perosa monstra Tartarei lacūs;
 Ater inextincto Vulcanus ubi æstuat igni,
 Mortemque vivo sulfure æternam coquit.
 Te verò, cui sacra dies præluxerat, unam,
 Stella advocavi, turbido imperitans freto.
 O MARIA, ô nullam ducens ab origine labem!
 Tibi vota medius tacita concepit sopor.
 Nec nulla est animo concepti gratia voti.
 Immotus hæret sessor innanti fero;
 Ac tandem innixus terrâ, quæ fortè reperta
 (Procurrit usus tenuis in magnos humus)
 Evadit; madidaque gravatus veste, sodalis
 Dextrâ prehensâ, victor in siccum exilit.
 Vix demum sonipes, etiam sessore levatus,
 Emergit altâ naufragus voragine.
 Sic tua percellunt vigilantem incommoda, Damon,
 Tuo laboret anxia ut casu quies.
 Quod superest; tanquam servati in littore nautæ,
 Persolve mecum vota Soreri Deo.
 Et Dominam venerare, maris terræque potentem.
 Certâ clientes sospitat præsens ope.

CRATES CHRISTIANUS.

Laus voluntariæ Paupertatis.

ODE XXXVI.

DA MNOS A inertis lucra pecuniæ,
 Plebem fatigate; & Proceres trahat
 Aurum superbos, heu, bonarum

Mentium onus, pretiosa labes.
 Congesto acervo plenæ opulentiam
 Stupescat arcæ, qui vacuus sui,
 Inopsque virtutis, beatas
 Nescit opes, propriamque gazam.
 Contenta paucis, æqua necessitas.
 Ipsâ cupido fervida copiâ
 Grassatur. hinc lites & arma,
 Hinc scelerum genus omne fluxit.
 Aude, & caducas perdere opes ama,
 Ne mox inhærentem exitio trahant.
 Da splendido, ne parce, quæstu,
 Rite datas habiture semper,
 Ultro & relictas, fœnore quas Deus
 Reddat beato. Pauperie tibi
 Mercandus Æther, omniumque
 Una Salus redimenda damno.
 Qui multa quærit, pluribus indiget.
 Nihil petenti nil animo deest.
 O sacra Paupertas, Eois
 Ditior, ô, meliorque gazis!
 Cælo minantes, quàm gravior domos
 Ruina & arces præcipitat solo!
 Infana ventorum procellas
 Culmina sic temere laceffant?
 Impune fastu non datur improbo
 Cristas in altum tollere. fulminis
 Surgunt in occursum. & laborant
 Mole suâ fragiles, & annis
 Insigne debent ludibrium æmulæ
 Turres Olympo. Quid rapidi impetus
 Mavortis? ut flammâ repostas
 Vastat opes, avidoque ferro!
 Prædantum avarus cui furor hostium
 Pepercit? aut quid callida fraus, rapax

LYRICON LIBER VI.

301

Vis liquit intactum? recessus

Insidiæ penetrant domorum.

Et ipse custos appositus gravi

Timendus arcæ. vitam etiam petet

Latrone mutatus satelles;

In dominum sua tela vertet.

Quæ criminosis scilicet artibus

Parata, rursus criminibus perit

Fortuna: protruduntque iniquos

Usque novi dominos tyranni.

Pœnis sed instans ultor agit Deus,

Transfertque gazas, falsa malis bona

Permittit; indulgetque lævus

Pulchra vagæ spolia illa sortis.

Nam quid lapillis oblitum, & aureo

Fuco lacunar? picta quid atria,

Signisque fumosis avorum

Cincta juvant, populique fluctu

Valvæ frementes, ac penetralibus

Turbans sub ipsis pompa clientium?

Ah, quas palatinis opertas

Blanditiis meditata fraudes!

Proh sumptuosæ splendida servitus

Fortunæ, & amplas cura terens opes,

Noctemque confundens diei,

Et placidæ impatiens quietis!

Me cara sancto Pauperies sinu

Amplexa, nusquam sollicitum dabit,

Cræso invidendum, vel tyrannis

Afflyriis opulentiorem.

Soluta curis pectora, & intimas

Puri medullas ubere gaudii

Perfundet. huic sentes amœno

Flore nitent, lacrymæq; gemmant;

Mihi coruscâ pervigilat faces

Stellatus æther. signa adamantinis

Pars fixa, pars castris movenda,

Et rutilis globus ales armis,

Illustre tectum, præsidium & decus

Securo adornant. Pavus, an, interest;

Non elaborato retundat

Esuriem cichorea victu?

Cibo quid aurum? quid latici virens

Affert smaragdus? Lumina mulceat

Pascaturque convivæ; sed acri

Corda fame malefana tentat.

Metus, cupido, viscera Divitis

Anhela carpunt; luxus opum vorax,

Prædæque succrescens egestas,

Visceribus populorum adefis.

Quantis voluptas bruta doloribus

Egrefcit! At me non Mareotico

Infusa deprendant venena,

Gemma capax ubi fata miscet.

Sarrano amictu splendida nec premant

Venena. durum quid rudibus vetat

Lanis, neque infectis ahenis

Sidonio prohibere frigus?

Tabes ostreorum Dives ovans micet,

Latèque amictus regifico trahat

Cultu laborantes. & urit

Delicias onerosa bombyx.

Velo pudoris simplice, principes

Mortalis ævi fat tunicis Deus

E pelle textit. Quantum inanis

Addidit ambitio malorum!

Ergo profanas despiciens opes,

Spes & superbas, atque cupidines

Mens calcat. incassum uncinatis

Fluxa tenax premit ille palmis.

Terris avarus quos amor illigat,
Lethum refixos urit acerbius.

Amiſſa reſpectant Avernas

Nudæ animæ miſerum per umbras.

Quid corpus, olim grande negotium?

Abſiſtit anguis? fert violas humus?

Aut molliùs tecti quieſcunt

Marmoreo cineres ſepulcro?

Paterno Abrami Lazarus è ſinu

Ditem ſepultum carcere flammeo

Iriſit, ah, guttam precantem,

Quâ Strygios levet oris æſtus.

Et, pauper ultro, ſummus Olympiæ

Regnator aulæ, non ſtabulum puer

Refugit, & nudus probroſâ

Immoriens trabe vir pendit.

Sic mira factis anteit arduus

Oracla, ſancitque; ac proprio dicat,

Uſu, beatam pignerato,

Pauperiem Deus ipſe, regno.

Flaventem avarus quærere pertinax

Glebam laboret. ſidera concipit,

Spe lata, deſponſumque Olympum

Pauperies. Sequor, ô, vocantem

Divam expeditus. *Poſſidet omnia,*

Quæ ſpernit, ultro nil retinentium

Magiſtra, quam votis frequentat

Relligio: trabeisque Reges,

Palmis ſuperbos expoliat Duces;

Datoſque vinclis colla volentia

Deducit, æterni triumphi

Auſpice ſigniferoque Chriſto.

FONS DRIBURGENSIS
IN AGRO PADERANO
AQUARUM SALUBRITATE INSIGNIS,
A CELSISSIMO PRINCIPE
FERDINANDO
EPISC. PADERB. COADJUT. MONASTER.
VARIE SPLENDIDEQUE ORNATUS.
ODE XXXVII.

MEDICÆ quisquis amœnum caput undæ
Viridanti spatius petis orâ;
Age, gratus Ducis effert generosi Monumentum.
Aganippes simul idem Paderæque
Sacra fonti celebratus dare jura,
Mihi PRINCEPS operosâ geminavit decus arte.
Vaga ferri per opertas aqua venas,
In apricum salienti pede pratum,
Viden', ut purpurat altus placito gurgès acore?
Quod inemptæ fluit uber panacæ,
Canit unâ popularis, canit hospes.
Spada nostro medicatum timet æquare fluentum.
Laticem hinc æger amicum sibi Vates
Heliconis bibit undâ potiozem:
Resonat sospes amicâ numerosam fide laudem.
Tua longè præit omni lyra Pindo:
Neque curas tibi mutæ labor artis;
Neque, PRINCEPS, opulentæ satiant munera dextræ.
Humus educta nitescit; Bibulosque
Nova ducit per opacum via xystum.
Locus ornatus, & ægris aditu structa voluptas.
Paderzi

Fons ipse pel-
lucidus. at mo-
dico limo ex
ferri venis.
quas perfluit
& sapit, labrû
orâque prati
rube facit.

Joan. Rorg.
Torelius. Ni-
col. Heinsius,
Ant. Verjusius.

Paderæi * quibus auctus lepor agri,
Titulos inter, & altè mihi surgat;
Tremulum * si ferat arvum, Pario marmore
cippus.

Micet auro quoque carmen, quod amoris
Speciosum tua, PRINCEPS, mihi testem
Inararit sacra docto manus æterna metallo.

Atenim Saxonici rudera castri
Reparans, vertis in usus meliores.
Opus immite Gradivi, placidæ servit Hygiæ.

Tua me juncta Camœnæ rapit omnes
Celebrem Fama per oras: neque * certat
Italæ Blandusiæ, vel Siculæ fons Arethusæ.

Ego quid laudis & artis Monumento
Referam, nil satis altum modulatus?
Strepitanti levis undâ tibi Fons perennè plaudam.

Pia sub jura fluentem suus urget
Honor, & blandus amoris ciet * ardor.
Tibi jurata, propaget dominam lympa salutem.

Nova me dona magistro didicere,
Meditantur nemorales philomelæ,
Nemus * & pervolitantum simul auræ Zephy-
rorum.

Tulit atas vetus almo sacra fonti.
Mea cuicunque levamen parit unda;
Meritas, ô, recreati cape, FERNANDE, coronas.

Opifer tu mala sanas miserorum:
Populo largus apertâ fluis Aulâ;
Liquidum melle, vel auro pretiosi vice fontis.

* Ferdinandus tractum Paderb. crebris insignit monumentis marmoreis cum aurea carminum inscriptione.

* Solum fonti proximum, substitutionis impatiens.

Driburgum, olim Iburgum, idemque munimentum Saxorum, pro quo ædes Hydropotis contimodas Princeps ad radices finitimi collis designavit

* V. lib. I. Heroic.

* Magno fons, tametsi frigidus, imperu ebullit.

* Fonti vicinum.

Coronabantur ab antiquis fontes.

TORQUATI TASSI
POETARUM ITALORUM PRINCIPIS
HIEROSOLYMA LIBERATA,
ILIADOS ÆNEIDOSQUE IMITATIO.

ODE XXXVIII.

THUSCIS imago clara sonans jugis
 Silvique, cani quàm bene principes
 Ævi Poëtas reddit, una
 Bisgeminæ assimilis Camœnæ!
 Vox illa Tassî. quidquid & Ilias
 Insigne, quidquid cultior exhibet
 Æneis, ingentes in usus
 Transtulit, ingenuaque fraude
 Graias remiscet cum Latiis opes,
 Suisque celat. Non temere assuit
 Pannos nitentes; at decorum
 Arte novâ pretioque textit
 Opus Minervæ: ceu Colophonium
 Secutus olim Virgilius Ducem,
 Haud erubescendis ovabat,
 Invidiâ strepitante, furtis.
 Quàm blandus aures, dum Solymæ canit
 Abrupta collo barbara vincula,
 Devinxit! Heroum superbæ
 Nominibus sonuere chartæ,
 Non hîc Atridæ, non Pylius senex,
 Non deest Achilles, non Telamonius
 Ajax, vel Interpres Deorum;
 Non Priamus, sociique contrâ.
 Dux Christiani maximus agminis,
 Bellique rector, nempe Agamemnona

LYRICON LIBER VI.

307

Bullonius gessit, sed acri
Consilio meliorque dextrâ.

Neque ira præceps, aut amor impotens
Versat tyrannum. fulmineæ manûs

Libidine * incorrupta virtus:

Sæpe Arabum cataphracta, ferri
Vibrantis ictu, corpora diffidit.

Pius sub armis, & *MARIÆ* cliens,
CHRISTIQUE miles, crebrum amico

Auxilium volucresque Cælo
Venisse turmas vidit, & igneis
Ardere telis. ocyûs inferæ

Cessere pestes. *Baldunus*

Fratri aderat, Menelaus alter.
Francusque Nestor, Tectosagum Comes;
Pelidæ & instar, fictus ad ardua

Stat *Reginaldus*: par furentem

Æstus agit juvenilis iræ.
Castris remotum fœdior abstulit
Amoris æstus, segnis & immemor

Circæo in *Armida* quiescit

Hospitio, vitreisque tectis:
Fatale robur dum revocantibus
Belli Magistris, excutiat gravem

Tandem veternum; redditusque

Ipse sibi, medios feratur
Victor per hostes, non sine fœnore
Dilata reddens prælia Barbaris.

Virtute *Tancredus* secundâ

Ausonius numeretur Ajax.
Sacris ab antris prodiit, & sagax
Ventura *Petrus* nunciat, augurem

Calchanta præstans. *Agareni*,

Ecce Phryges, peritura turba.
Lacæna Achivos enumerat Duces,

* Hanc ipse
sui roboris
causam ali-
quando miran-
tibus edidit.

Hermia Gallos. Inde tuam, Maro,

Clorinda bellatrix *Camillam*

Æquat Amazoniis in armis.

Hæc *Godefridum* fauciat alitis

Ferro sagittæ; *Dardaniden* prius

Juturna: sanavitque læsos

Ambrosio panacea succo.

Alecto ab imâ luctificam *Styge*

Juno evocavit: suscitât horridam

Innoxia *Torquatus* arte

Tartareo *Furiam* barathro.

Deserta motu quàm vario exprimit

Armida *Elisam*! *Perfurit* hostica

Irrumpere audax septa *Turnus*?

Tantum & atrox *Solymanus* audet.

Quid, cùm obvolutus nube supervenit

Regi *Sionis*? *Trojugenæ* simul

Amictus occulti recurrat,

Matre cavam glomerante nubem.

Imaginosæ pompa superbiæ,

Spirante in auro quæ magici fores

Cælat palati, ficta veris

Texere amans speciosa rerum;

Annon *Latinæ* limina regiæ

Exscripsit, arcis *Chalcidicæ* decus,

Clarumque *Vulcani* laborem,

Actiacæ simulacra pugnae?

Spumantis argenti è solido tument

Fluctus metallo; sanguine decolor

Pars horret undarum: sequaci

Morte fugax *Cleopatra* pallet.

Jam *Reginaldus* sidereo flagrat

Spectatque laudes in clypeo suas;

Famamque *Majorum*, ac nepotum

Facta humero generosa tollit.

Homerus istic plurimus emicat,
Vatisque tanti non minor æmulus.

Achillis Æneæque diâ

Scuta manu fabricata pingunt.

Hic & futuri præcia, pervio

Crystallo Eoum somnia sub jubar

Emissa, pulchris Godefridum

Consiliis animisque firmant.

Serenam *Hugonis* sic placidus sopor

Ostendit umbram magnanimo Duci.

Prælusit Anchises Sicanas

Elysio veniens ad oras;

Turbatum imago quæ monitis regit

Solata natum. Scilicet & frequens

Reclusit antiquis eburnam

Somnus, agens sua visa, portam.

Nec, quæ propinqui nuncia funeris,

Nocturna inanes monstra cient minas.

Exclusa jam muris Clorinda

Hectoreo jacet icta fato,

Mixtosque casus Euryali refert.

Quid plura? Hetruscis talia Cantibus;

Ut annulis gemmæ coruscant,

Ut liquido vaga signa cælo.

Libata cursim hæc: cetera persequi,

Quidquid Latinis fontibus hauserit,

Quidquid Pelasgis, non iniqua

Hora ferat, neque silva rerum.

Duella, cædes, historias, dolos

Omitto, & artes nobilis ingenti:

Quæ cuncta distinguit colore

Aucta novo, variatque scenam.

Tassus priorum non pede dispari

Vestigia implet: subsequitur chorus

Recens Poëtarum, & magistros

Castaliâ legit arte gressus.

D. BERNARDI ELOGIUM.

ODE XXXIX.

NOTOS ad citharæ, Dive, redi modos,
 JESU blanditiis & MARIÆ sacer,
 Claræ-gloriæ-vallis,
 Franci gloria nominis!
 Romanæ columen Sedis, & impii
 Erroris domitor, Christiadûm arbiter;
 Sanctæ pacis oliva, &
 Sacri buccina classici!
 Augusto medius concilio Patres
 Certâ voce regis, Pontificum Parens;
 Per delubra, per aûlas
 Regnum plurimus explicas;
 Europæ imperitans, ac monitis pios
 Dum flectis Proceres, fulmineo Duces
 Sternens ore superbos,
 Sermonum atque operum potens;
 Dignus, cui nivei copia nectaris,
 Magnæ virgineo Matris ab ubere
 Irrorata, beatis
 Linguam sensibus imbuat!
 Ex quo per populos suavior eloquî
 Fluxit diluvies. Lactis adhuc memor
 Vivæ vocis imago,
 Scriptis ducta perennibus;
 Cælestis riguos ambrosiæ sapit
 Succos, & liquidis ebria gaudiis
 Pascit corda legentum,
 Hyblæo melior favo.
 Almæ imbuta nitens Virginis ubere;
 Christi fonte simul purpureo madens.

LYRICON LIBER VE

51

Crebro vulneris haustu

Bernardi pietas calet.

Divini capitis ferta rigentia,

Gestatamque manu Regis arundinem,

Hastam, flagra, columnam,

Clavosque accumulat Cruci.

Numen sanguinei flebile Golgothæ

Amplexus recolit pectore faucio,

Congestosque dolores,

Pulchri semina gaudii.

Myrrham quam Domini fascis amarior

Collectam cupido ferre dedit sinu,

Dulcis sarcina, palmis

Evincitur amantibus.

Sic & corda mihi conscia myrrheo

Sponsus fasciculo, non grave onus, premat;

Telorumque salubris

Configat penitus rigor!

Accersat geminos huc latices Amor:

Marris lacti inbians, candidus & tener,

Natoque acer inhærens

Flammas sanguine combibat!

SANCTA SINDON CADOINENSIS.

ODÆ VII.

Quarum petita sunt argumenta partim ex Bedæ l. de Locis Sanctis c. 5. partim ex instrumentis vetustissimis Asceterii Cisterciensium Cadoïnensis. Atque hæc rite omnia recognita publicis actis sanxit Illustriss. Ioannes de Lingendes, tunc Sarlatensis Episcopus (quæ in diœcesi Cadoïnum est oppidum) splendidâque illâ suâ facundiâ Sindonem augustissimam celebravit. Cum autem plura Christi fuisse lintea sepulcralia constet ex Ioan. Evangelio; & corpore jam excitato sudarium quod fuerat super caput ejus, non cum linteaminibus positum, sed separatim involutum in unum locum: hoc ego, Sudarium capitis, ut vocat Beda, funebribus unguentis divinoque sanguine passim oblitum, ad venerationem propono, Religionis antiquissimum certissimumque monumentum, Gallia amplissimum omnique predicatione dignissimum ornamentum. Quod quidem & Maximorum XIV. Pontificum, & Regum, non Francorum modò, sed Anglorum etiam Aragoniorumque, diplomatis largitionibusque sacris jam olim piè magnificeque cultum. Cadoïnenses tabula ex ingenti superiorum temporum naufragio reliqua, insigniaque donaria clarissimè comprobant.

I.

AD SANCTAM SINDONEM.

Operis Consecratio.

ODE XL.

AUGUSTA SINDON, funebre Numinis
Velumque pignusque, & Syrii memor
Unguenti, & admixti cruoris
Nobilibus maculosa guttis!

Cœleste munus, quo pia gloriam

Æquat Sionis Francia; quâ potens

Felixque prædâ, transmarini

Servat adhuc pretia ampla belli!

O, quam infulati cum populo Patres

Votis frequentant; aurea Principes

Cui dona, regalesque pompas

Magnifico statuere cultu;

Exile sertum, laureolam sacræ

Nexam cupressi frondibus, ac, tuas

Juratus in laudes Poëta,

Cor pariter citharamque pono.

Litat, neque aris sordet inops, Amor

Se dives uno. turicremos focos,

Greges opimos victimarum

Præstat, Achæmeniamque gazam.

Et ipse quovis ore cani Tonans

Sinitque mandatque; haud tenues minùs

Per arva dignatus cicadas,

Quàm niveos super astra cynos.

II.

SANCTA SINDON

*In Saracenorum delapsa manus, flammisque in-
jecta, miraculo se recipit ad Christianos.*

ODE XLI.

HEU, qui te misero Christicolūm gregi
Adversū rapuit turbinis impetus?

Heu, quā barbaricam sorte tyrannidem,
Sindon regia, sustines?

Ah, lenti nimium, surgite vindices

Probris, Christiadae! cur Arabum canum?

Velato celebris Numine carbasus,

Fœdis in stabulis jacet?

Vestris, Christigenæ, digna sacrariis.

Sindon Golgotheo conscia funeri;

Vestras illa manus invocat, exteris

Migratura penatibus.

Necdum ex jure pias conferitis manus?

Causæ, judice vel Majuvia*, locus.

Hostis difficili subdita calculo

Vincet causa superbius.

At non ambigæ jus ego Sindonis

(Rex inquit) dirimam. prome domesticum;

Musulmane, sacrum: roboris ardua

Flammam concipiat strues.

Interpres dubii juris, & arbiter

JESUS litis erit. Christiadūm potens;

Custodes placitos delige, & ignibus

Judex testibus approba.

Hæc altè Solymo Rex Arabum foro

Effatus, rapidis injicit ignibus

* Rege Sara-
cenorum, Hie-
rosolymis tunc
imperante.

Christi funeream Sindona, barbaris

Elatam penetralibus.

Vasti flamma rogi, comprime, comprime

Undantem rutilis vim temere globis:

Byssum, ô, parce furens inviolabilem.

Sævo corripere impetu.

Mirum! sacrilegas nil metuit faces;

Insultatque pyræ byssus, & igneos

Sublimis volitans inter ovat globos;

Auro clarior emicat.

Sic quondam bifidi montis in editâ

Flagrans arce rubus, Numen habentium

Vocalis foliorum, innocuæ sacris

Flammæ fulsit honoribus.

At postquam supero lussit in aëre,

Et suspensa diu pectora civium

Incerto tenuit carbassis exitu,

Orbes orbibus implicans:

Paulatim liquido tramite defluit;

Ac, ducente Deo, certa pias adit

Partes Christiadûm, quò trepidis vocant

Votis fervida pectora.

Cæli judicio, munere Numinis

Victores, Domino plaudite; dum stupor

Saracena premit, dum pudor agmina;

Christo plaudite vindici.

Tanti nempe fuit barbara Sindonem

Captivam redigi sub penetralia;

Quò, jam splendidiùs libera, sic suos

Rursus Christicolas vetat.

III.

SANCTA SINDON

*Hierosolymis primum transfertur Antiochiam; mox
è Syria navigat in Galliam.*

ODE XLII

AUDAX in Superos, novi
Titanis Babylon prælia fuscitat.
Victis, en, Solymis ferox
Insultat Caliphas; ah, sacra pignora
Et Christi memores notas
Ferro ignique petens. O scelus! ô furor!
At tu, si qua via est, manus,
Sindon Sancta, manus effuge barbaras.
Turbatæ propera sinu
Elabi Solymæ. tutius, hospitas
Sedes & latebras dabunt
Inscripta Antiochi nomine mœnia.
Mox Europâ Asiam, Syros
Muta Francigenis. Lilia jam Cruces
Inter purpureas micant;
Lectæ Christiadum flos ruit agmine.
Toto velivolis mari
Vindex accelerat Gallia classibus:
An. 1098. Jam victricibus insidet
Signis turrigeras Antiochi domos.
Prædæ pars melior venis,
Sindon, barbaricas exuperans opes.
Magni Romulidum Patris
Legatus spoliū nobile vindicat.
At mors invida Præsuli,
Francis exuvias illa tamen sacras

Ademarus,
Anicii Velau-
norum Episco-
pus, in exer-
citu Christia-
no Legatus
Apostolicus,

Intervertere sedibus,
 Sancti nec valuit martis adoream.
 Legati pius affecla,
 Tectum qui niveâ frugis imagine &
 Subducti specie meri
 Numen sacrificis vocibus immolat;
 Heres pignoris inclyti,
 Vastatis Syriæ finibus avolat.
 O tu principe navium
 Argô nobilior, quâ tacitus sacri
 Vector longa fecat freta;
 I, puppis, fragili depositam alveo
 Portans Sindona Galliæ;
 Non lanam rutili velleris auream,
 Sed byssum pretiosius
 Divini maculis sanguinis oblitam.
 Irati fremitus maris,
 Ventorumque truces, ecce, cadunt minæ.
 Tutam per vada naufraga
 Syrtesque & scopulos, nec violabilem,
 Sanctæ gratia sarcinæ
 Præstabit, Superis rite faventibus.
 Cælo sidera candido
 Arrident, placido marmora gurgite.
 Auras ætherii cient
 Pennis Aligeri lenè sonantibus.
 Sic felix cupidas ratis
 Prætervecta plagas, Massiliam tenet.
 Belli ingens pretium sacri,
 Sindon sacra piæ reddita Franciæ,

IV.

SANCTA SINDON

Iterum victrix ignium, Cadoinum deportatur.

ODE XLIII.

ERGŌ iterum in flammās per tot maris æquora;
 Sindon,
 Venisti, Eo transfuga infelix solo?
 Mitius experta es terris mare. Tethyos undis
 Illæsa, terrarum impio exciperis rogo!
 Scilicet ut patriæ intulerat Petrochorius oræ
 Cæleste Flamen pignus, arcanas opes;
 Ædis & obscuram secreta in sede locarat,
 Defosso avarus qualè thesauro incubat:
 Augustum furiis monimentum invadit, & atros
 Tartareus ignes gutture eructat Draco.
 Corripuere aras flammæ; jam culmina victor
 Populatur æstus, lacerat ambefas trabes.
 Tabescunt muri, & vasto collapsa fragore
 Jam tecta fœdam clade tellurem obruunt.
 Turbidus it fumo glomeratus ad æthera vortex:
 Lambunt favillæ sidera, & nubes flagrant.
 Qualis ubi Enceladi mentito inclusa sepulcro
 Trinacriam vis dira succussit plagam;
 Sulfureos Ætnæa vomunt spiracula nimbos;
 Aër procellâ squallet horrificâ minax.
 Volvitur & piceus commisto pumice torrens;
 Abrupta montis viscera in campos rotat.
 Sic incensâ volant templi fragmenta per auras;
 Solumque fervens stravit incoctum cinis.
 Quàm bene Orontæâ sedisses urbe, Sionis
 Frustra superstes barbaro Sindon rogo!

LYRICON LIBER VI. 319

O breve Gallorum decus, & male tuta voluptas!
 Sancta, heu, profanos byssus in cineres abit.
 Sed quid ego hoc autem divinam Sindona luctu,
 Vanâque præceps naniâ exustam queror?
 Illa quidem rapido flammæ involvitur æstu:
 Sedenim æstuantès byssus exaromat rogos.
 Victricem Solyme, victricem Gallia vidit.
 Clarant verendam, non cremant byssum rogi.
 Huc pia Cisterci deducta colonia regnis,
 Recens propinqui turma Cadoïni hospita,
 Currite, iô, moniti mira ad spectacula Mystæ;
 Auferte sacræ byssinum sacrum manus.
 At tu, deprensam absumptæ penetralibus ædis,
 Cæleste cui velamen absenti perit;
 Heus, medio intactam busto, elatamque ruinâ,
 Piis reposcis Carbasum raptoribus!
 Quin Cadoïnenſi potiùs succede sacello,
 Tuam secutus, fide Custos, Sindona.
 Hæc decus æternum surgentibus affèret aris
 Geminò superstes Asiæ & Europes rogo.

V.

SANCTA SINDON

D. LUDOVICI, *sacram expeditionem ad-*
ornantis, regia peregrinatione piè religio-
seque culta.

ODE XLIV.

JACTA martis alea
 Utcunque jussit Iliæ nepotes
 Belluata mœnibus
 Efferre signa; seu dolis & armis
 Sævus urbis æmulæ
 Furor laceſſat Punicis ab oris;

Sive perfidi nefas
 Dirum Jugurthæ vindices repofcat,
 Romulæque gloriæ
 Cruore labes eluenda Mauro:
 Antè supplices Jovi
 Manus tetendit Conful, ut cruentas
 Fida per vias comes
 Victoria iret, ac Ducem Triumphus
 Ora sub Quiritium
 Albis referret inclytum quadrigis.
 Grande Franciæ decus,
 Aulæque clarum, Ludovici, fidus;
 Transmarina pectore
 Dum bella verfas, & Crucis trophæa;
 Tesseræque jam facri
 Signatus Heros militis corufcas:
 Aulicis cohortibus
 Stipatus, ingens huc iter capeffis,
 Asperæque fic viæ
 Præludis; ac te, denfa quæ minantur,
 In pericla providus
 Cultuque obarmas fortis auspicato.
 Quæ fupina Cælitum
 Opem invocavit, rite dextra ferrum
 Splendidèque moverit,
 Inauguravit quàm Deus triumphis.
 Sindonis facratio
 I, perge, facrum vindica Sepulcrum;
 At graves juvat mōras
 Tantique nodos expedire belli.
 Libero prius freto
 Commertium armis explica. Sionis
 Inde vincla conteras;
 Terramque partâ nobilem falute
 Sospitator afferas,

LYRICON LIBER VI.

321

Francis & olim splendidam trophæis,
Sive claustra barbari

Tentare Nili, seu placet Tuneti
Admovere costias:

Pelusiamque Punicamque certus
Concutit tremor plagam;
Utrinque palmæ laureæque surgunt,
Pulchra gloriæ seges,

Victoris ense demetenda Regis.
Crux ubique confita,

Tuoque crescant lætiora cultu,
Ludo oïcæ, lilia,
Stellata cæli dona; Barbarorum

Irrigata sanguine,
Istis & aucta moribus nitorem,
Gratiora floreat,

Terrisque fundant ultimis odorem.
Sin lues ovariantibus
Cœptis resistet, atteretque Francos;

Clade major emica,
Tuique, Princeps, Tartarique victor.

VI.

SANCTÆ SINDONIS.

Cultus per nefariam Hæreseos grassationem inter-
ruptus, ac postliminio revocatus.

ODE XLV.

HOSTIS sacrorum, triste portenti genus,
Famosa terrarum lues;
Quam casta Pietas fugit, & patrum fides,
Cæloque amica Veritas!

Non tu Sabæo templa succendens foco,

Tom. 2.

X

Gratis vaporas nubibus ;
 Sed , heu , fuorum cæde fumantes libet
 Aras videre Flaminum.
 Nec solam aduncâ diripis gazam manu,
 Votiva templis munera :
 Nec signa tantùm, fanaq; in cinerem vocas;
 Sed ipsa Olympo debita ,
 Raptans cremansque, funeri superstitem
 Integra Divùm corpora.
 Quin liba cælo missa , Cælestum dapem
 (Nefas !) molossis objicis.
 Cæco furore Numen , æternam hostiam ,
 Mundi piamen , proteris.
 Heu ferro & atrâ Galliam evastans face,
 Malo triumphas publico.
 Quis impia inter arma Cadoïno status ,
 Almæve cultus Sindoni ?
 Vix , nuda & arcam byssus exuta auream,
 Ungues fefellit hosticos.
 Arx illa patriæ , quæ triumphales dedit
 Gallis Tribunos militum ,
 Fugienti asylum Sindoni fidum patet
 Turrita Bironi domus.
 Hic fama longum jacuit , & sanctæ prior
 Sepulta byssi gloria.
 At tu , profano quas premis sedes jugo ,
 Hostis sacrorum , desere.
 Cede , & barathri mergere in Stygii lacum ,
 Quæ digna monstribus patria.
 Purgata repetat adyta jam Sindon suis
 Regnansque ovanisque sedibus.
 Clarum , ecce, nomen revocat , & miraculis
 Priscum reflorescit decus.
 Ut densiori contumax umbrâ vapor
 Cum solis oppressit jubar ;

Pallet stupetque luce dilutâ gravis,
 Terramque contristat dies.
 At si nigrantem fortè jaculatus globum
 Discussit ictu fervido,
 Cæloque jam sol liberum & roseo caput
 Igni comatum sustulit;
 Nimbo evoluta, gratiùs ridet dies
 Vibrantis auri lumine.

VII.

SANCTÆ SINDONIS

Encomia.

ODE XLVI.

RE GUM superbo murice clarior
 Astrisque Sindon, quam pius ultimo
 Pollinctor * impendens honori
 Numinis exanimi sacravit!
 Te dives, audens, nobilis, impiger
 Quæsitv empor. splendidus huic comes
 Ipse * ille, qui primùm silentes
 Christum adiit timidus per umbras.
 At nunc relectis ultro animis cliens
 Uterque Christi prodit; & impio
 Livore, communique gentis
 Mersum odio veneratur heros.
 Mixtos odores, tristia munera
 Largè pararunt; corpus & arbore
 Ungunt ab infaustâ refixum,
 Nil Solymos veriti furores.
 O Mater, ô pars funeris altera!
 Letho rigentem dum gremio foves
 Complexa Natum; quot cruentis
 Vulnera congeminata membris,

* Joseph ab
 Atimathæa,
 celebratus à
 IV. Evange-
 listis.

* Nicodemus.

Et corde totam colligis intimo
 Necem, orba Mater; non penitus tamen
 Deserta: & immensi levamen
 Hoc aliquod tibi, Diva, luctus.
 Feralis ingens officii decus,
 Cultusque mæsti relligio tuos
 Solatur, ô Virgo, dolores,
 Auspicium melioris ævi.
 Jamtum sepulcri gloria præscia
 Menti subibat, pompaque gentium
 Ventura, follennesque ad aras
 Dona ratis cumulanda votis.

D. Ioannes.

Sublecta * Christi munere candida
 Proles Parenti, virgineus comes;
 Honoris & curâ supremi
 Fœmineus comitatus adstat
 Ultro allaborans. Interea bibit
 Matris decoras subdita lacrymas,
 Quæ byssus unguentis natantes
 Mox Domini religavit artus.
 Hic ergo sanctum vulnificæ caput
 Passum coronæ spicula, sentibus
 Jam fronte detractis, quievit?
 Compositi jacuere vultus,
 Summi refulsit queis Patris eminens
 Antehac imago; sordibus oblitæ
 Sputorum, & informes probrosis
 A colaphis, rigidæque malæ?
 Vivæne amoris fiderei faces,
 Illa, illa Christi lumina, tristibus
 Oppressa jam fœdè tenebris,
 Hic gelido accubuerunt somno?
 Imbuta amaris ora liquoribus,
 Hic muta, quondam oracula Numinis,
 Sedere? concretusque inhæsit

Sanguineâ illuvie capillus?
 Tot vitæ inanes, non vacuas Deo,
 Cepisse felix reliquias, caput
 Sublime rerum, mentis almam
 Implicuit sacra byssus arcem.
 Testes per omnem Sindona lividi
 Guttae cruoris, quasque aloë notas
 Et myrrha fecit, quando pingui
 Numinis exuvias odorum
 Nimbo rigarunt. Jam simul, inferi
 Vastator antri, spiritus induit.
 Porrecta signato sepulcro
 Membra redux, stimulumq; victæ
 Mortis refregit; linthea vividis
 Simul reficti corporis artubus
 Amovit, exceptante turmâ
 Alite, funereos amictus.
 Sed obligando quæ capiti tulit
 Primas honoris munere lugubri
 Partes, adoratamque Sindon
 Circumiit veneranda frontem;
 Illam sepulcri rupe cavâ novi
 Secretam, & ipso præcipuam situ
 Cælestis involvit Minister,
 Ora micans, niveusque vestem.
 Quo te colono, quo rear ubere,
 Felicis agri filia, tam pios
 Crevisse & augustos in usus,
 Carbasæ? frugifero Canopus
 Gaudens optimus diluvio, & satum
 Cultuque Nili, te viridantibus
 Creatur arvis? an superbâ
 Extulerit Syra glebâ messe?
 Quâ fas laboratam artificis manu,
 Textam officinâ dicere? Cælitum

O cura, sacratæque mirum
Artis opus, duplicique limbo

Prætexta Sindon ! Tu Superi necem
Vitamque Regis conscia posthumam

* Octo pedes
longam &c.

Testâre : tu, qualem * Britannus
Beda refert, Cadoïna Sindon.

Tu pulchra litis materies piæ,
Quæ Christianis in Mahometicas

* Objecto me-
tu, ne ab An-
glis raperetur;
Cadoïno To-
loam, ac sub-
inde in agrum
translata Le-
movicensem:
utrobique ho-
nore summo
habita, nec ni-
si summâ con-
tentione à Ca-
doïnenfibus
recepta.

Certata turbas; quam * Tolosa;
Quam Lemovix agitavit ora.

Proh quanta rerum gloria ! Te duplex
Probavit ignis : tu gemini rogi,

Lethique morborumque victrix,
Mille potens titulis triumphas.

Non ipse tantum, vi propriâ valens
Magnes, superbis imperiosior

Aurique & argenti metallis,

Per se agitât domitatque ferrum:

Sed quidquid affrictu imbuerit levi;
Impressa virtus reptile pertrahit

Ferrum; & catenatos sine ullo

Aspicias per inane morsu

Pendere longis tractibus annulos,

Prior sequacem dum tacito alterum

Nectit vocatu, nil tenaci

Vis eguit socialis hamo.

Sic ille ab alto mysticus æthere

Lapis, benignam corpore vim sacro

Affudit & certam bonorum

Illecebram pretiumque Christus.

Cessante dextrâ nec minùs efficax,

Et voce nudâ, & simplice simbriâ

Sanabat olim: vestiumque

Cuncta pio mala pulsa tactu.

Hinc gratiarum sospita copiam,

Sindon, refundis. Cingula seu tibi
 Admota contrectant, vel aras
 Supplicibus coluere votis;
 Præsens in ægros emicat, artibus
 Tentata frustra Pæoniis, salus.
 Fessis laborantium malignæ
 Artibus incubuere febres?
 Tu sparsum in omnes sanguinis alveos
 Restinguis ignem. per populos lues
 Grassatur, exhaustasque in urbes?
 Vindice te superata pestis;
 Mors ipsa fugit. Nam quid ego hîc tuo
 Linguae renarrem vincula munere
 Soluta, facundoque mutos
 Ore tuas cecinisse laudes,
 Audita surdis carmina; dum novum
 Stupent reclusis luminibus diem
 Ridere cæci, teque visâ
 Primitias capiunt recentis
 Fructumque doni? Quin etiam truces
 Nigrâ tyrannos è Styge, corpora
 Infessa torquentes, revincis
 Sulfureas abigens sub undas.
 Te * Vaticani relligionibus
 Sanxere bisseptem ordine Præsules:
 Te sæpe donis purpuratus
 Regificis peregrinus auxit.
 Te sena Francis secula jam vident
 Florere terris, publica gentium
 Tutela, protecti Clientes
 Quâ Procures populique, Sindon;
 Sic, ô, decoris clarior in dies
 Splendesce nævis! sic age Franciam
 Tuere; sic rursus per omnes
 Christiadas tua fama currat!

* Clemens III.
 &c. Paulus
 III. decessorum
 suorum diplo-
 mata recensuit
 & confirma-
 vit.

Et quæ faventum munere Cælitum
Beata S A N C T A M Francia S I N D O N E M
Servavit , addicto Sepulcro
Et Solymâ , potiatur arce !

EPICITHARISMA
SERENISSIMO DELPHINO.
ODE XLVII.

MA G N I deliciæ Patris ,
Spes , D E L P H I N E , tuæ curaque Francia ;

Ode ad Sere-
niss. Delph.
Genethliaca
in aditu Lyri-
corum.

Primus tu fidibus labor

Et prædulce meis auspicium & decus :

Jam longo emeritæ sono

Te summis referent carminibus fides.

Stet Natalitiis honos :

Regnent Aonio lilia vertice ,

Lætis obfita laureis ,

Æternoque tibi vere nitentia.

Sic tu , candidus aspici ,

Florentem studiis , moribus integram ,

Formâ corporis explicas

Insignem & niveâ mente puertiam.

Franci nunc decora imperi ,

Laudes & patrias , scilicet & tuas ,

Ac vatem placidus novo

Experti radio luminis imbue.

Chartas * nam facili manu

Dignatus graciles nuper , & ingeni

Aspergens nitidum jubar ,

Artis nota probas Castaliæ sacra.

Musæ quâ tenues modos ,

Libatæ specimen grandis adorea

Premissum obvius excipis ,

* Oblatum in
anniversariam
Natalitiorum
gratulationem,
& eæque Pue-
ritiæ Exercita-
tiones libellû.

Audacem stimulat Gratia barbiton ;
 Pleno provocat agmine ,
 Quot subjuncta tuis carmina laudibus.
 Hinc & læta seges tibi
 Accrescit , meritis spargere frondibus
 Tento dum Proceres , tuis
 Nexos obsequiis , splendida nomina :
 Et quâ plurimus emicas ,
 Auges ipse tuos , inclyte , gloriâ.
 Doctis ut redimicula
 Contextunt ederæ debita frontibus ,
 Amplexu prius hinc tuos
 Circumserpere amant non humili pedes.

ANNIVERSARIA GRATULATIO
 IN REGALIBUS NATALITIIS

LUDOVICO
 GALLIARUM DELPHINO

CAL. NOVEMB. AN. CID. IDC. LXXIV.

Ætat. XIV. felicissime Auspicienti.

ODE XLVIII.

GEMMA notatus jam niveâ dies ,
 Et liliatis conspicuus redit
 Fastis ; neque unius voluptas
 Ille dies , honor ille seclis ;
 Spes ampla rerum. Crescis Olympii
 Delphinis astro pulchrior aureo ,
 Novisque Natalem coronas ,
 BORBONIDE , radiis superbum.
 Vix te sub auras luminis editum

Vidēre, blandā cūm properæ chely

Ortum salutarunt Camœnæ;

Primitias cecinere laudum.

Chori ipsa princeps; &, meus es, Puer

Auguste, dixit Calliope, & manum

Injecit; ornavitque mentem

Pervigili studiosa cultu.

Summi elaborat Gratia muneris

Confors, & artus dædala regios

Finxit; palatinosque suavis

Agglomerat Genius Lepores.

Tanto ministræ circūm operi vacant

Artes, biformi Gloria quas agit

Satellites aptas Minervæ,

Paci habiles, rapidove bello.

Nil otiosæ passus inertiae,

Ludisque tantum sceptrā decentibus

Qualemque Alexander palæstram

Ambierit, LONDONÆ, gaudes.

Sic eruditum, sic alacrem excipit

Te, sancta Regum jura pueritiā

Qui solvit * annus. fixa plebi

Franciadas neque meta Reges

Tardavit. Ætatem antevolat tuæ

Matura, præcox, vis sapientiæ;

Molles & artus durat acer

Iste animus, propiorque Divis.

Vibrat, sed alti non temere ingeni

Erumpit ardor: nec puerum sonant

Nata ora Suadæ. splendidum Orbis

Prodigium sine more surgis:

Ac gestientes jam populi stupent

Dignum Parentis numine Principem.

Communis exultat stupori

Mixtus amor, patriæque plausus!

* Annus xiv.
Franciæ Reges
tutelâ eximit.

LYRICON LIBER VI.

331

En Aula festis rider honoribus ;
 Gratantum adorat crebra clientium
 Caterva , sollennemque fervet
 Officiis agitare lucem.
 Doctis laborant interea modis ,
 Castisque amores illecebris tuos
 Captant , honoratisque Musæ
 Purpureum studiis Alumnum
 Latæ remulcent. Qui tibi * Galliam ,
 DELPHINE , Vates gemmiferas stitit
 Festinus ad cunas , beatos
 Augurio meditatus annos :
 Jamtum dicato , nec sine laurea ,
 Idem ecce plectro dulcia nunc refert
 Tributa ; partæ vota laudi
 Sollicitâ pietate nectit.
 Par evolutis aut melior tibi
 Annis refulgens , limina cui sacræ
 Pandunt Calendæ , jam recenti
 Annus eat speciosus auro ;
 Pulchrave mites Pace oleas ferens ,
 Densasve claris addere liliis
 Palmas amicus , Belgioque
 Ardua perdomito trophæa.
 Ut victa Magno Sequana gens Patri ;
 Ut Dola , crudo robore contumax ,
 In castra provento ferocem
 Visa tibi posuisse fastum ;
 Ut Rege fractos auspice dispulit
 Condæus hostes ; nec semel asperas
 Turennus attrivit catervas :
 Usque novi subeant triumphi,
 Urbesque gentesque ambitiosius
 Sub jura cedant Francica. Te duplex
 Phœbique Gradivique , PRINCEPS ;
 Certet ovans redimire laurus.

* V. Heroic.
 1. 4: & Oden

EXCELLENTISSIMO

CAROLO SAMMAUREO

DUCI MONTOSERIO,

SERENISS. DELPHINI GUBERNATORI.

ODE XLIX.

DUDUM regendis quæ populis manus
 Affueta, MAGNI Progeniem regat,
 Dignumque DELPHINUM Parente
 Perficiat, patriæque votis.
 Latè decoris functa laboribus,
 Hæc illa summo. dextera munerit
 Prælusit, & claros per usus
 Emeriti Ducis acta cura.
 Testis perenni laude Carantonus;
 Seu quæ Incolismam flumine prænatat:
 Errans amœno, fontis instar,
 Et vitreâ taciturnus undâ;
 Præpingue seu quæ Santonis irrigat
 Arvum coloni. Nec Ducis immemor,
 Ferrata Rhænus tauriformis
 Cornua fronte gerens minaci.
 Vidit, Brisaci Vimmario additus.
 Heros ut arces vicerit arduas;
 Virtute nec partam minori
 Strenuus Alsatiam tueri.
 Prorege felix Neustria, & arbitro
 Superba rerum! sed populis Ducem
 Invidit, affixamque ut Astro
 Borbonio tenet Aula Mentem.
 Duris probatam temporibus fidem
 Dignâ quis æquet laude? quis inclutos

Seu pace, seu bello labores,
 Ingeniique animique lumen?
 Vexilla ovanti rapta canent manu,
 Denfos per hostes fulmineo impetu,
 Per tela rumpentem secutæ
 Pegasides, sua turma, Nymphæ.
 Et Martiorum insignia vulnerum,
 Queis larga in ævum gloria fluxerit,
 Dicent, inundans purpuraret
 Cùm saturo chlamydem cruore.
 Sed lætiori pectine concinent
 Decusque & artis præsidium suæ;
 Novoque Mæcenate præfatos
 Aoniæ referent honores.
 Musas & olim magnanimi Duces
 Colunt in armis, & lituis lyras
 Varum remiscent. viva mutis
 Carmina dant animam trophæis.
 Doctâ ipse condis, MONTOSERI, manu
 Æterna, duris nec latebris adhuc
 Premenda, quæ Phœbus reposcit,
 Castaliæ monumenta laudis.
 Virtute DELPHINUM, ac solidâ imbuis
 Fingisque vitâ clarus, & aulicæ
 Lepore florentem palæstræ, &
 Artibus imperii supremis.
 Nec pignus altæ certius edidit,
 Quâ librat orbem Rex, sapientiæ;
 Justive, spectatos coronat
 Quo Proceres, specimen favoris;
 Quàm te regendæ cùm Soboli Pater
 Admovit; & spes ipse suas, decus
 Præsentis, exemplum futuri
 Ante alios tibi credit ævi.

AD ILLUSTRISSIMUM

JACOBUM BENIGNUM BOSSUET
CONDOMENSEM EPISCOPUM,
SERENISS. DELPHINI PRÆCEPTOREM.

ODE · L.

Poëtices amorem studiumque Principes decere.

VANUS Chimæaræ magnificæ parens,
Urbisque formam non imitabilem
Molitus autor, quem loquaces
Cecropidum tenuere silvæ;
Vatum, gravatam crimine non suo,
Artem severis legibus arceat,
Ipsumque donatum coronâ
Mæoniden fragili relêget.
Non sic, Eoï maximus imperi
Latæque victor Persidis; inclyto
Gratatus æternas Achilli,
Invidiâ stimulante, laudes.
Caro incubantem debita carmini
Regem fovebat magnanimum quies:
Gemmata * Rex vati sacravit
Barbarici monimenta luxûs.
Major triumphis gloria carminum
Post longa clarat sæcula Cæsares:
Dextram nec Augustos pigebat
Laurigeris adhibere plectris.
Magnus capaci Gallica qui manu
Et sceptrâ junxit Romula Carolus;
Suaves palatino recepit
Hospitio folioque Musas.
Ut quemque Famæ, sic & amor sacrae

* Alexander
M. Darii scri-
nio capto
inquit, libro-
rum Homeri
custodie detur
&c. Plin. l. 7.
s. 29.

Tangit Camœnæ. fœnore providus
 Multo repensandos honores
 Prærogat, illecebras favoris.
 Agnovit, & jam Pieridas probat
 Colitque Princeps, ille tuam datus,
 Antistes, in curam, per altas
 Ille tibi expoliendus Artes.
 Delphina mulcet cantus, & allicit
 Per stagna lætum accurrere cœrula,
 Vatesque fervare. hinc Arion
 Attonitis equitavit undis.
 Permissio amœnùm ludere gestiens,
 Aut Hippocrenes dulcibus innatans
 DELPHINUS exultansque lymphis;
 Aonio trahitur canore.
 Cognata magnas temperat & rapit
 Mentis Poësis, mysticus entheæ
 Conventus auræ, pura blandis
 Insinuans numeris voluptas.
 Ingentem Alumnum certo alacrem pede
 Cirrhæa ducis sub penetralia;
 Tuosque miraris beato
 Ingenio superare cultus.
 Seu, quos vetustas candida principes
 Inter Quirinæ lumina purpuræ
 Sacravit autores, revolvit
 Præsides te; Latiosque Franco
 Phœbi Ministros ore docet loqui,
 Novisque inaurat prisca leporibus:
 Seu parva contrectans dicati
 Munera nobilitat clientis,
 Sux ipse laudis conscius, & sagax
 Interpres: ô quàm pulcher amabili
 Fulgore Parnassus renidet,
 Etherium assimulans Olympum!

O, qui Poëtas nunc aget impetus!

Quàm lätus ardor, plectra ubi Regius

Puer capeffit, jamque ovarianti

Laurum avidus legit ipse dextrâ!

Simul Poëfi copia Gratiæ

Cuncta enitescit. floribus hinc tenet

Exurgit, illustrisque & ardens

Corda agitat domitatque sermo.

Flexus per omnes prævius Artium,

DELPHINO & umbram discutis, & tuâ

Spectabile accendis per orbem

Luce jubar, roseumque fidus.

Te, quem coruscas ore pio faces

Vibrare, festis non sine plausibus

Sensitque, regnantemque sacro

Eloquio celebravit Aula;

Hic te vel unus, dum cupidus tibi

Museo in alto BORBONIDES vacat,

Beatit auditor, superbâ

Hic Procerum potior coronâ.

Tua illa doctis perque manus volent,

Perque ora, chartis aurea pignora:

Libris hiantes præstat unus

Hic Procere populosque lector.

Princeps Magistrum scilicet altius

Extollet; ac te jam super æthera,

Crescente doctrinâque & almâ

Egregius pietate, vexit.

Augusta quondam sceptrâ dabit Pater;

Tu das mereri. partibus artifex

Divinus absolvis futurum

Rite suis cumulasque Regem.

LEONARDI

FRIZON

E SOCIETATE JESU

POEMATUM

PARS QUARTA,

SILVARUM LIBRI SEX.

ERUDITO LECTORI.


ETSI velocitatem nimiam styli, rebusque temere congestis levitatem probare Fabius non potuit; sequēdos tamen interdum affectus idem sanè prudenter admonet, in quibus ferè plus calor quàm diligentia valet. Quod si locum in Oratoribus habet, multo certe amplius in Poëtis, qui propria mentis vi & quasi divino spiritu concitentur Felices profectò, qui scribunt ex tempore perinde ac si fuerint diu meditati: aut quibus iusta meditatione curaque sic expeditum absolutumque carmen est, ut, politissimum cùm sit, sua tamen sponte, labore nullo, natum fustumque videatur. Ego verò cum neutram mihi gloriam scriptionis arrogem; veniam à te potius, Erudite Lëctor, quesivi, cùm hanc meorum carminum partem quartam, Silvas inscripsi; quod est operum festinatorum nomen, à Statio crebrisque aliis & veteribus & novis usurpatum autoribus; librisque suis, non veritatis, ut opinor, studio magis quàm modestiæ præscriptum. Atque huic titulo subjicere mihi quidem licuit superiorum etiam partium Heroïca Lyricaque plurima, quæ paucas intra horas effusa in lucem publicam Principumque manus venerunt. Sed tamen hujusmodi non sine ratione delectus & ordo est institutus: ac nonnulla, quæ locum sibi facile in Heroïcis vindicarint, eorum perfectâ jam editione succreverunt. Iam primo & altero libro res temporum nostrorum insignes canuntur. Tertio Colores dialogus exequitur. Ceteris promiscua, neque, ut spero, ingrata occurrent argumenta. Et quidem ludicra multa intexta; si non gloriam, quam Plinius ingeniosis tribuit lusibus, æquè ac seria consequentur; oblectationem fortasse parient non illiberalem, neque ab ingenua utilitate sejunctam.



SILVARUM

LIBER I.

AD CLEOBULUM,
 LAUDES
 PRINCIPUM SERENISSIMORUM
 CONDÆI ET ENGUINEI
 POETÆ CANENDAS OFFERENTEM.



PRINCIPIBUS jurate Cliens, Na-
 toque Patrique,
 Amborum æternas avidus diffundere
 laudes

Quò tenuem, CLEOBULE, vocas
 urgesque Poëtam?

Tu bello in medio Batavas oblata per urbes
 Carmina CONDÆO, peregrinaque dona benignus
 Objiciens ultro, tacitis hortator agebas

Sæpe modis, rursus & studiis confessus apertis.
 At non tarda mihi, & stimulis agitanda voluntas,
 Si modò, quas fingis, tanta in præconia vires
 Sufficiant, placitis & vox respondeat ausis.

Scilicet Heroëm teneris miratus ab annis
 BORBONIUM, juvenemque puer; vix tela ciebam
 Prima rudi Phœbea manu, cùm lætus ad arma
 Principis exarsi, & lituis plectra æmula movi,
 Regia dum toto Rupes Helicone sonabat,
 Primitiæ ingentes, & digna exordia Martis.
 Mox Pindi laureta jugis, silvamque perennem
 Friburgum, Nortlinga, sequacibus ordine pugnis,
 Absumpsere; simul torrens, non singula carptim
 Oppida, sed totas rapuit Victoria gentes.

O quoties alacri testatus gaudia plausu,
 Claustra maris, Dunkercam, atq; ardua castra Philippi,
 Lentiacasque acies, & adactum in vincla Mosellam,
 Edomitum Scaldim, atque infractum cornua Rhenum,
 Teutonas, Hesperios, Belgas gratabar, & uno
 Marte triumphatos, Franci quot nominis hostes!

Quà se cunque dedit cupidæ via libera voci,
 Fervidus arripui laudes; insigniaque alti
 Nomiinis ambivi, chartasque ornare superbis
 Luminibus factorum, & ovantes Principe Musas.
 At solido, fateor, plenas invadere laudes
 Carmine, per mediosque vehi, Cleobule, triumphos
 Quadrijugo curru, sollennis & agmine pompæ,
 Non antè expertus; seu fors tempusque locumque
 Invidit, campumque ingentem averſa negavit;
 Sive impar oneri, & vastæ fiducia moli
 Defuerit, justos nec jam Præanis honores
 Aggrediar, fessæ requies ubi nulla Camœnæ,
 Præscriptique instat series operosa laboris.
 Tum nimis fugiens lucis pudor; ipsaque fontis
 Aonii ductu si qua est opulencia venæ,

Hic obstructa, hærens, brevibus subsideret undis.

Et quisquam temere sublimi carmine Vates
CONDÆI affectet magni fastigia? Nec me
Tam Regalis apex Fortunæ, & gloria Martis;
Phœbeæ quàm lucis honos, ac vivida mentis
Vel doctis metuenda acies, ut fortibus ensis,
Movit. & audaces oculorum fulgura terrent.

ENGUINEUM geminæ confortem laudis & artis,
Ingenio pariter florentem animoque, Parenti
Hinc atque hinc Natum assimilem, miracula famæ;
Audieram, & dudum cecini. Latissima talem
Francia suspexit; pavidus talem approbat hostis:
Fulmineamque armis agnovit Belgica dextram;
Hispani sensere animos, sensere Batavi.
Sensimus ingenium, atque usu stupet ista recenti
Conscia Pieridum, suscepto Principe, sedes.

Audieram longe famam decora alta sonantem:
Nunc ipsum juxta suspensis auribus, ipsum
Coràm oculis haurire datum est, cùm splendidus hospes
Intima Dux Clari subiit penetralia Montis.
En turbæ facilem sese, grandisque remoto
Fortunæ strepitu, privata fronte remiscet
Augustus Regum Sanguis! quàm mutua blandus
Conferere alloquia, & miro condita lepore!
Principe nam dignus, facundo gemmeus ore
It nitor eloquii, puroque micantior auro.

Quas, ô, delicias civili munere Vesper
Candidus, & quantos Parnassò invexit honores!
Suavibus illecebris ut sacræ impensa Cohorti
Pignora ceperunt animos, penitusque revinxit
Æternùm obstrictos meriti vis blanda Sodales!
Sic Lojolææ cumulans jam stirpis avitum
Et patrium HENRICUS Natis transfundet amorem.
Hinc quoque (gratantes si Musas audiet orbis)
ENGUINEUM, ad tales ultro descendere cultus

Sereniss. D.
cis officiosus
in ædes S. J.
Claramonta-
nas adventus
pridie Idus Fe-
br. an. M. DC.
LXXIV.

Dignatum, excipiet venturis gloria seclis;
Regius & latè populis celebrabitur hospes.

Virtutesque Artesque Ducis, Cleobule, renarras;
Justitiæ quàm verus amor, quæ cûra decori;
Mitibus imbutos studiis ut pectore servat
Egrediè memori fructus; & acuta Lycei;
Largus ut officii Princeps dictisque benignum
Explicuit factisque animum. Sic dextera linguæ
Consona mulcere, & donis excurrere gestit.
Seriaque ingenuosque sales matura juvenus
Temperat: exuperansque annos Prudentia, raro
Virtutum sociat disjunctas fœdere partes.

Affiduos, Cleobule, tibi spectata per usus
Tanta refers; nec tu surdo canis inclyta facta.
Omnia quæ meditans numeris explere canoris
Optarim, dexter si quando adspiret Apollo;
Inque novam heroi molem quæsita laboris
Otia succurrant Vati, quem proxima rerum
Spes acuit, festoque jubet proludere cantu.
Ampla seges laudum: jam Belgica terra triumphos
PRINCIPIBUS, lætisque parat nova carmina Musis.

ILLUSTRISSIMO

JOAN. DIONYSIO LESTONACIO DAULEDE,

SENATUS BURDIGALENSIS PRINCIPI,

De suo Epigrammate gemino

In silvam superiorem, & Protrepticon adversus Turcas.

TUNE etiam, DAULEDE, novis urgere Poëtam
Aggressus stimulis, Cleobuli fautor; & altas
Carmine CONDÆI laudes tentare superbo,
Audacique jubes laurum sperare Camœnæ?
Judice te, quisquam valeat certare Maroni,
Communique Heroa canens æquare triumpho!
Quin age, purpureo qualis spectandus amictu;

Juris amans, Legumque potens, sublime tribunal
 Scandis Aquitani Princeps auguste Senatus;
 Exere vim justæ, consueta oracula, mentis.
 Quantus & Aonii superas fastigia collis;
 Seu Latios inter medium considere Vates,
 Seu Franco insignem placuit procedere cultu;
 Huc acres intende oculos, animumque sagacem.
 Neu blandæ nimium voces, & prodiga laudis
 Officia immeritum fallant, tua dona, clientem.

Nam quis inaccessos æquarit Phœbus honores
 Principis invicti; quo se Duce Francia, quantum
 Pellâve Alexandro jactat, vel Cæsare Roma?
 Nec verò Musas (ceu crudo barbara Marte,
 Nesciaque ingenuas mansuescere corda per artes
 Sæpe rigent) durâ CONDÆUS mente repellit.
 Palladio eductus gremio, facilisque Camœnas
 Suscipit: ac morbo nuper vexatus acerbo,
 Jam tenuem optabat repetito carmine silvam;
 Jam rapido citharæ modulatos pectine versus
 Auribus exceptans placidis hauribat; & ipse
 Visentum in cœtu Procerum, quâ voce feroces
 Accendit lituos, animam vimque addere plectro
 Dignatus, creberque ultro prælegit, & acres
 Ingenii vibrans radios, delecta notavit.

Atque utinam tanto exuperans *Crux* vindice regnet
 Christiadûm, Ottomanoque rubescens sanguine *Luna*
 Deficiat: sed quem affingis, mihi carmina fulgor
 Allinat, armatisque imitetur Oriona flammis.
 Te verò ingentem, Præses, moderante Senatum,
 Justitiæ famâ doctrinæque inclyta crescit
 Gloria Burdigalæ; cui longè splendida curvo
 Littore procurrit, tumidasque amplectitur undas,
 Oceanum quæ Luna sinu rapidumque Garumnâ
 Concipit, & portu peregrinam divite classem.
 Dividit hinc geminos DAULEDI nomen in orbes.

EPINICION,
 CUM SIGNA MILITARIA C. VII.
 POST SENEFENSEM VICTORIAM
 HEROIS CONDÆI PRINCIPIS,
 AB CHISTIANISSIMO REGE
 LUDOVICO MAGNO
 MARIÆ

CÆLI REGINÆ, FRANCORUM PATRONÆ
 DICATA,
 PARISIENSI BASILICÆ APPENDERENTVR
 AN. M. DC. LXXIV. XI. CAL. SEPT.

BELLIPOTENS Virgo, cui regia servit O-
 lympi,
 Et sacra jamdudum regali Francia voto
 Sollennes Patronæ agitat, Cælo æmula, pompas;
 Aspice, quos acie partos LODOÏCUS honores
 Te Duce victor ovans; quæ templo inducere gaudet,
 Ipse tui consors, spectacula clara, Triumphi.
 Non aliàs majore fremens Luteria plausu
 Gestit, augustasque tibi confluit ad aras.
 Accipe Borbonii monumenta & pignora cultûs;
 Fulmineâ quæ signa manu CONDÆUS Ibero,
 Quæ Batavo extorsit, Germanorumque catervis,
 Tergeminos unus superans Dux inclytus hostes.
 Proh, quibus hæc animis, quanto decora alta labore
 Principis invicti, quàm sævis rapta periclis!
 Vos, Belgæ, testes, & quondam ignobilis ora

Senesi, totum famâ celebranda per orbem;
Horrificæ, immanis, qualem nec longa tulere
Secla, trucidis pugnae regio, palmaeque cruentæ
Dura parens, fumansque hostili clade theatrum.

Borboniden primo spectavit Phœbus ab ortu
In casus arrectum omnes, dum castra moverent
Teutones, Hispani, Batavi; socialiaque arma
Cominus explorare, acrique laceessere bello:
Vidit, jam medium cum scanderet arduus axem;
Per mistas rumpentem acies, per tela, per ignes,
Cedere ad extremam rapidum trepida agmina lucem.
Consumpto generosa die nec vincere dextra
Abstitit, & noctem in mediam mavortia facta
Porrigere, & factis crescentem ad sidera famam.

Consiliine Artisque prius vibrantia dicam
Lumina? quam præsens, casus quam provida in
omnes,

Mens secura Duci; &, tacitâ ceu pace, tumultum
Inter & arma, suo libratam pondere sortem
Versare ac subitis occurrere certa periclis?
Heroisne animos, atque imperterrita mirer
Pectora? non galeam, aut ferro thoraca rigentem
Induitur. levis in tenui bombycis amictu
Tot sese adversum cataphractis millibus infert.

Qualis erat fronte in primâ, quantusque cohortes
Ductor agens, milesque! ruit per iniqua locorum;
Voce, manu pugnae volitat: iussâ ardua firmat
Præviis exemplo, mollitque asperrima rerum.
Fulgurat idem oculis, & dextrâ fulmina torquet.
Imperiis tantoque ferox sessorum superbum
Naribus ignescit patulis equus, armaque calcat
Insultans; mistos spumis agit ore cruores:
Et fati sensu credas gestire decori.
Nec sonipes longi rapidos certaminis æstus

Duravit. ferrique inter flammæque procellas
 Succubuit, crebro perfossus vulnere, triplex
 CONDÆI bellator equus, vitamque profudit.
 Uni etiam (horrendum !) tormenti turbine trunca
 Immanique abrepta globo, ceu fulmine, crura.
 Ah, quem vel ferrum extimuit, vel flamma refugit,
 Collapsâ ne mole premat Dominumque peremptus
 Exitio involvat quadrupes ! Tibi nempe sub omnes
 Impavido casus (nec movit tibia duro
 Bis contusa ictu) pulchri causâ una timoris.
 Hæc fuit, ENGUINEE, hic solus discriminis horror.
 Sic tua, sic rigidis Pietas splendescit in armis.

Proximus ut patrio lateri, nec degener ibat.
 CONDÆO, paribusque assurgens Filius ausis;
 Unus opem invicto meruit præstare Parenti;
 Egregio par Scipiadæ. Sed clade Quiritum
 Ille patrem eripuit, victorique abstulit hosti:
 Tu cursu in medio palmaris & ordine pugnae
 Magnanimo vindex aderas, HENRICE, Parenti.
 Ac tali intentum quæ te, fortissime Princeps,
 Officio violat, minus improba plaga cruoris
 Quàm decoris parit; & summæ jam præmia laudis
 Digna tulit. Factumque probat, risuque sereno
 Gratatur Genitor, casu inconcussus; & hosti,
 Mutatô sublimis equô, spectabilis Heros,
 Acrior instat agens, extremumque obterit agmen.

At non extremi clades una agminis implet
 Ingentes animos. ultrâ tenditque premitque
 Proturbatque aciem: & primæ dant terga phalanges.
 CONDÆUM quis tardet obex? Nec simplice pugna
 Res agitur, solitove paratur gloria campo.
 Hîc cunctæ belli facies, hîc omnia tela.
 Obsidio, assultus, peditumque equitumque remisto
 Concurfu latè fervent. hîc arcta viarum

Impediunt : hîc fœda palus uligine fallit :
 Hîc fossæ , hîc rapido torrentes gurgite inundant :
 Hîc silvæ , hîc sæpes : suggestuque edita collis
 Densa globis tormenta tonant , piceâque tenebras
 Nube cient : muris hostem castella tuentur.
 Franciadas sedenim frustra numeroque locoque
 Exuperans , vim, fraudem agitat. Virtusque Furorque,
 Quidquid Iber , quidquid Batavus cum Teutone
 versant ,

Concidit : & placitâ regnat CONDÆUS arenâ.

Sanguine jam rivi spumant , pinguisque cruore
 Stagnat humus : vastis horrent castella ruinis ;

Huc , illuc disjectæ ædes , latebrosoque septa.

Mille necis facies , horrendæ stragis acervi.

Corporibus strataque viæ , silvæque domusque ,

Immensique latent campi , squalentiaque arva.

Tot demessa jacent victricibus agmina telis !

Captus & Hispanos summus qui Ductor * agebat ; * Assentarius
 Vulneribusque infixâ gerens fata ultima , castris
 Marchio.

Oppetuit Francis , curas expertus amicas

Victoris , stantique gravis mitisque jacenti.

Interea trepidô sub mœnia tuta receptu ,

Qui superest , fugit incertis exercitus armis :

Ceu caudâ mutilus cæsâ se proripit anguis ,

Nequicquam & varios lacero dat corpore flexus.

Jam tumet exuviis miles , laudisque beatus

Parte , Ducem invictum celebrat ; quo Principe fretus ,

Exultansque animis , & non superabilis , acri

Ambierat pugnam voto. Quàm splendida præda !

Quot currus ! quæ gaza ! Ducum quàm lauta supellex ,

Haud parcâ direpta manu ! vix Gallica tantæ

Turba capax prædæ. Tercentum incendia currus

Iussa vorant , festisque rogis præludere visa ;

Qualibus accensas passim rutilare plateas

Aspiciamus flammis hilares , dum tota remugit

Bombardis alacrique sonat Lutetia plausu.
Mox aliæ excipient studiis certantibus urbes
Publica lætitiæ & iusti decora ampla triumphii.

Pompæ aderat transmissa seges, si Francia prisco
Ausonidum evinctos ritu protraxerit hostes,
Splendida ludibria & vivi simulacra trophæi,
Tot captos gente ex triplici Procresque Ducesque.
Regali speciosa tenet custodia castro,
Vicennæ septos circum nemoralibus umbris:
Spargitur & varias, quæ plurima turba, per arces.
At vano parcit victos illudere fastu
Francia. quin placidum & captis spectare trium-
phum

Sponte dedit, quæ Regis iter, quæ libera turba.
Quinque adeo, titulisque Duces & sanguine primi,
Clade nec indecores, & crudæ vulnere pugnæ,
Adstabant Francæ testes virtutis; & ultro
Prælia narrantes, generosâ laude favébant;
Pulchraque, dum spectant, ipsi spectacula præbent.
Ipse etiam Batavum rector, pars optima pompæ,
Venerit Auriacus, ni denso ex agmine raptum
Alipedis fuga servet, & hostica lumina fallat
Imperii abjectum decus atque insigne superbum,
Inventam largo miles quam vendidit auro,
Fascia. Vexillis potiùs conjuncta, sub aras
Sternatur; dehinc templo altè suspensa nitescat
Captivas Aquilas inter captosque Leones.

Quæ tu, Diva Parens, LODOICI Regia dona
Suscipe; totque inter fulgentia signa, sacratis
Digna tholis admitte. Tuo Rex numine victor,
Clara adytis monumenta piisque aggesta trophæis
Ipse suo erexit toties quæsita labore.
Auspiciisque suis, cognato à Principe nuper
Tergemino detracta hosti spolia inclyta, centum
Ecce tibi vexilla ferens, tua munera reddit.

SILVARUM LIBER I.

279

Astra supervectæ * quo tempore Franca triumphum
Patronæ instaurat Pietas ; nova gaudia festæ
Rex urbi , temploque novos cumulavit honores.
Ergo age , & augustum , Cæli Regina , Clientem ,
Borboniamque Domum , populosque urbesque tuere,
Ac Duce CONDÆO semper victricia castra.

* Ipsa die octa-
va B. V. Af-
tumptoria.

TERRÆ MOTUS AQUITANICUS,

presertim ad Pyrenæos,

Menſe Junio A. N. M. D. C. L. X.

QUis tremor iste novus, quidve hæc insueta
minatur

Tempeſtas ! nutare ſolum , totiſque moveri
Parietibus viſa ecce domus : pendetque gemitque ,
Ceu fluctu jactata ratis , firmiſſima moles.

Talia quærebam , & ſtupefactâ mente morabar
Cæleſtum pacem expoſcens , dum perfida tellus
Nefcio quæ ſubito meditatur fata tumultu.
At trepido brevis ut Motûs deſuncta periculo
Omnia conticuere , domusque agitata reſedit :
Protinus ille , animum qui tunc pulcherrimus Hymen
Dulcibus implebat muſis , & ovantia latè
Gaudia narrabat , ridenti talia vultu
Subjicit , & dictis tremefactum illudit amicis,
Dextrâ oleam myrtumque gerens , & fronte coronam.

Motus hic
ſub Regis nu-
ptias & digreſ-
ſum à Pyre-
næis contigit.

Quid nova te rerum turbant miracula , Vates ?
Nunc & cernendi rutilant impune cometæ ,
Et centum ludens in formas vertitur ignis :
Mentitos æris tonitrus , ſimulataque volvit
Fulmina , pulvereas inter candentia nubes.
Perſonat & geminos Triton circumvagus orbes ;
Cantabrigi ſpectata maris quæcumque per oras ,
Congreſſusque ſacros narrans & fœdera Regum :
Quo cantu poſuiſſe undas , ventosque renident

Gadesque Baltisque, & jam non ultima Thule;
 Aëre nunc toto pluit aurum missile donis;
 Cunctaque lætitiæ sensus elementa peragrant.
 Ne dubita, tremor inde solo: micat excita Tellus
 Lætitiâ; exultant convulsæ sedibus urbes
 Pæne suis. Dominæ adventu gestire propinquo
 Sensisti trepidas, & festo assurgere Motu.

Dixerat; hærenti cùm certior advolat autor,
 Qui mihi mentito veteris pro numine Phœbi
 Cultus, & adspirans facili vim carminis aurâ,
 Cæsariem chlamydemque & pictas aureus alas
 Eudæmon, placidoque hæc Nuncius incipit ore.

Blanda, Hymenæe, canis, lepidoque accommoda Vatis
 Et grato, ut memoras, fervent nunc omnia motu.
 Hesperiiis digressa plagis lectissima Conjux,
 Dignaque B O R B O N I O magno, per Gallica regna
 Ingreditur: Pax Reginam comitatur ovantem.
 Publicus augustæ merita ad spectacula pompæ
 Impetus incessit populis, penitusque morarum
 Impatiens ardor: vibrantur conscia voti
 Pectora, lætitiæque novo salientia sensu.
 Sed vis major agit: vasto Natura labore
 Turbida Aquitanas concussit funditus oras:
 Captivusque Auster cæco per operata meatu
 Quæsitivus clausis trepidans erumpere terris.
 Dum rimatur iter, dum carcere pressus anhelat,
 Inde tremor latè; nec tantum, Pictava * qualem
 Sensit humus, nutuque levi stridentia tecta.

* Ubi tunc
 agebat scrip-
 tor.

Disce adeo (simul hæc texens, in me ora reflexit)
 Disce, Pyrenæis quantam sub finibus asper
 Ediderit Motus stragem, qui lenis & ipso
 Infractus spatio vix Pictava contigit arva.
 Effractis montes scopulis subsidere visi;
 Oppida collabi; crebro discedere hiatu
 Terra vorax; ruptâque viâ vis effera venti

Voluere se tremulam per humum, summamque procellâ

Oram humilis legere, & gressus vexare caducos.
Tum clamor gemitusque virûm, dirusque ruentum
Tectorum fragor, atque alio quassâ omnia motu.

Quò fugiat titubante solo miserabile vulgus?
Si ferro flammâque ferox incumberet hostis;
Si tumidi immensis stagnarent fluctibus amnes:
Insedisse jugis licuit saxisque Pyrenes,
Castraque, vel campos hinc despectare natantes:
Portum arcemque darent prærupto vertice montes.
Fulminibus gravidas, capiti impendente ruinâ,
Mugitu horrifico rumpant si fulgura nubes:
Vim Cæli atque minas latebris eludere & antris
Concessum est; fidique alta tellure receptus.
Ast ubi succutitur Tellus, atque ipsa tremiscunt
Fundamenta Orbis; pernicibus ardua carpat
Pennis astra timor. quærendo hic solus asylo
Jam locus est, queis terra aperit subducta sepulcrum.
Nec superant, post absumptas cum civibus urbes,
Mox coëunte solo tantæ vestigia cladis.

Deprensi stupuere malo, subitaque ruinâ
Impliciti, subjecta colunt qui rura Pyrenæ.
Quot lapsu obriti tectorum, & strage sepulti!
Quot mutili, & mediis tandem vix eruta saxis
Membra trahunt! fugère domos, propriosq; penates;
Ac totis figunt, quâ fas, tentoria in hortis,
Insomnesque agitant sub iniquo sidere noctes.
Nec tuti, quamvis minitantiæ septa domorum
Effugère. gradu crebri fallente tremores
Horrorem ingeminant, & subsultantia trudunt
Corpora, colliduntque; pilas quo more videmus
Impactas resilire solo. feralis ubique
Exitii facies. nil præter vota relictum est.
Et non illa quidem frustra suscepta, Patronam

Excivere polo , dum squallida templâ piorum
 Concurfus lugubri habitu precibusque fatigat.
 Prodigio sancita virûm fiducia crevit.
 Disjecto Magnæ Signum venerabile Matris
 Delubro stetit , & facilem placavit Olympum.

At vos , Terrigenæ , motus condiscite justos ,
 Et summum tremite (ipsa docet Natura) Tonantem,
 Quo Regum tremuere apices , pallentiaque astra.
 Natali dum stare loco negat, improbaque effert
 Altiùs Ambitio ; solidæ jactura quietis
 Facta Homini ; tergoque gravem indignata repellit
 Fœdifragum Tellus , insanisque exprobrat ausis :
 Et , lasi annuerint si fors ultricia Cæli
 Numina , præcipitem jam jam mersura barathro.
 Ingruit atra dies , & lamentabile tempus,
 Cum toto instabilis pavitabit corpore Tellus ;
 Cum juga Pyrenes imis æquanda fatifcent
 Vallibus ; absiliet Capitolî mobile Saxum ;
 Mundus & abruptâ infelix compage labascet,
 Terrigenûm ob noxas undâ lustratus & igni.
 Hanc jussit legem Omnipotens. sed parcior iræ
 Suspendit Genitor pœnas , extremaque fata.
 Admonitu interea crebro revocare nocentes
 Sollicitus , venturæ olim præludia cladis
 Tristibus ostentat monstris : immotaque brutam
 Mens Tellurem agitans , certo ciet omnia Motu.

Sic ait , & sacro perfusum horrore reliquit
 Candidus Eudæmon , tenuesque abscessit in auras.

* Versus qui
 exciderant è
 superiori pa-
 ginâ , proximè
 ante v.

Tum clamor.

* Sulfure turbati , mutati sanguine fontes ;
 Desituitque suus thermas calor , & novus undas
 Invasit gelidas nebulis fumantibus æstus.
 Quin ipsæ inter se rupes configere ; & alto
 Aut excussa jugo aut imâ radice soluta ,
 Inque auras subiecta immani pondere saxa ,
 Ceu tælar ingentem flammam per inane volantes
 Edere ; belligero vel ahenea machina jactu
 Ceu lapides rôret accensos , ærisque flagrantem
 Massam , aut stridentis commisto sulfure ferri.

DELPHINO

AD ORIENTALES TRIUMPHOS AUSPEX
 D. FRANCISC. XAVERIUS
 INDIARUM APOSTOLUS.
 CUM AUGUSTI PUERI NATALITIA

In Regio Piſtav. Colleg. Societ. JESU celebrarentur sub ipsa Herois sanctissimi, novique Thaumaturgi solennia.

JAM tenerum officiis Regem cælestibus ambit
 XAVERIUS, patriæ decus ac tutela Navaræ,
 Trans Indum Gangemque vocans, quâ fervidus
 Heros

Movit, inaccessos ausus perrumpere fines,
 Signaque Memnonium fixit Romana per orbem,
 Mystica bella prius Francis meditatus in oris.
 Victor ad Oceani fluctus, Eoque longè
 Littora fulmineis Macedo provectus in armis,
 Post Aras tanti monimenta erecta laboris
 Regna triumphalem duxit per barbara pompam;
 Qualem Nylæo descendens vertice Liber
 Instituit, Divûmque altos præsumpsit honores.
 Longiùs hic, quâ terra patet, quâ funditur æquor,
 Protulit ætherii pennas indutus Amoris
 Imperium, Morbosque fugans, domitisque procellis,
 Armatosque ciens tremefactis montibus ignes;
 Et Morti prædam, & Stygio spolia ampla Tyranno
 Eripiens: Japonasque feros pia sub juga misit
 Grande triumphato nomen lucratus Eoo.

Sinica quin etiam claustra emolitus, Olympo

Mille alias raperet gentes , immensaue regna ;
 Lustraret rapido igne polos , maria alta remensus ;
 Prodigiumque ingens Europæ redditus Heros ,
 Undique concursu celebratus & undique plausu ,
 Iret per medias latè venerabilis urbes ;
 Hesperiaque suæ , jam noto major , amica
 Subsidia & Numen præsens Oriente referret.
 Occurrit vastis properata laboribus , & spes
 Abrupit Mundi , toties Mors antè subacta.

Sola adeo metam Heroï Mors , ultima rerum
 Linea , præfixit. sed Virtus ardua Cælo
 Invexit flagrantem Animam ; radiisque micantem ,
 Sideris in numerum Divûmque in tēpla recepit
 Gloria : & illustri jactat se Goa sepulcro.
 Spirat , adoratum , tantò post funera Corpus.

Hic tibi se , DELPHINE , ducem comitemque viarum
 Offert LOIOLÆ Geminus , sociumque laborum :
 Et , placidus quâ jura dedit divina volentes
 Per populos , Christi felicia tela coruscans ;
 Primigenam poscit Fidei , sacrataque bella.
 BORBONIDUM Hesperius fato nec sufficit Orbis :
 Nec tibi summa operis fuerit Mavortia , Princeps ,
 Thracia , magnanimi dextrâ frangenda Parentis.
 Pulchra rudimenta & lætæ juvenilibus annis
 Primitiæ , Solymæque arces , Jordaniaque arva.

Inde Palæstinis raptim victricia palmis
 Tempora circumdans , lucis fontemque caputque
 Exquires ; Persasque tuis , opulentaue Serum
 Imperia adjunges Francis. Jam lilia Susis
 Addita , jam Ligeri Tigrim decedere cerno ;
 Sinarum intextos scopulis & montibus æquos
 Regis in adventum penitus subsidere muros.

Gemmiferi maris unda , & gazis feta Pequini
 Regia , certa tui merces , DELPHINE , laboris :
 Dignior & superæ florens palma arce Sionis ,

Xaverius bellique autor sponforque triumphî,
 Ipse maris terræque dabit cælique potentem.
 Tendere in adversos hostes armataque inermis
 Agmina sustinuit quondam; stragemque ferentes
 Increpuit, validâ stupefactos voce repressit,
 Ore minax, totâque ardentia fulgura fronte
 Incutiens. Nec vox hominem, nec forma sonabat.
 Et meruit, nil tela pavens infesta, timeri.

Barbaricas idem classès, spoliisque superbas
 Christiadûm, sceleris quàm splendidus obruit ultor?
 Lusiadis Vates animos viresque ciebat.

Quid, cùm fœdifragas urbes, Christoque rebellem,
 Militis exigua ille manu, sed Numine fretus,
 Disjecit populum, & Christi sub jura reduxit?
 Dum supplex movet astra Pater, fremit excita tellus
 Imperio; subitoque abrupti montis hiatu
 Summittit cineri mistas ad classica flammæ:
 Mœnia procumbunt æquatis pervia fossis.

Hæc potuit mortalis adhuc: nunc arce potitus
 Sidereâ, quam non fulgentibus igneus armis
 Præstet opem? quas non Orientis panderet oras
 Hospitibus quondam Francis gratissimus Auspex?
 Quæ Grege pro sacro Regi debere fatetur
 IGNATÎ Consors, reddet Natoque Patrique.

NATALITIA DELPHINI

A LUDOVICÆO PICTAV. COLL.

*Supplicatione sacra, Ludis Academicis,
 Pompis Ignibusque festivis celebrata.*

STELLATIS alii purâ sub nocte fenestris
 Discutiantq; umbras, faciemq; imitentur Olympi:
 Bombardarum alii cæco per inane tumultu
 Latitiam, & festis agitent per compita flammis.

Nos animis lætos certatim accendimus ignes;
 Corda pius flammavit Amor : nos laude canorâ
 BORBONIO æternos PUERO molimur honores.

* Illustr. Gil-
 bert. de Cle-
 rambault Ep.
 Picav.

Subjicis ipse faces exemplis Inclyte * PRÆSUL,
 Auspice quo nuper templis resonantibus altè
 Sanctior ætherias Pæan sublatus ad arces.
 Regia solenni grataris munera ritu
 Nunc etiam LODOICÆAS operatus ad aras,
 Plebem avidam Proceresque inter, fidissima Regi
 Lumina Pictonicæ gentis; sacroque Camœnas
 Carmine gaudentes, & vocibus æmula plectra.
 Inde theatrales Musarum invisere ludos,
 Atque alios juvit DELPHINO impendere plausus.

Ecce Coronatus picto micat æthere DELPHIN,
 Astrorum venerante choro. salit æquore DELPHIN;
 Tritones circum & resonâ Sirenes in undâ
 Exultant. plaudente solo simul Aurea Secla
 Emicuerè : simul sortitæ quattuor Orbem
 Quadrifidum Nymphæ; Tempestatesque feracem
 Autumnum invidiâ, & votis DELPHINA secutâ.
 DELPHINO ardentem transcribis, Phœbe, coronam;
 Textilibusque caput radiis præcingis amicum:
 Cœruleum DELPHINO aptas, Neptune, tridentem:
 Innexas oleis, augusta insignia, lauros
 Addis ovans, Tellus. medium DELPHINA choreis
 In numerum lustrant variis, Regemque salutant.

Jam tuba successit fidibus; jam tympana raucos
 Dant sonitus; alacresque vocat lux altera turmas
 Florentum juvenum, pompamque ostentat equestrem.
 It generosa manus, totamque instructa per urbem
 Mirantes populi sensus, Procerumque laceffit.

Ipse caput viridi Clenus circumdatus ulvâ,
 Festivum ad strepitum vitreo sese extulit antro,
 Sustinuitque amnem tacitum, & sic ore profatur.
 Quò rapidi concursus & incita gaudia vulgi!

Cui nitor insolitus juvenum, cui pompa laborat!
 Agnosco. pictas undantia signa per auras
 Inscripto DELPHINE tument. Jure omnia feruent
 Lætitiâ, & vultu juvenes habituque decori.
 At tu Franciadûm DELPHIN Regnator aquarum
 Oceanique decus, tenuem ne despice Clenum:
 Ingens obsequii studio nec Sequana præstat.

Pictonidûm interea templis spectata juvenus
 Cephamque, Hilariumq; suum, Magnamq; Parentem
 Conciliat supplex DELPHINO; & pignora voti
 Cuique suis vexilla dicat splendentia formis.
 Aurea Pictonicas transmittens Corda sub ædes
 Regina, & paribus LODOICI ANNÆQUE sacrarat
 Consocians donis, alboque adscripta Clientum.
 Prodigia respondit concessio Principe votis,
 Sidereo effulgens solio regnansque Sepulcro
 Mirifico RADEGUNDIS, & aurea Dona rependit.
 Hinc Lodoicæis adytis, jam luce malignâ,
 Haud vani influxit species revocata triumphi.

Cetera nec defunt hilari spectacula Pindo.
 Excubiæ ardentes, densæ vasta atria circum
 Lampades assurgunt, turritaque tecta coronant:
 Sublimi rutilat DELPHINUS Regius astro.
 Congestâ in medium silvâ rogos arduus auras
 Implet, & auratos fluctus ad sidera volvit:
 Simplice nec volitat flammâ; circumque nitrato
 Fulgurât intorquens crepitantia pulvere tela.
 Incensi studiis Juvenes, cristisque corusci
 DELPHINO vitam, DELPHINO fausta precantur
 Omnia. congeminant festos cava tympana plausus,
 Æreaque in seram conspirant cornua noctem.

Accipe Vota piæ, PRINCEPS, cultumque Cohortis,
 Quæ tua facta canet, docilesque Heliconis Alumnos
 Exemplis monitisque perennibus ad tua fingit
 Obsequia, & pulchros afflat jam cordibus ignes.

FERDINANDO PRINC.

EPISC. PADERBOR. COADJUT. MONASTER.

De ipsius Gratulatione Poëtica

LUDOVICO REGI CHRISTIANISS.

AN. CIO. IO C. LXXII.

M ARMOREA qualis conchâ crystallinus humor,
 Aurea Phœbeæ influxit cui lucis imago,
 Dulcè micat; quâque ora patent argentea, suavi
 Desilit in numerum plausu, lenique susurro
 Lympha laboratum strepitans illapsa canalem;
 Purpureos inter flores dominantiaque hortis
 Lilia, jucundos exercet læta meatus:
 Tale tuum, PRINCEPS, it divitis ubere venæ,
 Clarum, illime, sonans, perfusum nectare carmen.
 Sic ego, dum Paderæ fontes, Mellita fluenta
 Haurio, Castaliis potiores fontibus undas;
 Gemmati decora ampla lego, tua munera, Libri:
 Sic adeo expertus, liquidissima gaudia sensi;
 Et quæ deliciis vincant laudemque fidemque,
 Principis usque inhians Musæ miracula adoro.

At mihi, dum stupeo & venerans opera inclyta lustro,
 Ecce aliud super atque aliud mirabile donum
 Advenit; oppresso tantâ jam mole clienti
 Blandum incumbit onus, Cirrhæosque addit honores.
 Ut Batavas latè victricia signa per oras
 Relligio sequitur, Lodoïco Vindice tandem
 Post seclum exilio & fœdis revocata latebris;
 Augustum Heroem, simul-ac Rhenumque Salamque
 Fulmineo adventu & sacris domitum obruit armis,
 Ore tuo, FERNANDE, canit; gratansque suburget
 Vincentem Superis, Rupellæoque triumpho

Majorem, & Justi transvectum facta Parentis;
 Ardua inoffenso cursu tot castra, tot arces,
 Et rapido attonitas versantem turbine gentes.

Aurea, Borbonisq; incidi nata trophæis,
 Carmina jam Vatum Princeps meditatus, & ipse
 Supremique Ducis consors Regisque triumphæ.
 Unus te dignam Lodoicus Vate ministrat
 Æternæ segetem laudis, palmasque superbas;
 Unus tu Vatum Lodoici pangere facta.
 Dignus eras, capitique æternam innectere laurum.
 Mutuaque hinc, gemnium quæ didita fama per
 Orbem,
 Crescit; & ambobus communis gloria surgit.

AD EUNDEM CELSISS. PRINC.

*De Poëtarum effusis in eum studiis
 Laudibusque meritissimis.*

NON ita præcipiti Batavas torrente per oras,
 Agger ubi disclusus hiat, prorumpere apertis
 Faucibus Oceanus gaudet, nec jam altera novit
 Quam sibi quæ vasto metatur littora cursu.
 En tibi Pegaseus totâ ruit Aoniâ fons;
 Toto avidos rapit orbe, tibi que ad limina Vates
 Sistit, & immenso circum undique funditur æstu.
 Et mihi quæ nuper latebroso margine septa,
 Mutaque inersque situ torpebat vena; benignam
 Quâ, FERNANDE, viam referas, impulsâ repente
 Profilit, exundatque tuæ læto ubere laudis
 Alta sonans; nec se ipsa capit, jamque immemor
 alvei

Amisium affectat, Paderæque incurrere gestit.

Tu fluvios, patriosque insigni marmore fontes
 Splendidus exornas Princeps; at clariùs idem
 Aureus inscripto decorasti carmine Vates.

Romanam
humoristarum
Academiā
Princeps rexe-
rat.

Vestphalicis & jam Romanus fontibus *Humor*

Invidet, Iburgi aut Smechtani ruris ocello;

Ille tuo quondam imperio cultuque superbus
Humor : & Arctoos Tiberis suspirat amores.

Auspiciis properant Franci Regalibus amnes :

Pieriis Caput agnoscunt venerabile Nymphis ,

Argutoque tuos plausu meditantur honores.

At tu nec tenues obscuro nomine rivos

Despicias , absterfoque doces se evolvere limo,

Felici alliciens ductu per amœna roseta.

Hinc mihi se agglomerans undam vocat unda se-
quacem ,

Neuhufiosque petit lucos. ipse obvius ultro,

Et molli invitans aditu blandissimus hospes

Accipis , Aoniâque obtendens fronde coronas.

INUNDATIO BATAVICA

Regiis armis objecta.

I.

FINITIMI exitio, depressis parcere terris
Oceanum docuere, furentumque agmen aquarum
Aggeribus multaque operosi mole Batavi
Castigant, franguntque minas, frænisque coercent.
At LODOICÆAS acies depellere frustra
Mœnibus obnixa, & vallo rapida arma morari.
Jam Franci incurfu Martis, vastoque tremantes
Diluvio involvens terras Victoria merfit.

II.

Hactenus educto patulos munimine fines
Littoraque egregiæ certantes viribus artis
Oceanî assultus contra furiasque tueri;
Quis labor hic vobis, quæ mens nunc læva, Batavi,
Molibus abruptis spumantem accersere pontum?
Scilicet auxilio Neptunum in Franca vocastis

Arma, laboranti si quâ succurrere Terræ
 Evaleat : pavidasque immixtis fluctibus urbes
 Cingitis, atque alto latitantia gurgite castra.
 Haud aliter potuit torrens Victoria sisti !

III.

Nequicquam experti Vulcania tela Batavi,
 Agmina subsidio Neptunia denique poscunt,
 Et Franco objectant undosa repagula Marti.
 At liquidos obices glaciali frigore coget
 Proxima hiems, bellique moras in commoda vertet.
 Vincla ferens Nereus sese substernet ovanti
 Ipse etiam Gallo domitus. Ni Regia discat
 Jura pati, ponatque animos gens victa rebelles;
 Tunc alio rubeant stagnantes gurgite campi.

IV.

Amstelodamæ quæ mœnibus urbis oberrat
 Circumfusa maris facies ! fugientia latè
 Arva natant, Phariosque imitata Batavia tractus.
 At limo felix Ægyptus, & ubere Nili
 Frugifero. falsâ steriles uligine campos
 Quattuor hîc miseri deflent in lustra coloni.
 Quis furor, ô cives, placido præferre furentem
 Nerea victori ? tot opes censusque beatos
 Perdere, ne pereant ? ac, ne Gradivus inundet,
 Sternere agros, longoque obsidere mœnia fluctu ?
 Oceani dives spoliis, & pinguis alumna
 Tethyos, Eoas quæ traxerat æquore gazas,
 Gens pelago & ludum & prædam debere fatetur.

V.

Unde procelloso confusa elementa tumultu,
 Et nova diluvii campos oppressit imago ?
 An solito major Nereus, validoque tridente
 Acrior impacto assurgens, munimina terræ
 Dispulit; exuperansque obices, immane ruinâ
 Littoreâ molitur iter ferventibus undis ?

Fulminibus parcens ultor, num Juppiter Austris
 Turbidus ac nimbis, & Plejade sævus aquosâ,
 Immensæ autor agit cladis? num torvus Orion
 Oceano excivit fluctus, cælove refudit?
 Hoc Mavortis opus, miserique ars dira pavoris.
 Intempestam hiemem, dum belli incendia flagent,
 Æstate optabat mediâ, votisque vocabat
 Tempestatum iras Batavus, pluvialiaque astra.
 Sed frustra. siccus Lodoïco militat æther.
 Terra nec oratam dudum, variasque per aulas
 Quæsitam præbebat opem cunctantibus armis.
 Tutelæ insolitam speciem tum denique ab ipso
 Hoste petit lymphatus; & aggere vasta recluso
 Claustra emolitur, ferratosque objice postes:
 Auxiliarem undam trepidantibus advocat oris.
 Illicet horrendâ ruit ingens mole, revulsis
 Finibus exultans, spatiiisque excurrit apertis
 Omnia permiscens convolvensque omnia pontus.
 Densâ repentino circumsonat insula fluctu;
 Urbs Batavo quàm crebra solo & stagnantibus
 arvis.
 Jam scopulos arces referunt, turritaque castra:
 Aërii affuso decrescunt gurgite muri.
 Æstuat ingenti tremefacta Batavia motu,
 Fracta armis, fœdè laceris nec jam artubus hærens:
 Ac metuens graviora, vagæ quàm Cycladis instar
 Vellet in æquoreos abrupta evadere tractus!
 Orbis ad extremos, Europæ transfuga, fines
 Proriperet sese; Eoo nec tuta recessu,
 Franco instante, suis pavitans sese abderet Indis.
 Quod superest; via subsidii quæ proxima, pontum
 Evocat, admissumque hosti veterem objicit hostem.
 Naufragio tentata salus. Victoriâ terras
 Occupat, attonitosque urget. spes omnis in undis.
 Amphibium hinc pendet genus, & Neptunia turba.

VI.

Necdum etiam satis est undarum ! Æstasque Batavos
 Et glacialis Hiems pariter metuenda subegit
 Damnosa auxilia & fluctus accire furentes.
 Sic juvat hostilem pelago restinguere flammam ;
 Sanguineasque abolere notas. Jam littoris altas
 Perfodiunt moles , arctosque odere meatus.
 Ut portæ patuere , latent sub fluctibus arva :
 Janque superfuso tercentum gurgite pagi
 Oecubuere ; unâque involvit cuncta ruinâ
 Naufragium insuetum , horrendum. maris ille ty-
 rannus

In terras conspirat atrox , & turbidus undas
 Auster agit , plangente solo. commune sepulcrum
 Oppidaque populosque immenso funere merisit.
 Pinguibus insultant armenta immania Protei
 Æquoribus camporum , ubi ludere mollibus agnis
 Ante datum est : & quo pastores gramine nuper
 Inflabant calamos , conchâ Tritones anhelant.

Ah cœcus nimium Timor , atque improvida rerum
 Cura , malum accersens fugiendo ! & clade periculum
 Præsenti redimit , fatisque occurrit âcerbis.
 Quamquam anceps Batavos , Timor an Furor ? impe-
 tus armat.

Quo noceant hosti , Trajectoque influat æquor ,
 Oceani rupere moras , seque ac sua mergunt
 Ultro ipsi : nec jam laxis temeraria claustris
 Temperat Ars , rapidosve coërcet limite fluctus.
 At Francum glaciata vetat si flumina sicco
 Exuperare gradu ; remis per aperta vagari ,
 Navalique dabit terras perfringere bello.

VII.

Expectata diu Batavis , tandem agmina vindex
 Impulerat , Franco armorum violata tumultu

Juraque Septemvir majestatemque tueri
 Fervidus Imperii, raptasque reposcere prædas,
 Corpore divulsa augusto componere membra.
 Hinc Batavis oblata Salus, hinc alma refulsit
 Libertas. Juncto processit fœdere moles
 Conjuratorum Procerum, quos Cæsaris ales
 Antevolat, Galloque movet fatalia signa.
 Heu miseri, quos illa petit vis alta Tonantis!
 Horrida fulmineâ nubes superimminet irâ.

Sed graviter, lentoque trahens vestigia motu;
 Post varios flexus, longarum dura viarum
 Per terras spatia & crebros emensa per amnes;
 Quæsitam ut demum Rheni stetit agmen ad oram,
 Jamque obstructa videt latè loca robore Francô;
 Finibus exclusum Lotharis, Batavisque repulsum,
 Mœsta retro flectit trepido vestigia cursu;
 Votaque Cattigenûm, spes & frustratur hiantes.
 Prævalido ceu cùm frænatus ab aggere torrens,
 Torquet agens sese nequicquam, ac spumeus irâ
 Infremit, atque in se rediens densò æstuat orbe.

Quid vos, Cattigenæ? lapsis quam denique rebus
 Exoratis opem? glacie concrevit inert
 Plurimus & fossas humor constravit & amnes.
 Nec frigent, hiemes inter, Mavortia Gallis
 Pectora, nec posito languescit dextera ferro.
 Celtica Dux agitat qui LUXEMBURGICUS arma,
 Trajecti regit imperiis victricibus oras;
 Sidere jam vestro & brumâ metuendus amicâ,
 Sollicitos premit, ac tremefactis mœnibus instat.
 Hinc rogos, hinc sanguis pagos funestat & urbes.

Ergo littoreas latè recludere moles
 Præcipitant Batavi, atque operosa resolvere claustra,
 Vincetasque hiberno fluviales frigore lymphas
 Proluere; armorum incurfus errantibus undis
 Sistere, inaccesas urbes & castra foyendo.

Quæ pelago amorint, præfixa repagula Franco
 Nempe rati, patriæ memores nec parcere, inundant
 Omnia, dum Celtas reprimant, periisse parati.
 Aggeribus tot jam Oceanus per lustra superbis
 Incassum obluçtans, fræna indignatus, & alto
 Cum fremitu assultans quassansque immania claustra;
 Protinus immissis regnat violentus habenis.
 Rerum unam cernas faciem, campumque liquentem.
 Arvaque fluminaque, & crebris plaga confita villis
 Castellisque jacent nullo discrimine, eodem
 Hausta lacu. pecorum strages, hominumque profundo
 Rapta quis enumeret confusis millia fatis?

Scilicet invictos restagnans unda moretur
 Franciadas. domat effusum vigor igneus æquor.
 Sic, ubi congressus Pelidæ Xanthus, aquarum
 Agminibus torrens victorem involvere certat;
 Vulcanus rapido immittens violentior æstu
 Undantùm flammaram acies, erumpere ripis
 Ausum Semideum proturbans hostis agebat
 Fervidus, in medioque urgebat torridus alveo.

Nam quid fossa ingens Drusi; nomenque timendum
 Romulidis, & Cæsareo vix ponte subactus,
 Fidentes juvit Batavos in Gallica Rhenus
 Arma fremens, geminoque minax in prælia cornu?
 Intrepidus, tumidoque insultans Guichius amni,
 Ferrum inter flammamque adversos tendit in hostes.
 Quo duce mox animis ardentque ruuntque manipuli:
 Spumantem audaci Rhenum fregere natatu.
 Ærea belligeri subiit juga pontis, in altum
 Diffugiens, strepitu domitum se quæstus inani;
 Nudavitque arces, turbataque castra recludit.

Oceanum frustra, conjuratasque procellas
 Armetis, Batavi. prodit se talibus amens
 Auxiliis pavor, atque animos læto adjicit hosti.
 Ipsa etiam nunc arva metu fugiuntque tremuntque,

Terrarumque latent pallentes undique tractus.
 Præceps heu nimium, & propriæ gens arbitra cladis!
 Per latus ipsa suum Gallos petit, ac perit ultro
 Ne pereat: clademque semel sibi barbara, quantam
 Nec velit aut longis valeat Mars Gallicus armis,
 Conscivit furiis atrox, & naufraga terris.

At tu multifidum, ceu rivis sectile, carmen
 Accipe, Musarum Princeps, undamque loquacem,
 Diluvii Batavi quâ plurima ludit imago:
 Neu, fluctus optatum inter lenimen amarus,
 Quo Musæ moresque tibi maduere, beati
 Nectaris huic pigeat partem aspersisse fluento.
 Sic tua, Pæoniæ fons nobilis ubere lymphæ,
 Pingua qui creber felicibus arva fluentis
 Dulcè rigat, tristes avertat corpore morbos,
 Diluat & curas Domino: nec suavia tantum
 Iburgi Smechtæque tuæ liquidissima mella,
 Quantum læta sacra decurrant flumina venæ.





SILVARUM

LIBER II.

CANDIA.

A N. M. D C. L X I X.



ILLA ego , cui pugnax in partes scin-
ditur Orbis ,
Meta Musulmannûm furiis , & pu-
blica cura
Christiadûm , majorque meis specta-
ta ruinis.

Æterno premor obsidio : tot ferrea lustra
Exhausti ; mille assultus , mille agmina fregi :
Nec victos vicissè datum est. En , maximus urget
Imperii dux Ottomani ; sævitque perennis
Impetus , accrescitque morâ. Sultanus & ipse ,
Jam propior , viresque suis animosque ministrat :
Barbariæ toto incumbit mihi pondere moles.
Naufragiis sparfos infamant funera portus ;

Sanguineum exundat campis mare ; fulminat aër ;
 Tartareis etiam bellum surrexit ab antris ,
 Vis armata dolo , & cœco grassata meatu .
 Omnia subvertit ferro crudelior ignis .
 CANDIA jam cinis est , urbisque informe cadaver .

At vos , ô Proceres , sacro quos nomine signat
 Relligio ; quos aut Pietas , aut Gloria tangit :
 Heu , laceram , atque inter fumantia busta jacentem ,
 Dum licet , aspiciate , & medio revocate sepulcro .
 Tandem Christicolas post civica prœlia gentes ,
 Quâ patet Europæ tractus , Pax alma revisit
 CLEMENTIS magni auspicio : nunc altera bella
 Pace ipsâ meliora vocant , solitisque triumphis .
 Et Pacis Martisque idem sanctissimus auctor .
 Cuncta movet , terraque Pater cœloque reposcit
 Angustis in rebus opem , labarumque coruscat .
 Signiferi augusti motum atque exempla secutæ ,
 Ingentes animæ , tenues servate clientis
 Reliquias . Mundo fatales hæctenus iras
 Sustinui , immanemque objectu corporis hostem
 Arceo , jamdudum vestros torrentibus armis
 Incurfare avidum fines . In me omnia regna ,
 Communisque arcem causæ defendite , Reges .
 Teutones , Aufonidæ , Hispani , quoscunque lavacrum
 Cæleste intinxit populos , Christoque dicavit ;
 Ah , tanta obluctantis adhuc post vulnera morti ,
 Auxilio properate ! cruor fluit undique membris ;
 Undique suffossâ pendens tellure labasco .

Tu , decoris studio ante alios & robore princeps ,
 Victricem huc , LODOÏCÆ , manum & felicia tela
 Tende age , Turcarum terror , spes ultima Cretum .
 Quod superest , Venetis opifer virtute tueri
 Fortunâque potens , captivaque littora & urbes
 Asserere , huc lectas vindex immitte catervas ,

Quò Deus, Heroumque vocat dignissima palma.
 Subsidii jam primitias, floremque juventæ
 Nobilis admirans; possit quid Gallicus ardor;
 Agnovi, dextrasque & prodiga pectora vitæ
 Thracum acies sensit, castrorumque horruit agger.
 Mox Francæ emeritas classi involitare cohortes
 Percinit, Odyssiis cladem, mihi Fama salutem.
 Molibus insanis operum, castrisque superbis
 Vizirum ac trepidos cerno diffidere Bassas.
 Annuat, ô, nostris evictâ cladibus irâ
 Bellipotens, scelerum vindex, hostilia tela
 Natorum in pœnas certo qui temperat ictu;
 Frangitque, ac tumidos elidit numine fastus.
 Armatum & læsâ pro Relligione Leonem
 MARCUS agens, tantam placido spem fidere firmet,
 Bistonias elapsa plagas, mihi que ipsa superstes
 CANDIA, ruderibusque meis invicta resurgam.

De Cretica
 expeditione l.
 4. Heroic.

IN EANDEM NÆNIOLA.

OCCIDIT, heu, sævoque jacet captiva Tyrannò
 Candia. quæ studiis Orbem distraxit & armis,
 Occidit infelix irato Candia cælo,
 Virtutisque theatrum ingens, vastumque sepulcrum.
 Non Ostenda suos æquet, non Troja labores,
 Illa triennali, hæc bello prostrata decenni;
 Quamvis fama loquax, quamvis & fabula casus
 Extollat victarum, & cladibus addat honorem.
 Nec quidquam votis, nec quidquam viribus actum
 Christiadûm. Si quâ servari Candia posset;
 Francâ etiam servata manu, præreptaue fato,
 Odrysiâ æternum staret de gente trophæum.

IN VOTUM LAURETANUM
CHRISTINÆ AUGUSTÆ,

*Cum VITALIS THERON Carmen sic inscriptum
ad Autorem dono misisset An. M. DC. LVI.*

Delphin Coro-
natus, carmen
lyricum The-
ronis, LUDO-
VICI XIII. na-
taliis impen-
sum.

E C C E Coronati fidicen DELPHINIS Arion
Æquora permulcens geniali Gallica plectro,
Itala nunc idem peregrino littora cantu
Personat, Adriacisque Domum quæ præsidet undis,
Palladiæ; Vitalis, honos & cura Tolosæ,
Cætonos decies canis vivacibus annos
Exuperans, studiis necdum juvenilibus impar;
CHRISTINAM, heroo Fidei cœlestis amore,
Gustavi genitoris opes Arctoaque sceptrâ
Linquentem sequitur longè, & veneratur euntem
Picentum ad sacras arces atque aurea templa.

O templa! ô sacraë turritis collibus arces,
Numine quas Magnæ præsentia Virginis implet!
Augustæ haud indicta mihi donaria Cellæ,
Nuper ubi, solennem inter Pæana Quiritum,
Sancta triumphalis cecini spectacula pompæ!
Ast æstri quem nunc temerarius incitet ardor
Therone audito, numeris qui grandibus hospes
Lauretum ingreditur, non inscius ille locorum?
Dumque aris oblata canit Regalia Dona,
Sceptrumque & multo stellantem adamante Coronam;
Virginea ipse sibi textit de fronde coronam.
Ecquis sit lucus, quo se plus gloria Vatis?
Qui Vates, quo se Laureti gloria jactet,
Christinæque ingens pietas & fama perennis?

Fortunate Senex, & in hunc servate Triumphum;
Cum Romam, Errorum domitrix, Regina petivit
Illius auspicio, totum quæ sola per Orbem

Tercentum capitum feralem contudit Hydram.

Vive diu, mellite Senex, ævumque propaga

Ipse tibi æternâ librorum prole superstes.

Te veniens ætas etiam post fata canentem

Audiet Aonium musæ immortalis olorem:

Audiet, & fertis sparget fragrantibus urnam.

Interea emerito tenerum succrescere Vatem

Blandus ama, quem dono acuens plausuque laceffis.

Nescio quas venæ salientes ubere fingis

Divitias bonus, & raros Heliconis honores.

At quæcunque manet tenuem fortuna Camænam;

Spes gratata tuas, & amicæ credere luci

Parciôr assurgens, magnæ se subiicit umbræ.

AD CLARISS. JUL. HIPPOL. MENARDERIUM.

DUNKERCA

Ex Britannis à Rege Christianiss. Recepta.

PALMARUM decorumque ferax, Neptunia Francis
Nunc demum triplici cessit Dunkerca triumpho,

Urbs pelagi dives spoliis, mox præda Britanni

Fœdere pacifero parta & socialibus armis.

Bis ferro domita, & largo priûs empta cruore,

Mollibus hîc Regum pactis auroque recepta

Æternos placidi celebrat Victoris honores,

Mutato felix Domino, sacrataque jura

Gratatur vinclis asserta, jugoque profano.

Advolat, hibernâ nil tempestate moratus,

Irè per Arctoas glacies, Borealia contra

Tendere flabra ferox; & cursu fulgura, & acri

Sidera Rex animo motusque imitatus Olympi,

Nocte dieque viam vorat indefessus agendo.

Littoteæ invecro tremuerunt Principe moles;

Oceani posuere minæ, longeque corusco

Sole refulgentes, nova lux incendit arenas:

Adversa emicuit candentibus Anglia faxis.

Et jam magnanimo Pietas comes addita Regi
 Ingreditur, sanctæque agitât spectacula pompæ.
 Munifica explicuit facilem Clementia dextram;
 Splendidaque arcessens gemino commercia mundo,
 Immunes aperit portus, gratissima nautis
 Hospitia, & valido crescentes aggere muros.
 Belgica concurrit, plaudentibus undique turbis
 Victorem mirata suum, cælestiaque ora
 Fulmineo aspersam Marti gestantia Pacem.
 Ipse autem plebi immiscens sese arduus Heros
 (Insolito summotâ cohors prætoria jussu
 Dum lateri procûl absistit) conferta ruentum
 Excipit officia, & placito importuna tumultu.
 Cuncti ardent, Regemque alacres contingere certant.

Clare MENARDERI, Pindo spectatâs & Aulâ
 Omnigenas vasto qui pectore colligis artes;
 Dic age, fecundo interea quæ pectore versas
 Consilia, ô Francæ decus Ausoniaeque Camœnæ?
 Ecquo Borbonias meditaris carmine laudes,
 Jucundum solitumque tibi? curasne moratur
Tergemina Obsidio; bellumque in pace retractas,
 Pacis opus sævo armorum molitus in æstu?
 Certantem historiam Crispo, lectissima facta
 Gallorum, Insu-bres pariter Belgasque superbis
 Urbibus exutos, monumenta ingentia condis.

Et rebus fidum egregiis adjungere testem
 Dignatus, comitemque viæ, Famæque perennis
 Præconem, Dunkercæ olim sub mœnia duxit,
 Castraque virtutesque avidus spectare suorum
 Borbonides, campumque Hispanâ strage calentem.
 Attonitæ ante oculos Gravelinguar, arcesque sub ipsas
 Hesperio necdum excussas, per aperta tetendit
 Jactum intra tormenti equitans; frontemq; tremendam

Extulit hostili volitans Lodoïcus in actâ.

Ergo age , quid Pindum lentus frustraris & Aulam?
Quin celebris monimenta viâ , doctosque labores ,
Museo pressos nimium , cæloque negatos ,
Ire per ora virum , superasque erumpere in auras
Annuis , & veterum primæ succedere laudi ?
Saltem quæ patriæ , summo quæ gloria Regi
Debita , languentes accendat corpore sensus ,
Reliquias morbi abstergens ; animoque caducas
Sustineat vires , operosaque cœpta coronet.

HEROICÆ PATIENTIÆ

CHRISTIANÆQUE FORTITUDINIS IMAGO

Ex delineatione rerum Canadensium expressa.

HORRENDÆ visu facies ! hominesne , feræne ?
An nova monstrifero rabies erupit Averno ?
Barbarica attonitæ nam quæ spectacula menti
Obiicit , atque oculos infueta exterret Imago !
O scelera ! ô tragici monimenta infanda furoris !
Silvestres Furæ victricibus omnia tedis
Incendêre : volant undosæ ad sidera nubes ,
Tartarei vapor ignis ; & implacabilis ira
Funestam exequitur cladem , rapidoque per omnes
Turbine sanguineæ grassatur Imaginis oras.
Conjurata Dei crescentem excindere cultum
Agmina bacchantur : mediæ inter crimina cædis
Feralesque rogos lymphato corde triumphant.
Fervet agens Orcus , stimulisque inmitibus iras
Incitat , admissusque intra præcordia sævit.

Heu mundo æquævi saltus , stabula alta ferorum
Hiroquiûm , glacie nivibusque horrentia latè !
Heu nemora indigno toties perfusa cruore
Christiadam , & flammis toties recalentia nostris !

Ecquando tantæ vidistis stragis acervum ?
 Quæ tanta in fragiles dispersa incendia quondam
 Erravere casas ? & ferro victor & igni
 Omnia permiscens , Huronibus addere Francos
 Gestit ovans , natisque Patres , sacrosque profanis.
 Confusâ hostiles saturarunt funera flammæ.
 Terribiles vario formas illusâ colore
 Larvarum in speciem , gens insidiosa latronum ;
 Nec magis urforum villosas corpore pelles ,
 Quàm mores induta animis , ruit impete vasto
 Silvarum è latebris : pagos nil tale timentes
 Invadit , nullo defensos milite pagos.
 Murice pars torquata nitens , pars duplici gyro
 Ceu teretis gemmæ duram circumdata frontem :
 Tela gerunt alii , celeresque in fata sagittas ;
 Bombardâ ille minax , rigidâ ferus ille bipenni.

Eminet hîc vultu ira truci , pictique furores
 In charta vivunt , & adhuc crudelè renident
 Aspectu læti scelerum. Quò te ignea mentis
 Vis , DANIEL , rapidos adversum impellit in hostes :
 Scilicet ut subita deprensæ in peste , fugaces
 Elabantur oves , rictus atque ora luporum
 Sanguinea incurrens , & murum pectore supplex ,
 Prodigus , ah , vitæ Pastor ; certumque lacessis
 Obvius & denso recipis cum vulnere lethum.
 Hinc tua membra , Pater , flagranti injecta sepulcro,
 Ædiculæque ruinam inter , stragemque tuorum ,
 Funereâ absument flammâ rogos. At pius ignes
 Sacrilegos inter , nil jam lustralibus antris
 Flammæ debens , purgatoque emicat auro
 Clarior , ætheriasque animus succedit in arces.

En turba in media gemini , par nobile , Patres ;
 Qui captare fugam moniti , pedibusque salutem
 Quærere ; constiterant animis cælestibus ambo
 Invicti Heroës , magnasque instantæ periclo

P. Antonius
 Daniel S. J.

PP. Joan. de
 Brebeuf, &
 Gabr. Lalle-
 mant.

Devovêre animas. alienæ cura salutis
Immemores agit usque sui, lethoquê paratos.
Hinc atque hinc trepido turbata mapalia casu
Pervolitant: & vitæ alacres, fata inter acerba,
Æternæ referare aditum, puerosque senesque
Hostis ad incursum lustrali spargere lymphâ;
Aut, pia quos Metanœæ adigit vindicta fateri
Suppliciter noxas & conscia prodere corda,
Abluere ardentes, stygiisque exsolvere vinculis.
Tantus amor Christi, & formosæ gloria mortis!
Ast illos meritis pro talibus undiquê vexat
Hiroquiûm truculenta manus, pœnasque per omnes
Proripit. atque inopes primùm detraxit amictus:
Tum crebri impacto certatim verberare fustis
Permolit; admotâ nudos face concremat artus.
Talibus officiis, captos gens tota salutat
Semihominum, & scenæ gestit proludere atroci.
Pegmate substructo stabant nudata piorum
Corpora, & irriguo miscentur sanguine busta.
Spectatore Deo & Superûm dignissima plausu
Certat Sævitiæ Virtus, superatque ferendo,
Suppliciis dum se Canadæ furialia monstra
Immanesque oculos pascunt immaniaque ora.

Nigrantum, trifido è ligno, vis dira leberum
Pendula, væ, quales tortorum tendit in usus!
Spumantes agitare undas, altèque sonoro
Exultare æstu, nebulasque rotare sequaces
Aspicias. illos, ubi circum exuberat amnis
Turbidus, elatos capita in veneranda profundunt
Desuper, angusti simulacra indigna lavaeri.
Mysticus ille latex ferventis penditur undæ
Ludibrio. prohi triste nefas! etiamne securim
Consertam appendunt collo (duodena per omnem
Circuitum jacet) & flammâ feralè rubentem
Subjecere alis: sævo nidore fruuntur

Carnifices, prædamque inhiant. Jam mordicus ungues
 Diripuere alii Lalemanto, immota gerenti
 Lumina. mox oculum præacutâ subula candens
 Vi terebrat: penitusque cavâ sede erutus orbis
 Alter, & horrendo suffossæ frontis hiatus;
 Carbonisque oculum supplet vivi insitus ardor.
 BREBEUFO vultum populant, naresque recidunt,
 Mitiaque informi discindunt vulnere labra,
 Maxillasque secant, & obusta in guttura torrem
 Dentibus effractis adigunt; linguæque loquaci
 Numinis in laudes, urente silentia ferro
 Imperitant. & jam laceris æqualia membris
 Vulnera. Nunc demum rabidæ, nunc parcite, tygres.
 Ecquis erit scelerive modus, requiesve furori?
 Parcite: jam cuncto nusquam est in corpore corpus.
 Pars ubi nulla vacat, plagæ undique & undique plagæ;
 Vulnera congeminant; feriunt pro corpore vulnus.

Quin etiam horrifici Canadæ Læstrigones ora
 Viventem malis epulari immanibus audent
 Ipsius ante oculos: semiustæ fragmina pulpæ
 Grandia decerpunt, avidoque trementia membra
 Ore vorant. Medios inter tamen ille dolores,
 Adstrictusque manus palo atque interritus adstat.
 Haud secus ac tenerum carpentes forfice vellus
 Fert nullis querula ora sonans balatibus agnus:
 Sic laniorum iras tormentis fortior heros
 Sustinet, & vultu terrores spectat amico.

Hiroquius (miratus enim, motusque quieti
 Mente Patris) tali dignissimus agmine ductor,
 Armatur cultro, atque infandâ circinat arte
 Elix capitis pellem, & cum crine revellit,
 Ac salientem haurit generosi sanguinis undam,
 Herois bibere hinc pleno ratus ore vigorem.
 Magnanimi sedenim nec tum indignantia Mystæ
 Lumina conspiciens, pectus scrutatur apertum:

Ingentisque animi sedem, cor nobile, dextrâ
Eruit, & crudo spirans depascitur ore.
Circùm alii, tepidis per membra fluentia rivis,
Impasti quo more canes, legere cruorem;
Atque ipso de fonte petunt, laterisque refossi
Intima rimantur penetralia; nectaris instar,
Unde cavis haustus palmis rapuere calentes.
Profuit & Patri feritas: compendia fecit
Pœnarum. Socii cum vitâ extracta sequentem
In lucem tormenta Patris: quanquam horridâ hiulcum
Labe caput; lævamque inflicta bipennis ad aurem
Detexit cerebrum, & vitæ jam prodidit arcem.
Tot victor pœnarum, & amans insistere letho,
Dum lacerum piceoque inclusum cortice torrent
Hiroquii Lalemantum, hæret; fumantiaque ossa
Spiritus inter agens, caros fovet usque dolores.

Mox satur ille malis & fœdâ clade superbus,
Pagum ubi prostratum & vastâ funesta ruinâ
Deseruit præceps loca victor, & avius altos
In patriæ revolat saltus; heu, quale theatrum,
Quam rerum faciem & vestigia certa Cyclopum
Finitimi adspectant Francâ de gente coloni!
Sanguineæ gentis documentum, hominesque laresque
Communi exitio implicitos, atrâque favillâ
Et sanie expavit squalentem audacia campum.
Tristes reliquias, ambesis corpora membris,
Pignora cara tamen gemini pretiosaque Mystæ;
Huronum, fuga quos avido subduxerat hosti,
Sed magis excepti indicio monstrata furoris,
Cum lacrymis teneræque legunt pietatis honore.
Vulnera dum censent, victos desistere tandem
Innumeris subigunt plagis absumpta, dolorum
Quæque suis distincta notis confusaque membra,
Ac nece multiplici. Gratantes figere pulchris
Oscula vulneribus gaudent; thecisque recondunt,

Quà licet, eximiæ certatim fragmina mortis
Christigenæ; ac tumulo cineres invidit avaro
Relligiosus Amor; si fas, & consecret aris.

* Canadensis, ex Algonquina gente,

Arbitrii hoc majoris opus. Nec te, inclyte * JOSEPH,
Transferim, Algonquine puer, quem fune revinctum
Palus habet, diro exercet laniena dolore.

Tres adeo sine pace dies, tres barbara noctes
Tormenta infontem exagitant, miserabile visu!
Si quâ fortè pio Christi præconia possint
Ore excussâ premi. sed vinctis libera palmis
Lingua manet, Christumque canit; comitesque dolorum
Hortatur, brevibusque vetat succumbere pœnis,
Et Cæli meminisse jubet. nex ignea carpit
Tabo stillantes artus: nec gratior implet
Astra vapor, qui Panchæo de ture per aras
Surgit, ad ætherii adspirans folia aurea Regis;
Quàm cælum ambusto veniens à corpore fumus.
Hostia pura litat, lentosque excocta per ignes.

Acrior ecce autem rapido flamma emicat ictu.

Ærea sulfuream provolvit fistula nubem;
GARNERIUMQUE procùl, captum dum lustrat ovile,
Missilis accensâ figit mors plumbea glande.

P. Carol.
Garnier.

Non tamen ille gregis, non ille oblitus Olympi
Extrema jam in morte: suo se in sanguine versat,
Semianimisque ovibus prorepens ultima solvit
Officia, & caulis Superùm transmittit apertis.

Vincit Amor Lethum, Virtusque Acheronta triumphat.

Sed mihi quod fellâs acies, luctuque gravatas
Vulnerat abjectum diversâ in parte cadaver,
Ora supina gerens, manibusque ad sidera versis
Suppliciter? sanctæ vivo quæ gratia curæ.

P. Natal.
Chabanel.

Ah, NATALIS hic est, Canadæ impiger ille viator.
Me miserum! quæsite diu, Pater optime, qualis
Nunc tandem, CHABANELLE, redis! quæ te impia
letho

Dextræ dedit : solum nemora inter devia nactus ,
 Perfidus , heu , Christi vitam desertor ademit ;
 Perfidus , atque alti projecit fluminis alveo .
 Et nunc , egregiæ spoliū lacrymabile mentis ,
 Sidereo quondam cingendum lumine corpus
 Ludibrium undarum fluitat , quod claudere gemmæ
 Debuerant , memoresque aurum servare per annos .

Nunc alia ex aliis ostendunt fata profundæ
 Immenſi ſilvæ amfractus , queis avius errat ,
 Myſtica longinquis portans commercia terris ,
 DUNOUS Christi præco. glaciata per arva
 Tendit iter : latet informis niveo aggere tellus ;
 Confuſæ periere viæ . rumpentia cautes
 Frigora fert ANNAS obnixo pectore fruſtra :
 Vincit hiems , gelidasque adstringit ſanguine venas .
 Ergo infixæ nivi ſubmittit genua Sacerdos ,
 Numina devenerans . ſanctos Amor excitat ignes ,
 Tam magis ille flagrans generoſi in pectore Myſtæ ,
 Quàm magis invalidum divexant frigota corpus .
 Parce , Pater , pulchro rubefactam ſanguine laurum
 Ambire , & ſiccā nequicquam horreſcere mortem :
 Carnificem tibi ſupplet hiems ; penetrabile frigus
 Inſtar . habet gladii . languentia membra rigescunt ;
 Paulatim exoluit duro ſe marmore præpes
 Spiritus : aſt idem defecto in corpore reſtat
 Exanimis membris habitus , ſimiliſque precanti .

Ultima feralis pars eſt obeunda theatri ,
 Quò vocat errantes ſpectaclum inamabile viſus ,
 ISACUSQUE Pater nota ad tormenta reverſus ,
 Et juxta duplices , juvenilia corpora , Galli .
 Heu Pietas ! heu ſancta Fides , majoraque letho
 Corda virum ! triplex , mortis pendente ſub ictu ,
 Poplite curvato , demifſo victima collo ,
 Fata manet . Viden' , ut ſævos aſſurgat in ictus
 Barbarus hinc atque hinc connixo corpore Cyclops ,

P. Annas De-
noué.

P. Isaac Jo-
gues , duoque
Juvenes Galli,
eius comites,
contrucidati.

Torva tuens , cristæque ferox crinalis honore ?
 Altiùs adductis supra capita atra lacertis
 Elatam vibrat , spirans immanè , securim.

O miseri , quæ tanta animos occæcat Erynnis ?
 Quis tantus furor ? ipsum illum , qui limina cæli
 Pandebat , Stygiæque animas fornace revulsas
 Venerat in Divûm æternos missurus honores ,
 Sparsas rore sacro , & partu meliore renatas ;
 Paciferum infando mactatis funere Mysten ?
 Non aliter , quàm si Huronî Dux agminis , atras
 Pago inferre faces , inimicaque figere tela
 Pectore bellantum furat implacabilis hostis ,
 Vi popolare casas , raptasque avertere matres
 Cum sobole Hiroquiûm , totamque exscindere gentem .

Immites animæ , natalibus aspera silvis
 Corda magis ! rigidisne attritos fustibus artus ,
 Infixas digitis præacutâ cuspide sentes ,
 Carnivorisq[ue] antehac præcisos dentibus ungues
 Isaci ; ac morsu digitos truncasse ferino
 Num satis , & raptò mutilatas pollice palmas ?
 Nempe semel vestris extractum faucibus olim ,
 Nec solitos pavisse rogos doluistis , Averni
 Effigiem , & Stygii simulacra horrenda camini.
 Jam toto rediens odia exsaturare cruore ,
 Et malè pacatas (id pœnis defuit unum) :
 Imbuere Isacus revocatâ mortè bipennes
 Debuit , ac truncum demergi flumine corpus .

Sancte Pater , bis sanguineos experte furores ,
 Incassum , heu , quondam præsentî erepte periclo !
 Per varios pelagi casus patria alta reversum ,
 Emeritum pœnisq[ue] exhaustum vidit acerbis.
 Crebra , neque indecori horrescens livore cicatrix
 Attonitos spectantum oculos defixit , & ipsos
 Gallorum Proceres , & Gallica regna * Regentem.
 Tu diramque famem , corruptaque vulnera tabo ,

* Annam, Frã-
 ciæ tunc Mo-
 deratricem,

Et Canadæ immensos glaciæntia frigora fluctus
Corpore perpeſſus nudo ; certamina ruſum
Inſtaurare audax , pelagoque , invictæ , remenſo ,
Tormenti auctorem patrio complexus amore
(Subdola dum pacis prætexit imagine belli
Conſilia , & falſo deludit fœdere Gallos)
Immanem invifis populum , pœniſque notatos
Silvarum anfractus. ſcleratae injuria turbæ
Excidit , & vitam indictâ pro morte rependis :
Ni ferus antiquis detrudi ſedibus Orcus
Impatiens , furiis incenſos excitet hoſtes
Stirngere tela manu , ſopita accendere buſta.

Felix , ô nimum felix , tecumque , JOGUÆ,
Fortunati omnes , placidi queis Rector Olympi
Largius , optatos votis , haurire dolores
Annuit , & magno mercari funere Cælum !
Non lacrymis hoc funus eget ; removete cupreſſos ,
Parcite lamentis : ſacras Victoria palmas
Atque triumphales feſta inter gaudia cantus ,
Præmia digna petit. longorum extrema laborum
Cæleſti æternam patriâ peperere quietem :
Et quot magnanimum fœdarunt vulnera corpus ;
Tot gemmæ , totidem ſtellatæ inſignia frontis
Purpureâ Heroum florentem luce coronam
Contextunt , radiisſque micantia tempora cingunt.

Hæc adeo , ætheriæ miratos ſtemmata palmæ ,
Egregios animi Patres , Canadæque colonos ,
Qua licitum eſt , mediâ jamdudum in morte retentant :
Palantesque greges deſerta per invia ſuadent ,
Mille inter caſus , rerum diſcrimina mille ,
Sectari , & laceræ comites ſe adjungere genti ,
Hoſpitiique dapisſque inopes ; percurrere ſilvas
Cælum abſcondentes , nivibus tellure ſepultâ ;
Vincta gelu maria ac ſcopulos ſuperare minaces ;
Et juga per ſalebroſa , & præcipites anfractus ,

Errantes animas, raptandam ad sidera prædam;
 Quærere, barbariemque Deo tolerare magistro.
 Nulla illos facies, non horrida terret Imago
 Divino indutas virtutis robore mentes:
 Sed magis atque magis pœnarum incensa cupido
 Corda invicta coquit. Tanti pars magna doloris,
 Spectaculi pars esse velint, auctamque cruentis,
 Picturæ intexti, pœnis ornare tabellam.

PACIFICATIO CANADENSIS.

AN. CIO. IOG. LIV.

JAM fluvii campique metu, saltusque lacusque
 Insidiis, nullo hoste, vacant. non efferus ultra
 Per silvas hominum passim venatus agetur:
 Non captivorum laniena, ollæque nefandæ
 Visceribus pingues miserorum, atroque cruore.
 Carnificum posuit rabies: fregere lebetas,
 Discerptos hominum subigentes ignibus artus.
 Horrida belligeri nec pingent ora rubores.
 Nescia Pax fuci, blando Pax candida vultu,
 Cædibus assiduis pollutos expiat arcus;
 Flammivomosque tubos posthac, volucresque sagittas
 Exercebit, agens lustra inter devia prædam.
 Castoreos agitare greges, alcesque juvabit.
 Nec post corticibus pugnas gestare cavatis
 Indignata frement, scopulisque abrupta procellas
 Flumina miscebunt spumoso naufraga fluctu:
 Terrestrique viâ durum proferre laborem,
 Impositosque humeris adigent vectare phaselos.
 Cuncta sed in partem venient elementa quietis.
 Hiroquixæ Paci, nivium mox parcior aër,
 Mollius & cælum clementiaque astra favebunt.
 Æquora difficilem substernent lintribus alveum:
 Silvarum populator agros & jugera lata
 Deteget, ignavamque situ putremque yverno

Rubris colori-
 bus vultum
 oblinere amat
 Barbari ad ter-
 rorem hostiū.

Tellurem flammâ penetrabilis excoquet ignis.
Culta nitefcet humus, surgentque in farra novales.
Et crescent telluris opes, crescente colono.

At vos, ô Christo penitus devota caterva,
Cernite maturis albertia frugibus arva,
Cælestique operæ gnavae immittite falces:
Cernite piscosos verrentia retia tractus.
Ecce autem prædæ Socii gravitate laborant,
Confortesque cient dextras. commercia Cæli
Instaurare licet: secura ultroque citroque
Huronum in patriam, spatio & contracta patefcit;
Quæ quondam immensos via traxerat invia flexus.
Nec modò connexas antiquo fœdere gentes;
Longinquos etiam populos, quos impia bella
Arcebant, Christi imperiis adjungere fas est.
Hiroquiam ante alias, Heroum sanguine multo
Desponsam & pœnis fecundam invadite gentem:
Quinque unâ populi veniunt sub gente domandi.
Ipli adeo, certum propriâ regione volentes
Descripsere locum hospitibus, Francosque colonos
Expetiere ultro. messes sperate beatas.
Hæc sola Martyrii generoso semine culta
Jampridem, glebasque rudes cruor almus opimat.
Certè impensa Patrum fraternæ vita saluti.
Barbarus invisa pro Relligione dolores
Aggerat; & laticis deridet balnea sacri,
Mystrarumque illusa rigat ferventibus undis
Hiroquius capita: & morbi causamque caputque
Pestiferi, cladisque, Fidem ratus; improbus ultor
Omnigenâ sœvit ficto pro crimine pœnâ.

Ite alacres, ducente Deo. sorti æquis utrique
Præmia constituit; seu pacis carpere fructum
Hiroquii ancipites dederint, odiive cruenti;
Si quid adhuc struitur sceleris, cinerique doloso
Subjecti vivunt ignes, armataque corda

Evangelicæ al-
legoriæ.

Depositis servat gens implacabilis armis.
 Qualibus insidiis & prodicione J O G U Æ U S
 Oppetiit, dulci simulatæ nomine Pacis
 Semiferûm nimis, heu, notas pellectus in oras.
 Cæde recalfactum ferrum, rapidâque securi
 Discissum caput, & maculosum sanguine, palo
 Præfixum est, triste abrupta de pace trophæum:
 Collectusque morâ belli furor, impete vasto
 Fœdifragi effudit tantò sese acrius hostis,
 Per saltus pagosque ruens. torrente ruinâ
 Huronum involuit populum, sedesque subegit
 Excisâ patriâ & tectis mutare perustis.
 Ite agite, ingentes animæ, atque in utramque paratæ
 Fœderis aut belli partem, seu jungere CHRISTO
 Immites populos, seu vitam impendere cœpto.

* D. Xave-
 rius.
Spiritus Dei
ferebatur su-
per aquas.
 Gen. I.

* *Angelus a-*
quarum &c.
 Apoc. 16.

Sic vos Diva potens cæli, notissima toto
 Stella mari! sic vos geminis Ignatius ardens,
 Indorum * & Domitor facibus per cœrula ducant!
 Et qui secundæ superexspatiatus aquarum
 Spiritus incubuit moli, cùm prima foveret
 Semina Naturæ, mundique excluderet orbem;
 Carbasa agens & corda secundo plurimus æstu
 Adspiret, Zephyris melior felicibus Aura.
 Nec non & Genius *, pelagi cui credita cura;
 Et cui barbaricæ custodia publica terræ;
 Indigenûm aligeri Vigiles, vestraque viritim
 Excubiæ innocuos placido dent æquore cursus,
 Æternæ famuli Mentis, rerumque Ministri.
 Ætherias fruges divini è semine verbi,
 Nesciaque Oceani corrumpi gurgite falso
 Dulcia purpureo Christi de fonte fluenta
 Vobiscum vehit ista ratis, multamque salutem
 Gentibus, & sacro firmatam sanguine Pacem.

Ast ego palmarem indignus trivisse palæstram,
 Præconis certè partes & munia obibo,

Invidios

Invictos pugiles atque hoc certamine cæli
Præmia digna canens. Et honos erit huic quoque facto:
Præconique aliquâ Victores fronde coronam
Ferre dabunt, pompamque sui comitare triumphi.

Allusum ad
morem Olympi-
um.

IN BARBAROS FOEDIFRAGOS AD CHRISTIANISS. REGEM.

HEr mihi, quod Vates etiam præsagia fallunt!
Silvicolum effrenam rabiem atque immania
bella

Detonuisse, piâ compositos pace furores
Credideram, fractasque iras; jam condita tela;
Vel solis metuenda feris, solisque secures
Quercubus infontes posthac flammæque minari.
Unda gelu, nive terra, obstructumque arbore cælum;
Omnia jam ridere mihi & splendescere visa.
Scilicet hæc quondam licuit sperare: sed Orci
Turbante invidiâ, & resides acuentibus iras
Fœdifragi Hiroquii furiis, Pax alma refugit,
Heu, quando infidum Canadæ reditura sub axem;
Alma redi, & votis responde certa piorum.

Aut tu victrices Americæ immitte catervas;
Ultorisque cie Martis, Lodoïce, triumphos.
Nec te Europa capit; Bellonamque evocat ipsa
Pacis amans Pietas (facili sacra assere bello)
Et Dominum sua regna vocant, fundique vacantes;
Barbariem Hiroquiam, sævis grassantia furtis
Agmina, nec mites Christi patientia cultus,
Accelera justâ armipotens excindere opum vi.
Fors & victa metu, tandem mansuescere discat
Gens inimica Deo, Francisque infesta colonis.
Longimanum, auxilio præsens, Canadensibus arvis
Actutum præsta Regem terraque marique.
Jamque tuâ geminum diffusâ pace per orbem

Sentiat optatam veteris Nova Francia sortem.

Sic erit. armatas video fervere cohortes
Littore Santonico, & rapidis dare linthea ventis.
Reliquiæ Huronum tenues, profugique manipuli
Indigenum, & Franci pariter gaudete coloni.
En, Pacem referens, & Regia signa secutis
Lata supervolat Geniis Victoria classem.
Religioque Salusque feris adnavigat oris.

PAX RESTITUTA.

Sic non vana fides rerum, non irrita vota
Nunc demum cecidere! truces Regalibus armis
Hiroquios cessisse juvat: renovataque constant
Fœdera, nec fictæ gaudemus pignore pacis.
Tracyus instructis Americam puppibus oram
Dux tenet, auxilioque subit. majoribus olim
Expertus bellis, jam barbara cœpta repressit,
Immanesque animos virtute infregit & arte.
Atque hostes quæsisse labor, quàm vincere Franco
Major erat. sed fræna vagos injecta coercent,
Impositæque arces stagnis, castra addita filvis.
Barbariem edomuit terror, gentique salutem
Ipsa parit clades vastatis milite pagis.
Effera jam Paci dociles summittere corda,
Hiroquii veniunt; legisque audire Magistros
Ætheriæ, Christique placet condiscere cultus.

Ergo certa quies; nec pacem injuria turbat
Hostica, promissisque fidem experientia sanxit;
Mutuaque hospitia, & rerum commercia jungunt.
Quin & apex sacris, & Præsulis infula surgit
Quebeco, clavis Majorum stemmata longè
Virtutum exuperans titulis LAVALLIUS, Orbem
Ecce novum gerit; & Francis pia jura colonis,
Et Canadæ indigenis sanctas describere leges
Strenuus exemplis factorumque ordine Præsul.

Illustr. Frac.
de Laval, Episc.
Quebecensis
in Nova Fran-
ciæ pîmus.

SILVARUM LIBER II.

387

Christiadum excultam ritu, moresque vetustos
Exutam patrio Antistes complexus amore
Barbariem, cæloque educere cara laborat
Pignora; quàm linguæ illecebris, tam munere dextræ
Blandus agens, captansque Deo silvestria corda.
Nec minus & complexa pium gens tota parentem;
Suavis & accenso reverentia certat amori.

AD EPISC. PRINC. PADERB.

ENCOMIUM LUDOVICI REGIS &c.

NULLA tui, Princeps, cultu certaverit ora
Franciadum genti. nec tantum imbellia Vates
Plectra tibi, sed tela Duces victricia versant.
En, tua dum latè hibernis grassatur in arva
Foederis infausti nomen; properatque juvatque;
Regis ad imperium, Paderæ certissimus ultor
TURENNUS, modò Teutonicas ut aheneus agger
Sustentare potens Rhenoque arcere catervas.
Virtuti adspirat prudentia, vividus arti
Impetus: ac vitiis intactos candida mores
Exornat pietas, pompamque exosa superbam
Gloria, divinoque Fides spectata triumpho,
Castrisque imperitans & fas & splendidus ordo.

V. Vesphe-
liam Liberatâ
l. i. Heroic.

Nec verò, FERNANDE, Ducum Regumque supremus
Ipse manu LODOÏCUS opem, si fortè reposcant
Tempora, ferre neget, solidumque impendere regnum;
Strenuus hic vindex sociorum, Orbique paratæ
Largus opis, nil Versalias aulamque moratur,
Nec vigili parcit curæ; rigidosque labores
Contextit, gressu antevolans sua signa feroci,
Fulmineam longinqua viam per & aspera rumpens;
Utro æstum brumamque subit, duratque sub armis,
Ac totos affixus equo stat in agmine soles,
Et noctes agit excubiis. castra ipse sagaci
Indefessus obit studio, lustratque per umbram.

Tum si qua increpuit vicino ex hoste pericli
 Turbida suspicio, & cæci terroris imago;
 Advolat, observatque aditus, & tela laceffit.
 Tornacum mihi testis, & aspera castra Duaci;
 Insula, totque aliæ, populis mirantibus, urbes:
 Et domita hiberno raptim gens Sequana motu.

O quoties tenui ille globo stipante suorum,
 Coràm exploravit tentandas molibus arces;
 Tormentique intra jactum, simul arduus hostem
 Sollicitosque Duci comites formidine vibrat,
 Securus tamen usque sui! vallumque minasque
 Murorum intentâ speculatur sedulus arte.
 Obsidiis formam ipse, locum describere castris;
 Agmina dirigere, adversos educere in hostes;
 Effrænos superare amnes novitque soletque,
 Assiduè incumbens operi. Nec Principe dignum
 Ille ratus, palmas alienâ carpere dextrâ;
 Ipse suâ, & pulchro riguas sudore petivit.

Belgica jam toties signavit rura trophæis;
 Jam Rhenum calcavit eques, jam Cæsare major
 BORBONIDES. ubi nunc Parmensis gloria, & illud
 Spinolæ decus eximium, clarique triumphus?
 Ipsa etiam Justi, Rupellâ ex urbe, Parentis
 Laureâ decessit longè, te judice, Princeps.
 Mensëm intra, Batavûm innumeras rapit incitus urbes,
 Indomitas priùs, aut annorum denique lapsu
 Vix duro obsidiô evictas; armisque virisque,
 Arte, situ validas, terrâque undâque potentes;
 Tot fossas fluviosque, & propugnacula Gallo
 Frustra objectantes. primâ ceu fulguris aurâ,
 Regis in adventum penitùs tremere omnia visâ.
 Aspectu patefactæ arces, disjectaque castra;
 Atque ipso trepidæ sternuntur nomine gentes.

Fatalem certo Lodoïcum Numine sensit,
 Victoris rapido stupefacta Batavia cursu

Horruit. ut Cyro quondam, sic ferrea claustra
Bellipotens pandit LODOÏCO, arcesque superbas
Sternere amat. dux ipse præit, dextrâque prehensum
BORBONIUM populis infert Deus; & sua bella
Ultor agens læsâ pro Relligione capeffit.
Expiat antiqua, & ritu violata profano
Templa Batavorum, qui sanguinis actus honore,
Ingenioque sacroque micans BULLONIUS ostro,
Splendidiûs virtute micat; plebisque salutem
Ambiit, & studiis animas venatur amicis.
Hi suaves fructus bellorum, hæc præmia sunt;
Sacrorum reduces devicta per oppida cultus.
Ah, ne cœpta malæ disturbent splendida fraudes,
Tartareique artes hostis, queis funditus omnem
Misceat Europam, funestisque implicet armis.
Christiadas! ne fortè pavor livorque furentes
Concutiat populos, Francis corda ægra triumphis!
Pax tamen, ô, miseris fugiens consistere terris,
Candidam oliviferæ speciem nitidaque Columbæ
Rursus amans pennas, post diram læta malorum
Colluviem & sævis commistas ignibus undas,
Pax redeat; victrixque inimicâ ex gentetriumphet
Relligio, & victum jam se gratante Batavo.
Tum Pacis vigeant Artes, placidæque Camœnæ.
Tuque adeo, belli strepitu curisque solutus,
Publica dum requies Paderæque opulencia regnat,
Regia dona canes; & te, tuaque alma canenti
Munera, præbebis vacuas placidissimus aures,
Carminis ipse mei princeps, & summus Apollo,
Tu; residem laude increpitans, donisque laceffens,
Excutere indignam subigis, FERNANDE, quietem,
Dulcibus & curis musæ instaurare labores.
Doctorum illecebras operum felicibus hausi
Vix oculis; & jam labefacto pectore rapta
Æstuat ignea vis, afflatâ Numinis aurâ.

Munere lata tuo, Princeps, inopina recurrit,
Et nondum clausis exundat copia rivis.

Neu Monumenta loquar, multo jam carmine dicta,
Nec fatis illa tamen cupido celebrata clienti:

En brevis, ast immensum eadem, charta aurea, Regis
Laude patens, Clarii laticis quam dives origo est!

Oceano, validâ Batavi quem mole coercent,
Fortior, aggeribus nusquam vallisque refractus,

Et victor Batavos armis Lodoïcus inundans,
Deucalionææ ceu tempestatibus undæ.

Quantos pauca mihi, sed gemmea carmina fluctus
Elicuere; novâ quando labor improbus arte

Finibus excitum Oceanum, pavida arva prementem,
Irritat, Francisque opponit turbidus armis!


Scilicet effusas Regis vario agmine laudes,

Et quæcunque sonant Batavi præconia belli,

Principe digna manu FERNANDI pagina vincit.

Hæc summa
Gratulationis
Poeticæ, de quâ
l. l.





H. Wattelet del. L. Corbin scul.

SILVARUM

LIBER III.

DE COLORIBUS.

Chromatias proloquitur.



U A M formosa vagos rapiunt specta-
cula sensus,
Æthera seu croceum, seu contra flo-
ribus arva
Collustrare juvat, ridentisve aquo-
ra ponti,

Fuco ubi purpureas liquido sol imbuat undas!
At visus quæcumque avidos miracula pascant;
Nil ingens cæli species terræque marisque,
Infusâ quàm luce color. Thaumantias Iris
Quid, nisi Phœbeo nubes illusa colore est?
Versicolor, vident', ut lymphis salientibus arcus
Fingitur, & vitro circum virgata trigono
Omnia vertuntur? sic ludit amabilis error:
Intentos oculos speciosâ fraude remulcet

Bb iij

Gratior Elysio facies, æquandaque Olympo.

Collane lacteolæ referam torquata columbæ,

Et radiante vagos dorso trepidare colores?

Stellatine oculis Argi, speculifve micantem

Innumeris, cernique avidum, lætumque corusco

Pavonem adversos incendere sole colores?

Ut caudâ conchatus obambulat! ut sua jactat

Gaudia! magnificè circumspicit arduus, & se

Circumit ipse tumens, & formæ conscius ales.

Quæ genus & Colcho duxisti à Phaside nomen,

Non ego te fileam, aut Numidæ guttata volucris:

Nec vos terreni fugentia corpora tactus,

Natæ Apodes cælo. non axis munus Eoï

Psittacus, humanæ doctus commercia linguae;

Nedum, orbi æquævus, Phœnix indictus abibit.

Totne illaudatos, pennarum ostenta, colores,

Cyaneos, fulvosque auro, minioque rubentes

Transierim ornatus, & mista nitentibus umbris

Lumina, & accensos plumis undantibus ignes?

An, quæ sanguineis interlita marmora guttis

Dant Phryges? an flavas Nomadum, viridesque La-

conum

Persequar, aut Pario niveas è monte columnas?

Nec color argento est, tellus quod avara coerces,

Informi massæ, nec læto splendor in usu.

Et sordet, cui corda inhiant mortalia, sordet

Imperiosum aurum, pacis bellicue potestas;

Squallentis glebæ excocta dum facce colorem

Ducat adoratum populis, radiisque superbum.

Unde suum baccisque decus, rutilisque lapillis?

Fallor an eximii laus est pretiumque coloris?

Unio candenti, flammæ imitante pyropus,

Cœruleo sapphirus ovat, viridante smaragdus:

Iridis & centum varios jaculata colores

Pariete in adverso miscet crySTALLINA gemma.

Prata refert, lucos, & flumina pulcher achates.

Quid, victrice manu Pyrrhi gestatus, & ipso
Nobilior sceptro? Phœbumque novemque Camœnas
Expressit. maculis sic discurrêre colores

Sponte sua: mirus Parnassum æquavit achates.

Chrysolitos, adamantas, jaspidas, aut amethystos
Enumerem, nitidi censos fulgore coloris?

Hinc famam genus omne trahit; congestaque in
arctum

Majestas Naturæ, & non imitabile gaudet
Ingenium tot se in species fudisse colorum.

Naturæ genio tamen æmula certat, & audax
Omnia dædalio tentat præstatque colore.

Artifices inter dubiæ certamina palmæ
Scimus, & allapsas volucres fallacibus uvis;
Parrhasique dolos, ipsum quæ Zeuxida fuco
Alitibus facto plaudentem animisque tumentem
Induxere, artem tantum celantia vela.

Sed mage Apelleas tabulas, gratissima Magno
Pellæo decora, & centum potiora trophæis,
Fulmine terribilem dextram, spirantiaque ora
Cælestes animos, Jovis & dignissima nato,
Ceteraque æterni stupeas monumenta coloris.

Quam tota belli incumbens Demetrius acer
Mole premit, Rhodon objecti texere colores,
Protogenis claram arte Rhodon. cedentibus armis
Mœnia servarunt servandæ obsessâ tabellæ.
Nec vinci puduit Regem pictoris amore,
Et Poliorcetæ magnum summittere nomen:
Gloria nec tanti captæ fuit urbis, & hosti
Impositæ leges, vastæque opulentia prædæ,
Perderet ut miros victoria sæva colores.

Regesque heroasque creat; mutâque Camœnis
Arte color certans, immites vincere Parcas,
Umbroso extinctos potis est revocare barathro.

Haud secūs ad mores veniens, Virtutis amatur
Neglectâ Virtute color; studioque petatum
Turpibus hunc etiam factis obtendere cœci
Mortales agitant, famamque colore tueri.
Imbuere antiquâ novitas, à stirpe colorem
Ambit, & obscuræ splendorem arcessere genti.

Cum Graïo tonat eloquio, cùm Suada Latino;
Unum Suada potens diâ petit arte colorem,
Cecropidûm in cœtu, & magnorum ad rostra Qui-
ritum.

Aoniæ Vates frondis meruere coronam,
Ingenuo veri decorant si ficta colore.
Naturæ usqueadeo color utilis, utilis arti.

Jam Regale ostrum, & Latii prætexta Senatûs,
Palmatæque ducum tunicæ, cinctusque Gabini,
Et trabæ, & tanti quæcunque insignia fastûs,
Nimirum augusto fulgent spectata colore.

Gypsata allecant veneres? non capta colore
In gladios ignemque ruis, furiata juvenus?
Te nivæ cervicis honos, te frontis eburnæ
Gratia, te roseis interlucentia malis
Lilia succidunt? color est. color ore decoro
Defluat; aut morbo aut vultum populante senectâ:
Fatali nec Tyndaridis teneatur amore
Priamides raptor; sua nec Briseïs Achillem,
Vel medias inter lauros Chryseïs Atriden
Urat, & Argolicis accersat funera castris.

Nunc age, cui numero ex omni data palma colorum?
Hinc Japones festis nigrum addixere diebus:
Hinc pompa albatos duxit Romana Quirites.
Fascia bellantes insignit candida Gallos,
At rubra Hispanos: & toto discolor ore
Liligeræ se opponit Iber ferrugine genti.
Quin ipsi inter se Franci contendere multo
Cum strepitu, atque alios alii laudare colores;

DE COLORUM PRÆSTANTIA CONTENTIO.

Quæ Prasinorum, aliisque distinctorum coloribus factiones quondam in Circensibus ludis vigerunt, ea sic ad Poëticam disceptationem traductæ sunt, ut duo principum colorum paria, quasi in arenam producta, inter se ludicro certamine componantur.

DE ALBO ET NIGRO COLORE DIALOGUS.

Leucophilus, Melanius.

Leucophilus. **M** AURORUM facies, piceo squallore
capilli

*Æthiopum, tetraque genæ atque informia labra,
Horribiles visu, portenta minacia, larvæ.*

O quisquis niger est, hunc tu, Romane, caveo.

Horat.

Monstrifero nigra ora sinu parit Africa tellus,

Et similes vultus animas, præcordia mille

Feta dolis. hinc Pœna fides. quid barbara dicam

Pectora, & ingenium Libyco truculentius angue?

At formosa virum producit corpora felix

Europæ regio. niveo mens concolor ori,

Et nullâ infecti scelerum fuligine mores;

Celtarum ante omnes populis, quos Graia vetustas

Candentes lactis Galatas de nomine dixit.

Quid, quæ roranti Junonis ab ubere nata,

Lilia lactescunt, Gallorum aptissima genti?

Quid via, quâ magni stellata ad templa Tonantis

Diis iter est, ipso facilis candore notari?

Servat adhuc, niveo cælestis nectare mammæ

Tincta, notas memores, & Lactea nomine gaudet.

Candet ebur, candet jasme, candentque ligustra.

Albus odor, dulcem fata ad suprema camœnam

Extrahit. at verò damnatus Apollinis irâ
 Primævâ specie temerarius excidit index;
 Ex quo per campos abjecta cadavera quærit,
 Ingluviemque atram fœdis venatibus explet,
 Vexat & infauftis corvus clamoribus aures.
 An non cœruleas inter pulcherrima Nymphas
 Leucotheë, Matuta eadem, quæ fidera vincit
 Noctivaga, & reducis præcurrit lumina Phœbiæ.

Melan. Parcivus indigni laudes jactare coloris
 Leucophile, ac probris nigrum fœdare labora.
 Et sua laus Ebena est, molles albescere vultus
 Fœmina amet: formam decuit vis fusca virilem,
 Oraque bellantum. gelidâs effeta pruinas
 Fert ætatis hiems; vitæque insigne caducæ,
 Tempora quæ rari spargunt albertia crines.
 Quàm piget incani vulgò puduitque capilli
 Matronasque virosque! comas fuligine pingunt.
 Alcæus, *nigris oculis, nigroque decorum*
Crine Lycum auratâ cecinit testudine vates.
 Gloria terrarum quondam, nunc sidus Olympi,
 Illa peregrino non aspernata colore
 Æthiopas patrios, & nigri conscia vultûs,
 Vinci indignantes formæ in certamina Nymphas
 Cassiopea vocat. nigram, Jovis aurea proles,
 Arsit: & æquoreo victor, jam Gorgore cæsâ,
 Andromeden rapuit monstro Danaeius heros.

Lenc. Diræ nigrescunt nubes, agrisque minantur
 Concepto imbre graues, fœdæque horrore procellæ:
 Aëra per sudum candentis vellera lanæ
 Sparsa volant. placido Titanis ab ore renidet
 Candida lux, albique dies. Nox atra, colorum
 Prædatrix, redditque chaos, & lumine cassam
 Naturam indignis miseram terroribus urget.
 Dux veris, florumque parens, pelagique tumentis
 Blanda quies, pennâ vultuque Favonius albet.

Contra autem horrescit nigro Notus efferus ore,
Cumque Noto Caurus, & quisquis turbidus antro
Æolio erumpens, nautis lacrymabile fatum
Arboribusque satisque luem cum flamine portat.
Nauta vocat Zephyros; Zephyris clementibus albam
Cædit ovem, & passis velorum amplectitur alis
Felices animas; penitusque furentibus Austris
Nigrum offert Hiemique pecus. mala Numina;

Manes,

Nigrarum placito pecudum veneranda cruore,
Persephonen, Stygiumque Jovem, Furiasque sorores
Sacrorum monimenta docent. at victima regi
Cœlicolũ candens formoso corpore taurus
Sistitur ante aras; puraque in veste Sacerdos
Conspicius, vittis albescit tempora puris.

Melan. Candent accenso prægnantes fulmine nimbi
Obscuras inter nubes: ceu ferrea massa,
Quam faber injectam flammis versare tenaci
Forcipe sollicitus, rapido mox extulit igni
Ardentem, & sævo longè stridore minantem.
Haud alia est cœli facies: sic luce malignâ
Horrificæ candent nubes, & fulgura vibrant
Stricturarum instar; duraque incudẽ gementem
Assiduo instantis fabri sub verbere massam
Desuper incussi tonitrus imitantur, & alto
Hinc atque hinc sonitu convexa trementia quassant;
Forſitan & clarus Boreas, aut albus Japix
Quid peccent, nescire jubes, incanaque fluctu
Irato maria, & laceras torquentia puppes.
Tun' placidam exagitas Noctem, gratissima rebus
Otia præstantem, mollique accommoda semno
Tempora, & optatas fessis mortalibus umbras?
Stellarum nox castra movens, quàm dulcia terris
Explicuit Superũm tacito spectacula lapsu!
Ecquis, ubi æstivos accendit Sirius æstus.

Non scenam laudat nemorum? fugit ilicet omnis
 Umbrosam in vallem campestri ex æquore pastor.
 Lanigeri simul ire greges, armentaque læta.
 Omnibus umbra placet. cantum philomela sub umbra
 Exercet; luduntque vagi per flumina lintres,
 Queis, diffusa supèr, patulis umbracula ramis
 Impendent. tum pulsa chelys; tum fistula molles
 Dat gemitus: liquidum resonat concentibus æquor.
 Seu pinus platano socialem admiscuit umbram,
 Silvescensve ulmo vitis; seu laurea, densas
 Fundere læta comas, ferventia tela retundit;
 Frondosis quem non requies invitet amœna
 Hospitiis circum infesto decedere Soli?
 Phœbigentum certè silvas chorus omnis adorat;
 Umbriferasque petunt sedes, Parnassiaque antea.
 Nec verò, in blandam membrisque animisque quietem
 Nata licèt, Nox Aonio male-amica labori.
 Et non illa quidem solerti ignava colono.
 Mos erat obscuro quondam circumdare luco
 Tempia Deum; & spissâ nemorum caligine sanctis
 Majestas captata locis: interque silentes
 Relligione sacer tenebras diffunditur horror.

Lenc. O venus una hiemis, satus ô castissime cæli,
 Hospita terrarum, quo, nix, te nomine dicam?
 Fermenti in speciem, gremium telluris amico
 Incubitu, teneroque foves turgentia lacte
 Frumenta, & molli sola candida pingis amictu.
 Qui nitor argenti! qualis purissima blandæ
 Auroræ soboles, flavo decus additur auro
 Gemma, Erythræ spoliū, pulchrive superbia Gangis!
 Ut patitur, ferri metuens imparque dolori,
 Vulneribus transfigi aures, insigne superbum
 Fœmina queis aptet! formæ nova gloria, carum
 Pendet onus, gratoque ictu subiecta flagellat
 Dives cœli globus. scandit capita ardua Regum;

Auratâque micat sublimis in arce coronæ
 Unio, sollemnesque Deum spectabilis aras
 Exornat. tenebris, quæ fordida cumque, premuntur.

Melan. In nivibus quid tam egregium? miremur
 aquarum

Scilicet aerias spumas, nimbosque caducos.
 Cerne laborantes tristi sub pondere filvas,
 Nullaque jam agrorum discrimina, nulla viarum;
 Interrupta opera & clausis pigra otia tectis.
 Suspice & Alpinas cautes, rigidumque Niphatem
 Jupiter & quascunque altâ nive contegit arces.
 Hæc juga, Leucophile, & dilectas incole sedes.
 Quin canis & solidâ crepitantes grandine gemmas?
 Ecquid habet majus, concreti filia roris,
 Bacca, globus fragilis, conchæ detractus avaræ,
 Improba cui pretium luxûs infania fecit?

At tu Leucopetræ, Nautarumque *ossibus albo*
Sirenum scopulo pretium quid dicere cessas?

Leuc. Insula præclarum, Oceani quæ maxima, nomen
 Rupibus alba suis jam olim debere fatetur;
 Candidaque Elysio pueros capit insula Manes.
 Albula regnator fluviorum; & vitreus albos
 Sacrato, Clitumne, greges facis amne, Quirinis
 Digna parans templis armenta & digna triumphis.
 Tu quoque Germanos inter non ultimus amnes,
 Albis. at Euxini damnantur nomine fluctus
 Et Nigri horrescunt titulo freta inhospita Ponti.

Melan. Dic age, cur, vatum qui per mendacia crevit
 Albula (sic olim Hesperii dixere coloni)
 Antiquum excussit nomen, Tyberisque vocari
 Maluit, & flavi cognomine lætior audit
 Cœruleive amnis? tetram exhalare Mephitim
 Dicitur Albunea, & Stygias redolere paludes.
 At Niger Afrorum sitientia perluit arva,
 Torrentis zonæ victor. licet ignea semper

Æstas, & nimii depascant flumina soles,
 Ferventes placido solatur gurgite tractus.
Sulfurea Nar albus aquâ graveolentibus auris
 Proxima corrumpit. Phariis qui nubila supplet
 Frugiferosque imbres, pingui cùm se extulit alveo
 Ægypti facilis læta eluvione colonus,
 Maurorum à patriâ veniens, Nigrinque fluento
 Natalem referens Nilus septemplete fontem,
 Felices nigrâ campos oblimat arenâ.

Lenc. Zoile, seu tu *crine ruber*, seu tu *niger ore*,
 Herculeum exantlas heroo corde laborem,
 Zoile, si bonus es: cortinam crede locutam.
 Atra furit bilis: succo loliginis atræ
 Invidia, & nigri livescit tabe veneni.
 Virgineum signat florem pulcherrimus albor
 Candidaeque aprico laudantur pectora sensu.
 Cana Fides, sensu Prudentia cana senili;
 Simplicis & veri nudus, forma optima, candor.
 Innocuæ specimen vitæ, nota certa salutis,
 Spes trepidis color ille reis. væ, calculus ater
 Quos notat. invisum ferali theta nigrore.
 Felices, niveo queis vellere nevit amicâ
 Vitam Parca manu: candenti mollia filo
 Fata fluent. atenim funebris nuncia luctûs
 Nigritia, infaustumque ferens mortalibus omen.
 Candorem & merito quisquam vicisse negarit,
 Ire triumphali solitum ad Capitolia pompâ?
 Candentem currum nivei rapuere jugales,
 Plausibus & nivei cælum implevere Quirites.
 Martigenis nec tam Ducibus, quàm Roma triumphum
 Divino instituit justissima Roma colori.
 I nunc, & *nigrum*, si fas, *in candida verte*.

Melan. Ingenii fomes (Pellæi crede Magistro)
 Nigrescit, rerum illa tenax, Pindo atque Lyceo
 Bilis, & imperii clayum tractantibus apta.

Nec tam canities, seræ fæx languida vitæ,
 Quàm sanctum exornat gravitas antiqua Senatum;
 Fabricios, dignosque piis dare jura Catones
 Sacravit, veneranda, sagax, divina futuri.
 I nunc, & Nigros albo pugnare colori
 Scilicet indignum clama. sed si qua Maroni
 Fortè fides, illo cernatur iudice causa.
 Quid dubitas? tanto certè *deterimus albis*
 Teste color. Veteres meditari perge triumphos;
 Albentes miratus equos. tibi cedat aquosus
 Iste color, morborum index; tibi pallida cura;
 Albescensque metus. tu *parmâ inglorius albâ*.

DE RUFO ET VIRIDI COLORE DIALOGUS.

*Cum aliter ignis rubeat, aliter sanguis, aliter
 ostrum, aliter crocum; has tamen varietates La-
 tina oratio, ex Favorini Philosophi sententia,
 perinde ac formas partesque Rufo subjectas, unâ
 Ruboris appellatione complectitur, vel acuentes
 eum, vel remittentes, vel mista quadam specie
 temperantes. Ac, teste Frontone, non solum Ru-
 fus & Ruber; sed fulvus & flavus & rubidus &
 phæniceus & rutilus & luteus & spadix, appel-
 lationes sunt Rufi coloris. quemadmodum ad Vi-
 ridem caruleus casusque revocantur. ex A. Gel-
 lio, l. 2. c. 26.*

Domitius, Chlorus, Leuc. Melan.

Domitius. QUID mihi cum nivibus, quid cum
 deformibus umbris?

Albinos quamvis Proceres, multoque superbos
 Romula Corvinos tellus celebravit honore.

Audiimus ; sed nil laudesve jocose moramur ;
 Quidquid mollities Albi fastusque coloris ;
 Quidquid falsa Nigri species , & gloria jactat.
 Una placet Rufo veniens in corpore forma.
 Ut cinale aurum capiti , barbæque comæque
 Fulget honos ! nigris Hispania crinibus horret :
 At rutilis generosa comis & vertice fulvo ,
 Heroum fecunda parens & maxima nutrix ,
 Gallia lætatur , tantoque colore superbit.

Chlor. Villorum procul hinc feritas vaccina faceffat ;
 Sulfurei longè crines , & *ahenea barba* ;
 Unde tuæ , Domiti , cognomina gentis , & ampla
 Stemmata decurrunt. Hac dignum stirpe Neronem
 Quis neget ? exarsit furiis tamen improbus ; & cùm
 Aspera jam Galli movissent arma rebelles ,
 Vindicis indoluit levius motuque minisque ,
 Gentili quàm cùm opprobrio cognominis ictus.
 An temere cælo *barbatus* ire cometas
 Astrologi narrant ? Crinitas igne maligno
 Romani dixere faces. lugubre rubescunt ,
 Sanguineisque jubis crudelia fata minantur.
 Terrificus Lunæque rubor Solisque , pericla
 Intentat , ventoque graves bacchante procellas.

Domit. Luce rubet placidâ Vesper ; radiisque ru-
 bescunt

Æquora Luciferi , & radiis juga picta ruborem
 Purpureæque trahunt nubes ridente sereno.
 Massylûm ille pavor fulvo se corpore jactat ,
 Silvarum latè dominus , princepsque ferarum.
 Delicias quæris ? gilyæ prælata , superbas
 Rubra onerat perdix mensas. Jovis armiger ales
 Puniceâ gaudet pennâ ; fulmenque coruscet.
 Invalidus canescat olor , mollisque columba.
 Ne deceat color alipedes , cortina docebit
 Argilii , palmam referunt Spadices honoris.

Quàm rutilante jubâ, tam præpete victor Arion
Igneus emicuit plantâ, Zephyrosque reliquit
Ponè laborantes volucris contendere cursu.
An Balias loquar, & fundentem oracula Xanthum;
Magnanimi Herois bigas, quo turbine flavi
Hectora traxerunt pariter Trojamque jugales?

Chlor. Et glaucos idem alipedes, quo teste superbis,
Parte aliquâ summi Vates dignatur honoris.
Me viror ante alios, & quem non cepit amicus
Ille oculis animisque color? fata læta virescunt,
Gemmea prata virent, & amœni gratia veris.
Cœruleæ Divûm sedes, cœlestia templa:
Cœrulea Oceani domus, & Neptunia regna.
Nereïdum viridesque oculi, viridesque capilli.
Spes animosa viret, robur viret acris juvenatæ.
At curam cœcumque alto sub pectore vulnus
Prodit flava lues, defosso concolor auro
(cui super incumbens, avido fordescit amore)
Tabidum avarities animum flavo exprimit ore.
Flava erumpit agens bilis flavente capillo;
Quot setæ, totidem flammata hastilia credas.
Ira oculis manibusque ardet, linguâ intonat ira.
Fulminat. ô superi, terris avertite monstrum.
Quæ strages populorum, & ostantia sanguine bella!
Cæde natant campi, confidunt ignibus urbes.
Flavet ebur longâ corruptum ætate: senectâ
Arescens herbarum, aut sidere adustus iniquo
Flavescit vigor: atque immiti frigore flavæ
Defluxere comæ; neque honos aut gratia silvis.
Deliciæ volucrum atque hominum, viridissima Tempe:
Musarumque choros viridi Parnassus in umbra
Æternosque agitat cantus. viridesne smaragdos,
Totque alios verno memorem splendore lapillos?
Luctiferas etiam potis est convertere clades
Lætificam in speciem viror, atque incendia gratis

Pingere imaginibus. flagrantis funera Romæ
 Testor, & hortensi speculantem è turre Neronem.
 Ille quidem Æneadûm imperio titulisque potitus,
 Crine genus referens, maculoso corpore fœdus,
 Heu dirum omnigeno concretum crimine monstrum,
 Infantum exitio pastus, patriæque ruina,
 Ardentem potuit Romæ sub imagine Trojam
 Cantare, atque hilari flammæ fucare smaragdo:
 Non tamen innocuum aspectu scelerare colorem,
 Barbarus, & macula sævorum aspergere morum.
 Denique viêtrices Prasino quis reddere lauros
 Abnuerit, palmasque suas, viridantia ferta?
 Et Cumæa virent inscriptæ oracula frondes.

Domit. O folia, ô pulchris virides cum frondibus
 herbas!

Nec prædas hiemis pudor est, ludibria venti
 Magnifico versu frondes agitaſſe caducas?
 Mendaci quàm sæpe virens seges interit arvo,
 Votaque mœrentis deludit avara coloni!
 At quæ maturis flavesceat messibus æstas,
 Nutrix illa virûm, Cereali munere dives,
 Lætitiisq;ue animos & frugibus horrea complet.
 Punica mala vides, queis non formosius horti
 Alcinoi, non Pomonæ felicia septa
 Frugifero in nemore & cultis mirantur amœnis?
 Atque illis summâ præfixus verticis arce
 Nativi effulget radiatus stemmatis orbis;
 Et circumfuso speciosæ murice vestis
 Augustum micuere; & structis ordine granis
 Intima corda rubent. quid, quæ vigilata Draconi
 Diribus Hesperidum frondent mala aurea silvis?
 Floræ primus amor, fragrantis gloria Pæsti,
 Igne fover tenero augustum Regina colorem,
 Hortorum suaves rubicundo lumine Ocelli.
 Quid flos, purpureâ florum cingente coronâ;

Imperii titulo atque habitu qui se arduus effert?
 Et quæ lacteolo jactantur blanda nitore,
 Rubra quoque areolis animosæque Lilia regnant,
 Francorumque micant victricibus aurea signis.
 Vile gravis plumbi livet ferrique metallum:
 Divitis at splendor cui non arriserit auri?
 Auricomos passimque viros, passimque puellas
 Aoniæ multo sonuerunt carmine laudes.
 Egregius formâ, belloque invictus Achilles,
 Ante omnes fulvo spectatus crine Pelasgos.
 Pelides Indo nigrantem Memnona vultu,
 Barbaricasque acies viresque Orientis agentem;
 Pelides toto canentem vertice Cycnum,
 Quem neque fas telo juvenem, nec lædere flammâ;
 Hunc atque hunc Phrygiæ stravit sub mœnibus urbis
 Exanimum: huic genitor quamvis, huic dia creatrix
 Ferret opem; & flavum contra pugnaret Achillem
 Cycni Neptunus, Tithonia Memnonis armis.
 Nec tantum Æacidæ rutilat coma. pectore quisquis
 Concipit audaci Martem, simul eminet index
 Ille animi rubor, & virtutis conscia fulget
 Cæsaries, fusco pavidos prodente capillo.
 Principis audierit tripodem si Chlorus Homeri;
 Principis absistat placito damnatus Homeri.
 Scilicet hæc plenis rerum discrimina chartis
 Maximus edocuit Vatum.

Chlor. Cæco, ecce, colorum
 Judice jam causam vicisti.

Domit. Ast omnia cæcus
 Cernere picta dedit, Clarioque expressa colore.
 Lyncea mens. Phæboque illustrat proximus orbem.
 Mercurius pariter, præsesque Heliconis Apollo
 Immortale rubent, quibus est æterna juventa.

Chlor. At viridi ille tuus lauro redimitur Apollo
 Cæsia oyar, glaucisque oculis clarissima Pallas.

Sed quid ego hîc fictos habitus, ludicra retexam.
 Omnia? mittamus nugas vatesque profanos.
 Ecquid adoratum Isacidis vitulantibus Apim
 Nosti, & sacrilegæ mandata piamina culpæ?
 Disiectum ut castris simulacrum, atque aurea moles
 Vindice Legiferi dextra validaque securi
 Concisa, obtrita, & rapidis resoluta caminis?
 Tum latice infuso cinerem, lustralia jussi
 Pocula fœdifragi exorbent. hic sordida noxa
 Erupit: rufa signati labe nocentes,
 Aureaque epoto vituli barba extitit auro.
 Hoc decus, hoc pretium, & rubræ laus inclyta formæ.

Domit. Judæi quàm bella canis festivaque Apellæ
 Somnia, qui missis divina capeßere nugis
 Arbitria, & cælo demissa oracla jubebas!
 Ultro animis ad sacra vocas monimenta volantem.
 Fabula Apellarum, & vatum commenta priorum
 Discedant. nam quid consulta oracula Divûm
 Respondent? cæli dirimat sententia litem.
 Rufus erat, pulcherque aspectu Isaius heros,
 Lanigerum duxisse gregem Jordanis ad undam
 Assuetus patris imperio; mox pascere magnam
 Progeniem Abrami multa inter millia lectus,
 Pastorale pedum sceptro mutavit Hebræo.
 Agni instar, lacerans ursumque acremque leonem;
 Deinde Philistaum turritâ mole Giganta
 Dejecitque solo, & proprio caput ense recidit.
 Primitiæ insignes juvenis, bellicque cruenti
 Pulchra rudimenta, & Superûm dignanda trophæis
 Gloria! Non contrâ regalibus asper in armis
 Incessit; validamque ferox surrexit in hastam.
 Sed fundam tereti adductam contorsit habena
 Procurrens, certoque adversam vulnere fronte
 Perculit. infixio crepuit diffissa lapillo:
 Et sonitu ingenti procumbens ardua terram

Constravit moles ; gemuit sub pondere campus.

Unde triumphales tanta in certamina vires ,

Majoresque ætate animos , fortissime David ,

Traxisti ? tantumne rudes potuere lacerti ,

Ut quem non alti victricia sæpe Saulis

Tela , neque immensum Judæi militis agmen

Sustinuit ; cunctis unus pavitantibus hostem

Invadas puer , & sternas bellator inermis ,

Et spoliū avulsā referas cervice cruentum ?

Hoc illud rufi promiserat inclyta crinis

Purpura , qua regem insignit natura futurum

Præfaga , & rubro frontem diademate cinxit .

Scilicet hic Regum ille color , Rex ille colorum .

Princeps ante alios , qui limo principe fulsit

Exhinc terrigenæ nomen facturus Adamo .

Non molli vultus Natura colore nivales

Diluit , aut vivā faciem fuligine tinxit :

Sed rubrum esse dedit generis caput ; unde nepotum

Transfusus delecta color manavit in ora .

Hunc adeo , juris princeps , Themis alma colorem ;

Hunc & Relligio Latīa sublimis in arce

Diligit ante alios , quæque alta palatia Regum

Servat Majestas , rubris se insignibus ornat .

Et quid plura canam ? nimirum hic Solis & ignis ,

Ingeniique animique color , castique pudoris .

Melan. Jesseo quæ Nympha tamen cantata nepoti ;

Fusca licet , formā Nymphas supereminet omnes .

Coccina (nil equidem invideo) Tyriique ruboris

Regifico saturam ostenter sese aurea luxu

Pallā ; sed ipsa nigram Solymis Regina puellis

Prænituit faciem Sulamitis ; & ora colorat ,

Intus agens , sacro qui pectora torret ab æstu

Sol animi , Rex cordis , Amor . Sponsine decoram

Cæsariem , & crispas capitis dicemus honores ?

Quale nitet corvus lævis caligine plumæ ;

Haud aliter fusco generosi vellere crinis
 Splendet Abramæus princeps, gaudetque comarum
 Nube coronatam populis ostendere frontem.
 Quin etiam Deus ille, Deus qui sidera torquet,
 Christiadis unum & semper venerabile Numen,
 Montem in Sinæum legis cum lator aperto
 Descendit cælo, visus gaudere tenebris
 Et sese arcano nimborum obvelat amictu,
 Apparensque latensque, & Hebrææ pectora gentis
 Augusto exterrens habitu. tentoria, nubes,
 Digna Deo, sanctique parens nox mystica cultus.

Leuc. Certior an puro, vel amicior ulla colori,
 Quam Superum veniat sententia? Thabore in alto
 Transformis niveo radiavit Christus amictu,
 Æternæ candor lucis. Regnator Olympi
 Cyclade victrices animas Deus induit albâ.
 Ipse novo inscribens candentem nomine gemmam
 Cuique suum assignat sacrum & mirabile pignus.
 Cælestes, hominum quoties venêre sub ora,
 Aëre contexto Genios nitidissima palla
 Induit; & niveo splendebat gloria cultu.
 Sic albos Superos, Manes sic novimus atros
 Dividere adversas æquo discrimine partes.

PHILALETHES ARBITER

Rixam de Coloribus amice componit.

QUIS modus, ô Socii? & tanto certaminis æstu
 Ludicra alternis probra intorquere decorum,
 Et laudes fluxi jactare coloris inanes?
 Nunc adeo vocem hanc adytis sibi quisque profectam
 Occinat. infido *nimiùm* ne crede colori.
 Fallit crebra color: niveoque in corpore sordent
 Atræ animæ, Romano & Punica corda sub ore;
 Candidus & fuscis animus subit artubus hospes.

Purpura, virginei flos & lux blanda pudoris?
 Flavius *, imperii labes; non ille parentem,
 Deliciasve orbis, Fratrem; sed acerba Neronis
 Pectora, sed Cai referens inmania facta,
 Humanæ invisus genti; simul ore ruborem
 Induerat, visus simul ejecisse pudorem.
 Tum crudo nullus sceleri modus. omnia cædes;
 Omnia sanguis erant. sævi rubor ille furoris
 Nuncius, & diri fatalis flamma cometæ.

* Domitianus.

Quid si etiam summos decorat sua purpura Reges?
 Sed tamen & *viola* splendescit *purpura nigra*.
 Proxima virgatis anemone cura tulippis,
 Cernitis, ut gratos variat miscetque colores?
 Haud secus & varia est, nec sanguine cuncta rubescit
 Spineti regina, rosæque tenerrima puro
 Lacte natant folia; & niveæ rubræque sororum
 Gratia rara placet, junctoque haud invida regno.
 Nec minùs hîc aliam foliorum ardore comantem
 Pœoniam aspicias; aliam candore nivalem,
 Vique salutiferam medicâ, quam nomine signat
 Nescia formosi species marcescere floris.

Herculeæ fronti placitam quæ populus umbram
 Ornatumque dedit bicolor frondentē coronâ;
 Candida si foliis, præcelso vertice nigra
 Populus exuperat, victrixque & victa triumphat.
 Fronde virens, eadem rubet ardua termite palma.
 Antè viret, quàm flava Ceres. nascentia vestit
 Munera Pomonæ, vestit Baccheia dona;
 Unus & omnigenos Floræ viror usque colores
 Sustinet, officiisque Palen comprehendit amicis.

Candidus Italiæ Zephyrus, per Gallica regna
 Nigrescit, piceasque agit imbrifer æquore nubes.
 Albus sæpè Notus, Venusini carmine Vatis;
 Luteus est pallor; pulla est Cythereia *myrtus*.

Cæruleumne albumne voces pontumque polumque?

Inficit & confors undas rubor , inficit auras.
 Tuque rosas , Aurora , manu quæ fundis amœnâ ,
 Ore simul candes , & roras lutea gemmis.

Atria fumosis operosaque fercula pompæ
 Ornat imaginibus , rerum clarissima Roma.
 Crescit & offusâ rutilans carbunculus umbrâ.
 Picturam illustrent umbræ : mediisque serenam
 Eduxit lucem tenebris Deus. ipse perenni
 Cursu alternantem noctemque diemque reducit.
 Has Natura vices amat , hæc discrimina rerum.
 Astra ciens , Lunæque choros Phœbique jugales.
 Inducit cælo , qui Phosphorus , Hesperus idem.
 Tot sociat varios arquatâ nube colores
 Concilians Iris , seu vitro aut fonte relucet
 (Titanis ludus) seu gemmâ efficta resultat :
 Tot varios plumâ sociat gens picta volantum.
 Ipsi etiam inter se admoti cùm bella videntur
 Exercere , juvant sese clarantque colores :
 Candoremque acuit nigror , candorque nigrorem.
 Pulchrior est , albens sonipes frontemque pedemque,
 Et nigros oculis sparsus candentibus artus.
 Intertextum ebено regalem insignius aulam
 Ornat ebur. speculi crySTALLINA ridet imago
 Grator , argenti quoties emblemata flavam
 Distinxere cedrum , aut maculas testudinis Indæ ;
 Circùm inclusa nitet glacies quo lucida septo.

Quid juvat argutâ , socii , committere rixâ ,
 Jucundos multâ quos profuit artē colores
 Jungere ? Naturæ passim discordia concors
 Temperat , & lætos secundo fœdere miscet.
 Atque aptas rebus placeat si fingere formas ;
 Conjugio sanxit pacem , Viridemque marito
 Nigrities peperit Rufumque Albore colorem.
 Cadmæo fratres scelus est turbare duello ;
 In geminum furor est natos armare parentem.

SILVARUM LIBER III.

411

Verùm age, si libeat superis præcidere litem
 Arbitriis; veniant monimenta ad sacra vocati,
 Quos pulchrâ inter se componam pace Colores.
Dilecti geminant Candorque Ruborque decorem.
Iesseâ radice virens it *virga* sub auras,
 Florida virga Deo: passis superincubat alis
 Candidior cycno & potior phœnice Columba.
 Mista die risit, Bethleo conscia partu,
 Abstulit & vanos rebus *Nox* alma Colores.



H. Watel' jr.

L. Corvin sculp.



SILVARUM

LIBER IV.

AD FERDINANDUM

EPISCOPUM AC PRINCIPEM PADERB. &c.

*De priori exemplo Panegyrici Poëmaris per infestas
armis vias deperdito.*



R E G O Castalii monumenta amissa la-
boris ,

Quæ , FERNANDE , tibi properata
volumina littus

Misit Aquitanum , viridi frondentia
lâuro ;

Dum tua , Neuhufiô castrô devecta , vicissim
Splendida Germanos linquebat littera fines !

Quâ fati invidiâ ? quâ vi ? quâ fraude locorum
Chartæ infelices , gratæ argumenta Camœnæ

Interiere, graves nimium nimiumque profanas
Passa manus? Phœbo male-amici tempora Martis
Ferreæ, nil Vatum fasces, nil pignora curant.
Clangoremque tubarum inter, raucoque sonora
Tympana mugitu, bombardarumque fragores,
Bellonæ horribiles tonitrus, imbellia plectra
Ah, tenuem furdo disperdunt milite musam.
Sæva latrociniis, passimque infesta vagantur
Agmina; Pegasæ abruptunt commercia gentis.

Parcite crudeles, seu vos Germania milit,
Seu Batavi Francive agros tenuistis & amnes,
Parcite; neu sacros armis violate Poëtæ,
Et FERNANDÆO præscriptum nomine carmen.
Hosti etiam venerandus apex, & plurima Virtus;
Quæque Viri geminum volat inclyta Fama per Orbem;
Nec belli consulta agitat, nec turbat inermis
Calliope. Pacis gaudemus munere Vates,
Puras & petimus lauros. vos illa morentur
Scripta Ducum suspecta, notis horrentia cæcis;
Acribus excubiis vigilique obnoxia curæ.
At mihi FERNANDUM celebrans innoxia apertis
Musa modis Ubios fertur visura Colonos;
Inde sacros Paderæ Fontes, Dominoque beatam;
Latus Alifoni quâ Luppia confluit, aulam.
Illic hospitium nobis, & Regia Pindo
Nobilior, fociis gaudens ubi sancta Camœnis
Religio placidâ populos ditione gubernat.
Reddite, jam tanto percussi nomine, donum
Missile Raptores. prædam servatis inanem?
Laurea non baccis animos hæc pascet avaros.
An solus placuit furor, atque insana voluptas
Omnia vexandi, & spoliata gloria Musæ?
Nil precibus, meritis nil improba corda moventur.
Barbaries doctas insultans proterit Artes.

Non ego vocales (facilis jactura) tabellas

Hic gemitu repeto : dilati munus honoris
 Sollicitat , quo te , Princeps Auguste , per ora
 Ferre virum , summo attollens molibar Olympo.
 Antè quidem , curis aliò distractus iniquis ,
 Nec jam Regales palmas citharæve tubæve ,
 Ceu quondam , resonare memor ; surdusque vocanti
 Famæ absidebam , & longum tacita ora premebam.
 Vulgarem averfus plausum , laurosque profanas ,
 Sacra revolvebam placiti monumenta laboris ,
 Emeritas ad præla parans suprema Camœnas.
 Partem etiam celebris vidit me BORGIA pompæ ,
 BORGIA Cœlituum fastis adscriptus & aris ;
 Terrarumque novos meditantem audivit honores.
 Inde tuis avidus libris donisque pependi ,
 Musarumque Auspex , & Rex , FERNANDE , sacrorum.
 Tempora præcipiti rapiens fugientia cursu
 Laudibus impendisse tuis gratabar ; & aulæ
 Reddita Neuhausiæ jam spe mea vota fovebam ,
 Heu rerum ignarus Vates , casusque sinistri.
 Irrita sic ambos , expectatique caduca
 Officii pietas , & mutua cura fefellit.

Ast ego nec fatis irascar vanus acerbis ,
 Nec me , quæcunque est , Fortunæ injuria versat.
 Temperat arbitriis sortes Mens provida nostras ,
 Et regit incertos certo moderamine casus.
 Ac meruit , fateor , trepido Musa incita voto
 Has perferre moras , & tristia plangere damna.
 Mistra sed ultrici tamen est clementia pœnæ :
 Perviaque alternis ultro citroque Camœnis
 Facta via est. dumque agglomerans undam unda se-
 quacem

Evocat ; aggestas vario jam munere chartas
 (Spero equidem) FERNANDE , sinu complexus amico ,
 Quo se cunque vices rerum discrimine vertant ,
 Servabis cari monumenta æterna clientis.

Hic, Musæ audito scelera inter Martia casu,
 Alite nunc iterum properanda volumina dextrâ.
 Sed labor ipse juvat, repetitaque gratia Musæ,
 Si modò jam noti perflaverit aura favoris.
 Tu porro & manibus prædonum, ipsius & ævi
 Dentibus illæsam vindex præstare Camœnam
 Et potes, & blandum spondes testatus amorem.

PALINODIA,

*Cum Poëmatis apographum, quod per infestas ar-
 mis vias deperditum Autor existimarat, in
 Germaniam denique perlatum rescisset.*

AUDIERAM : sed vana, gravem quæ littera
 casum

Nuncia portarat, cecidit; nec iniqua Camœnam
 Gradivi rabies læsit palantibus armis,
 Aut Fernandæ violavit munera laudis.
 Et sua stant bello jura, & quas audiat æneos
 Tormentorum inter fremitus vis Martia leges.
 Ergo, seu medios Cyllenia virga per hostes
 Aonii vectorem operis, concessaque juvat
 Tessera; seu felix servavit cura, soluti
 Agminis insidias latèque vagantia in armis
 Prædonum eludens solerti crimina flexu;
 Certè Ubiis dudum, quæ credita, reddidit oris
 Pignora Musarum, lætâ florentia lauro.

Nec tamen errasse, aut longum renovasse laborem
 Præcipiti, FERNANDE, piget pennâque manuque.
 Scripta retractanti, nova lux affulsit; & ægri
 Nubem animi, desiderii permista removit
 Tædia; jam suavi extundit quæ Gratia sensu,
 Principis objectâ specie, fallitque laborem.
 Tunc ego crescentes operis gratatus honores;

Felicem, & lucrum jacturam nobile dixi.

Atque utinam, quod vera nimis jam fama renarrat;
Sic cedat, grave, atrox, vix & reparabile damnum.
Parcite, clamabam, crudeles parcite dextræ,
FERNANDI augusto sacratis nomine chartis.
Nunc cladem queror immensam: dolor, ira minacem
Dant gemitum, votisque patet Rhamnusia justis.
Et Musas armarit Amor; Martemque ciebit
Terribili sonitu pecten, vel Apollinis arcus.

Mitte age, quâ sollennem agitat Germania cœtum
Tutelam imperii meditans, age læsus ad urbem
Mitte graves, FERNANDE, tuâ pro gente querelas;
Cæsareasque aures generosi voce doloris
Concute. Bructericam in gentem commissa luantur.
Et tua jam, Princeps, Leopoldum injuria tangat,
Auxilii memorem, quo barbara contudit arma,
Pannonici funesta inter discrimina belli;
Et sua tunc nexas mirantem ad tempora lauros,
Militiaque istâ duplices, Musâque coronas.

Vestphalicæ interea robur floremque juventæ,
Quo trepidos inter succincta Colonia motus,
Servandam in patriam revoca, civilibus armis
Direptam, & fœdâ turbatos clade penates.
Ocyus audaces Paderæ lugentis alumni,
Germanorum equitum lectissima pectora, promant
Ottomano expertos animos palmataque tela.
Nec minor hîc urget pietas: patriæque saluti
Relligionis honos, Romæque innexa Fides est.

At tu, vel sonitus armorum horrentiaque inter
Tympana & ingentes curas, ni credula vanum
Spes animum & concepta tui fiducia lufit,
Longinquum exaudis Vatem; plenisque receptam
Sensibus atque animis fover indulgentia Musam.
Illa tuis demum auspiciis revocata sub auras,
Post steriles nixus, post longa silentia, cantum

Instaurat

SILVARUM LIBER IV.

417

Instaurat, gratosque, velut rediviva, labores.
 Jamdudum exultans regales Musa triumphos,
 Quos bello, quos pace tulit Lodoïcus, & aula
 Borboniæ decora, & terno quæ plurima lustro
 Magnarum Europe stupuit spectacula rerum,
 Insignes vario celebrarat pectine casus.
 Nec tuus ille, sacris terras moderatus habenis;
 Carmine ALEXANDER nostro illaudatus abivit;
 Sive triumphalis molitus gaudia pompæ,
 CHRISTINÆ adventu, Fideique augusta trophæa;
 Seu Loiolæis reddens Veneta arva colonis,
 Aut Venetis classem socians, Divosque secundos
 Hostem in Threïcium; Pellæo major, & olim
 Pacis ALEXANDER, mox belli splendidus auspex.
 Tum Spartæ affixus rigidæ, sanctoque recessu
 Muta diu plectra infodiens, meme ipse volentem
 Umbrâ involvebam tacitâ pigrisque latebris.
 Sed vatem haud ultra pateris squallere sepultum.
 Tu mihi lux, tu Magne amplum FERNANDE theatrum.
 Quid plebem insulsam morer atque Heliconis inanem,
 Aut leviter lymphâ tinctam Permesside turbam?

Te circumfuso lectissima flore corona
 Gentis Apollinæ, totum spectata per orbem;
 Ambit, atque isto Pindi stat gloria nutu.
 Scriptorumque operumque fides tibi maxima, Princeps.
 Sponte fluunt alia ex aliis; & divite venâ
 Largius, an dextrâ, dubium, tua munera currant.
 Nec verò tenuis despectas ausa Poëtæ,
 Mittere si qua rudis properat munuscula silvæ.

Jam sacer ille tibi, claraque in luce resurgit
 BORGIA, quem templis venerandum inscripsit &
 astris
 Relligio, terræque pios complevit honores.
 Qui, Latæ Francæque potens Suadæ atque Camœnæ,
 Gaudet Aquitanum Rheno sociasse Garumnam,

So'ennia Poë-
 tica D. Borgiæ
 ab autore can-
 tata, Celsiss.
 Principi ab
 Ant. Verjassio
 alterâ editione
 consecrata.

Has tibi primitias & non ingrata dicavit
 Obsequii referens communi pignora cultu.
 Verus hæc pietas ; cui tantum BORGIA debet,
 Quantum scriptori Superos, arisque sacratam
 Virtutem Historiæ fas est debere, per omnes
 Inclyta dum fertur Cælestum gloria terras.
 Ipse autem tanto jurati interprete cultûs
 Fortè placens ; caræque tibi, FERNANDE, Cohortis
 Ductori quondam FRANCISCO ardentia supplex
 Pro te vota feram ; transcriptisque in tua Musis
 Jura decus columenque suum gratabor ; & alti
 principis æternos venerans meditabor honores.

LUDOVICO MÆRATIO THEOLOGO

CALENDÆ APRILES AN. M. DC. LIX.

P R I M U S & hic, totoque fluent qui deinde secuti
 Mense dies, purô, LODOIX, tibi sole nitescant :
 Mox alii ex aliis, fœdæ post nubila brumæ,
 Purpurei longo succedant ordine menses.
 Hei mihi ! tempestas reparat se mobilis anni ;
 Lætior & vernæ revocato flore juventæ
 Post hiemem nitidis aperit se mensibus æther.
 Non ea fors homini, recidivaque corpore vita.
 Et vivax ubi te consumptâ ætate senectus
 Dimittet fragilem, sacri Mens alta Lycei
 Quò vel Suaresius, vel quò Vasquesius acer
 Decidit ; ah, nimium breve & irreparabile secli
 Transierit spatium, nec habet Mors atra regressum,
 Donec summa dies redivivum exsuscitet orbem.
 Fallor ? an extendet mortalis tempora vitæ
 Immortalis Honos, & letho Fama superstes ?
 Jam præstructa via est, quâ te, Doctissime, fati
 Legibus eripias : tumulus nec tristibus umbris
 MÆRATIUM extinguet nomen ; Lucisque supremæ ;
 Post Fidei nebulas, usum dabit ignea Virtus.

X AVERIUS NAUFRAGUS.

NAUFRAGUS Oceano, terni dum tempora solis
 Transierint, latè insanis agitata procellis
 Continuâ sub nocte fecat freta. nil tamen Austri;
 Nil, spumante salo quæ mille natantia monstra
 Prædæ inhiant, movêre Virum. sedet assere nudo;
 Ac pelagi immenso flagrans XAVERIUS æstu
 Volvitur, assiduaque undarum aspergine rorat.
 Haud major liquido Alcyoni pax æquore constat;
 Quæ nidum in tenuem & mollem compôsta latebram
 Fertur aquis, dum blanda favet Natura volucris,
 Lenes adspirant auræ, pura athra nitefcit,
 Astraque marmoreo rident geminata profundo.
 At mediâ tranquillam Herois corda quietem
 Tempestate foveat. animum defixit Olympo
 Certa Fides; tutoque velut jacta anchora portu;
 Inconcussa hæret spes & fiducia Christo.

Jam summis pendens præruptæ in montibus undæ;
 Sidera contingit, cæloque appellere gestit:
 Jam barathro præceps, immani gurgitum hiatu,
 Ad manes ruit, ac Stygio propè mergitur Orco;
 Conscia nec tali intremuit discrimine Virtus.
 Ventorumque inter fremitus, tonitrusque polorum,
 Fulguraque, & cæco confusa elementa tumultu;
 Dulcia divino vibrans suspiria amore,
 Imperium æterni majestatemque Parentis
 Pectore miratur securo, & cuncta cieri
 Numine gratatur; nutu maria alta supremo
 Attollique premique, & fræna audire procellas.

Sic fruitur mens sacra Deo, gaudetque periclo;
 Nec circumfusâ revocari à morte precatur,
 Ni gravior maneat casus. majora pericla
 Provocat, & votis ardens audacibus ambit.

ALETHIA ET ASTRÆA

SIVE ORATIO DE VERITATE ET JUSTITIA
AB ILLUSTRISS. ARNALDO PONTACO

Senatus Burdigalensis principe habita

Ad solennem forensium actionum instaurationem

AN. M. DC. LV.

FATIDICÆ Princeps citharæ, quem sæpè canentem
Jordanis tacito suspensus fluminis alveo
Obitupuit; miserique Orco turbata Sæulis
Regia, Tartareas frangentem carmine vires;
Desine terrarum solitas incessere fraudes,
Perque omnes diffusa hominum mendacia vitas.
Quin mage Alethiam règali concine plectro
Tellure exortam, cælo simul extulit alto
Justitia os sacrum, purâque in luce retexit
Purpureo astrorum redimitam examine frontem.
Seclis illa prior, divinoque edita partu
Omnia solerti radio miracula rerum
Descripsit; priscumque chaos, discordia mundi
Semina digessit, tenebrasque evoluit inertes.
Indivisa comes, paribusque exercita curis
Ibat Alethiæ, & libram germana ferebat
Justitia, hæc stellis numeros, & pondera ventis
Addidit: hæc cæli spatium dimensa, folique est:
Præfixit vallum pelago, & spumantibus undis
Littoream objecit certo munimine arenam.
Sic patri communem operam soror utraque primum
Impendit, magnis componens legibus orbem.
Tempora jam ex illo fœdus sociale coivit
Terram inter, Cælumque. unâ primæva creavit
Corpora; diversâque Deus quæ parte locarat,
Junxit amicitîâ tamen; & magnetica vincla

*Veritas de ter-
rà orta est, &
justitia de cæ-
lo prospexit.
Psal. 84.*

Intendens, certatim ultro citroque favorem
 Alternum, donis & respondentia dona
 Ire dedit, gratumque vicissim apponere fœnis.
 Sidera Tellurem circum rotat arduus Æther,
 Quæ vastæ occultas vires, vegetumque calorem
 Insinuant moli, perque intima viscera fundunt;
 Et venas implent argenti, aurique metallis;
 Floribus, & lucis extrâ vernantibus ornant,
 Pomifero Autumno, atque æstivæ munere frugis.

At Terra omniparens; illi dum tota laborat
 Cæli cura supèr, dumque omnibus influit astris;
 Haud ingrata, suo subiens occurrit honore.
 Spiritus accenso surgens de corpore Cælum
 Appetit: & qualem Panchæo ture flagrantem
 Subjiciunt aræ fumum, venerata rependit.
 Atque hinc (si qua fides veterum) sua sidera pascit,
 Rursus & in gremium terræ felicius Æther
 Reddit agens lætos fecundis nubibus imbres;
 Unde satis vigor, & frugum nova copia crescit,
 Magnaque inexhausto fœtus alit ubere mater.
 Nec vinci Tellus patitur; sed principe limo
 Corpora ficta virûm cælo transmittit habenda,
 Incrementa Jovis. cedunt Cælestia signa
 Terrigenis: diæ radio fulgentia mentis
 Clarius ista suos, alieni haud indigna motûs;
 Conficiunt cursus. præbet templa hospita Cælum;
 Suggestit Indigetes Tellus stellantibus aris.

Hæc adeo instituit geminæ commercia parti
 Indiscreta soror (doctæ fas credere genti
 Hebræum, sacris miscentum vocibus ambas.)
 Illa etiâ superis defluxit sedibus ultro,
 Diva Deo genita; & valles invisere nostras
 Dignata, humanam faciem, mortaliaque ora
 Virgineâ desumpsit humo. solum Ætheris alti
 Antè Patrem referens, Terram sic deinde parentem

Veritas tua
 usque ad nu-
 bes. Pl. 35.
 Nubes pluant
 Insum; ape-
 riatur terra...
 & Iustitia o-
 riatur simul.
 Isai. 45.

Communis fecit soboles. jam roscida, dicas,
 Solvit se nubes; votisque vocata sub æstum
 Descendit pluvia, & sitienti illabitur agro.
 Terra sinus avidos aperit; pariterque Salutis,
 Justitiæ pariter sublimi germinat ortu.
 Illam certa Fides, illam Spes nescia falli
 Consequitur, cæli tabulas & sacra ferentem,
 Ac sua perpetuæ mandantem oracula cedro.
 Obvia Alethiæ Clementia venit Olympo,
 Mutua Justitiæ Pax oscula fixit; & inter
 Abramidas folio regnant Salomonis eburno.
 Tunc jaculis adversa premens commenta coruscis,
 Fulmineum & vibrans Verbi insuperabilis ensem
 Diva potens veri, justique acerrima vindex,
 Personata Erebi latè portenta subegit.
 Pulsa superstitio templis, injuria rostris.

III. Esdæ 3. &
 4.

Exclamare juvat, celebri quod Persica plausu
 Aula favens resonat: Magna est, atque omnia demum
 Vincit Alethia, & forti de Rege triumphat.
 Hanc celebrat polus, hanc supplex terræ orbis adorat.
 Quippe Error, technisque instructa Calumnia tandem
 Concidit; & victæ tabescunt tempore Fraudes,
 Proditæque infernam repetunt Mendacia noctem.
 Clarescit contrà magis ac magis, invidiamque
 Virtute exuperat transcendens omnia Verum.
 Cetera quondam igni resoluta elementa liquefcent,
 Tellusque, Oceanusque, & qui super incubat Aër,
 Aureaque illa etiam radiantis machina Cæli;
 Quàm citò in ardentes abeunt consumpta favillas
 Complicitæ flammis injecta volumina chartæ.
 Atque ipse in sese, postquàm cuncta hausserit ignis,
 Denique subsider, Stygio revolutus Averno.
 Verum extincturo seclorum opera omnia busto
 Illæsum, mundi post fata novissima constat,
 Ac Domino æquævum manet, æternumque manebit.

Digniùs an quidquam facundæ munere laudis,
 Aut quis Alethiæ præco te dignior alter,
 PONTACE, purpurei lumenque caputque Senectis?
 Illam tu rerum summâ, sceptrisque potiri
 Jussisti, & placidas latè regnare per urbes
 Gallorum, priscoque recudere seclâ metallo,
 Quo sincera Ætas, vitæque infontis amicus
 Candor, Alethiæ custos fidusque satelles,
 Debitaque integro vigit reverentia Juri.
 Sed propriam Divæ sedem, templumque dicaſti
 Burdigalense forum; & lectâ virtute ministros
 Regalem sacris operari hortaris ad aram.

Non tamen inventu facilis, neque cognita vulgo
 Fertur Alethia, & curâ quærenda sagaci est.
 Nescit Alethiam Præses Solymæus; & ipsam
 Audire impatiens testem, jurisque magistram,
 Damnat, & invidiæ metuens configit iniquæ.
 Democritus mersam puteo; Tellure sepultam
 Sanctior illapso dicebat Numine Vates.
 Ergo, ut continuo tellus versanda labore
 Agricolæ, multoque priùs sudore riganda,
 Quò tectam eliciat segetem: sic providus acri
 Incumbat studio Judex, Verique latebram
 Effodiat; frugemque in luminis evocet auras.
 Sæpè vepres & saxa super, sæpè horrida fœdo
 Bruma gelu. Quoties mole interclusa Potentum
 Est via, & oppressæ vix respirare potestas!
 Sic odiis captiva, dolisque urgetur iniquis
 Undique Alethia, & justî fallacibus umbris.
 Ac velut indecores medicatur fœmina vultus,
 Naturæ certare procax; nitidoque veneno
 Picta genas, fatuos ignes accendit amantum:
 Haud aliter Veri specie se callidus Error
 Dissimulat, gaudetque oculis imponere, & aures
 Verborum illecebri & credula pectora ludit.

*Veritatem in
 injustitia de-
 rinent. Rom.
 I.*

Detracto nudum fuco tu cernere Verum
Rite doces, ingens ttabeati gloria cœtûs.

Cetera, quæ vacuos tenuissent plurima Vates,
Prætereo; generisque decus, mitrasque tuorum,
Doctrinæque apices, Gallis decora addita fastis,
Ordinis & gemini Torques, nomenque Thuanum
Conjugio amplexus, Parisini Augusta Senatûs
Lumina non tanto dispar comprehendis honori,
Castræamque Domum, Polemarchorumque triumphos,
Atque adeo Regum connexam sanguine gentem.
Et patriam excipiet laudem non degener Heres;
Quem juris nodos solventem Academia cælo
Extulit; & pacto invitat jam Præsidis ostro
Curia maturum primos attollere fascēs.
Fortunæ quid dona sequar, censumque, domumque
Insignem ante alias, Auream quam nomine dicunt?
At non tu, quanquam impatiens deformis iniqui,
Moribus idem asper, tetricâ & gravitate severus,
Largior officii nemo: descendere ad imos
Nec refugis, demissus honos, sublimior exit.
Deliciæ hinc populi, & summi commune Senatûs
Exemplum, communis amor. Nec purpura, mentis
Præstringit fulgore aciem, morumque nitorem
Inficit, ac sensu titillat corda superbo.
Quam dudum objectam frustra, tollique rogantem,
Suscipere instantes vix persuasistis amici.
Ast alios modici aucupio malè torquet honoris
Ambitus. hunc peteret cum purpura, ferre repulsam
Et jam olim potuit. neglecto culmine major,
Externæ nil lucis egens, splendore coruscus
Ipse suo; velut Astrææ cum signa subivit,
Et mundum paribus Libræ sol temperat horis;
Arnaldus proprium exornat, dum admittit, honorem;
Augustoque, gerendum inter, decus allinit ostro.
Liligerum nam qualis eras. quantusque tribunal

Supremâ ditione tenens ; regnoque forensi,
 Confessu Patrum in medio spectabilis altè !
 Burdigalæ vario condensi ex ordine cives
 Omnia complerant avido subsellia cœtu,
 Ampla neque undantem cepere Palatia turbam.
 Tu verò , mirantùm oculos dum pascis hiantes
 Majestate oris , gemmantis flumine linguæ
 Interea bibulas demulces plurimus aures.
 Mendaces tibi nulla merent stipendia Musæ.
 Ecquis Alethiæ media in præconia falsis
 Laudibus obrepat ? Veri , justique tenacem
 Te scuto circum illa dedit , longeque tenebras
 Dispulit ex oculis ; linguamque auresque modestas,
 Ac totam infedit mentem , reducisque labori
 Astrææ dedit auspicium , servatque tenorem.
 Me quoque nunc eadem , nunc utraque concitat ultro,
 Et veram egregiâ laudem pro laude rependit
 Ore meo. Nec me arguerit vox publica vanum ;
 Audacem potiùs , cœptis quòd grandibus impar
 Magnificam angusto tenuarim carmine Suadam.

*Scuto circum-
 dabit te Veri-
 tas. Psalm. 9.*

BURDIGALA.

VASCONIS hæc agri & tumidi Regina Ga-
 rumnæ ,
 Nympha senex ; sed verna hilari nitet ore senectus.
 Nec modò seclorum spatiis illæsa venustas
 Constat , & Ausonio qualis cantante vigeat :
 Sed magis annorum cursu forma inclyta , forma
 Excolitur , majorque animoso pectore virtus.
 Turrigerum rostrata caput , cui byssina vela
 Dependent retro , & Zephyro crispante renident ;
 Cœruleâque ingens pallâ , quam clarior astro
 Purpura distinxit mediam , peregrinaque gaza ;
 Altiùs ingreditur. Qualis Latonia Phœbe ,

Aut Cynthi silvis venatur Oreadas inter ,
 Aut jam splendidior crescentis imagine Lunæ ,
 Stellarum agglomerante choro , percurrit Olympum ,
 Puræ ubi noctis iter discussis nubibus , ore
 Una duplexque alio. nec abest argenteus arcus :
 Quæque feras terris , eadem quoque ab æthere fluctus
 Oceani immensos agitât , miranda potestas ,
 Et maris alternâ certos vice temperat æstus.
 Percussum intremuit jaculis radiantibus æquor.

Felix Burdigala , & Musis memorabile nomen !

Lunato auriferum portu complexa Garumnâ ,
 Lautis prætextum villis , castrisque superbum ,
 Vicini alterno revolutum gurgite ponti.
 En , quæ malorum coram natat ardua silva
 Vexillis fulgens , tonitruque salutat ahenò.
 Assiduè veniens operosa ad littora navis !
 Quàm varias infert læta ad commercia gentes ,
 Germanos , Batavos , gelidâ & quicumque sub Arcto
 Tellurem ingratam populi tenere feroces ,
 Nec linguâ , nec veste pares ! grato ecce tumultu
 Omnia miscentur. rerum densissima turba
 Robustam exercet plebem , nec segnis egestas
 Invenit urbe locum : peregrinæque undique merces
 Affluere. urbs totos septem capit una Triones ,
 Una implet , vel vitiferis sat dives arenis.

Felix Burdigalæ post horrida nubila sedes !

Reliquias non quod veteris monumentaque Romæ
 Servat adhuc , murosque & propugnacula Marti
 Nil cessura gerit , duplicesque assurgit in arces :
 Non , latis quod strata viis , & splendida tectis ,
 Ingenuo luxu spatiosas explicat aulas :
 Quanquam aptos Divis æternâ mole labores
 Attollit fanorum , & nubes turribus intrat.
 Sed magis imperio Themidis , Patrumque beata
 Consilio , summoque Augusti Præsidi Cœtus !

BETHUNIDÆ simul & sacros ostentat honores,
Et vigiles curas ; tantoque Antistite felix
Regnat Aquitanas inter clarissima gentes.

Illustr. Hen-
ric. de Bethu-
ne, Archiep.
Burdig. Aquit.
Primas.

ASTRÆA REDUX,

*Sive Senatus post civiles turbas
Burdigalæ Restitutus.*

ASTRÆAM Reducem populi celebrate clientes,
Juraque Aquitanas latè dominata per urbes,
Augustosque Patres, dudum quos muta vocabat
Curia, & averfis inhonora palatia caulis.

Antè vagam, & sævi jactatam turbine Martis,
Vidimus attonito Divam fluitare Garumnâ,
Diversa hospitio, nec majestate Senatûs
Digna satis, populis nec concurrentibus apta
Oppida mutantem, lunatâque urbe remotam.
Et quæ Burdigale, patrio spoliata Senatu!
Altera lux, Regnique ingens decus, hei mihi quantum
Decrevit, quantos exhaustit fessâ labores!

Quamquam velivolas plenis Neptunus abundans
Portubus inveheret classes, generosaque Liber
Munera congereret totis spumantiâ cellis;
Nil desiderium Astrææ tamen illa levarint.

Urbs opibusque virisque potens, deserta jacebat:
Unde priûs leges populi moremque petebant;

Ah, viduæ instar habens, gravibusque oppressa ruinis
Bellonæ, diramque luem perpeffa famemque,
Astræam, Astræam longo clamore petebat:

Cujus in adventum sordentes pulvere vultus
Tolleret; ac plenâ tum denique pace potitam
Rite putans, solido gauderet munere Regis.

Sensit, & optatis Rex annuit: & simul auram
Nuncia fama volans niveis prævertitur alis,
Jam fas Astrææ consueta in templa reverti;

Affore mox, Reducem solito comitante Senatu.

Quis mihi nunc plausus, quis publica gaudia narret?

Ipsi vere novo frondentia culmina jactant

Finitimi colles : ipsæ jam fluminis oræ

Floribus arrident, lactisque aspergine rorant :

Ipsi subsultant muri, portusque bicornis.

Curiaque ante omnes, Dominæ gratata regressum,

Sponte patet ; positoque situ revirescere visa,

Convelli propè visa loco, atque erumpere gestit.

Illa triumphalis deducitur agmine pompæ.

Antevolat Regali habitu Clementia, quercu

Nexa comas ; geminæque manus conferta sorori

Gratia, & interpret dubii Prudentia Juris,

Incorrupta Fides, ac dulcibus aurea vinclis.

Illaqueans aures & corda volentia Pitho.

Purpureâ se in veste ferens Astræa potenti

Fulgentem dextrâ gladium lanceque sinistrâ

Sustinet, æquato librans examine causas.

Illam Prosperitas, & aperto Copia cornu,

Virtutumque chorus, Legesque silentia passæ

Longa tubas inter violentaque classica Martis,

Pars Latæ, pars Indigenæ, sectantur euntem

Condensæ, canis veneranda sacrataque turma.

Non, illæ, Actæi proles effera Solonis,

Spartanumve genus : Francorum filia Regum

Plurima, Cæsaribus priscâ vel origine natæ,

Libertatem habiles frænis cohibere decoris.

Palladiæ ramum felix attollit olivæ,

Jungit & Astrææ famulos Concordia cives.

Vidit Aquitanæ genitor pulcherrimus undæ,

Santonica Oceani cùm jam remearet ab aula

More Garumna suo : cui nautica lintea circum

Funduntur, glaucumque incinctus arundine crinem

Arquatâ effinxit lunaria cornua fronte ;

Quantus non Rhodanus torrens, non Sequana felix

Sorte suâ, latisque Liger spatius in arvis.
 Atque illum officiis lætum comitatur amicis
 Oceanus, fluctusque suos trahit ipse vicissim
 In socialem alveum, ripisque allabitur altis.
 Sic major rediens, atque urnâ divite nixus,
 Burdigalæ intrantem portus examine claro
 Vidit, & Astrææ liquido dedit ore salutem.

O Cæli Soboles, Proceres Astræa rogatos
 Quæ revelhis tandem, disjectaque membra reponis
 Burdigalæ, augusti corpus regale Senatûs!
 Sic equidem sperabam animo, nec inane fefellit
 Augurium: agnosco Lodoïci nobile pignus.
 Ille meæ insedit ripæ, castroque propinquo,
 Cum fera perstreperent turbatis fluctibus arma:
 Ille meis subvectus aquis, pictâque carinâ.
 Mirabar speciem insolitam, fulgentiaque ora,
 Et jam majorem Natum Patre. Quanta voluptas;
 Conjugii talem fetum spectare superbi,
 Fœderis immemores quo Gallia vinxit Iberos!
 Ac Regina parens jam vertice celsior ibat,
 Magna parens, eadem Castrorum Mater, & aris
 Assidua; insignique altum pietate Tonantem
 Concilians nato, precibus victoria servit.
 Et mirantur adhuc Lodoïcum Annamque carinæ,
 Et riguæ salices, prætentaque fluctibus arva,
 Et, quæ spectaclum jussi meminisse, fluenta.
 Tunc primum agnovi facilem, pronumque moveri;
 Ac te cùm implacidis jussit secedere rebus,
 Burdigalæ referendum ausus spondere Senatum,
 Cùm bene tranquillo staret respublica portu.
 Bis mutata priûs statio, & placidissima castra,
 Ex quo abjuncta tuæ concussis mœnibus urbis;
 Nec dominos nostro vertisti à flumine fasces.
 Sed tamen hac regnum commune ambobus in actâ:
 Navibus hîc locus; hîc mundi commercia fervent.

Ludov. XIII:
 conjugium
 Burdigalæ ce-
 lebratum.

Heu, quàm rara meo dudum ratis amne cucurrit!
 Astræa hinc aberas. Mavorte onerata Garumnæ
 Terga laborabant : nostro gravis ille labori,
 Et fluvio insultans, sævis ludebat in armis.
 Corpora sæpè meos fœdarunt sanguine vultus ;
 Sæpè mihi contusa globis ardentibus ora.
 Nunc tecum mea laus, mea fama obtrita resurget.
 Hospes & Oceanus, fido sociatus amore,
 Nuncius Astrææ Reducis testisque per orbem
 Ibit, & huc crebras referet sine milite classes ;
 Dividet & Bacchum populis sitientibus, istinc
 Spargere vitigeni gaudentem nectaris undas.
 Dixerat ; & totis applausit fluctibus urbi,
 Terque Garumna caput Divæ submisit ovanti.
 Et pater Oceanus firmat lætissima dicta,
 In vitream refluens solito velocior aulam ;
 Pinnatosque ascendit equos ; terrasque per omnes
 Tritonis ventosa cavâ præconia conchâ,
 Burdigalæ Astræam Reducem confidere narrant.

ACONTIÆ SULFURATÆ.

SERPENTES rutili sinuosis ignibus errant ;
 Aut altè exiliunt, & sibila inania vibrant,
 Flagrantesque trahunt caudas, fumosque sequaces.
 Stant avidi cives infrâ, vultumque supini
 Discursus flammæ varios flexusque sequuntur
 Luminibus totis : vestigia cuncta volatûs,
 Præcipuè finem observant, formamque cadentum.
 Nam cursu exhausti colubri, cum pabula flammæ
 Deficiunt, superis fragiles vertuntur ab oris,
 Pulvereasque efflant animas. dispergitur ardens
 Vita in scintillas tenues, pluviamque rubentem.
 Exuviæ fumo turpes, teretemque ligatæ
 Ad virgam (quæis parvus adhuc, ceu morte recenti,
 Corpore in extincto superest calor) æthere ab alto

Ante pedes cecidere. illas tellure jacentes
 Certatim arripiunt pueri, passimque superbi
 Ostentant, quatiuntque manu. Detracta subactis
 Hostibus arma putes, spoliisve induta trophæa.

D. JOANNIS BAPTISTÆ

NATALITIA

Insigni Tutellæ cultu celebrata.

SOLLENNEM instruimus pompam, collesque pro-
 pinquos

Lustramus, flexusque viæ defixa per omnes
 Delubra, & festis accendimus ignibus urbem.
 Huc ades, ô BAPTISTA! piis hîc omnia fervent
 Lætitiis: tibi per vicos Tutella, per agros
 Annua sacra refert: & ovantes aëra cantus
 Implerunt, volucres auxerunt sidera flammæ.
 Tu faciles huc flecte oculos, quacunque refulges
 Stellantis regione domûs; vultuque sereno,
 Ipse tui ex alto lætus spectaror honoris,
 O, dexter vatique tuo populoque clienti
 Adspira; & Pindi quæ consecrat hospes & urbis,
 Accipe non ficti monumenta & pignora cultûs.
 A te ducta meis primæva est gratia Musis:
 Tu mihi lætitiæ princeps, tu carminis autor.

Natalem ingentis pueri quæ proxima lucem
 Anteit, auspicium sancti dedit illa triumphî.
 Principio, Martini ædes statioque petita est.
 Antiqui extremâ templi regione sacellum,
 BAPTISTÆ addictus locus est. superimminet ipse,
 Qualis erat quondam, villosa membra camelo
 Tectus in obliquum vates. densissima turba
 Æstuat, & parvis supplex affunditur aris.
 Hinc serie tendunt immensâ: & publica nondum

Pompa licèt moveat, necdum sacra signa coruscent;
 Ferventes, en, cerne, vias, turbamque perennem.
 Mellilega Hyblæi ceu quando examina reges
 Educunt; liquido volitans sese aëre nubes
 Agglomerat, Floræ vel dædala castra laceffit
 Undique fufus apum rutilis exercitus alis.

Apparent crebræ effigies, impressa domorum
 Parietibus, Magnæ ante omnes simulacra Parentis.
 Tegmine carbaseo, florumque halante corollâ
 Insignis, puerumque sinu complexa Tonantem,
 Cognati tantos Baptistæ incendit honores.
 Trajicitur vitreis errans Correzia lymphis.
 Ardua deinde via est; sed amœnâ frangitur umbrâ
 Mitis, & æstivo lux exarmata calore.

Per varios nemorum flexus (nam colle frequenti
 Turritum nemorosa caput Tutella coronat)
 Plebs tacitâ affatur Superos prece; cunctaque sanctos
 Composita in ritus miro pietatis amore,
 Pervolat ætherium votis flagrantibus axem.

Morte suâ vincens lethumque Erebumque Theander
 Monte in Golgotheo partæ monimenta salutis
 Quæ statuit, proprioque imbuta cruore dicavit;
 Sacra trophæa, Cruces, & propugnacla piorum,
 Stant passim; ac solido substructa altaria saxo
 Septenâ statione vocant, quò confluit agmen
 Assiduo fervens æstu. Nec simplice tantum
 Hæc vulgo dignata: sacri sollennia moris
 Insignes opibusque viri meritisque frequentant.
 Ipsi etiam properare senes, properare puelli.
 Hi, dextræ impliciti matrum, festoque labori
 Assuescunt, gaudentque vias didicisse parentum,
 Jamtum habiles veræ fingi pietatis ad usus.
 Nec modò, quos variæ discretos ordine vestis
 Zacharidæ inscripsit magno Metanœa Sodales;
 Supplice sed cunctos habitu vestigia cernas

Figere nuda solo, & ceras gestare flagrantēs.
 Montibus ut primū summis albescit Eous,
 Votivum instituunt cives agitare laborem,
 BAPTISTÆ memores; nec pars vacat ulla diē;
 Dum seram accendat formosus lampada Vesper.
 At novus unde meas aris canor impulit aures?
 Aëriā pompæ signum sublimis ab arce
 Buccina præcinnit. quæ cymbala musica versat,
 In numerum turris modulatur, & ardua templo
 Increpuit: festo conspirant tympana plausu.
 Dispositi sonuere tubi; fulsere cometae
 Pulverei, caudamque vago traxere volatu.
 Turicremi rubuere ignes, fumoque Sabæo
 Pinguis odoratas in nubes cogitur aër:
 Ardua concentu templi convexa resultant.
 Procedunt gemino versu, temploque relicto
 Linigeri Mystæ, per compita perque supinos
 Trans fluvium colles. longo via flectitur arcu.
 Sidera prælucent ingenti cerea tractu;
 Illusumque auro, magnum & venerabile Vatis
 Divini simulacrum obeunt; circumque Sodales
 Innumeri, ac tunicis pueri talaribus alben;
 Zachariæ ante omnes, pueri, dilecta caterva,
 Lilia gestantes, niveorum insignia morum.
 Tale equidem sanctæ supra juga lata Sionis
 Crediderim puerorum agmen, turmamque sequacem
 Lustrifici, quem BAPTISTES monstraverat, Agni;
 Qui sacro expungens hominum delicta cruore,
 Purpureâ Crucis oppetiit fatalis in ara.
 Ariete Signiferi nunc & formosior aureo,
 Victor & Ammonis monstrorūque Agnus Averni;
 Florentes astris campos succisque madentes
 Ambrosiis peragrat submisso augustus Olympo;
 Virginis ille gregis ductor princepsque, nec unquam
 Velleris intacti niveos maculatus honores;

Septem oculos, septem, Regum potiora coronis,
 Cornua ramosæ circumdat mystica fronti.
 O quàm dulce melos propriâ sibi sorte canentum
 Turma Sionæum perlustrat candida montem,
 Quâ se cunque tulit cæli pulcherrimus Agnus!

Proxima tu genitrix, Agnoque simillima Virgo.
 Mox consanguineus sequitur BAPTISTA, triumph
 Pars ingens, palmasque ferens & lilia dextrâ;
 Villosamque auro pellem, radiisque coruscam
 Indutus; nec jam silvestri pallida melle
 Imbuit ora, sed ætherii se nectaris amne
 Proluit, & Geniûm pastu jejunia pensat.
 Virgineum cui zona latus succingere visa,
 Jam mollis, jam fidereis clarissima gemmis
 Zona nitet. bicolore caput diademate nexum
 Alba rubro decorant intexta ligustra roseto;
 Sanguineoque micat colli fulgore cicatrix.
 Tum maculæ expertes pueri, infantesque puellæ;
 Primitiæ illustres Agni, sua lilia portant,
 Lacteoloque Agni splendentes sanguine pallas.

Sed quis me astringeras rapuit super impetus arces?
 Vos, pueri, vos ô nitidæ, mea gaudia, mentes,
 Virgineæ egistis mira ad spectacula pompæ.
 Vos, teneri flores, Superos candore refertis.
 Flaminis inde sacri varius sese explicat ordo;
 Fluctibus immensis populare affunditur agmen.
 Pompaque multiplici psallens discrimine vocum,
 Lunatum exequitur spatium, delubra viarum
 Devenerans. resonat BAPTISTAM amnisque nemusque;
 BAPTISTAM totis recinit pia montibus Echo.

At tu, sancte Puer, nato quo gessit Orbis,
 Ut divina tuæ liceat miracula laudis
 Felicesque ortus & grandia dicere facta,
 Solve malos linguæ nexus; sordentiaque ora
 Rite pians, te digna, sacris & idonea cæli

SILVARUM LIBER IV.

455

Finge modis, Vatum ô Princeps! velut igneus Ales

Amosidæ quondam Vati, carbone sacro

Labrorum excoxit vitium, augustoque dicavit

Purgata eloquio, & vivo verba imbuunt igni.

Nuncius ætherio Gabriel delapsus Olympo,

Virgineas idem ille brevî venturus ad ædes

Numinis Orator, cæli terræque Sequester;

Te patri Solymas visus prædixit ad aras,

Lætitiæ segetem insolitæ; jussitque JOANNIS

Egregio, proprios quem Gratia poscat in usus;

Nomine signari; quem, falli nescia, magnum

Edita per populos Domini sententia firmet.

Nec te vitigenos latices, solitasve ciborum

Delicias tacturum; & amici Numinis aurâ

Materno jamtum ex utero donisque replendum

Eximiis, vicino aptum præcurrere Christo;

Thesbitæque acres flammato in pectore Vatis

Gestaturum animos, Judææque corda potentem

Conciliare Deo, Fideique accendere lumen.

Hæc Gabriel. sedenim tantis incredula dictis

Mens hominis, promisso impar, cælestia necdum

Dona recognoscens, hæsit, pignusque petivit.

Haud impune quidem. namque objectare senectâ

Jam sibi vim exhaustam, atque effectæ conjugis annos;

Audentis merito inflixit pœnam Aliger ori,

Et dubiam arcana substrinxit compede linguam.

Ast ubi maturo divinæ oracula vocis

Sanxisti eventum, sterili senis editus alvo;

Exacto cum octava dies mox orbe recurrit;

Nomine signatus jussu, patria ora loquelæ

Cassa reclusisti, & Verbi Vox ipse tonantis.

Hoc pietatis opus, nodos & vincula linguæ

Damnata solvisse Patri. nec munera tantum

Gratari, sed fata etiam das læta profari,

Atque in longinquos animum transmittere casus.

Ec ij

Quin prius & fetus meritis arcana retexit;
 Jam propiore afflata Deo, lætissima mater;
 Felici cum te, alme, sinu complexa, puelle,
 Cognatam hospitio MARIAM suscepit, & ipsam
 Prægnantem; sedenim conceptâ prole beatam
 Ante omnes, Domini supremâ sorte Parentem.
 Quæ simul aligerâ Superum stipata cohorte
 Intravit Regina domum, dulcique salutem
 Ore dedit; ventris materni carcere septus
 Audisti voces infans, queis Gratia ab alto
 Vocibus it comes, & primævam abstergere labem
 Accelerans; nec passâ diu rationis egentem,
 Ceu vili de plebe animam, & sine pectore corpus:
 Sed teneram accendit properato lumine mentem,
 Læctam animam, & pleno saturatam Numinis haustu.
 Præsentem quâ luce datum est agnoscere Christum;
 Jamque inde ex utero vates mysteria pandis,
 Sidereum prodis genitrici conscius Agnum;
 Succussas hilari exultans pia viscera motu.

O fax, æternæ fax ô prænumcia lucis,
Ardensque lucensque, & Hebrææ pectora gentis
 Spectato fulgore hilarans! ô prævia Christo
 Spes hominum, Sponsi gaudens cælestis amore,
 Sponsi avidâ vocem aure bibens! tua sacra colentes,
 Quam folio undantem potas Agnique Deique,
 Lætitiâ asperge; & famulis, quam nomine præfers,
 Alma salutiferos irrorer Gratia fontes.

Tali BAPTISTAM celebrantes carmine turbæ
 Dum tumulis acclive nemus vallesque peragrant;
 Interea pæne exhaustæ jam civibus urbis
 Mœnia quos intra, nec iners ad publica sensus
 Sacra ciet; festiva agitant spectacula, ludos
 Missilibus flammis pars exercere, vel ignem
 Subjicere extructis alacres per compita silvis.
 Omnibus in vicis ardet rogus, omnia flammæ.

Præcipuè templi festivos excutit ignes
 Pyramis. accenso nec prægnans fulmine nubes;
 Cum lateri impactus violens rimam halitus egit,
 Fulgura tot vibrat. spargit jacula ignea moles:
 Illa viam signant longè, tractuque corusco
 Aëra describunt, pompamque allapsa salutant.
 Ac dum supplicibus lustrantur longa catervis
 Per clivos spatia, & solitâ statione morantur:
 Nunc rutilos jactat vastum per inane colubros,
 Et nebulas urit tenues; nunc tela caduca
 Destinât ad terram, spectatoresque lacessit
 Ictibus innocuis, fluvioque incendiâ miscet.
 Sed magis incæptos BAPTISTÆ exercita ludos
 Instaurat, cum pompa redit, longoque propinqui
 (Ultima prona via est) descendere colle videntur
 Paulatim, fuscâ Metanœæ in veste Sodales.
 Nunc age bombardæ, nunc tympana pulsa, tubarum
 Commixtis animosa sonis, flammæque volantes
 Undique colludunt, vexillaque Regis adorant.
 Quò propius plenis advoluens collibus agmen,
 Spectandi erectæ studio sese admovent urbi;
 Acrius hoc fervet scloppis, atque alite flammâ
 Aërius lascivit apex: condensaque cælum,
 Artis opus, nova monstra tenent, oculosque remul-
 cent.

Stant gemini funes, queis proxima tecta supremæ
 Turri annectuntur, festi pas maxima lusûs.
 Actor utrinque frequens hilaris spectacula flammæ
 Edit, & assiduo scloppo per mutua ludit;
 Incessitque vago, respondetque igne paratus.
 Currunt ardentes ultro citroque sagittæ,
 Communesque legunt funes, labra ardua donec
 Alternæ attigerint molis. nam præpete cursu
 Huc delata hærent, saxoque obtusa queruntur
 Flammæa tela moram; & frustra indignata, caducas

Acrius incendunt iras: absumit inanes
 Sulfure reliquias flagrantis acontia vitæ.
 Gaudia sic reducem pietatis ludicra pompam
 Gratantur, sanctoque impensa elementa triumpho.
 Illa subit; dumque illa suis se mœnibus infert,
 Ænea Musarum ante aditus tormenta nitratum
 Concipium ignem, & vasto nubem ore profundunt
 Pulveream. succussa via est, & proxima tecta
 Contremuere: cavis geminata remugit imago
 Vallibus; & rapido dissultat turbine flumen.

Postremo, vicis dum relligiosa precantum
 Agmina vertuntur, referuntque ad limina gressus;
 Ramosis faculæ lætùm micuere fenestris
 Dispositæ: simul ante fores plateisque parati
 Effulsere rogi: summique in culmine templi
 Turriculæ festis simul alta ad sidera flammis
 Erumpunt, rutilasque vomunt læto igne favillas.
 Tum reliqua effundit pulvis succensus in auras
 Missilia, & primâ jam sidera nocte laceffit.
 Quin etiam artificii ductu sæpè actus in orbem,
 Contortaque rubens spirâ, sequiturque fugitque,
 Et sese sua per vestigia circuit ignis.
 Undique Vulcani telis certatur: ubique
 Explosæ crepitant cannæ: tuba, fistula dulcem
 Concentum, mixtæque fides & tympana densant.

Natali quos deinde tuo, BAPTISTA, recursus
 Congeminat Tutella, piosque operosa labores!
 Nempe tibi quos albo habitu Metanœa clientes
 Addixit, proprios Patroni ingentis honores
 Manè obeunt. Solis primos Lunata sub ortus
 Corripiunt spatia, & silvis rorantibus errant.
 It niveum clivis agmen: puerùmque manipuli
 Hic etiam (stola pura pedes defluxit ad imos)
 Aligerùmque choris similes, spectacula præbent,
 Cœlestem & Puerum modulis cecinere tenellis,

Ponè ingens populi vis agglomerata Sodales
 Consequitur : lucentque facum longo ordine silvæ ;
 Et latè sacro discreti lumine colles.
 Mox aliæ lato pompæ splendore per urbem.
 Publica inardescit pietas ; festamque per ædem
 Orator magni celebrat præconia Vatis.

Hæc ego BAPTISTÆ ingenti compulsus amore ,
 Verùm arcto inclusus spatio , properata canebam :
 BAPTISTÆ , cujus sacris æterna laborat
 TUTELLÆ pietas , Cælique imitatur honores.

MAGNI BAPTISTÆ LAUDES.

NAM tua quæ tantis damnasti crimina pœnis ,
 Jam sacer ante ortum , jam sanctâ concitus aurâ ,
 Numinis & lætos spirans , quo plenus , amores ?
 Desertor patriæ , cœtus exois profanos ,
 Solus agis , silvarum hospes , consorsque ferarum.
 Nuda tibi spelunca domum , saxosa cubile
 Terra dedit ; vestem exuviæ finxere cameli ,
 Insulsamque locusta dapem & silvestria mella.
 Hos ritus , hæc insolitæ studia illa palæstræ
 Exerces jam inde à tenero. loca dura subisti ,
 Lactis egens ; vix prima solo vestigia doctus
 Moliri , ætherioque viam jantum arduus orbi
 Affectare docens , supera & vi carpere regna.

Sic alacer , ducente Deo , comitante catervâ
 Aligerûm , summi ingrederis Prodrôme inclyte Regis.
 Supplicibus votis noctesque diesque fatigas
 Fervidus , haud ignava terens tacitæ otia vitæ :
 Atque urbes fugiens , cælo commercia jungis.
 Ad te serpentes posito adrepere veneno ;
 Collusere feræ ; & blandæ longo agmine caudæ
 Affusæque jubâ placidi mulserunt leones.
 Mane salutabant volucres , cantuque fovebant
 Arrestos animos , suspensæque pectora Olympo.

Te quoque cedrorum submissis culmina ramis
Errantem saltu immenso venerata petebant.

Verùm idem (cùm nota Dei mandata vocarent)
Progressus silvis , populum ad lustrale ciebas ,
Quo scelerum elueret sordes Metanœa , lavacrum.

Talem nimirum quondam te , maxime Vates
Fatidicique chori longè decora alta beatus
Sorte novâ exuperans , priscorum oracula Vatum
Præcinuere , Deo tua jamtum in fata vacante.
Te fore , qui fragili velatum corpore Numen ,
Munere cælestem referens animoque Ministrum ,
Anteires ; validisque instans hortatibus acer
Deserta impleres præco loca ; vallibus æquos
Consternens montes , facilemque per aspra viarum
Rite viam & cæcos regeres per devia flexus.
Te flavis turbatus aquis , inculta per arva
Clamantem , & medio Jordanis in amne sonantem
Audivit ; Galilæa trucis procùl aula Tyranni ,
Ceui fremitu accepto magni concussa leonis ,
Obstupuit ; longeque omnem lateque moveri
Judæam admirans Solymâ cum plebe sacerdos ,
Undosâs , tua regna , frequens accurrit ad oras.
Vocali interea tonitru male conscia turba
Contremuit perculsa minis ; veniamque precata ,
Certatim fluvio lustrandos intulit artus.

Altiùs & resonans habitu quàm voce , potensque
Exemplo urgebas , austeræque ordine vitæ ;
Totus inhorrescens veste , atque immitia villis
Texta feris rigidamque incinctus ad ilia zonam ;
Longaque vix tenui solans jejunia pastu ;
Unde cibi expertem vulgò potiusque ferebant.
Mollibus indutos trabeis , luxuque superbos ,
Arguere impavidus Reges , Veneremque probrosam ;
Pro monitu & curâ fers aspera vincla salubri.
Utque puellari placuit lascivia saltu

*Joan. caput in
disco. Heroic.
l. 6.*

Convivarum oculis, didicit sœvire voluptas:
Et tristem immissus scelerati in carceris umbram,
Perque epulas dat grata redux spectacula listor,
Sanguineum disco caput, illætabile fœclum.
Ah natalitiæ feralia gaudia cœnæ!
Compositâ occumbens incesti fraude Tyranni,
Purpureæ, BAPTISTA, refers insignia palmæ.
Quin & Cælicolas inter spectabilis omnes,
Tergeminam emeritâ complexus fronte coronam,
Doctrinæ radiis contextam, & floris honore
Virginei, ac pulchri stellantem luce cruoris.

Magnanime Herodis censor, populique magister,
Et, quam voce doces, legis fortissime vindex;
Magna idem præstare, idem pro Numine latus
Dura pati! Christo natus, linguamque manumque,
Omniaque impendis Christo. Fidissime Testis,
Cælestisque index Agni, & Dux certe salutis!
Quis formas virtutum omnes, laudumque tuarum
Nomina percurrat? geminæ tu sibula legis;
Concludisque aperisque simul fatalia pacta.
Ne quâ habetes oculos, fœdæque in nocte jacentes
Terrigenas, subito adveniens fulgore coruscus.
Læderet ille parens lucis; tu lumine primô
Imbuis, æterno præmissus, Phosphore, Soli.

An primæva novo revocem miracula cantu?
Zachariæ solitas operanti clarus ad aras
Quæ Gabriel summo cecinit legatus Olympo?
Aut MARIE accessu, Divæ quæ signa Parentis
Attonitâ edideris subsultans Matris ab alvo?
Et consanguineum sensisti, parvule, Numen.
Utque prius Matrem, ventris compagibus infans
Clausus adhuc; sic Patrem etiam natalia vatem
Sacra inter facis; & quam plurimus æthere mentem
Hauifisti, Puer alme, Parentem in utrumque refundis.
Quò ferar ulterius? Cælo venientis aperto;

Divinæ speciem augustam lucemque Columbæ
 Vidisti, & merito Christum signantis honore.
 Ætherium certâ Genitorem voce tonantem
 Audisti : & mundi labes sine labe ferentem
 Agnum, animas Sancto qui Flamine lustrat & igni,
 Conscius indiciis. Superûm, dextrâ, ore notasti.
 Cujus rite pedes infra dejectus; in altum
 Palmam efferre caput, vulgi de more piandum,
 (Quankum humilis, multaue horrens pietate re-
 culas

Grande ministerium) jussus tamen omnia supra
 Tendere, adoratum vivo caput amne rigasti.
 Tu Christi, ille tui præco : te nomine Christi
 Gens dignata, tuo jactavit nomine Christum.
 Hic variæ demum laudi meta ultima : nec te
 Major Adamæâ proles ab origine venit.

JOANNI PAULO OLIVA

SOCIET. JESU PRÆPOSITO GENERALI

Dicatum de Incarnatione volumen

PETRI DE BUGIS EJUSDEM SOCIET. THEOLOG.

UT rigidæ florent sentes, purissima chartis
 Mella fluunt, claræ resonant oracula voces
 Et teneri sensus, liquidi ceu nectaris imbres,
 Arguta insinuant sese in certamina, & æstus.
 Difficiles insuerâ aliis dulcedine mulcent;
 Facundosque inter fluctus micat aureus ignis!
 Quotquot honoratas Artes tenuere palæstras;
 Pars Latio antiquo flores, pars colle liquores
 Cecropio, pars & nemoris spolia ampla sacрати,
 Palmarum inscriptas Hebræa oracula frondes
 Convehere, ac teretes gaudent innectere baccas.
 Unâ omnes, cedro incumbunt felicia dextræ

Scripta laborantes certatim, opulentaque donis
Talibus accumulans, cæleste sonantia Verbum.

Dignior & quisquam monumentis talibus auspex,
Quàm Ducis ætherii præscriptam nomine Turmam
Qui placidis regit imperiis, Christique vocatum
Sub juga bisgeminum curis amplectitur Orbem?
Ille Quirinali dudum celebratus in Aulâ
Pontificum Orator studiis, sacrique Senatûs;
Nunc quoque, inexpleas divinis vocibus aures
Mulcet, inexhaustusque animis illabitur, ardens,
Aureus, ac misto suavis terrore coruscat.
Non tam crebra micant mundi laquearibus astra,
Pervigiles lychni, puræ spectacula noctis;
Quàm densa excelsæ vibrantia lumina Mentis
Suspicias, augustæ ubi passa * volumina Suadæ.

* Temi Con-
cionum in A-
postolico Pa-
latio habitârû
&c. V. lib. II.
Lyr. Od. XIII.

HORATIUS, MUTIUS, CLOELIA.

Romana prodigia & miracula. Florus.

ROMANÆ speciem Virtutis, & inclyta fastis
Nomina, tergeminosque uno de Rege triumphos
Conspicio. Quantus mihi pontem insistis, Horati,
Sublicium; patriamque adverso pectore, Thuscûm
Armatis unus par millibus, obtegis Heros!
Horribilis pro te insignem cognomine facti,
Scævola, qui dextram injiciens fumantibus aris,
Torvus, atrox, victo splendescis fortior igni;
Aspectuque frui pœnæ, sensuque doloris
Lætus oyas! Quid tu, Heroum geminæ æmula laudi,
Clœlia, non vinclis patiens, non amne teneri,
Aulâ fugâ tumidas victrix enare per undas?
Congressumne, fugamne priûs? fluctusne, focusne,
Virtutis documenta, canam? Miratur & amnis
Virgineos pariter vultus animosque viriles,

Mollior incedens : collapsumque omnibus armis,
 Romæ inter lætos fremitus gratosque fragores
 Pontis, & abruptâ felices mole ruinas,
 Accipiens facilis Coclicem, applaudensque natanti.
 Et Muti dextram miratur sponte flagrantem
 Ignis edax. Hostes miratur Porfena, monstris
 Attonitus rerum tantis, victumque fatetur.

HORATIUS COCLES.

O Fatale urbi nomen, patriæque salutis!
 Tergeminos alter fratres, Albana peremit
 Robora, cum Tullo missum in compendia bellum;
 Inclinatam humeris patriam Romanaque fata
 Sustentans, validisque assertor Horatius armis.
 Sed tamen ille fugam simulans, & singula adortus
 Sauciaque illæsus demisit corpora letho.
 Solus Hetruscæ aciem, glomeratisque aspera telis
 Sustinet hic fixo concurrentum agmina gressu:
 Scilicet & quos stare gradu, pontemque tenere
 Inviçtæ exemplum geminos virtutis adegit
 Ingentis fati comites, dimisit in urbem;
 Et sibi se gaudet supremâ in sorte relinqui.
 Terribilem clypeo nimbum ferrique procellam
 Exceptat; crebro nec fractus vulnere victor,
 Quin hostes ultro increpitans, ac tela retorquens;
 Cæforum spoliis densoque cadavere vallum
 Ipse sibi obtendit, prohibetque immanè ruentes;
 Ac totâ belli immotus stat mole caduco
 Ponte super, Regi palmam extorquere superbus
 Frustra indignanti, & Thuscum in bella cienti.
 Nec reditum curat, pereat dum ponte revulso
 Hosti aditus; placitæque ardet se involvere cladi.
 Vix cunctam interea Thuscum, & rapida arma mo-
 ratur,

Atque capi ærato captam vetat objice Romam.
 Qui sibi, qui patriæ innumero prospexit ab hoste,
 Cocles, an Argus erat? Tu luxque Salusque Qui-
 ritum,

Tu Scutum patriæ, tu murus aheneus Urbi;
 Pro Jove tu Custos & Romæ Stator, Horati!

MUTIUS SCÆVOLA.

PRODITOR ipse sui, confesso & crimine vindex,
 Approbat immanes animos, dextramque flagranti
 Immittit foculo; spectantemque acrius urit
 Porfennam, terretque ferox. plus illa ferendo,
 Quàm cædendo egit. Parce, ardens improbe, dextræ:
 Ipse tui miseresce; hostis jubet. horruit ausis
 Quippe tuis, pacemque ambit. Jam Scævola dextram
 Semjustam recipe, & clarum per secula nomen.

CLOELIA.

CLOELIA, Amazonium nomen, tela inter &
 undas;

Obses ubi elusit custodes Clælia Thufcos,
 Effugit; atque urbi dulces, sua pignora, Natas
 Intactæque decus reddit floremque juventæ.

Hæcine Amazonidûm virtus? hæc dia virago?
 Spectatamque fugâ, Romanam Heroïda jactas,
 Regia quæ præceps & vincla & fœdera rupit?


Audacem sua palma fugam, sua fama secuta est.

Jam supra Muti facinus, supra acris Horati,
 Extollis, Porfenna, dolos, queis fallere pulcher
 Libertatis amor, Tiberinaque flumina Virgo
 Impavido æquales docuit superare natatu.

Ille quidem elapsam subitâ gravè concitus irâ
 Jure suo repetens hostis: sed castra reductam
 In Tyrrhena amplo decorat Rex justus honore.

Laudis & insolitæ, statuâ dignatur equestri
 Roma ducem. Celebrate, viri; celebrate, puellæ;
 Factum insuetum, ingens; & dignos Virgine mores
 Fingite. Virtutis monumentum insigne perennat,
 Spumantes fregisse minas Tybrimque ferocem
 Ardua ovans; formâque animosi prænitet oris
 Clælia, virginæ princeps vindexque catervæ.





SILVARUM

LIBER V.

ARCHIMEDES.



LE Syracosæ, Latii cingentibus ar-
mis,

Præsidiumque decusque urbis, miran-
dus & hosti,

Et pariter doctæ metuendus viribus
artis.

Ceu Briareus, centena simul dispergere tela
Ille potens, unusque adversam infringere classem,
Dum sedet, & tormenta levi muralia tactu
Temperat, assultusque virum deridet inanes;
Aut vi belligerâ referens & strage Tonantem,
Terribilis totâ cæli cùm fulminat arce.

Quippe vitro immensum exiguo collegit Olympum;
Terrenumque Deum gessit. quos extudit orbes,
Mens infusâ ciet; leges errantibus astris

Describens, annique vias, æternaque signa.

Cui tantum ingenio licuit? quam terra negabat,
Cælo excivit opem; Solemque industria telum
Fecit: & attonitos vicit, dum dimicat absens
Missilibus radiis, & fulgure sævit acuto.

Mox fuit ingenium exitio, dum pulvere terras
Metitur descripto ardens, operique supremo
Incubat, & captis medius terit otia muris,
Labentem ignorans patriam, immotusque tumultu.
Securum, placidæque instantem fervidus arti
Occupat irrumpens miles; frustra que vetante
Marcello, Siculum extinxit manus impia lumen.
Ah miser, & radium dextrâ moriente tenebat,
Confuditque cruore notas inscriptaque terræ
Signa, cadens patriæ in cineres, pars maxima cladis.
Horruit ipse suum victor scelus, horruit ensẽm,
Nomen ubi auditum senis, ingemuitque perempto;

LUDUS TUDICULARIS.

INCLYTUS Heroum fuerit labor, omnia bello
Miscere, ac totis collisum viribus orbem
Voluere certatim, & vario protrudere casu.
Quod strepitu immenso, atque insani turbine Martis,
Per freta, per terras geritur labefactaque Regna;
Innocuæ viden' ut referat brevis area pugnae;
Et procerum curas, operosa negotia ludat?

Mensâ oblonga sedet, viridique intenta tapete
Sternitur, & valido circum munimine septa.
Ligneus hinc fornix, ferro versatilis illinc
Circulus, adversi inter se finesque sub ipsos
Ictibus exposti stant purô cætera campô.
Nunc age qui ritus, quæ sint ludentibus arma,
Expediam, placidique sequar discrimina belli.
Telorum Libycisve plagis Indisve petita
Materies, pretio insignis multoque nitore,

Nec

Nec ferro, at secto candens elephante superbit.
 Quattuor inde globi campo spatiantur aperto,
 Quò tuditum vis agmen agit, torquetque sonantes;
 Non tamen ut toto in silvis versata lacerto
 Robustum exercet pugilem, saltuque feroci
 Concita ferratos refugit pila buxea pulsus.
 Mollius appressum lufor, dextrâque reductâ
 Librat, multa movens, tuditum, appulsumque petito
 Sæpè globo tractim alternat; dehinc fronte quadratâ
 Arietat, & plagam meditato temperat ictu.

Extremo in spatio locus est, cui desuper arcus
 Imminet. huc primò tendunt & proxima captant
 Procursu globulorum. hinc spes affulgere rebus;
 Hinc palmæ augurium, & vacuum data jura per
 æquor.

Præsertim pila si patulo trajecta sub arcu,
 Dum fauces aliæ tentant, arcumque morantur
 Circa sollicitæ; jam circolo immissa triumphat
 Princeps, inque novos victrix accingitur ictus.
 Quàm variæ martis facies, quantisque palæstram
 Motibus exercent! pila seu directa rotatur,
 Sive percussu septorum obliqua foramen
 Aut petit, aut validis obstantem incurfibus urget.
 Obsedè aditus, & ferri mobilis arcum
 Ire globi penitusque sinum transmittere certant:
 Ast alii præcludere iter properantque ruuntque
 Aggeribus velut oppositis, medii que resistunt.
 Nonnunquam & plenis hærentem faucibus orbem
 Vi multa extrudi videas, lapsive quieta
 Eludi aversâ ferri revolubilis orâ.
 Ludicra trajectu nimirum laurea terno
 Constitit, aut campo si quis dejecerit hostes.

Hinc atque hinc laterè in gemino patet alta vorago;
 Et mensæ duplicem frons utraque pandit hiatum,
 Angulus in præceps refugit, foveâque dehiscit

Quisque suâ. geminæ huc fertur violentia partis,
 Præcipitesque globos rapido certamine volvit.
 Nec latebroso unum satis est meruisse barathro;
 Victor & alterius fatis audentior instat
 Conduplicans ictum, & repetito vulnere sævit.
 Quid loquar, ut campo excussi vallumque caducâ
 Transiliant pereantque fugâ? tanto impetus ardens
 Turbine agit. trepidos fors, ars, miscentur in ictus.
 Nunc sese agglomerant, nunc eminus arma laceffunt:
 Jam stipata acies, confertoque agmine pugnam
 Impediunt: toto dispulso æquore fundit
 Jam temere incurrens impactusque orbibus orbis.
 Fit fragor. obnixa fugiuntque premuntque vicissim
 Verberibus sese alternis: avidusque nocendi
 Uro eodemque sequax tumulto sæpe occubat hostis.

Nec verò mensâ tantum ludicra geruntur
 Bella super; nudoque solo graviora ciemus
 Robora. contusos cava faucibus haurit apertis
 Fossa globos. sedenim haud qualem pila transit eburna,
 Annulus extremo duri sedet æquore campi.
 Funis at intentus surgit, signumque canoro
 Ære dat impulsus. plausu dum læta pilarum
 Area belligero fervet, canit ære triumphum.

D. MARTIALIS

AQUITANORUM APOSTOLUS,

Eorundem à morbo pestifero Sospitator.

TERRARUM dominam pestis grassata per urbem
 Cum miseros vastâ turbaret clade Quirites;
 Phœbigenam, humanæ quando nil civibus artes
 Proficiunt crescitque mali vis dira medendo,
 Auxilio accersunt; quo Numine protinus altos
 Romulidum ad colles, inque hospita fana recepto;

Sæva lues Romamque diu populata refugit.
Sic fucum incautis Stygius mortalibus Anguis
Fecit, opemque * Dei brutâ sub imagine finxit.

* Æsculapii,
Draconis.

Non ea Francigenæ quondam ludibria passi,
Cum per Aquitanos latè serpentina tractus
Ignea senferunt tristis contagia morbi.
Nec longè quæsita salus. flammata venena
Artubus exegit pereuntum, aurasque salubres
Extudit, atque ægræ revocavit gaudia genti,
Indigetis magni translato in corpore præsens
Sospita vis, populi precibus concita clientis.

Ergo age, Lemovicas nunquam frustrate vocantes,
Ad tua sacra veni, Præsul, celebrandaque Vati
Annue grata pio pompæ sollennia cantu.
Quæ cryptâ effossum insedit spectabile corpus,
Dive, tuum, *Lati* conscendam culmina *Montis*.
Jam mihi Parnassusque biceps, Pindusque Heliconque,
Et quæcunque super Phœbo juga cognita sordent.
Sanctior hîc statio Musis; hîc ardua templa
Structa piæ gentis manibus, morboque fugato
Religiosi instar monumenta erecta trophæi.

Sævior haud morbi facies, nec tetrius illâ
Peste malum incubuit terris, & corpora letho
Plura dedit. velut immixtis ubi curribus ardet
Per segetes Bellona virûm; trepidamque phalanga
Proturbant & utrinque metunt Saturnia tela.
Talis Aquitanas morbi vis acta per oras.
Ac primum extremos invadere corporis artus
Visa lues, acrique manus tentare veneno,
Sive pedes: cæco inde, cuti sublapsa, meatu
Gliscere per venas, perque intima viscera fundi
Ignis edax; donec vitæ fontemque caputque,
Atque ipsam victor penetravit cordis ad arcem.

Quisquis crudeli afflatus contagio, malignos
Combiberat fibris morbi immedicabilis æstus;

Vitæ odii, furiisque actus tardantia fata
Incusabat, & insano clamore ciebat.

Ætnæos sibi namque rogos, totumque Vesevum,
Et pice ferventes atroque bitumine fluctus
Ferre videbatur. Nequicquam aspergine lymphæ
Ossibus implicitos ignes restinguere certant.
Accendit lymp̃ha ipsa magis spirantia busta,
(Qualè superfuso micat acrior ignis olivo)
Horridus & tactis undâ vapor artubus exit.
Tartaream exhalant fumantia membra mephitim.

Ergo in se impatiens sævit dolor, omnia promptus
Dira pati. nec depositæ jam cura salutis;
Sed sensum finire mali, vel cæde, precantur.
Carnifices optant medicos, durumque levamen,
Membra peragrantem ferro compescere flammam.

Quid faciant trepidæ rerum? queis ultima gentes
Præfidiis fata avertant? nil Pæonis herbæ,
Pergameique arcana senis, nil Coa supellex
Profuit; & medicas irrisit Apollinis artes
Orco excita lues, accensâ Numinis irâ.
Irritant fomenta malum. per rura, per urbes
Pestis acervatim longè lateque cadenti
Insultat populo. mœrent deserta locorum,
Exhaustæque domus: & deest jam terra sepulcris.
Illum adeo ultorem scelerum, cui militat omnis
Morborum jurata cohors, pacare necesse est
Et telis spoliare Deum, ne funditus uno
Obruat exitio populos vindicta nocentes.

Sed quis erit voti interpres, qui voce sequestrâ
Causam oret miserorum, infestaque tela Tonanti
Detrahat evicto precibus? Tu, maxime Præsul,
Missus Aquitanum Christi Legatus in orbem.
Tu mirorum opifex, & iniquis proxima rebus
Auxilii via, nec lapsæ spes vana salutis.
Tu potes incensam morborum extinguere pestem;

Ultoremque, tuâ pro gente, ut murus ahenus
Stare Deum contra : cælesti qualis & iræ
Occurrisse audax, cidari inscriptoque verendus
Nomine sacrorum Princeps, Arcæque Minister,
Sontibus immissos condensî fulminis ignes
Turicremo avertit foculo, clademque repressit.

Hæc ubi defixa est animis fiducia Divi ;
Undique Lemovicas concurritur, inde petita,
Nusquam inventa prius, tetri medicamina morbi.
Felici vitam Indigetis manare sepulcro
Sensit adorantum pietas, cum tortor anhelis
Pectoribus voto in medio consideret ignis.
Nec dubium, quin, eductum si corpus ad auras,
Aëris extemplo vitium purgetur, atroxque
Lethifero carpens igni vitalia pestis.
Tutelare placet tantâ mercede sepulcrum
Pandere, relinquiisque ægram fatalibus urbem
Lustrare, & populo auxilium properare ruenti.

Agmina per vicos ardentum, avidisque salutem
Speratam quærentum oculis, stipata jacebant,
Pignus & incenso augustum clamore vocabant.
Sic, ô Lemovicis decus & tutela, Magister
Ille tuus Solymam quâ gressum cunque per urbem
Claviger extulerat Cephass, obsessâ tenebant
Compita convectæ agrorum longo ordine turbæ,
Vel tenui optantes perstringi Sospitis umbrâ.
Nec verò tantâ quenquam de gente fefellit
Spe præsumpta salus. urbem veneranda procurant
Fercula, tabificæque fugant contagia pestis:
Ceus claro Boreas abstergit nubila flatu,
Aëraque everrit pennis, cælumque resolvit.

Dum pia jam angustam procedit pompa per urbem;
Undique depositos (visu mirabile) cives,
Confestim exhaustum Divo reparante vigorem,
Corpora tollere humo, & læto revirescere vultu

Aspicias, pompamque sacri celebrare triumphi.
 Haud secus ac quondam devicto ex hoste recepti
 Laurigeras soliti post vindicis ire quadrigas.
 Septem infelici languentia millia morbo,
 Protinus ambrosio dilutas rore medullas
 Sensere, & festis Ratiastum vocibus implent,
 Munificum dignâ gratati laude parentem.

Ille ubi sublimi Soteris prostitit arâ;
 Et populos spatium affusos excludit iniquo,
 Quamvis laxa ædes, immensis arcta catervis;
 Sancta laborato fulgentia lipsana in auro,
 Templo efferre placet, patulâque in sede locare,
 Impleat ut cupidum populorum aspectus amorem.

Lemovicas juxta, magnos extructus in usus,
 Clivus Hyperboream modicè consurgit ad Arcton:
 Nomen arenâ loco fecit; neque collis aprica
 Pampineâ vestire negat sola vite Lyæus.
 Huc mystarum humeris patriæ fatale saluti
 Invehitur corpus, tumulique in vertice summo
 Compositum, è speculâ campos despectat, & urbem.
 Accurrunt populi, & latè loca proxima complent.

Æneus ut coluber, castris elatus Hebræis,
 Serpentina letale malum & flammante veneno
 Dispersam in populum pestem retudisse videndo
 Creditur, & facili læsos servasse medelâ:
 Corporis haud alia est montem insistentis imago.
 Prospectu, ægrorum serpentem in viscera flammam
 Extinguit; longeque oculis infusa, per omnes
 Non operosa salus permanat corporis artus.
 Nativus tantum superat calor: ille benigni
 Innocuique ignis vitali fomite mulcet
 Torrida membra prius; revocatæ in pectora vires.

Numen habet, veterisque locus vestigia facti
 Servat adhuc, pulchroque sacer Mons nomine gaudet
 Lætitiæ memor, & priscâ spectabilis æde.

Lemovicæ, quoties Idus rediere Novembres,
Publica Aquitanæ renovant Soteria gentis.

JULIUS HIPPOLYTUS MENARDERIUS

Regius Anagnostes &c. in Epithalamio Regio
Laudator JULII CARD. MAZARINI.

MAXIMUS accisum recreat dum Julius orbem,
Consilii Mentisque potens, & nobile Pacis
Urget opus, Regum nectens felicia vincla:
Alter in heroi partem subit, ecce, laboris
Julius; augustæque legit vestigia Pacis,
Cantabrico ducens Hymenæum à littore Vates.
Jam Liger, & glaucæ per vitrea regna sorores
Omnibus applaudunt ripis: jam Sequana fervet
Laudibus, aure bibens avidâ mirabile carmen;
Flaventesque pater Nymphas ediscere jussit
Et Mazarino dignos & Apolline cantus.
Parnassi rupes, silvarum ingloria tecta
Linquite, Pierides! Francâ Pax regnat in aulâ
Principis auspicio Julî. simul auspice tanto
Sacra Palatinus penetralia pandit Apollo.

D. IGNATII EFFIGIES

Speculo impressa, cum hac epigraphe,

Quàm mihi sordet terra, dum Cælum auspicio!

TALIS erat, nocturnam oculis rorantibus æthram
Cum peteret flagrans Ignatius. emicat ore
Sublimis, terræque animus contemptor Olympum
Spirat, & ardenti speculatur sidera vultu,
Sidera, inaccessi tenues quæ luminis umbra.

V. Lyr. l. II.
Od. xv.

Dum rapit obtutuque haurit defixus anhelos
Ætheriæ sedem patriæ, fulgentia regna;
Numinis abstrusi formosa renidet imago.

Tum fragili quodcunque solo splendere visum
 Obtusos specie sensus deludit inani,
 Despectat, vulgi curas miseratus inertes.
 O tenebræ ! ô sordes ! heu bruta & noxia tellus !
 Inter opes quàm sordet inops, segetemque dolorum
 Captat delicias, probrososque ambit honores !
 Ipse autem magno in speculo Loiola moratur,
 Sidereæ quæ celsa micant spectacula pompæ,
 Blanda ciens tacitus suspiria. Protinus auras
 Illa supervolitant : nec-surdæ templa Sionis,
 Astraque supplicibus respondent conscia votis.
 Sic patitur divina ; pios sic pascit amores
 Fervidus, & flammam lacrymoso diluit imbri.
 At latis dulcem lacrymis pater incitat æstum.
 Gemmiferâ crescens oculorum aspergine, cordis
 Altior assurgit stellis & purior ignis.

Hæc tu, magnanimum venerans Heroa, Themisti,
 Assiduus meditaris ; & alto pectore versas
 Hinc Cæli decora, hinc miseræ ludibria terræ,
 Flammæque & lacrymas ; speculoque affixus inhæ-
 res,

Ex quo non vani simulacra coloris & umbra ;
 At solidæ laudis species, at plurima virtus,
 Moribus egregiis expressa resultat imago.
 Me quoque, me claræ sancta ad spectacula formæ
 Sponte vocas, & amica pii consortia cultûs.
 Artis opus geminæ, carum & spectabile signum,
 Dulce tui externâ pignus transmittis ab orâ ;
 Munifici quod sacra manus, quod splendida charta
 Verborum officiis cumulans ornare laborat.
 Ipse etiam augustâ spectatus imagine fulges,
 Sollicitatque animum geminæ pietatis imago.
 Conceptas utinam divino à lumine flammæ
 Ardenti impressus speculo Loiola reflectat,

Supplice te, radiique aciem vibrante coruscam!
 Aut si nulla feram stellantis munera flammæ;
 Ah, speculo objecto turpes abstergere saltem
 Ediscam maculas, terrarum fordida longè
 Effugiens, votis & jamnunc astra capeffam.

S S. IGNATIUS ET XAVERIUS

Sacro numismate expressi.

AD MERCURIUM VERDERIUM.

INDIGETUM augusti vultus, expressaque vivis
 Ora notis lucent: oculis ardentia corda
 Erumpunt: supero vertex redimitur honore.
 O Gemini, quos non partu Natura superbo,
 Gratia sed magnis socios virtutibus æquat,
 Et Vaticani ritûs communia sacra!
 Angustum, ô, quantum decoris collegit in orbem,
 Qui terræ immensis amplexos cordibus Orbem
 Extudit Heroas, parvoque numismate clausit!
 Cæsareas quærant Latia inter rudera formas,
 Quos antiqua virûm cælatis ora metallis,
 Squallentesque juvant pretiosâ ærugine nummi.
 Me pietas, nitido spirat quæ plurima signo,
 Corripit, & blandæ majestas ardua frontis;
 Seu Loiola pater, seu quâ Xaverius ingens
 Eminent, aspectuque animum suspendit hiantem;
 Ac tenero mulcet venerantia pectora sensu.
 Quas ego, Verderi, sancto pro munere grates,
 Quosve referre parem cantus? nam cetera parco
 Nunc equidem memorare, tuæ quæ pignora mentis
 Ampla tuli. nec iniqua finant jam tempora gratum
 Rite animum, meritasque expromi carmine laudes.
 Doctrinæ omnigenæ decus, & Parnassia plectra,
 Et Sophiæ lectos dumeta per aspera flores

Si liceat narrare ; & cælo quidquid Aquinas
 Detulit , Aligero similis morumque nitore ,
 Ingeniique acie ! quo te ætheris alta sonantem
 Magnificè audivit plausu , stupuitque Lyceum !
 Quæque Sigillorum Custos , Regniue Minister
 Addidit , vario jactatus turbine rerum !
 Unde laborantis facies argentea Lunæ
 Tristibus horrescat tenebris ; cur aurea Solis
 Ora notent maculæ , seclis incognita prisceis
 Sidera ; quo gyro Martisque Jovisque Satelles
 Circum erret , numeroque vagantia lumina crescant .
 Mille alias rerum species , arcanaque mundi ;
 Quidquid & Architas , quidquid Babylonius Horos ,
 Quæque Syracosius memoranda inventa magister
 Tradit ; & inventis quod sedula cura nepotum
 Addidit , aut Cimber Tycho , crystallina princeps
 Tecta colens ; aut qui radiantia signa secutus ,
 Perlegit vitreis oculis Galilæus Olymum .
 Pluraque felici complexum pectore norunt ,
 Et sæpe artifici signare mathemata dextrâ
 Mercurium læti Proceres vidêre docentem ;
 Et nunc eximio meritum venerantur honore .
 Fulsit & Hibernæ Patris sapientia genti ,
 Cùm Loiolæam jussus censere Cohortem
 Ivit ; & Oceani summos gurgite tractus
 Invisens , Româ laudes gratante recepit .
 Quid reliquos agitem falces , & qualibus exin
 Rexit Aquitanos studiis curisque Sodales ?
 Sed nimirum , artes superat quæ splendida Virtus ,
 Vindicat æterno primas in carmine partes .
 IGNATI pater , & sacra , FRANCISCE , Cohortis
 Alter honos ; quorum stellantia subjicit ora
 Mercurius , pulchroque insculpta numismate donat ;
 Pulchrius ipse alto spirantia pectore gestat ,
 Exempla & repetens ingentibus exprimit actis :

Munificum servate Patrem, vestrisque vicissim
Muneribus versuram inopi concedite Musæ.

HYCUSSUS, seu REX-PASTOR, ALEXANDER VII. PONT.

ROMA, quid horrescens crinitos suspicis ignes?
Ecce pii sidus placidum processit Hycussi;
Sidus, quo dudum bello squalientia rura
Latentur, mellisque fluant pro sanguine rores;
Pastoresque gregesque sacri caligine pulsâ
Exultent: roseo quantum non Lucifer igni
Mulceat, aut croceo ridens Pallantias ore.
Ipsi lætitiâ saliant cum mollibus agnis
Septeni colles: ipsæ jam Tybridis undæ,
Ipsa canunt jam prata; venit Bonus æthere PASTOR,
Et Sanctæ statuit meliora *Palilia* Romæ.

Illum & olorino facundus Mincius amni,
Et qui pauper aquæ Daunus secat Appula rura,
Tum gelidæ Sulmo liquidissimus ubere lymphæ,
Jampridem insolito plausu excepere canentem.
Ille & Germani petiit cùm littora Rheni;
Aspera corda virum longoque exercita bello
Leniit, & Pacis blandum inspiravit amorem.
Orphea Tyrrenum silvæ rupesque secutæ.
At sacram nequiere diu circumdare frontem
Aut apium, aut ederæ, aut suaveolentia lauri
Germina, purpureo decedere iussa galero.
Nunc triplicis summo præfulget honore coronæ
PASTORUM PRINCEPS; & habet commercia cæli.
Ille & oves agnoscit, & ipse agnoscitur illis.
Custodis vocem auditam gressumque sequuntur
Quæque bibunt Aniena fluenta Padumque bidentes,
Quæque Ararim Ligerimque; Tago quæ vellera de-
bent

Joan. x.

Aurea ; secundoque Albis quas gramine pascit ;
 Vistulaque Dravusque , & ripa binominis Istri ;
 Quæque Indi albescent Gangisque aspergine sacrâ ;
 Atque aliæ , terras sparſæ quæcunque per omnes.
 Scilicet emissas caulis dux anteit ultrò
 Nomine quamque vocans ; fontesque & pabula læta
 Sufficit , ac vivo curat mersare lavacro.
 Errantes coget pecudes , medicabitur ægras ,
 Languentes referet collo , septisque reponet.
 Vipereum avertet virus , scabiemque malignam ;
 Sedulus & culpam , si quæ subrepserit olim ,
 Incautam vaga ne perdant contagia turbam ,
 Compescet , vinumque admisto franget olivo.

Felices Pastore greges , felicia secla!

Latrones , ovium pinguiſſima corpora macant ;
 Et qui Pastores avidâ se pascere curâ ,
 Non pecus incumbunt. pretio queis vendita cura ,
 Diffugiunt veniente lupo , atque aliena relinquunt.
 Haud ita , cui pecoris merito custodia cessit.
 Ne concessa quidem subeuntis præmia lactis
 Accipiet , tonſoque aptas de vellere vestes :
 Sed magis ipse greges opibus curabit amicis ,
 Pascuaque argenti rivis manantia pandet ,
 Et cæli annonam divinæque horrea frugis.
 Haud mutos feret ille canes ; acrique jubebit
 Latratu terrere feras. & fortibus ipse
 Pervigil excubiis defensor ovilia servat.
 Si quis ab Hercynio saltu lupo irruat atrox ,
 Sive Caledoniis lustris , orâve Lemanâ ;
 Intrepidum objiciet dura in discrimina pectus ,
 Projecisse animam pro caro lætus ovili.
 Quin etiam immitesque lupos mutabit , & urſos
 Corpora in agnorum , caulisque admittet apertis.
 Illi autem sensusque novos , & non sua corda
 Attoniti circumſpicient ; mollique * capistro

* Hædorum...
 ferratis præsi-

Præbentes placida ora, manum patientur herilem.
 Pastor & infames hircos, armenta^{gunt ora ca-}que equorum,
 Thracia quos hominum, ceu quondam, sanguine
 pascit,^{pistris. Georg. III.}

Pellet; & infestis purgabit Mænala monst^{ris},
 Mænala Romano quondam regnata Magistro;
 Ereptique ovibus reddet juga celsa Lycæi.

Hic te, ô Hycusse, labor manet, hæc te cura lacessit.

Sunt & oves aliæ (nec te adduxisse pigebit)
 Quas Brasilûm deserta tenent, quas Sinica culta;
 Quas Japonum glacieque rigens & torrida flammâ
 Insula, tot pecorum exitio grassata cruento;
 Hostia cùm per mille neces occumberet insons,
 Balatu & nullo infandum confessa dolorem,
 Cum grege pastores, teneri cum matribus agni.
 At nunc omnis, Hycusse, tibi mansuescere discit
 Barbaries, mittitque novos procul, accipe, fœtus.

Montibus excelsis pascet; herbâque virenti
 Accumbent saturæ. Qui tanta coagula Montes
 Præstiterint? Seno confurgit vertice ad astra
 Mons pinguis, placitusque Deo. Deus ipse colonus ^{Psal. LXVII.}
 Et Sedem hanc pluviâ cæli perfundet odorâ,
 Subjectam & riguo ditabit nectare vallem.
 Tantus amor Cælo, tanta est fiducia terræ,
 Magne, tui, quo nil melius dedit Optimus orbi;
 Ex quo jussit oves ardentem pascere Cephæ.
 Magne, tuum Armeniæ tygres Pœnique leones
 Imperium agnoscent; nec dente aut ungue nocebunt ^{Isai. XL & XLV.}
 Romanis adstrati ovibus: pardosque Saniris
 Inter adulantes medius stabulabitur Agnus.
 Unus & unius fies BONE PASTOR ovilis.

Hæc tibi Aquitanis Vates longinquus ab oris
 Cantabam, gregis Ausonii fidissime Custos,
 Et Regum Pater, & populorum Pastor, Hycusse!

Nec tibi displiceant silvestris carmina Musæ ;
 Quando & Ephratæi citharâ Pastoris Hebræus
 Rex olim , nunc & gaudent Latialia templa.
 Sic tua vota Deus facili bonus hauriat aure !
 Ille tibi sociam demittat ab æthere Pacem ,
 Christiadûm in Turcas vertantur ut arma , diuque
 Sex flamma alta jugis læto præluceat Orbi !

FULMEN.

Philosophia
 descripta l. 12.
 Heroic.

Æ THERII delapsa plagis , unde ardua rerum
 Subjectam seriem , Naturæ ingentia regna
 Collustro , votis avidi repetita Lycei
 Huc venio ; sed qualis eram , cùm splendida primum
 Gentibus Aonio fundebam oracula cantu.
 Ergo & quæsitæ , studiis acerrima , causas
 Disce , cohors , terrisque pavendos fulminis ortus.
 Hæc ubi præcinuit , lectam Regina catervam
 Aspectans juvenum , pleno mox insonat ore.
 Vulcani fumosa domus , gens torva Cyclopum ,
 Armando fulmien quondam fabricare Tonanti
 Credita , & ille Jovis cedat procul armiger ales.
 Aspice terribili nubem ferrugine tinctam :
 Fulminis hæc fornax. elatæ in viscera nubis ,
 Quem tepefacta parit tellus , fumoque sequaci
 Assimilem , siccum calidumque exhalat in auras ,
 Spiritus insinuat. mistus quin sæpè vaporis ,
 Quando excitus aquâ superasque attractus in auras
 Surgit ; ubi aërio concrevit frigore nubes ,
 Denfatâ inclusus terræ manet halitus undâ.
 Interea spissâ nimborum indagine septus
 Paulatim coquitur , paulatim concipit ignem ;
 Dum calidum totis oppugnans viribus hostem
 Arctâque obsidione premens , circum undique frigus
 Funditur , aëria latè regione tyrannus.
 Ille autem gelidâ captivus sede teneri

Impatiens, animisque furens majoribus acrem
Hostis ad assultum (crescunt certamine vires)
Tam magis abruptis erumpere nubibus ardet,
Quàm magis objectæ cogunt latera humida nubes.

Audis, ut vario indignans cum murmure cæli
Discurrit? jamque hîc abitum, jam turbidus illic
Molitur, tentatque viam, quâ parte ruinæ
Opportuna labet nubes, rimisve fatiscat.
Et modò, ceu longis mugitibus æthera pulset;
Obtuso sonitu, raucique tenore boatûs
Volvitur, & nubis media intra claustra rotatur.
Nunc graviter lateri molis se impingit opacæ,
Et parte elisâ dirûm crepat. aridus alto
Crebrescit fragor, & rimâ fulgente relecti
Fulminis accensum testatur in axe furorem:
Ardentes crebris prorumpunt ignibus iræ.
Atque illam quoties violentior arietat æstus,
Credideris calidos cribrari desuper imbres.

Nunc oculis, si fortè audes, nunc auribus usus,
Nimbofo luctata diu cum carcere flamma,
Jam tandem victrix, cava nubis viscera rumpit.
Ceu fragilis glacies, insano dissilit ictu,
Lato vulnere hians: & quâ via facta, per auras
Sulfure fumantes immensis flexibus errans,
Flammeus ut serpens, non eluctabile fulmen
Præcipitat. rapidi sternentibus omnia flabris
Præcurrêre Noti, & majoris nuncia flammæ
Antevolant tristi vibrantia fulgura luce;
Nec vani effractâ glomerantur nube tumultus.
Visa simul ruere æthra, simul tremere undique tellus.
Heu quantæ trepidis clades mortalibus instant!

Ut globus ille, ardens nitrato pulvere moles,
Ænea Gradiui moles, quem turbine vasto
Et sævo ætherias sonitu jaculatur in auras;
Ille vel adversas acies, eductave cælo

Culmina, & objectas ictu ruit horridus arces.
 Haud aliter fulmen (nimio seu coctilis æstu,
 Oblongi in cunei formam sese ille coëgit
 Atra in nube lapis; seu tantum flammeus imber;
 Diffususque ardor nimbo se erupit hiulco)
 Dat stragem silvis, capita & scopulosa Pyrenes
 Decutit, atque ipsas latè depascitur urbes

Mira canam. tenues per corporis *alba* meatus
 Si flamma insinuet; transmissam prodere nulla
 Indicia; atque idem cæco sub funere vultus:
 Subtili consumpta intus vitalia flammâ;
 Vaginâ illæsâ liquefactus ut effluit ensis,
 Doliaque exhausto perstant integra Lyæo.
 Ast ubi *compactum* perfregit dolia fulmen,
 Nudata, en, subitæ circum vina humida crustæ
 Concrevere. accita meri de fæce vaporum
 Agmina concurrunt; suspensum obducta liquorem,
 Ceu corio indutum, stipant; qualisve rigenti
 Lympha gelu constricta, hærens; immobilis humor
 Triduo agit: mox ingentem resolutus in amnem
 Funditur. infelix, liquidum quicumque bidental
 Attigerit labris! incauto amentia potu
 Aut lethum hauritur. præsentī namque veneno
 Corrupti latices, Autumnī dulcia dona.
 Impete nec solo, nec tantum urente nocet vi
 Pestiferum fulmen. quamvis & rebus eodem
 Eripiat tactu infectis, purisque venenum
 Invehat. hinc homines virosâ fulminis aurâ
 Afflati, & nullum perpeffi corpore vulnus,
 Interdum letho volvuntur, quos neque *densus*
 Fregerit, angustove ardor terebraverit ictu
Flammens, aut rapido combufferit *igneus* æstu.
 Terror, & ærium confecit funera virus.

Qui clypeorum orbes, quæ propugnacula fulmen
 Sustineant: si quid moles pulsata resistat,
 Obistendo

Obstistendo iras & robora fulminis auget.
 Tantâ laude ferox, humiles non ille myricas
 Tundere dignatur victor, vallesque jacentes:
 Sed Libani cedros, Tarpeiaque culmina gaudet
 Dejicere, & Regum, turrita palatia, fastus.
 Nil fragiles profunt lauri de fronde coronæ;
 Non vituli æquorei circumdata corpore pellis;
 Sparsave fulmineos hyacinthis purpura jactus
 Avertère. flagrant percussæ fulmine laurus,
 Squammosæ exuviae flammâ crepitante cremantur;
 Dissiliunt hyacinthi, acrique calore liquescunt:
 Præcipuè jussâ mores animosque superbos
 Cum pœnâ insequitur vigilans in crimina fulmen.
 Hinc pavor ille reis, fulmen dum parturit æther.

At vos, ô nullo squallentia crimine corda,
 Flammæ ubi præfagus cælo fragor intonar alto;
 Quis timor exagitat? tensis Deus ipse sub alis
 Protegit, & scuti defensos orbe coronat.
 Collisi inter se nimbi, sine fulmine, vento
 Nonnunquam jactante tonant. non halitus omnis
 Nubila concutiens funesto accenditur igni.
 Contentus plerumque minis, ubi terruit Orbem,
 Solvitur in ventos, & inani detonat ictu.
 Ipsa fremens etiam concepto fulmine nubes
 Non semper miseris cladem mortalibus affert.
 Emicat in cælum nubis convexa per alta
 Sæpe ardor; vel cùm in terras devolvitur, Othryn
 Percutit aut Hæmum, aut præruptas obterit Alpes,
 Rarò homines. Cœcâ neque enim temeraria dextrâ
 Tela jacit, certo librans sed dirigît ictu
 Omnipotens, parcitque suis. Si quem tamen olim
 Fulmineâ petiit flammâ; non vindicis irâ,
 Sed jaculo clemens & Amoris sæviit igni.
 Mortales rupere moras, & corpore tacto
 Felicem rapuere animam, superisque dedere

Sedibus optandi pernices fulminis alæ.
 Fulmineo ætherias arces superare volatu
 Quis metuat? quæcunque Deus te ad fata vocarit;
 I, sequere ipse volens; & funere lætus in ipso
 Eterni. sanctum Genitoris fulmen adora.

DE VARIO POETARUM STYLO.

QUI vultus hominum varios miraris & ora,
 Naturæ solertis opus, discrimina formæ;
 Haud secus ingenii varios agnosce colores,
 Et studia, & mores, præsertim dissona Vatum
 Carmina, Naturæ seu quæ felicitis & Artis
 Ficta manu, seu quæ vano fucata decore.
 Obruar at censu, si fors ingentia Pindi
 Nomina & artifices operum memorare superbos
 Institutam: proceresque nefas confundere turbâ.
 Abnegat & iustas numeris hora invida laudes.
 Nec verò invadam partes censoris acerbas,
 Aut infelices curas, vacuosque labores.
 Conscia mens, teneroque vetat frons nata pudori.
 Sed tamén Augusti postquam lepor aureus ævo,
 Heu brevis, enituit; quoties invita Minerva
 Audaces animos, studiis cœlestibus impar
 Vulgus adorantum, sensit; laurumque petentes
 Grandibus elusit votis aversus Apollo!
 Ventosas aliis bullas, spumasque sonantes
 Ingenii tumor & fecunda licentia voluit;
 Ceratasve quatit pennas, nisuque caduco
 Aërias tentat malefana audacia nubes.
 Serpere humi pars visa, & anhelu languet hiatu
 Ægra, elumbis, iners, condensoque oblita cœno:
 Vel fragili splendet vitro, vel ferrea stridet.
 Prædam alii Parnasso abigunt, & non-sua passim
 Ostentant decora; & vario segmenta colore
 Intexunt, furtis opulenti ac fraude superbi.

SILVARUM LIBER V.

467

Pars & barbaricâ in gazâ, fulvoque orichalco
Mirantur sese, ac veteres sprevere Camœnas.

Longè aliter, casti gravitas cui prisca decôris,
Non exultim auras captans FLECHIERIA Musa,
Aut incerta viæ, & tremulo pede lubrica lapsans;
Composito exuperat Parnassia culmina gressu.
Iridis haud fluxos vestis mentita colores;
Nec gemmis temere, ac peregrinis compra metallis,
Luxu indigesto, aut ludo se jactat inani
Bracteolis crepitans, argutis tinnula nugis.
Circumfusa suo radiat Musa aurea Phœbo,



H. Watel'jn.

L. Cossi sculp.



SILVARUM

LIBER VI.

IN FERDINANDI PRINC.

EUCCHARISTICON LUDOVICO XIV.

Ob ipsius Regis, Reginae, Delphini

pictas imagines dono acceptas.



Ic Phœbi radios Martis fulgoribus
addit,

Regia qui Vatum Maximus arma
canit.

Reginæ augustos formæ veneratur ho-
nores,

Delphini Clariis exprimit ora modis.

Quàm bene, Apelleo spectatos munere, vultus

Explet Apollineâ vividus arte color!

Tergemina aspectu FERNANDUM pascit Imago,

Sidereæque auget lumine signa Domûs.
 Principis exscripta ingenio cultuque superbit,
 Nec dubiis gaudî visa micare notis.
 Quas referat, Vatum Princeps, tibi Gallia grates,
 Nobilior versu Gallia facta tuo?
 Martia pacatæ veniunt in fœdera Musæ,
 Et partes Pietas jungit, & alma Fides.
 Splendidus officiis certas cum Principe Princeps:
 Mutuus alterno pignore crescit Amor.
 Milite bella juvas, ornas Pæane triumphos,
 Et tua Regali laurea fronte nitet:
 Sublimi per te LODOIX trans æthera fertur
 Laude, triumphales exuperante rotas.
 Nulla tuos atas cantus aut ora filebit:
 Gratibus & cedunt Regia Dona tuis.

SAMSON EXCOECATUS.

VERANE te vigilem, Samson, ludibria versant,
 An tenebris miscet somnia vana sopor?
 Quò mala fraus captum, quò vis inopina redegit?
 Aut in me tantum cui licuisse potest?
 O decus amissum capitis, vetitæque secari
 Gratia purpureæ jam violata comæ!
 Roboris invicti fatalia pignora crines,
 Eheu, non ultra jam Nasaræus alo.
 Ah, sacrum Superis intacto vertice florem
 Impia furtivo forfice dextra tulit.
 Væ, Dalile, infamis Dalile! sic perfida captas,
 Insidias somnis tendere vafra meis?
 Hoc mihi blanditiæ, mellitaque verba parabant?
 Hoc teneri amplexus? hoc bonus ille sopor?
 Exceptum genibus dum me scelerata foveres,
 Divideres fusam pectine cæsariem;
 Æternumque instans, vitæque ad tædia adurgens,
 G g in

Perdendi eliceres quæ via certa mei ;
Jurati fallax titulos obtrudere amoris ,
Pejor & armato sævior hoste lupa !
Quem non mille viri quondam cepere revinctum ,
Fœmineâ potui liber ab arte capi !
Et dudum infelix , Thamnathæ discere casu
Debueram , ingenium quid muliebri ferat.
Illecebras lacrymis , precibus miscere querelas
Callida , quippe datam fregerat illa fidem.
At bene , quod crebrâ quærentem fraude fefelli !
Præcipitem quò me lubricus egit Amor !
Ut dixi , ut perii ! ut perdita robora sensi
Evigilans , tonsæ nescius antè comæ !
Tunc animosi hostes , averso Numine capti
Ferrea in effetas vincla dedere manus.
Sed quid ego Dalilam incuso ? meme ipse , meumque ,
Ut prodi possem , prodideram antè caput.
Quo Dalilæ sacrum capitis crinale retexi ,
Plusquam hoc cæcus ego tempore , cæcus eram.
Illa meos nervis constrinxerat antè lacertos ;
Vinxerat illa novis funibus antè manus.
Fixerat & clavo jam septem implexa capillis
Licia , qui caperet , proximus hostis erat.
Sed neque tentatæ per terna pericula vires
Credere me turpi dedocuere lupæ.
Luce prius mentem fœdi spoliastis amores ,
Ut mediam nimbi surripuêre diem.
Mox odia in vultum furiatis hostica dextris ,
Luce cavos orbant depopulata sinus.
Ille ego *Sol* populi Samson , nunc lumine cassus
Monstror in hostili , ceu fera capta , solo.
Ille Philistææ terror , jam nobile gentis
Ludibrium ; patriæ nunc pudor , antè decus.
Improba me vexant petulantis sibila vulgi ;
Sæva cachinnati gaudia in ore natant.

Atque utinam crude in me mihi cernere vultus
Detur, & auditis ora proterva jocis.
Triste genus voti ! sedenim nec cernere possum,
Nec miser ipse meis illacrymare malis.
Ecce puer gressum regit; & palmaria nuper
Brachia, vincolorum pondere fracta cadunt.
His olim palmis, veluti mollissimus agnus,
Membra dedit torvus dilaceranda leo?
Hæne tulere manus convulsas cardine valvas,
Non grave, in ærii culmina montis, onus?
Quid validos juvit funes abrumpere? palmas
Vincta premunt, solvi nescia, vincta pedes.
Non potui infestis animam hanc effundere telis,
Cum peterent nostrum spicula mille caput?
In probra servatus, discrimina bellica vici,
Victis ut ludos altera scena daret.
Festa, miser, præbes spectacula & orgia turbis,
Quas luctu solitus, quas onerare probro.
Quin etiam (proh triste nefas! proh carcere majus
Dedecus, & cæco fœdus ore malum!)
Ecce molam, ceu vile pecus, versare coactum
Tundit ab hostili plurima plaga manu.
O Deus, ô miserum vindex ultorque nocentum,
Redde Philistæis præmia digna, precor.
Sanctus ego jamtum sterili tibi Matris ab alvo:
Parce profanata jam memor esse comæ.
Verte iras aliò, si te tua gloria tangit,
Omnipotens, si te barbara probra movent.
Namque tibi pariter, ceu victo, perfidus hostis,
Perfidus insultat, Numen inane ratus.
Audio, & infano strepitu plausuque triumphant;
Victor & accinitur per sua sana Dagon.
Da scelus ulcisci (Samsonem sentiat hostis)
Inque breves usus robora redde, Pater.

Dulce Philistæum mihi sit traxisse ruinam,
Obtritura meum sit licet illa caput.

DAVIDIS LACRYMÆ.

AGNOSCO, fateorque nefas. ah, parce fatenti,
O Deus, ô misero spesque metusque reo!
Peccavi, Omnipotens Genitor; labemque pudoris
Atrox innocuo culpa cruore gravat.
Tu gemini testis iudexque & criminis ultor:
Nec fuga, nec latebra est ulla premente Deo.
Hei mihi, quæ cæcam rapuit vefania mentem!
Antiquæ cessit quò pietatis honos?
Quò nivei mores, & casti gaudia cordis?
Pax animi, & cælo blanda favente quies?
Eheu, funestâ perierunt omnia culpâ:
Pectoraque immanis conscia tortor habet.
Quid sævi fauces prodest fregisse leonis,
Ac rabidæ pecudes eripuisse gulæ?
Guttura quid nudis urso elisisse lacertis?
Deterioris ego præda pudenda feræ.
Et potui fundâ Goliathum sternere: miles
Pastori, puero succubuitque Gigas.
Fœmina probroso Regem devicit amore;
Et cecidi, viso perditus hoste, miser.
Quàm meliùs vasti cecidissem mole Gigantis
Obrutus; & purus tinxerit arva cruor!
O utinam canibus præda alitibusque jacerem,
Sparisset tumidas nec levis aura minas!
Tartareo cessi de me spolia ampla Tyranno,
Quem citharâ quondam pellere ludus erat.
Depulsum toties alieno à corpore monstrum,
Væ, væ, animo excepi proditor ipse meo.
Nam quid tale Saül, folio dejectus ab alto,
Admisit, diris obrutus ille malis?

Obscœnis populum exemplis peccare sequacem
Edocui Princeps. Dux ego flagitii.
Flagitio adjeci facinus; feralis & umbra
Ante oculos volitat nocte dieque meos.
Hæccine munifico reddis Dominoque Patrique,
Ah, tantis referens crimina tanta bonis?
Vilibus abducto canlis regalia tecta,
Proque pedô manibus sceptrâ gerenda dedit.
Et dedit erepto sævis gaudere periclis,
Conjugiisque auxit progenieque domum.
Heu nimium funesta mihi, funesta Sioni
Otia, queis noxæ prima reclusa via est!
Quin bello, mollis; quin castris, degener, ibas,
Urebantque tuas ferrea tela manus?
Dum tibi plebs pugnat, dum Rabbæ obfessa Joabus
Mœnia, & Ammonis robora dura quatit;
Dum tibi, castrensem invictus perferre laborem,
Infelix Urias (ô dolor!) arma ciet:
Ignavum, & cedrinæ residem penetralibus aulae,
Fortè vago incautum lumine cepit Amor.
Errones oculi, subiit queis pestifer ignis,
Tartareo erumpens fordida flamma rogo;
Ite oculi, lacrymis vigiles consumite noctes;
Strata mihi lacrymis irrequieta natent.
Me Cilicum textus, me pellibus hirta cameli
(Splendida cede procul purpura) seta decet.
Excidat indigno capiti violata corona;
Impuras fugiant sceptrâ verenda manus.
Innocuos angusta decent insignia Reges:
Nequitiae servus regia sceptrâ feram?
Nunc cinis aspergat crinem, cinis imbuat escas;
Delicias turpes vindicet atra cinis.
Pocula miscendo lacrymis turbentur amaris,
Mœstaque sanguineas expiet unda notas.
Atterat ossa lapis, cinerique instrata favilla

Puniat infamem debita pœna torum.
 Et jampridem arces, inferno carcere dignus,
 Incesto Solymas : exprobrat aula nefas.
 Ibo, & telluri infossus mea funera plangam :
 Luctifonis rumpens vocibus antra, gemam.
 Afflicti miserere, Deus, miserere clientis :
 Ah, sceleris clemens elue probra mei.
 Hostia lustrales si cœsa placeret ad aras;
 Ante aras pecoris millia cœsa darem.
 Verùm accepta tibi, sacro mens icta dolore;
 Cordis & obtriti victima sola litat.

DEO INFANTI.

TANDEM, Puppule concupite, tandem
 Venisti, patrio evolans Olympo
 Vilem sub tetrici specûs latebram,
 Hospes Bethlemix tenelle rupis !
 Ah, immitis Hiems, & insolentis
 Qui flatu, Borea, specum pererras,
 Parce, parce, precor, meo Puella.
 En, ut dulcibus effluunt ocellis
 Gemmantes lacrymæ, & genis inundant !
 Audin', ut querulo dat ore tristem
 Vagitum gemitumque mollis Infans,
 Ille, quo tremuit polus Tonante ?
 Eia, nectare candido tumentes
 Blanda prome Parens Deo mamillas.
 Flentem, ô, virginex admove papillæ,
 Pignus dulce Deum fovens alumnum,
 Risum, lætitiâ, beatitatem
 Ardentum Geniûmque Mentiumque,
 Agni quas epulæ piâ laceffunt,
 Sponsas Numinis, esuritione.
 Quo te munere ditat ipse, miro
 Imple lacte Deum Parens alumnum.

Mille delicias Tuo recanta,
Mille blanditias Tuo repensa.
Amplexus avidos, & arctiores,
Quàm vitis sociam ambientis ulmum,
Quàm dilectam ederaë implicantis ornum,
Necte, necte tuo Parens amori:
Et fragrantibus osculis pudica
Audax junge Deo labella puppo.
Tòtum lacteolumque melleumque
Infantem gremio Deum remulce.
Hujus te simul, hunc tui vicissim
Æterno satia flagrantem amore.

At vos, queis Orientis ora paret,
Huc Panchæa citi Deo puello
Ferte tura, Magi: superba egeno
Regum affundite Principi metalla.
Mortali inferias, amara suavi
Prælibet lacrymas odore myrrha.

Tum simplex pecus halitum tepentem
Hinc bos officiosus, hinc tepentem
Auratum pecus oris afflet auram
Certatim, Dominique delicato
Cruda frigora corpori repellant.
Auras carmine mulceant volantes
Circumquaque Chori: micantis aula
Affusi Proceres novum recurvo
Regem poplite supplices adorent.

Et jam purpurei tholis Olympi
Defluxere, clientibusque flammis
Incunabula Numinis coronant
Claris sidera circumacta gyris.
Exortum in tenebris jubar salutant,
Stellâ progenito minore Soli
Vectigalibus advoluta turmis.
Curâ pervigili gregem silentes

Servantum propè noctis inter umbras
 Ecce rustica turba, fulgurantis
 Verbis Alitis evocata, parvi
 Natalem volat ad casam Tonantis.

Proh, quantas oculis faces Puellus,
 Quot vibrat radios! quot eleganti
 Vultu fiderei nitent lepores!

Urit me Pueri decor: *MARIAM*,
 Iosephum, Superos, Magosque Reges,
 Agrestesque viros, & ipsa Puppis
 Saxa Bethlemii perurit antri.

Vos aram mihi turibus calentem,
 O quos tangit amor mei Puelli,
 Ligustrisque, rosisque, liliisque
 Stratam ponite. Sed moramur aram?
 Jam Præsepe sacrum: Deusque præsens,
 Quam terris bonus intulit cremandis
 Decerptam ætheriæ foco Sionis,
 Flammam subjicit: *Ignis*, ipse, corda
Consumens amat immolata pasci.

JESU CRUCIFIXO.

O Matris dolor! ô Patris voluptas!
 O terræ opprobrium, decusque cæli!
 Quem Regem superæ ambiunt cohortes,
 Dira carnificum opprimit caterva!
 Nube qui super, aureaque pictam
 Luce splendidus insidet curulim;
 Pudore obrutus, obrutus dolore,
 Infami cruce fixus ecce pendet!

Heu sputa, heu colaphi! quid illa Regis
 Fœdè fiderei notastis ora?

Heu flagra, heu baculi! quid illa fœdè
 Almi corpora conscidistis Agni?

Ah spinæ! quianam ferâ tremendum

Sepſiſtis Domini caput coronâ?

Ah clavi ! quianam orbis architectas
Plantâ cum geminâ manus forastiſ ?

Cur, ô ſpongia peſtilens aceti,
Felliſ pocula ! cur ſiti æſtuantem
Linguam, & mellea labra diluiſtiſ ?

Cur, ô ferrea, cor pium cruentas
Jam ſancti jaculiſ amoris ictum,
Extremi ſitiens cruoriſ haſta ?

Haſta ferrea, fellei liquoreſ,
Cum claviſ tribuli, flagella, ſuſteſ,
Et ſputa & colaphi, dolorum acervuſ,
Myrrhæ faſcicuſ, Crucis ſupelleſ !

Infelix Deicidii theatrum,
Mons ô Golgotha, Gelboæ cruenti
Sæviſ diriùſ execrande ſaxiſ !

Cæleſtiſ grave pulpitum Magiſtri,
Crux, ô, certiuſ arduam ſuperbâ
Virtutem cathedrâ docenſ Lycei !

Sacri maxime Pontifex Amoriſ,
Chriſte, victima barbari Furoriſ,
Quiſ te, quiſ popa cruduſ immolavit ?

Meum hoc illud opuſ, tuumque, J E S U.
Sic te, ſic Amor & Furor biformi,
Heu, fœdè lacerum immolavit arâ.

Noſter cauſa tui Furor doloriſ,
Noſtri pœna tuuſ dolor Furoriſ:
Tanti dux & Amor tuuſ laboriſ.

Quem, J E S U, calicem ebibiſſe gaudenſ,
Noſtrorum ſclerum hæc amara fœx eſt.
Noſtræ victima tu, Deuſ, ſalutiſ.

GLORIÆ CURRUS

Amico post Lupaream editionem commissus.

CURRUM, quo vehitur recens Triumphus,
 Ah, ne Gloria fors suum negarit,
 Axe durius æreo strepentem,
 Cælo insignia facta deterentem,
 Festinô nimum, parum eleganti!
 At si candidus obvium labori
 Præbes, Hippolyte, arduo favorem;
 Tum, quo devehitur recens Triumphus,
 Currum Gloria fors suum probarit,
 Læto gratius impetu rotatum,
 Versu mollius aureo sonantem,
 Cælo splendida facta subvehentem.

LUSUS AD AVICULAS.

HUc picti volucrum greges,
 Argutæ, teneræ, vagæ
 Huc Musæ nemorum, ad chelyn,
 Vatis cura volate.

Hic vivæ saliant aquæ:
 Argenti nitidus liquor
 Obliquâ trepidat fugâ
 Inter florea prata.

Quæ fonti superimminet
 Dens obsita frondibus,
 Præbet frigus amabile
 Vernâ populus umbrâ.

Ramos, en, teretes quatit,
 Pandens hospita brachia;
 Invitatque loquacibus
 Aurâ flante susurris.

Hic suavi modulamine,

Respondentibus invicem

Exercete diem choris,

Donec guttura rumpant.

Fauces cùm sitis ufferit,

Ad fontis viridem citæ

Oram mittite corpora

Pronis incita pennis.

Læti gramine marginis,

Aut quæ plurima candicant

Lymphas saxa morantia

Dulci non sine questu;

Tanquam ponticulis super

Stantes, ducite pocula

Puri lubrica nectaris,

Propinante Napæâ.

Sin & ludere juverit;

Libatos, age, rivulos

Alâ stringite mobili,

Exultimque micate.

Mox plausu lepidè dato,

Ad solis tepidi jubar

Explicabitis aureum

Plumæ vellus apricæ.

Tum pes unguiculis comam,

Ceu pecten radiis aret:

Componat faciles sinus

Rostri morsus acuti.

Nec vos pulveris ignei

Cautas sollicitet pavor,

Ne mors plumbea missili

Vitam glande refigat.

Arcto nec mala servitus

Alas carcere comprimens,

Virgato querimonias

Eliquabit in antro.

Nullæ hîc insidiæ : procûl
 Fraudes aucupis improbi,
 Viscatæque tenacibus
 Virgæ fordibus absunt.

Huc symphoniacum genus,
 Ruris deliciæ leves,
 Quò vos ludicra provocant
 Vatis plectra, volate.



FERDINANDUS EVERGETES.

H EU nimium falsi Vates, & inania rerum
 Auguria ! heu fati mendax ridentis imago !
 Hæccine, quæ toties cantavimus aurea secla ?
 En, quò deliciæ, quò pulchræ pacis honores
 Cesserunt ; quò laudis amor, quò digna Camœnis
 Præmia, & Aonii revirescens gratia collis !
 Jam ferri solido rediere incocta metallo,
 Tristia, sæva, cruenta, immanis secla Gradivi.
 Hinc durus conspirat Iber, hinc Belgica tellus,
 Asperaque ingenti fervet Germania bello.

Talibus indignans tacito sub corde fremebat
 Musæus ; spes ipse suas, atque irrita vota,
 Et male præfagas damnabat carmina sortes.
 Cum subito, niveæ formoso nubis amictu
 Splendida, purpureoque micans fulgore per auras
 Adstitit Euphrosyne. roseo tum blanda renidens
 Ore, sacram dextrâ effigiem flavo extulit auro,
 Lauream quam circum viridante amplexa coronâ.
 Atque his turbato solatia vocibus offert.

Parce agitare graves frustra, Musæe, querelas ;
 Haud Pindo satis æqua, immiti condita ferro,
 Invidiâque onerans & amaris tempora probris.
 At non Phœbei cecidit spes undique regni,
 Nec decus obtritum, aut eversæ funditus Artes.
 Suspice, & hos venerans propera cognoscere vultus,
 Unde jubar toto diffusum Helicone reluxit.
 Inclytus Heroum sanguis, virtute sed altum
 Exuperans genus & patrii fastigia montis,
 Furstenbergiades, geminoque augustus honore ;
 Unâ idem Princepsque virum Divumque Minister
 Regnat, & ingenuas dat splendida jura per artes.
 Quis magnæ curas mentis, pulchrosque labores

Laudibus aut numeris æquet; tot grandia facta;
 Et vario partos operum molimine fructus,
 Seu quos Relligio, seu quos res civica legit?
 Quot senio labefacta, hosti disjecta profano
 Erexit delubra, situque informia Præsul
 Ornat, in antiquum revocans jam templa nitorem!
 Florentesque augere novâ bene prodigus aras
 Insistit specie, marmorque aurumque superbos
 Congerit in cultus: & pingues creber alendis
 Agminibus gaudet Mystarum addicere fundos.
 Quippè suis muros & propugnacula Princeps
 Urbibus instaurans, ac moles molibus addens;
 Idem & sacratas, munimen certius, arces
 Attollit, Stygioque adversas instruit Orco.

Ingentes animos, heroum pectore robur
 Gestat; & obnixus vitiis popularibus acer
 Dedecora exscindit penitus, quacunq; biformem
 Porrigit imperii, & justis vim legibus armat.
 Præsertim, ne fortè duces contagia in ipsos
 Serpant fœda gregis, lustratque probatque severo
 Invigilans sensu, plebi quos rite Magistros
 Præficiat, nullaque aspersos labe ministros
 Sacrorum, ætheriæ dignos adstare cohorti.
 Ah, misero longè abductas errore bidentes,
 Et jam caularum immemores, jam noxia pastas
 Gramina, quàm curâ Pastor sectatur amicâ!
 Tristibus implicitas dumis, avidisque luporum
 Faucibus eripiens, antiqua in septa reponit.
 Voce potens dextrâque movet torpentia corda
 FERNANDUS. quid non Pietas operosaque Virtus
 Possit, & ingenii telis accincta coruscis,
 Nobilitate opibusque vigens, ac Principe dignis
 Moribus; exemplisque urgens blandissima jussa?
 Ille quidem adversis obistere viribus acer;
 Præsulis & quacunq; sacros invadat honores,

Principis aut carpat civilia jura potestas ;
Ille animis contra tendens , suprema tuetur
Munera : sed plebem indulgens descendit ad inam ,
Et patrio amplexus miseros solatur amore.

Quin & nobilibus tenuis fortuna saluti
Autore hoc verti didicit : variasque per artes
Munifici tacito pietas se lata recessu
Assidua exercens , famæ subtrahit ; & uno
Teste Deo contenta , Orbi spectanda , laborat.
Eheu sævities & perfida cura parentum !
Tartareum instillant natis , mala dogmata , virus ;
Et quam non genuere , immortalemque nefandâ
Fraude animam stimulisque necant fu talibus icti.
Subvenit auxilio , & nimium fecunda malorum
Semina FERNANDUS blandis elidere curis
Sollicitus ; dias Erebæis artibus artes
Objectat , Superûm interpres : pretioque receptas
Ne pereant cœno immersæ , generosus Olympo
Institor apponit vertitque in sidera gemmas.
Ut , malè dotatas , largo intra septa puellas
Relligiosa locat sumptu ; dirosque penates
Evasisse juvat , thalamis jam rite paratas
Virgineis , sponsumque Deum quærentia corda !
Disimulans & Præsul opem consuetus honestâ
Ferre ministerii specie ; quos legit Ephebos ,
Nativâ exutos Lutheri labe refingit
Aligerûm in faciem , cæloque educere gaudet.
Tot fœdè scissa in partes sensusque profanos ;
O tibi sacrorum tales , Germania , Reges ,
Sic animis apti fata in meliora vocandis
Accrescant , virtute pares atque arte Magistri !
Jam redeat primæva Fides , lateque piatis
Atra lues terris concesserit : una per omnes
Relligio populos consortibus imperet aris.
Certè non studiis tantum discordibus acti ,

Sed templis etiam adversis castrisque feroces,
 Hunc tamen, hunc animis unum concordibus omnes
 Mirati coluere; & queis suprema potestas,
 Nil capiti augusto dubitant summittere fasces.
 Atque ubi, furda nimis Themidi, Mars impius arma
 Increpuit; vastoque agitans hiberna tumultu,
 Civilem hostili miscebat turbine motum:
 Indoluit Pater Ausonius; testatus acerba
 Cæsar & ipse sibi, Paderam quæ crimina Martis
 Oppressere. simul celebri Germania cœtu
 Tota favet; regna inventas per Bruçtera clades
 Sarciri edicens, merito conspirat honore.
 Quid, quod amicitiam certatim & fœdera captant
 FERNANDI, & Pacis fidum optavere Sequestrem
 Teutoniadæ Proceres? densis pallatia fervent
 Neuhusia, ex omni legatis parte, Ministris;
 Qui Dominis responsa, velut commune rogantes
 Gentibus oraculum, & gravibus certissima causis
 Arbitria exposcant placitasque à Principe leges.
 Tanta viri fama, & justæ sapientia mentis!

Imperii jura, & varios ab origine mores;
 Annales populorum, ac Regum ex ordine facta;
 Ceu, testis seclorum, oculis perlegerit Orbem;
 Quidquid & immensus studiorum circulus ambit,
 Omnia divinæ construxit mentis acervo.
 Præsertim emissas adytis cæloque profectas
 Doctrinas animo Præsul concepit, honesti
 Multiplicem formam, factisque ingentibus explet.
 Pontificum decreta, sacri consulta Senatûs,
 Pectore fixa gerit, varioque oracula cœtu
 Edita; concitos dubiis cùm publica rebus
 Junxit causa Patres, cælestis & impulit aura,
 Composuit sanctis purgatum legibus Orbem.
 Nam quid ego æternas, Vatis redimicula, lauros?
 Lumina quid referam florentibus illita chartis,

Gestarumque notas, Monumenta insignia, rerum?

Jam Paderæ vastâ quantum ditione locorum

Signavit bellique memor pacisque vetustas,

Romulidûm & palmis celebres & cladibus oras;

Sed magè Franciadûm spisso loca nota labore,

Justitiaque armisque, & queis angusta trophæis

Stat Pietas, fructusque suos Victoria sacrat;

Singula FERNANDUS multo cumulavit honore,

Largus inaurati specioso marmoris usu.

Splendore ac pretio sedenim præstantia, vincent

Marmoreos etiam durando carmina cippos.

Illa quidem jam sæpe tibi pulcherrima dona

Pignoraque autoris tanti celebrata; nec unquam

Sat tibi, sat gratis usquam celebranda Camœnis.

Nunc demum tanto felices Principe Musæ

Neuhusiam gaudent Parnassi rupibus auiam

Mutasse, & lympa meliorem Aganippide Fontem,

Hunc illum Magno quondam pacem inter & arma

Dilectum Carolo Paderam, longoque secutis

Ordine Cæsaribus. latici nunc insula sacro

FERNANDEA decus supremumque addit honorem.

Divitis & venæ sitiens; centumque sonantes

In numerum scatebras inhians, haustuque beato

Circumfusa viget Vatum floretque corona.

Torckius imprimis, qui sanguine clarus ab alto

Relligionem opibus sumptuque adnexus amico

Rite fovet. scit Minda pios, quos ille labores

Instruit & cultus, victoque Errore triumphos.

Et queis Rotgeriæ cælestia carmina terris

Non audita. lyræ, FERNANDI proxima plectro?

Ut socialis amor, niveis & moribus ambo,

Dulcibus. & studiis Romæ conjunxit, & oris

Jam Padebornæis æterno fœdere necit.

Nec generis tantum antiqui splendore superbo

(Ex quo Teutonibus Princeps, rerumque Magister,

Hh iij

V. lib. r. He-
reic.

Ordinis armigeri quondam sceptrā inclyta gessit)
 Quantum animo, quantum virtute insignis & arte
 FURSTENBERGIADEN retulit, morumque nitore
 Egregio, doctæ lux Plettenbergius Aulae.
 Castaliæ assertor laudis, vindexque, sub astra
 Extulit indigno violatum crimine nomen,
 Sanctum, augustum, ingens Vatum & venerabile
 nomen.

Omnigenas Proceres, nec lauro simplice frontem
 Evinctos memorat, Regesque Ducesque, Poetas:
 Quos populi coluere Patres; tot conscia Divis
 Pectora, tot puro lustratas aethere mentes
 Agglomerat, seriem immensam, spectataque priscis
 Sidera, postremis & adhuc fulgentia seclis,
 Urbanosque & Alexandros, quos ille Quirinæ
 Majestatis apex soliumque admovit Olympo.
 Sic Heroum acies monstra in deformia pulchro
 Dirigit eloquio, densis ubi cincta coronis
 FURSTENBERGIACI producit carmina Phœbi
 Magnanimus scriptor. quid, quæ facunda laboris
 Historici monumenta parat, gentique perennem
 Famam Hildeshemiæ? Francis & gloria crescet.

Ille etiam dulces haud ultimus inter amicos
 Principis, eximiosque aulae Paderensis honores,
 Schatenius, quo Teutonidum non certior alter
 Eoas agitat linguas, lateque patentes
 Historiæ vasto conclusit pectore tractus.
 Quem dubiâ certans Pietas Doctrinaque palmâ
 Vindicat; & tenuis quærentem arcana latebræ
 Ambit ipse favor, spectandumque intulit aulae.
 Illum adeo vitæ ascivit comitemque ducemque
 Osnabrugensis, Bavaroque à stemmate Præsul
 Romanoque micans ostro. Mimigardius exin
 Antistes, castris pariter spectatus & aris,
 Suscepitque virum; carumque & nobile munus

FERNANDO, vinci demum vi passus amicâ,
Tradidit instanti, ac studiis in aperta vocanti
Hospitia, & grati consortia docta laboris.

Hic valido excudit splendentia tela metallo
Schatenius, Carolo queis posthuma bella revincat:
Ter-Magno Carolo, qui conjurata, superbis
Verior Aufonidis Germanicus, arma refregit
Saxonix, jussitque feram mitescere gentem.
Nunc alius movet arma furor, pugna altera surgit.
Signifer Augustum cœcis Nifanius ausis
Appetit (quis enim super errorisve dolive,
Luthero præeunte, pudor?) ceu sacra perosum,
Vestphalicis quæ rite plagis fundavit, & urbes
Mitratis latè Patribus gentesque subegit.
Nempe Quirinalis Carolo jura illa Tiaræ
Agnita quis credat? vanum dediscite morem,
O populi. fœdæ tenebras atque horrida noctis
Monstra, situmque sagax informem dispulit autor.
Quamvis Alpinas Heros transcenderit arces,
Pontificum in partes veniens, sævoque tyranno
Vexatum eripiens Hadrianum, alnoque Leonem
Restituens solio, ac patrio veneratus honore;
Maximus & quanquam templa ad Romana Sacerdos
Cæsaream imposuit Franco sanxitque coronam,
Imperiique auxit titulis Regalia sceptrâ:
Nil tanto fuerit, Latio cum Præsule, Regi;
Tantarum series numeretur fabula rerum.

Ah Pietas! ah casta Fides! sic omnia vertit
Infelix Novitas, nimiumque ingrata supremi
Posteritas meritis Augusti, & conscius Error!
Haud impune tamen: chartas nec passus ovantes
Nifani volitare, leves sine vindicæ nugas;
Sed capiti temere aspersam labem ecce verendo
Strenuus abstergit, scriptisque ultricibus instat
Cæsareæ laudis & Religionis avitæ

Defensor, fraudesque & inanes discutit umbras.
 Mox idem fastis commenta insana refellet
 Aeternos Fidei referens Carolique triumphos;
 Seu Mimigardiæ priscis decora eruta seclis,
 Seu Padebornæ gentis, fidosque Latino
 Expolit annales cultu. FERNANDUS & amplam
 Undique materiem cura sumptuque benignus
 Suggestit, & libros monumentis grandibus aptat.
 Nec Vaticano parcit deducere ab alto,
 Et quocunque latent ævi documenta recessu,
 Vestphalicæ segetem historiæ, doctique laboris.

Cetera Neuhusiæ præstantia membra cohortis
 Si numerare vacet, propriasque evolvere laudes!
 Teutonicæ flos gentis, & Aulica Principe turma
 Digna suo, decori certatim incumbere gaudent;
 Ingenuas artes concordi mente frequentant.
 Hi res ætherias, divina humanaque jura;
 Pæonias illi curas, Coique Magistri
 Scita agitant: aliis alii, quæ cuique facultas,
 Exercent studiis animos. juvat æmulus ardor
 Consortes operum, ac Domino generosa placendi
 Ambitio, crebrisque ornandæ insignibus aulæ.

Nec sua FERNANDO tantum servire caterva,
 (Vincit Alifonis castrum quæ Palladis arcem)
 Proxima nec tantum regio, circumque superba
 Gestit, & Aonio certat Germania cultu.
 Par agit externos stimulis amor. undique docti
 Confluere in Paderam fluctus; totoque clientum
 Scriptorum subit orbe chorus, magnique Patroni
 In laudes grateque, operum lectissimus ordo.
 Pompa sequax, vario glomeratur carmine donum,
 Nobile seu meritâ FERNANDI forte tributum.
 Hinc petere auspiciū studiis placitoque labori
 Bisgemina Hesperia, & Padulo submittere sese
 Electrô Padus & liquidô Tagus inclytus aurô.

Huc Belgæ, huc Dani Vates; huc plurima Franci
Nominis accurrit, servatque Camœna tenorem.

Longinquum munivit iter Verjusius, & qui
Regia Teutonicas solers mandata per aulas
Summorum curat Procerum; Regisque Ministro
Qui comes adjunctus Fratri, nec muneris exors,
Principis it jussu, Phœbo dilectus uterque,
Ac FERNANDÆ succensus laudis amore.

Plura loquar: Fratrum sedenim quid gratia possit;
Quæ decora amborum, tantisque exercita rebus
Ingenia, & pulchras virtus spectata per artes;
Privatim expertus, crebrique haud immemor usquam
Officii, jam læta frequens ad plectra vocasti.
Quid meritis dignum referas? nec-opinus apertos
Ultro aditus summam debes Heliconis in arcem,
Sanctaque FERNANDI penetralia, Principe felix
Magnifico, absentem donis jungente Poëtam.
Et largæ quàm blanda manûs, quàm splendida in
omnem

Aoniæ effundunt sese commercia partem!
Aurea Neuhusio jam spargi tessera, claræ
Pignus amicitiae, cœpit, regale numisma.
Jamque adeo præsume oculis, quod Sequana reddet
Missile, & aggestos pretiis cumulabit honores.

Hæc ubi dicta dedit; penitus se nube reductâ
Euprosyne involvens, venerandum & amabile rursus
Elatum dextrâ simulacrum objecit, & auri
Circùm auras fulvo radiantes lumine pinxit.
Musæus tacito versans illustria corde
Munera FERNANDI, lunato à littore soluit,
Burdigalæ aërias turres portusque bicornes
Respiciens longè, ac pleno delabitur æstu.
Dumque secat remis tumidum velisque Garumnâ,
Quique Garumnæ ingens socio confunditur alveo,
Aurigenam; mox & serpentem Pictava Clenum

Arva inter, Tuxonumque inter felicia culta
Stagnantem Ligerim, tot amœnis flumina campis
Collustrans, alios animo complectitur amnes.
Jam pulchra Amisii, Paderæ jam pulchra fluentia,
Ambraque Luppiaque, & nemorosi forma Visurgis
Sponte suâ occurrunt: & quâ via cunque nitentes
Ostendit rivos; vitrei læto ubere fontes
Iburgi, Smechtæ, Paduli, notissima menti
Gaudia succedunt; tua per monumenta fluentes
Dulciùs, ô Princeps, operoso marmore cincti,
Constratisque viis, & opaco frigore fontes.
Auratisque incisa notis tua carmina, cantu
Suavius adspirant volucrum nemorumque susurro.

Denique Parisias ubi contigit advena fedes;
Non illum egregii numerofo fornice pontes,
Ænea signa super, bifido vel gurgite magnus
Sequana, & irrigui sinuoso flumine tractus
Permulcent, avidoque aspectus corde morantur.
Non urbis speciem immensam, prætorique alta
Musæus, contracti inhiat miracula mundi.
Obvia regifci decoris spectacula passim
Alliciant; FERNANDO animos defixit in uno;
Unica FERNANDI ante oculos versatur imago.

FINIS.

*Nonnulla , quæ variis sparsa schedis intercide-
derant festinanti , commodum in has vacantes
paginas conjici posse visum est , additamenta
Dialogi de Albo & Nigro Colore.*

Pagina 395. versu 7. &c.

Feta dolis. hinc illa Fides , quæ ludere ruptis
Punica fœderibus gaudet ; perjuriaque inter ,
Effera barbaries Libycis cognata cerasiis ,
Regulus immani qualem perpeffus ab hoste.
At formosa virum &c.

Pag. 396. post versum 5. hæc adde.

Pythagoræ in gremium placido sese alba volatu
Demittens aquila , & superum testata favorem ,
Junxit amica sacræ cælo commercia mentis.
An non cœruleas &c.

Post versum 19. ead. pag.

Oscine quid corvo , Phœbi dum fertur ab ortu ,
Lætius auspiciis ? clarum & mirabile corvus
Prodigium , officiis quantas civilibus olim
Delicias Romæ fecit ! cùm insistere rostra
Matutinus amans , hinc multam rite salutem
Dicere Cæsaribus primùm gestiret , & omni
Mox populo. postquam crudelis crimine Parcæ
Publica vox cecidit , corvo ingemuere diserto ,
Sollenni elatum pompâ luxere Quirites.
Indecores , ubi membra fame jam victa fenescunt ,
Degenereſve aquilas ignavâ albescere plumâ ,
(Quas simul ac timidos corvus profligat olores ;)
Prævalidâ fuscas specie , curâque suorum
Novimus egregias , teneros educere ferus
Unicè amant , dignosque Jovi finxisse ministros.
Leucothean narras ? lymphatam scilicet Ino ,
Quæ præceps furiis mater , pejorque novercâ ,

Abreptam secum demersit in æquora prolem.
Gloria terrarum &c.

Ac subinde post 7. versum. Danaëus heros,
Ætheriosque orbes animo complexus & astra,
Sustinuisse humero fertur Maurusius Atlas.

Pag. 397. sic lege 3. vers.
Æolio erumpens, cælo maria aspera miscet,
Perque agros diro perque urbes flamine sævit
Pestifer, & populis fatum lacrymabile portat.
Nauta vocat &c.

Post 14. vers. lege.
Candet inardescens nubes; ceu ferrea massa,
Quam fornace faber domitans rapido extulit igni
Vibrantem, & sævo longè stridore minantem.
Hinc alba, & cæcam parientia fulmina mortem,
Illapsâ absumunt penitus vitalia flammâ.
Forfitan & clarus &c.

Ac septimo post versu.
Stelliferis Nox alma roris quàm dulcia volvit,
Explicat & latè picto spectacula mundo;
Interea campos, arentis & ubera terræ
Fecundi tacitâ reparans aspergine roris!
Ecquis, ubi æstivos &c.

Pag. 399. post v. 15. adde.
Nec mihi, fors nigros libeat jactare lapillos,
Gemmea defuerit vivo splendore supellex.
At tu Leucopetræ &c.

Pag. 400. post vers. 18.
Formidata reis inter subsellia curas
Ille salutifero gaudens candore lapillus
Eximit, assertor capitis. væ, calculus ater &c.

ERRATA

In Silvis Typographica sic emenda.

Pagina 359. versu 11. geminum.

Pag. 381. vers. 12. stringere.

Pag. 398. vers. 15. antra.

Pag. 406. vers. 33. frontem.

Pag. 421. vers. 25. indiga.

Pag. 424. vers. 2. trabeati.

Pag. 437. vers. 26. pars.

Pag. 438. vers. 7. concipiunt.

Pag. 441. vers. 21. hebetes.

Pag. 455. in 2. titulo, aspicio.

Pag. 470. vers. ult. cachinnanti.





86 B/125



UNIVERSIDAD DE SEVILLA



600704004









i26464287

80

F. R. 120
O. P. 120
P. O. 120

+ colorchecker classic

calibrite



mm